



Quiarinio pueyaso rupaa pa jiyaniijia
Jesucristojiniji pueyano rupaajinia

Arabela New Testament

Contents

MATEO	1
MARCO	67
LUCAS	108
JUAN	176
MIISHANO	226
ROMA	292
1 CORINTO	322
2 CORINTO	354
GÁLATA	374
ÉFESO	386
FILIPO	396
COLOSA	404
1 TESALÓNICA	410
1 TESALÓNICA	416
1 TIMOTEO	419
2 TIMOTEO	428
TITO	434
FILEMÓN	438
HEBREO	440
SANTIAGO	464
1 PEDRO	471
2 PEDRO	480
1 JUAN	485
2 JUAN	492
3 JUAN	493
JUDAS	495
NIQUISHANO	498

Quiarinio pueyaso rupaa pa jiyaniijia Jesucristojiniji pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

© 2008, Wycliffe Bible Translators, Inc. All rights reserved.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

ISBN 978-1-5313-0052-4

PDF generated on 20 Sep 2016 from source files dated 20 Sep 2016

90034700-94c6-5f48-ae9c-2383843fed68

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

MATEO NAAJIOTASANO JESUCRISTOJINIJI

Jesucristo supuetanaajiniji pohuatasano
(Lc 3.23-38)

¹Jesucristoori supuetana Abraham jiuhuacuajinio supueno quiquiaari, supuetana David niqiuohuacuajinionio. Nioori Jesucristo supuetanaa sesaca. Naa quiquiaaritiij:

²Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niqiuocua. Faresri Esrom que quiquiaari. Esromri Aram que quiquiaari. ⁴Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶Isaíri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niqiuocua.

⁷Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸Asaari Josafat que quiquiaari. Josafatri Joram que quiquiaari. Joramri Uzias que quiquiaari. ⁹Uzíasri Jotam que quiquiaari. Jotamri Acaz que quiquiaari. Acazri Ezequías que quiquiaari. ¹⁰Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹Josíasri Jeconías que quiquiaari, tapueyocuaca quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. ¹²Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano jiyaniijiarano”. ¹⁷Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano
(Lc 2.1-7)

¹⁸Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetuqueyaquishacarijia María, Maríari tariucua manajaraca quiquiaari. Pueyaso Sohanucuaajaari na manajetequiaari. ¹⁹Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niqiuara. ²⁰Naa José niishiriojosacari na cartenura juucuatej, Pueyaso seruuri nocua metaquiaari na maquenujinia. José sequeereeri:

—Supuetana jiyaniijia David niqiuohuacuajinio supueno Joseenaa, María quia camiri naajaa. Maja quia puerenu. Pueyaso Sohanucuaajaari na manajorucuaa. ²¹Maríari neyanu ranutaniya. Quiocua na sesojore “Jesu”. Sesa na pueya mijiosano tujunutaniya nojori jiuujajiniijiri. Naaratej, na sesaari quiniutianiya “Jesu”.

²²Jesu rasaanuuri naa quiquiaaritiij, tariucuaaanu pueyara Pueyaso sequesano camini-ujunia pohuatasano tohuateenura. Pueyasoori naa na pohuataniquiaari jiyanohua tarijiatej:

²³“Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaariiri na tiajinia necocuara. ²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuatijia. Jaara na raquiaari, na sesojoreeri “Jesu”.

2

Niishijiaca tiuquijiosacari conaajaacua

¹ Jesuuri rasaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquijioquiaari Jerusalén tiacajinia. Nojoriiri Jesu niquniuria tiuquijioquiaari jiya pajamaji. ² Nojori tiuquijiosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niqiquianu jiya pajamajini, canaa jiyajinia canaa quishacari. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishijiaca sequesantej, jyanohua tacaquiaariiri. Puetunu Jerusalén tiacajinia quiniaajanaari tacaquiaarijuhuaj. ⁴ Nocuaji, Herodesri Judiocuacaacuara secojona sequequiaari nocua nojori nijionura, Moisés Rootasanojiniji niishitiojanaanio. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasanutaniyani, Judiocuaca jiyaniijiarantej?

⁵ Nojoriiri na riucuaquiaari:

—Belén tiacajinia rasanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujuunia sequesano. Cuno tariucuaaanu naajiotasano cuajaari naa sequeyatej:

⁶ “Belén tiacajinia quiniaanaa, nia tiacaari maja najuhua shiitaniyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara Jiyaniijiajanaa quiniutaniya tamasa jiyaniijiacajiniji Judea jiyajinijinio. Cunoori maninia jiitianutaniya cua pueya, Israel pueya”.

⁷ Naa pueya sequesano na tojinu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niquishaacanu seetanujuanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Niaa jaara na riuriatare, niocua cua numootecuhua. Janiyacua nocua quiaarejaanihuaj cua shuquiritianura nojuaja.

⁹ Niishijiaca tojinu nuhuaji naa jiyaniijia Herodes sequesantej, nojoriiri quiojiya-reecuhua. Jiya pajamaji na niqutiushano rijia niqutiuriiri nojori puetaano. Rijiaari pootia tiushii tia caco, tee mueya quiriqiaacuajani. ¹⁰ Nojori niquishacari rijia, niishijiacaari jyanohua timitiuiquiaari. ¹¹ Tiaco tiuquitiaseeri. Conaja niqutiushii na nucua Mariataari. Conajaacuara mojuquetacoquiaariiri. Na shuquiritatureeri. Na nuhuaji, niishijiacaari na patootasano casaa riataquequiaari, nareya na niqutiosocoriquiano conaja. Nojoriiri na niqutioquiaari oro, shanohua jaanutaja catijasocoriquianojuhuaj, tamaatiuucua shanohua jaanutajanio. Na sesaari tahue rupaajinia “mirra”. ¹² Na nuhuaji, Pueyasoori cuno niishijiaca sequequiaari na maquenujinia, maja Herodescua nojori tacatenuhuara Herodes nojori pohuatenuhuara conajajiniji. Naacuajitij, niishijiacaari tamonu nucucuhua tacatequiaarihuua na jiyajiniohuara.

Egipto jiyajiniara Jesu mashitiasaanujiniji pahuatasano

¹³ Niishijiaca jaara quiaquiaarihuua, Pueyaso seruuri Josecua muetaquiaari na maquenujinia. José sequeereeri:

—¡Quia sanere! ¡Conaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajanijaaatijia. Herodesri Belén tiacajinia na pueya pajetenutaniya conaja, na motesocoriquiano.

¹⁴ Joseeri sanequiaari. Cuno niucuaja, conaaja mashitiaree na nucuatajaari Egipto jiyajiniara. ¹⁵ Nojori tiuquishacari Egipto jiyajinia, tii quishiiquiaariiri, Herodes cuaara cusooraajatija. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinjia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanoehua juaaquiaari. Na pueya jiyaroquiaari puetunu naatujoori canuniyojuajanaa nojori puecoonura Belén tiacajinia, na shocuaqueya tiacajinia quiniaa muerasuni. Naa miiquiaariiri Jesu na monura juucua. Herodesri na pueya sequequiaari cuaara puecoosaaria puetunu shusha roosanojuanaa, mariyata canapete caapiqui marijia shocoteo quiquiaarijiani. Herodesri naa sequequiaari niishijiaca pohuatuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. ¹⁷ Naacujitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

¹⁸ “Sapunuuri tojishiya Ramá tiacajinia. Jiyanoehua taraatia. Raquelri necohuacua sariyacojiya. Majaari na paniniu na cumanijiasaanura. Necohuari tari puecoosaarucuaa”.

¹⁹ Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujinia, Egipto jiyajinia nojori quishacarijia. ²⁰ Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiaari tari cusonuurucuaa.

²¹ Joseeri sanequiaari. Mueya tacaretaquiaariuhua Israel jiyajiniohuara na nucuatajaari.

²² Israel jiyajinia na tiuquishacari, Joseeri numootesaaquiaari Herodes niyanu Arquelaoori jiyaniijia quiquiaaa jiyacari, na que niti Judea jiyajinia. Nocujia, Joseeri puerequiaari quiniqui na quiniuria. Jiyacarijiuhuj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara.

²³ Galilea jiyajinia nojori tiuquijiosacari, Nazaret tiacajinia quishiiri. Naacujitij, tariucuacaanu Pueyaso sequesano caminiujiunia sequesanoori tohuateequiaari nojori jaara naa naajiotasaaquiaaritij:

“Jiyaniquishaanutanitari Nazaret tiacajinijinio pueyano”.

3

Tiuquinijiona Juan pohuatasacari cariquia jiyajinia

(Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ² Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni paniya, na muerasu nia quiniuria seetanujuanaa.

³ Jiyanoehua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojuquetunu na quiniuria’”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiosacari nojori jeenucuanura nojori jiuujia Jesuucujia.

⁴ Cuno Juan toqueeri camello cajacajiniji shitasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariquia jiyajinia na riuriatasano sequeru, samiyatunio. ⁵ Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiojuanaano. ⁶ Pueya jaara pohuataquiaari Juan

niquiara sesa nojori miijosano, Juanri nojori tiuquinijioquiaari Jordán moojinia, Pueyaso tojjiara nojori quiniu panishacari.

⁷Na tiuquinijosacari pueya, Juanri queraatia Fariseocuaca niquiquiaari nocua nijiyano, Saduceocuacanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaquiri sesa pueya, juhua sacocua! ¿Cante nia numooteree nia mashiniuria Pueyaso saniitionuucua ni janiyani? Nio pa quishacarini, quera Pueyaso saniitionuucua jiyano nio pa ruuretajaca pueya. ⁸Nia jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹Majaari nia jiyani nio niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijihua. ¹⁰Nio miriqui sequesano nia tojirijihua pueyanaa. Naana jaara maninia jajau muetuyaquiri, na camaruuri na nuya na catijiasocoriquiano. Naajuhua, Pueyaso quera saniitionutaniya ni janiyani, na tojiyashijaca nia quiniuucua.

Tiuquinijiona Juanri pueya sequequiaari socua:

¹¹—Janiari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriquiano cutara. Nojuajaari jiyano nio socua jiyaniijajanaa janiyajiniji. Janiya maara jiyano nio shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojajinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. ¹²Nia tojitiare miriqui cua sequesano. Trigo jaara rapijosare maninia, na camaruuri na queyaroojua, jiyocuacaanuji na totinijiasocoriquiano. Naa miiquiaari paratu cuaara paara na cocua, na sucuanio, na jajau na racatanura tijajinaaco. Naajuhua, cua nuhuaji niniari tariucua pueca, na tojitianaa na rijionura na quiquiojinia, saniniujia na tojiyashijaca na quejoonura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeeseri:

—Cua tiuquinirijia.

¹⁴Juanri saaja na sequeree:

—Maja Jiyaniijanaa. ¡Quiaa cutaraari maninia pueyano! ¿Casaara cucua quia nimiaa cua tiuquininuria quiajaninya moojiniani? ¡Cua tiuquiniri juhuari cutara!

¹⁵Jesuuri saa sequerejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiniquiaari. ¹⁶Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuacari riataquee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. ¹⁷Jiyacaritij, jiyocuacaanuji Pueyaso rupaari tojishaaree naa sequeyano:

—Nioori cua Niyanuniyojua. ¡Na shuquiritiaa jiyanojuanijia!

4

Samaruhua jiyaniijia saniniujiushacari Jesu

(Mr 1.12-13; Lc 4.1-13)

¹Na nuhuaji, Pueyaso Sohuanuuri Jesu jiyataquiaari cariquia jiyajiniara, Sesaaca saniniujiushocoriquiano cuniqui.

²Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³Sesaacaari jiyacari nocua niquiaari na saniniujiniuria. Jesu sequeeseri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴Jesuuri saaja na riucaaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocuja. Seetanujuanaa saminio quiya cutaraari na tojishacari puetunu Pueyaso Rupaajanaa”.

⁵Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuaaanuuri, Pueyaso Secojojua tia cacojiria. ⁶Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucujj”.

⁷Jesuuri na riucaaree:

—¡Maja! Pueyaso Rupaajinia, naa naajiotasanoori quiyajuhuj:

“Maja quia saniniuuniu quia Jiyaniijia Pueyaso”.

⁸Na nuhuaji, Sesaacaari Jesu tacaniquiaari socua jiyanohua jiyaconaja tuhananuucua. Cuniquiji na niquitirii puetunu jiya jiyaniijiacajanaari. Jiyanohua cumaacaraca quijia. Jiyanohua queraatia casamiriaca quijiacajuhuj. Jiyanohua maninia niquishano. ⁹Jesu sequereeri:

—Janiyacua quia jiyatere jiyaniijajanaara nojori nitini, quiaa jaara cua cariquimijia mojoquetare quia shuquiritianura janiya, quia jiyaniijia cua quiniuria.

¹⁰Jesuuri na sequere:

—¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuqiritiare cutara. Saaja nojuaja quia tojiri”.

¹¹Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu coteesacari poonijionu Galilea jiyajinia

(Mr 1.14-15; Lc 4.14-15)

¹²Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. ¹³Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabolón niquiohuacujinio supueno pueya jiya, Neftalí niquiohuacujinio supueno pueya jiyanio. Zabolón, Neftalíno, nojoriiri supuetana Jacobo niquiohua quiquiaari. ¹⁴Jesu quishacari cuno jiyajinia, naa tohuatteequiaariiri taa tariucuacaanu Pueyaso sequesano caminiuiniunia Isaías pohuataquiaari cuno jiyajinjicujajani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵“Zabolón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaa quiyacujajani. ¹⁶Cuno jiyajinia quiniiaari ninishiqui quijia quiquiaari. Quiarijia saniniuujia, nojoriiri jiuujia Cuhuatana niquiruucua. Nojoriiri cusunon pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniuucujj”.

¹⁷Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Nioojia nia tacatore sesa nia miiniuiniiji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa

(Mr 1.16-20; Lc 5.1-11)

¹⁸Jesuuri Galilea caminia shuriuquiuoco rucuaneriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroortariquiaa. ¹⁹Jesuuri nojori sequere:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniuiniija, juhua sapitiaaja quioona.

²⁰Nojoriiri na shiyaru tiujiaquiaari ritia. Jesuta quiojyareeri.

²¹Jesuuri shiitianiyojua socua rucanequiaari na tacoji. Socua caapiqui pueya riuri-ataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriqiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniuriajuhuaj. ²²Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya
(Lc 6.17-19)

²³Jesuuri puetunu Galilea jiyajiniajanaa rucanejoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiiticojuajanaa naatanijioquiaariiri. Puetunu nootunejaca pueyajanaa shaataquiaarijiaari-iuhuj. ²⁴Naa maninia na miishanoori poojotasaaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitijacajanaano, cumatacuruhuana cusosuhujahuaj, nootunejacanio. Nocua jiyatasaaquiaarijuhuaj samaruhuaraca quijiaca, canashyaquiji cusojonuujuacanio. Jesuuri nojori naatanijioquiaari puetunujuanaa. ²⁵Jiyanojua queraatia pueyari Jesu nuhujiquiaari Galilea jiyajiniji, Decápolis tiacajinijinio. Na nuhujiquiaarijuhuaj Jeruslén tiacajinijinio, Judea jiyajinijiojuhuaj, mariyata Jordán moo taquijiria jiyajinijionio.

5

Jesu pohuatasacari Pueyaso rupaa tuhananujiniji
(Lc 6.20-23)

¹Jesu niquishacari jiyanojua queraatia pueya nocua niyano, nojuajaari tuhananuucua tacaquiaari tiji na cajiniuria. Na saquiriojosano pueyari nocua catecanoquiaari. ²Jesuuri nojori niishitiojonu coteequiaari. Naa na pueya sequereeri:

³—Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

⁴Shuquiriaatia quijiaca cutaraari noo pojori canapuate taraatia quiyani sesa na miinuucua. Pueyasoori nojori cumanijanutaniya.

⁵Shuquiriaatia quijiaca cutaraari noo pojori, canapuate maja tama nerajaaja niishiriojjuacani. Nojoriiri nio jiya camaruhua quiniutianiya, taa Pueyaso sequequiaaricujani.

⁶Shuquiriaatia quijiaca cutaraari noo pojori, canapuate maninia quiniuucua jiaatiaa jiyanojua, taa pa jiaatiaacuaa miaquenuucuanu. Pueyasoori maninia quijiacara nojori jiyatenutaniya.

⁷Shuquiriaatia quijiaca cutaraari noo pojori, canapuate naquiya miishanoojua taraajeni. Pueyasoori nojoriicua taraajenutaniyaacuahuaj.

⁸Shuquiriaatia quijiaca cutaraari noo pojori canapuate maninia jiuujaracani. Nojoriiri Pueyaso niquiniutianiya cutara.

⁹Shuquiriaatia quijiaca cutaraari noo pojori, canapuate pueya jiyanootiotejani. Nojoriicua jiaari Pueyaso muerasu quiniutianiya.

¹⁰Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miinuucua. Pueyasoori nojori jiitianutaniya pueyaracaanu shuquiriaatia, na muerasu nojori quishacari.

¹¹Shuquiriaatia quijiaca nijaniya, tamasaca jaara nia macaatiri cua tojtijaca nia quishacari, naajuhuj, nojori jaara miya naquiya nijaniya. Naajuhuj, niaari shuquiriaatia quijiaca, nojori jaara saquiriojotare niaacuara na sapojonuta, maninia nia tojniuucua janiya. ¹²Niaa jaara naa miishaaretej, jiyanojua nia timiquiore. ¡Shuquiriaatia nia quiriujuhuj! Pueyasoori cunora jiyanojua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuniaacuajaari naa naquiya miishaaquiaarijuhuaj, nia supueyaquishaacarijijiojua.

Pueyaso muerasuuri juhua shoni quiya mijiria, juhua ninishiqui cuhuatanaajuhuj
(Mr 9.50; Lc 14.34-35)

¹³ 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiqiriiquia jatama, ¿maatucua taa tiqiriiquiara quirihoani? Maja na naata. Shoni jaara naa quiritij, najuhuaa quiyari, shaaca. Jiyano shoni cuaara jatasaaria nuujinia, pueya rapijosocoriquiano.

¹⁴ 'Naajuhuj, niaari juhua ninishiqui cuhuatana mijiria quiniaara. Tiaca jaara tuhuanuucua quiri, majaari na naata na jamaaniu. ¹⁵ Naajuhuj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia nocuaji. Majaari samaritiu niataaanu conatu cariquiaco. ¹⁶ Naajuhuj, nijaniya cuaara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia mijia nia quishacaritij, pueyari Jiyocuacaanu Quijia nia Que Pueyaso maniniuhaquetanutaniya.

Jesu niishitiojosanoori tariucuacaanu Moisés Rootasanojinji

¹⁷ 'Majaari nia jyaniniu janiyari niquiaarini Moisés Rootasano cua tarinitiniuria nijaniya, Pueyaso sequesano caminiujiuniaa rootasano. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuj. ¹⁸ Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niqiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajjotesanojuanaa cuaara tohuateerejaatijia. ¹⁹ Naaratej, tamonu pueyano jaara jyaniri tamonu rootasano tariucuacaanu Pueyaso Rupaajiniji najuhuaa sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijianaa. Saniniuujia, cante tariucuacaanu Pueyaso rootasano tojiyuqianijia, na niishitiojoquiaa tamacajariuhuj, cuno pueyanoori socua tojishano pueyano quiniutianiya Pueyaso shuriucua jiyocuacaanu. ²⁰ Nia numooteyanijia, niaa jaara quiyaquiri socua maninia quijiaa Fariseocacajiniji, Moisés Rootasano niishitijonaajinijinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria
(Lc 12.57-59)

²¹ 'Niaacuajaari tojiyuqiaari taa pa supuetanaa sequesaaquiaricujani: "Maja monu. Cante pueyano monani, nojuajaari nequesoreesaanutaniya". ²² Janiyari saniniuujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuj, cante narta pueyano saarijiojuani, cunoori nequesoreesaanutaniya jyaniijianucua niquiara. Naajuhuj, cante narta pueyano sesacareeni, cunoori quera jatashiya mani quiqiojinia, pueyaracaanu saniitosocoriquiano.

²³ 'Naacuajitij, nia niqutionu panishacari Pueyasora nia casaa, niaa jaara jiyacari niishiqui, quiaari quarta pueyano juatiriucuaa quiocuara, ritia quia tiujiare cuniqui quia niquitiosocoriquiano Pueyasora, catijaja shuriucuanu. ²⁴ Quarta pueyanota quia jyanootioococuara coteenu. Na nuhuaji cutara quia naata niqutionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniucua nojuaja, maninia quia pohuatare ritia nojuaja, taa quia miiniutianiyani na jyanooniuria quiajaniya. Ritia nia jecatoore nuacuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niqutionutaniya nujuatejojua camarnu saniniuujia. Nojuajaari quia nujuatenutaniya nujuatejojua. ²⁶ Seetanujuanaa nia sequeyanijia, majaari quia tohuatanu quiniutianiya, quiaa cuaara niqutiorejaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajicua pa jiaataaquiniuria

²⁷ Niacuajaari tari tojiqiaari nio tariucuacaanu rootasano: “Maja tamonu niqiuocua numuetucunu”. ²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jiyanoehua na niishitiojonura nojori:

—Naaratej, quia miaquetajara quia namijia jaara sesa miitiri quiajanija, quia namijia quia jiatere. Tamocora quia jatere. Quiajanijara socua maninia cutaraari namijijiu quia quiniuria, maja quia jatasaanura mani quiqiuojinia puetunu quia cuaqueyatajanaa. ³⁰ Naajuhuj, quia miaquetajara quia numatu jaara quia miitiri sesa, quia jiyatarenaj. Tucuaaanu quia jatere. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya ti.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitijosano maja pueya cartenura necocua

(Mt 19.9; Mr 10.11-12; Lc 16.18)

³¹ Jesuuri naa niishitiojiaarijuhuaj:

—Pa supuetanaari naa rootasaaquiaarijuhuaj: “Pueyano jaara necocua cartere, maaji cuaara niqutiosaaria naajione, pueya niishiniuria neyacaqui na carteree”. ³² Janiyari saniniuujia nia sequeyanijia, pueyano jaara necocua cartere, sesa miya Pueyaso niqiaaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niqiaara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitijosano maja pa sapojonura

³³ Naaari tarijia tojitiaquiaari taa pa supuetanaa rootasaaquiaarini. Naa rootasaaquiaari-iri: “Majaari nia jatanu nia sequesano, niaa jaara sequere: ‘Seetanujuanaari cua sequesano. Pueyasocuajaari niishiya majaari cua sapojonu’”. ³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere “jaa”. Jaara seetanujuanaa quiaquiri nia sequesano, saaja nia sequere “maja”. Majaari nia sequesano nia maatenu najuhuaana naatej: “¿Janiyate sapojuanu? Cua rupaari juhua jiya cajiniocua. Maja na jatanu quiniutianiya”. Majaari nia sequenutej pueyanaa. ¿Majateeri nia niishiniu, jiya cajiniocuaari Pueyaso quiqiuo? ³⁵ Naajuhuj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niuhua. Naajuhuj, ¿casaara nia sequequiaani: “Cua sequesanoori juhua Jerusalén tiaca? Pueyaracaanu quiniutianiyari”. Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuj, ¿casaara nia sequequiaa naa najuhuanani: “Quia naataari cua sequesanoocua tiuuniu, cua naca quishacarijia”? Majaari nia sequenutej pueyanaa. Niaa jaara naa sequeretej, nia niishiri, majaari nia naata quenaaja niqumi nia muesujinijinio nia jiyatenu taariuria, muerumecarano. ³⁷ Naaratej, pueyaracaanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitijosano nijaniya.

Jesu niishitijosano maja pa naminiuria

(Lc 6.29-30)

³⁸ Niacuajaari tari rootasaaquiaari: “Pueyano jaara tamonu pueyano namijia cocuartaare, na namijia cuaara cocuartaariajuhuaj, pueya nequesoreena niaquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaataariajuhuaj”. ³⁹ Janiyari saniniuujia nia sequeyani, pueyano jaara quia miini paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaani. Quia jiyanoori. Nojuaja jaara socua quia pirohua, quia jiyanoori. Majaari na naminiu. ⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqutiore nareja. Majaari jamueja quia quiniu. ⁴¹ Tamonu camarnu jaara quia

sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuaaanu na sequesanojiniji. ⁴²Tamonu pueyano jaara quia casami masenu paniya nera, quia niqutiore nareja. Naajuahuaj, tamonu pueyano jaara quia casaa panu paniya nareja rupaquijia, quia niqutiore. Majaari na ruuretanu. Capora quia quiri.

Jesu niishitiojosano pa paraca pa paniniuria

(Lc 6.27-28, 32-36)

⁴³'Niaacuajaari nio tariucuacaanu sequesano tojitiaquiaarijuhuaj: "Quia shuriucua quinia quia paniri. Saniniuujia, majaari quia paraca quia niqiniu". ⁴⁴Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niqiaara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. ⁴⁵Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijia pueyara, sesa miijicarajuhuj, maninia nojori nataacuaca moritianiura. ⁴⁶Niaa jaara saaja nia panijia pueya panijia quiri quia, ¿Pueyasoteeri cunora nia shuquiritianutianiya, socua na casaajini nia niqutionura nijaniya? Maja. Sesa miijia pueyani, noo pojori canapuee cumaneeca masejoquiaa na sapojonutani, nojoriiri maninia miiquiaa na panishano pueyajuhuj. ⁴⁷Niaa jaara saaja nia panishano pueya saruhuataquiaa, ¿niaateeri cunora maninia miijia quia Pueyaso niqiaara? Maja. Pueyaso niishiyashijia pueyari naa maninia miiquiaa na panishano pueyajuhuj. ⁴⁸Naaratej, maninia miijia nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niqiaara

¹Tama nia cuaqueyajaaja nia cojuare maja maninia nia miiniuria saaja pueya niqiaara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niqutionu quiniutianiya nijaniya socua, maninia nia miiniucua. ²Naaratej, niaa jaara casamijiuucua pueya niqutionu paniri nareja nia casamijini, majaari juhua sesa jiuujiaraca pueya nia miiniu. Cuno pojoriiri pueya numootequiaa na niqutionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secjojua tiacajinia, tiacaacacajuhuj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojini nia maninia nojori miiniucua. ³Saniniuujia, niaa jaara nia casaajini casamijiuucua niqutionu paniri nareja, quia mueneca cuaara niishyaquiri quia niqutiosano quia miaquetajata. ⁴Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacujitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutianiya na casamijini, na shuquiriasacari nijaniya.

Jesu niishitiojosano naa pa secjonura Pueyaso

(Lc 11.2-4)

⁵'Nia secjosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secjonu maniniucuaquiaa na nujuanuta pueya niqiaara, saaja pueya shootianura nojori. Nojoriiri naa secjonuquiaa Pueyaso secjojua tiacajinatej, tiaca nuucujinijuhuj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaarecuaaja. Jiyano pueyatej, majaari nojori masenu quiniutianiya socua Pueyasojini. ⁶Nijaniya saniniuujia, nia secjosacari Pueyaso, nia sohuacamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secjore jiyasohuaja tamajaaja. Nia Que Pueyaso niqishacari naa jiyasohuaja nia

miishanotej, nojuaja cutaraari nia niqutionutaniya na casamijiniji, na shuquiritiasacari nijaniya.

⁷ Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸ Majaari juhua nojori nia miiniu. Pa secojiyaquishaacarijijojua, pa Que Pueyasocuaajaari tari niishiya casaa pa paniyani. ⁹ Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaaquiaacuaani. ¹¹ Canaa quia niqutiore canaa miaquesocoriquiano quiarijiani. ¹² Canaa quia jiyanoori sesa canaa miishanojiniji, taa canaa jiyanooquiaa tamasacacuaani, sesa nojori miishacari canaa. ¹³ Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacaacuaaji. Saaja quiajaniya cutaraari seetanujuanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaaja”.

¹⁴ Naatej, niaa jaara jiyanoori tamasaca, sesa na miishacari nijaniya, nia Que Pueyasoori nia jiyanooniutianiyajuhuj. ¹⁵ Saniniuujia, niaa jaara tamasaca jiyanoyaquiri, nia Que Pueyasoori maja na jiyanooniutianiyajuhuj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶ Niaa jaara miaqueyaquiya Pueyaso nia secojonura, majaari macuhajeconu pueya niqiuara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhaqueetareecuaja. Majaari Pueyasojiniji nojori masenu quiniutianiya socua. ¹⁷ Nijaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. ¹⁸ Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacujitij, nojuajaari nia niqutionutaniya na casamijiniji na shuquiritianuucua nijaniya.

Pa casami pa racatare jiyocuacaanu Pueyaso shuriucua

(Lc 12.33-34)

¹⁹ Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaariuhuj. Nohuasenujuacaari nocua tiuquiniutianiya na nohuasenura. ²⁰ Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejojuaari maja na naata nocua tiuquiniu tii, jiyocuacaanuji nia casami na nohuasenura. ²¹ Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaanuu quiniutianiya mijiria casaacua tari.

Pa cuaqueyajinia cuhuatanajiniji pohuatasano

(Lc 11.34-36)

²² Pa namijiaari juhua poojia cuhuatana. Naacujitij, paa jaara sesa casaacua jiaati-aashijia quirini, poojiaari juhua cuhuashiqui quiya maninia. ²³ Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyujuaru pueyanojiniji.

Pueyaso panijia pa quiri, maja cumaneeca panijia

(Lc 16.13)

²⁴ Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niqiniuu

paniyaquiniutianiyacujua. Naacuajitij, niaari shuquiriaatia poonijionutaniya nia panishano camarnura. Niaari tamonu soojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

Pueyaso na muerasu cojuaja
(Lc 12.22-31)

²⁵Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiririni, ²⁶Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Naaa cutaraari socua Pueyaso panishano cuno jiyocuacaanu jaacuatujuacajiniji. ²⁷¿Nia naatate socua jiyaconajara maashiniu, jiyanhua nia tacaaniu-tia? Maja.

²⁸Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitijara shitianujuhuj. ²⁹Seetanujuanaa nia sequeyanijia, pa supuetanaa jiyaniijia Salomónri jiyanhua shanhua toqueya cushijia quiquiaari. Naajaa, na toqueeri maja socua shanhua niquishano quiquiaari cuno naana shuucuacajiniji. ³⁰Naana shuuri saaja rupaquijia shanhua niquishano. Jaara sorere, namitiashiyari catijasocoriquiano. Pueyasoori naana shuu shipiniquiaari saaja rupaquijia shanhua niquishocoriquiano, na nuhuaji catijasocoriquianonio. Nojuaja jaara naa shanhua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiyaquiya nia Que Pueyasooaarini? ³¹Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani? ³²Pueyaso niishiyashijiacaari naa sequejacatej, puera nojori tacaashacari puetunu na panishano casaacujanaa. Naaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³Naaratej, coteenu nia niishiriojore Pueyaso tojjijara nia quiniuria cutara. Pueyasocua nia niqutiojore puetunu nia panishanojuanaa. ³⁴Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarjiani. Tariqui cutara niocua niishiriojore taa nia miiniutianiya maniniani. Tariucuaa quiarjia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

7

Majaari quarta pueyanoocuaara soqueto nia quiniu
(Lc 6.37-38, 41-42)

¹Maja niarta pueyano nia soquenu najuhuanaj, Pueyaso mariqui nia jiyanoyaquirijiaarijuhuaj. ²Taa nia sesacaquiaa tamascacuaani, niaari naa sesacasaanutaniyajuhuj. Naatej, taa nia miiquiaa tamascacuaani, Pueyasoori mariyata naa miiniutianiya nijaniyajuhuj. ³Nio miriqui cua sequesano nia tojiri. ¿Casaara nia niqiyia rucucua nia tarajanu namijiajiniani, niaa jaara puereetuca maca jitiaa tama nia namijiajiniajaaja cutara? ⁴Maca nia jittiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵Sesa jiuujaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeeicare coteenu, na nuhuaji cutara niocua maninia nacasure niarta pueyano.

⁶Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso sojeaca nia pohuatanu Pueyaso miishano shanhua

nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej
(Lc 11.9-13; 6.31)

⁷Pueyaso nia secojore. Nojuajaari nia niqutionutaniya nia masesano. Niaa jaara pajere, niari nia pajesano riuriatanutaniya. Tohuateyaji nia piquiri, niacuajiiri riataasaanutaniya. ⁸Cante Pueyaso maseya na panishanoni, seetanujuanaa na masenutaniyari. Naajuhujaj, cante pajejani, na panishano riuriatanutaniyari. Cante tohuateyaji piquijiani, nocuajiiri riataasaanutaniyajuhujaj.

⁹Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹Niajanitari sesa miiniu niishijiaa. Naajaa, niacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanhohua socua maninia niqutionu niishijia, na muerasu secojosacari nojuaja.

¹²Pueyaracaanu maninia nia miiri tamasaca, taa nia paniquiaa pueya miiniuria nijaniyacuajani. Niaa jaara maninia miiriquia nio cua sequesano, niari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiunaa rootasanonio.

Pueyasocua nuuri secanuniyojua
(Lc 13.24)

¹³Pueyasocua neteja nuu nia pajere, shiitaniyojua nuuri tuneja. Saniniuujia, puereetuca nuuri neteya mani quiquiojinia. Puereetuca na tuneja. Puereetucaari neteya, carianujuhujaj. Naaratej, queraatia pueyari juhuajaniya cuno nucuaco quiojiaa saniitiosocoriquiano. ¹⁴Saniniuujia, shiitaniyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanhohua shiitaniyojuuari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji
(Lc 6.43-44)

¹⁵Tama nia cuaqueyajaaja nia cojuare sapojonuujuaacuaaji, noo pojoriicuaaji canapueete najuhuaana sequejacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura nijaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaa. ¿Shuuniateeri na naata muetunu cohuajaru? Maja. Naajuhujaj, cuno sesa jiuujiaraca pueyari maja na naata maninia miiniu. ¹⁷Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸Maninia naanaari maja na naata sesa jajau muetunu. Naajuhujaj, sesa naanaari maja na naata maninia jajau muetunu. ¹⁹Naana jaara sesa jajau muetujua quiri, nushiyari, manijinia catijiasocoriquiano. ²⁰Naacuajitij, niocua cuno sapojonuujuaa pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya
(Lc 13.25-27)

²¹Cuno pojori canapueete cua sequejacani: “Cua Jiyaniijanaa, cua Jiyaniijanaa”, noojiaqueya nojoriinjiniioori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojitiajaca cutaraari nocua tiuquitianutaniya. ²²Cua nequesoresacari pueya nio jiya puequesacari, queraatia pueyari cua sequenutaniya: “Cua Jiyaniijanaa, cua Jiyaniijanaa, canacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhujaj, canaari cusosuhua naatanijioquiaarini quia sesa canaa jiyaniquishacari”. ²³Janiyari saniniuujia naa sequejaca riucuanutaniyani: “Maja cua niishiniu nijaniya. ¡Nia quiojorohua! Niaari saaja sesa miijiaa quiquiaari”.

Jesu tojitiyajaca miishanoori pueyaracaanu rishiniutianiya cutara
(Mr 1.22; Lc 6.47-49)

²⁴ Naacuajitij, cante cua sequesano tojjijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquijania tiaquiaari. ²⁷ Maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanhua taraatia quiquiaari na tia pojotasacari.

²⁸ Jesu jaara niishitiojonu puecaquiaari, pueyari jiyanhua jiuujiateriquiaa na niishitiojosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijijajanaa, maja juhua Moisés Rootasanojiniji niishitiojonaa. Cuno pojoriiri nareja tariucuaacaanu rootasano caminiujuquiaari pueyaracaanu.

8

Jesu naatanishacari sesa cusonu jiitiaja
(Mr 1.40-45; Lc 5.12-16)

¹ Jesu jaara tuhananujiniji rosequiaariuhua na cojiniaata, jiyanhua queraatia pueyari na nuhuajiriqiaa. ² Tamonu pueyano cusosuuri jiyacari Jesuucua catecanoquiaari. Jiyanhua sesa cusonu jiitiaquiaariiri. Tahue rupaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiiti-asacari. Cusosuuri Jesu cariquimijaji mojoquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacujanijia quia naata cua cusonu cushiriitiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

jijacaritij, ritia cushiriiquiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasa niqiaara quia pohanuana cua miishano quiajanijia. Saaja Pueyaso secojonaa jiyaniijia quia cuaqueya quia niqitiri, na cartenura quiajanijia, pueya tajinia quia rucuanefonuhua juhuajaniya. Na nuhuaji, ritia quia niqitioire quia seru Pueyasocuaa catijasocoriqiano. Naa quia miiritij taa Moisés niishitiojoquiaari tariji-acuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

Jesu naatanishacari Romano capitán seru
(Lc 7.1-10)

⁵ Jesu jaara tiuquiquiaariuhua na pueyata Capernaum tiacajinihua, Romano soldado-hua jiyaniijaari Jesuucua niquiaari na seconura Jesu. ⁶ Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanhua naquiya miya na noonutaari.

⁷ Jesuuri na sequequiaari:

—Jiyacuajaari nocua quianutaniyani na cusonu cua shaatanura.

⁸ Soldadohua jiyaniijaari na riucaaree:

—jMaja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacujanijia, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiqiaaniijia. Naajuhuj, cua soldadohuari cua tojitiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaquiaacuaa, quia sequesano cutaraari tojishaanutaniya.

¹⁰ Jesu jaara tojiqiaari naa cuno tahue sequesantej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquiniu quiquiaa Pueyasocua tiuuja cutara, juhua nio tahue! ¹¹ Seetanujuanaa nia sequeyanijia, queraatia tucuacaari Pueyasocua tiuujiaca quiniutianiya juhua nio tahue. Nojoriiri tucuacaanuji nijionutaniya pananu muetasamaji, pananu tiuquishocojiihuuaj. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaataari pa supuetanaata: Abrahamta, Isaactajuhua, Jacobotanio. ¹² Parta Israel pueya, canapute Abraham jinianuucujinino supuenoni, nojoriiri saniniuuja tamocora quejoosaanutaniya ninishiqui, nojori tojitiaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jinianuucujinino nojori quishacari.

¹³ Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia sequerecujani. Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiaasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhua. ¹⁷ Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujuanaa na jatanura”.

Tamasaca pueya quiniu panishacari Jesu pueyara juucua

(Lc 9.57-62)

¹⁸ Jesu jaara jyanohua queraatia pueya niquiquiaari na shocua maano, na pueya sequereeri:

—Camínia taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequereeri:

—Niishitiojonanaa, janiyari quiata quianu paniani. Janiyacua quia tarajareni puetunu tiqiyocujanaa quia rucuanesacari.

²⁰ Jesuuri na riucaare:

—Quiojuapue cutaraari na raa jiitiaa. Shuhuari na jesuhua jiitiaajuhua. Saniniuuja, pueyano cua quishacari mijiria, majaari cua maquejara cua jiitiano quenaaja, taa cuno casami jiitiaacuaa na maquetujuarani.

²¹ Tamonu Jesu pueyajinijinoori Jesu sequereeri:

—Cua jyanijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

²² Jesuuri na riucaare:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³ Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu coteequiaari nojori niuutiasacari. Jyanohua

piyarojoriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵Na pueyari cunora na niucujasee. Jesu sequetureeri:

—¡Jiyaniijiana, canaa quia naacutare! ¡Paa tari tiuquitiaareeni!

²⁶Nojori riucuaereeri:

—¿Casaara nia pueretiuyani? ¿Majateeri nia niishiniu Pueyasooqua tiuuniu?

Jesuuri saneree. Paratu sequeereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷Jesu pueyari jiuujiatequee. Tama nojorijiaar-
ijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhuaaj!

Jesu tohuatanishacari samaruhua, caapiqui pueyajiniji Gadara jiyajinia

(Mr 5.1-20; Lc 8.26-39)

²⁸Jesuuri na saquiriojosano pueyata tiuquijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuha paaquiosaquiji. Nojoriiri samaruhuaraca quiquiaari. ¡Jiyanoehua pueya puere-
sano! Cuno nucuaco, majaari pueya rucuanenu quijia, cuno pojori na puereenucua.

²⁹Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰Jiyacaritij, cushiyari cateca naataja miaquenuuriquiaa. Jiyanoehua queraatia cushiyari quiquiaari. ³¹Samaruhuari cuno caapiqui pueya pocuatequiaari. Naa Jesu secojoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

³²Jesuuri cuno samaruhua sequeeree:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tacinijijiiri. Cushiyari tii shushiniu-
ushii.

³³Cushiya cojuanaari netecuatiquiaariuhua na shiriquiniutia na tiacajiniara. Nojori tiuquijiosacariuhua, pueya niquiara pohuatatuquiaari cushiyajinijiiri, samaruhuaraca pueyajinijinio. ³⁴Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

9

Jesu naatanishacari cumatacuruhuana cusosu

(Mr 2.1-12; Lc 5.17-26)

¹Na nuhuaji, Jesuuri boteginia rosetaquiaari na saquiriojosano pueyata. Caminia taquijiria niuutiaquiaariuhuari tama na tiacajiniarajaaja. ²Tii nojori tiuquijiosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanoehua nocuani, cusosu sequeereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishano-
jiniji.

³Noojiaqueya Moisés Rootasanojiniji niishitiojonaari Jesu sequesano tojtiriaria. Nojoriiri tama noojajiniaajaaja niishiriojonuuquiaari: “¡Nio pueyanoori tama na cuaque-
yajaaja jiyateya juhua Pueyaso na quiniuria naa na sequesacari! ¡Cunoori jiyanoehua sacuaraatia!”. ⁴Jesuuri cuno pueya niishiriojosano niishiquiaari. Nojori sequeereeri:

—¿Casaara sesa nia niishiriojyani? ⁵Seetanjuanaa, pueyano maja na naata jiyanooniu pueya miishano sesa. Naajuhuaaj, majaari na naata tamajaaja pueya na naataniniu. ⁶Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniu-
niuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niquitiushacari Jesu miishano, puetunu pueyajanaari shiriiquitiuquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuquiciaarini cua tiajinia na miaquenura, na pueyajuhuj. Naacuajitij Jesuuri cua tiajinia tiuquitiuquiaari miaquenura. Queraatia cuarta cumaneeca masejonaari canaa cojiriquiaajuhuj, queraatia noo pojorijihuj, Fariseocuaca jiyaniq-uitiushano sesoriquia pueyatatej. Puetunu canaajanaari Jesuta miaquenuuriquiaani.

¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuaratia cumaneeca masejonaatani, sesoriquia pueyatano?

¹² Jesuuri naa nojori sequesano tojirii. Nojori sequeree miriquiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa miijiaa pueyari cua paniya nojori cua jiyanooniuria sesa nojori miijosanojiniji. ¹³ Niaa cuara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesaciritij:

“Niaacuajaari nia seya catijiaquiaa cucuara. Maninia juhuari nia taraajenura tamasaacua. Cuno cutaraari cua shuqiritiasano”.

Naara niquiaarinijia nia sequesano sesa miijiaa cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacu.

Pueya nequesotasano casaara Jesu pueya tarinitiaaquiuaa quenaaja miaquenuni

(Mr 2.18-22; Lc 5.33-39)

¹⁴ Tiuquinijiona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiuaa quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miiquiaacuaani.

¹⁵ Jesuuri nojori riuuaree miriqui:

—Pueyano camishacari, ¿na masuusano pueyatucua taraatia qiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶ Socua cua tojtiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaree toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya.

¹⁷ Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhanaj. Shoque tariucuacoori maja na naata tooniu, uva caaca jaara jerema. Naaratej, uva caaca nia shuujiore shoque quiariquiojinia, maja najuhua nia niitianura uva caaca. Naajuhuj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojtiare cutara.

Caapiqui maajipohua naatanijiosacari

(Mr 5.21-43; Lc 8.40-56)

¹⁸ Jesu pocuasacarijia, nocua niquiaariiri Pueyaso secojojua tia camarnu. Jesu cariquimi-aji mojoquetaquiaariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishyanijia quiaa jaara niare nocua quia juaashiquia, samiitianutaniuahuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. ²⁰⁻²¹ Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojoriquiaajaarijia: “Janiya jaara Jesu toque quiaareni, cua nanacaari curetanutaniya”. Cunora, maajiiri Jesu toque casaca quiaasee jiyasohuaja. ²² Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuayano taraatia, sapiyoniuayanio. ²⁴ Jesuuri cuno pojori sequeree:

—¡Niiquiji nia tohuareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatani-jioree saaja. Na nuhuaji, sohuacamara tiuquimiaari macuucua. Na juaashiquiaajini nia quiaaseeri. ¡Maaji samiriuri sanemaa! ²⁶ Naa Jesu miishanojinijiri pahuatasaaquiaari puetunu cuno jiyajiniajanaa.

Jesu jeecasacari caapiqui cariyojuaru namijiaa

²⁷ Canaa jaara tohuareetaquiaari cuno tiajinijini, caapiqui cariyojuaruuri Jesu nuhua-jiquiaari. Canaa nuhuaji nacariquiaari nojori niishishacari Jesuuri seetanujanaa Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaajal!

²⁸ Canaa tiuquishacarihua canaa quijia tiajinia, cariyojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riuucatureeri:

—Jaa, jiyaniijianaa. ¡Quia naatacuuaquiniatejaj!

²⁹ Jesuuri na juaashiquia niaree nojori namijiaacua. Jesuuri cariyojuarujuri sequeree:

—Cucua nia tiuuniucua, cuara quiriiraa taa nia sequereecuajani,

³⁰ Cuno pojori namijiaari maniniujiaacara quiquiaarihua. Jesuuri jiyanhua nojori rootaree:

—¡Majaari tamasaca niquiara nia pahuatanu cua miishano!

³¹ Na tohuareetasacari, cuno cariyojuarujuriiri ritia pahuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariyojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj.

³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanhua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojujaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanajoquiaari Pueyaso rupaa na pahuatanura, puereetuca tiacajinia, shiitianiyojua tiacajiniano. Maninia rupaa pahuataquiaariiri

Pueyaso secojojua tiacajiniaqueya, pueya niishiniuria taa Pueyaso jiyanoonu paniya no-jorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejacanio.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquirio-josano pueya sequequiaari:

—¡Nia niquiri! Jiyanohua queraatia pueya. Cuno pojoriiri juhua puereetuuca suchohua. Saniniuujia, secajaari na senoonaa. ³⁸ Nocujaji nia sequeyanijia, na Camaru nia secojore, nojuaja cuara jiyaroora queraatia poonijionaa na senoeriquiano nera.

10

Jesu saquiriojosacari doce pueya na jiyaramiquishocoriqiano

(Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojini-uria, canaa na jiyaramiquiyaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujua-na canaa shaatanurajuhuj.

² Niiori canaa sesaca, na jiyaramiquishocoriqiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaar-ijiuhuaj. Quiriquiaaariuhua Santiago, tarajanu Juannio. Cuno pojoriiri Zebedeo niqiohua quiquiaari. ³ Felipeeri quiriquiaajuhuj, Bartolomé, Tomásno. Quiriquiaa-jaariuhua janiya Mateoni. Janiyari tarijia quiquiaarini cumaneeca masejojua Romano jyanijijara. Quiriquiaaariuhua socua tamonu Santiago. Cuno Santiagoori Alfeo niyanu quiquiaari. Quiriquiaaariuhua Lebeo. Na sesa tarajanuuri quiquiaari Tadeo. ⁴ Quiriquiaaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriquiaajuhuj. Nojuajaari Jesu quiateriquiano quiquiaari mosocoriqiano.

Jesu rootasano na pueya na jiyaramiquiyaquishacarijia

(Mr 6.7-13; Lc 9.1-6)

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiariiri, canaa na jiyaramiquiyaquishacarijia. Naa canaa seque-quiariiri:

—Majaari taucacaacua nia quiojonu. Naajuhuj, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioono quia. ⁷ Nojori niqiuara nia pohuatate puetunu tiacajinijanaa. Nojori nia sequere: “Pueyasoori quiarjia nia jitianu paniya, niaa jaara na rupaa tojitajacara quiri”. ⁸ Cusosuhua nia naatanijiore. Macunucua nia samiitianijiore. Canapuate lepra cusonu jitianu, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacujaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuara niqutioora saniniuujia nia panishano.

¹¹ Nia rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tijinia nia jiyojetare, niaa cuara cuniquiji quiaarejaatijia. ¹² Niaa jaara tamonu tijinia tiuquishiiquia, pueya nia sequere naatej: “Pueyaso cuara nioojia cajitiiria”. ¹³ Cuno tijinia quinaa jaara maninia pueya quiri, juhuajaniya quiniutianiyari taa nia sequerecujani. Nojori jaara Pueyaso tojiyashijaca quiri saniniuujia, nojori juujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniaquiri na tijinia, Pueyaso Rupaa ruuretajaca nojori quiniucua, nojori niqiuara nia niohuacaacujaji nia rapijiotare jiya jooocua. Naacujitij, cuno pueyari niishiniutianiya Pueyasoori nojori jiyanoquiniutianiya, nojori maseyaquiniucua na rupaa pohuataana. Naa nia miirijuhuj cuno tiaca pueya niqiuara, cuno pojori jaara

Pueyaso rupaa tojiniu paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyanoehua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

Pueyaso rupaa pohuatanaari naquiya miishaanutaniya

¹⁶ Socua cua tojitiare. Janiyari nia jiyaroya Pueyaso tojtiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuani. Nojoriiri sesa miiniutianiya nijaniya. Nocuaji jiyanoehua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucua nia saniitiosaanura, nojori tojiniu paniyaquishacari cua rupaa. Niaari Pueyaso secojoja tiacajinia piquishaanutaniya. ¹⁸ Cua rupaa nia pohuatanucua, niaari quioosaanutaniya tiaca jiyaniijianucua nia, nojori nequesoreenura nijaniya. Niaari jiyaca jiyaniijianucua niquitiosaanutaniyajuhaaj. Naajaa, naacuajitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio. ¹⁹ Naa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaa maninia nia riucuanura. ²⁰ Naacuajitij, nia riucuanoori maja tama nijaniyajinijijaaja quiniutianiya. Pueyaso Sohuanu cutaraari nia pohuatenutaniya jiyaniijianucua niquiara.

²¹ Pueyari tama tarajanujuaaja niquitioanutaniya mosocoriquiano, tarajanu tiuushacari cucua. Pueyanoori neyanu niquitioanutaniya mosocoriquiano, cucua neyanu tiuuniucua. Mueraaspueeri tama na queya tacartanutaniyajaacujua na motenura, na queya tiuushacari cucua. ²² Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanujuaja nia tucuaa quishacari nia pohuatanu Pueyaso rupaa puetunu Israel pueya tiacajinijanaa, janiyari jiyocuaanuji tacatenutanihuani.

²⁴ Nio nia niishirijiuhaaj. Pueyanoori maja socua tojishano na niishitiojonajiniji. Naajuhuaaj, seruuri maja socua tojishano na camarnujiniji. ²⁵ Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijiuhaaj. Maniniacuajaari, seru jaara juhua na camarnura quirijiuhaaj. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na nuerasu sesacasaanutaniyatej?

Cante socua pa pueresaroni

(Lc 12.2-7)

²⁶ Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhaaj. ²⁷ Jiyasohuaja cua niishitiojosano nijaniyani, cuno nia pohuatare puetunu pueya niquiarajanaa. Cua sasacjosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacujani mani quiquiojinia nia sohuanu na quejoonura, nia cuaqueyano.

²⁹ Pa naata saaja niquiriyatu cumaneeniyajuata caapiqui shiyojuanijojua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. ³⁰ Naajuhuaaj, Pueyasoori puetunu nia naca cjasu niishiyajanaa. Puetunujuaanaari na serojosano quiya. ³¹ Naacuajitij, maja nia puerenu. Niaari jiyanoehua socua Pueyaso panishano queraatia shuhujiniji.

Maja cumaati Jesucristojiniji pa caririqiniu

(Lc 12.8-9)

³² Níaa jaara tamasa pueya níquiara sequere níaari cucua tiuujíaca cutara, janiyacua jiyocuaaanu quijía cua Que níquiara sequerejaníahuaj, níaari cua muerasu. ³³ Cante saníniuujía cucuají seetaja tamasa níquiarani, janiyarí cua Que níquiara na tamacanutaniyajaacuhaj.

Jesuucua tiuujía pueyari narta pueya juaashano
(Lc 12.51-53; 14.26-27)

³⁴ Majaari nía jiyáníniu janiya mijiría níquiaraaní pueya quiniuría juhuajaniya. Maja. Mijiría cua níniuucua, pueyari juayonuujutanutaniya. ³⁵ Níquiaraí cutaraníjía pueya tiuuniuría cucua. Naacuajitíj, pueya tiuushacari cucua, cucua tiuyashjíaca pueyari nojorí níquíníu paníyaquíníutíaniya. Naacuajitíj, pueyanoorí na que paracaaníutíaniya, cucua tiuujía na que quíníuucua. Maajíirí na nucua paracaaníutíaniyajuhuaj, na nucua tiuuniuría cucua. Pueyano níquíocuaarí na reyarucua paracaaníutíaniyajuhuaj, cucua tiuujía na reyarucua quíníuucua. ³⁶ Naacuajitíj, tama pueya paníshano pueyajaajaaari na paracara quíníutíaniya, cucua nojorí tíuuníuucua.

³⁷ Cante na queya paníjía socua janiyajíníjíní, jíyano pueyanoorí maja manínía cua pueyano na quíníuría. Cante necohua paníjía socua janiyajíníjíní, jíyano pueyanoorí maja manínía cua pueyano na quíníuríajuhuaj. ³⁸ Cante tama na cuaqueyajaaja panítíaaquíjía na tojíníuría janiyani, cunoorí maja manínía quíría. ³⁹ Cante saaja tama na cuaqueyajaaja cojuanu paníya shuquíriaatí na quíníuría mijíríani, jíyano pueyanotej, nojuaja cutaraarí shaajasaanutaniya, pueyaracaanu taraatí na míitíasaanura. Saníniuujía, cante tama na cuaqueyajaaja panítíaa naquíya na míishaanura cua tojíjía na quíníuucuaní, nojuaja cutaraarí ríshíjía jataníshaanutaniya. Seetanujuanaa cuata shuquíriaatí quíníutíaniya pueyaracaanuurí.

Pueyasoorí manínía míjía níquítionutaniya na jíitíasaanójíníj
(Mr 9.41)

⁴⁰ Cante na tíaco nía tíuquínítíaja cua rupaaajíníj nía pohuatásano na tojíníuríani, cuno pueyanoorí cua tojíyajuhuaj. Cuno, cante cua tojíjíaní, nojuajaarí cua Jíyarona tojíjíaajuhuaj. ⁴¹ Naajuahuaj, cante Pueyaso rupaa pohuatana tíuquínítíaja na tíaconí, Pueyaso rupaa pohuatana na quíníuucuaní, Pueyasoorí cuno pueyano níquítionutaniya manínía na casaajíníj. Nojuajaarí níquítíasaanutaniya maríyata taa Pueyaso rupaa pohuatana níquítíasaanutaniyacuaaní, Pueyasojíníj na pohuatanu samí. Cante manínía míjía pueyano tíuquínítíaja na tíaconí, manínía pueyano na quíníuucua, na tíaco tíuquínítíaja pueyanoorí manínía casaa níquítíasaanutaniya maríyata taa manínía míjía pueyano níquítíasaanutaniyacuaaní. ⁴² Naajuahuaj, cante quenaaja shíníitíuníacu mohuaca raateya tamonuní, cua mueyaníyojua na quíníuucua, Pueyasoorí seetanujuanaa na jíitíasaanójíníj na níquítionutaniya na raatenu samí.

11

Tíuquíníjóna Juanrí na pueya jíyaroquíaaarí Jesu nequesotanura
(Lc 7.18-35)

¹ Jesu jaara canaa na doce saquírojosano pueya rootanu tucuaatíquaaarí tíi, nojuajaarí tíj quíaaquíaaarí cuno jíya tíacajínía quíníaa na níshítíojónura Pueyaso rupaa.

² Tíuquíníjóna Juan quíshacari nujatejójuaajínía, nojuajaarí jíyacarí níshíquíaaarí Jesucrísto míshanójíníj. Cunora, nojuajaarí na pueya jíyaroquíaaarí Jesuucua naa na nequesotanura:

³ —¿Quíaaate seetanujuanaa Crísto, taríuucuaaanu Pueyaso sequesano canaacua níríquíanotej? ¿Canaate tamonu sashíya soj?

⁴ Jesuurí nojorí ríuucaree:

—Nía quíaaarohua. Tíuquíníjóna Juan nía pohuatásuhua puetunu cua míshanójuaana nía níquíshano, nía tojíshanójahuaj. ⁵ Naa nía pohuatásuhua: “Cariyójuaríurírí tarí níquítíarohua. Shípííníquíníuujíacaarí manínía rucoorohua. Shu míaqueja cusonu jíítíajacaarí tarí jeequerohua. Numueejunucuaarí tarí tojítíarohua manínía. Macunucuaarí samítíacorohua. Casamíjúníuucua pueyari Pueyaso rupaa pohuatasaaree, Pueyaso

muerasura nojori quiniuria". ⁶Shuquiriaatia quiija cutaraari noo pueyano, cante cucuaji taacanuyaquijiani.

⁷Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjini naa pohuatanu coteequiaari pueya niquiaratej:

—¿Casaa niquiniuucua nia quiojocanu cariquia jiyajiniani? ¿Niaateeri paratu pi-yarojosano naajua niquiniuucua quiacanu? Maja. ¿Tiuquinijiona Juanteeri noojia niquijoteja? Maja. ⁸Cua sequeture, ¿casaa niquiniuucua nia quiojocanuni? ¿Niaateeri pueyano niquiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quiijaca cutara, maja cariquia jiyajinia. ⁹¿Taateerinitioj? ¿Casaa nia quiojocanuurini? ¿Pueyaso sequenu panishano caminiujiunia niquiniuucuatee? Jaa. Seetanujuanaa nia sequeyanijia, Tiuquinijiona Juanri jiyanoehua socua cutara pueyano tamasa Puyaso sequesano caminiujiuniaajiniji.

¹⁰Cuno Juanjinijicuaajari tariucuaaanu Pueyaso Rupajinia pohuatasaaquiaari. Naa naajiotasaaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jeecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjini. Naajaa, cante Pueyaso muerasuniyojua quiya cucua na tiuushacari, cunoori socua cutara pueyano Tiuquinijiona Juanjini.

¹²Tiuquinijiona Juan jaara coteequiaari Pueyaso rupaa pohuatanu, pueyari jiyanoehua saniniujiuriquiaa Pueyaso muerasu nojori quiniuria. Pueyari naa saniniujiya quiarjiajuhuaj. Cante jiyanoehua saniniujiya Pueyaso muerasu na quiniuriani, naa quiniutianiyari. ¹³Supuetana Moisés, mariyata puetunu Pueyaso sequesano caminiujiuniaajanaari tariucuaaanu pohuataquiaari taa Pueyaso jitianutaniya pueyani. Naa poojotasaaquiaariiri Tiuquinijiona Juan jaara tiuquiquiaarijiaatijia. Quiarjiani, Tiuquinijiona Juanta, nojori pohuatasanoori tari tohuateenu coteya. ¹⁴Niaa jaara nio cua pohuatasanoocua tiuuni paniri, nia tojiri nio: Tiuquinijiona Juancuaajari tariucuaaanu pueyara Pueyaso sequesano caminiujiunia Elíascaja. Elíascajaari sequesaaquiaari niriqiano. ¹⁵Cante numaacani, cuara tojiiria cua sequesano.

¹⁶Nia pohuatareera taamuecate nio pa quishacari pueyani, quiarjiani paa na quiyani. Nio pueyari juhua naatujoori, canapete carijiniacuma tacuarishijionu paniya juucuan. Nojoriiri narta naatujooriicua nacaa, nojori tacuarishijionu panishacari juucua. ¹⁷Naa nacaaari: “Canaari juucua naajua jonenejyani. Majaari nia nianujunu panini. Canaa jaaquejeosacari taraatia saniniujia, majaari nia sapuenu”. ¹⁸Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujajuhuaj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaratijuhuj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

Jesu piriyojosacari tojyashijianucua pueya

(Lc 10.13-15)

²⁰Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiyauquiquiaari. Nojoriiri maja noojia na tacatonu quiquiaari sesa nojori miinijiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quinaa pueyari:

²¹—¿Niaari taraatia sanihtioaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasoocua tari noojia tacatocanu cutara. Nojori maara ritia cocuaque toqueya cushiyonuquiaari

nojori tacaani niishishaanura sesa nojori miishanoiniji. Naajuhua, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniucua. ²² Naaratej, janiyari nia numooteyani: jiya puequesacari, niari socua jiyanhua saniitiosaanutaniya Tiro tiacajinia quinia pueyajiniji, Sidón tiaca pueyajinijio. ²³ Capernaum tiacajinia quiniaanaa, ¿niaateeri jiyaniya niari tamasa tiaca shocotanutaniya nia jyanishacari niari socua maninia cutara? ¡Maja! Niari mani quiquiojina quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriqiaajaj. ²⁴ Nocuaji nia sequeya cutaranijia: jiya puequesacari, niari socua jyanohua saniitiosaanutaniya Sodoma tiaca pueyajiniji.

Jesuucua tiuuniaari samaateriquiano cutara
(Lc 10.21-22)

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanjia cua Quena. Quiaari jiya camarnu, jiyocuaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocuaaja tuujiaca. ²⁶ Naacuajitij cua Quena, quiaari maninia niishitirii niishiyashijiaca pueya, taa quia paniquiaaricuajani.

²⁷ Cua tojitiare pueyanaa, cua Queeri cua niqutioquiaari puetunu casaajanaa cua jiiiasocoriquiano. Majaari seetanujanaa tamasa niishiniu janiya. Saa cua Queja cutaraari cua niishiya. Naajuhua, majaari seetanujanaa tamasa niishiniu cua Que. Saaja janiya, Neyanuni, na niishiya cutaranijia, naajuhua canapue cua niishitiniu paniya cua Quecuajani. ²⁸ Cucua nia nijiore, puetunu nijaniyajanaa, canapue tacaquioyani, canapue puera niishiriojonuuacani. Naa jaara cucua nimia, janiyari nia samaraatanutaniyani. ²⁹ Cua niishitiosano nia tojiri. Janiyajiniji nia niishiri taamuecatucua janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaani quiniutianiya nia rupuesacari janiya. ³⁰ Naa tojishacari janiya, nioojiaari juhuajaniya quiniutianiya. Cua poonitijosacari nijaniya, majaari jiyajeneta na quini quiniutianiya niaara, cua cumaquishacari nijaniya.

12

Jesu pueya carojotasacari trigo samaatenu juuca
(Mr 2.23-28; Lc 6.1-5)

¹ Jiyacaritij, Jesuuri canaa na saquirojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nuuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocua jaara canaa niquiquiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitia! ¡Na shuquiquiojonuuyari! ¡Naa nojori miishacaritij, poonijionuuyari! Cuno maja panishano samaatenu juuca miiniuria. ¡Pa supuetana Moisés cuajaari naa pa rootaquaaritij!

³ Jesuuri cuno nojori riucaaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacari, na pueyano? ⁴ Nojori Pueyaso Secojoua tiajinia tiuquiti-aquiaari. Pueyasora niqutiojosano pan satureeri. Cuno panri saaja pueyacuara secोजना sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niqiuara. ⁵ Naajuhua, ¿majateeri nia serojonu quiquiaari tariucuaanu Moisés naajiosanoinia, taa pueyacuara secोजना pueyaracaanu poonijioquiaa Pueyaso Secojoua tiajiniani? Nojori naa poonijionuquiaa samaatenu juucajuhua. Naa nojori poonijosacari Pueyaso Secojoua tiajinia samaatenu juucatej, cunoori maja sesa. ⁶ Moisés cuajaari pa rootaquaari maja pa poonijionura samaatenu juuca. Naajaa, cuno rootasanoori seetanujanaa maja na quini Pueyaso Niyanura, jaara Pueyaso Secojoua tiajinia poonijionaara quiaquirijuhua. ⁷ Maja naasuaari nia niishiniu quiquiaari casaa nio tariucuaanu naajiotasano niishitiojia

nijaniya juucuan. Naa sequeyari: “Janiya cutaraari socua nia panitiaani niarta pueyacu nia taraajenura, maja saaja nia niqutiojonura nia seya cucuara catijiasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiaquiriquiaj. ⁸ Cua tojitiare quiarijia. Janiyacuajaari Pueyaso Niyanuni. Naacujitij, mijiria cua quishacari cua naata sequenu casaate samaatenu juuca miishiyan.

Jesu jeeacasacari pueyano juaashiquia cuseetucjuara joojequetano
(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniqijini. Canaari Pueyaso Secojuua tiajinia tiuquishiini. ¹⁰ Pueyanoori tii quiriquiaa cuseetucjuara joojequetano na juaashiquia. Taa canaa Judiucua camarucua Jesuucua saquiriojotanu paniriquiaa juucacuajani, jiyacaritij, na sapojonuta Jesu nequesotaturee naari.

—¿Maniniateeri samaatenu juuca cusosu naataniniuria? Paacujaruhua niishitiojosaaquiaarini maja pa poonijionura samaatenu juuca.

¹¹ Jesuuri cuno pojori riucaaree:

—Naa jaara niquiriyatujua borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¿Taaquiririnij! ¹² ¿Majateeri pueyano socua jiyanohua panishano borregojiniji? Taaquiririnij. Naaratej, maja pa tarinitianu maninia pa miiniuria pueyaracaanu, samaatenu juucajuhaaj.

¹³ Na nuhuaji, sesarucjuua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocua niquishacari Jesu miishanotej, tohuareetaqueeri. Tama nojorijiaarijia roojotooquiaari nojori motenura Jesu.

Jesujiniji pohuatasano tariucuaaanu naajiotasanojinia

¹⁵ Jesu jaara niishiquiaari Fariseocua miiniu panishano nojuaja, quiniqijii quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶ Jesuuri na naatanijosano pueya rootaquiaari maja tamasa niquiara nojori pohuatanura cante nojuajani. ¹⁷ Naacujitij, tariucuaaanu Pueyaso sequesano caminiujunia Isafas pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriqitij:

¹⁸ “Niocujaari cua seru, cua saquiriojosano. Na timitiaanijia. Nojuajaari jiyanohua cua panishano. Janiyari cua Sohanu jiyaronutaniya nocuani. Nojuajaari tamasa pueyapue pohuatanutaniya janiyajiniji, nojori quiniuria cua muerasura pueyaracaanu. ¹⁹ Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. ²⁰ Majaari quenaaja shuniitiasano naajua na shutianu quiniutianiya puetunujuaana. Naajuhuaaj, majaari na maquishajanu quiniutianiya jatarinitiaja nojityano samaritiu. Nojuajaari naa sesa miijiaa jiyanooniutianiya, nojuaja jaara tiuquiriohuajaatijiaj, puetunu sesa miiniujianaa na puecanura, jiyaniijajanaa na quiniuhua pueyaracaanu. ²¹ Puetunu tiqiyocuaajinijinio quijiaa pueyajanaari nocua tiuuniutianiya”.

Pueya sequesacari Jesu samaru cumaacaracana

(Mr 3.20-30; Lc 11.14-23; 12.10)

²² Tiquiaari Jesuucua jaatucusaquiaari. Cariyojuaru quiriquiaajaarihuaj. Naa quiquiaariiri samaruraca na quiniucua. Jesuuri na jeearee. Naacujitij, tiquiaari pocuajara quiquiaari, niqijiarajuhuaaj. ²³ Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyoteeri pa supuetana David niquiohuacuajinio supueno pueyano, tariucuaaanu sequesano pa jiyaniijara quiriquianotej!

²⁴ Fariseocua jaara tojiquiaari naa pueya sequesacari Jesujinijitij, nojoriiri na juaaniutia sequesquiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵ Jesuuri cuno pueya niishiriojosano niishiquiaari. Cunora, nojori sequeereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhua, tiacajinia quinia jaara juayonuutare jiyareta tama nojorijiaaja, cuno pueyari maja na naata quiniu jatiqui. Naajaariuhua, pueyano jaara juayonuujutare tapueyocucata tama na tiajiniaaja, majaari nojori naata jatiqui quiniu. ²⁶ Jaara naa quiriritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacuaajani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanáste? Majaruhua. Nojoricuaajari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyanoehua jiyajeneya nia sequesacari janiya samaruhua tohuatanijiya Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaruhaatej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiaquiri. Jaara na morojore coteenu, na nuhuaji cutara na naata na casami panu. Naajuhua, janiyari Pueyaso cumaacata jaariuutiaa Sesaaca jiitiasano pueyani.

³⁰ Cante cua jiyano quiaquiyani, cunoori cua paraca. Cante cua naacutaaquiy pueya rerecojonura Pueyasorani, nojoriiri saaja pueya cocuataa Pueyasocuaaji.

³¹ Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhua. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Niyano sesacajani, nojuajaari na naata jiyanooshaanujuhua. Saniniuujia, cante Pueyaso Sohuanu sesacajani, nojuaja cutaraari jiyanoaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhua.

Naanaari niishishano na jajaujiniji

(Lc 6.43-45)

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaa quiyajaa? Paari poojiajiniji pa niishiriojosano pocuquiaani. ³⁵ Naacuajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuajari. ³⁶ Nia sequeya cutaranijia, Pueyaso saniitionu juuca, pueyari puetunu najuhuaana sesa na pocuasanojinijianaa nequesoresaanutaniya. ³⁷ Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhua, cante sesa casaa pocuaja quiquiaarini, nojoriiri saniitiosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

Fariseocuaca niquiniu panishacari Jesu miishano Pueyaso cumaacata

(Mr 8.12; Lc 11.29-32)

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niqishocoriquiano.

³⁹ Jesuuri nojori riucaaree:

—Niaari sesoriquia pueya, Pueyaso tojiyashijiaca. Majaari nia niqiara casaa cua miiniu quiniutianiya Pueyaso cumaacata. Niaari saaja niqiriyatu cutara miishano

niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari. ⁴⁰Nojuajaari puereetuuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuaaj, janiyar raaco macu niujoasaqui camueenujunutaniya jiuujianaraca juucani, jiuujianaraca niucuanio. ⁴¹Jonás pohuatasacari Pueyaso rupaa Nínive tiacajinia, cuno tariucuacaanu tucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatanutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijiajanaa cutara Jonásjiniji. ⁴²Naajuhuaaj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojinuucua. Cunoori quiquiaari jiyanojua niishijia Salomón quiniuucua. Cuno maajiiri pananu shuucuaji niquiaari Salomón na tojiniuria, jiyanojua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoricuara saquiriojotanutaniyar nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua

(Lc 11.24-26)

⁴³Samaru jaara tohuatare pueyanojiniji, joojuashiquio rucuaneyari na samaatejara na pajesacari. ⁴⁴Jaara riuriataaquiri na samaatejara, naa niishiriojiyar: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriatasuhuari juhua camaruju tia, netoosano, maninia jeenucuasano. ⁴⁵Naaratej, samaruuri socua tamasa narta samaruhua pajeya. Socua siete narta samaruhua riuriataari socua jiyanojua sesa nojuajiniji. Puetunu nojorijianaa jaara tiuquitiare cuno pueyanoojua tii na quiniuria, cuno pueyanoori na nuhuaji socua jiyanojua sesa quijara jiyacateja.

Naa quiniutianiyajaariuhua nio pa quishacari pueyara na tojitiaaquiniuucua janiya. Nojoriiri socua sesa quijacara jiyacatenutaniuhua taa cua niyacarijia quijiaa nojori quiquiaaricujani.

Cante seetanujuaana Jesu nucuani, tapueyocacajuhuaaj

(Mr 3.31-35; Lc 8.19-21)

⁴⁶Jesu pohuatasacarijia pueya niquiara, na nucuari tiuquijioquiaari Jesu tapueyocacata Jesuucua. Carijiniacuma quitiuriquiaari. Jesuta pocoojonu paniriquiaa juucaari. ⁴⁷Tamonu pueyanoori Jesu sequere:

— ¡Niishitiojonanaa! Quia nucuacqui quia tapueyocacata carijiniacuma quia. Quia pocoojonu paniyaquinaari.

⁴⁸Jesuuri saaja na numootena pueyano riucaaree:

— ¿Cante cua nucuani? ¿Cante cua tapueyocacani?

⁴⁹Jiyacaritij, Jesuuri canaa na tojitianaa pueya shishirii. Tii quiniaa pueya sequereeri:

— Nio cua tojitianaani, nojori cutaraari juhua cua nucua, juhua cua tapueyocacata cutara. ⁵⁰Naacajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuanio.

13

Natoojoua pueyanojiniji pohuatasano

(Mr 4.1-9; Lc 8.4-8)

¹Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ²Jiyanojua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquijinia jateequiaari, tiji na tojitianura Jesu canaata. ³Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

— Pueyanoori natoojonura quiaquiaari na cuhuariquiajia. ⁴Na jacutasacari, secajaari nucoo totequiaari. Shuhuari nocua rosetaquiaari. Puetunujuanaa nucuacoji na natau miojoquiaariiri. ⁵Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶Panaru

jaara tacaquiaari, cuno natauri ritia sorequiaari maja puera nujuacaraca na quishacari. ⁷Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸Maninia jiyajinia totequiaariiri tajaaca saniniuujia. Tii moritaciaquiaari maninia cutaraari. Maninia muetuquiaari cutaraari. Puetunu cuno jiyoneejiniijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhuj. Socua tamonu jiyoneeri muetuquiaari treinta jajau. ⁹Niaa jaara numaraca quiri, nia tojtitiare cua pahuatasano.

Casaara Jesu niishitiojiya miriquini

(Mr 4.10-12; Lc 8.9-10)

¹⁰Jesuuri naa pahuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini: —Jiyaniijianaa, ¿casaara pueya quia niishitiojoriquiaa miriquini?

¹¹Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijija pueya jiuujajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹²Cante Pueyaso rupaa tojjia cutarani, nojuajaari socua niishitiojosaanutaniya, Pueyasojiniji jyanohua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanutanijajanaa nojorijiniji. ¹³Cunora, janiyari miriqui pohuatariquiaa nojori niquiarani. Naacuajitij, nojoriiri najuhuaa niquiquiaa cua miishano na niishiyaquiniutia. Nojori tojishacari cua pahuatasano, na numaa shama tojtiquiaa saajaari. Majaari quenaaja nojori niishiniu na tojishano. ¹⁴Naa nojori quiniucuatej, tari tohuateereeri juhuacaribia supuetana Isaias sequesano nojorijiniji. Pueyara Pueyaso sequesano caminiujunia na quiniucua, nojuajaari nia sequequiaari pueyatej:

“Niaari seetanujanaa Pueyaso rupaa tojiniutianiya najuhanaj. Majaari nia niishiniu quiniutianiya. Niaari Pueyaso miishano niquiniutianiya najuhanaj. Majaari nia niishiniu quiniutianiya nia niquishano. ¹⁵Nojoriiri cumajiuujiaa quia. Nojoriiri juhua numueju, tojiyashijiaa. Nojoriiri juhua nimishitiu quiyajuhuj. Naa juhua nimishitiu qitiuyari nojori niquiyaquiniucuaaji. Nojoriiri naa juhua numueejunucuaajuhuj, nojori tojtiaaquiniucuaaji noojiata. Naa qitiuyari nojori niishiyaquiniucuaaji noojiata, cucua nojori tacatenuhuara cua jeecanura nojori jiuujia seque”.

¹⁶Cua pueyanaa, niaari saniniuujia shuquiriaatia quia maninia nia niishishacari cua miishano, nia tojishacari cua pahuatasanojuhuj. ¹⁷Seetanujanaa nia sequeyanijia, queraatia tariucuaaanu pueyari quiarjia nia niquishano niquiniucua jiaatiaquiaari juucua. Naa nio niquiniucua jiaatiaquiaariiri tariucuaaanu Pueyaso sequesano caminiujunaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniucua jiaatiaquiaari juucuaajuhuj. Majaari nojori tojiniu quiquiaari saaja.

Jesu niishitiojosacari miriqui na pahuatasano natojojuajiniji

(Mr 4.13-20; Lc 8.11-15)

¹⁸Nia pahuatareera nia niishiniuria cua pahuatasano natojojuajiniji. ¹⁹Canapete Pueyasojiniji cua pahuatasano niishiyaquiyani, nojoriiri juhua nuucaco toteno jajau. Sesaacaari niquiaa. Pueyaso Rupaa jaariutiaa noojajinijiiri. ²⁰Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹Nojoriiri juhua nujuacaaju. Majaari cumaatia na nuuatunu. Naaratej, nojori jaara naquiya miishaare Pueyaso Rupaa tojjiaa nojori quiniucua, nojoriiri ritia Pueyaso tojiniu tarinitiaquiaa. ²²Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhuj, nojoriiri sapojosaquiaa nojori jyanishacari nojori jaara queraatia casamiriaca quiriquia, nojori maara shuquiriaatia quiriqiaj. Cunora, Pueyaso Rupaari maja na naata poonijionu nojori

jiuujiyajinia. Naacuajitij, cuno pueyari juhua natau muetuhuo quiquiaa. ²³ Saniniuujia, cante maninia tojjijia Pueyaso Rupaani, maninia na niishiyari. Cunoori juhua jiya maniniuujinia jacutasano jajau. Naacuajitij, cuno pueyari juhua maninia natau, maninia muetuna cutara. Jiyanhua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujuajuhuj.

Jesu pahuatasano miriqui trigo tajinia moritaja sesa jiyasocujajiniji

²⁴ Jesuuri tamonu miriqui pahuatasano pahuataquiaari pueya niquiara, nojori na ishitojonura taa Pueyaso tojitiaashijia pueya quiniutianiya Pueyaso muerasu tajiniani. Jesuuri naa pueya pahuataquiaari:

—Tamonu pueyanoori maninia jajau nataquiaari na cuhuariquajinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquajiniaari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyo. ²⁷ Cuhuariquia camaru seyari quiaquiaari na camarujanaa nojori sequenura: “Jiyaniijianaa, ¿majateeri maninia saquiriojosano jajau quiquianucua quia natasano cuhuariquajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸ Cuhuariquia camaruuri nojori riuucaree: “Pa paracaari cunohuj, naa pa miiruucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seya sequere saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiiriajaara trigo jajau. Na nuhuaji cutara janiyari senoona jiyaronutaniyani, cuaara coteenu jiyasocua namirioora, nojori jiunioconura jiyasocua catijiasocoriquiano. Na nuhuaji cutara, cuaara trigo jajau racatatura nataco”.

Jesu pahuatasano miriqui mostaza jajaujajiniji

(Mr 4.30-32; Lc 13.18-19)

³¹ Jesuuri socua miriqui pahuataquiaari pueya niquiara, na niishitojonura taa Pueyaso poonijija pueya jiuujajiniani, nocua nojori tiushacari. Naa sequereeri:

—Tamonu pueyanoori mostaza jajau nataquiaari na cuhuariquajinia. ³² Seetanujanaa mostaza jajauri socua jiyanhua shiitianiyojua puetunu tamonu jajaujajinijianaa. Naajaa, cuno mostaza jaara maashiri, socua puereetucara maashijiaari narta nataacuacajiniji. Naacuajitij, shuhuari na cashacucuaa Jesuya. Naajuhuj, pueyano tojishacari Pueyaso rupaa, seetanujanaa maninia Pueyaso muerasura jatanishiyari.

Jesu pahuatasano miriqui pan poreetajajiniji

(Lc 13.20-21)

³³ Jesuuri nio miriqui pahuatasano pahuatarohuacuhua pueya niquiara, taa Pueyaso Rupaa poonijija mijiriani. Nojori sequereeri:

—Pueyaso rupaari jiyanhua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuta, puetunujanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

Casaara saaja miriqui sequesano pahuatasaaquiaa pueya niquiarani

(Mr 4.33-34)

³⁴ Puetunu Jesu pahuatasanojuanaa pueya niquiarani, miriqui sequesanoori quiquiaari. Puetunu na pahuatasanojuanaari naa quiquiaaritij. ³⁵ Naacuajitij, maninia tohuateequiaariiri tariucuaaanu pueyara Pueyaso sequesano caminiujiunia sequesano, jaara nio naajiotaquiaari:

“Pueyasoori naa sequayaquij: ‘Janiyari pueya niishitojonutaniyani saaja miriqui cua pahuatasano. Naacuajitij, janiyari pueya pahuatanutaniya pueyaracaanu nojori niishishoo casaani, shusha jiya shipinishaanujiniji’”.

Jesu niishitiojosacariuhua miriqui na pohuatasano sesa jiyasocujiniji

³⁶Na nuhuaji, Jesuuri pueya maanu sequeree:

—Tariucuaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojosano pueyani, canaari nocua catecanouquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

³⁷Jesuuri canaa sequeree:

—Janiyacuajaari cunoni, maninia jajau natojojuani. ³⁸Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquajinia natasanoni. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquajinia natau tajinia maashinioni. ³⁹Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. ⁴⁰Naatej, taa sesa jiyasocua namitiashiya catijiasocoriquianocuaani, naa quiniutianiyajaariuhua nio jiya puequesacari. ⁴¹Janiyari cua seya jiyaronutaniya jiyocuacaanuujini. Nojoriiri sesa miijiaa quioonutaniya, mariyata canapute tamasa miitiquiaa sesani. ⁴²Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaa miaquenutaniyari. ⁴³Na nuhuaji, Pueyaso tojtiajacaari jiyanhua shacantuucara quiniutianiya juhua pananu, na Que Pueyaso jiitiasacari nojori pueyaracaanu. Cante numaaracani, cuara tojtiaara cua sequesano.

Jesu pohuatasano miriqui jiyanhua panishano casaajiniji

⁴⁴Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanhua panishano. Nojuajaari naa sequequiaaritij:

—Tamonu pueyanoori tamasa cuhuariquia tajiriquiaa juucua. Casaa riuriatamaari, jiyanhua panishano casaa. Tiihia na jamorohuari tee na quiriquiaacuajani. Jiyanhua na shuquiritiasacari na riuriatasano casaa, puetunujuanaa tama na casamijiaaja niquitiojoreeri queraatia cumaneeca na jiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanhua na panishano casaari tama na casaara quiquiaarijiaaja. Naajuhuj, socua jiyanhua panishano cutaraari, Pueyaso pueyanora nia quiniuria. Cunoori jiyanhua socua panishano puetunu pa panishano casaajinijijianaa.

⁴⁵Socua nia tojori nio pohuatasano. Casami niquitiojonaari pueyaracaanu rucuaneroriquiaa shanhua cohuajaaca tiujiau na pajenura. Cunoori noturu shipinijosano sai quiquiaari. ⁴⁶Tamonu juuca, jiyanhua shanhua noturu saajia niquitishaaquiaariiri. Jiyanhua na panishano. Naaratej, puetunu na jiitiasanojuanaa niquitiojoriaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanhua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷Pueyaso Rupaari juhua puereetuca shiyaru na camaru jartasano caminiajinia.

⁴⁸Jaara mishaja quiquiaari sapitiaajata, pueyari na jayotaquiaari jaaquajiniara. Queraatia tamaatiuniucua sapitiaajaari tii quiriquiaa. Pueyari jaaquajinia cajitiquiaari saaja maninia sapitiaaja nojori saquiriojonura. Canaasatujinia na nojotureeri racatasocoriquiano. Sesa sapitiaajaari saniniuujia jacutasaaquiaari. ⁴⁹Naa quiniutianiyajaariuhuj jiya puequesacari. Naacuajitij, Pueyaso seyari rosetanutaniya, sesa miijiaa na saquiriojonura maninia pueya tajiniji. ⁵⁰Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quiaa miaquenutaniyajaariuhua naquiya na miiniutia.

Pueyaso Rupaari jiyanhua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohuatasanojuanaacuaja?

Canaari Jesu riucaareeni:

—Taaqiriirinij Jiyaniijianaa.

⁵² Jesuuri canaa sequeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijihuaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiri-acacuajani, quiarinio casamiriacajuhaaj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuuri. Canaari na nuhua-jiriquiaani. ⁵⁴ Canaari na maashijia tiacajinia tiuquiaariuhuani. Canaa tiuquijiosacari, canaari Pueyaso secojuaa tiajinia tiuquiaariini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijionurani? ⁵⁵ Na shipininiocuajaari suruhuatuujiniji casaa shipinijiona quijia. Na nucuacuajaari María. Na tapueyocuaacari Santiago, José, Simón, Judasnio. ⁵⁶ Na rimiatuhuuri mariyata niya pa tajinia quiya. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojiti-aacquishacari nojuajtej, Jesuuri nojori sequequiaari:

—Puetunu tiqiyocua pueyajaanaari maninia tojitiaquiaa cutara Pueyaso sequenu panishano caminiujunia. Saaja narta pueya tama na jiyajinijiniojuaarijia na tojitianu paniyaquiya, tama na tiajinijiniojuaja pueyano.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuquiniuucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanohua cumaaca jiitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niqiuocuata. ⁴ Tiuquinijiona Juanri naa Herodes sequequiaari quiasano na qiyaaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niqiuocuata!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujunia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyate. Jiyacaritij, cuno maaji Herodías niyatuuri nianujuquiaari Herodes masuusano pueya niqiuara. Jiyaniijia Herodesri jiyanoehua na shuquiritiaquiaari. ⁷ Naaratej, Herodesri necanuru sequequiaari puetunu pueya niqiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutiani. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seya sequequiaari cuaara niquitiosarianoj. ¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaaquiaarihua miacojuajinia. Niyacoo niquitiosasuhuari. Niyacoori saniniuujia na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaaci caminia shuriuquiuoco. Cuno pueyari canacuaji cutesee.

¹⁴ Naacuajitij, Jesu rosesacari botejiniji, jiyanhua queraatia pueya niqishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutiani. Juhucarijia pueya quia sequere nojori cuaara quiojohuara tiacajinia, na miaqueso-coriqiano nojori masenura.

¹⁶ Jesuuri canaa sequeree saaja:

—¿Maatucua casaara quiojyaroahuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiitianu miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriqiano. ²⁰ Puetunu pueyajanaari miaquenuuquiaari. Maninia tooquioreeri. Nojori puecasacari miaquenu, canaari pan neeca reratequiaarihuani, sapitiaaja raquiquiano. Doce canaasatuuri mishinijosaaquiaari na raacuata. ²¹ Jiyanhua queraatia pueyari miaquenuquiaari; cinco mil quiquiaari saa canuuja. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³ Pueya jaara tari quiojoquiaarihua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriqiaa tamajaaja. ²⁴ Canaari saniniuujia caminia jiuujiajinia tari jaare-tariquiaacuaani. Mohuacaari saaja canacuara cajiniucuariquiaa, paratu piyarojosacari canacuara. ²⁵ Juhuaquenu panishacari, Jesuuri canaa rupesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanhua shiriqitiuriini! Canaari sariyocuatereeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajaniija. Maja nia puerenu.

²⁸ Canaa tojishacari Jesu, Pedroori Jesu sequere:

—¡Jaara seetanujuanaa quiajaniya quiri Jiyaniijianaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanhua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijianaa cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocujaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajequee! ³³ Canaa niquishacari naa Jesu miishano na cumaacatatej, canaari Jesuucua mojoquetacoquiaarini. Canaari na sequereeni:

—¡Quiaaqui seetanujuanaa Pueyaso Niyanu!

Jesu naatanijosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jiyajinijanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhujanaa. ³⁶ Pueyari Jesu sequetuaquiaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinijinio pueyari canaacua tiuquijioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

² —Quia pueyari shuquitiojua miaquenuquiaa. ¿Casaara nojori tojtiaaquiquiaa canaa niishitiojosano pa supuetanaajinijini? ¡Nojori cuaara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajanitariuhuj? ¿Casaara nia tojtiaaquiquiaa saniniuujia Pueyaso Rupaani, nia supuetanaa jiidishano miiniu nia miiniuriani? ⁴ Pueyasocujaari sequequiaari: “Quia que tojjia quia quiri, quia nucua tojjiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniacuajaari pueyano jaara na queya sequere: “Cua quena, cua nucua, janiyari Pueyasora niqutionutaniya cua casamini. Naacuajiti majaari cua naata nia naacunu cua jiidiasano casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapuenu Pueyaso Rupaa tojtiajacanaa! Supuetana Isafasquiiri maninia naajotaquiaaricujaji niajanijiniji, na caminiuujishacari nio rupaa Pueyasojiniji:

⁸“Nio pueyari saa na rupaataja cua maniniuhuaqueetaquiaa. Nojori jiuujiaari saniniuujaia tucuaaanu quiya janiyajiniji. ⁹Nojoriiri najuhuana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰Na nuhuaji, Jesuuri puetunu pueyajanaa sequeree:

—Mji, nia cua tojitiaseecuarajaj maninia nia niishiniuria. ¹¹Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹²Jiyacaritij, canaa, Jesu saquirojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuaaari juaaquioree naa quia sequesacaritij?

¹³Jesuuri canaa riucaaree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasanua cua Que cuhuriquiajinia. Nojoriiri juhua sesa jiyasocua jayotasaanutaniya. ¹⁴Seetanujanaa Pueyaso niishiyashijiaca nojori quishacari, nojoriiri juhua cariyojuaru quiya. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

¹⁵Pedroori Jesu sequeree:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶Pedro riucaareeri:

—¿Niaateeri na niishiyaquiyajuhua? ¹⁷¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari.

¹⁸Saniniuujaia, pa rupaata pa pocuasano sesani, cunoori poojiajiniji tohuataa cutara. Naacujitij, pueyanoori sesa quiya Pueyaso niquiara, sesa casaa na pocuanuucua.

¹⁹Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquirojotanu paniniu; sacaraatia coriaacojonu paniniu.

²⁰Puetunu naa sesa pueya niishiriojosanojuanaa cutaraari pueyano sesojua. Saniniuujaia, pueyano jaara miaquere shuquitiojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhua.

²²Canaa rucuanesacari tii, cuno jiyajinijinio taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—Jiyaniijianaa, cucua quia taraajere! ¡Pueyaso Jiyarosanonaa, cucua quia taraajere quenaaja! Quiyatu samaru jiitiaa. Jiyanohua taraatia na miiquiaari.

²³Jesuuri maja na riuuanu quiquiaari. Sanaa canujiriquiaa saajaari. Naaratej, canaari Jesu catecanoquiaarini canaa sequenura nojuaja:

—Jiyaniijianaa, na panishano quia miiri cuaara quiohuara! ¡Taajeta nacaa pa nuhuajini!

²⁴Jesuuri canaa riucaaree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquioonu. Nojoriiri canaari jiyajinijia.

²⁵Cuno maajiiri Jesu sequesano tojirii. Naajaa, Jesu cariquimijia mojoquetaseeri. Na sequereeri:

—Jiyaniijianaa, cua naacutare!

²⁶Jesuuri na riucaaree:

—Majaari maninia pa jaariutianura pa niquiohua miaquesano, sare niquiohua niquitosocoriquiano saniniuujaia.

²⁷Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniojuacuajaari miaquesano shiriya miaquenuquiaa, na camaru totinijosano na miaquejajiniji.

²⁸Jesuuri maaji sequeree:

—Maniniacuaja quia sequesano maajinia. Quiaaqui jiyanohua cucua tiuya. Cuaara quiiriqui taa quia panyacuajani.

Jiyacartij, neyatuuri naataquiaariuhua.

Jesu naatanijosacari queraatia cusosuhua

²⁹ Canaari Jesuta cuniqiji quiaquiaariuhua. Canaari Galilea caminia shuriuquico tajimiaani. Canaari tuhuananuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquijuinia pueya, cariyoujarurjuro, tiquianucujuhua, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunjuanaa. ³¹ Pueyari jiuujiatequiaari nojori niqishacari tiquianucua pocoyano, shipiiniquijuinia rucuaneyano maninia, cariyoujarurjuro niqishacari maninijuhua. Naajuhua, sesarunecatohuari maninia numatucuaraca quiquiaariuhua. Naa pueya niqishacari Jesu miishanotej, nojoriiri Pueyaso maniniuhuaqueetaree. Sequetureeri:

—Jiyanohua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquirijosano pueya sequeree:

—Miji pueyanaa. Nio pueyacu taraajeyanijia. Nojoriiri tari jiuujianaraca juuca ca-muenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoni-uyarohua nucuacoori.

³³ Canaari Jesu nequesotareeni:

—¿Canaatucua tee riariatate queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiitiaani?

Canaari na riucaareeni:

—Canaa saaja siete pan jiitiaani, secaja sapitiaajaniyajuanio.

³⁵ Jesuuri pueya sequeree na cajituniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niqitiojonura pueya. ³⁷ ¡Puetunu pueyajanaari maninia miaquenuquiaari! Tooquioreeri. ¡Canaari miaquesano curenota mishinjioquiaari siete canaasatuni! ³⁸ Queraatia pueyari na miaquenuquiaari. ¡Saaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹ Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajinara.

16

Fariseocuaca, Saduceocuaca niqiniu panishacari Jesu miishano Pueyaso cumaacata

(Mr 8.11-13; Lc 12.54-56)

¹ Fariseocuacaari Saduceocuacata Jesuucua nijioquiaari nojori saniniujuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niqishocoriquiano, canaa niishiniuria quiaate seetanujuanaa Pueyaso jiyarosano.

² Jesuuri nojori sequeree saaja:

—Jiya jaara naatuuca quiri pananu tiquishacari, niaari sequequiaa: “Maninia juucaqui tariqui quiniutianiya”. ³ Naajuhua, pananu jaara tariquicuaji jama, niqitioocua jaara niqishaaarejuhua, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyani jiya nia niqishacari. ¡Mosanucuaana! ¿Casaara sanini-uuja nia niishiyaquia casaa Pueyaso niishitiojiya juucua nijaniyani? Nojuacuajaari juucua na cumaacata na miishano miiquiaa nia niqiara najuhanaj.

⁴ Jesuuri nojori niqiara sequerejuhua:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niquniu paniya juucua. Majaari nojori niqutishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji

(Mr 8.14-21)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. ⁶ Jiyacaritij, Jesuuri canaa sequeree:

—Niishijia nia quiri. Tama nia cuaqueyajaaja nia cojuare Fariseocuaca pan poreeta-jaacuaji, Saduceocuaca pan poreetajaacuajinio.

⁷ Cunora, canaari tama sequetooreejaanijia:

—¿Casa na sequeyani? Pan pa paaquiniucua naa pa sequeya jiyoteeri.

⁸ Jesu niishishacari naa canaa sequesantej, canaa sequereeri:

—¿Majateeri juhuanojuaja cucua nia tiuuniu maninia? ¿Casaara tama nia pocoo-jiyajaaja panjinijini? ⁹ ¿Majateeri juhuanojuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? ¹⁰ Naa jiyoteeri niyajetarucuaajuhuaaj taa canaasatu mishajate curecanuni, cuatro mil canuu jaara miaquenuucanu siete panjinijitij. ¹¹ ¿Casaara nia jiyaniirini janiya miaquesanojiniji sequeriquiaani? Maja cua sequenu panjiniji. Naa sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequesacari, canaari jiyacari niishiquini majaari Jesu sequenu quiriquiaa pan poreetajajini. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujuanaa Pueyaso Jiyarosano

(Mr 8.27-30; Lc 9.18-21)

¹³ Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴ Canaari Jesu riuquareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samitiarohuacuaa. Tamasacaari sequequiaacuajua, quiaanaari Elías, tariucuaaanu pueyara Pueyaso sequesano caminiujiunia. Tamasacaari saniniujia quia sequequiaacuajua, quiaanaari supuetana Jeremías, pueyara Pueyaso sequesano caminiujiunijuhuaaj, tamonu Pueyaso sequesano caminiujiunia soj.

¹⁵ Jesuuri canaa nequesotarahua socua:

¿Niajanियariuhuaaj? ¿Taa nia sequeyanijia? ¿Cante janiyani?

¹⁶ Simón Pedroori na riuquaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuaaanu Quijia cua Quecuajaari quia niishitirii cante janiyani. Janiyajini quia niishishanoori maja pueya niishitishano quiajaniya. ¹⁸ Janiyari socua sequenu paniya quiajaniyani Pedronaa. Quia sesaari Pedro. Niiori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuatata quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuaaj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutianiya cua muerasurani. Puetunu cua saquiriojosano pueyajanaari cumaatia nujuatunutianiya, nojori niishishacari janiyari Pueyaso Niyanuni. Naacuajitij, nojoriiri juhua puereetuua saajiaacua tiasano quiniutianiya. Puetunu cua muerasujuaanari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari

cua quiquiora. ¹⁹ Naajuhuaq Pedronaa, quiaari juhua cua quiquio tiotiu riatataja jiitiana quiniutianiya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasooocua nojori tiuquiniuria na muerasura nojori quiniuria. Naajuhuaq, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiiriatej. Naajuhuaq, quiaa jaara casaa tenujire, maja naa pueya miiniuriatej, Pueyasoori naa sequenutaniyajuhuaq.

²⁰ Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyanu.

Jesu numootesacari na pueya, nojuajaari mosaanutaniya

(Mr 8.31-9.1; Lc 9.22-27)

²¹ Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoehua. Pueyacuara secojonaa jiyaniijianucuaari nojori rupenutaniya naa cua paracaashaanurajuhuaq, mariyata tariucuacaanu Moisés Naajoneejiniji niishitiojonaano. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuanu.

²² Naa Jesu sequesacartij, Pedroori Jesu jaatucuree tamocora na nacasunura tamajaaja. Jiyanoehua Jesu sequereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaa-nuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacartij, quiaari cua Que sequesanoocuaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjijara quiniu paniya, nojori cuaara carteera tama nojori panishanojuaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoehua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuaq, pueyano jaara masere puetunu nio jiya casamijanaa, na casamiiri najuhuaa quiniutianiya nera, na camaru jaara jatasaae mani quiquiojinia na shaajesacari. Nojuajaari maja na naata Pueyaso jiyanootiniu tama na cuaqueyajaaja, naajaa, nojuaja jaara puetunu na casamijanaa niquitiore Pueyaso, Pueyaso samiitianiniuhua nojuaja.

²⁷ Janiyacuajaari jiyanoehua shacantuuca quijjara quiniutianiyanu, cua Que jiyatesacari janiya Jiyaniijiarajanaa. Na nuhuaji, janiyari mijiria niiniutaniuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niquitiosaanutaniya maninia nojori miiniuucua. Pueyaso tojjitiaashijjaacaari saniniuujia naquiya miishaanutaniya, sesa nojori miiniuucua. ²⁸ Seetanujuanaa nia sequeyanijia, noojiaqueya nijaniyajinijinio niya cuata quiyani, majaari nia shaajenu quiniutianiya juhuanajuaja, niaa cuaara niquirijiaatijia Pueyaso cumaaca cucua tiuquiyano, cucua tiuujiaa jiitiariquiano.

17

Jesu jatasacari shacantuucara

(Mr 9.2-13; Lc 9.28-36)

¹ Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojori-iri quiquiaari Pedro, Santiago, Santiago tarajanu Juannio. Jiyareta tama nojorijiaarijia quiaquiaari. ² Jesuuri tii tamaatiara jataquiaari nojori niquiara. Na jiquiocoori jiyanoehua shacantuucara jataquee, juhua pananu. Na toqueeri mariyata jiyanoehua cohuajara

jataquiaarijuhuaj, juhua cuhuatana. ³Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. ⁴Cunora, Pedroori Jesu sequeree:

—¡Jiyaniijianaa, canaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuaj, Elásranio.

⁵Pedro pocuasacarijia, shacantuuca najacaari nojori mishiquioma. Najacajiniji, ru-paari tojishaaquiari naa sequeyano:

—¡Nioori cua Niyununiyojua, cua shuquiritasano! ¡Saaja nojuaja nia tojitiare!

⁶Naa nojori tojishacari Pueyaso pocuaanotej, nojoriiri jacamatuquiaari jiyanojua na puerenuta. ⁷Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuatuohua. Maja puerenu.

⁸Nojori jaara niqiniijionuuquiaari, majaari tari na niqitiuniu quiquiaari cuno supuetanaa. Saaja Jesuuri quiriquiaa.

⁹Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohanu pueya niqiuara tuhuananujiniji nia niqishano! Niocua na pohanu cutara janiya jaara samiitiarohuani.

¹⁰Na pueyari Jesu nequesotaree:

—¿Casaara tariucuaaanu Pueyaso Rupaajiniji niishitiojonaa sequequiaacuaraarini, supuetana Elásnaari quiocuaji mijiria niiniutianihua coteenu, pueya na jiyanooototenuhuara necohuata?

¹¹Jesuuri riucaaree:

—Elíasri seetanujanaa coteenu niriqiano quiquiaari, puetunu pueya jiuujiaajanaa na jeenucuanura. ¹²Janiya cutaraari nia sequeyani, Eláscaajaari tari niqiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyajuhuj.

¹³Naa Jesu pohuatasacari Elásjinijitij, na pueyari niishiquii nojuajaari Tiuqiniijona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

¹⁴Jesu jaara tuhuananujiniji tiuquijioquiaari canaacia, tamonu pueyanoori nocua catecanoquiaari canaata quiniaa maanujiniji. Jesuucuaa mojuquetaseeri na sequenura neyanuucuaa. ¹⁵Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiiitasano cusonuuri na taquiriocatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, mojiniano. ¹⁶Janiyari quia pueyacia na tiuquitiasee na naataniniuria juucuan. Nojoriiri maja na naata na naataniniu.

¹⁷Jesuuri cunora sequeree:

—¡Niaaqui Pueyasocua tiuyashijia, na tojiyashijiacano! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

¹⁸Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

¹⁹Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰Jesuuri canaa riucaaree:

—Maja puera maninia nia tiuniu juhuanojuaja Pueyasocua. Seetanujanaa nia sequeyanijia, nia tiuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuana. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹Saniniujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

*Jesu pacutesacari pohuatanu nojuajaari mosaanutaniya
(Mr 9.30-32; Lc 9.43-45)*

²² Tamonu juuca Jesu rucoojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niqutiosaanutaniya taucuacani. ²³ Nojoriiri cua monutaniya. Jiujianaraca juucajinia, janiyari samiitianutaniuhani.

Naa Jesu sequesacari canaatej, canaari jiyanoehua taraajequiaarini.

Cumaneeca niqutiosacari Pueyaso Secojoju tiaacuara

²⁴ Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoju tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoju tiaacuara, taa pa jiyaniijianucua sequequiaaricuaajani?

²⁵ Pedroori na riucaaree:

—Na niqutioquiaanocuaaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿tayeeno pueyajiniji cumaneeca maseshiyani? ¿Tama na pueyajinijitii, taucuacajiniji soj?

²⁶ Pedroori Jesu riucaaree:

—Taucuaca niqutiojoteshianocuaaja nojori jiya jiiitiana sequesano.

Jesuuri na sequeree:

—Naacuaaquinatejaj. Naacuaajitij, tama na pueyajaaritia maja na niqutionu. Pueyaso Secojoju tiacuaajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷ Naajaa, pa niqutiojore juhuari nojori sequesano, paa mariqui nojori juaatiriiri. Nocuaaji quia rioosee caminiajinia. Quiocua coteenu quia jatasano sapitiaaja rupaama niqiri. Quiaari tii cumanee riuritanutaniya. Quiocua cuno cumanee niqutiosuhua nojori, quiria, quiarajuhuj.

18

Cante jiyaniijijajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijijanaa, canaa quia sequeretoj, puetunu quia pueyajinijiniojuanaani, ¿cante jiyaniijijajanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyaretare socua tojishano pueyano nia quiniu paniniu tamasacajiniji. See-tanujuaana nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja.

⁴ Naacuaajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijijajanaa quiniutianiya cutara narta Pueyaso muerasujinijinio. ⁵ Naajuhujaj, cante naatujua maseja maninia na paniniucua janiyani, nojuajaari cua maseyajuhujaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriqiano pueyanora, nojuaja jaara juhuacaritia caminia queronijinia jartasaare puereetujajau saajia na riqiajiniji morotasano. ⁷ Mijiria quinaari jiyanoehua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ Nio miriqui cua niishitiojosano nia tojiri: nia juashiquia, nia niohuaca jaara sesa miitiya nijaniya, nia rashiquiarenoj, tucuaaanu jatasocoriquiano. Naa nia miiri niaa mariqui mani quiquiojinia jataaareeri puetunu nia cuaqueyatajanaa. Socua maninia cutaraari juashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhuj, nia namijia jaara nia miitiri sesa, nia jiatere. Tucuaaanu nia jatarenof. Jiyanohua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatjanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanohua canaa miiniu panishano, cuno jaara sesa miijara jiyateriquia canaa.

Jesu pohuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniucujaji tamonu muerasuniyojua, juhua nio mueyaja. Cua tojitiare. Pueyasocujaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquico shootiaquiaa. Naa-juhuj, Pueyasocujaari na muerasuranocua niishirioquiaa. ¹¹ Naaratej, janiyari mijiria niquiaarini tashucuanu pueya cua pajenura, nojori cua jaariuutianura Sesaaca.

¹² ¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashucua tapueyocujajiniji, ¿majateeri na camaru na borregohua cureeno tiujianu rupaquijia, tashucuanu na pajenura? Taaquiririnij. ¹³ Jaara na riuriatate, seetanujuanaa socua jiyanohua cuno borrego tashucuanu shuquiritiaari tamasa na borregohujajiniji. ¹⁴ Naajuhuj, jiyocuacaanu quijia nia Queeri maja na paniniu quenaaja niquiriyatujua nio muerasujinijio tashucuanura puetunurajanaa.

Taa pa jiyanoja pa tarajanuni

(Lc 17.3)

¹⁵ Quarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacujaari. Niaari maninia rupuetoojuacara quiniutianihuacuahuaj. ¹⁶ Nojuaja jaara tojiyaquiri quiajaniya saniniujia, nocua quia quiaare socua tamonu pueyanota, caapiqui pueyata soj. Nojori niquiara quia nacasure cuno sesa miinia. Naa jaara naa miiritij, naa quiniutianiya taa tariucuaaanu Pueyaso Rupaajinia niishitiojosaquiaaricujajani: “Querajaa pueya jaara mariyata pohuatare na niquishano, na tojishanojuhuaj, cunoori maja sapojonu”. Naacujitij, nojori saquirojotasanoori seetanujuanaa quiniutianiya. ¹⁷ Cuno sesa quia miinia jaara nia tojinu paniaquiyaa saaja, puetunu niarta Pueyaso pueya niquiarajanaa quia pohuatare sesa na miishano. Cuno pueyano jaara tojinu paniaquiri puetunu Pueyaso pueyajanaa, nojuaja cuara quiiria juhua Pueyaso niishiyashijia niaara. Naacujitij, majaari socua nia rupununof.

¹⁸ Seetanujuanaa nia sequeyanijia, cana nia jiyanojaquiri mijiriani, na tojinu paniaquishacari nijaniya, cunoori jiyanojaquishano quiniutianiya jiyocuacaanu cua Que Pueyasorajuhuj. Naajuhuj, cana nia jiyanoori mijiria na tojishacari nijaniyani, cunoori jiyanooshano quiniutianiya jiyocuacaanu cua Que Pueyasorajuhuj.

¹⁹ Naajuhuj, janiyari seetanujuanaa sequeya nijaniyani. Caapiqui nijaniyajinijio jaara mariyata niishiriojore nia panishanoocua nia secojunura Pueyaso, cua Queeri nia tojinutianiya. Nojuajaari jiyocuacaanuji naa maninia miiniutianiya niaara, taa nia secojosacari nia sequerecujanoj. ²⁰ Querajaa nijaniyajinijio jaara rerejore, cucua tiuujia nia quishacari, janiyari tii niata quiyajanihuaj. Naacujitij, cua Queeri nia secojosano tojinutianiya cutara.

²¹ Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucujaja, janiya jaara na jiyanoori siete sesa na miishanojiniji janiyani?

²² Jesuuri Pedro riucaaree:

—Maja naatej Pedronaa. Maja quia tarinitianu na jiyanooni. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pahuatasano jiyanooyashijia serujiniji

²³Naaratej, cua tojiri pueyanaa. Nia pahuatareera nia niishiniuria taa Pueyaso paniya jiyanoootiojuaca na muerasu nia qiniuriani. Tamonu jiya jiyaniijaari nera poonijionaa pueya sequequiaari nojori cuaara tari niqutiojoora nojuaja na cumaneeca, nojori na niqutiojosanojiniji na casami. ²⁴Noojiaqueya nera poonijionaa pueya jaara tari nojori pasano casamijiniji niqutiojoriquiacuaa tama nojori cumaneecajinijijaaja, jiyacaritij, tamonuuri tiuquinishaareejuhuj. Nojuajaari jiyanoohua queraatia casami masejoquiaari na jiyaniijaajiniji, queraatia millón cumaneeca. ²⁵Nojuajaari maja na jiitiano quiquiaari na cumaneeca, na jiyaniija na niqutionuhua. Na jiyaniijaari cunora na pueya sequere: “Tamonu camarnu nia niqutio nio cua seru, necocuataja, cua cumaneecara, necohujuhuj, puetunu na casamijianaanio. Naacujitij, na cuentaari puequenutaniya”. ²⁶Cuno na seru tojishacari naa na jiyaniija sequesantej, nocuara jacamaquiaariiri. Na jiyaniija sequereeri: “¡Cua tarinitiare quenaaja cua jiyaniijianaa! ¡Rupaquiijara cua tarinitiarejaara! Janiyacuajaari quia cumaneeca niqutionutaniya puetunujuanaani”. ²⁷Na jiyaniijaari nocua taraajeree. ¡Na carterohua puetunujuanaari! Naa na jiyanooriiri, nocua na taraajenuucua.

²⁸Cuno seru tohuatasacari jiyaniija tiajiniji, narta seruta naacuneetooreeri. Cuno narta seruuri tarija masequiaari shiitaniyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quia-ree. Cumaatia na riquiajinia na miniriiri. Na sequereeri: “¡Ritia cua niqutio cumaneeca, tarija quia masesano janiyajiniji!” ²⁹Narta seruuri na riquiajinia mininia cariquimijaji mojoquetaree. Na sequereeri: “¡Cua tarinitiarecuaraja quenaaja! ¡Janiyacuajaari quia cumaneeca quia niqutionutaniya!” ³⁰Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niqutiojeaatijia. ³¹Narta seya niquishacari naa cuno jiyanooshano seru miishantej, nojoriiri jiyanoohua taraajequiaari. Nojoriiri jiyaniijaacua quiojoquiaari puetunu sesa narta seru miishanojuanaa nojori pahuatanura. ³²Naaratej, jiyaniijaari tamonu na seru jiyaroree cuno jiyanooshano seru riniuucua. Na tiuquishacari, jiyaniijaari na juaarii. Na sequereeri: “¡Quiaqui jiyanoohua sesajuhuanajaj! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca. ³³¿Majateeri quia naata quiriquiaa taraajenu quiarta seruucua, taa cua taraajeree quicuacuaani?” ³⁴Jiyaniijaari jiyanoohua juaarii. Cunora, cuno sesa miijia seru jiyarotareeri nujuatejojuajinia na nujuatesaanura. Sequereejariuhuj cuaara naquiya miishaaria tii, cuaara puetunujuanaa na cumaneeca niqutiojeaatijia, casami na pasanoiniji.

³⁵Nia Que Pueyasoori naa miiniutianiya nijaniyajuhuj, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura

(Mr 10.1-12; Lc 16.18)

¹Jesu jaara naa pahuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani. ²Jiyanoohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijoree.

³Jiyacaritij, noojiaqueya Fariseocacajinijinoori Jesuucua nijioquiaari sesa na pocu-atenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juaatiri?

⁴Jesuuri nojori riucaaree:

—¿Majate nia serojonu quiquiaacuaaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵Naaratej, nojori shipininaari sequequiaari: “Caya cuaara tiujiaara na que, na nucuanio, necocuata

na quiniuria. Nojoriiri juhua niquiriyatu pueyanora quiniutianiya na camitioosacari”.⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacujitij, majaari maninia Pueyaso rupuetootesano rupartanura.

⁷Nojoriiri Jesu sequeree:

—Jaara naa quiriritij, ¿casaara supuetana Moisés rootaquiaaricuaarini caya cuaara naajionee niquitioora necocua, na cartenu panishacari?

⁸Jesuuri nojori riucaaree:

—Moiséscaujaari niishiquiaari niaari puera cumajiuujiaaca. Naaratej Moisésri na tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanohua sesa miya Pueyaso niqiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucjuani. Naajuhuj, cante cartesano maaji camiyani, naa sesa miyajaariuhuj.

¹⁰Canaa, Jesu saquiriojosano pueyani, canaa tojishacari naa Jesu sequesanotej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹Jesuuri canaa riucaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuaanuji cumaaca niq-uitiosaareeni na tojiniuria. ¹²Naajuhuj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanohujanajaj. Tamasaca canuuri maja na caminiu saniniuuja, jiatejosano nojori riyacajajau quishacari. Tamasacaari maja na caminiujuhuaj tama nojori paniyaquishacarijaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

Naatujooriicuaa Jesu secojosacari Pueyaso

(Mr 10.13-16; Lc 18.15-17)

¹³Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴Jesuuri saniniuuja canaa sequeree:

—¡Maja nojori tenujunu! Nia tarinitiare naatujoori cuaara cucua nijioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriquiano.

¹⁵Na nuhuaji, Jesuuri na juaashiquia niaquiaari naatujooriicua, nojoriicuaa na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanohua casamiriaca mashaja pocojosacari Jesuta

(Mr 10.17-31; Lc 18.18-30)

¹⁶Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyan maninia cua quiniuria Pueyaso niqiara, pueyaracaanu quijijara cua quiniuriani?

¹⁷Jesuuri na riucaaree:

—¿Casaara quia sequeya janiya maninia pueyanotani? Saaja niquiriyatujuaari maninia quijija cutara. Nojuacuajaari Pueyaso. Naajaa, quiaa jaara maninia quiniucua jiaatiaa Pueyaso pueyano quia quiniuria, quia tojiri tariucuaaanu Moisés Rootasano Pueyaso-jiniji.

¹⁸Jesu riucaareeri:

—¿Teyano rootasanoteni?

Jesuuri na sequeree:

—Maja quia monu. Maja cuarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucuaa quia sajonota. ¹⁹Quia que, quia nucua tojijia quia quiriquia. Maja nojori quia rerequetenu. Mariyata cuarta pueyano quia paniri taa quia panyacuaa tama quia cuaqueyajaajani.

²⁰ Mashajaari Jesu sequere:

—Janiyacuajaari puetunujuanaa nio tojjia quiquiaari cua naatujuajinjini. ¿Casaa cua miintutianiya socuani?

²¹ Jesuuri na sequere:

—Quiaa jaara seetanujuanaa maninia quiniucua jiaatia Pueyaso niqiuara, quia quiaarohua quia tiajinia. Quia niqutiojore puetunu quia casamijianaa cumaneecara. Na nuhuaji, casamijiunucua quia niqutiojore nareja quia cumaneeca. Naacujitij, quiaari queraatia casami jitianutaniya jiyocuaaanu. Na nuhuaji, quiocua nimiohua cutara, cua tojjia quia quiniuria.

²² Na tojjishacari naa Jesu sequesantej, mashajaari taraatia quiaarohua jiyanoehua casamiriaca na quiniucua.

²³ Jiyacarijij, Jesuuri canaa sequere:

—Seetanujuanaa nia sequeyanijia, jiyanoehua jiyajenetaari pueyano tojjiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri.

²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojjitiare. ¡Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojjishacari naa Jesu sequesantej, canaari jiyanoehua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequere:

—¿Canaarijataj? Canaari puetunu canaa casamijianaa tiujiaquiarini canaa rupuenura quiajaniya. ¿Casaa canaa masenutaniyarinjia?

²⁸ Jesuuri canaa riucaare:

—Seetanujuanaa nia sequeyanijia. Nio jiya maniniushitshacariuhua, janiyari cajiniutianiyan jiyaniijia cajitiujinia puetunu cua Quejiniji shanohua cua cumaacatajanaa. Jiyacarijij cua pueyanaa, niaari mariyata cajitijosaanutaniya doce jiyaniijia cajitiucujinia. Niaari pa supuetana Israel doce niqiuohuacujinio caneno pueya nequesoreena quiniutianiya. ²⁹ Cua pueya tojjiniuria janiya, noojiaqueya nojorijinjinioori na tia tiujanutaniya, tapueyocuaa, na rimiathuha, na que, na nucua, necohua, na cuhuariquiamio. Canapute naa tiujiaquiaa na tojjiniuria janiyani, cuno pojoriiri Pueyasojiniji socua jiyanoehua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijiaa quiniutianiyajuhuj, shaajeyashijia. ³⁰ Saniniuuja, queraatia tojjishano pueyari Pueyaso shocotasano quiniutianiya na tojjiaashijia nojori quiniucua. Naajuhuj, mijiria, queraatia pueyari juhua shocotasano pueya quia Pueyaso niishiyashijia pueyara. Cuno pojori jiyanihano najuhuaa quijiacani, nojoriiri Pueyaso shuquiritasano pueya quiniutianiya cutara.

20

Jesu pohuatasano cuhuariquajinia poonitijosano pueyajiniji

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tonu cuhuariquia camaru miiquiaa na poonitijosano pueyacuani. Cuno cuhuariquia camaruuri quiaquiarini tariquicuaji pueya na pajenura na uva cuhuariquajinia nojori poonijionura. ² Cuhuariquia camaruuri pueyata pocojoquiarini taa cumaneeca na niqutionutaniya cuno juuca nojori poonijosanojiniji. Poonijionaa pueyari na sequere: “Maniniacuajaari taa quia sequereecujani”. Na nuhuaji, cuno pueya jiyaroreeri uva cuhuariquajinia nojori poonijionura. ³ Pananu tacasacari, cuhuariquia camaruuri tohuataquiaruhua na tiajiniji. Jiyacarijij, socua tamasaca pueya niqishiiri juhuajaniya quiyano tiaca jiuujiajinia curotasano cajitiucujinia. ⁴ Cuhuariquia camaruuri nojori sequese: “Nia quiaarejuhuaj, cua uva cuhuariquajinia nia poonijionura. Janiyacu

cumaneeca nia niqutiorohua nia poonijionu samini”. ⁵ Naacuaajitij, nojoriiri quiojoquiaari cunoo cuhuariquiajinia poonijionurajuhua. Na camaruuri socua tohuataquiaariuhua panacari. Socua tamasaca pueya niqushihiri juhuajaniya quiyano tiaca jiuujiajinia curotasano cajitiucuaajinia. Nojori sequereeaariuhua nera nojori poonijionura cunoo juuca. Pananu mueecosacari, canaa pueya riuriataquiaariiri. Nojori jiyaroree poonijionucuaajiaariuhua. ⁶ Tariucua pananu piriushacari, na camaruuri socua tohuataquiaariuhua. Socua tamasaca pueya niqushihiri tiaca jiuujiajinia curotasano cajitiucuaajinia najuhua quiyano. Nojori sequereeri: “¿Casaara nia quiojiaquiyaree poonijionucuanu? ¿Casaa nia miya niyani? Naa mariqui poonijiore”. ⁷ Nojoriiri na riucaaree: “¿Canaatucua taa poonijioreni, canaa jaara pajeshiaquiri poonijionurani?” Cuhuariquia camaruuri nojori sequereeri: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niqutiorohuani”. ⁸ Pananu tiuquishacari, cuhuariquia camaruuri na casami cojuana sequereeri: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijianaa taa cua sequereeri coteenujuanaa quiria poonijionaacuaajani. Majaari rimiajata nojori niqutiojonu. Coteenu quia niqutiojore tariucua pananu piriushacari na jiyaramiquishano. Naa quia niqutiojore puetunjuanaa. Quiocua naa tucuatere niqutiojonu noo pojorijiuhuaj, canapuate tariquicuajaji coteere poonijionucuaajani”.

⁹ Jiyacaritij, tariucua pananu piriushacari poonitijosano pueyari nihiomaa. Puetunu nojorijianaari cumaneeca niqutiosaaree taa cuhuariquia camaruuri coteenujuanaa tariquicuajaji poonijiona pueya sequeriquiaariucuaajani. Majaari rimiajata nojori niqutiosaanu quiquiaari cumaneeca, nojori poonijionu sami. ¹⁰ Na nuhuaji, coteenujuanaa poonijiona pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaree taa cuhuariquia camaruuri sequereeri nojori cunoo juucacuaajani. ¹¹ Nojori masacari na cumaneeca, nojoriiri cuhuariquia camaruuri juaaquioree. ¹² Na sequetureeri: “Cunoo pueyari saaja rupaquijia poonijioree. Quiaari nojori niqutiojore taa quia niqutiojore canaacuaani. Canaari pananucari catere cutarani, pueyaracaanu canaa poonijosacari”. ¹³ Cuhuariquia camaruuri tamonu nojorijinijinio sequereeri saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuajaji pocoojoriquiaatej, janiyari juhuacarijia quia sequereeni janiyari naa cumaneeca quia niqutiosaanutaniya? Quiaari cua riucaaree: ‘Maniniacuaja’. ¹⁴ Naaratej, quia jiyataarohua quia cumaneeca quia tijajinohua. Janiyacuajaari naa niqutionu paniriquiaa tariucua pananu piriushacari cua poonitijosano pueyani, taa cua niqutiojore quiajanijacuaani. ¹⁵ ¿Majateeri cua naata miiniu tama cua panishanojuaja tama cua cumaneecatajaaja? ¿Quiaateeri socua cumaneecaacua jiaatiajara quiqui, capora cua quiniucua?”

¹⁶ Na nuhuaji, Jesuuri naa sequeriquiaarijuhuaj, na pohuatasanojiniji na niishitiojonura:

—Naa quiniutianiyari taa cua sequeriquiaacuaajani: canapuate nuhuajishanaani, nojoriiri coteetanaa quiniutianiya. Naajuhua, cante coteetanaani, nojoriiri nuhuajishanaa quiniutianiya saniniuuja. Queraatia masusano pueyari quia. Saniniuuja, secajaari saquirojosano quia nojorijinijinio.

Jesu camishacariuhua pohuatanu taa na mosaanutaniyani

(Mr 10.32-34; Lc 18.31-34)

¹⁷ Tari Jesu quiasacari Jerusalén tiacajiniara, Jesuuri canaa na doce saquirojosano pueya piirri tamocora nuu shuriquicora, tamajaaja canaata na pocoojonura. Canaa sequereeri:

¹⁸ —Cua tojori. Niacuaajaari niquiya paa tari Jerusalén tiacajiniara tacataani. Janiyari tii niqutiosaanutaniya pueyacuara secojona jiyaniijianucuanu, Moisés Naajoneejiniji niishitiojanaano. Nojoriiri cucuara saquirojotanutaniya nojori sapojonuta cua mosanura. ¹⁹ Nojoriiri cua niqutionutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitanutaniuhua.

Santiago, Juan nucua sequesacari Jesu, maninia na miiniuria necohua
(Mr 10.35-45)

²⁰ Jiyacaritij, Zebedeo niquiocuaari Jesuucua catecanoquiaari necohuata. Jesuucuaa mojoquetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riucaareeri:

—Quiaa jaara Jiyaniijiaara jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuaara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucujuhua.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucaaree:

—Taaquiriirinij. Canaa naatacuaaquinatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajituniuria, teyano pojori-icuaaji na jeenucuaquiaaricuaajani.

²⁴ Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacuaajari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Nijaniya saniniuujia, majaari naa nia quiniu quiniutianiya. Naacuaajitij, cante tojishano pueyano quiniu paniya nijaniyajinijinioni, cuno cuaara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuaara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani. ²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaaji cua ritianura Sesaaca.

Jesu jeecasacari caapiqui cariyujuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jyanohua queraatia pueyari Jesu nuhua-jiri quiaa. ³⁰ Jiyacaritij, caaptqui cariyujuaruuri nuu shuucuaaji cajituriquiaa. Nojori niishishacari Jesuuri nojori tajiriquiaa, nojoriiri nacan u coteequiaari:

—¡Jiyaniijianaa! ¡Canaacua quia taraajere! Quiaacuaajari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanona!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria nijaniyarani?

³³ Jesu riucaatureeri:

—¡Jiyaniijianaa, canaa namijiaa quia jeecare!

³⁴ Jesuuri nojoriicua taraajeree. Nojori namijiaa quiareeri. ¡Nojoriiri niquiijacara quiqui! Na nuhuaji, Jesuucua sacuaaree canaataari.

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquijiosee Betfagé tiacajiniani, Olivo nacuhua tuhuananu shuriucua. Cuniqiji, majaari puera tucuacaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

² —Cuno tiacajinia nia quiaare, nooj pocuaji niquishiyatej. Niaari tii riuritanutaniya niquiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhacuaja”.

⁴ Naa tohuateequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuacuano!’”.

⁶ Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya nojoquiaari burro nijiniani, necojuaja nijiniano. Na nuhuaji, Jesuuri na nijinia cajirii. ⁸ Jiyanohua queraatia pueyari tii quiriquiaa. Nojoriiri na tucuaque toqueya muevoquiaari nuco Jesuucua. Tamasacaari jaamasucua piyotaquiaari Jesuucua ni jotasocoriquiano nuco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionaajuhua, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuara quiiria shuquiriaatia pa Pueyaso jiyarosano! ¡Jiyanohua maniniaari pa Pueyaso! ¡Cuara shuquiritasano quiiria!”

¹⁰ Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹ Jesuta tiuquijionaari nojori riucaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinijinio pueyano, Galilea jiyajinijinio.

Jesu jaacasacari seya niqutiojonaa Pueyaso Secojoua tiacariji

(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojoua tiacari matacajinia tiuquiquiaari. Tii pueya niquishiiri seya niqutiojijano. Jesuuri puetunu nojorijianaa tohuatanijiooree. Cumaneca tacatojuuaca juhuacutucua caponeetareeri, tee pueya niqutiojoriquiaa taucuaca cumaneeca, Pueyaso Secojoua tiacajinia niqutiojosocoriquiano cumaneecaracuajani. Mococoonu niqutiojonaa cajitiucua caponeetareejaariuhua, tee mococoonu niqutiojosaariquiaacuajani Pueyasoocua catijiasocoriquiano. ¹³ Jesuuri nojori sequeree:

—Pueyaso sequesanoajaari naa naajiotasaaquiaari tarijia:

“Cua quiqioori sesojosaanutaniya Pueyaso Secojoua tia”.

¡Niaari saniniuujia na jiyatecanu nohuasenujuaca quiquiora!

¹⁴ Secojoua tiacajinia na quishacarijia, cariyouarujuri pueya, mariyata shipiiniquiujunaa pueyari nocua niojoquiaari. Jesuuri nojori naatanijiooree. ¹⁵ Pueyacuara secojonaa jiyaniijanucuaari Moisés Naajioneejiniji niishitijonaata Jesu shootariquiaa cusosuhua naatanijiyano. Jiyacaritij, naatujooriiri Secojoua tiacajinia naa nacoariquiaa Jesujiniji: “¡Pa supuetanaa jiyaniijia David niquiohuacuajinio supueno pueyano! ¡Nojuajaari pa Jiyaniijia!” Canaa Judiocuaca jiyaniijanucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucaaree:

—¡Taaquiririnij! Na tojiyacujajinijia. Maniniacuajaari nojori sequesano. ¿Majateeri nia serojonu quiquiaacuaja tariucuaaanu Pueyaso Rupaajinia naa sequesantej:

“Quiaari naatujoori niishitirii conaajanio, seetanujuanaa nojori maniniuhuaqueetanura quia Jiyarosano?”

¹⁷ Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

Jesu sesacasacari higo naana, muetuhuo na quiniuucua

(Mr 11.12-14, 20-26)

¹⁸ Tariquicuaji, Jesuuri Jerusalén tiacajiniara tacateriquiohua canaa na saquirojosano pueyata. Jesuuri miaajeriquiaa. ¹⁹ Higo naana niquiriiri nuu shuriuucua nujuaano. Nocua canujiyareeri. Shaanoori quiriquiaa, saa na jaamasucuaaja. Cunora, Jesuuri naana sequere:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

—Jesuuri canaa riuucaree:

—Seetanujuanaa nia sequeyanijia, niaa jaara Pueyasocua tiuujiaa quiri nioojia nia niqiioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”. ²² Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutianiya.

Judiocuaca jiyaniijianucua nequesoreesacari Jesu, cante na jiyaronani

(Mr 11.27-33; Lc 20.1-8)

²³ Jesuuri Pueyaso Secojoua tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuaara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequeree saniniuujia:

—Janiyari nia nequesotanutianiya saniniunijia. Niaa jaara cua riuucare, janiyacua nia sequerohua saniniunijia cante cua jiyaroquiaari naa cua miiniuriani. ²⁵ Naacuajitij, cua riuucature coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarijia juayonuutanu coteequiaari jiyasohuaja. Tama seque-tooreejaarijia:

—Paa jaara na riuucareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaaraarini?” ²⁶ Saniniuujia, paa jaara sequereni: “Nojuajaari nareja pueya jiyarosano quiquiaari”, ¡puereeta quiniutianiyaari pajaniyara! Paacuaajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujuunia quiquiaari.

²⁷ Naaratej canaa Judiocuaca jiyaniijianucuaari Jesu riuucaree:

—Maja canaa niishiniu canariquitijia na jiyaroquiaaritijiaj.

Jesuuri nojori sequeree:

—Janiyajuhuj, majaari cua sequenu quiniutianiya nijaniya cante cua Jiyaronani, naa cua miiniuriatej.

Jesu pohuatasano pueyano niquihuajiniji

²⁸ Jesuuri naa nojori sequerohuacuhuj:

—¡Cua tojitia! Tamonu pueyanoori caapiqui niyanuraca quiquiaari. Nojuajaari jiya-pueranu jiyaroree: “Quiyanunaa, quiria quia poonijiosee uva cuhuariquiajinia quiarijia”.

²⁹ Neyanuuri saaja na riuucaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰ Na queeri naa na nuhuajishana sequereehuhuj. Neyanuuri na riuucaree: “Maniniacuaja, cua quena. Janiya quianutianiya”. Na nuhuaji,

majaari na quianu quiquiaari saaja. ³¹ ¿Taa nia sequeyani pueyanaa? ¿Teyano cuno caapiqui necohuajiniiniote na que tojjia quiquiaarini?

Nojoriiri Jesu riucaaree:

—Na jiyapueranucuaaja.

Naaratej, Jesuuri nojori sequere:

—Seetanujuanaa nia sequeyanijia. Cumaneece masejona pa pueyajiniji Roma tia-cajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. ³² Cua tojitiare casaara naa cua sequere niajaniani. Tiuquinijiona Juanri niquiaari na niishitiojonura juucua niajaniani, maninia nia quiniuria Pueyaso niqiaara. Majaari nia tiuuniu quiquianu nocua. Niaari saaja na tojiyaquiquianu. Cumaneece masejona nia soosano pueya cutaraari nocua tiu-quianu, paanatujurinio. Nojoriiri na tojitajara quiquianu. Niaacuajaari na niquiquianu taa cuno sesa miijia pueya maninia pueyara jatacanuni. ¡Niajaniyarijijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

Jesu niishitiojosano cuhuariquia cojuanaa sesa miijiacajiniji

(Mr 12.1-12; Lc 20.9-19)

³³ Socua tamonu cua pohuatasano nia tojiri. Tamonu pueyanoori cuhuariquiajinia uva natoouiaari. Maninia matacoquiaari puetunu na shuriuquiocojuanaari maja casaa tiuquitanura nocua. Saajia quejaquiaarijuhuaj uva rapijiojura, na caaca rerate-saanura. Jiyaconajara tiaquiaarijuhuaj, cojuana niqijijara tiji nohuasejojuacuaji. Na nuhuaji, na camaruuri tamasaca pueya niqutioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seya jiyaramiquiiaari na cuhuariquia cojuanaa pueyacua. Nojori jiyaramiquiiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricujani. ³⁵ Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na camaruuri socua queraatia seya jiyaramiquiiaarijuhuaj. Nojoriiri naquiya miishaquiaarijuhuaj.

³⁷ Na nuhuaji, na camarujuanaari tama sequereajaaja: “Jiyaroreera cua niyanu. Maja cutara nojori rerequetenu quiniutianiya cua niyanu”. ³⁸ Cuhuariquia cojuanaa jaara niqiquiaari camarnujuanaa niyanu nojoriicua niyano, nojoriiri tama sequetooreajaaja: “¡Cunocujajiqui cuhuariquia camaru quiriqiano na que niti, na que jaara shaajequee! ¡Pa morej! Naacuajitij, pocua nio cuhuariquia camaruhuara quiqini”. ³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojtianaari na riucaaturee:

—¡Cuno cuhuariquia camaruuri nojori pueconutaniya, nojoriicua na taraajeyajuiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niqutionutaniya nojori carojotasanojiniji.

⁴² Jesuuri nojori sequere:

—Jaa, naa miiniutianiya. ¿Majate nia serojonu quiquiaaricuaaja nio, tariucuaaanu Pueyaso Rupaajimiani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujuajau naasucua. Cuno saajiacuaajaari socua panishano saajia quiquiaari. Jiyaniijajanaari naa na jiyatequiaari. Cuno saajiata tiaree maninia cutaraari. Pueya niquishacari, jiuujiatecoreeri”.

Naa naajiotasano quiyacuajaari.

⁴³ Camarucanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojtianaa quiniutianiya cutara, Pueyaso muerasu canenura jiyanohera nera, juhua cuhuariquajiniji senoosano queraatia. ⁴⁴ Cuno saajajiniji saniniujia, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanocua, jacanaura na miiniutianiyari.

⁴⁵ Pueyacuara secोजना jiyaniijianucua, mariyata Fariseocuaca tojtiasacari naa Jesu pohuatasantej, nojoriiri niishiqui Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiujunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

Jesu pohuatasano miriqui camishacari queranacunujiniji

(Lc 14.15-24)

¹ Na nuhuaji, Jesuuri socua niishitiojoquiaari miriqui pohuatasanta. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaana. Cuno jiyaniijaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijaari socua tamasa na seya sequeree: “Cua masuusano pueya nia numotejocoo. Nia sequeese: ‘Jiyaniijia nia sashiya. Puetunujaanaari tari jeenucasano nia queranacunura. Tari puecoosaaree na juyaca, na shiyoshitishano seyanio. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijaari nojori jiyaramiquiriiri. ⁵ Masuusano pueyari saaja tojtiaaquirii. Puetunujaanaari tama na panishanojaaja miiriquiaa saaja. Tamonuuri na cuhuariquajinia quiaaree. Tamonuuri na casami niqutiojosaqui quiaareecujua. ⁶ Tamasacaari saniniujia jiyaniijia seya quiooree. Jiyanohera naquiya nojori miiriiri. Na nuhuaji, nojori puecootureeri. ⁷ Jiyaniijia niishishacari, jiyanohera juaariiri. Nocuaji na soldadohera jiyaramiquiriiri cuno monaa nojori naminiuria saniniujia, nojori tiaca na catijiatanurajuhuj. ⁸ Na nuhuaji, jiyaniijaari na seya sequeree: “Puetunujaanaari tari jeenucasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiasa, saaja cua rerequetajajinia, tee queraatia nojori quiniucua. ⁹ Quiarijia cutara, nia quiaare nuu tunequetajajinia, tee queraatia pueya tajiniucuaatiquiaacuajani. Nia masuure puetunu nia niquishano pueyajanaa”.

¹⁰ Na seyari quiojoquiaari tiaca nucuaco. Nojoriiri puetunu na riuratasano pueyajanaa rerejoteree, maninia pueya, sesa pueyanio. Queranacunusaquiiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

¹¹ Na nuhuaji, jiyaniijajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueju. ¹² Jiyaniijaari na sequeree: “Pueyanonaa, ¿taa quia tiuquimiasa camishacari cushishano toqueejuni?” Pueyanoori sanaa na tojiriquiaa. Majaari na riucaanu quirii. ¹³ Cunora, jiyaniijaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapenuutianiyari. Na quiaa miaquenutaniyajaariuhua na noonuta, naquiya na miishacari”.

¹⁴ Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniujia, secajaari saquiriojosaanutaniya nojorijinijinio seetanujanaa na muerasura nojori quiniuria.

Jiya jiyaniijia cuaara niqutiojosaaria na sequesano cumaneeca
(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucuaji tama nojori niishitiojotounurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijiaca pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuarachashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niqiarani. Majaari quia puerenu quiquiaa, pueya niqiaara quia pohuatanura quia niishishano. Majaari rimiajata quia niqiniu pueya. ¹⁷ Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijijanaa Césarra, taa cuno tahue César sequequiaaricuajani. Quiajanियariuhuj, ¿taa quia sequeya saniniunijia?

¹⁸ Jesuuri ritia niishiquii, nojoriiri naa na nequesotariquiaa na sapojonuta. Nocuaji nojori sequereeri:

—Sapueni maninia quijiicanaa, ¿casaara nia saniniujijia naa janiyani? ¹⁹ Cua niqitiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqitirii cumanee. ²⁰ Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanihuaj?

²¹ Nojoriiri na riucaaree:

—Jiyaniijia César naaquicuaja, na sesajuhuj.

Jesuuri nojori sequeree:

—Jaara naa qiritij, César nia niqutiojore tama na casaajaaja. Nojuacuajaari na camaru. Saniniujia, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesantej, jiuujiatecoreeri. Na tarinitiatoreeri. Quiojiyaroahuari.

¿Macunucuate samiitiaconutaniuhua?
(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴—Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiriia mashiquio, mueya na mueratenura tarajanu niti. ²⁵ Tarijia, tamonu pueyanoori niya quiquiaari. Siete niqiohuaraca quiquiaariiri, saa canuujuu. Jiyapueranuuri camiquiaari. Na nuhuaji, shaajequiaariiri muetuhuojuu. Naaratej, na mashiquioori camitishaaquiaari neyaca tarajanuta.

²⁶ Nojuajaari muetuhuojuu shaajequiaarijiuhuj. Naaratej, neyaca tarajanuuri mashiquio camiquiaarijiuhuj. Nojuajaari mueyaju cusoquiaarijiuhuj. Naa cusonuuquiaariiri puetunu cuno siete canuujuanaa. ²⁷ Na nuhuaji, mashiquioori cusoquiaarijiuhuj.

²⁸ Saniniujia, macunucua jaara samiitacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹ Jesuuri nojori riucaaree:

—¡Niaari jiyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! ³⁰ Macunucua samiitacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuacaanu quijiaca Pueyaso seya, maja camiyosano. ³¹ Socua cua tojitiare. Macunucuaari seetanujuanaa samiitacoriquianohua. ¿Majateeri nia serojonu quiquiaacuaja taa Pueyaso sequequiaari nijanyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapueete seetanujuanaa Pueyaso muerasuni, nojori cutaraari pueyaracaanu quijiaa.

³³ Pueya tojishacari naa Jesu niishitiojosanotej, nojoriiri jiyanhua jiuujiateree.

Puetunu Pueyaso rootasanojinijianaani, teyanote socua na pueya tojishocoriqianoni (Mr 12.28-34)

³⁴ Fariseocuaca jaara niishiquaari Jesu Saduceocuaca sanaajaree, nojoriiri Jesuucua nijioquiaari nojori saniniujiuniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijinijiniori Moisés Rootasanojiniji niishitijona quiquaari. Na saniniujiuniuria, nojuajaari Jesu nequesotaree:

³⁶ —Niishitijonanaa, ¿Pueyaso rootasanojinijini, teyanote socua pa tojishocoriqianoni?

³⁷ Jesuuri na riucuaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohanutajanaa, puetunu quia niishitijatajanaanio”.

³⁸ Niocuaajaari socua na pueya tojishocoriqiano Pueyaso rootasano. ³⁹ Tamonu na sequesanoori quera juhua nojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰ Puetunu Moisés rootasanojuanaa, mariyata puetunu tariucuaaanu Pueyaso sequesano caminiujuninaa rootasanojuanaari nio caapiqui rootasanojinijicuaa.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

⁴³ Jesuuri nojori sequerohuacuahuaj:

—Taaquiririnij. Jaara naa quiriritij, ¿niaateeri niishiyacuaja casaara David sequequiaari “cua Jiyaniijiaata” Cristocuaraarini, Pueyaso Sohanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuara quia paraa shocojotare quiocuajijiaatijia’”.

⁴⁵ ¿Cristotucua taa David niquiohuacuaji supuereni, David jaara Cristo jiyaniquiya na jiyaniijiaata?

⁴⁶ Nojoriiri Jesu niquitiaree sanaa. Nojoriiri maja na naata na riucuanu quiquaari. Cuno nuhuaji, pueyari maja socua na nequesoreenu paniniu quiquaari Jesu.

23

Jesu juaashacari Fariseocuaca, Moisés Rootasano niishitijonaanio

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, canaa na saquiriojosano pueyano:

² —Moisés Rootasanojiniji niishitijonaa, mariyata Fariseocuacaari supuetana Moisés niti quiya, tariucuaaanu Pueyaso Rupaa nojori niishitijonura. ³ Naaratej, nia tojitiare puetunu nojori sequesanojuanaa nijaniya. Saniniuuja, maja cutaraari nia miiniu taa nojori miiquiaacuaani. Nojoriiri najuhuaa niishitiojoquiaa taa pueya miiniutaniyani. Majaari saniniuuja nojori miiniu tama nojori niishitiojosanojuaja. ⁴ Nojoriiri tama nojori niishishanojuaja rootaquiaa, maja saaja tariucuaaanu Pueyaso niishitiojosano pa supuetanaa. Nojori rootasano pueya miishocoriqianoni, cunoori juhua jiyanhua niiquia casaa pueya nitiasocoriqiano. Nojoriiri maja quenaaja na naacutanu quiquiaa na juaashiquia sacasaruta. ⁵ Nojoriiri puetunu na miishanojuanaa miiquiaa saaja pueya

niquishocoriquiano, pueya shuqiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuuja, nojoriiri najuhuana socua puereetucara na quiqiora cusupuequiaa pueya shootiasocoriquiano. Naajuhuj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojtijajaca miiquiaaricuaani. Saniniuuja, nojoriiri puera tucuacujua na tunujutaquiaa saaja pueya niquishocoriquiano, pueya shootianura nojori. ⁶Nojori jaara masuusaare tamonu tiajinia queranacunura, nojoriiri secoquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucuajinia pueya shootianura nojori. ⁷Nojori rucanejosacari tiacajinia, nojoriiri paniquiaa pueya saruhuatanaura nojori. Panitiuquiaa-jariuhua pueya jiyaniquiniuria nojori “niishitijonaata”.

⁸’Niajanija saniniuuja cua pueyanaa, majaari pueya shanacunu niaacua, nojori jiyaniquiniuria niajanija “niishitijonaata”. Niajanija cutaraari niquiriyatujua Niishitijonaraca. Puetunu niajanijajanaari niarta Pueyaso pueya tapueyocua. ⁹Naajuhuj, majaari tamonu pueyano mijiria nia jiyaniquiniu “cua queta”. Niaacujaari niquiriyatu Queraca. Nojuajaari jiyocuaaanu Quinia. ¹⁰Naajuhuj, majaari pueya nia shanacunu niaacua, nojori jiyaniquiniuria niajanija “cua jiyaniijata”. Niaari niquiriyatujua Jiyaniijiaracujaja. Nojuacujaari Pueyaso jiyarosano nia Jiyaniijiaranoni. ¹¹Cante jiyaniijijajanaa cutara niajanijajinijinioni, cuno cuaara jiyateera tama na cuaqueyajaaja nia cumaquinia na quiniuria. ¹²Cante tama na cuaqueyajaaja jiyateja pueya shototaja na quiniuriani, narta pueya jiyaramiqijia na quiniurijuhuj, jiyano pueyano cutaraari cararosaanutaniya. Cante saniniuuja juhua narta pueya serura jiyateja tama na cuaqueyajaajani, cunoori jiyaniijiaari jiyatesaanutaniya cutara.

¹³’Cua tojtijare, Moisés Rootasanojiniji niishitijonaanaa, niajanija Fariseocucajuhuj, niaari cocuaatia miiquiaa! ¡Niaari sapuenu juhua maninia quijiaa niquishano! Niaari pueya tarinitiaquiquiaa nojori rupenuura Pueyaso. Niaari maja nia tiuuniu Pueyasocua. Naajuhuj, majaari pueya nia tarinitianu nojori tiuuniuria Pueyasocua, na muerasura nojori quiniuria.

¹⁴’¡Niaari taraatia miishaanutaniya, Moisés Rootasanojiniji niishitijonaanaa, niajanija Fariseocucajuhuj! Niaari sapuenu juhua maninia mijiaa niquishano. Niaari mashihiopue tiaca masequiaa secaja nia cumaneecata, nia sapojonuta nojori. Naacuajitij, niaari nojori tiaca masequiaa tama niajanijarajaaja. Naa nia miiniu nuhuajitij, niaari shitiarayocua secojojuaa najuhuana Pueyaso, pueya niqiara, maninia pueya nia jyanishaanura. Naaratej, niaari socua jyanohua saniitiosaanutaniya tamasaca pueyajiniji.

¹⁵’¡Niaari puereeta miishaanutaniya Moisés Rootasanojiniji niishitijonaanaa, niajanijajuhuj Fariseocucanaa! Niaari sapuenu juhua maninia mijiaa niquishano. Niaari tucuacaanu rucanejoquiaa jiya caco, shoniniacu caminia taquijiriano, tamonu nia niishitijonura najuhuana Pueyaso tojijia na quiniuria juucua, juhua tama niajanijajaaja. Nia niishitijosano pueyano jaara nia tojijiaa quiri, nojuajaari socua jyanohua saniitiosocoriquiano quiya niajanijajiniji, sesa nia rootasano tojijia na quiniucua.

¹⁶’¡Niaari taraatia miishaanutaniya mosanucuaanaa! Niajanijari juhua cariojuaru, cante tamonu pueyano jaatucuya juucuanu, nuu nia niishiyaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuaara sequeera: “Taa oro Pueyaso Secojojua tiajinia pueyaracaanu quiyacuaani, naajuhuj, cua sequesano quiajanijari seetanujanaa tohuateenutaniya quiaara”. Saniniuuja, niaari sequequiaa, Pueyaso Secojojua tiajinia oro jaara sequeyaquishaare, majaari na sequesanoocua tiuushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequeera: “Taa Pueyaso Secojojua tia pueyaracaanu quiyacuaani, naajuhuj, cua sequesano quiajanijari seetanujanaa tohuateenutaniya quiaara”. Niaari sequequiaa cuno sequesanoocuaari maja tiuushaanu. ¹⁷¡Mosanucuaanaa, niaari juhua cariojuaru! ¿Teyanote socua pueresanoni, cuno orotee, Pueyaso Secojojua tia soj? Cuno oroori naa pueresanora jiyatesaaquiaari saaja

Pueyaso Secojoua tiajinia na quiniuucua. ¹⁸ Niaari rootaquiaajuhuaaj, pa sequesacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: “Seetanujuanaa quia sequeyanijia. Naatej, taa casaa Pueyasooacara catijiaja juhuacutuucua niasano jiyanoehua maninia quiyacuaa Pueyasorani, naajuhuaaj, cua sequesanoori saaja maninijuhuaaj. Majaari cua sapojonu”. Naacuajitij, niaari sequequiaa, paa jaara naa sequerani, paa cuaara miiria pa sequesano. Saniniuujia, niaari sequequiaa: “Pa sequesanoori najuhuaana sequesano, paa jaara saaja Pueyasooacara catijiaja juhuacutu sequerani. Majaari nocua tiuushaanu”. ¹⁹ ¡Cariyojuarurjuria! ¿Majateeri nia niishiniu? ¿Teyanote socua maniniani, Pueyasooacara catijasocoriquiano casaatee, Pueyasooacara catijiaja juhuacutu soj? Catijasocoriquiano casaari narejajuhuanaj, jaara Pueyasooacara catijiajaacua niasoo quiyaquiri. ²⁰ Naaratej, cante Pueyasooacara catijiaja sequeree seetanujuanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequereehuaaj. ²¹ Naajuhuaaj, cante Pueyaso Secojoua tia sequeree najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaa, Pueyaso Secojoua tia na sequesacari. ¡Pueyasocuaajaari na Secojoua tiajinia quijia! ²² Naajuhuaaj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereeariuhuaaj, Pueyasojuanaa sequereeariuhuaaj, jiyocuaaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhaaj Fariseocuaacanaa! Niaari sapuenu juhua maninia miijiaa niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuaani. ¡Niaari saniniuujia socua pa tojishocoriquiano Moisés rootasano tojtiaaquiquiaa! ¡Naacuajitij, majaari maninia pueyano nia quiniu taa Moisés rootaquiaaricuaani! ¡Majaari nia taraajenu quiquiaa niarta pueyanoocua! ¡Majaari nia tiuuniu Pueyasooacara! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, jnaa nia tojtiaarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia niishitiosacari Moisés Rootasanojiniji juucua, niaari juhua cariyojuaru cante narta cariyojuaru jaatucuya juucuaani. Niaari juhua tamonu pueyanohuaaj. Na ratusacari, nujujua taquirii na mashacajinijiiri. Socua na ratusacariuhua, ¡saaja cuartia miataare juhujaniyari!

²⁵ ¡Niaari cocuaatia miquiaa, Moisés Rootasanojiniji niishitiojonaanaa, nijaniyajuhaaj Fariseocuaacanaa! Niaari sapuenu juhua maninia miijiaa niquishano. Niaari juhua noo pueyajuhaaj, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanoehua curuutuca quiyajaa. Nio miriqui cua sequesano nia niishiri. Nioojaari naa quiyajuhuaaj. Niaari nohuasenujuuca, jamuejancano. ²⁶ ¡Cariyojuaru Fariseocuaacanaa, nia ratujua jiniacuma nia jeequere coteenu, nia miacojua jiniacumano! Naacuajitij, na cuaqueyari maninia jeequesano quiniutianiyajuhuaaj.

²⁷ ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhaaj Fariseocuaacanaa! Puetunu nijaniyajanaari sapuenu juhua maninia miijiaa niquishano, juhua macunucua quiquio shanohua niquishano, cohujata noshijosano. Saniniuujia na jiniacuma quiyari sacuaataia jaanujua pueya nucuhaa mocuaca. ²⁸ Niaari naajuhuaaj. Niaari sapuenu juhua maninia pueya niquishano. Saniniuujia nioojaari jiyanoehua sesa, jiyanoehua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhaaj Fariseocuaacanaa! Niaari sapuenu juhua maninia miijiaa niquishano. Niaari macunucua niojotajara shanohua niquishano shipinijioquiaa, tariucuaaanu pueyara Pueyaso sequesano caminiujuniana nucuhaacuaji. Naajuhuaaj, niaari tariucuaaanu Pueyaso tojtiajaca puecosano quiquio maniniushitijia. ³⁰ Naa nia miishacaritij, niaari juhua sequequiaaruhua: “Paa jaara shipinijosaaquiaari pa supuetanaa quishacar-

ijia tariucuacaanuni, paa maara nojori cojiyaquiuaari cutarani, nojori puecoosacari Pueyaso sequesano caminiujiunaa". ³¹ Saniniuujia, naa nia sequesacari, niaari tama niaacuara toreejaacujua. Naaquiiri cuno tariucuacaanu Pueyaso sequesano caminiujiunaa puecoonaacuajinio supuenocujaa. ³² Naa Pueyaso sequesano caminiujiunaa puecoonaacuajinio supueno nia quishacaritij, Pueyaso Jiyarosano nia morejuhuaj, nia tucuatana nia supuetanaa coteesano.

³³ ¡Sesa mijiaa pueyanaa, niaari noonacuraca, juhua sacocua! ¿Niaateeri jiyaniya niaari saniitioyaquishaanutaniya mani quiqiojinia nia supuetanaata? ³⁴ ¡Cua tojitiare! Janiyari Pueyaso rupaa caminiujiunaa jiyaramiquiniutianiya niaacuani, Pueyaso Rupaa niishijiacajuhua, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasa teetejonutaniya niyacutesanojinia nojori nia monura. Niaari tamasa majacunutaniya Pueyaso secojojua tiacajinia. Niaari tamasa neteyojotanutaniya puetunu tiacajinijijianaa, naquiya nia miiniuria nojori. ³⁵ Naaacuajaari niishiya, coteenujanaa mosaaquiariiri Abel, maninia mijia pueyano. Naa puecoosaaquiariiri queraatia Pueyaso tojitiajaca pueya. Na nuhuaji, socua jaatesaaquiari monuuri Zacarías, Berequías niyanu. Cuno maninia pueyanoori mosaaquiari Pueyaso Secojojua tiacajinia, Pueyasoocuaa catijiasaqui shuriucua. Monu porocua nia quiniucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuacaanu Pueyaso tojtianaa puecoosaanuucujanaa. ³⁶ Seetanujanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

Jesu nujuquesacari Jerusalén tiacajinia quiniaa pueyacua
(Lc 13.34-35)

³⁷ ¡Jerusalén tiacajinia quiniaa pueyanaa, jiyano nia taraajeya niaacuani! Niaari Pueyaso sequesano caminiujiunaa pueya puecoojuaca. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucua nia taraatia nia miyaquishaanuucujia cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajaniya. ³⁸ Cua tojitiare. ¡Niaari nia quiqiojiniji sanaajasaanutaniya niqijij! ³⁹ Seetanujanaa nia sequeyanijia, majaari socua nia niqiniu quiniutianiya janiya, niaa cuara cua tiuquishacariuhua sequerejaatijia: "Pueyaso cuara shuquiritiiria pa jiyaniijia quiriquiano na jiyarosano."

24

Jesu pohuatasacari, Pueyaso Secojojua tia niyartasaanutaniya
(Mr 13.1-2; Lc 21.5-6)

¹ Jesuuri Pueyaso Secojojua tiacajini tohuataarohua. Nata canaa quiojosacari nucoo, canaa, na saquiriojosano pueyani, canaari nocua catecanoquiariini. Canaari Jesu niqitiriquiaa Pueyaso Secojojua tiani, shanohua niquishano tia. ² Jesuuri saa canaa riucaareejaa:

—Jaa, na niqiyacuajaniya. Naa cumaati maninia na niqiyacuajua. ¡Seetanujanaa nia sequeyanijia, cuno tia niaa na niqiyani, cunoori niyartasaanutaniya puetunujanaa! ¡Majaari quenaaja tamonu saajia manu quiniutianiya tamonu caco!

Taa pa niishiniutianiya quera jiyaa puequesacari
(Mr 13.3-23; Lc 21.7-24; 17.22-24)

³ Na nuhuaji, canaari Olivo cuhuariquia tuhananuucua quiojoquiariini. Jesu ca-jishacari tii, canaa na saquiriojosano pueyani, canaari nocua catecanoquiariini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanutaniya? Naajuhaaj, ¿taa canaa niishiniutianiyari taacari quia tacatenutaniuhua mijiriani? Canaa quia sequerejuhuaj, ¿taacari jiyaa puequenutaniya?

⁴ Jesuuri canaa riucaaree:

—Tama nia cuaqueyajaaja nia cojuare tamasa mariqui nia sapojoreeri. ⁵ Queraatia sapojonuujaacaari supenutaniya. Nojoriiri tama na cuaqueyajaaja sequenutaniya: “Janiyacuja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyari. ⁶ Naajuhujaj, niaari pueyapue miaquetoojonujiniji tojinuuniutianiya, nia, tamonu jiyacajiniano. Niaari miaquetoojonura miananajotoonujiniji tojinuuniutianiyajuhujaj. Niaa jaara naa tojinuuiritij, majaari puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. ⁷ Tamonu pueyari tamasa pueyata miaquetoojonutaniya. Tamonu jiyajiniji jiyaniijaari tamonu jiyaniijaata miaquetoojonutaniyajuhujaj. Jiyacaritij, jiyanhua miaajenuuri quiniutianiya queraatia jiyacajinia, cusunuujuhuaj. Rijaari queraatia jiyacajinia jiuuquiujiutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhuaj, socua jiyacatenutaniyari naquiya miishacari, mijiria cua tiuquiyaquishacarijia.

⁹ Jiyacaritij, niaari jiya camarucua niqitiojosaanutaniya cua muerasu nia quiniucua, naquiya nojori miitianura nijaniya. Niaari puecoosaanutaniya. Puetunu jiyacajinijinio pueyajanaari nia niqiniu paniyacquiniutianiya, cua muerasu nia quiniucua. ¹⁰ Jiyacaritij, queraatia cucua tiunua pueyari cucua tiuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniu paniniu quiniutianiya tarijia narta Pueyaso muerasu. ¹¹ Queraatia sapojonuujaaca Pueyaso rupaa pohuatanaari supenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanhua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³ Saniniuujia, cucua tiuuja jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuca quijara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuataasaare janiyajiniji pueyapue niqiyara puetunu jiyacajinijanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ Pueyaso sequesano caminiujiunia Danielri tariucuaaanu pohuataquiaari sacuaatia casaanaari supenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaatia casaa niqiri Pueyaso Secojoua tijinia nujuatesano, niocua mashiri. ¹⁶ Jiyacaritij, canapuate Judea jiyajinia quiyani, nojori cuaara mashiiria tuhuananuhuacua. ¹⁷ Canapuate na tia cacojiria quiyani, nojori cuaara tiuquiyaquiria na tijajiniaaco maja na tarishiniuria na casamiicua. ¹⁸ Canapuate cuhuariquijania quiyani, cuaara tacateyaquiuuhara na tijajinohua na toqueyacua. ¹⁹ Jiyacaritij, jiyanhua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jiitiaani. ²⁰ Juhuaricua Pueyaso nia secojoriquia nia mashiyocuatunu panishacari quiyacquiniuria shuniyara, samaatenu juucanio. ²¹ Cuno quishacari, jiyanhua naquiya miiniuuri quiniutianiya seetanujuanaa. Jiya coteenujiniji, jiyano naquiya miiniuuri maja na niqishaanu quiquiaari tari. Naajuhujaj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. ²² Cuno naquiya miishacari jaara tajiyacquiri ritia, pueya maara cureyacquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

²³ Jiyacaritij, majaari nia tojinu, tamonu jaara sequere nijaniya: “¡Cua tarajanunaa, Cristoqui tari tiuquiriohua! Niya quiyano”. Naajuhujaj, majaari nia tojinu tamonu jaara nia sequere: “Noj, jati quiyatej”. ²⁴ Queraatia sapojonuujaacaari supenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujaa: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojori quiqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaarihuaj. ²⁵ Pueyanaa, naa cua sequesacari nijaniyatej, janiyacujaari juhuaricua nia numootereeni. ²⁶ Naaratej, majaari nia quianu cua pajenucua, pueya jaara sequere nijaniya: “Cristo jati cariquia jiyajinia quiya”. Naajuhujaj, majaari pueya nia tojinu nojori jaara sequere nijaniya: “Miji,

Cristo sohuacamara cajiya. Nia niquishijia”. Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niqiquiaa miacana nunujiano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. ²⁸ Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiyani Cristo tiuquishacariuhua

(Mr 13.24-37; Lc 21.25-33; 17.26-30, 34-36)

²⁹ Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitijaja-caari tetecatunutaniya. ³⁰ Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanoehua nojori taraajenuta. Na nuhuaji, cua niqitiuniutianiyari cohuaja najacajinia roseyano, jiyanoehua cua cumaacata, jiyanoehua shacantuua. ³¹ Janiyari jiyocuacaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacuajanaa. Nojori tojitiasacari trompeta jonenenu jiyanoehua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

³² 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niquishacaritij, niaari niishiya tacareejonuqui quera quiniutianiya. ³³ Naajuhuj, niaa jaara puetunu cua sequesanojuanaa niquiri tari tohuatayano, niocua niishiri janiyari quera tiuquihuani. Tari jiya puequesacari quera. ³⁴ Seetanujanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuara puetunujuanaa cua pohuatasano niquirijiaatijia. ³⁵ Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

³⁶ Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihua. Jiyocuacaanu quiniaa Pueyaso seyari maja na niishiniujuhuaj. Majaari quenaaja cua niishiniujuhuaj. Saaja cua Queeri tamajaaja na niishiya cutara.

³⁷ Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuaaanu pueya quiquiaaricuaani. ³⁸ Jiyacaritij, nio jiya pajaashitiaquishacarijia, supuetanaari juhuajaniya miaquenujua quiquiaari. Juhuajaniya queranacunuuriquiaajaarihuaj. Juhuajaniya necohua camiyoteriquiaajaarihuaj Noé jaara tiuquitiaquiaarijiaatijia na puereetuua buquejiniacuma. ³⁹ Nojoriiri saaja juhujaniya quiriqiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniucua. Tamonuuri jateenutaniya saniitiosocoriquiano saniniujia. ⁴¹ Naajuhuj, caapiqui maajipohua riiquiniushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriqia. Majaari nia niishiniu taacari nia Jiyaniijia tiuquiniutianihua. ⁴³ Nio nia niishiri. Tia camaru jaara niishiriqia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenua. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinijinio

(Lc 12.41-48)

⁴⁵ Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijaari tucuaaanu quianu paniquiaari tamonu

jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjiajuhuaj. ⁴⁶ Cuno seruuri shuquiriaatia quiniutianiya na camarnu jaara na riuriasuhua maninia poonijiyano taa na camarnu sequequiaari na nuhuajiriacuajani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. ⁴⁸ Saniniujia, cuno seru jaara sesa miijia quiri, nojuajaari tama sequenutaniyaacuajua: “Cua jiyaniijaari jiyanohua tarishiniutianiya”. ⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenujuaca cojiniutianiyajaariuhua queranacununura. ⁵⁰ Naa juhuajiani na quishacaritij, na jiyaniijaari jiyacari na jiyajenetenutaniya. ⁵¹ Naa sesa na quiniucuatej, na jiyaniijaari jiyanohua na saniitonutaniya. Na nuhuaji, na jatanutaniyari na cojiritiasocoriquiano saniitonu sapuenu juhua maninia niquishano miijia pueyata. Nojoriiri tii nujuquetunutaniya. Na quiaa miaquenuunutaniyari, naquiya na miiquiosacari.

25

Jesu pohuatasano diez niyacoojorijinji

¹ N'ia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhuani. Nojoriiri juhua diez niyacoojori quiniutianiya, canapueete camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijinjiiri mosanucua quiquiaari. Tamasacaari saniniujia niishijiaa quiquiaari cutara. ³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maquenujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriniuriiri. Nocuaji niishijiaa niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeere: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹ Cuno cinco niishijiaa niyacoojoriiri nojori riucaaree: “Maja. Maja maninia canaa niqutionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. ¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiurica niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiotiuuri mishiquiosaaree. ¹¹ Na nuhuaji, mosanucua niyacoojoriiri tiuquijioquiaariuhua. Tia tohuatayaji jiiquioonusuhuari. Sequetureeri: “¡Jiyaniijianaa, jiyaniijianaa, canaacuaji quia riatareja tiotiu!” ¹² Jiyaniijaari saa sequeerejaa: “Seetanujuanaa nia sequeyanijia, maja cua niishini nijaniya”.

¹³ Naa na pohuatanu nuhuajitij, Jesuuri canaa na saquiriojosano pueya sequeere:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuani, casaa juucatej.

Miriqui pohuatasano cumaneeca poonitijonaajiniji (Lc 19.11-27)

¹⁴ Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaniya jiya puequesacari. Jesuuri naa canaa pohuataquiaaritij:

—Tamonu jiyaniijaari tucuaaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijasocoriquiano. ¹⁵ Naacuajitij, coteenu seru niqutiooree cinco mil cumaneecaari. Tamonuuri niqutioosaaree dos mil. Tamonuuri niqutioosaaree mil cumaneeca. Na jiyaniijaari naa nojori niqutiojoquiaari na niishishacari nojoriiri rimijata

niishijiaca quiquiaari, socua cuno cumaneeca nojori canijianura. Na nuhuaji, nojori jiyaniijiaari quiaquiaari. ¹⁶ Cinco mil cumaneeca jiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijiaara. Naacuajitij, cuno seruuri socua cinco mil cumaneeca reratequiaari coteenu na jiitiasanojiniji. ¹⁷ Naajuhuaaj, dos mil cumaneeca jiitianaari socua dos mil cumaneeca reratequiaari na jiitiasanojiniji. ¹⁸ Mil cumaneeca masenaari saniniuujia maja na poonitijionu quiquiaari na jiyaniijia niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. ¹⁹ Seya jiyaniijiaari camueenujuquiaari jiyano. Socua tiuquiquiaarihuari na cumaneeca na masejonuhuaara na seyajiniji. ²⁰ Coteenu nocua tiuquiquiaari cante cinco mil cumaneeca niqutiosaaquiaaricujani. Nojuajaari na jiyaniijia sequeree: “Jiyaniijianaa, quiaari cua niqutioicanu cinco mil cumaneeca. Niya quiyari socua cinco mil cumaneeca quiaara, cua poonijiosanojiniji cua reratesano”. ²¹ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiqianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Niya cuata quia quishii shuquiriaatia”. ²² Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niqutiosaaquiaaricujani. Na jiyaniijia sequereeri: “Jiyaniijianaa, quiaari cua niqutioicanu dos mil cumaneeca. Niya quiyari socua dos mil cumaneeca quiaara, cua reratesano cua poonijiosanojiniji”. ²³ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiqianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Shuquiriaatia niya quia quishii cuata”. ²⁴ Na nuhuaji, tamonu seruuri tiuquishiijuhuaj cante mil cumaneeca niqutiosaaquiaaricujani. Na jiyaniijia sequereeri: “Jiyaniijianaa, janiyari niishiyani quiaacuajaari quarta pueyacuara taraajeyashijia. Quiaari tamasaca natoosanojiniji senoouja. Quiaari tamasaca poonijiosanojiniji miajajuhuaaj. ²⁵ Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”. ²⁶ Na jiyaniijiaari na juaarii: “¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senooujani, tamasaca poonijiosanojiniji miajajuhuaaj? ²⁷ Quiaa jaara cua jiyaniquianu naa quijiatej, ¿casaara cua cumaneeca quia niqutioyauquiqianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. ²⁸ Jiyacaritij, jiyaniijiaari tamasaca na seya sequeree: “Nio sesa cua serujiniji nia jaariuutiare cua mil cumaneeca. Nia niqutioire cutara cua maninia seru, cante diez mil jiitiaa tariucujani. ²⁹ Naacuajitij, cante casaa jiitiaacuaani, nojuajaari socua niqutiosaanutaniya, queraatia jiitiaja na quiniuria. Saniniuujia, cante secaja jiitiaa najuhuanani, nojuajaari secaja na jiitiasano jaariutiasaanutaniya puetunujuanaa. ³⁰ Nio najuhuaana quijia seru saniniuujia, nia jatara carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya saniitiosocoriquiano

³¹ Puetunu cua seyajanaari jiyocuaaanuuijia cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijianaa cua quiniuria mijiria. Janiyari shanohua pueyeta jiyaniijia cajitijunina cajiniutianiya, pueya cua nequesoreesacari. ³² Puetunu pueyapuejanaari cucua rerejotesaanutaniya puetunu nio jiyajinijiojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani. ³³ Janiyari maninia pueya njuatejonutaniya cua miaquetajarani. Saniniuujia, janiyari sesoriquia pueya njuatejonutaniya cua muenecarani. ³⁴ Na nuhuaji, janiyari cua miaquetajara njuatiuyano sequenutaniyari: “Miji, cua Que shuquiritasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori nijaniyara, maninia miijiaca nia quiniuuca. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucanejosacari, niaari nia tiaco cua tiuquinijia. ³⁶ Toqueju cua quishacari, niaari cua

niquitioquiaari. Cusosu cua quishacari, niari cua niquiniucua quiaja. Nujuatejojuajinia cua quishacari taraatia, niari cucua quiojojuua cua cumanjianuucua”.³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niquiquiaari quiajaniya jiyamueyanoni? ¿Canaateeri quia raatequiaarini? ”³⁸ ¿Taacari canaa niquiquiaari quiajaniya canaa jiyajinia rucanejeyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuj, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. ”³⁹ ¿Taacari canaa niquiquiaari quiajaniya cusosuni, nujuatejojuajiniano? ¿Canaateeri quiocua quiojoquiaari canaa niquiniuria quiajaniyani? Maja”.

⁴⁰ Janyari cuno maninia pueya riucanutaniyani: “Seetanujuanaa nia sequeyanijia. Niaa jaara naa maninia miiquiaari tamonu cua muerasuniyojuajinijinio, niari maninia cua miiquiaarijiuhuj”.

⁴¹ Na nuhuaji, janyari cua muenecara nujuatiuyano sequenutaniyani: “¿Cua shurucuaqui niiquiji nia quiaare, sesoriquia pueyanaa! ¡Niari cua Que sesacasano! Niari mani quiquiojinia quejoosanutaniya. Cuno mani quiquioori maquesaashijia. Shipinishaquiaariiri samaruhua jiyaniijiaacuaji, na seya samarhuacuajinio. ”⁴² Niaari naa miishaanutaniyaqui nia taraajeyaquiniucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucanejosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhuj, majaari toque nia niquitionu quijia janiya. Nujuatejojuajinia cua quishacari, cusosu cua quishacarijiuhuj, majaari nia quianu quijia cua niquiniucua quenaaja”.

⁴⁴ Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanujuhuaj? Majaari canaa niquinu quijia quiajaniya canaa jiyajinia rucanejijiano tiaaju, toqueeju quiyano, cusosu quiyano, nujuatejojuajinia quiyanojuhuaj. Canaa jaara naa quiyano quia niquiquiaarini, canaa maara quiocua taraajeyaquiarini”. ⁴⁵ Janyari nojori riucanutaniyani: “Seetanujuanaa nia sequeyanijia, nia taraajeyaquiniucua tamonu cua muerasuniyojuacuua, niari seetanujuanaa cucua taraajeyaquiquiaari”. ⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shurucua quianutaniya, pueyaracaanu shuquiriaatia nojori quiniuria.

26

Judiocuaca camarucua roojotoosacari Jesu nojori quianura

(Mr 14.1-2; Lc 22.1-2; Jn 11.45-53)

¹ Jesu jaara puetunu nio pohuatasanojuanaa pohuatanu puecaquiaari, canaa na saquiri-
ojosano pueya sequereeri:

² —Niaacuajaari niishiya, tama tariquiiri Pascua juucara queranacusacari. Janyari
jyacari taucuaca niquitiosaanutaniyani, mosocoriquiano niyacutesanojinia teetesano.

³ Jiyacarijiuhuj, canaa Judiocuaca camarucuaari rerejoquiaari Caifás tiajinia. Caifásri
pueyacuara secojonaa jiyaniijijanaa quiquiaari. Cuno pueya rerejoquiaarini, nojoriiri
quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri
cuno tiajinia pocojoquiaari taa nojori sapojonutaniya Jesu na quiatosocoriquianoni,
nojori mosocoriquiano. ⁵ Nojoriiri tama sequetooquiaarijiaaja: “Maja pa monu Pascuara
queranacusacari, paa mariqui pueya juatiriiri”.

Tamonu maaji totasacari na shanhua jaanutaja Jesuucua

(Mr 14.3-9; Jn 12.1-8)

⁶ Tamonu juuca, Jesuta canaa quishacari Betania tiacajinia, canaari Simón tiajinia mi-
aquenuuriquiaani. Cuno Simónri tarijia lepra cusunujiniji Jesu naatanishano quiquiaari.

⁷ Miaquejajinia Jesu cajishacari, tamonu maajiiri nocua catecanojia. Shiitanioy-
jua shucuariquiaja pataconioyjuua cacatariquiaari, cohuaja saajajiniji quejasano. Tii
quiriquiaari shanhua jaanutaja. Cuno jaanutajaari jiyanohua queraatia cumaneecata
masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa

jaara niqiquiaari naa cuno maaji miishanotej, canaari juaaquioreeni. Noojiaqueya canaajiniiniioori naa sequeturee:

—¿Casaara cuno maaji niitiaree najuhuaana shanohua jaanutajani? ⁹ ¡Cuno jaanutaja maara queraatia cumaneecara niquitiosaare, casamijiuiniucua niquitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanoohua maninia quiria! ¹¹ Casamijiuiniucuaari niaata quiriquiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹² Nio maaji totasacari cucua na shanohua jaanutajani, juhuacarijia cua cuaqueya jeecaari, raoco cua niasaanura janiya jaara mosaareni. ¹³ Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuataasaanutanijuhua puetunu jiyacajinijanaa. Naa na miishano janiyani, majaari na niyajetasaanu quiniutianiya pueyaracaanu.

Judas tacartasacari Jesu, na quiatenura

(Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquriyatu canaajiniiniio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequeeseeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶ Na nuhuaji, Judasri pueyaraacaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸ Jesuuri canaa riucaaree:

—Paacuajaari miaquenutaniyani tari cua sequesano pueyano tiajinia Jerusalén tia-cajinia. Tii nia quiaare. Tia camaru nia sequeese: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹ Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata miaquejajinia cajitiuriquiaa. ²¹ Canaa miaquenuusacari, Jesuuri canaa sequereeri:

—Seetanujuanaa nia sequeyanijia, tamonu nijaniyajinijiniioori cua tacartanutaniya, cua paraa na quiatenura janiya, nojori monura janiya.

²² Canaari jiyanoohua taraajequenei naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riucaaree:

—Cante cuata tureneetaa pa miacojuajinijini, nojuacuajaari cua quiatenutaniya mosocoriquiano. ²⁴ Janiyacuajaari mosaanutaniyani taa janiyajiniji naajiotasaaquiaaricujani tariucuaacaanu Pueyaso Rupaajinia. Saniniuujia, jiyanoohua taraatia miishaanutaniyari cua quiatერიquiano pueyano. Maara socua maninia quiquiaari cuno pueyanora jaara raaquishaaquiaari.

²⁵ Na quiatერიquiano Judasri socua Jesu nequesotareejuhuj:

—¿Janiya jiyoteeri Niishitiojonanaa?

Judas riucaareeri:

—Taaquiririnij. Quiajaniyacuaaquiniatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu nijanijajanaa. ²⁸ Nioori cua nanaca, Pueyaso jiyanooniuria nijaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. ²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyanhua maninia quiniutianiyari cuno quishacari. Paari mariyata jiyanhua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya

(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajionejinijini, na nuhuaji canaari quiojoquiaarini Olivo cuhuariquia tuhuananuucua. ³¹ Jesuuri jiyacari canaa sequeree:

—Puetunu nijanijajanaari cucua tiuuniu tarinitianutaniya quiari niucuaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niyaquejonutaniya tamajaaja”. ³² Naajaa, janiya jaara samitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴ Jesuuri Pedro sequeree saaja:

—Seetanujuanaa nio niucuajani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuaara moora janiyaqui, naajaa, majaari cua seetanu quiniutianiya quiocuaji! Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

Jesu secojosacari Getsemani cuhuariquiajinia

(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquijioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree:

—Niyaja nia cajitiuri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niqiuohuano. Jesuuri juhuacatecara taraajequiaari. Jiyanhua tacaariquiaajaarihuaj. ³⁸ Jiyacaritij, Jesuuri nojori sequeree:

—¡Coojia quera jiaqueya jiyanhua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quena, jaara na naata quiri, maja quenaaja cua cartenu naquiya cua miishaanura! Naajaa, janiya cuaara miishaariaqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niqishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujiishaare. Seetanujuanaa, poojiaari maninia miiniu panijia. Pa cuaqueyari saniniujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quena, janiya jaara naquiya miishaareni, janiya cuaara miishaariaqui taa quia paniyacuajani.

⁴³ Jesuuri na pueyacia tacateyarohuacuhuj. Maquetiuyano nojori riuriatasuhuari-huhuj. Nojori namijiaari saaja seecutayariquiaa jiyanohua nojori maquenu paniniutia.

⁴⁴ Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucujani. ⁴⁵ Na nuhuaji, na pueyacia nimiohuariuhuj. Nojori sequesuhuari:

—Quiarijia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaa pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneecature! Pa quiaare. Cumaji tari cua quiateriquiano.

Moronucua na paraa jaatucutasacari Jesu

(Mr 14.43-50; Lc 22.47-53; Jn 18.2-11)

⁴⁷ Jesu pocuasacarijia, Judasri jiyacari tiuquishii. Nio Judascuajaari niquiriyatu canaajiniinio Jesu doce saquirojosano pueyajini quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhuj. Nojoriiri nijiniaquetucujaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyan teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujajaari nojuaja. Niocua na quiasee ritia”. ⁴⁹ Naacuajitij, Judas tiuquishacari Jesuucua, na sequeereeri:

—Quiocua tiuquiyaniija Niishitiojonanaa.

Jiyacarijia na nujuureeri. ⁵⁰ Jesuuri na sequereeri:

—Cua rupenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajiniinio pueyanoori ritia shitiaree na nijiniaquetucujaja mueruu na shuucujaji. Nata jaatereeri secojonaa jiyaniijia seru numocoori. ⁵² Jesuuri na sequereeri:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuj? ⁵³ ¿Quiaate niishiyajuyuhuj, janiya jaara cua Que sequereni cucua na jiyaramiquiniuria na seya jiyocuaanuji na cojuanura janiya, cua Que maara ritia cucua jiyaramiquiri cincuenta mil na seyajiniinio? ⁵⁴ Naajuhuj, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajini naajiotasanotucua taa tohuateerini?

⁵⁵ Jiyacaritij, Jesuuri na paraa sequereeri:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiquianu janiyani?

⁵⁶ Naajaa, naacuajitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajiniucujani.

Jiyacaritij, canaa, na saquirojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatereeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuaquiaari jiyaniijia Caifásua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucujaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniijia tiajinia. Cuno puereetuca tia shocuaari mataca quiquiaari. Pedroori tii carjiniacuma tiuquiquiaari-juhuj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucuatanaa pajeriquiaa pueya, nojori saquirojotanura na sapojonuta Jesuucua, na mosanura. ⁶⁰ Queraatia pueyari najuhuaana Jesuucua saquirojotaree juucua. Nojori sequesanoori rimiajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquirojotaree Jesuucua. ⁶¹ Nojoriiri naa sequereeri:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucuatanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaji, secojonaa jiyaniijaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojiri quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiri quiaa. Nocuaji secojonaa jiyaniijaari Jesu sequereeri:

—¡Cua tojiri! Paa niya quiya Pueyaso niquiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaaree:

—Jaa. Nojuacuajanjia taa quia sequereecuajani. Cua tojitiare. Na nuhuaji, niaari cua niquiniutianiya Pueyaso miaquetajara cajiyano. Niaari cua niquiniutianiyajuhua jiyocuacaanuji tacateyanohua cohuajajinia.

⁶⁵ Pueyacuara secjonaa jiyaniija jaara tojiquiaari naa Jesu sequesantej, tama na toque sutareejaarija na juaaniutia. Nata quiniaa sequereeri:

—¡Juhuej! ¡Nia tojishuriuucuaa na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuaraatiari na sequesano Pueyaso niquiar! ¿Paatucua casaara sashiri socua tamonu saquiriojotanura nocuaraarini? Ni-aacuaja shusha tojitiaree tama na sequesanojuaja sacuaraatia Pueyaso niquiar. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secjonaa jiyaniija riucuaaree:

—¡Cuaara mosaaria!

⁶⁷ Jiyacaritij, tamasaari Jesu jiquioco riocojoree. Na jiquioco na masetejotureejaariuhua. Tamasaca saniniuujia, Jesu namijia na morotunu nuhuaji, na mocoritia na piquitiuriiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucujaji

(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiri quiaajaa carijiniacuma. Jiyacaritij, secojonaa jiyaniija seruuri Pedro niquishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucunejojua, cuno Galilea jiyajinijinio pueyanotani!

⁷⁰ Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohateyajiria canujiyaree. Jati, tamonu niyacoori na niquiriijuhua. Cuno seruuri jiyacari tii quiniaa sequereeri:

—¡Nio pueyanoori cuno Jesuta quijijuhua, cuno Jesu, Nazaret tiacajinijinio pueyanoni!

⁷² Pedroori Jesujiniji socua seetanu camiriohuacuuhua:

—¡Maja cua niishiniu cuno pueyano! ¡Pueyasocujaari niishiya, seetanujanaa nia sequeyanijial!

⁷³ Pasaja na tarishiniu nuhuaji, quinqi quiniaari Pedro sequetusee:

—¡Quiaaqui seetanujanaa cuno Jesu pueyajinijinio! ¡Quiaari juhua nojori pocuaajuhua!

⁷⁴ Jiyacaritij, Pedroori socua jiyacateere sapojonura. Naa cuno pueya sequereeri:

—¡Pueyasocujaari niishiya maja cua niishiniu cuno pueyano, nia na sequeyani! ¡Pueyasocujaari cua sequesano tojiya! ¡Majaari cua sapojonu nijajaniya!

Caacarajaari canashiyajiji niunjioquee. ⁷⁵ Jiyacaritij, Pedroori naa cuno niucuaa Jesu sequesano niishiquii: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua matakajiniji tohataquaaari ritia. ¡Jiyanohua nujuquequeeri na taraajenuta!

¹Tariquicuaji, puetunu pueyacuara secojonaa jiyaniijianucujanaari rerejoree narta Judiocuaca camarucuata. Nojoriiri roojotooree taa na miitiuniutianiya Jesu na motenurani. ²Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³Judasri jiyanoehua macuhuajequiaari na niquishacari Jesuuri mosaanutianiya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niquitionuhuara cuno treinta cumaneeca.

⁴Judasri nojori sequeese:

—¡Janiaqui sesa miiriucuaani, najuhuana cua quiatenuucua maninia pueyano nia-janiya!

Nojoriiri saa na riucuaareejaa:

—Naajaa. Maja canaa miishano. Cunocuaajaari tama quia miishanojuaja.

⁵Judasri nojori cari cuno treinta cumaneeca jatatee Pueyaso Secojoja tiajinia. Tiji quiacuhuari. Na riquiajiniji morotaquiaari sohuaneyocuaari. Naa cusocuaariiri. Sohuaneyocuaacuaji jaasutaari. ⁶Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau panioru pueyano cuhuariquia masequiaari cuno cumaneecata. Cuno cuhuariquiaari jiyatesaaciaari rucoonaa jamojuara, nojori jaara cusoyare Jerusalén tiacajinia nojori quishacari. ⁸Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰Naacuajitij, Pueyaso sequenu panishano caminiujiniya supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhuariquia masenura marau panioru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaciaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’ ”.

Pilato nequesoresacari Jesu

(Mr 15.2-5; Lc 23.3-5; Jn 18.33-38)

¹¹Jesuuri jaatucusaaciaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaare:

—Jaa. Naacuaaquiniatejaj, taa quia sequerecujani.

¹²Secojonaa jiyaniijianucua, canaa Judiocuaca camarucuanio, nojori jaara Jesuucuaa saquirojotariquiaa, Jesuuri sanaa tojiriquiaa nojori. ¹³Naaratej, jiyaniijia Pilatoori Jesu sequere:

—¿Majate quia tojinu nojori, quiocuara tonujiano queraatia?

¹⁴Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquia quenaajani.

Pilato sequesacari Jesuuri mosaanutianiya

(Mr 15.6-20; Lc 23.13-25; Jn 18.38-19.16)

¹⁵Puetunu Pascua juucarajanaa, Pilatoori nujuatejojuajinia nujuatesano pueyano cartenuu jitiquiaari. Judiocuaca panishano pueyanoori cartesaaciaari pueyara-caanu. ¹⁶Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanishano. Puetunu pueyajanaari na niishijia sesa na miiniucua. ¹⁷Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosana.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojiti-aaqiriqiaa, nojori tojitianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqi, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanoocujajini!”

²⁰ Jiyacaritij, secojonaa jiyaniijianucuaari, canaa Judiocuaca camarucua pueya ni- ishitojoriqiaa nojori sequenura, Barrabás cuaara cartesaaria, Jesu cuaara mosaaria saniniuuja. ²¹ Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucuaaree:

—¡Cuaara teetesaaria niyacutesanojinia!

²³ Pilatoori nojori nequesotarohuacuhuj:

—¿Casaarateni? ¿Sesa miiritijiaara?

Pueyari saaja socua jiyanoehua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujiushacari Jesu juucua, pueyari saaja socua jiyanoehua na-cooriquiaa. ¡Socua jiyanoehua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuaacujani, nojuajaari mohuaca masere. Pueya niqiara shuquitiareeri. Na shuquitasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaja!

²⁵ Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niqiuohuacuanio!

²⁶ Na nuhuaji, Pilatoori Barrabás tohuateree nujuatejojuajiniji. Saniniuuja Jesu maja-cuteereeri. Na nuhuaji, na soldadohua na niqutioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohujanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatinuria. ²⁹ Nojoriiri juhuacontucua maaturee na nacaquerajuhuj. Na nuhuaji, na cushitituriiri Jesuuri. Naajua niqutiosaaree-jaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaa mojuquetacoquiaari. Nojoriiri naa na macaatiiri:

—¡Jejeje, Judiocuaca jiyaniijiana!

³⁰ Nojoriiri Jesu riocojoree. Na naajua na jaariutiatureeri. Nataja na naca piquitiuriiri. ³¹ Naa nojori macaatinu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji pucoosaquiria nojori quiojosacari, nojoriiri ta-monu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. ³³ Nojoriiri tiuquijiose sesa miijiaa pucoosaqui. Pueya pucoosaquini, na sesa quiquiaari “Gól-gota”. Nioori pueyano rupajinia sequeya “Pueyano nacaco”. ³⁴ Quinqi, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacuaajitij, tama nojorijiaarijia Jesu toque seraatiaquiaari. Naa tohuateequiaari tariucuaacaanu Pueyaso sequesano caminiujiunia sequesano, nojuaja jaara naa naajiotaquiaari: “Pueyari saitia tacuarishijioree cua toque nojori seraatianura”.

³⁶ Na nuhuaji, cuno soldadohuari cajitiuquiaari Jesu na cojuanura.

³⁷ Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenujuacaari Jesu shuriucua teetesaaquiarjihuuj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹Tamasaca pueya tajishacari nucaaco Jesu shuriuquico, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Ja! ¡Cumaacaraca quijia naatijia! Quiaacuajaari sequeja quiaa jaara Pueyaso Secojoja tia niyartare, quia naata na tianu tucuatunuhua jiuuqianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Niyanu quiri seetanujuanaa!

⁴¹ Secojojaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhua. Tama sequetooriquiaajaarijia:

⁴² —Saaja tamasaca naatanijiojuaquiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiarijia pa niquiara niyacutesanojiniji, nocua pa tiuuniuria. ⁴³ ¡Pueyasocua tiuujia naatijia! Jaara naa quiriritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴ Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macaatiriquiaajuhua.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵ ¡Panacari, mijiriaari ninishiquiria quiqui! Pananu mueecosacari cuhuatemohuari.

⁴⁶ Jiyacaritij, Jesuuri jiyanohua nacaquiaari naatej:

—¡Elí, Eliinaa! ¿lama sabactani?

Nioori pueyano rupajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua njuatunaari na tojitiariquiaa. Nojoriiri sequere:

—¡Nia tojiri! ¡Supuetana Elías jiiquioonuyano! Noo Elías, tariucuaacaanu pueyara Pueyaso sequesano caminiujiunia quiqiaaritij.

⁴⁸ Tamonuuri ritia netequee namasu casa na riniuria. Naajuacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura.

⁴⁹ Tamasacaari sequere:

—¡Pa shanacure! ¡Elías jiyoteeri nocua niniutianiya na roshiniuria niyacutesanojiniji!

⁵⁰ Jiyacaritij, Jesuuri jiyanohua nacarohua! ¡Na nuhuaji na sohuano tohuataniriiri! ¡Cusoqueeri! ⁵¹ Pueyaso Secojoja tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. ¡Jesu cusosacari, cuno toqueeri sutequee jiyocuaaanuji jiyocuaa puetunujuanaa! ¡Rijiaari jiya jiuuquitiaquiaari jiyanohua! ¡Sairi jiaquetacoquiaari noojiaacojil! ⁵² ¡Macunucua raacaari riatequequiaari! ¡Queraatia tariucuaacaanu Pueyasocua tiuuniari samiiticoquee na raacajinia! ⁵³ Jesu jaara samiitiquiaariuhua, cuno samiiticonohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacia muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuaara cusoyareajatijia nojori niquiara. Nojori jaara jiya niquitiquiaari jiuuquitiaano, socua puetunu nojori niquishanojuanaano, nojoriiri jiyanohua puereturee. Sequetureeri: —¡Nio pueyanoqui seetanujuanaa Pueyaso Niyanu quiqianu!

⁵⁵ Queraatia maajipohuari tii quiriquiaajuhua. Nojoriiri tucuaaanuji shootiatiriquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno

maajipohua tajinia quiriquiaari María Magdalena, Santiago nucua Maríajuhua, José nucua Maríano, mariyata Zebedeo niquiohua nucuano.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiquiaari Arimatea tiacajinijinio. Jiyanhua casamiriaca quijaaari. Na sesa quiquiaari José. Nojuajaari tarija Jesu tojjiara quiquiaari. Joseeri Jesu cusonu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. ⁵⁹ Joseeri Jesu quete paquiaari na jeenucanura raaco na niasocoriquiano. Na jiuniooreeri quenaaruque cohuajaque toquejinia. ⁶⁰ Na nuhuaji na niaquiaari tama na raacojaarija. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuca saajia saquitiniquiaari raa tiotiuria. Quiacuhuari. ⁶¹ María Magdalenaari na sesaanucata cajitiuriquiaa raa canaja taquijiria.

Soldadohua cojuasacari Jesu raa

⁶² Pascuara jeenucanu juuca nuhuaji, secojona jiyaniijnucuaari Pilatoocua quiojoquiaari Fariseocucata. ⁶³ Naa na sequetuseeri:

—Jiyaniijanaa, canaari cuno sapojua pueyano sequesano niishiquini, na sequesano saminio na quishacarija. Nojuajaari sequeja: “Janiyari jiuujianaraca juucajinia samiitanutaniuhuan”. ⁶⁴ Nocuaji na raa quia cojuatere maninia tiosano, jiuujianaraca juuca cuaara shocorejaatija, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacua. Nojori jaara na sapojore pueyatej, socua jiyacatenutaniyari Jesu sequesano, nojuaja jaara sequedanu: “Janiyari Pueyaso Jiyarosanoni”.

⁶⁵ Pilatoori nojori sequeree:

—Niya quiyacuja cua soldadohua. Nojori nia cojuatere maninia cuno raa, taa nia paniyacujani.

⁶⁶ Nojoriiri soldadohua nujuatejoquiaari raa nojori cojuanura. Raa tiotiuri rupana-cusaquiaarijuhuaj jiyaniija Pilato sesa naajiotajata.

28

Jesu samiitiasacarihua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niquiniucua quiariquiaa na sesaanucata. ² ¡Canashiyajiji, rijiaari jiyanhua jiuuquiutiaree! Cunoori quiquiaari Pueyaso seru rosenucua jiyocuaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niquishaaquiaari shacantuca juhua miacana! Na toqueeri jiyanhua cohuajaque quiquiaari, juhua sohanatuu. ⁴ Raa cojuatunari jiyanhua shiriqitiuquiaari nojori niquishacari Pueyaso seru. Jiyanhua tetecatureeri. Na puerenuta socua seconuureeri. ⁵ Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriqini. Janiyacuajaari niishiyani niaari Jesu pajeya, niyacutesanoinia mosanotej. ⁶ Maja niya na quiniu. Tari samiitiarohuano, taa nojuaja sequequiaari nijaniyacujani. Miji. Nia niquishushiiria na masaqui. Shaaqui. ⁷ Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niari jati na niquiniutianiya”. Janiyacuajaari tari nia sequereni. Naa nia pohuatasuhua na pueya.

⁸ Maajipohuari masacujutanuuriquiohua raajiniji na puerenuta, na shuquiriniutiajuhuaj. Nojoriiri socua netecuatiyarohuaquij, canaa na pohuatanuhua Pueyaso seru sequesano nojori. ⁹ ¡Jiyacaritij, Jesujuanaari canashiyajiji nojoriicua muetaquee nuujinia! Nojori sarhuatareeri. Maajipohuari nocua catecanoree. Na cariquimijia

mojoquetacoreeri. Jesu niohuaca quiatuereeri. Jesu shootiatuereeri na jiuujiatenuta.
¹⁰Jesuuri nojori sequereeri:

—Maja nia puerenu. Nia quiaarohua. Cua pueya nia sequesuhua nojori cuaara quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niquitiuniutianiya.

Raa cojuanaa pohuatasano

¹¹Maajipohua quiojosacariuhua, noojiaqueya raa cojuanaajiniijinioori tiacajinia quiojo-
 quiaariuhua pueyacuara secojonaa jiyaniijianucua nojori pohuatanura nojori niquishano.

¹²Pueyacuara secojonaa jiyaniijianucuaari canaa Judiocuaca camarucuata rerejoree na rojotoonura taa na miitiuniutianiya. Na nuhuaji, nojoriiri queraatia cumaneeca niquitioquiaari raa cojuanaa, pueya niquiara nojori pohuatanura tamaatia nojori niquis-
 hanojiniji. ¹³Soldadohuari naa rootasaaquiaritij:

—Niocua naa sequere pueyatej: “Canaa maquesacari, Jesu pueyaquiiri niucua nohuase-
 quee Jesu quete raajiniji”. Niocua naa sequeretej. ¹⁴Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shiniajanutaniya jaara juaari. Naacuajitij, majaari na juaaniu quiniutianiya niajaniya.

¹⁵Jiyacaritij, soldadohuari cumaneeca maseree. Nojoriiri naa pohuatanu coteequiaari
 taa nojori rootasaareecuajani. Nojori cuaracashishanoori ritia caminiujiushaaquiaari
 canaa Judiocuacara. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

¹⁶Canaa, Jesu once saquiriojosano pueyani, canaari Galilea jiyajinia quiojoquiaari
 tamonu tuhananuucuaani. Jesuuri canaa sequequiaari canaa quiojonura tiriara, tii canaa
 coquetonura nata. ¹⁷Canaa niquishacari Jesu quiyano tii, canaari nocuara mojoqueta-
 coquiaari canaa shuquiritianura nojuajani. Tamasaca canaajiniijinioori jiyaniriquiaa maja
 naasucuaari Jesu. ¹⁸Jesuuri canaacua catecanoree. Canaa sequereeri:

—Janiyari puetunu cumaacajanaa niquitiosaareeni, Jiyaniijajanaa cua quiniuria jiy-
 ocuacaanu, mijirianio. ¹⁹¡Naaratej, nia quiojore! ¡Puetunu pueyapuejanaa nia pohuatare
 cua rupaa, cua tojitiajacara nojori quiniuria! Moojinia nia tiuquinijiore cua tojitiajaca
 Pueyaso sesajinia, nojori rupesacari pa Que Pueyaso, janiya, na Sohuanunio. ²⁰Nojori
 nia niishitiojore puetunu cua rootasanojuanaa niajaniya, nojori tojishocoriquiano. Nia
 niishiri nio: jjaniyacuajaari niaata quiniutianiya pueyaracaanuni, jiya cuaara puequere-
 jaatijia!

MARCO NAAJIOTASANO JESUCRISTOJINIJI

Cariiquia jiyajinia Tiuquinijiona Juan poojotasacari Pueyaso rupaa

(Mt 3.1-12; Lc 3.1-9, 15-17; Jn 1.19-28)

¹ Pueyaso Nyanu Jesucristojiniiri naa coteetasaaquiaari pohuatanutej. ² Tariucuacaanu pueyara Pueyaso sequesano caminiujunia Isafasri Pueyaso Nyanu niyacari naajiotaaquiaari. Naajiotaaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojjia nojori quiniuria. Isafasri naa naajiotaaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. ³ Na nacanuari tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’ ”

⁴ Quiari naataja, Tiuquinijiona Juanri seetanujuanaa naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijionura niajanija! ¡Pueyasocua sesa nia miishanojiniji nia jiyanoori puetunujuanaa!

⁵ Puetunu Judea jiyajiniinio pueyajanaari nocua nijioquiaari nojori tojtianura nojuaja, Jerusalén tiacajiniinio pueyanio. Cuno pueya jaara sesa na miishano pohuataquiaari Juan niquiara, Pueyaso niquiarajuhuj, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷ Juanri pueya niquiara pohuataquiaari naatej:

—Tamonuuri cua nuhuaji niniutaniya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji. ⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojajinia, na cumaaca nia jitianura, seetanujuanaa maninia miijia nia quiniuria.

Jesu tiuquinishacari moojinia

(Mt 3.13-17; Lc 3.21-22)

⁹ Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niquiquiaari riatelyano. Pueyaso Sohuanu niquiriiri nocua roseyano juhua mococoonu. Nocua tiushiiri. ¹¹ Jiyacaritij, jiyocuaaanuji tojishaaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanohua quia timitiaanijia!

Samaruhua jiyaniijia saniniujiushacari Jesu

(Mt 4.1-11; Lc 4.1-13)

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara. ¹³ Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujuriquiaa na tojijiara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

Jesu coteesacari poonijionu Galilea jiyajinia

(Mt 4.12-17; Lc 4.14-15)

¹⁴ Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojotaaquiaari tii, maninia pohuatasano Pueyasojiniji, taa Pueyaso jitianutaniya na muerasuni.

¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtijajaca nia quiniuria.

Jesu saquiriojosacari pueya, na tarajariquiano

(Mt 4.18-22; Lc 5.1-11)

¹⁶Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajinia. ¹⁷Jesuuri nojori sequesee:

—¡Miji, cua nuhuajitiyuare! Janiyari nia jiyatenutaniya pueya quioojuara saniniunijia, juhua sapitiaaja.

¹⁸Nojoriiri ritia na shiyaru tiujiaquiaari. Jesuta quiojiyareeri.

¹⁹Socua shiitianiyojua na tacoji Jesu canujusacari, Santiago niquishiiri, tarajanu Juanio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohúa quiquiaari. ²⁰Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano

(Lc 4.31-37)

²¹Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. ²²Pueyari jiyanohua jiuujiatequiaari na rootasano nojori tojishacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. ²³Samaruraca pueyanoori Pueyaso secojojua tiajinia quiriquiaa tiijiuhuaj. Nojuajaari nacaquiaari:

²⁴—¡Nazaret tiacajinijinio Jesunaal, ¿quiaateeri tari canaacua nimiaa, canaa quia shaa-janura? Janiyari quia niishiyani. ¡Quiaacuajaari Pueyaso Niyanu!

²⁵Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

²⁶Jiyacaritij, samaruuri jiyanohua taraatia miiri cuno pueyano. Jiyanohua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷Puetunu pueyajanaari shiriqitiuquiaari. Tama nojoriijaarijia nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojtiaa nojori na jiyarosacariiri!

²⁸Pueyari ritia caminiujuquiaari Jesujiniji puetunu Galilea jiyajiniajanaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juananio. ³⁰Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa.

³¹Jesuuri nocua canujiyaree. Na juaashiquiajiniji cusosu sanaseeri. Na cusonuuri seetanujanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³²Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. ³³Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴Jesuuri queraatia puetunu tamaatia cusonujanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinia
(Lc 4.42-44)

³⁵ Jesuuri jiyanhua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶Na nuhuaji, Simónri Jesu pajenuucua quiojoquiaari, nata quiniaata. ³⁷Jaara na riuriatatuquiaari, na sequetuseeri:

—¡Puetunu pueyajanaa quia juuretaal!

³⁸ Jesuuri saaja nojori sequereee:

—Pa quiaare juhuari catecanaataja tiacajinia. Tii pa pohuatarehua Pueyaso rupaa pueya niquiara. Janiyacuajaari cunora jiyasohuaja tohuataareeni.

³⁹ Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaari Pueyaso secojoja tiacajiniaqueya puetunu Galilea jiyajiniajanaa. Nojuajaari samaruhua tohuatanijioquiaarijuhuaj.

Jesu naatanishacari lepraraca pueyano
(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

⁴¹ Jesuuri nocua taraajequiaari. Na juaashiquia niaree nocuaari. Na sequereeri:

—Taaquiriririnj. Quia naataniniu panianijia. Quia cuaqueya cuaara jeequehuara.

⁴² Jesu jaara naa na sequequiaaritij, na lepraari ritia cushiriitiqui. Na cuaqueyajiniji shaajequiaariiri na cusonu. Na cuaqueyari maniniara quiquiaarihuua. ⁴³Na jiyaroyaquishacarijia na naatanishano pueyano, Jesuuri jiyanhua na rootaquiaari. Na sequereeri:

⁴⁴ —¡Cua tojori, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niqutishii, na cartenuhuara quiajaniya, pueya tajinia quia rucuanonuhua juhuajaniya. Mariyata ritia quia niqutiore quia seru Pueyasocuara catijasocoriqiano. Naa quia miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niquniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocujaji Jesuuri pueya quiyaquishaqui rucuanajoja. Naajaa, puetunu cuno jiyajiniji pueyajanaari saaja nocua nijioquiaari na niquniuria.

2

Jesu naatanishacari cumatacuruhuana cusosu
(Mt 9.1-8; Lc 5.17-26)

¹ Na rucuanononu nuhuaji, Jesuuri Capernaum tiacajinia tiuquiquiaarihuua na saquiriojoso pueyata. Pueya jaara niishiquiaari Jesu tari na quijia tijinia tiuquiriohua, ² queraatia pueyari nocua nijioquiaari cuno tijiniara. Nojoriiri tiaco mishiquiaari, tohuateyajijiuhuaj. Jesuuri cuno pueya niquiara pohuataquiaari Pueyaso rupaa. ³ Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. ⁴ Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuateyaji. Nocujaji nojoriiri tia cacojiria cusosu tacataquiaari tacatuhooco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. ⁵ Jesuuri cusosu patanaa pueya niquirii seetanujanaa nocua tiuyano. Naaratej, Jesuuri cusosu sequereee:

—Quiyanunaa, sesa quia miishanojiniji quia jiyanoori taricujajaniia.

⁶ Moisés Rootasanojiniji niishitiojonaari tii cajituriquiaa. ⁷ Nojori tojishacari Jesu jiyanojano cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. ¡Nojuajaari

tama na cuaqueyajaaja jiyateya juhua Pueyaso na quiniuria! ¡Cunoori jiyanoehua sacuaratia! ¡Saaja Pueyaso cutaraari na naata pa jiyanooniui!”⁸ Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojiyani? ⁹ ¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuhua: “Quia sanere. Quia matu quia pataarohua”? ¹⁰ Seetanujuanaa nia sequeyanjia, janiyari quiarjia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaa cua jiyanooniuriani.

Jiyacaritij, Jesuuri cumatacuruhuaana cusosu sequeree:

¹¹—Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niquiara na matu pataarohuari. Naaratej, pueyari jiuujatequiaari. Pueyaso manihuuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—¡Majaari quenaaja pa niquiniu quiquiaari naa miishanotej!

Jesu sequesacari Leví na nuhuajiniuria

(Mt 9.9-13; Lc 5.27-32)

¹³ Na nuhuaji, Jesuuri na saquirojosano pueyata tacatequiaarihua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojioquiaari Pueyaso rupaa. ¹⁴ Na nuhuaji, Jesu quiojosacari na saquirojosano pueyata cuniquiji, Jesuuri Leví niquimiaa cajiyoano Roma tiacajinia quijia jiyaniijara cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucuaja, Jesuuri Leví tiajinia miaqueriquiaa. Leví tiajinia miaquenuuriquiaajaarihua queraatia narta cumaneeca masejona. Queraatia tamasaca pueyari nojoritia miaquenuuriquiaajuhua, canapue Judiocuaca camarucua sequequiaari sesa pueyatacua-jani. Nojoriiri Jesuta miaquenuuriquiaa, Jesu saquirojosano pueyatano. Jiyanoehua queraatia pueyari Jesu rupueña quiriqiaa. ¹⁶ Moisés Naajioneejiniji niishitiojona, mariyata Fariseocuaca jaara Jesu niquiri cuno pueyata miaqueyano, nojoriiri Jesu saquirojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaaniuhua?

¹⁷ Jesuuri cuno pueya sequesano tojiri. Nojori sequeree miriquiri:

—Jiyotuucari maja na paniniu naarajona. Cante cusosuni, cuno cutaraari naarajona paniya. Majaari cua ninu quiquiaari maninia miijiaacu. Niquiaari cutaranjia nia sequesano sesa miijiaa cua jiyanooniuria sesa nojori miijosanojiniji.

Pueya nequesotasacari Jesu, casaara na pueya miaquenu carteyaquiyaari, nojori shuquiritiniuria Pueyaso

(Mt 9.14-17; Lc 5.33-39)

¹⁸ Tamacari, Tiuquinijona Juan tojtiajaca, mariyata Fariseocuaca miaqueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquirojosano pueya carteyaquiya miaquenu quenaajani? Tiuquinijona Juan pueya cutaraari miaajecoquiaa Pueyaso nojori shuquiritiniuria. Fariseocua-caari naa miiquiaajuhua. ¿Casaara naa quia pueya miyaquiyaaniuhua?

¹⁹ Jesuuri nojori riucaaree miriqui:

—¿Masuusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ Seetanujuanaa nia sequeya cutaranjia, toque mocua cuhuocoori maja na naata cu-shipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaree. ²² Naajuhua, quiariniacu

uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuaana niitiaa uva caacani, shoquenio. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoquenio.

Jesuuri naa pohuataquiaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajiniaaco na saquirojosano puey-ata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niquiquiaari, Jesu sequetureeri:

—¡Quia niquiri! ¿Casaara quia saquirojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

²⁵ Jesuuri nojori sequereer:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jitiaaquishacari na coseyaca? ²⁶ Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara. ²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeeacasacari pueyano juaashiquia cuseetucujuara joojequetano
(Mt 12.9-14; Lc 6.6-11)

¹ Jesuuri Pueyaso secojojua tiajinia tiuquiquiaariuhua na saquirojosano pueyata. Tii quiriquiaari pueyano, cuseetucujuara joojequetano juaashiquiaraca. ² Cuniqiu quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequeetoreejaaja:

—¿Jesuteeri sesarucouja pueyano juaashiquia jeeanutaniya samaatenu juucani?

Nojoriiri Jesuucara saquirojotanu paniriquiaa, nojuaja jaara samaatenu juuca pooni-jiore. ³ Jesuuri jiyacari sesarucouja pueyano sequereer:

—Quia sanere. Niya quia nujuasee canaa tajinia pueya niquiara.

⁴ Na nuhuaji, Jesuuri pueya nequesotareer:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niquitariquiaa saaja, Jesu sequesacari naatej. ⁵ Jesuuri na shocuaqueya nujuatiuyano pueya niquinijioree na juaaniutia. Nojoriicua taraajeriquiaajaariuhuj, cumajiuujiaaca nojori quiniucua. Majaari nojori niishiniu paniniu quiquiaari taa Pueyaso paniya pueyacuara taraajeja pa quiniuriani. Jesuuri sesarucouja pueyano sequereer:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!

⁶ Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaaca pueyata pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquirojosano pueyata. Queraatia pueyari na nuhuajiquiaarijuhua Galilea jiyajiniji. ⁸ Pueya niishishacari puetunu Jesu

maninia miishanojinijianaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhua, Idumea jiyajinijinio pueyano. Nijioquiaar-ijiaarihua Jordán moo taqijirijajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhua na niquiniuria Jesu. ⁹ Nocuaji Jesuuri na saqiriojosano pueya sequequiaari:

—Niocua juhuacarjia bote cojuare quiria, cua tacajara pueyacuaji, maja pueya tanuujunura janiya.

¹⁰ Jesuuri jiyacari jiyano hua queraatia pueya naatanijioriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusunujiniji nojori naataconuhua.

¹¹ Samaruharaca pueya jaara Jesu niquitiquiaari, nojoriiri nocuara mojoquetacokuiaari. Naa nacatuquiaariiri:

—¡Quiaacuajaari Pueyaso Niyanu!

¹² Nocuaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

Jesu saqiriojosacari doce pueya na pueyajinijinio, na rupaa pohuatariquiano

(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujani. Nocua nijioquiaariiri na jyaniquishano pueya. ¹⁴ Jesuuri doce pueya saqiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. ¹⁵ Nojori niquitioree na cumaacaari, cusosuhua nojori naatanijionura, samaruhua nojori tohuatejonurajuhua. ¹⁶ Nioori na saqiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaa pueya maanujinijinio quiquiaari. ¹⁹ Quiquiaarijiaarihua Judas Iscariote, Jesu quiatequiaari mosocoriquianoni.

Judiocuaca camarucua sapojosacari, Jesu samaruhua cumaaca jiitiaa

(Mt 12.22-32; Lc 11.14-23; 12.10)

²⁰ Na nuhuaji, Jesuuri na saqiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tiajinia Jesuucua. Naacuajitij, majaari nojori naata miaquenu quiquiaari. ²¹ Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequeoortiquiaajaarijia:

—¡Jesuqui tari paatecara quirijuhuanajaj!

²² Moisés Rootasanojiniji niishitiojanaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niquitiorucuaa cuno pueyano. Cunora, samaruhua tohuanijia pueyajinijiiri.

²³ Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuanu pueyanojiniji tama Satanás cumaacatajaaja? Maja na naata. ²⁴ Naajuhua, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasanutaniya. ²⁵ Naajaariuhua, pueyano jaara tapueyocucata juayonuutare, majaari nojori naata jatiqui quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuanijioquiaa samaruhuanu. Satanás jaara naa miiritij, cuno maara tari quiri na shaajasaanurajanaa.

²⁷ Naajuhua, pueyano maja na naata tiuquiniu cumueca pueyano casamiriaca tiajinia, na casami na jaariuutianura, jaara coteenu na camaru morojijaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸ 'Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhaaj. ²⁹ Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocuacajinijino
(Mt 12.46-50; Lc 8.19-21)

³¹ Jiyacaritij, Jesu nucuuaari tiuquiiioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriucara. ³² Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pa-penyuaquinia.

³³ Jesuuri saaja nojori sequeree:

—¿Cante cua nucuani, cua tapueyocuacajuhaaj?

³⁴ Na nuhuaji, na shocuaqueya cajitiuniaa niquinijoreeri. Sequereeri:

—Nio pueyari cua nucuua, cua tapueyocuacanio. ³⁵ Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natoojoua pueyanojiniji
(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojtianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ² Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

³ —Nia tojitiare nio sequesano. Tamonu juuca, pueyano na cuhuariquiajinia natoonuuca quiaquiaari. ⁴ Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. ⁵ Tajaacaari totequiaari sai tajiniaqueyajuhaaj. Majaari cuniqui puera jiya quiniu quiquiaari na maashiniuria. Naacuajitij, najuhuaa ritia moritiaquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijiuhua riyocuaca tajinia. Jiohuacacaari socua ritia maashiquiaari. Natauri tarinitiuucara quiquiaari saniniuujia. Naaratej, majaari na muetunu quirii. ⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuaaj socua cien jajau tanajajiniji.

⁹ Jesuuri nojori sequeree:

—Cante numaaracani, cuara cua sequesano tojtiaara.

Casaarate miriqui pohuatasanoni
(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquirojosano doce pueyari na nequesotaquiaari, tamasaca pueyano. Cuno pojoricuaajaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojija jiyasohua na miiniu panishano, taa na muerasu na jitianutaniya pueyaracaanu cutarani. Tamasacara saniniuujia, canapuete Pueyaso ruure-tajacani, nojoririaari miriqui pohuataashiyacujua. ¹² Naacuajitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Naajuhuaaj, nojori jaara Pueyaso Rupaa tojitiare, majaari na niishiniu na tojishano.

Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoonajiniji
(Mt 13.18-23; Lc 8.11-15)

¹³ Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasano? ¹⁴ Cua pohuatasano cuhuariquiajinia natoonajiniji, nojuajaari juhua Pueyaso Rupaa pohuata. ¹⁵ Noojiaqueya pueyari juhua nuacuoto teno jajau. Najuhuana Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariutiaquiaa. ¹⁶ Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitaari. ¹⁷ Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuj, cuno pueya jaara saniniuujia shaare taraatia, jaara naquiya miishaarejuhuaj Pueyaso Rupaa tojijia nojori quiniuucua, nojoriiri ritia Pueyasocua tiuuni tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaariuhuj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhuo quiya. ²⁰ Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuj, tarajanuuri jiyanohua queraatia muetujua. Naajuhuj, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-18)

²¹ Jesuuri nojori sequerejuhuaj:

—¿Samaritiuiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiuucua morotashiyari, tiajiniaaco na cuhuatanura maninia. ²² Naajuhuj, jiyasohua nia miishanoori puetunujanaa niishishaanutaniya. Cua pohuatasanoori juhua samaritiu, puetunu pueya jiuujiajanaa na cuhuatanura. Naajuhuj, Pueyaso Rupaa jaara nioojiajinia jamosaare, juhua muetunutanitari puetunu pueya niquishocoriquianojuanaa. ²³ Niajaniya, canapuate numaa jiitiaani, nia tojitiare cua pohuatasano.

²⁴ Jesuuri naa nojori sequequiaarijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyajuhuj. Naacuajitij, niaa jaara capora ririquia tamascata, Pueyasoori socua capora quiniutianiya niaarajuhuj. ²⁵ Cante na rupaa tojijiani, socua na niishitiojonutanitari. Saniniuujia, canapuate na rupaa tojitiaquiyani, secaja na niishishanoori puetunu jaariutiasaanutanijajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jiitasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuj. Tamonu juuca, na camaru tacatesacariuhua na natasano na niquiniuria, tariucua puereetuucari quiquiaari. Majaari na camaru niishiniu quiquiaari taa na moritiareeni. ²⁸ Jiyari tamajaaja moritianiata natau. Coteenu moritiaari na jiyona. Na nuhuaji, na jajau coori supueya.

Na nuhuaji, na jajauri querasapijiaacara quimíaa na noshiniuria. ²⁹ Na natau jaara noshimíaa, na senoonaaari na senoojua na racatasocoriquiano. Pueyaso muerasuuri naa miishaanutaniyajuahuaj.

Miriqui pohuatasano mostaza jajaujiniji

(Mt 13.31-32; Lc 13.18-19)

³⁰ Jesuuri socua sequequiaari:

—¿Juhua casaa niqishanote Pueyaso cumaacani? ¿Casaatate pa naata na sanini-
ujuniuni, taa Pueyaso Rupaa poonijiya pueya jiuujiajiniani? Quiarijia nia pohuata-
reeraj. ³¹ Pueyaso Rupaari pueya jiuujiajinia quiya juhua mostaza jajau. Mostaza jajauri
jiyanohua socua shiitaniyojua puetunu tamasaaca jajaujinijianaa, majaari puera maatia
na niqishaanu. Pueyaso Rupaari naajuhua pueya jiuujiajinia, nocua nojori tiuushacari.
³² Mostaza jajau jaara natasaaare, maashiyari socua puereetucara tamasaaca nataujiniji. Na
cashacucuaari maashiya puereetucucua. Shuhuari na cashacucua cariquiaco nujuatu-
jua shinishiqui.

Pueyaso Rupaari pueyano jiuujiajinia naa cumaacaracajuhua, na jataniniuria na tojjia,
maninia mijia na quiniuria.

Jesu niishitiojosacari pueya saa na miriqui pohuatasannotaja

(Mt 13.34-35)

³³ Jesuuri naa queraatia miriqui pohuatasanota niishitiojoquiaari Pueyaso rupaa saaja
pueya niishishano casaata. Majaari socua jiyajeneta casaa na pohuatanu quiquiaari.
³⁴ Naacuajitij, nojuaja jaara casaa niishitiojonu paniquiaari pueya niqiuara, nojuajaari
puetunujuaanaa naa niishitiojoquiaari miriqui na pohuatasanota. Tamajaaja nojori
quishacari saniniuuja, Jesuuri na saquiriojosano pueya niishitiojoquiaari maatia, casaa
miriqui na pohuatasano sequenu paniriquiaani.

Jesu pueyajetesacari paratu, mohuaca cajiniucuanunio

(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Camínia taquijiria pa quiaare.

³⁶ Cuniqijia pueya tiujiatiuyareeri, nojori quianura camínia taquijiria. Na pueyari
Jesuta quiojiyaree cuno botejiniaja, tee nojuaja quiriqiaacuajani. Jesu quiasacari
camínia taquijiria, tamasaaca boteeri nata jaatequetariquiaajuhua. ³⁷ Maja puera na
quenaacoyaquishacarijia, maruuri paratuta canashiyajiqi jiyanoahua niqiaari nojoriicua
nojori niuutiasacari. Paratuuri jiyanoahua cajiniucuatequiaari mohuaca nojori botejini-
acumara. Nocuaji na boteeri tari quera tiuquitiariquiaa mohuacata. ³⁸ Jesuuri jiyacari bote
pajamaji maqueriquiaa juhuajaniya. Na nacaacuaji mataja caco maqueriquiaari. Na pueya
niucujatusacari nojuaja, Jesu sequetureeri:

—¡Niishitiojonanaa!, ¿majateeri quia puerenujua paa tari tiuquitiaareeni?

³⁹ Jesuuri sanemaa. Paratu sequereeri, camínianio:

—¡Quia suraajere! ¡Tariucujaja!

Paratuuri tajimiohua. Camíniaari pootia maquee. ⁴⁰ Jesuuri na saquiriojosano pueya
sequere:

—¿Casaara nia puereya puerani? ¿Niaateeri Pueyasocua tiuyashijica quiyajaaruahuaj?

⁴¹ Nojoriiri jiyanoahua shiriquitiurii. Tama nojorijiaarijia sequetooquiaari:

—¿Cantejaaranonjoni? ¡Paratu, camíniaari na tojjirii!

5

Gerasa jiyajinijinio samaruharaca pueyanojiniji pohuatasano

(Mt 8.28-34; Lc 8.26-39)

¹ Na nuhuaji, nojoriiri camínia taquijiria tiuquijioquiaari, Gerasa jiyajinia. ² Jesu
tacasacari botejiniji, nocua niqiaariiri tamonu pueyano raacajiniji, macunucua nucuhua
paaquiosajiqi. Cuno pueyanoori samaruraca quiquiaari. ³ Raacajinia quijia quiquiaariiri.
Majaari na naata moronu quishaaquiaari quenaaja cumayocua shipinishano casaata.

⁴Pueyari juucua na morojoua, na cashacucua, na juaashiquiacanio. Saaja na turojotajaari. Majaari quenaaja na nujuataja pueyano quiniu quijia. ⁵Pueyaracaanu tuhuananuhucua rucuanajoquiaari, raacajinianio. Na rucuanajosacari sariyacojojuuari, juuca, niucuanio. Tama na cuaqueyajaaja piquijia saitiaari. ⁶Nojuaja jaara Jesu niquiquiaari tucuaaanuji, nocua netequiaariiri. Jesu cariquimijaji mojoquetaseeri. ⁷Jesuucuaa nacareeri:

—¿Casaacua miji quia niyani, Jesunaa, jiyocuaaanu Quijia Pueyaso Niyanunaa? ¡Quia secojijanijia maja naquiya quia miiniuria janiya!

⁸Samaruhuaraca pueyanoori naa sequeree Jesutej, tari Jesu sequenuucua samaru nojuajinjiji na tohuatanura.

⁹Jesuuri na nequesotaree:

—¿Taa sesanaacatequia?

Na riucuaareeri:

—Canaa jiyanoehua queraatiani, cunora cua sesa “Queraatia”.

¹⁰Cuno samaruuri jiyanoehua Jesu secojoriquiaa maja nojori na taanuunura cuno jiyajinjiji. ¹¹Cushiyari jiyacari cateca naataja miaquenuuriquiaa tuhuananucari. Jiyanoehua queraatia cushiyari quiriquiaa. ¹²Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

¹³Jesuuri samaruhua jiyaroree. Samaruhuari pueyanojinjiji tohuareetaquee. Cushiyacua tiuquitiasaeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacobinjiji totesee caminajiniaari. Puetunujuanaari tii shushiniuquiaari.

¹⁴Cushiya cojuanaari jiyacari netecuaturuhua na shiriqiniutia. Na tiacajinia pueya poojotanuuhua nojori niquishanoori, cuhuariquiacajinia quiniaa pueyano. Nocuaji pueyari nijioquiaari nojori niquiniuria casaate quiquiaarini. ¹⁵Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶Jesu miishano niquitiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinjini. ¹⁷Cunora, cuno pueyari Jesu secooteree na quianuhuaa cuniquiji, nojori jiyajinjiji.

¹⁸Jesu jaara tacaquiaariuhua na botejina, cuno tarijia samaruhuaraca quijia pueyanoori nata quianu paniquiaari juucua. ¹⁹Majaari Jesu paniniu quiquiaari. Na sequeree saajaari:

—Quia quiaarohua quia tajinia quia pueyacua. Quia pohuatasuhua nojori taa Pueyaso miirii quiajanijiani, quiocua na taraajenuucua.

²⁰Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajaanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

Jairo niyatujinjiji pohuatasano, Jesu toque quiana maajijinjijiuhuaq

(Mt 9.18-26; Lc 8.40-56)

²¹Jesu jaara niuutiaquiaariuhua botejina caminia taquijiriohua, queraatia pueyari nocua tiuquijioquiaari na quishaqui. ²²Jesu quishacarijia caminia casaqueyaji, nocua tiuquijiaariiri tamonu pueyano, Pueyaso secojojuua tia jiyaniijia. Na sesa quiquiaari Jairo. Jaara Jesu niquiquiaari, na cariquimijaji mojoquetaseeri. ²³Naa Jesu secojoree jiyanohuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhuaa!

²⁴Jesuuri jiyacari nata quiaaree, na saquiriojosano pueyano. Puera jiyanoehua queraatia pueyari na nuhuajiriquiaa. Jesu tanuujuturiquiaari. ²⁵Cuno pueya tajinia quiriquiaa-jariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. ²⁶Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaa na cumaneeca puecaquiaariiri na naarajosaanura juucua. ²⁷Cuno maaji jaara Jesujinjiji tojiquiaari, na nijinjiji na nuhuajiquiaari jiyasohuari. Na tucuaque toque quiaase pueya tajiniaari. ²⁸Cuno maajiri tama sequequiaarijiaaja: “Janiya jaara quenaaja na toque quiaareni, janiyari naatanutaniuhuanu”. ²⁹Naacuajitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaaja: “¡Cua cusonu tari tajiyatemaal!” ³⁰Jesuuri jiyacari niishiquiiri nojuaja

na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquirojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhuana neque-sotaariquiohua saajuhuaaj: “¿Cante cua quiareeni?”

³² Jesuuri saaja na shocuaqueya niquinijioriquiaa, na niquiniuria cante na toque quia-reeni. ³³ Maajiiri jiyacari tetecariquiaa na puerenuta. Jesu cariquimijaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanjuanaari. ³⁴ Na nuhuaji, Jesuuri na sequeree:

—Sanauna, cucua quia tiuuniuucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucua tari tajiyatemohua quiocuaji.

³⁵ Jesuuri cuno maajicua pocuariquiaajaa pueya tiuquijiosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajiniaari.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸ Nojori jaara tiuquijioquiaari Jairo tiajinia, pueya niqishii nujuquetiuyanoori, sariyocuatuyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu sarojojotquiaari nojuaja na rerequetenuta, naa nojori na sequenuucatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quitiuriquiaani. ⁴¹ Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriunia, quia sequeyanijia, quia sanere!”

⁴² Jiyacaritij, maaji samiriuri ritia sanequee. Juhucatecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niqishacari naa Jesu miishanotej, nojoriiri jiyanhua jiuujiatequiaari. ⁴³ Jesuuri jiyanhua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuara mianuutesaaria.

6

Jesu quishacari Nazaret tiacajinia

(Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuajaaja. Na saquirojosano pueyari nata quiojoquiaarijuhuaj. ² Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tiajinia. Queraatia pueyari na tojtitariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani? ³ Nojuacuajaari suruhuatujiniji casaa shipinijiona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocua: Santiago, José, Judas, Simómmio. Na rimiatuhuari niya quiyajuhua pa tiacajiniani.

Cunora, majaari nojori tojtianu paniniu quiquiaari Jesu. ⁴ Naaratej, Jesuuri nojori sequeree:

—Pueyari tiqiyocua Pueyaso sequenu panishano caminiujunia tojinu paniquiaa cutara. Saaja tama na tiacajinijinio pueya cutaraari maja na tojtianu paniniu, na jiyasojinijinio supueno pueyajuhua, tama na tiajinia quiniaajaajanio.

⁵ Naacuajitij, nocua nojori tiyuacquiniuucua, majaari na naata na cumaacata na miiniu quiquiaari. Saaja secaja cusosuhuacua niojoquiaari na juashiquiaari, nojori na naatani-jionura. ⁶ Jesuuri jiuujiatequiaari nojori tiyuacquishacari nocua. Na nuhuaji, Jesuuri rucujanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura
(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacaari samaruhua nojori tohuatani-jionura pueyajiniji. ⁸ Nojori sequeereeri maja nojori panura nojori panishano, saaja nojori miojotu cutara. Nojori sequeereejaariuhua, maja nojori panura caashoque, coseyaca, cumaneecanio. ⁹ Nojori sequeereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰ Nojori sequeereejaariuhua:

—Niaa jaara tiuquishiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuquinitianu paniyaquiri na tiajinia, nia pohuatasano nojori tojinu paniyaquishacarijuhuaj, niocua cuniquiji quiaare. Niocua nia nioluacaacajaji jiya joocua piitiare nojori niqiuara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

¹² Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuuquiaari pueya tacatonuhua nojori jiuujia Pueyasoocua. ¹³ Nojoriiri queraatia samaruhua tohuatanijoquiaari. Naajuhua, nojoriiri cusosuhuacua tarooquiaari naana jajau shiyocua, nojori naatanijiosacari queraatia pueya.

Tiuquinijiona Juan mosacari
(Mt 14.1-12; Lc 9.7-9)

¹⁴ Jesu miishanojinijiri caminiujushaaquiaari puetunu cuno jiyajinijanaa. Naacuajitij, Galilea jiya jiyaniijia Herodesri Jesujiniji pohuatasaaquiaarijuhuaj. Herodesri cunora sequequiaari:

—¡Tiuquinijiona Juanqui samiitarihuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanoehua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniuuja, nojori jiyajenesacarijuhuaj. Naa sequetuquiaariiri:

—¡Nojuacuajaari tariucuaaanu pueyara Pueyaso sequesano caminiujunia Elías!

Tamasaca pueyari saniniuuja naa sequequiaari, nojori jiyajenesacarijuhuaj:

—Nojuacuajaari quiarjia nio pa quishacari Pueyaso sequesano caminiujunia pajaniyara, juhua tariucuaaanu pueyara Pueyaso sequesano caminiujuniaajuhua.

¹⁶ Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitarihuacuaaquiiri.

¹⁷ Tiuquinijiona Juan moyaquishacarijia, nojuajaari Herodías rupaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niqiuocua quiquiaari coteenu. Herodesri tarajanu Felipe niqiuocua jaariutiaquiaari necocuara.

¹⁸ Nocujaji, Tiuquinijiona Juanri Herodes nacasujujua. Naa na sequejaari:

—¡Pueyasora, majaari maninia quia jiitianura quia tarajanu niqiuocua!

¹⁹ Cunora, cuno maaji Herodásri maja na niqiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojjijia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan

pohuatasano tojiniu maniniucua. Nojuajaari saaja noojia niquijjoteja quiquiaari. Majaari na niishiniu quijia taa na miiniutianiyani. ²¹ Saniniuujia, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajiniijinio jiyaniijianucua masuuquiaari, tama na soldadohua jiyaniijianucuaajaanio. ²² Jiyacaritij, Herodías niyatuuuri tiuquiquiaari queranacusaquí, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyano. Nata miaquenaa pueyari jiyano. Nata shuquiritiaquiaarijuhuj. Naaratej, jiyaniijia Herodesri niyacoo sequere:

—Cua masere quia panishano. Janiyacua quia niqutioreni.

²³ Herodesri socua puetunu pueya niquiarajanaa na sequerohuacuhuj:

—¡Seetanujanaa quia sequenianijia, maja cua sapojonu! Janiyari quia niqutionutaniya quia masenanoni. Quiaa jaara cua masere cua jiitiasano cajiniocua, naajaa, janiyari quia niqutionutaniyani.

²⁴ Niyacoori tohuataquee na nucua Herodías na nequesotanura. Na sequeeseeri:

—Cua nucuaanaa, ¿casaa cua masenutaniya cua quenuni?

Na nucuaari na sequere:

—¡Quia masere Tiuquinijiona Juan naca!

²⁵ Cuno niyacoori ritia tiuquiquihua jiyaniijia Herodes quishaquí. Na sequereeri:

—¡Quiarjia cua niqutiore Tiuquinijiona Juan naca miacojuajinia!

²⁶ Naa jiyaniijia Herodes tojishacaritij, jiyano. Taaajaqueeri. Naajaa, seetanujanaa na sequenuucua na masuusano pueya niquiara, majaari tari na naata ruuretano quiquiaari cuno niyacoo masenano. ²⁷ Naaratej, jiyaniijiaari ritia jiyaree na soldado, Juan naca na niqutionura cuno niyacoo. ²⁸ Soldadoori quiaaree nujatejojuajinia. Juan nacataseeri. Na naca patamohua miacojuajiniaari. Soldadoori niyacoo na niqutiosuhua. Nojuajaari na nucua na niqutioree saniniuujia.

²⁹ Tiuquinijiona Juan pueya jaara na niishiquiaari, na maanu patuquiaariiri, na jamotu-socoriquiano.

Jesu mianuutesacari cinco mil pueya

(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquijjioquiaariuhua Jesuucua nojori rucuanenonuhua. Pueyari rupaa nojori pohuatanura. Nojoriiri Jesu pohuataquiaari puetunu nojori miitushanojuanaa, nojori niishitiojosanojinijinio. ³¹ Na nuhuaji, Jesuuri nojori sequere:

—Miji, pueya quiaquishaquí pa quiaare tamaquí, tii pa samaatenura rupaquijia quenaaja.

Jiyano. Queraatia pueyari pueyaracaanu nojoriicua nijioriquiaa. Tamasacaari quiojoriquiohuacuaa. Tamasacaari saniniuujia shusha tiuquijjioriquiaacujua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiyaramiquishano pueyata quiaquiaari botejinia, pueya quiaquishaquí. ³³ Queraatia pueyari saaja nojori niqutiuri quiaano. Cuno pojoriiri Jesu niishitiquiaari. Naaratej, puetunu caminia shuriuquioico tiacajiniijianaa pueyari netecuatuquiaari. Nojoriiri Jesuucuaaji cutese. ³⁴ Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taaajaquiaariiri. Nojoriiri juhua cojuanaaju borregohua quiriqiaa. Naaratej, Jesuuri nojori niishitiojonu coteeree queraatia casaa Pueyajojiniji. ³⁵ Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiaquí quiyani. ³⁶ Pueya quia sequere, nojori cuaara quiojoora cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucaaree saaja:

—Niaa mariquí nojori miaquetereja saniya.

Nojoriiri na sequere:

—¿Quiaateeri paniya queraatia pan masenuucua canaa quianura puetunu cuno pojoriirajanaa? ¡Pa mianuutenura nojori, panishiyari dosciento cumaneeca! Majaari pa jiitiano.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiQUIAARI taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiyasocuaJinia, na mianuutesocoriQUIANO. ⁴⁰ Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuaaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriQUIANO pueya. Cuno caapiqui sapitiaaja shiquioreereejaariuhua puetunu pueyarajanaa. ⁴² Puetunu pueyajanaari maninia miaquenuuQUIAARI. Maninia tooquioreejaariuhuj. ⁴³ Na nuhuaji, doce canaasatuuri mishinijiosaaQUIAARI pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuuna QUIAARI.

Mohuaca caco Jesu rucuanenujiniji pohuatasano

(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaQUIAARI boteJinia, nojori puetanura nojuaja caminia taquijiria Betsaida tiacajiniara. JiyacariTij, Jesuuri pueya sequeriquiaa nojori quiojonuhua na tiacajiniOHUA. ⁴⁶ Pueya jaara tari quiojoQUIAARIUHUA, Jesuuri tuhananuucua tacaQUIAARI tii na secojonura na Que Pueyaso. ⁴⁷ Jaara niniQUIAARI, boteeri tari caminia jiuujiaJinia jaaretariquiaa. Jesuuri juhuanujuaja na jateesaqui quiriQUIAAJAA. ⁴⁸ Jesuuri nojori niQUIAARI najuhua juaarioconuyano. Majaari nojori naata jaaretanu quiriQUIAA, puera paratu piyarojosacari nojoriicuara. Quera juhuaquenu panishacari, Jesuuri nojori rupesee. Mohuaca caco canujiquiaari. Quera nojori tajiriquiaari. ⁴⁹ Nojori jaara na niqitiquiaari mohuaca caco canujiyano, nojoriiri na jiyanitiuQUIAARI samaru. Nocuaji sariyocuatereeri. ⁵⁰ Puetunu nojorijianaari na niqitiiurii. Shiriquitiuriri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaqiri! ¡Maja pueretunu! Janiyacuajanijia.

⁵¹ BoteJinia tacasee nojoriicuara. Paratuuri jiyacari netecuatuQUIAARI, Jesujiniji nojori pohuatiariquiaa tacuriitia, jiyanoHUA na jiuujiatenuta. ⁵² Nojoriiri juhuanujuaja maja na niishini quiquiaari Jesu miishano, queraatiara na jiyatesacari pan, pueya miaquesocoriQUIANO. Nojori jiuujiaacari juhua ninishiqui quiquiaarijia.

Jesu naatanijosacari cusosuhua Genesaret jiyajinia

(Mt 14.34-36)

⁵³ Jesuuri na pueyata caminia niuutiaQUIAARI. Tiuquijioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohareetaQUIAARI boteJiniji, cuniquijinio pueyari ritia Jesu niishiQUIAARI. ⁵⁵ Pueyari jiyacari netecuatuQUIAARI, Jesujiniji nojori pohuatanura puetunu cuno jiyajiniaJanaa. Cusosuhuari juhuacatecara patootasaaQUIAARI na matucuaJinia tee Jesu quiriQUIAA na rucuanijosacari nojori jiyajiniacuajani. ⁵⁶ Tiquiyocua Jesu rucuanijosacari, cusosuhuari nocuaji niojotasaaQUIAARI nucuaco, tuhuaqui tiacajinia, queraatia shiitianiyojua tiacajiniajuhuaj, cuhuariquiacajinianio. Pueyari Jesu secojoree cusosuhua na quietanura quenaaja na toque casaca. Canapue te na toque quiaQUIAARINI, puetunu nojorijianaari na cusonujiniji naatacoQUIAARIUHUA.

7

Casaate sesoriquiara pa jiyateja Pueyasorani

(Mt 15.1-20)

¹ Jesuucua catecanoQUIAARIIRI Fariseocuaca, Moisés RootasanoJiniji niishitiojonaanio, canapue te Jerusalén tiacajiniji nijioQUIAARICUAJANI. ² Cuno pojori quishacari tii, nojoriiri noojiaqueya Jesu pueyajinijinio niQUIAARI shuquitiojua miaqueyano. Nojoriiri jiyanjia, nojori rucuanijosacari sesa miijiaa pueya tajinia, sesa nojori quiniu na naata nojoriicu pacunu. Nojoriiri cunora shuquitianu jiitiquiaari, nojori jiyanishacari nojori

jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. ³Cuno Fariseocuaca, puetunu narta Judiocuacajanaanio, nojoriiri maja na cartenu quijia tariucuacaanu nojori supuetanaa niishitiojosano. Naaratej, majaari nojori miaquenu quijia shuquitioo. ⁴Naacuajitij, nojori jaara miaquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jiyaniquiaa, sesa nojori quiyaguiniuucujaji Pueyaso niquiara, nojori cuaara na ratujua jeequejooora, pataco, coshi, na maquetucuanio. ⁵Naaratej, Fariseocuaca, Moisés Rootasanojiniji niishitiojanaanio, nojoriiri Jesu nequesotaquiaari:

—¿Casaara quia pueya tojtiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶Jesuuri cuno pojori riucaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa mijiaa! Pueyaso sequesano caminiujumia Isafasri maninia sequequiaari niajanijajini-jicujaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuaaanu quiya janiyajiniji. ⁷Nojori miishano quiriani, cunoori najuhuanaj. Naa nojori miishanoni, majaari na shuquiritini janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

⁸Niaari cua pueya pocuariquiaa. ¿Niajanijariuhuj? ¿Casaara Pueyaso sequesano nia tojtiaquiquiaanijia? Niaacuajaari Pueyaso sequesano tojtiaquiya, tama nia supuetanaa niishishanojuaaja nia miiniuria najuhuanaj.

⁹Jesuuri socua naa sequequiaari cuno pojoritij:

—Tama nia miiniu jiiitishanoocua nia miiniurijajaaja, ¡niaari Pueyaso sequesano shocortaa saaja! ¹⁰Moiséscuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuaara mosaaria”. ¹¹Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu niajaninya cua casamitia. Janiya tari Pueyasora jiyateree puetunu cua jiiitiasanojuanaani”. ¹²Niaari sequequiaajuhuj, pueyano jaara naa sequerefej, maniniacuaja maja na naacutanura na que, na nucuanio. ¹³Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miquiaa juhua cunojuhuj.

¹⁴Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojtitiare puetunu niajanijajanaa, maninia nia niishiniuria. ¹⁵Casaa pa miaqueyani, Pueyasora naajaa. Cunoori maja na naata pueyano jiyatenu sesa mijijara. Poojiajinia pa niishiriojosano cutaraari sesara pa jiyateya Pueyasora. ¹⁶Cante numaacani, nojuaja cuaara tojtiaara cua sequesano.

¹⁷Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸Jesuuri nojori sequere:

—¿Niaateeri cua sequesano niishiyaquiyajuhuj? ¿Majateeri nia niishiniu? Puetunu pa jiniacuma tiuquijijanaani, cunoori maja na jiyatenu sesa mijijara pajaniya. ¹⁹Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyari pa marecuhuacuma.

Nio sequesana, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curutuucara Pueyasora. ²⁰Jesuuri sequereejuhuj:

—Pueyano niishiriojosano sesa noojiajiniani, cuno cutaraari sesara na jiyatequiaa.

²¹Pueyano jiuujiajiniji supueya cutaraari sesa niishiriojosano, sesa na miiniuria. Naacuajitij, pueyanoori na camishoo maajipohua numuetucujua, seya numuetucujuhuj. Tamonu pueyano casami nohuasejoquiaari. Pueya moquiaajaariuhuj. ²²Narta pueyano niquiocua numuetucujua. Tamonu pueyano casamiicua jiaatiaquiaari. Jiyanohua

sesa miiquiaari. Cuaracashijionu niishiyari. Tama na cuaqueyajaaja shuquiritiqiaari na miiniu jiitishanota. Narta pueyano miananajoquiaari. Tamonuucuaa tonujuquiaari. Naajuhuj, saaja tama na cuaqueyajaaja shuquiritiaja quiquiaari. Juhujaniya sesa miiquiaajaariuhuj, moseeca na quiniuucua. ²³Puetunu nio sesa miishanojuanaari pueya jiuujajiniiji supuequiaa. Cuno cutaraari sesa quijiara pueya jiyateja Pueyaso niqiaara.

Taatu tiuushacari Jesuucua
(Mt 15.21-28)

²⁴Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajini-aari. Majaari na paniniu quiquiaari pueya niishiniuria nojuajiniiji, tee na quiyani. Naajaa, majaari na naata jamaaniu quiriquiaa. ²⁵Tamonu maajiiri ritia Jesujiniiji niishiquiaari. Neyatuuri samaruraca quiriquiaa. Naaratej, maajiiri Jesuucua niqiaari. Na cariquimiiaji mojuquetaseeri. ²⁶Cuno maajiiri Sirofenicia jiyajiniinio taatu quija. Jesu secoseeri samaru na tohuataniniuria neyatujiniiji. ²⁷Jesuuri maaji sequereee miriqui:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸Maajiiri Jesu riucaaree:

—Jaa, Jiyaniijianaa. Naajaa, sareyacuaajaari miaqueja cariquiacoji tatucuaaja, muerasu totinijosano miaquesano shiriya.

²⁹Jesuuri na sequereee:

—¡Quiaacuaaja maninia cua riucaaree! Quia tacateyarohua. Samarucuaajaari tari tohuataree quia niyatujiniiji.

³⁰Maaji tiuquishacariuhua na tiajiniohua, neyatu riuratasuhuari na maquetujinia mataano. Samaruuri tari tohuatano quiriquiaa nocuaji.

Jesu jeeacasari numueeju, tiqia pueyano

³¹Jesuuri tacatequiaariuhua Tiro tiaca shocua jiyajiniiji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³²Tii na quishacari, nocua jaatucusaquiaariiri numueeju, tiqia pueyano. Na jaatucunaari Jesu secotujuquiaari na juaashiquia na nianura nocua, na jeeanura cuno pueyano.

³³Jesuuri pueyano numueeju jaatucuree tamocora pueyacuaaji. Na numaama shirii na juaashiquiaari. Na nuhuaji, tama na juaashiquiajiniajaaja riocoreeri. Na riacau cojuata pocuaashijia niti quiareeri. ³⁴Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riaterel!”

³⁵Jiyacaritij, numueeju numaari riatequequee. Na nitiiri jeequequeejuhuaj. Ritia pocuaquee maniniaari. ³⁶Jesuuri cuno pojori rootaree maja nojori pohuatanura na jeeasano pueyanojiniiji tamasa niqiaara. Nojoriiri saaja tiqiyocua pohuatanuquiaari. Naa Jesu rootasacari na naatanijosano pueyatej, maja nojori pohuatanura na miishano-jiniiji, nojoriiri saaja socua jiyacatequiaari pohuatanura. ³⁷Pueyari jiyanohua jiuujiate-quiaari Jesu miishano na niqitiushacari. Tama nojorijiaarjia sequetoquiaari:

—¡Puetunujuanaa miya maniniaari! Numueejunucua jiyateya tojitajacaraari. Tiquianucua pohuateyajaariuhuj.

8

Jesu mianuutesacari cuatro mil pueya
(Mt 15.32-39)

¹Jiyacaritij, jiyanohua queraatia pueyari rerejoquiaari Jesu na tojitianura. Majaari nojori jiitianu quiquiaari casaa quenaaja na miaquetusocoriquiano. Jesuuri na saquiri-ojosano pueya piirii. Nojori sequereeri:

²—Nio pueyacu taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³Janiya jaara nojori jiyaramiquiriohua na tiajinia miaqueyojuani, nucuaco cusojoniuarohuacua. Noojiaqueya nojorijiniiniioori niyara nijiorucuaa tucuaaanuji.

⁴ Na saquirojosano pueyari na riucaaree:

—¿Paatucua taa miaquetere nojori niyani, pueya quiyaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequereee:

—Nareja siete.

⁶ Jesuuri na pueya sequereee, nojori cuaara sequeera puetunu pueyajanaa nojori caji-tiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquirojosano pueyara na neecasereeri. Nojoriiri saniniuujia pueya na serotaree puetunujuanaa. ⁷ Secaja sapitiaaja jiitaturiquiaajaariuhuj. Jesuuri socua nocuara secorohuacuuhuj. Na nuhuaji, na pueya sequereeri nojori niqutiojonura pueya. ⁸ Puetunu pueyajanaari maninia miaquenuuree. Tooquioreejaariuhuj. Miaquesano cureenota mishinjiosaaquiariiri siete canaasatu. ⁹ Na miaquena pueyari quiquiaari cuatro mil pueya. Na nuhuaji, Jesuuri nojori sequereee nojori quiojonuhuara. ¹⁰ Na nuhuaji, Jesuuri botejinia tacataquiaari na saquirojosano pueyata. Quiaareeri Dalmanuta jiyajiniara.

Fariseocuaca niqiniu panishacari Jesu miishano Pueyaso cumaacata

(Mt 16.1-4; Lc 12.54-56)

¹¹ Fariseocuacaari Jesuucua tiuquijioseee. Nata juayonuutaseeri. Nojori saniniuujiniuria Jesu, nojoriiri na sequereee juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. ¹² Jesuuri nojora niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu qiniutianiya nijaniya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacatarohuari. Caminia taquijiria niutiaareeri.

Jesu numootesacari na pueya Fariseocuaca niishitijosanoocuaji

(Mt 16.5-12)

¹⁴ Jesu pueyari na coseyaca niyajetatuquiaari. Nareja niqiriyatujua panniyojua jiitia-turiquiaa botejiniaari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreeta-jaacuaji, Herodee pan poreetajaacuajjiuhuj.

¹⁶ Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa sasocoriquiano.

¹⁷ Jesuuri na saquirojosano pueya niishirijosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanajuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? ¹⁸ ¿Majateeri cua miishano nia niqiniu quiquiaacuaja nia namijiata? ¿Majateeri nia tojiniu quiquiaa nia numaatajuhuaj? ¿Niaateeri ritia niyajetarucuaa cua miishano? ¹⁹ Janiya jaara cinco pan neecascanu cinco mil pueyatej, ¿taa canaasatu nia mishinijiocanu miaquesano cureenotani?

Nojoriiri na riucaaree:

—Doce.

²⁰ —Naajuhuj, janiya jaara siete pan neecasercuaa cuatro mil pueyatej, ¿taa canaasatu nia mishinijiorucuaani?

Nojoriiri na riucaaree:

—Siete.

²¹ Naaratej, Jesuuri nojori sequereee:

—¿Majateeri juhuanajuaja nia niishiniu naa cua miishanojinijitij?

Jiyacariti nojoriiri Jesu sequesano niishiquii.

Jesu jeecasacari cariojuaru pueyano, Betsaida tiacajinia

²²Na nuhuaji, Jesuuri Betsaida tiacajinia tiuquijioquiaari na pueyata. Tii na quishacari, Jesuucua jaatucusaquiaariiri cariyujuaru pueyano. Pueyari Jesu secujojuquiaari cuno cariyujuaru namijia na quianura quenaaja. ²³Jesuuri cariyujuaru quiaree na juaashiquia-jiniji. Tiaca jijaquiria na jaatucuyareeri. Cariyujuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niqiniu shiitianiyojua quenaaja?

²⁴Cariyujuaruuri niqiniu sanirii. Jesu sequereeri:

—¡Jaal! ¡Pueya niqiyanjia, juhua nacuhua rucoyano!

²⁵Jesuuri socua pacuterohua na juaashiquia nianu cariyujuaru namijiaacua. Cariy-
ojuaruuri niqiniu saniriohuacuhaj. Jiyacaritij, tojetaarucujanaa maninia niqijijara
quiquiri. ²⁶Jesuuri na tiajinia na jiyarorohua. Cariyujuaru rootaree naari:

—Majaari tiacajinia quia quianuhua pueya quia pohuatanura cua miishanoiniji quia-
janiya.

Pedro sequesacari, Jesu seetanujanaa Pueyaso Jiyarosano

(Mt 16.13-20; Lc 9.18-21)

²⁷Na nuhuaji, Jesuuri quiojoquiaari na saquiriojosano pueyata tucuaqui tiacajiniara
Cesareya Filipo tiaca shocuaqueya. Na quiasacari nuacuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari
saniniuujia quia sequequiaacujua quiaanaari supetana Elías. Naajuhuj, tamasaacari
quia sequequiaa, quiaa naasucuaanaari tariucuaaanu pueyara Pueyaso sequesano camini-
ujiunia, samiitianohuatuahuaj.

²⁹Na nuhuaji, Jesuuri nojori nequesotaree:

—¿Niajaniyaritajata, taa nia sequeyani, cante janiyani?

Pedroori na sequereeri:

—Quiajaniyacuaja Cristo, Pueyaso Jiyarosano.

³⁰Jesuuri nojori rootaree maja nojori pohuatanura tamasa niquiara nojuajiniji Pedro
niishishano.

Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

³¹Jiyacaritij, Jesuuri na pueya niishitiojonu coteequiaari tama nojuajinijiaaja, taa
Pueyaso Nianu miishaanutaniya jyanohua naquiya taraatiani. Naa na pueya sequereeri:

—Parta Israel pueya jiyanijianucuaari cua tojitiaaquiniutianiya, pueyacuara Pueyaso
secojonaa jiyanijianucujuhuj. Naajuhuj, Moisés Rootasanojiniji niishitiojonaari cua
rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca
juacajinia samiitianutaniuhani.

³²Jesuuri naa seetanujanaa nojori sequequiaari. Na pohuatasanoori maja miriqui na
quiniu quiquiaari. Jesu jaara naa sequequiaari, Pedroori tamocora na jaatucuree. Cuniqui
na nacasureeri maja naa na pocuanuratej. ³³Jesuuri na nijiniara tacatequee saaja. Na
saquiriojosano pueya na niqiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji.

Majaari quia niishiriojonu juhua Pueyaso panishano. Quiaari saaja juhua nio jiyajinijinio
pueya niishiriojia.

³⁴Naa na sequenu nuhuajitij, Jesuuri na saquiriojosano pueya piirii, puetunu cuniqui
quiniaa pueyajanaanio. Nojori sequereeri:

—Pueyano jaara cua tojijiaa quiniu paniri, nojuaja cuaara niiria cucua, seetanu-
juanaa nojiata na panishacari janiya. Nojuaja cuaara niyajetaara tama na cuaqueya
na cojuanurajaaja. Cuaara cucuara panitiaara tama na cuaqueyajaaja. ³⁵Saniniuujia,
cante tama na cuaqueyajaaja shuquiritiniu panijiani, na nuhuaji, nojuajaari jyanohua
taraatia quiniutianiya pueyaracaanu. Saniniuujia, cante tama na cuaqueya panitiaa cua
panishano na miiniuriani, na pohuatanura janiyajinijihuhuj, cuno pueyano cutaraari
pueyaracaanu quiniutianiya shuquiriaatia. ³⁶¿Niaarate maninia, pueyano jaara puetunu

nio jiya casamijianaa jiitiare, na nuhuaji na sohanu jaara jatasaa mani quiquiojinia pueyaracaanura? ³⁷ ¿Pueyanote na naata Pueyaso niqutionu queraatia na casamijiniinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririquiya sesa miijiaca pueya niquiara nio jiyajiniani, janiyari nojori caririquiniutianiyajaacuhuj. Naajuhuj, cante caririquiya mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuj. Janiyari jiyacari cua Que cumaacata jiyocuacaanuji tacatenu-taniuhuanu, maninia miijiaca cua Que seyatajuhuaj.

9

¹Jesuuri nojori sequequiaarijiuhuj:

—Seetanujuaanaa nia sequeyanijia pueyanaa. Noojiaqueya niya quiniaajiniinio quiari-jiani, majaari nojori cusonuunu quiniutianiya juhuanojuaja, nojori cuaara niquirijiaatijia Pueyaso cumaaca tiuquiyano cucua, na muerasu jiitiariquianoni.

Jesu jatasacari shacantuucara

(Mt 17.1-13; Lc 9.28-36)

²Seis juuca nuhuaji, Jesuuri jiyaconaja tuhananuucua tacaquiaari. Saaja nata quio-joquiaari Pedro, Santiago, Juannio. Jesu quishacari tuhananujiniji, na cuaqueyari tamaatiuucara jataquiaari nojori niquiara. ³Na toqueeri shacantuquera jataquiaari, socua jiyanohua cohuajara sohanatuujiniji. Nio jiyajinia toqueya jeequejonaari maja na naata jiyanohua cohuajaquera toque na jiyatenu, taa Jesu toque jataquiaaricuaani. ⁴Jiyacaritij, nojoriiri supuetana Elías niqituuquiaari, supuetana Moisésjuhuaj, Jesuta pocoojijano tii. ⁵Jiyacaritij, Pedroori Jesu sequeree:

—Niishitiojonanaa, ¡canaa nimitia niya quiyani! ¡Canaacua niaacuaaji suhuorojoreni: quiara, Moisésra, Elásranio!

⁶Jesu pueyari shiriquitiuriquiaa. Nocuaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani. ⁷Jiyacaritij, jiyocuacaanuji cohuaja najacaari nojoriicua rosequiaari. Cohuajaari nojori mishiquioma. Cohuaja najacajiniji, Pueyasoori tojishaaree pocuaano. Naa sequequiaaritij:

—¡Niocuaja cua Niyaniyojua, cua shuquiritasano! ¡Saaja nojuaja nia tojiri!

⁸Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niqituniu quiquiaari socua. Saaja Jesuuri tamajaaja quiriquiaa.

⁹Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhua tamasa niquiara nojori niquishano. Jesuuri nojori sequequiaari cuaara noojajinia racatatuura, nojuaja jaara samiitiarohujaatijia. ¹⁰Cunora, tama nojorijiaarjia maninia racataquiaari noojajinia nojori niqituiushano. Maja cutaraari nojori niishituniu quiquiaari, casaara naa Jesu sequeree nojorini “cua samiitasacariuhua”. ¹¹Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaararini, Elásna coteenu tiuquiniutianihua Pueyaso Jiyarosocoriquianoocuaaji?

¹²Jesuuri nojori riucuaaree:

—Seetanujuaanaacuaaquiniatejaj, Elásri coteenu tiuquiriquiano quiquiaari, puetunu cucuaaji jeenucuariquianojuanaa. ¿Niaate niishiya casaara tariucuaaanu Pueyaso Rupaa-jinia naa naajiotasaaquiaari janiyajinijini: “Pueyaso Jiyarosanoori naquiya miishaanuta-niyan? Pueyari na soonutanijajuhuj”. ¹³Janiyari seetanujuaanaa nia sequeyani, Eláscuajaari tari niquiaari. Pueyari naquiya na miiquiaari taa nojori paniquiaaricujani. Pueyaso Rupaa-jiniacuaajaari naajiotasaaquiaari nojuajaari naa miishaanutaniyaquij. Seetanujua-naa tari naa miishaaquiariiri.

Jesu tohuatesacari samaru, caya samijajiniji

(Mt 17.14-21; Lc 9.37-43)

¹⁴Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quituiriqiaajaariuhua Moisés

Rootasanojiniji niishitiojona. Nojoriiri Jesu pueyata juayonuutariquiaa. ¹⁵ Pueya jaara Jesu niquitiuiquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuatanura. ¹⁶ Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinijinioori Jesu riuuaree:

—¡Niishitiojonanaa, quiocua nitiaaree quiyanunjia! ¡Samaru jiitiaano! ¡Samaruuri na jiyatequiaari tiquiara! ¹⁸ Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miaquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quyaree. ¡Socua piriuiquiniutianiyari! Janiyacuaajari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹ Jiyacaritij, Jesuuri naa sequeree:

—¡Niaaqui Pueyasocua tiuyashijacaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretanutaniyajaaniuhua? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirri taraatiaari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushaariquiaa. ²¹ Jesuuri caya samijia que nequesotaree:

—¿Taacari na cotecanu naa na quiniuria juhuacatecarani?

Na queeri Jesu riuuaree:

—Na naatujuajiniji naa qijiajuhuanajaj. ²² Na cusojuanura juucua, cuno samaruuri sequeyarucua na pojotequiaa manjinia, moojiniajuhuaj. Naaratej, jaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya nojiata seetanujuanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuniuria quiocua!

²⁵ Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatare nio caya samijiajiniji! ¡Puetunu quia tohuatarejanaa! ¡Majaari socua quia tacatenuhua, nocua quia tiuquiniuhua!

²⁶ Samaruuri sariyocuaquee. Caya samijia taquiriocuaterohuariuhua. Na tohuatesacari caya samijiajiniji, juhua macu na tiujaqueeri. Nocuaji, queraatia na niqitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquiajiniji na quiaree. Na sanareeri. Caya samijiaari juhuajaniya nujuaquiaariuhua.

²⁸ Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riuuaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pohuatanu pacutesacariuhua nojuaja mosaanutaniya
(Mt 17.22-23; Lc 9.43-45)*

³⁰ Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitosaanutaniyani, nojori miiniuria janiya taa nojori paniyacua-jani. Nojoriiri cua monutaniya. Jiuujianaraca juucajinia, janiyari samiitianutaniuhua.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijajanaa cutarani?

(Mt 18.1-5; Lc 9.46-48)

³³Nojoriiri Capernaum tiacajinia tiuquijioosee. Tari nojori quishacari tajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴Nojoriiri saaja sanaajetaquee. Na juayonuutanujiniji niishituriquiaacuajaari. Nucua-maji, nojoriiri riutioconeetariquiaa teyano nojorijinijiniote socua tojishano pueyanoni.

³⁵Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujuanaa.

³⁶Na nuhuaji, Jesuuri mueya nujuatequiaari nojori tajinia. Cuno mueya patee nojori niquiaraari. Na pueya sequereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhuj. Cante cua maseyani, majaari saaja na masenu janiya. Jiyocuaaanu Quijia cua Jiyarona maseyajaariuhuj.

Tamonu pueyano tohuatanijiosacari samaruhua Jesu cumaacata

(Mt 10.42; Lc 9.49-50)

³⁸Tamacari, Juanri Jesu sequereeri:

—¡Niishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijionura pueyajiniji! Nojuajaari maja pajaniyajinijinio. Nocuaji, ¡canaari na tenujureeni maja socua naa na miiniuriatej!

³⁹Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰Nia niishiri, cante maja pa paracani, nojuajaari pa jiyano. ⁴¹Nia rucuanijosacari, cante nia raateya mohuacaniyojua na paniniutia janiyani, cua pueya nia quiniuucujuhuj, Pueyasoori saniniuujia maninia casaa na niqutionutaniya na jiiitiasanojiniji.

Puereeta quiniutianiyari sesa miijiacara

(Mt 18.6-9; Lc 17.1-2)

⁴²Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujajau saajia jaara morotasaare na riquiajiniji, caminia queroni-jinia jartasocoriquiano. ⁴³⁻⁴⁴Nio miriqui cua niishitiojosano nia tojiri: tama nia juashiquia-jaaja jaara nia jiyatere sesa miijiaara, nia juashiquia nia rashiquiare juhuari niaa mariqui mani quiquiojinia jatasaaereeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataasaanura caapiquiquiojuata? Jiyano socua maninia cutaraari niaara, juashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶Naajuhuj, nia nio-huaca jaara nia jiyatere sesa miijiaara, nia rashiquiarenoj maja nia jataasaanura mani quiquiojinia. ¿Niaateeri paniya tii nia jataasaanura caapiquiniocuata, pueyaracaanu tii nia saniitiosaanura? Jiyano socua maniniaari niquiniocuata Pueyasooocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸Naajuhuj, nia namijia jaara sesa miitiriqia niajaniya, nia jaterenoj. Naa nia tarinitiare sesa nia miiniu, maja nia jataasaanura caapiqui namijiaata pueyaracaanu mani noshishaqui. Sesa miijiaacari cuno mani quiquiojinia quejoasaanutaniya, pueyaracaanu nojori saniitiosaanura. Cuno manijinia, majaari porohua cusuunu. Maniiri tii pueyaracaanu noshiya. Majaari na maquesanu. Jiyano socua maniniaari nia tiuquiniuria Pueyasooocua niquiriyatujua namijiaata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarini-tianura jiyano socua miiniu panishano, cuno jaara sesa miijiaara jiyateriquia nojori.

⁴⁹Jesuuri socua niishitiojorohua:

—Puetunu Pueyaso muerasujuanaari saniniujiushaanutaniya juhua manitia, taa shu caquishiyacuaani na moqueyaquiniuucuj. ⁵⁰Naajuhuj, shoniiri jiyano socua maninia, shu moqueyaquiniuucuj. Saniniuujia, shoni jaara shaacara quiri, ¿maatucua taa

tiquiriquirea quiriohua saajaniuhuj? Maja na naata. Naajuhuj, Pueyaso cumaaca nia jiitiare nioojiajinia, niaa mariqui najuhuaa quijia quiriiri juhua Pueyaso niishiyashijia pueya. Naajuhuj, jiyanoojiaca nia quiri, jatiqui nia quiniuria shuquiriaatia.

10

Jesu niishitiojosano maja pueya cartenura necocua

(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquirojosano pueyata. Judea jiyajinia quiojijareeri, Jordán moo taquijirajuhuj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocuaaari Jesuucua nijioquiaari na saniniujiuniuria nojori nequesotanuta, nocuara nojori saquirojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

³ Jesuuri nojori nequesotaree saniniuuja:

—Cua sequeretoj, ¿taa Moisés sequequiaari nijaniyani?

⁴ Cuno pueyari Jesu riucuaaree:

—Moisésri pa sequequiaaricuaaja, pueyanoori na naata necocua cartenu. Neyaca cuaara coteenu na niquitioora na cartetaja naajionee, necocua na cartenura. Moiséscuajaari naa pa sequequiaaritij.

⁵ Jesuuri cuno pojori sequereee:

—Moisésri naa sequequiaari nijaniyatej, pueyaracaanu cumajiuujiaaca nia quiniuuca, nia niquiocuaaca taraajeyashijia nia quiniuucajuhuaj. ⁶ Saniniuuja, Moisésri naa naajioquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷ Naaratej, pueyanoori na queya tiujianutaniya necocuara na caminiuria. ⁸ Nojori jaara camitioore, nojoriiri juhua niquiriyatujua pueyanora quiqui. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹ Cunora, pueyano cuaara necocua carteyaquiiria, Pueyaso rupuetootesano nojori quiniuuca.

¹⁰ Majaari Jesu saquirojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquirojosano pueyari Jesu nequesotaquiaari casa na sequenu paniriquiaa naani. ¹¹ Jesuuri nojori sequereee:

—Cante necocua carteya tamonu maajitia na caminiuriani, cuno pueyanoori jiyanohua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia. ¹² Naajuhuj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuj.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³ Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquirojosano pueyari naatujoori jaatucunaa tenujuriquiaa saaja.

¹⁴ Jesu jaara na niquiquiaari, juaaquiiri. Nojori sequereeri:

—¡Nia tarinitiare naatujoori cuaara niiria cucua! ¡Maja na tenujunu! Canapete Pueyaso muerasura quiniu paniyani, nojori cuaara juhua nio naatujooriira jataara. ¹⁵ Seetanujanaa nia sequeyanijia, Pueyasoocua nia tiuuri seetanujanaa, taa naatujoori tiuya cucuacuaani na taacanuyaquiniutia. Saaja naacuajiti niari Pueyaso pueyara jiyatesaanutaniya cutara, pueyaracaanu Pueyaso jiitiasano nia quiniuria.

¹⁶ Jesuuri jiyacari cuno naatujooriniyujua pooree. Nojori nacaacua niojoree na juaashiquiaari Pueyaso na seconutana, Pueyaso miiniuria maninia nojori.

Jiyanohua casamiriaca mashaja pocojosacari Jesuta

(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimijaji mojqetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸Jesuuri na sequereee:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹Quiaacuaajaari Pueyaso niishitiojosano niishiya. Moiséscaajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuaa tonujunu sapojonuta. Maja cuaracashijionu. Quia queya tojjia quia quiriqia”.

²⁰Pueyanoori Jesu riucaaree:

—Niishitiojonanaa, janiyacuaajaari puetunu cuno rootasanojuanaa tojjia pueyaracaanu cua naatujujajinjini.

²¹Jesuuri na paniniutia na niquirii. Na sequereeri:

—Juhuanajuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niqutiojocoo. Na nuhuaji, casamijiuniucua nareja quia niq-uitiore quia masesano cumaneeca quia casami sami. Naacuaajitij, quiaari quia casami jitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

²²Cuno pueyano jaara tojiqiaari naa Jesu sequesantej, jiyanohera taraajequeeri. Na taraajenuta quiacuhua na tiajiniaari. Nojuajaari jiyanohera casamiriaca pueyano quiquiaari. ²³Na nuhuaji, Jesuuri na shocuaqueya niqiniijioree. Na saquiriojosano pueya sequereeri:

—Jiyanohera jiyajeneta cutaraari casamiriaca pueyano quiniuria Pueyaso pueyanora!

²⁴Na saquiriojosano pueyari shiriqiuquiquiaari naa na sequesacariitij. Na nuhuaji, Jesuuri nojori sequenu pacutequiaari:

—Sanajooringa, seetanujuanaa nia sequeyanijia. Jiyanohera jiyajenetaari casamiriaca pueyano quiniuria Pueyaso pueyanora. ²⁵Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶Na saquiriojosano pueya jaara na tojtiaquiaari, nojoriiri socua jiyanohera jiuujiateree. Naaratej, tama nojoriijaari nia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casa quiniu.

²⁸Pedroori Jesu sequereee:

—Jiyaniijianaa, canaari puetunu canaa jitianasanojuanaa tiujiaquiaarini quia pueya canaa quiniuria.

²⁹⁻³⁰Jesuuri nojori riucaaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jitianasano tiujiaja cua tojjia na quiniuucuaani, janiyajinjini pohuatana na quiniuucuaajuhuj. Cante na tia tiujiajani, tapueyocuaa, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanohera queraatia niqutiosaanutanihua na tiujiasano-jinjini. Niqutiosaanutaniyari tiaca, tapueyocuaa, na rimiatuhua, na nucua, necohua, cuhuariquiano. Naajuhuj, naquiya miishano quiniutianiyari cua tojjia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. ³¹Saniniujia, queraatia tojishano pueyari najuhua quijia quiniutianiya Pueyasora, nojori tojiyaquiniuucua nojuaja. Saniniujia, Pueyaso ruuretajacara, queraatia Pueyaso pueyari quiarijia juhua najuhua quijia quishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojtiajaca nojori quiniuucua.

*Jesu pacutesacarihua pohuatano nojuaja mosaanutaniya
(Mt 20.17-19; Lc 18.31-34)*

³²Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhua. Nuu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

³³Nojori sequereeri:

—Niaacuaajaari niishiya, paa tari Jerusalén tiacajinia quiaani, tee cuniqui Pueyaso Niyanu niqutiosaanutaniya pueyacuara secojonaa jiyaniijianucuaani, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niqutiosaanutaniyani. Janiyari jiyanhohua naquiya miishaanutaniyani. ³⁴Nojoriiri cua rerequetenutaniya. Cua riocojotunutaniyani. Cua piqutiuniutianiyajaariuhua. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhua.

Santiago, tarajanu Juanta, nojori sequesacari Jesu, maninia nojori na miiniuria (Mt 20.20-28)

³⁵Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquihua quiquiaari. Jesu sequetuseeri:

—Niishitiojonaanaa, canaara quia miiri canaa masenu panishano quiajaniya.

³⁶Jesuuri nojori nequesotaree:

—¿Casaa nia paniya cua miiniuria niaarani?

³⁷Nojoriiri Jesu riucuaaree:

—Pueyaso jaara quia jiyatere pueya jiyaniijiaara, quiocua canaa cajitijiore quia shuricua, tamonu quia miaquetajara, tamonu quia muenecara, quia naacunaa canaa quiniuria.

³⁸Jesuuri nojori sequere:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanhohua noonu quiniutianiya juhua pueyano jaara mani noshianojinia tiuquinishaare.

³⁹Nojoriiri na riucuaaree:

—Taaquiririnij, canaa naatacuaaquinateja naquiya miiniu rejeretanu juhua quiajaniya.

Jesuuri nojori sequere:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanhohua naquiya na miishaanutaniyani, na cusosacari pueyacuara. Jesuuri naa nojori sequeree socuatej:

⁴⁰—Maja cutara cua naata niqutionu nijaniya nia masesano, cua cajitiniuria nijaniya cua miaquetajara, cua muenecarano. Cunoori noo pojori niqutiosaanutaniya cutara, canra tari na jeenucuaaquaiaaricuaajani.

⁴¹Narta saquiriojosano pueya jaara tojiquiaari nojori masesano Jesu juucua, nojoriiri juaaquoquiaari. ⁴²Jesuuri nojori piirri. Nojori sequereeri:

—Niaacuaajaari niishiya, mijiria jiya jiyaniijianucuaari na pueya jiitiaquiaa juhua na seya, tama nojori panishano na miiniuriajaaja nojoritia. Naajuhua, pueya jiyaniijianucuaari na jiitiasano pueyacuara paaretaquiaa na cumaaca, tojishano pueya nojori quiniuria.

⁴³Niajaniya saniniujia, majaari naa nia quiniu quiniutianiya. Cante tojishano pueyanora quiniu paniya nijaniyajinjini, cuno cuara jiyateera tama na cuaqueyajaaja juhua narta Pueyaso pueya serura na quiniuria. ⁴⁴Cante nia jiyaniijia quiniu paniyani, nojuaja cuara quiiria narta Pueyaso muerasu cumaquinia. ⁴⁵Janiyajuhua, majaari mijiria cua ninu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niqiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritanura Sesaaca.

Jesu jeeacasacari Bartimeo namijia (Mt 20.29-34; Lc 18.35-43)

⁴⁶Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariyojuaru pueyanoori tii cajiriquiaa nuu shuucara. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyojuaru na quiniuucua. Nojuajaari maja na naata poonijionu quijia tamajaaja. ⁴⁷Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nacanú coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸Queraatia pueyari na tenuityiquiaa na sanaajanura juucua. Saaja socua nacaree jiyanohuari:

—¡Pueyaso Jiyarosanonaa, cucua quia taraajere!

⁴⁹Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyojuaruuri naa sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

⁵⁰Naa na tojishacaritij, cariyojuaruuri na tucuaque toque jataquee. Ritia jaaqueeri Jesuucua na catecanonura. ⁵¹Jesuuri na nequesotaree:

—¿Casaa quia paniya cua miiniuria quiajaniani?

Cariyojuaruuri na riucaaree:

—¡Niishitiojonanaa, niqijijara quiniu paniuhanijia! ¡Cua namijia quia jecarohua quiria!

⁵²Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariyojuaruuri tari na naata niqiniu quiriqiaa. Nucuaco Jesu nuhuajiyareeri.

11

Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

¹Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquiiiose Olivo cuhuariquia tuhananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ²Nojori sequereeri:

—Cuno tiacajinia nia quiaare, pa taccoji niqishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niqishiinio, niocua na samaacartasee. Niocua na jaatucumohua miji. ³Pueya jaara naa nequesotare niajaniana: “¿Casaara nia samaacartaanoj?”, niocua na sequere: “¡Jiyaniijia na paniya rupaquijia. Ritia na niqutionutanihuacuaja”.

⁴Nojoriiri quiojoquiaari. Burro riuriataseeri morotasano nuujinia, tamonu tia tohuateya shuriucua. Nojoriiri na samaacartasee.

⁵Tamasaca tii quiniaari nojori sequeree:

—¿Casaa nia miyani? ¿Casaara nia samaacartaa cuno burroni?

⁶Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. ⁸Queraatia pueyari na toqueya muejoquiaari nucuaco, Jesuucuaaji nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucuaaji nojori niojotasocoriquiano na nucuacojuhuaj. ⁹Jesu puetanaa, mariyata na nuhuaji nijionaari jiyanohua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanohua maniniacuaja pa Jiyaniijia, cuno, Pueyaso cumaacata tiuquiyani! ¹⁰¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuacaanu Quijia pa Pueyasocuaajaari na shuquiritiasano!

¹¹Jesuuri naa tiuquiquiaari Jerusalén tiacajiniatej. Pueyaso Secojojuaja tiajinia tiuquishiiri. Na niqinijionu nuhuaji puetunu casaajanaa, Betania tiacajiniara quiaquiaari ritiari na doce saquiriojosano pueyata. Jiyacaritij, tari tenacariiri quiriqiaa.

Jesu sesacasacari jajauju higo naana
(Mt 21.18-19)

¹² Tariqui, nojori quiojosacari Betania tiacajiniji, Jesuuri miaajeriquiaa. ¹³ Tucuaaanuji niqirihi higo naanaari queraatia jaamasucuaraca. Nocua canujiyareeri na niqiniuria seetanujuanaa jajauracate quiriquiaa. Saaja queraatia jaamasucuari quiriquiaa. Maja higo muetusacari quiquiaari jiyacari. ¹⁴ Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquirojosano pueyari na tojitiariquiaa naa na sequesacaritij.

Jesu jaacasacari seya niqutiojonaa Pueyaso Secojoju tiajiniji
(Mt 21.12-17; Lc 19.45-48; Jn 2.13-22)

¹⁵ Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojoju tiajinia. Tiji pueya tohuatanijionu coteereeri, cuno pojori, canapue te Pueyasoocua puecoosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucua cumaneecacuajani, Pueyaso Secojoju tiajinia niqutiojosocoriquiano cumaneecaracuajani. Naajuhuj, Jesuuri mococoonu niqutiojonaa cajitucua caponeetaree. ¹⁶ Naajuhuj, majaari na shanacunu quiquiaari pueya niyacunura najuhuaana Pueyaso Secojoju tia, na nitiotasano casamitia. ¹⁷ Na nuhuaji, pueya niqiara niishitijonnu coteereeri. Naa sequereeri:

—Tariucuaaanu Pueyaso Rupaajinia naa naajiotasanocuaajari quiya:

“Cua tia sesaari quiniutianiya, Pueyaso Secojoju tia. Puetunu jiyacajinijiojuanaa pueya seconuujuara quiniutianiari”.

Niaari saniniujia na jiyatequiaari nohuasenujuaca quiquiora.

¹⁸ Pueyacuara secononaa jiyaniijianucua, mariyata Moisés Rootasanojiniji niishitijonnu aari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniujia, puetunu pueyajanaari jiuujiteriquiaa Jesu niishitijosano nojori tojishacari. Cunora, Judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitijosano. ¹⁹ Jaara niniquiaari, Jesuuri Jerusalén tiacajiniji quiauhua na saquirojosano pueyata.

Higo naana sorenojiniji pohuatasano
(Mt 21.20-22)

²⁰ Tariquicuaji, nojori shocosacari higo naana, na niquitiuaariiri tariucua soreno, puetunu na nujacatajanaa. ²¹ Pedroori jiyacari Jesu sequesano niishiqui. Jesu sequereeri:

—Niishitijonanaa, ¡quia niqirihi! ¡Quia sesacasano higo naanaqui tari soreree!

²² Jesuuri nojori riucaaree:

—Pueyasocua nia tiuuri. ²³ Seetanujuanaa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhananu sequenu: “Shiiquia niqiji. Quia jaataare shoniacu caminajinia”. Niaa jaara naa sequere seetanujuanaa Pueyasocua nia tiuuniutia, niaari nia sequesano niqiniutianiya. Naacuajitij, Pueyasocua nia taacanuyaquishacari, nia sequesano nia taacanuyaquishacari nia sequesano niqiniutianiya. ²⁴ Janiyari cunora nia sequeyani, puetunujuanaa nia masasano nia secojosacari Pueyasoni, nia niishiri niaa na jiiitiaa tari. Na nuhuaji, niaari seetanujuanaa na masenutianiya.

²⁵ Nia secojosacari, niaa jaara niishiqui niaa sesa quiya tamonu pueyanota, sesa na miiniucua niajaninya, nojuaja nia jiyanoori. Naacuajitij, jiyocuaaanu Quijia nia Queeri nia jiyanooniutianiya sesa nia miishanojinijihuaj. ²⁶ Naa jaara jiyanooyashijia quiriquia, jiyocuaaanu Quinia nia Queeri nia jiyanooyaqiniutianiya, sesa nia miishanojinijihuaj.

Pueya nequesotasacari Jesu, cante na jiyaronani
(Mt 21.23-27; Lc 20.1-8)

²⁷ Na nuhuaji, nojoriiri quiaquiaarihuja Jerusalén tiacajinohua. Jesu rucanejosacari Pueyaso Secojoju tiajinia, nocua catecanoquiaariiri pueyacuara secononaa jiyaniijianucua, Moisés Rootasanojiniji niishitijonnuajuhuj, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojoua tia jiyaniijia quia quiniuriani?

²⁹Jesuuri nojori riucuaaree:

—Janiya nia nequesotanuniya saniniunijia. Naa jaara cua nequesotasano riucuaare coteenucuaa, janiyari nia sequenutaniyajuhaaj cante cua jiyaroquiaari naa cua miiniuriani. ³⁰Cua riucuaturotoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucuaare.

³¹Jiyacartij, cuno pueyari jiyasohuaja tama juayonuutanu coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucuarucua: “¿Casaara nocua nia tiuyaquiquianucuaarini?” ³²¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuaaari niishiriquiaa puetunu pueyajaari niishiquiaari Tiuquinijiona Juanri seetanujuanaa Pueyaso sequesano caminiujunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. ³³Naacuajitij, maja na naata na riucuatunu quishacari, Jesu sequetureeri:

—Maja canaa niishiniu.

Jesuuri nojori sequereeri:

—Janiyajuhaaj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pohuatasano sesa miijiaca poonijionaajiniji

(Mt 21.33-46; Lc 20.9-19)

¹Jiyacartij, Jesuuri miriqui pohuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiajinia uva natooquiaari. Na nuhuaji, na shuriuquioco maticoreeri. Naajuhaaj, saajia quejaquiaariiri uva rapijiojuara, na caaca reratesaanura. Jiyaconajara tiareejaarihuaj, tiji na cuhuariquia na cojuajara nohuasejojuacuaji.

²Na nuhuaji, tamasa poonijionaa pueya na niqitioreeri nojori cojuasocoriquiano nera. Naacuajitij, uva carojotasacari, nojoriiri nojuaja niqutionutaniya tijijihuaj, na camarujuanaa na quiniucua. Na nuhuaji, nojuajaari tucuaaanu quiaquiaari, tii marijia na shocotejonura. ³Jaara tari quiquiaari uva carojotasacari, saniya cuhuariquia camarujuanaari na seru jiyaroquiaari cuhuariquia cojuanaa pueyacua. Na jiyaroquiaariiri cuhuariquia cojuanaa niqutionura nojori carojotasanojiniji, taa na camarujuanaa pocoojoquiaaricuaaja nojoritia tarijiani. ⁴Cuhuariquia cojuanaa pueyari saaja jiyarosano seru quiaturee. Na piqitiuriiri. Na nuhuaji, juhuasu na jiyaroturohua na camarnuucuaari. ⁵Na camaruari socua jiyaroquiaari tamonu na seru. Cuno seruuri jacusaaree saitia. Na nacaari surtasaaree saajiata jasano. Na sesacatureejaarihuaj. ⁶Na camaruari socua jiyaramiquiquiaari queraatia na seyari. Puetunu nojorijinijiojuanaani, tamasaari piqishaaquiaari. Tamasacaari puecoosaaquiaari cutara.

⁷Cuhuariquia camaruari saaja niqiriyatujua niyanuniyojua jiiitiquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijiaaja: “Cuno pueya jaara niqiri cua niyanu, nojoriiri na tojinutianiya cutara”. ⁸Cuno cuhuariquiajinia poonijionaa niquishacari nojori camarnu niyanu nojoriicua niyanu, nojoriiri saaja tamajaaja niishitiojotooquiaari:

—¡Nioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuaa quiqui tamajaajani!

⁹Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

¹⁰Jiyacartij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasaca pueya niqutionutaniya cuno cuhuariquiaari, nera nojori cojanunura.

¹⁰¿Majateeri tariucuacaanu Pueyaso Rupaajinia nia serojonu quiquianucuaja nio? Naa sequeyari:

“Tiajonaa pueyari tamaatiujiajau saajia jatatee nojori tiasacari sajjiniji tia. Na nuhuaji, cuno jatasano saajiaari socua cutara saajiaari jiyatesaarohua tamasaca sajjiniji.

¹¹Cunoori pa Jiyaniijia miishano. Pajaniyara, na miishanoori jiyanoehua maninia. Nocuaji jiuujiatesano”.

¹²Jiyacaritij, cuno Judiocuaca camarucuuari niishiriucuaja miriqui Jesu pohuatasanoori tama nojorijiniijiaa quiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajajiniijitij, nojuajaari tama na cuaqueyajiniijiaa pohuatariquiaa.

Jiya jiyaniijia cuaara pueyaracaanu niqitiosaaria na sequesano cumaneeca

(Mt 22.15-22; Lc 20.20-26)

¹³Na nuhuaji, Jesuucua jiyaramiquishaaquiaariiri noojiaqueya Fariseocuacajiniijinio, Herodes panijata pueyajiniijiojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimajata quia niqiniu pueyajuhuj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojotua, taate pa naata maninia quiniu Pueyaso niquiarani. Naaratej, canaa quia sequere, ¿maninate pa niqitiojonura pa cumaneecajiniji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niqitiojoshiyatee, maja soj?

¹⁵Jesuuri ritia niishiqui, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocoriquiano.

¹⁶Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhuj?

Nojoriiri na riucaaree:

—Jiyaniijia César naaquicuaja, na sesajuhuj.

¹⁷Jesuuri jiyacari nojori sequeree:

—Jaara tama César casaaja quiri, tama na casaaja nia niqitiore na camaru. Saniniuujia, Pueyaso nia niqitiore nerano tama na casaaja.

Jesu jaara naa nojori riucaquiaaritij, nojoriiri jiyanoehua jiuujiatequiaari.

¿Macunucuate samiitiaconutaniuhua?

(Mt 22.23-33; Lc 20.27-40)

¹⁸Fariseocuaca nuhuaji, noojiaqueya Saduceocuacajiniijioori Jesuucua nijioquiaari. Saduceocuacaari jiyaniya macunucua maja na samiitiaconu quiniutianuhua. Naaratej, nojoriiri Jesu nequesotasee nojori niishiniuria taa na sequenutaniya macunucujiniijini. Na sequetuseeri:

¹⁹—Niishitiojonanaa, supuetana Moiséscajaari pa rootaa na naajioneejinia, pueyano jaara cusoyare mueyaju, tarajanu cuaara camiriia mashiquio, mueya na mueratenura tarajanu niti. ²⁰Tarijia, tamonu pueyanoori niya quiquiaari. Siete niqiohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuojuua. ²¹Naaratej, na nuhuajishanaari tarajanu mashiquio camiquiaari. Nojuajaari muetuhuojuua cusoquiaarijuhuaj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajuhuj. ²²Cuno siete canuuri naa camioquiaari cuno maaji. Puetunu nojorijianaari cusunuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri

cusoquiaarijuhuaj. ²³ Naacuajitij, macunucua jaara samiitacorohua, ¿teyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca qüiquiaari?

²⁴ Jesuuri nojori riucaaree:

—Niaari jiyanhua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. ²⁵ Macunucua samiitacosacariuhua, majaari canuu camiyonu quiniutianiya maaji. Naajuhua, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuaaanu quijiaca Pueyaso seya, maja camiyosano. ²⁶ Niaa macunucua samiitianiijionujiniji nequesoreetaate. ¿Majateeri nia serojonu quiquiaacuja supuetana Moisés naajioneejinia, taa Pueyaso sequequiaari Moiséscauja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijajuhua, quia supuetana Jacobo Jiyaniijiano”.

²⁷ Naacuajitij, paari niishiyani Pueyaso pueya shaajeconoori saminiucua quia Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanhua jiyajeneya nia niishiyaquiniucua Pueyaso Rupaa.

Puetunu Pueyaso Rootasanojinijianaani, teyanote socua pa tojishocoriquianoni (Mt 22.34-40)

²⁸ Tamonu pueyanoori Jesu tojiriqüiaa Saduceocua riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuaaanu Pueyaso Rootasanojininiote socua pa tojishocoriquianoni?

²⁹ Jesuuri na riucaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijajanaa. Majaari tamonu quiniu socua. ³⁰ Nia Jiyaniijia Pueyaso nia paniri puetunu nioojiatajanaa, puetunu nia sohanutajanaa, puetunjuanaa nia niishitajata, puetunu nia cumaacatajanaani”. Nio rootasanoori socua pa tojishocoriquiano puetunu Pueyaso rootasanojinijianaa. ³¹ Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia panyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeree:

—Quiaacuja maninia sequeree, niishitiojonanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja.

³³ Seetanujuanaa jiyanhua maninia cutaraari Pueyaso pa paniniuria puetunu pooji-atajanaa, puetunjuanaa pa niishitajata, puetunu pa sohanutajanaa, puetunjuanaa pa cumaacatanio. Naajuhua, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaa quirini, cunoori jiyanhua socua maninia Pueyasora, puetunu seya catijasanojinijianaa nocuara, mariyata puetunu pueya niquitiojosano na casamijiniijianaa nera.

³⁴ Jesu jaara tojiquiaari naa cuno pueyano riucaasano maninatej, na sequereeri:

—Quiaaqui quera Pueyaso pueyanora quia.

Na nuhuaji, majaari socua pueya nequesoreetanu paniniu quiriqüiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojoua tiajinia niishitiojoriqüiaa pueya. Jiyacaritij, nojuajaari na tojtianaa pueya nequesotaree:

—¿Casaara Moisés Rootasanojiniji niishitiojona sequequiaacuaaraari: “Cristonaari supuetana David niqiuohuacuajinio supuenutaniya”? ³⁶ Pueyaso Sohanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuaara quia paraa shocojotare quiocuaajijiaatijia, Jiyaniijiajanaa quia quiniuria pueyaracaanu cutara’”.

³⁷ Supuetana David jiyaniijiasacari Cristo, ¿Cristotucua taa supuetana David niqiuo-huacuaajinio supueno quirini? Davidcuaajaari na jyaniquiya “cua Jiyaniijiaata”.

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaaji. Cuno pojoriiri puera tucuaque toque cushiyonu maniniucuaaja nojori rucuanajotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucuaajinia. ³⁹ Nojori jaara masusaare tamonu tiajinia queranacunura, nojoriiri ritia secoquiaa socua panishano cajitiujinia nojori cajitiuniuria tia camaru shuriucua. Naajuhua, Pueyaso secojojua tiacajiniaqueya pueya rerejosacari, nojoriiri camarucua cajitiucuaajinia cajitiuniu paniquiaa, pueya shootianura nojori. ⁴⁰ Nojoriiri mashiquiopue tiaca masequiaa secaja cumaneecata nojori na saponota. Naa nojori miiniu nuhuajitij, nojoriiri Pueyaso secojoquiaa shitiarayocua pueya niquiara, maninia pueya nojori jyanishaanura. Naaratej, Pueyaso saniitosacari maninia miyashijiaa pueya, nojoriiri socua jyanohua naquiya miishaanutaniya tamasacajiniji.

Casamijiu mashiquio niqutiosacari na cumanee juuranee Pueyasora

(Lc 21.1-4)

⁴¹ Tamacari, Jesuuri cajiriquiaa Pueyaso Secojojua tiajinia cumaneeca niqutiojojua tajoji, tee pueya niojoriquiaa na cumaneeca Pueyasoracuaajini. Jesuuri tiji pueya shootiariquiaa na cumaneeca niqutiojijiano. Queraatia casamiriaca pueyari queraatia cumaneeca niqutiojoriquiaa. ⁴² Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojojuaajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. ⁴³ Jesuuri jiyacari na saquirojosano pueya piiri. Nojori sequereeri:

—Seetanujanaa nia sequyanijia, nio casamijiu mashiquio cutaraari socua queraatia niqutioree puetunu tamasacajinijijanaa. ⁴⁴ Puetunu pueyajaanaari na cumaneeca curenojiniji niqutiojoriquiaa. Saniniuujia, nio maajiri puetunujanaa na miaqueso-coriqiano na masetajarano niqutioree cutara.

13

Jesu sequesacari Pueyaso Secojojua tia niyartasaanutaniya

(Mt 24.1-2; Lc 21.5-6)

¹ Jesu tohuareetasacari Pueyaso Secojojua tiajiniji, tamonu na saquirojosano pueyajinijiniori na sequeree:

—Niishitiojonanaa, quia niquiri Pueyaso Secojojua tia, puereetujaaca saitia tiasano. ¡Jyanohua shanohua tia!

² Jesuuri na riucuaere:

—¿Quiaateeri cuno shanohua tia niquiya, saijiniji tiasano jiyaconajani? Cuniqui, majaari saajia curenu quiniutianiya tamonu caco maano quenaaja. Puetunu niyartasaanujanaa quiniutianiari.

Taa pa niishiniutianiyanijia puequesacari quera

(Mt 24.3-28; Lc 21.7-24; 17.22-24)

³ Na nuhuaji, nojoriiri quiojoquiaari olivo cuhuariquia tuhananuucua. Cuniquiji, maja puera tucuaaanu quiquiaari Pueyaso Secojojua tia. Na taquijirijia quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaaja:

⁴ —Canaa quia sequere taacari Pueyaso Secojojua tia niyartasaanutaniyanijia. ¿Casa Pueyaso miiniutianiyanijia canaa niishiniuria quia sequesano quera tohuateya?

⁵Jesuuri nojori riucuaaree:

—Tama nia cuaqueyajaaja nia cojuare tamasaca sapojijaquiniucuaaji nijaniya. ⁶Nia numooteyacuajanijia, queraatia sapojonuujuaacari nijionutaniya nojori sequenura nia-janiya: “Janiya Cristoni”. Naa sapojotunutaniya queraatia pueyari.

⁷Niaa jaara tojiniuri miaquetoohonujiniji niya, tucuaaanuhujaj, majaari najuhuaana nia shiriqutiuniu. Seetanujananaa naa quiniutianiari. Naajaa, jiyacari, majaari jiya puequesacari quiniutianiya juhuanajuaja. ⁸Tamonu rupaa pocuajacaari miaquetoohonutaniya tamaatiucua rupaa pocuajacata. Pueyari tamonu jiyajiniji miaquetoohonutaniya tamonu jiyajinijinio pueyata. Naajuhujaj, rijiaari jiuuquiujiutianutaniya queraatia tiqiyocua tiacajinia. Jiyanhua miaajesacariiri quiniutianiya jiyacari. Naajaa, puetunu niyojuanaari saaja shusha naquiya miiniu cotesacari quiniutianiya.

⁹Tama nia cuaqueyajaaja nia cojuare. Niaari tama nia tiacajinia jiyaniijianucua-jaaja niqutiosaanutaniya saniitosocoriquiano. Naajuhujaj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyjuhua tiaca jiyaniijiaacua, jiya jiyaniijianucuaacuanio, nojori nequesoreenura nijaniya, janiyajiniji pohuatanaa nia quiniucua. Naacujitij, niocua janiyajiniji pohuatara nojori niquliarajuhujaj. ¹⁰Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. ¹¹Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitiojosano nijaniya. Nia pocuasanoori maja nijaniyajiniji quiniutianiya, nia pocuasacari nojori niquiara. Cunocujaari Pueyaso Sohuanu niishitishano quiniutianiya, na pocuatesacari nijaniya. ¹²Jiyacarijuhuaj, pueyanoori sesa miiniutianiya tama tarajanujuaaja, cua tojjia tarajanu quiniucua. Tama tarajanujuaarijia na niqutioonutaniya mosocoriquiano. Jiyacaritij, pueyari tama necohuaaja miiniutianiya sesa, cucua tiuujiaa necohua quiniucua. Naajuhujaj, necohuari tama na queya tacartanutaniya monujuaaja, na queya tojiniucua Pueyaso rupaa. ¹³Puetunu nio jiyajinijinio pueyajaanaari maja na niqiniu paniniu quiniutianiya nijaniya, cua tojitiajaca nia quishacari. Naajaa, cante seetanujananaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quijiara jatanishaanutaniya, pueyaracaanu cuata na quiniuria shuquiriaatia.

¹⁴Niaa jaara cuno jiyanhua sacuaraatia casaa niqiri Pueyaso Secojoua tiajinia nujuatesano, taa supuetana Daniel sequeya na naajionejiniacuajani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuananuhuaacua, cuno sacuaraatia casaa jaara nujuatesaare Pueyaso Secojoua tiajinia. ¹⁵Canapueje jiyacari quiya na tia cacojiriani, nojori cuara tiuquitiaaquiiria tiajiniaaco na casaa na riniuria juucua. ¹⁶Canapueje jiyacari quiya na cuhuariquajiniani, nojori cuara tacateyaquihuara na toqueya na poonuhuaa. ¹⁷Jiyacaritij, jiyanhua taraatia quiniutianiari maajipohuaa, nojori jaara manajaatohua quiya, jaara jiyacari jitiare supuejaca conaajajuhujaj. ¹⁸Nia secosacari, Pueyaso nia maseriquia juhuacarijia, nia mashiyocuatusacari cuara quiyaquiiria shiniquia quishacari. ¹⁹Cuno quishacari, jiyanhua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhujaj, cuno naquiya miiniu nuhuaji, majaari jiyano naquiya miiniu quiniutianuhua socua, juhua nio. ²⁰Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocujaari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹Jiyacaritij, tamasaca jaara nia sequere: “Nia niqiri, Cristo tari niya quiya”, jaara sequerejuhuaj: “Nooj, jati quiyatej”, majaari na tojitianunoj. ²²Jiyacaritij, queraatia sapojonuujuaacari supenutaniya. Nojoriiri sequenutaniya: “Janiyacuaja Cristoni”. Tamasacaari sequenutaniyjuhujaj: “Janiya Pueyaso sequenu panishano caminiujuniani”. Nojoriiri pueya niqishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya.

²³ Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyjetanu.

Pueyaso Niyanu tacatenujiniji pohuatasano
(Mt 24.29-35, 42, 44; Lc 21.25-36)

²⁴ Naa naquiya pueya miiniu nuhuajitij, pananuuri ninishiquiria quiniutianiya. Naa-juhuaj, racaari maja na cuhuatanu quiniutianiya mijiria. ²⁵ Riyari totenutianiya. Jiyocuaaanu cumaacaraca quijiacaari tetecatunutanijahuaj. ²⁶ Jiyacari, janiya Pueyaso Niyanuuri niqishaanutaniya jiyocuaaanuji roseyano cohuajajiniani, jiyanohua shacantuuca cua cumaacata. ²⁷ Jiyacaritij, janiyari cua seya jiyaramiquiniutianiyanani nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiniojuanaa rerejotesaanutaniya, socua jiyanohua tucuaaanu jiya cajiniocua puequeetujinijini.

²⁸ Quarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niqiritij, niaari niishiquiaa tacareejonuqui quiniutianiya. ²⁹ Quarijia saniniuujia, naatej taa nia niishiquiaa higo naanacuaani, niocua naa niishirijihuaj janiya quera tiuquihuani, niaa jaara puetunu cua pohuatasanojuanaa niqiri tohuateyano. ³⁰ Seetanujuanaa nia sequeyanijia, puetunu cua pohuatasanojuanaari niqishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhuaj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³² Maja cutaraari nia niishiniu taacari cua tiuquiniutianihuani, casaa juucatej. Majaari jiyocuaaanu quijiaca Pueyaso seya niishiniujuhuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqitiare cucuaji, juhua sutejaca. Tamajaaja nia soquere. Saaja pueyaracaanu nia secojoriqia Pueyaso. Majacuajaari nia niishiniu taacari cua tiuquiniutianihuani. ³⁴ Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seerataaree maninia nojori cojuanura na tia. Tamasaca niqitioyaree na poonijiosanoori, nojori poonijiosocoriquiano. Tamonu sequereeri, tohuateyaji na cojuanura pueyaracaanu, nojuaja cuara tiuquihuara-jaatijia. ³⁵ Naaratej, nia suture. Maja maquenuujunu. Majaari nia niishiniucuaa taacari tia camaru tiuquiniutianihuani, shusha ninishacari, shiyaqueya, caacaraja niunijiosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. ³⁶ Cunora, juhua sutejaca nia quiriqia, janiya mariqui nia jiyajenetesuhuari, canashiyaquiji cua tiuquishacarihua niaacua. ³⁷ Cua sequesano niajaniani, cunoori puetunu pueyarajanaa: “¡Nia sutereja! ¡Maja maquenu!”

14

Judiocuaca camarucua rojotoosacari nojori quianura Jesu
(Mt 26.1-5; Lc 22.1-2; Jn 11.45-53)

¹ Jiyacari, juhuanojuaja querajaa juuca quiriqiaajaari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijanucuaari jiyacari Moisés Rootasanojiniji niishitiojonaata rojotooriquiaa Jesuucua. Nojoriiri rojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano. ² Nojoriiri naa sequetooriquiaa: —Maja queranacusacari naa pa miiniutij, paa mariqui puetunu pueyajanaa juaatiriiri.

Tamonu maaji totasacari na shanohua jaanutaja Jesuucua
(Mt 26.6-13; Jn 12.1-8)

³ Jesuuri Betania tiacajinia quiriqiaa Simón tijinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiri tiuquiquiaari. Shiitaniyojua shucuariquiaja pataconiyojua cacatariquiaari, shanohua

cohuaja saajiajiniji quejasano. Mishaja quiriquiaari shanohua jaanutajata, nardo jaamasu-cuajiniji shipinishano. Jiyanhohua queraatia cumaneecata masesano quiquiaariiri. Jiyacar-itij, cuno maajiiri na shucuariquiaja pataconiyojua cocuataree, na totanura Jesu nacaacua. ⁴Tamasaca tii quiniaa pueyari naa cuno shanohua jaanutaja niitiasaanuucua. Tama nojorijiaarijia sequetooriquiaa:

—¿Casaara cuno shanohua jaanutaja niitiasaaree najuhuanani? ⁵¿Cuno jaanutaja maara niqitiosaacanu queraatia cumaneecara, casamiijiuniucua niqitiosocoriquiano!

Nojoriiri juhuacatecara cuno maaji juaarii.

⁶Jesuuri nojori sequeree saaja:

—¡Nia tarinitiare! ¿Casaara nia rimiaaqueya nio maajicuarani? Naa na miishano janiyani, cunoori jiyanhohua maninia quiria. ⁷Casamiijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyaracaanu niaata. ⁸Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹Seetanujanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quietenura

(Mt 26.14-16; Lc 22.3-6)

¹⁰Jiyacaritij, Judas Iscarioteeri quiaquiaari pueyacuara secojonaa jiyaniijianuucua roojotoonura taa nojori na quietenutaniya Jesuni. Nojuajaari Jesu saquiriojosano pueyajiinjio quiquiaarijuhuaj. ¹¹Jiyaniijianuucua jaara tojiquiaari, Judas nojori quietenu paniya Jesu, nojoriiri jiyanhohua shuquiririi. Nojoriiri Judas sequeree:

—Canaa quia niqitionutaniya cumaneecani, canaa quia quietenu sami Jesu.

Cunora, Judasri niishiriojonu coteequiaari taacari nojori na quietenutaniya Jesuni.

Jesu miaquesacari na nuhuajiria na pueyata

(Mt 26.17-29; Lc 22.7-23; Jn 13.21-30; 1 Co 11.23-26)

¹²Puetunu marijiajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaquiaariiri Pascuara riuriotaca borregohua, Pueyaso niqiuara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹³Jiyacaritij, Jesuuri caapiqui na saquiriojosano pueyajiinjio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacujinia. Niaa jaara na riuriatasee, niocua na nuhuajimia. ¹⁴Jaara tiuquishii tiajinia, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua niucuanati?’ ” ¹⁵Jiyacaritij, nojuajaari nia niqitiniutianiya pueereetuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetese, niucua pa miaquesocoriquiano.

¹⁶Na saquiriojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetese borrego, Pascuara miaquesocoriquiano.

¹⁷Jaara niniquiaari, Jesuuri tiuquijioseer na saquiriojosano doce pueyata. ¹⁸Nojori miaquenuusacari, Jesuuri nojori sequeree:

—Seetanujanaa nia sequeyanijia, tamonu nijaniyajinjio niya cuata miaqueyani, nojuajaari cua tacartanutaniya na quietenura janiya, naquiya cua miishaanura.

¹⁹Jesu sequesacari naatej, nojoriiri jiyanhohua taraajequee. Jiyacaritij, tama nojorijiaarijia na nequesoreetanu coteeree:

—¿Janiya jiyoteeri quia quietenutaniyani Jiyaniijianaa?

Puetunu nojorijianaari naa na nequesotaree.

²⁰ Jesuuri nojori riucaaree:

—Niquireiyatujua doce nijanyajinjiniocuaja, nojuacuajaari nio, shusha pan shiya mia-cojuajiniani, nojuajaari cua quietenutaniya. ²¹ Janyiacuajaari maninia tohuateenutaniya puetunujuanaani, taa tariucuacaanu Pueyaso Rupaajinia janyajinjiji naajiotasaquiaar-icuajani. Saniniuujia, jiyanohua taraatia quiniutianiyari cuno pueyanora, cantucuaja cua quietenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²² Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequequiaari-iri:

—Jajaa. Nia miaquere. Nioori cua cuaqueya.

²³ Na nuhuaji, Jesuuri ratujua pataree. Na Que Pueyaso secojoreeri nojori ratuso-coriquianoocuara. Na secojonu nuhuaji, na saquiriojosano pueya niqutioereeri nojori ratunura tiji. Puetunu nojorijianaari ratujuajinjiji raturee. ²⁴ Nojori sequeere miriquiri:

—Nioori cua nanaca. Cua nanacaari queraatia pueyacuara shoonutaniya. Naacuajitij, Pueyasoori seetanujuanaa jiyanooniutianiya pueya, saaja nojori tiuuniuucua cucua, taa Pueyaso sequequiaaricuajani. ²⁵ Seetanujuanaa nia sequeyanijia, maja socua cua ratunu quiniutianihua uva caacajinjiji, janiya cuaara tacatemohuajaatijia pueyaracaanu Jiyani-ijiajanaa cua quiniuria. Jiyacaritij, janyari shusha niaata na ratunutanihuani.

Jesu sequesacari Pedro, nojuaja nocuaji seetanutaniya

(Mt 26.30-35; Lc 22.31-34; Jn 13.36-38)

²⁶ Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhananuucua. ²⁷ Na quiojosacari, Jesuuri nojori sequeere:

—Nio niucuajani, puetunu nijanyajanaari cucua tiuuniu tarinitianutaniya. Naa naajiotasano quiyacuajaari nijanyajinjiji tariucuacaanu Pueyaso Rupaajinia. Naa sequeyari: “Janyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸ Na nuhuaji, janiya jaara samiitiarohua macujinjini, janyari nia puetanutaniya Galilea jiyajiniani.

²⁹ Pedroori jiyacari Jesu sequeere:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

³⁰ Jesuuri saaja na sequeere:

—Pedronaa, janiya seetanujuanaa quia sequeyani, nio niucuajani, quiaari janyajinjiji naa seetanutaniya pueya niqiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

³¹ Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuaara mosaaria quiataqui, naajaa, majaari cua seetanu quiniutianiya quiocuaji!

Narta saquiriojosano pueyari naa sequetureejuhuj.

Taraatia Jesu secojosacari Getsemani cuhuariquiajinia

(Mt 26.36-46; Lc 22.39-46)

³² Nojoriiri jiyacari tiuquijioquiaari tamonu cuhuariquiajinia. Cuno cuhuariquia sesa quiquiaari Getsemani. Jesuuri na saquiriojosano pueya sequeere:

—Niyaja nia cajituri, cua secojosacari cua Que socua nia tacoji.

³³ Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacatecara shiriquireyiaa. Tacaariquiaajaarihuaj. ³⁴ Nojori sequeereeri:

—¡Coojiajinia taraajeya jiyanohuanijia, quera cusoyanjia! Niyaja nia jiyojetare. ¡Niocua niqutiareja! ¡Majaari maquenu!

³⁵ Jesuuri socua shiitianiyojua quiaaree nojori tacoji. Na secojonura Pueyaso, mojuquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaaritij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiaquiiira juhua cua panishano. Saaja cuara quiiria cutara taa quia paniyacujani.

“Nio raatonuque” na sequesacari, Jesuuri miriqui sequeriquiaa naquiya na miishocoriqiano.

³⁷ Na secojonu nuhuaji, na saquiriojosano pueyacia tacateyarohuari. Nojori riuriata-suhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaa quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

³⁹ Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuara. Nojori riuriasuhuariuhua maquetiuyano. Nojori namijiaari saaja seecutariquiaa na maquenuujunuta. Jiyacaritij, nojoriiri maja na niishiniu quiriquiaa taa na riuquatunutaniyanoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaa! ¡Quiarijia cutara janiyari sesa miijiaa pueya quiatasaanutaniyani, nojori miiniuria janiya taa nojori panitiuyacujani! ⁴² Nia saneeculture. Pa quiaare. Cua quiateriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiaquiaarijuhuaj. Queraatia pueyari Judasta nijioquiaari. Cuno pueyari nijiniaquetucujaa mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiaquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. ⁴⁴ Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacari, cunocujaaari nojuaja. Niocua na quiasee. ¡Niari maninia morojosano jaatucutaarohuaquiniroj!

⁴⁵ Naacuajitij, Judas jaara tiuquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiasee. Morojosanoori jaatucutashiyarohua.

⁴⁷ Cuniqiu Jesuta quiniaa pueyajinijinioni, niquiriyatu nojorijinijinioori na shuucujia shitiaquiaari nijiniaquetucujaa mueruu. Nata jaateree pueyacuara secojonaa jiyaniijia seru numacoori. ⁴⁸ Jesuuri nocua nijionaa pueya sequeree:

—¿Casaara cucua nia nijioree nijiniaquetucujaa mueruutani, macacatanio, morojosano nia riniuria janiya juhua nohuasejojuani? ⁴⁹ Janiyacuajaaari puetunu juucajanaa nia tajinia quiaquiaani, Pueyaso Secojoua tajinia cua niishitiojosacari pueya niqiaara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniji Pueyaso Rupaajinia naajiotasano tohuateenura.

⁵⁰ Jiyacaritij, puetunu Jesu saquiriojosano pueyajanaari na shuriucujia mashiyocuatucuaari. Tamajaaja Jesu tiujiatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetucue lino toquerauta cuhuajaatiariquiaa. Jesu quiatunaa niquishacari nojuaja, na quiatureejaariuhuj. ⁵² Nojuajaari saaja na toque tiujiaquee nojori juashiquiajinia. Juhuasuuri ritia netequee. Mashimiaari. Janiyacuajaaari cuno pueyano quiaquiaarini, nio naajionajuhuj.

Judiocuaca camarucua nequesoreesacari Jesu

(Mt 26.57-68; Lc 22.54-55, 63-71; Jn 18.12-14, 19-24)

⁵³Jesu quietunaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucuajuhua, Moisés Rootasanojiniji niishitiojonaanio. ⁵⁴Pedroori Jesu nuhua-jiquiaari tucuacaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia cajishiiri. Mani jitiuriquiaa nojoritia cuniquiiri.

⁵⁵Pueyacuara secojonaa jiyaniijianucua, puetunu Judiocuaca camarucuajanaari ni- ishironuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaaqui quiquiaari sesa casaa, nocuara tonu- jusocoriquiano. ⁵⁶Queraatia pueyari nocuara tonujuriquiaa juucua, nojori sapojonuta. Nojori saquiriojotasanoori saaja rimiajata quiriquiaa puetunujuanaa. ⁵⁷Na nuhuaji, tamasacaari sanetaquiaari nocuara nojori tonujunura na sapojonutajuhua. Nojoriiri naa sequetuquiaaritij:

⁵⁸—Canaa na tojiqianu sesa sequeyanoni. Naa sequecanuuri: “Janiya nio Pueyaso Seco- jojua tia niyartanutaniyani, pueya tiasanoni. Jiuujanaraca juucajinia, janiyari tamajaaja na tianu tucuatanutanihuani. Cunoori maja pueyata tiasano na quiniu quiniutianiya”.

⁵⁹Nojori saquiriojotasanoori saaja rimiajata quiquiaari jiyaniijianucua niqiuara.

⁶⁰Jiyacaritij, pueyacuara secojonaa jiyaniijiaari nujuaree pocuanura. Jesu nequesota- reeri:

—¿Majate quenaaja quia riucuanuuja? ¡Quia tojori, pueyaruhua quiocuara tonujija!

⁶¹Jesuuri saaja sanaa nujuariquiaa. Majaari na riucuanu quiriquiaa quenaaja. Puey- acuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶²Jesuuri na riucuaee:

—Jaa, nojuacuajanjia. Niaari cua niquiniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niquiniutianiya tacatehuano cohuajajinia jiyocuacaanuji.

⁶³Pueyacuara secojonaa jiyaniijia jaara tojiqiaari naa Jesu sequesantej, tama na toquejaaja sutaree na juaniutiaari. Sequereeri:

—¿Casaara pa sashiya tamasaca saquiriojotanura saa nocuarajaanihuua? ⁶⁴Niaacuaja shusha tojirii Pueyasocuara na sequesano sacuaraatia. ¿Niajanivarijiataj, taa nia niishiri- ojiyani?

Puetunu pueyajanaari sequequiaari:

—¡Cuaara mosaaria!

⁶⁵Jiyacaritij, tamasacaari Jesu riocojonu coteequiaari. Na jiquioco moroturejaariuhua maja na niqiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojojua tia cojuanaa pueyari na jiquioco piquitiurijijuhua.

Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

⁶⁶Pedroori jiyaniijia tia carijiniacuma quiriquiaa. Jiyacaritij, tamonu niyacoori ru- cuanejoriquiaa carijiniacuma. Nojuajaari pueyacuara secojonaa jiyaniijia seru quiquiaari.

⁶⁷Pedro niqishii cajiyanoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucanejojuaajuhua, cuno Nazaret tiacajinjijinio pueyano- tani.

⁶⁸Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujiyaree. Mataca tohuatayaji nujuaseeri. Caacarajaari jiyacari niuni- jiree. ⁶⁹Cuno niyacoo jaara Pedro niquiquiaariuhua socua, juhuacatecara nata quiniaa sequereeri:

—¡Nio pueyanoori cuno Jesu pueyajinjiniujuhua!

⁷⁰Pedroori socua na seetaquiaari. Pasaja na tarishishacari, cuniqui nata quiniaari Pedro sequere socua:

—Seetanujuanaa, quiaari cuno pueyajinijinio. Quiaacuajaari Galilea jiyajinijinio pueyano. Canaa tojishacari quiajaniya, quia pocuanuuri juhua nojori pocuanujua.

⁷¹ Pedroori socua jiyanhohua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiyani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

⁷² Jiyacaritij, caacarajaari niunijionu pacuterohuacuhuj. Pedroori jiyacari niishiquii naa Jesu sequesano nojuajatej: “Juhuanujuaja caacaraja niunijionu pacutejiyaquishacari-ijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiquii naa Jesu sequesano nojuajatej, jiyanhohua nujuquequeeri.

15

Jesuucua pueya saquiriojotasacari Pilato

(Mt 27.1-2, 11-14; Lc 23.1-5; Jn 18.28-38)

¹ Tariquiiuajaji, pueyacuara secojonaa jiyaniijianucuaari rerejoquiaari Judiocuaca camaruacua, Moisés Rootasanojiniji niishitiojonaatajuluaj, Sanedrín maanutanio. Nojori-iri moronucua Jesu jaatucutaquiaari Pilatoocua. Cuno Pilatocujaari Judea jiya jiyaniijia quiquiaari. ² Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Jaa. Naacuaaquiniatejaj, taa quia sequereecuajani.

³ Pueyacuara secojonaa jiyaniijianucuaari Jesuucuaa tonujuriquiaa queraatia sesa casa. ⁴ Pilatoori Jesu nequesotarohuacuhuj:

—¿Majateeri quenaaja quia riucaanuujua? Quia tojiri taa cuno pojori saquiriojotaa quiociarani.

⁵ Jesuuri maja na riucaanu quiriquiaa quenaaja. Cunora, Pilatoori jiyanhohua jiuujiatequiaari.

Na paraa sequesacari Jesu cuaara mosaaria

(Mt 27.15-31; Lc 23.13-25; Jn 18.38-19.16)

⁶ Puetunu marijijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracuajani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jiitianuucua Judiocuaca. ⁸ Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijijarajanaani.

⁹ Pilatoori nojori riucaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucua. ¹¹ Pilato nequesotasacari nojori, pueyacuara secojonaa jiyaniijianucuaari jiyacari pueya shiniujiuquiaari nojori sequenura Pilato, nojuaja cuaara carteera Barrabás. ¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jiyanhohua:

—¡Cuara mosaaria niyacutesanojinia teetesano!

¹⁴ Pilatoori nojori riucaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanhohua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqutioreeri, niyacutesanojinia na teetsaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. ¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatinuria:

— ¡Jejee, Judiocuaca camarnuna nooj!

¹⁹ Nojoriiri na naca piquirii naajuata. Na riocojotureejaariuhuj. Nocuara mojuquetacoreeri juhua jiyaniijiajanaa cariquimiaji, nojori sapojonuta na macaatinuria nojuaja. ²⁰ Naa na rerequetesaanu nuhuajitij, toque naatunqueeri nocuaji jocuasaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹ Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitianiyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”.

²³ Soldadohuari Jesu raatequiaari vino juucua, mirrata cojitishano. Saaja na ratuyaquiriiri.

²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririajaaja.

²⁵ Jiyacaritij, niyacutesanojinia na teetesacari, shusha pananu tacasacariiri quiquiaari.

²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷ Jiyacaritij, caapiqui nohuasenujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸ Naa tohuateequiaariiri taa tariucuacaanu Pueyaso Rupaajinia na naajiotasaaquiaaricuajani. Naa sequeyari:

“Na sesaari sesa miijia pueya sesacata cojiritiasaaquiaari naajiotasaanujuhuaj”.

²⁹ Pueya tajishacari nucuaco Jesu shuriuquico, nojoriiri na macaatiquiaari. Na maanuenuta naa na sequetuquiaariiri:

— ¡Jaj! ¿Majateeri quiajaniya cumaacaracuaja? ¿Quiaateeri jiyaniriquiaa, quiaa jaara Pueyaso Secojoja tia niyartare, quia naata na tianu tucuanuhua jiuujianaraca juucajania? ³⁰ Quiaa jaara naa cumaacaraca quirritij, niyacutesanojiniji quia roserecurajaj.

³¹ Pueyacuara secojonaa jiyaniijianucua, Moisés Rootasanojiniji niishitiojonaari na macaatiquiaarijuhuaj. Tama nojorijaarijia naa sequetooquiaari:

— ¿Maatucua saa tamasaca naatanijoriquiajaari? Tama nojuaja cutaraari maja na naata niyacutesanojiniji rosenu. ³² Jaara seetanujuanaa quiri Pueyaso Jiyarosano, pa jiyaniijia na quiniuria, cuara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenujuaca Jesu shuriucua teetesosano quiriquiaani, nojoriiri na sesacariquiaajuhuj.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. ³⁴ Jiyacaritij, Jesuuri jiyanohua na rupaa paaretaquiaari:

— Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵ Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

³⁶ Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuacuaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

³⁷ Jiyacaritij, Jesuuri jiyanhua na rupaa paaretarohuacuhuj. Cusoqueeri. ³⁸ Jiyacaritij, Pueyaso Secojoja tiajiniaacuma, shiquiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasocua nojori tiuquishacari juuca, jiyanooshoojua nojori quishacari. ³⁹ Cuno Romano soldadohua jiyaniijaari Jesu tacoji nujuariquiaa. Na niquishacari taa Jesu nacaquiaarini, naajuahuaj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuaana Pueyaso niyanu!

⁴⁰ Maajipohuari tii quiriqiaajuhuj. Tucuacaanuji Jesu shootaturiquiaari. María Magdalena nojoritia quiriqiaajuhuj, socua narta maajipohuano. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji. ⁴¹ Puetunu nio maajipohujanaari Jesu nuhuajinia quiquiaari. Nojoriiri nera pueraquenuunaa quiquiaari, Galilea jiyajinia na quishacari. Socua queraatia maajipohuari tii quiriqiaajuhuj, canapuate Jerusalén tiacajiniara nijioquiaari Jesutacujani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴² Jesu cusonjuucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujuaana. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquniucua jiaatiaja quiquiaarijuhuaj, canaa Jiyaniijaana na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanhua jiuujiatequiaari na tojishacari Jesu tari cusoquee. Pilatoori soldadohua jiyaniija sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniija jaara na riucaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanhua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na juniocoreeri. Na nuhuaji, na niaquiaari raacoori. Cuno raari jiuutiasano quiquiaari saajajinia. Joseeri raa tioree jiyanhua pueretuuca quejasano saajiaa. ⁴⁷ María Magdalena, José nucua Maríano, nojoriiri na niqutiariquiaa tee na niasaareeni.

16

Jesu samiitasacarihua

(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Marfajuhuj, Salomeño, nojoriiri shanhua jaanutaja masequiaari macuucua na tuujutasocoriquiano. ² Jiyanhua tariquicuaji Domingo juuca, shusha pananu muetasacari, nojoriiri raajinia quiojoquiaari. ³ Nucuaco na quiojosacari, tama nojorijiaaritia sequetooriquiaa:

—¿Canteeri pocuaji shuquitiniutianiya tamocora raa tiootiuni?

⁴Nojori jaara niqiquiaari raa, saajia niqutiiriiri tariucua tamocora shuquitishano. Puereetuca saajiaari quiqiaari raa tiotiu. ⁵Nojoriiri raaco tiuquitiamaa. Mashaja niqutiishiiri tii cajiyano nojori miaquetajara, cohuaja tucuaque toque cajitiaano. Nojoriiri jiyanohua shiriqitiuqiaari na niqutiushacari nojuaja. Cuno mashajaari Pueyaso seru quiqiaa. ⁶Maajipohua sequereeri:

—¡Maja nia shiriqiniu! Janiyari niishiyacuajani, niaari Jesu pajeya, Nazaret tiaca-jinijinio pueyano, niyacutesanojinia teetsaarucuaani. ¡Nojuacuaja tari samiitariohua! Maja niya na quiniu. Nia niqishuriiria na maja, tee na niasaarucuaacuajani, shaaqui. ⁷Na saqiriijosano pueya nia sequesuhua, Pedrojaajiano: “Nojuajaari nia puetanutaniya Galilea jiyajiniara. Niaari tii na niqiniutianiya, taa na sequecanu nijaniyacuajani”.

⁸Maajipohuari netecuatuqiaariuhua raajiniji. Nojoriiri tetecaturiquiaa na shiriqiniutia. Majaari quenaaja tamasaca pueya na sequetunu quiqiaari na puerenuta.

Jesu muetasacari María Magdalenaacua
(Jn 20.11-18)

⁹Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujanaa muetaquiaari María Magdalenaacua. Jesucujaari tarijia siete samaruhua tohuatanijioquiaari cuno Marájiniji. ¹⁰María Magdalena niqiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹María Magdalenaari nojori sequesee:

—Pueyanaa, ¡Jesu tari samiitariohua! ¡Janiya na niqiriini!

Nojoriiri María sequesano cuaracashitirii saaja.

Jesu muetasacari caapiqui na saqiriijosano pueyacia
(Lc 24.13-35)

¹²Na nuhuaji, Jesuuri socua caapiqui na pueyacia muetaquiaari nojori quiojosacari tamocora. Nojuajaari tamaatia niqishano quiqiaa nojoriria. ¹³Nojori niishishacari nojuacuaja Jesu quiqiaari, nojoriiri ritia riujiuuquiaariuhua tamasaca nojorijinijinio nojori numootenuhuara. Naajuhuj, Jesu saqiriijosano pueyari nojori pohuatasano cuaracashitirijuhuj.

Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)

¹⁴Tamacari, Jesuuri na once saqiriijosano pueyacia muetaquiaari. Nojoriiri mi-aquejajinia cajitiriqiaa jiyacari. Jesuuri jiyacari nojori juaarii cumajiuujiaaca nojori quiniuucuja. Majaari quenaaja nojori tiuuniu quiqiaari nojorijinijinio pueyacia, nojori sequesacari: “Canaa Jesu niqiriini, samiitarihuacuaaqui”. ¹⁵Na nuhuaji, Jesuuri nojori sequesee:

—Nia quiaare puetunu jiyacajinijanaa, janiyajiniji Pueyaso rupaa nia pohuatanura, puetunu nia pohuatasanoocua tiuujiaa pueyapuejanaa jiyanooshaanura. ¹⁶Cante moojinia tiuquinishiya Pueyaso rupaacua na tiuuniuucuaani, Pueyasoori na jiyatenutaniya na pueyanora. Saniniuujia, cante Pueyaso rupaacua tiuyaquiyani, nojuajaari saniitosano quiniutianiya. ¹⁷Cucua tiuujiaacari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaacui seetanu rupaaajanaa. Naacuajitij, cucua tiuunaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiya-juhuj. ¹⁸Naajuhuj, niaa jaara soconu sajtitishaare, niaa jaara casaa raatesaarejuhuj nia cusojuasaanura juucua, majaari nia cusun quiniutianiya. Naajuhuj, cusosuhucua nia niasacari nia juaashiquia, cusosuhuari naataconutaniuhua.

Jesu tacasacariuhua jiyocuacaanu na Queecua
(Lc 24.50-53)

¹⁹Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojuajaari Pueyaso miaquetajara cajiquiaariuhua. ²⁰Na nuhuaji, na saqiriijosano pueyari quiojoquiaari Pueyaso rupaa nojori pohuatanura puetunu jiyacajinijanaa. Jiyaniijia

Jesuuri pueyaracaanu nojori cumaquiriquiaa. Pueya niqitirijjaariuhua na cumaacata na pueya miiijosano, pueya niishiniuria maatia, Jesu jiyaramiquishano pueya pohu-atasanoori seetanu rupaajanaa.

LUCAS NAAJOTASANO JESUCRISTOJINIJI

Niya pohanashiyari casaara Lucas naajiotaquiaari nioni

¹ Queraatia pueyari suraatia naajionu saniniuuiuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohanataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na cotesacari. Nojoriiri na nuhuaji na rupaa pohanatanaara jiyatesaaquiaari. ³ Janiyari niishiriojoriquiaani, maniniruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. ⁴ Naacujitij, quiocuara naajiyanjijia na coteenujiniji, seetanujuanaa quia niishiniuria puetunujuanaa, taa quia niishitiojosacanucujani.

Pueyaso seru pohanatasacari Tiuquinijiona Juan rasaanutaniya

⁵ Herodes jaara jiyaniijia quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niqiuoacuajinio supueno quiquiaari. Necocua sesa quiquiaari Isabel. Cuno maajiri supuetana Aarón niqiuoacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. ⁶ Zacaríasri necocua Isabelta maninia miijiaa quiquiaari Pueyaso niqiuara. Nojoriiri puetunu Pueyaso rootasanojuanaa tojtiajaca quiquiaari, taa Pueyasojiniji caminiuujuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaa nojori quishacari. ⁷ Nojoriiri maja na muetunu quijia, niyajarua Isabel quiniucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojoua tajinia Pueyaso niqiuara Jerusalén tiacajinia. Jiyacari saniniuujia nojori poonijosacariiri quiquiaari. ⁹ Shanohua jaanutajaari catijiasaaquiaari puetunu juucajanaa Pueyaso Shuriucua Quiquojinia, Secojoua tajinia. Pueyacuara secojo naari jiitiquiaari saajia naajosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquojia tiuquiniutianiyani, shanohua jaanutaja na catijanura tii. Cuno juuca saniniuujia, saajiaari Zacaríascuara tacatequiaari. Naacujitij Zacaríasri seeratasaaquiaari tii na tiuquiniuria shanohua jaanutaja na catijanura. ¹⁰ Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹ Jiyacariitij, Pueyaso seruuri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriquirii na niquishacari Pueyaso seru. Jiyanohua na puerereeri. ¹³ Pueyaso seruuri na sequere:

—Maja puerenu Zacaríasnaa. Pueyasocujajari quia secojosano tojiqiuiaari. Quia niqiuocua Isabelri quia muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niqiuara. Nojuajaari vino ratuyashijia quiniutianiya, najatunacunio. Pueyaso Sohanuraca pueyano quiniutianiyari na rasaacarijiyujua. ¹⁶ Nojuajaari queraatia Israel pueya tacatunutiuhua nojori Jiyaniijia Pueyasoocua. ¹⁷ Nio Juanri pa Jiyaniijia pueta quiniutianiya. Nojuajaari pueyara Pueyaso sequesano caminiuujunia supuetana Elías sohanu jiitianutaniya, na cumaacanio. Naacujitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojtiaashijiaa pueya rootanutaniya maninia, Pueyaso tojtiajaca nojori quiniuria. Naacujitij, pueya jiuujiaaari jeenucuasano quiniutianiya pa Jiyaniijiaacujia.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niqiuocuaari motajajuhuj.

¹⁹ Pueyaso seruuri na riucaare:

—Janiyacuaajaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰Quiarijia saniniuuja, cua sequesanoocua quia tiyuaquiniucua, quiaari tiqia quiniutianiya. Majaari quia pocuanu quiniutianiya cuara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso panyacuajani.

²¹Jiyacaritij, pueyari Pueyaso quiquo carijiniacuma sashiriquiaa, Zacarías cuara tohuatohuara. Nojoriiri shiriqitiirii pueyaracaanu Zacarías tarishishacari Pueyaso Shuriucua Quiquiojinia. ²²Zacaríasri socua tohuatamohua. Majaari na naata pocuanu quiriquiaa. Nareja shishiniojoriqiaari. Naacuajitij, pueyari niishirii Pueyasoqui casaa niqitirii Zacarías, Pueyaso Shuriucua Quiquiojinia na quishacari.

²³Zacarías jaara puecaquiaari puetunu na poonijionu juucajanaa taa na sequesaaquiaar-icuajani, na tiajinia quiaarohuari. ²⁴Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaar-ijiaatijia cinco raca. Nojuajaari tama sequequiaarjiaaja: ²⁵“Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷Tamonu niyacocua na jiyaroreeri, cante tari sequesaaquiaaricuajani José jyanishano pueyanota na caminiuria. Na camiriqianoori supuetana jyanijia David niqiuohuacuajinio supueno pueyano quiquiaari. Niyacoo sesa quiquiaari María. ²⁸Pueyaso seruuri nocua tiuquimaa. Na sequereeri:

—Janiyari quiocua jiyarosaareni, Pueyaso shuqiritiasano niyacoona. Jiyaniija Pueyasoori quiata quiya, socua shuquiriaatia quia quiniuria tamasa maajipohuajiniji.

²⁹Maríari jyanohua tacaquiaari naa Pueyaso seru sequesacari nojuaja. Nojuajaari tamajaaja niishiriojoriqiaa: “¿Casaara naa na sequeree janiyani?” ³⁰Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. ³¹Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. ³²Nojuajaari cutara pueyano quiniutianiya. Sesojosaanutaniyari “Pueyaso Nyanu”, jiyocuacaanu Quijia Nyanu. Pa Jiyaniija Pueyasoori na jiyatenutaniya Jiyaniijarajanaa na quiniuria na supuetana David niti. ³³Israel pueya jiyaniija quiniutianiya. Pueyaracaanu jitianutaniya na pueyari. Majaari na shaajenu quiniutianiya Jiyaniija na quishacari.

³⁴Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Nyanu quiniutianiya. Nojuajaari seetanjuanaa Pueyaso tojjia quiniutianiya. ³⁶Naajuhuj, quia supuetanajinijinio motaja Isabelri neyanu ranutaniyajuhaaj. Cuno maajiiri sequesaaquiaari “niyajarua maajitia”. Naajaa, seis racaari tari na shocojiya na manajesacari. ³⁷Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸Maríari sequeree:

—Maniniacuajaqui. Maniyacuajaari cua Jiyaniija Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niqiniucua

³⁹Maríari jiyacari quiaquiaari na seconuta Judea jiyajinia, Zacarías tiajinia tamonu tiacajinia. Cuno jiyari tuhuananuharaca. ⁴⁰Zacarías tiajinia María tiuquishacari, Isabel sequereeri. ⁴¹Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiqui na cumaaca na jitianura.

⁴²Naacuajitij, Isabelri jiyacari na rupaa paaretaree. Naa María sequereeri:

—¡Pueyasocuajaari socua maninia miiriucuaa quiajaniya tamasa maajipohuajiniijil!
 ¡Maninia miiniutianiya quia niyanujaariuhual!⁴³ ¿Janiyateeri pueya tojishano maajini, cua
 Jiyaniijia nucua tiuquiniuria cua tiajinia, na niquniuria janiya? ¡Maja! Naajaa, jiyanohua
 timianijia!⁴⁴ Shusha cua tojishacari quiajaniya cua sequeyano, cua mueyari cua jiniacuma
 nuwanequequee na shuquiriniutia.⁴⁵ Shuquiriaatia quia quiri, quia tiuuniucua Pueyaso
 sequesanoocua quiajaniya.

⁴⁶Marfari sequeree:

—¡Coojia jiyanohua shuqiritiaa cua Jiyaniijia Pueyaso!⁴⁷ ¡Cua sohuanuuri cua Jiyanoo-
 nia Pueyaso timitiaani!⁴⁸ Juhua najuhuaa quijianijia. Naajaa, Pueyasoori
 cua jiyanoorii. Cua saquiriojorucuaari na tojjia cua quishacari. Quiarijiani,
 pueyari pueyaracaanu cua sequenutaniya: “Pueyaso shuqiritiasano María”.
⁴⁹¡Pueyasoori jiyanohua maninia miirii janiya! Nojuajaari puetunu cumaacara-
 cajanaa. Nojuajaari tojetaarucujanaa maninia quijia.⁵⁰ Nojuajaari pueyaracaanu
 jiyanooquiaa na tojtianaa, canapute na rerequeteyaquijiacacuajani.⁵¹ ¡Nojuajaari
 jiyanohua maninia miiquiaa na cumaacata! Nojuajaari niishijica pueya shocote-
 quiaari, canapute tama na cuaqueyajaaja jiyatequiaari juhua niishijicaracuajani.
⁵²Nojuajaari cutara jiyaniijianucua jataree, cuno pojori jiyanishano niishiyashijica
 pueya jiyatesaanura jiyaniijara nojori niti saniniuuja.⁵³ Miaajeejunucua tooti-
 jioreeri maninia sumatuuta. Puera casamiriaca pueya taanuuquiaariiri, casaaju
 nojori quiojonura.⁵⁴ Na pueya Israel naacureeri. Majaari na niyjetanu quiquiaari
 nojoriicua na taraajenu.⁵⁵ Naa miiquiaariiri taa na sequequiaari pa supuetanaacua-
 jani. Pueyasoori naa pa supuetana Abraham sequequiaari: “Seetanujanaa
 quiocua taraajenutaniyanijia, quiocuajinio supueriquiano pueyacuanio”.

⁵⁶Na nuhuaji, Marfari queraatia tarishiquiaari Isabel tiajinia. Jiuujanaraca raca nuhuaji,
 Marfari tacatequiaariuhua na tiajiniohua.

Tiuquinijiona Juan rasacari

⁵⁷Na nuhuaji, Isabel rasacari quiquiaari. Jiyapueratereeri.⁵⁸ Na shuriucua quiniaa,
 mariyata na jiyasoocujainio supueno pueyajuhual, nojoriiri jiyanohua shuquiriquiaari
 nojori tojishacari taa Pueyaso jiyanohua taraajequiaari Isabelcuani, na shuqiritiniuria
 neyanuta. Nojoriiri Isabelta shuquiriquiaarijuhuaj.⁵⁹ Nojoriiri Zacarías tiajinia rerejo-
 quiaari conaaja jitiisacari ocho juuca, na cararaatiuuquia co miatesaanura, taa Moisés
 rootaquiaaricujani. Nojoriiri na sesojonu paniriquiaa juuca Zacarías, na que sesaanucua
 na quiniuria.⁶⁰ Na nucuaari saaja sequeree:

—¡Maja! Sesojosaanutaniyano “Juan”.

⁶¹Pueyari saaja sequeree:

—¿Casaarateni? ¡Majaari quenaaja tamonu quia pueyajiniinino cuno sesaraca na quiniu
 quiquiaari! ¿Casaara naa quia sesojonu paniyarini?

⁶²Cunora, pueyari na que Zacarías shishinioree na nequesotanura taa na sesojonu
 paniriquiaa neyanuni.⁶³ Zacaríasri naajioju casaa maseree na naajionura tii neyanu
 sesarano. Naajioreeri: “Na sesa, Juan”. ¡Pueyari jiuujiatequee!⁶⁴ Jiyacaritij, Zacarías
 nitiiri sasaquitiacuhua. Juhucatecara pocuarohuari. Pueyaso miishano pohuateree
 pueya niqiaracari, na shuqiritiasacari Pueyaso.⁶⁵ Cunora, na tia shuriucua quiniaa
 pueyari jiuujiateree. Puetunu niojuanaari caminiujuushaaquiaari puetunujuanaa cuno
 Judea tuhuananuhucua quijica pueyara.⁶⁶ Puetunu nio tojtianaa pueyajanaari niishiri-
 jonuuquiaari. Tama nojoriijaarijia nequesoreetooquiaari:

—¿Casaquitijia cuno mueya quiniutianiya na nuhuajitijaj?

Pueyari niishiquiaari Pueyasoori seetanujanaa cuno mueyata quiriqiaa, na
 cumaquiniuria.

Zacarías sequesano na shuqiritiasacari Pueyaso

⁶⁷Na que Zacarías jiuujiaari jiyanohua mishaja quiriqiaa Pueyaso Sohuanuta. Pueyaso
 Sohuanuuri na pohuateree. Naaratej, Zacaríasri naa sequequiaari:

⁶⁸—¡Jiyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara
 jiyanohua shuqiritiasaaria mijiria na niniucua na pueyacua, pocuaji na

tacunura! ⁶⁹Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuaacuanucujani. ⁷⁰⁻⁷¹Tariucuaaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niqiniu paniyaquijia pueyano. ⁷²Nojuajaari sequequiaarijihuhaj, majaari na niyajetanu quiniutaniya na sequesano pa supuetanaa, pocua na taraajenura. ⁷³⁻⁷⁴Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵Nojuajaari Abraham sequequiaarijihuhaj maninia quijiaari pa jataniniutianiyaquiniaari, saaja nera pa quiniuria pueyaracaanu. ⁷⁶Quiajaniya saniniuujia, quianuniyojuanaa, quiaari sesojosaanutaniya Jiyocuaaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸¡Pa Pueyasoori jiyanhua jiyanoojial! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹Maninia pa cuhuatanutaniyari, maninia pa rucanejonura Pueyaso niquiara, panaatia poojiacata. Naacuajitij, majaari socua pa cajitiuniu quiniutaniya taraatia ninishiqui, juhua pa jamaca shuriucua.

⁸⁰Conajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujiunio coteequiaarijaatijia narta Israel pueya niquiara.

2

Jesu rasacari (Mt 1.18-25)

¹Tiuquinijiona Juan rasaanu nuhuaji, jiyaca jiyaniijijanaa César Augustoori Roma tiacajiniji sequequiaari puetunu na jiitiasano pueyapuejanaa cuaara serojosaaria puetunu nojori jiyacajinijanaa. ²Pueya jaara coteenujuanaa serojosaquiaari, Cirenio jiyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. ³Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaanuacuaani. Naaratej, Joseeri Belén tiacajinia quiaquiaariuhua. ⁵Maríari tari sequesaaquiaari nojuaja Joseeta caminiutaniya. Naaratej, Maríari nata quiaquiaarjihuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriqiaa. ⁶Belén tiacajinia nojori quishacari, jiyacari tari quiquiaari María ranu juuca. ⁷Tii jiyapuerateeri. Conaja jiuinocoquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria rucoonaa tiuquijia tiajinia.

Pueyaso seya muetasacari borrego cojuanaa pueyacua

⁸Belén tiaca shuriucua cuno niucuaaja, borregohua cojuanaari suteriquiaa cuhuariquiajinia, na seya nojori cojuasacari. ⁹Canashiyajijia Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanhua shiriiquitiurii! ¹⁰Pueyaso seruuri nojori sequeree:

—¡Maja nia puerenu! Niaacua nimiaanjia, jiyanhua maninia casaa cua pohuatanura nijaniya. Cunora, puetunu pueyajanaari shuquiriniutaniya. ¹¹¡Niaacuaji Tacunaari tari rasaanee supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. ¹²Niaa jaara nocua quiaare, niaari conaja riuratanutaniya toqueraacuacajinia jiuniosano, juyaca miaquejajinia maano. Naacuajitij, niaari niishiniutaniya, seetanujuanaari cua pohuatasano nijaniya.

¹³Jiyacaritij, narta Pueyaso seyari na cojishii. Jiyanoehua queraatia quiriquiaari. Nojoriiri naa maniniuhuaqueetariquiaa Pueyaso:

¹⁴—¡Jiyanoehua maninia pa Pueyaso, jiyocuacaanu Quijia! ¡Nojuajaari jiyanoehua pa shuquiritiasano, na jiyaronuucua jiyacua quiniaa Jiyanoonia! Naacujitij, cana Pueyaso shuquiritiaani, nojoriiri jiyanoootoonutaniya narta pueyata.

¹⁵Pueyaso seya jaara tacataquiaariuhua jiyocuacaanu na quiquiojinioehua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia nu-mooteree pajaniyacujani!

¹⁶Nojoriiri ritia quiojoquiaari. Conaaja riuriataseeri, María, Josénio. Conaajaari juyaca miaquejajinia niasano mariquiaa. ¹⁷Nojori niquishacari conaaja, nojoriiri ritia tii quiniaa pueya caminiujuriiri conaajajiniji Pueyaso seru pohuatasano nojori. ¹⁸Puetunu pueyajanaa, cante nojori pohuatasano tojiriquiaani, nojoriiri jiuujiateree. ¹⁹Majaari María niyajetanu quiquiaari puetunu nojori pohuatasanojuanaa. Noojajinia na ni-ishiriojoriquiaa pueyaracaanuuri. ²⁰Borregohua cojuanaari quiojoquiaariuhua. Nojori-iri Pueyaso maniniuhuaqueetariquiaa nojori tojishanojiniji, nojori niquishanojinijinio. Puetunujanaari naa quiquiaari taa cuno niucua Pueyaso seru pohuataree nojoriucujani.

Conaaja Jesu pasacari Pueyaso Secojoua tiajinia, Pueyasora jiyatesocoriquiano

²¹María conaaja jaara ocho juucajiitiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarijia.

²²Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quniuria Pueyaso niqiuara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quniuria. ²³Na queyari naa miqiuaritij, tariucuacaanu Pueyaso Rupaajinia naajiotasano tojtijajaca nojori quiniuucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. ²⁴Naaratej nojoriiri quiaaree na seru mosaanura nojoriicua Pueyaso Secojoua tiajinia, juhua jeequesano nojori quniuria Pueyaso niqiuara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinijia”.

²⁵Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia mijia quiquiaari Pueyaso niqiuara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacujaji Tacuriquiano. Nojuajaari Pueyaso Sohuanu jiitijaja. ²⁶Pueyaso Sohuanuuri na niishitiquiaari majaari na shaajenu quiniutianiya nojuaja cuaara niqiri Cristojatiija, Pueyaso jiyarosaariquiano. ²⁷Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacujitij, Jesu jaara pasaaquiaari Secojoua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. ²⁸Simeónri Jesu paree. Na cacanuureeri. Naa Pueyaso sequeree jiyanoehua na shuquiriniutiaari:

²⁹—¡Cua Jiyaniijianaa, tariucuaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajaari tari cua niqitirii tarijia quia sequesano janiya, quia seru cua quiniuucua. ³⁰Tari niquirii quia Jiyarosanocujaniija, canaacujaji Tacuriquiano. ³¹Nojuajaari quia niqitiosano puetunu jiyacajinia quiniaa pueyapueecuarajanaa. ³²Nojuajaari puetunu taucuaca jiuujijajanaa kuhu-atanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritiasano quiniutianiya na seera.

³³Jesu que, na nucujuhuj, nojoriiri jiuujiateree naa Simeón sequesacari conaajajiniji.

³⁴Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia nijaniya.

Jesu nucua María sequereejariuhuj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na mi-iniuucua, pueyari na naata Pueyaso niishiniu maninia. Naajaa, queraatia pueyari na ruuretanutianiya saaja. ³⁵ Naacuajitij, tama pueya niishiriojosano noojiacajiniajaarijia niishishaanutianiya. Quiara saniniuujia, jiyanoehua taraatiaari quiniutianiya. Quoiojaari juhua mueruuta tohuariquitiishaanutianiya quia mueyacia quia miishacari.

³⁶ Cuniqijia, Pueyaso Secojoja tiajiniani, tamonu motajaari tii quiriqiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquiohuacuajinio supueno maaji quiquiaari. Jiyanoehua motaja quiquiaari. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoja tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secosacari pueyaracaanu. ³⁸ Simeón pocuasacarijia, jiyacaritij, Anaari nocua nimia. Na niquishacari conaja Jesu, Anaari noojiajinia niishiquiaari cante nojuajani. Cunora, Pueyaso sequeere na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijia pueya niquiaari. Nojori sequeere:

—¡Niocuajaari pa sashishano pa pueyacuaji Tacuriquiano!

Na queya tacartasacariuhua conaja Nazaret tiacajiniohua

³⁹ Jesu queyari puetunu Moisés naajioneejinia Pueyaso rootasanojuanaa tucataquiaari na conajara. Na nuhuaji, nojoriiri Galilea jiyajinia tacatequiaariuhua tama nojori tiacajiniohuajaaja, Nazaret tiacajinia. ⁴⁰ Naatujua Jesuuri maashiquiaari. Socua cumuecara quiquiaari, maninia niishijiaranio. Pueyasoori jiyanoehua na naacujua.

Mashajaniyoja Jesu quishacari Pueyaso Secojoja tiajinia

⁴¹ Puetunu marijarajanaa, Jesu queyari quiojoquiaari Nazaret tiacajiniji, Jerusalén tiacajiniana, Pascua juacajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jitiqiaaricuajani puetunu marijarajanaa. ⁴³ Queranacunuuna jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriqiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhuajaniya rucuaneree puetunu cuno juucajanaa. Cuno niucuaja, nojoriiri Jesu pajequiaari nojori pueya tajinia, nojori niishishano pueya tajiniano. ⁴⁵ Shaaqui quiriqiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojoja tiajinia, Moisés Rootasanojiniji niishitiojonaa pueya tajinia cajiyano. Nojori tojiriqiaari. Nojori nequesoretariquiaaariuhuj. ⁴⁷ Puetunu pueyajanaa, canapete na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori rihuaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriqitiuquiaari. Na nucuaari na sequeere:

—¿Quyanuaa, ¿casaara naa quia miiri canaani? ¡Janiyari quia queta quia pajeriquiaani jiyanoehua canaa tacaaniutia quiocua!

⁴⁹ Jesuuri na riucaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoja tiajinia quiniucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijara

quiquiaariijaariuhuj. Pueyaso shuquiritiasano quiquiaariiri. Puetunu pueyajanaari na shuquiritiaquiaarijuhuaj.

3

Tiuquinijiona Juan pohuatasacari Pueyaso rupaa cariquia jiyajinia

(Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijaari tari shocojoquiaari César Tiberio, jiyaniijijanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisiansri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucua César Tiberio jiyatesano quiquiaari cuno jiyacajinia. ² Jiyacaritij, Anásri Caifásta Judiucuaacuara secोजना jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pohuataquiaaritij:

—¡Nioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

⁴ Naacuajitij, supuetana Isafás naajiotasanoori tohuateequiaari. Pueyaso sequenu panishano caminiujinua na quiniucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria! ⁵ ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhujanaa cuaara jiuuroosaaria jacananu na nuu quiniuria! ¡Shuyorocotunu nuu cuaara pocuareesaaria! ¡Puetunu surocoshiquiajanaa cuaara mishiquiojosaaria jacananu na nuu quiniuria! ⁶ Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’”.

Naa miriqui Isafás naajiotasanoni, cunoori pueya numooteriquiaa juhuacarijia nojori jeenucuanura nojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanohua Pueyaso saniitionu panishacari nijaniyani? ⁸ ¡Maninia miijiara nia quiri, canaa niishinuria niaari seetanujanaa niojiaca tacatoree sesa nia miiniujiniji! ¡Majaari najuhua tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenucua”! ¡Nia niishiri, Pueyaso jaara paniri, nojuajaari na naata nio sajiniji shipinini Abraham niqiuohuarajuhuj! ⁹ ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijiasocoriquiano. Naajuhuj, nijaniyari juhua sesa muetuna naana, maninia miyashijia nia quishacari. ¡Niaari quera saniitioshiyacujaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riuacuaree:

—Cante querajaqueya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanoojunucua.

¹² Roma tiacajinia quijia jiyaniijijanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijiaataj, casaa canaa miyarinijia?

¹³ Juanri nojori riuacuaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riuacuaree:

—Niaacuajaari pucootajaraca. Naajaa, majaari pueya casami nia jaariutianu, nojori nia miananajonuta, nojoriicuara nia tonujusacarijuhua nia sapojonuta. Juhujaniya nia quiri saaja nia jiyaniijia niqutiosano cumaneecata.

¹⁵ Pueyari jiyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. ¹⁶ Nocujaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohanu tiuquinijionutaniya nioojiajinia, na cumaaca nia jiitianura, seetanujuanaa maninia mijia nia quiniuria! ¡Nojuajaari juhua manitia nia saniniujuuniutianiyajuhuj, maninia jiuujjaraca nia quiniuria! ¡Nojuajaari socua jiyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuuja na jajau na racatasocoriquiano tiajiniaaco. Naajuhuj, cuno pueyanoori tari niya quiya na pueya na saquiriojonura na tojiyashijaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuuja! ¡Nojoriiri jatasaanutaniya maninjial! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niqiara. Maninia rupaari, na tojitijaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹ Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinuu quiquiaari saaja. Jiyaniijia Herodesri socua queraatia sesa casaa mijia quiquiaari. ²⁰ Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniiaari.

Jesu tiuquinishacari moojinia

(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secojoriquiaari. Jiyacariniji, jiya cajiniocuari riatequee. ²² Pueyaso Sohanuuri Jesuucua roseyaree juhua mococoonu niquishano. Jiyocuaaanuji, Pueyaso rupaari tojishaaree sequeyano:

—¡Quiaacuajaari cua panishano quianuniyojua! ¡Jiyanohua quia shuquiritiaanjia!

Jesu supuetanaa sesaca

(Mt 1.1-17)

²³ Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatiasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatiasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melqui niyanu quiquiaari. Melquiiri Adi

niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyacari cariquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucaaree:

—Pueyaso Rupaajiniacuajaari naa naajiotasano quiya:

“Pueyanoori maja saminiio na quiniu saa miaquesanotaja. Seetanujuanaa saminiio quiyari na tojihacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanojia tuhuananuucua. Sesaacaari ritia niqitiriji Jesu puetunu mijiria jiyacajanaa. ⁶ Jesu sequereeri:

—Janiya quia niqitionutaniya puetunu nio jiyaca jiyaniijianucua cumaacajanaani, maninia jiyaniijajanaa quia quiniuria mijiria. Janiyari puetunu nio jiyacajanaa niqitiosaaquiaarini. Naacuajitij, janiyari cumaaca niqitioquiaani cana cua niqitionu paniyacuajani, jiyaniijjara na quiniuria. ⁷ Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojojua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri.

¹⁰ Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹ Nojoriiri quia quianutaniya, saajiaacua quia jiriataaquiniucuaaji”.

¹² Jesuuri na riucaaree saaja:

—Naa naajiotasano quiyajaariuhua Pueyaso Rupaajinia:
 “Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu pucaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacariri-aari.

Jesu coteesacari na poonijiosano miiniu Galilea jiyajinia
 (Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutioquiaari.

¹⁵ Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia
 (Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucujani. Nojuajaari nujuaquiaari Pueyaso Rupaa serojonura pueya niquiara.

¹⁷ Pueyari na niqutioree tariucuaaanu Pueyaso sequesano caminiujiunia Isafas naajioneer jiuucosano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacujani:

¹⁸ “Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niqijiara nojori quiniuhua. Cua jiyaroreejaariuhua taraatia mitiasusano pueya cua jyatenu shuquiriaatia quijiacara. ¹⁹ Cua jiyaroreejaariuhua cua pohuatanura pueya niquiara, quarijiaari Jiyaniijia Pueyaso jiyanooshacari pueya”.

²⁰ Na serojonu nuhuaji, Jesuuri naajioneer jiuucorohua. Na niqutiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niquiara.

²² Puetunu pueyajanaari jiuujiatereer shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojoriijaarijia nequesoree-tooriquiaa:

—¿Majate nio pueyano José niyanucuaaja, niya pa tiacajinia maashinotej?

²³ Jesuuri nojori sequereer:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniajaajani, taa nia tojiquianucuaaja cua miishanojiniji Capernaum tiacajiniacuaani.

²⁴ Jesuuri socua sequereer:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniajaaja. ²⁵ Supuetana Elías quishacari, queraatia mashiquioopueeri quiquiaari Israel jiyajinia. Jiyanohua miaajesacari quiquiaari-iri maru niyaquishacari pueyaracaanu. Jiuujianaraca marijiaari shocojoquiaari socua seis racanio, maru niyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasocua tiuujia, cuno taatu miaquesanoori maja na pueetanu quiquiaari nojoriria. ²⁷ Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja

tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

²⁸Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanoohua juaaquioree. ²⁹Nojoriiri saneecuatuquee. Jesu caponeeturee nojori tiacajiniijiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricujani. Nojoriiri na capotunu paniriquiaa juucua tacobiyaji naa na monura. ³⁰Jesuuri saaja nojori tajiniaaco canujuquiaari juhuajaniya. Quiniqiji tamocora quiaareeri.

Samaruraca pueyanojiniji pohuatasano
(Mr 1.21-28)

³¹Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³²Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

³³Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoohua nacareeri:

³⁴—¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacujaniijia, cante quiajaniyani! ¡Quiaacuajari sesa miyashijia Pueyaso Niyanu!

³⁵Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶Puetunu pueyajanaari shiriiquituri. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoohua cumaacaraca! ¡Cunora samaruhua tohuataniriiri!

³⁷Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

Jesu naatanishacari Simón Pedro reyarucua
(Mt 8.14-15; Mr 1.29-31)

³⁸Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jiyanoohua naseeca matariquiaa. Pueyari Jesu sequeree na naataniniuria. ³⁹Jesuuri cusosu caco nujuasee. Jesuuri na naseeca cusunu jiyaree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuaacujanaa. Nojoriiri queraatia tamaatia cusunu jiitiaquiaari. Jiyacari na naatanijioree puetunujuanaari. ⁴¹Naajuhua, queraatia samaruhuari tohuareetaquiaari cusosuhujiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujua tiajiniaqueya
(Mr 1.35-39)

⁴²Tariquicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooni paninya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paninya tamonu tiacajiniajanihuahaj. Janiyacuajaari cunora jiyarosaaquiaarini.

⁴⁴ Naacujitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

5

Sapitiaajara jaquerootanaa shiriiquitiushacari
(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoohua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuaara bote juariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

⁶ Nojori jaara socua na shiyaruhua jartaquiaariuhua, jjiyanohua queraatia sapitiaaja ritiatureeri! Shiyaruhuari sureequetanu coteequiaari. ⁷ Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoririatej, Jesuucuaa mojoquetareeri. Jesu sequereeri:

—¡Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

⁹ Simónri shiriiquirii, jiyanoohua queraatia sapitiaaja nojori quiasacari. Nata quiniaa pueyari shiriiquitiuriijihuahaj. ¹⁰ Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequereeri miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujaquiaari Jesuta nojori quiojonura.

Jesu naatanishacari lepraraca cusosu
(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiriirinij. Quia naataniniu paniyanijia. Quia cuaqueya cuaara jeequehuara.

Naa na sequesacaritij, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara seconanaa jiyaniijia quia niquitishii quia cuaqueya, na cartenuhuara quiajaninya, pueya tajinia quia rucuanefonuhua juhuajaninya. Naajuhuj, quia seru quia niquitiosee Pueyasooocua catijasocoriquiano. Naa quia miiri taa Moisés rootaaciaar-icuaajani, puetunu pueyjanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanoohua socua tamaquicua caminiujiushaaquiaari pueya niquiara. Naaratej, jiyanoohua queraatia pueyari nocua nijioquiaari na tojinuria, mariyata Jesu naatanijionura nojori, nojori cusonujiniji. ¹⁶ Jesuuri saaja pueya

quiyaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu
(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquiaa. Na tojtianaa tajinia cajitiuriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijjianaa, Judea jiya tiacajiniji, Jerusalén tiacajinijinio. Jesuuri jiyanohua Pueyaso cumaaca jiitariquiaa cusosuhua na naatani-jionura. ¹⁸ Jiyacaritij, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. ¹⁹ Puera queraatia pueya rejesacari tohuateyaji, majaari na naata cusosu tiuquiniti-asaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree huhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojonaa, mariyata Fariseocua-caari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooniu sesa na miishanojiniji! ¡Saaja Pueyaso cutaraari na naata pa jiyanooniu!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? ²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetejaariuhua sequenura: “Quia sanere. Quia rucuanere”? ²⁴ Cunora, janiyari quiarijia nia niishitiniutianiyani, janiyari mijiria jiyarosaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

²⁵ Jiyacaritij, pueyanoori sanequee nojori niquiara. Na tiajinia pataarohua na matu-uri. Shuquiriaatia quiariquiohua na tiajiniohuari Pueyaso na maniniuhuaqueetanuta. ²⁶ Puetunu pueyajaari shiriiquitiurii. Nojoriiri Pueyaso maniniuhuaqueetariquiaa cuno maninia casaa nojori niquiniucua. Nojoriiri na puerenuta naa sequetquiaarijiuhujaj:

—¡Paari quiarijia jiyanohua maninia miishano niquiriini! ¡Nocuaji jiuujiatesano!

Jesu sequesacari Leví, na pueyano na quiniuria
(Mt 9.9-13; Mr 2.13-17)

²⁷ Nio nuhuaji, Jesuuri tohuatequiaari. Tamonu pueyano niquiriiri jiyaniijajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiitiasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jiyanohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhujaj. Nojoritia miaquejajinia cajitiuriquiaari, socua tamasa pueyano. ³⁰ Moisés Rootasanojiniji niishitiojonaa, mariyata narta Fariseocua-caari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacarta-jacataajajanio? Nojoriiri pa paraa sequera cumaneeca masejonaa.

³¹ Jesuuri nojori riucaaree:

—Cante na cuaqueya jiyaniyani nojuaja maja cusosu na quiniu, nojuajaari maja naara-jona na paniniu. Cusosuhua cutaraari naarajona paniya. ³² Naajuhujaj, majaari mijiria

cua niniu quiquiaari maninia miiijia pueyacua. Niquiaari cutaranijia sesa miiijaca cua tacatonuhua Pueyasocua, maninia miiijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

³³ Pueyari Jesu sequeree:

—Tiuquinijiona Juan pueya cutaraari sequeyarucua miaqueyaquiuaa. Nojoriiri naa Pueyaso secojoquiaa pueyaracaanu. Fariseocuaaari naa miiquiaajuhua. Quia pueya saniniuujia, saaja miaquequiaari, ratuquiaari. ¿Casaarateni?

³⁴ Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhua, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niquiaara pohuataquiaari nio miriqui sequesano:

—Majaari pueyano miatenu quijia na toque quiariquijiniji, na toque quiariqui sesoyari. Quiarinio toquerauri sesoshiyajuhua, toque mocuajinia na posequesacari. Cua rupaari naajuhua, juhua quiarinio toque. ³⁷ Naajuhua, majaari na naata quiarinia uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhua niitiashiya. Shoqueeri najuhua sesoshiyajuhua. ³⁸ Naaratej, maninia cutaraari quiarinia uva caaca shuuqionu shoque quiariquiojinia, maja vino niitiasaanuucua, na quiquio shoquenio. Naajuhua, nia niishitijosanoori juhua tariucuaco shoque. ³⁹ Naajuhua, pueyano jaara vino tariucuanacu ratujua quir, majaari na paniniu quiarinia vino. Sequeyari: “Tariucuanacuuri maniniacua”. Naajuhua, majaari cua niishitijosano nia paniniu, quiarinio na quiniucua.

Jesu pueya carojotasacari trigo samaatenu juuca

(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuquiojoriquiaa na corequetanura. Na nuhuaji, na jajau miojonuuriquiaari. ² Fariseocuaaari na niquitariquiaa. Nojoriiri Jesu pueya juarii:

—¿Casaara nia tojitiaquiya Moisés Rootasanoni, taa na sequequiaaricujani maja pa poonijonura samaatenu juuca?

³ Jesuuri nojori riucuaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijuhua? ⁴ Nojujaari Pueyaso Secojoua tiajinia tiuquiuaari. Pueyasora niojosano pan pooquiaari. Na sareeri. Mariyata nata quiniaa niqutiojoreeri nojori sanurajuhua. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juuanu quiquiaari naa David miiniucua.

⁵ Jesuuri socua cuno Fariseocuaa sequequiaari:

—Janiyacuajaari Pueyaso Jiyarosononi. Jiyaniijara jiyatesaaquiarinijia cua sequenura casaate samaatenu juuca miishiyani, Pueyaso pa shuquiritiniuria.

Jesu jeeacasacari pueyano juaashiquia, cuseetuajuara joojequetano

(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojoua tiajinia tiuquiuaari. Tii niishitiojoriquiaari. Quiniqui quiriquiaari pueyano, cuseetuajuara joojequetano na

juaashiquia miaquetajara. ⁷ Moisés Rootasanojiniji niishitiojona, mariyata Fariseocua-caari Jesu shanacutariquiaa. Nocuara tonujunu paniriquiaari Jesu jaara cuseetucoujara joojequetano juaashiquiaraca pueyano jecare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucouja pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. ⁹ Jesuuri nocuara tonujunu panijiaa pueya sequeree:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niqinijioree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! ¹¹ Cuno pueyari jiyanhua juaaquioree naa Jesu miishacaritij. Nojoriiri naa pocojoquiaari tamajaaja: “¿Taa pa miiniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano

(Mt 10.1-4; Mr 3.13-19)

¹² Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojitiyajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijiuhua “Pedro”. Simón tarajanu Andrésri saquiriojosaaquiaarijiuhuj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónmio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaaquiaarijiuhuj, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya

(Mt 4.23-25)

¹⁷ Na nuhuaji, Jesuuri tuhuananujiniji rosetaquiaariuhua na saquiriojosano pueyata, jamatujiniara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanhua queraatia pueyari tii quiriquiaa puetunu Judea jiyajinijinio, Jerusalén tiacajinijinojuhaj, shoniniacu caminia shuriuquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijiosaanurajuhuj. Jesuuri nojori naatanijioree. ¹⁸ Naajuhuj, taraatia samaruhua miishano pueyari naatanijiosaaquiaarijiuhuj. ¹⁹ Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanhua poonijoriquiaa. Naaratej, puetunu pueyajanaari naatanijosaaquiaa, saaja nojori quiasacari nojuaja.

Jesu pohuatasano shuquiriatia quijiajiniji, taraatia quijiajinijino

(Mt 5.1-12)

²⁰ Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara niishiriquia nioojia saaja sesa miijia. Niaa jaara niishiri nioojia naa quiyatej, niaari Pueyaso jiiitasano pueya quiniutianiya.

²¹ Niaari Pueyaso shuquiritasano, niaa jaara maninia miijia quiniuucua jiaatiaa, taa miaajeyano pueyano miaquesanoocua jiaatiaacuani. Niaa jaara naa quiniuucua jiaatiaa, Pueyasocujaaari nia jataniniutianiya maninia quijiaari nia quiniuria.

Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutianiya nia shuquiriniutia, niaa jaara jiyanooshaarohua.

²² Niaari Pueyaso shuquiritasano, pueya jaara nia niqiniu paniaquiri, pueya jaara nia taanuure, pueya jaara nia macaati, pueya jaara nia soore cua tojitiyajaca nia quishacari.

²³ Níaa jaara naa miishaaretej, jiyanoohua nia timiri. Níaa jaacuatatare nia shuquiriniutia. Níaa jaara naa nia miishacari rejeretajaca quiri, Pueyasoori nia niishishoo casaa racatasano jiitiaa jiyocuaaanu, na niqutiosocoriquiano nijaniya. Níaa paraa supuetanaari naa taraatia miiquiaari tariucuaaanu Pueyaso sequenu panishano caminiujiuniaa pueyajuhua.

²⁴ Níaaari saniniujia taraatia quijiaa quiniutianiya, jamuejaca casamiriaca pueyanaa. Níaacuaajari tari shuquiriaatia quiqianu, puetunu nia panishanojuanaa nia jiitiasacari.

²⁵ "Taraatia quijiaacari nijaniya, cante sequejani: "Janiyacuaaja maninia pueyanoni. JJaniyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, níaaari niishiniutianiya níaaari saaja sesoriquia pueya seque.

"Taraatia quijiaacari nijaniyajuhua, jeya nia quiyacuishacari Pueyasora, saaja tamaaja shuquiriaatia nia quiniuria nia cojesacari pueyaracaanu. Níaaari na nuhuaji sapuenu-taniya Pueyasooju nia quishacari pueyaracaanu.

²⁶ "Taraatia quijiaacari nijaniya, puetunu pueyajanaa jaara maninia pohuataquiaa nijaniyajiniji, maninia nia kojiniuucua cuno pueya, Pueyaso tojiyashijaca pueyani. Cuno pojori supuetanaacuaajari naa shuquiritiaquiaari cuno sapojonuujuaa, canapuate maja seetanujuanaa Pueyaso sequesano caminiujiuniaa quiquiaaricuaani.

Pa paraa panijiaa pa quirij

(Mt 5.38-48; 7.12)

²⁷ Níajaniya, cante niya cua tojtiaacuaajani, cua tojitiuri. jNíaa paraa nia paniri! Maninia nia miiri nia niqiniu paniyashijia pueya. ²⁸ Saaja maninia nia riuquare nia juayano pueyano. Sesa nia miijiaa pueyacuara nia secojore Pueyaso. ²⁹ Pueyano jaara quia masesa piri, quia jiyanoori nojuaja. Jaara taquijiria pirijuhua, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojiqui quia niqutiorejuhuaj. ³⁰ Pueyano jaara quia sequere quia casamijiniji quia niqutionura nojuaja, quia niqutiore nareja. Pueyano jaara quia casaa jaariutiare, majaari na sequenu: "Cua niqutionorohua". ³¹ Maninia nia miiri tamasaca, taa nia paniquiaa tamasaca miiniuria nijaniyacuaani.

³² Níaa jaara saaja nia panijiaa paniriquia, majaari nia jyaniniu Pueyasoori nia shuqiritiaa naa nia miishacari. Sesa miijiaa pueyari naa paniquiaa nojori panijia-cajuhuaj. ³³ Maja puera maninia mijia nijaniya, níaa jaara maninia miiquiaa saaja noo pojori, canapuate maninia miiquiaa nijaniyacuaani. Sesa miijiaa pueyari naa maninia miiniu niishiquiaajuhua, noo pojori canapuate maninia miiquiaa nojoricuaani.

³⁴ Maja puera maninia mijia nijaniya, níaa jaara nia masena niqutioquiaa na panishano, nia niishishacari nojuaja ritia niqutionutaniuhua nijaniyajiniji na masesano casaa. Sesa miijiaa pueyari na casaa rupaquijiaa niqutioquiaa narta sesa mijia pueyajuhua, na niishishacari nojori ritia niqutionutaniuhua nojori masesano casaa rupaquijiaa.

³⁵ Níaa paniri nia paraa. Maninia nia miiri nojori. Níaa casami nia niqutiore nareja, pueya jaara na paniya rupaquijiaa. Majaari nia taraajenu cuno pueyano jaara nia niqutioyaquiriohua nia casaa. Naa nia miishacaritij, níaaari seetanujuanaa Jiyocuaaanu Quijia muerasu. Pueyasoori socua jiyanoohua queraatia nia niqutionutaniya tamasaca nia niqutiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miijiaa pueya, mariyata canapuate na sequeyashijiacani "paacarasho". ³⁶ Naaratej, jiyanootio nia quiri, taa nia Que Pueyasocuaani, jiyanoofia.

Maja sesa nia niishiriojonu niarta pueyanoocuaa

(Mt 7.1-5)

³⁷ Maja nia rimiaaquenu tamasacaacuara, Pueyaso mariqui saniniujia nia jyanoy-aquiriiri. Níaa jaara tamasacaacuara tonujiyashijia quiri, naajuhua, Pueyasoori maja na saneenu quiniutianiya sesa nia miishanojuhuaj. Níaa jaara jiyanootio quiri, Pueyasoori nia jiyanooniutianiyaacuahuaj. ³⁸ Níaa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusanu, jiu-uquutiasano, maninia quianujanano, mishaja quera niitiyano. Pueyasoori mariyata juhua nia shanacutajajiniya niqutionutaniya nijaniya, taamueca shanacutajajinia nia niqutioquiaa pueyacuani.

³⁹ Jesuuri socua niishitiojoquiaari pueya, nio miriqui sequesanaota:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

⁴¹ ¿Casaara nia niquiya rucucua maano quia tarajanu namijiajiniani, niaa jaara puereetuca maca jiitiaa tama nia namijiajiniajaaja? ⁴² Niaa jaara puereetuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

Naanaari niishishano na jajaujiniji

(Mt 7.17-20; 12.34-35)

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴ Puetunu naanajanaari maninia niishishano na muetusanoiniji. Majaari pa naata satuna carojonu shuunajiniji. Naajuhuj, majaari pa naata tuhuaracona carojotanu saarianajiniji. ⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinjinio

(Mt 7.24-27)

⁴⁶ ¿Casaara nia sequequiaa janiyani, “Cua jiyaniijanaa, cua jiyaniijanaa”, niaa jaara cua rootasano tojtiaaquiquiaa? ⁴⁷⁻⁴⁸ Cua tojiri. Cante cua rupuenara quirri cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanhua cajiquiaari cuno tiaacua. Naajaa, majaari na mueturujutanu quiquiaari, maninia nujuatejosano na morijiuucua quishacari cumueeca jiyajinia. ⁴⁹ Saniniuujia, cante najuhuaa cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanhua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunjuanaa.

7

Jesu naatanishacari Romano capitán seru

(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiaacajiniaari. ² Romano soldadohua capitánri quiniqui quiquiaari. Jiyanhua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuuara niiria nocua na seru na naataniniuria. ⁴ Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanhua, nojoritia na quianura. Nojoriiri Jesu sequeere:

—Cuno Romano capitánri canaa jiyaroreeni, ¡nojuajaari jiyanhua maninia pueyano! ¡Quenaaja quia miiri na panishano! ⁵ Nojuajaari parta Judiocuaca panijia. ¡Nojuacuajaari Pueyaso secojojuatiatequiaari canaara tama na cumaneecatajaaja!

⁶ Naacuajitij, Jesuuri nojoritia quiaquiaari capitán tiajinia. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijanaa, capitán naa sequeya: “Cua Jiyaniijanaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia.

⁷ Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸ Janiyari niishiyajaanuuhuj, cuno cusunuri quia tojiniutianiya taa cua tojiquiaa cua jiyaniijianucuacuani. Janiyari cua jiyaramiquishano soldadohua jiitiaajuhuj. Janiya jaara tamonu sequereni, 'Quia quiaare', nojuajaari quiaqueequiaa. Janiya jaara tamonu sequereni, 'Miji', ritia nimiaquiaari. Janiya jaara cua seru sequereni casaa na miiniuria, ritia na miyari. Niishyanijia quiaari jiyano cumaacaracajuhuj".

⁹ Jesu tojishacari cuno pojori caminiujiushano capitán sequesano, Jesuuri jiuujateree. Jesuuri na nuhujiniaa pueya niquinijoree. Nojori sequereeri:

—Seetanujuanaa nia sequeyanijia, puetunu parta Israel pueyajinijuanaani, ¡majaari quenaaja cua niquiniu quiqianu Pueyasocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tajiniuhua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhuj, socua queraatia tamasaca pueyano. ¹² Nojori catecanosacari Naín tiacaacua, Jesuuri pueya niquiquiaari macu pataano jamoscoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. ¹³ Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: "¡Quia sanere!"

¹⁵ ¡Macuuri cajiquii! Juhucatecara pocuareeri. Jesuuri na nucuaacua na jaatucuree.

¹⁶ Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanohua cumaacaraca!

Nojoriiri naa sequetureejuhuj:

—¡Pueyasoori shusha quiarijia na saquiriojosano Israel pueya niishiriohuacuuhuj, na cumaquiniuria pajaniya!

¹⁷ Jesujiniji pueya pohuatasanoori caminiujiushaquiaari puetunu Judiocuaca jiyajinijanaa, mariyata puetunu na shocuaqueya jiyacajinijanaano.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: "¿Quiaate setanujuanaa Pueyaso Jiyarosano, tariucuaanu sequesano niriquianotej, tamonu sashishiyajaara soj?"

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: "¿Quiaatena Cristo, Pueyasojiniji niriquianotej, canaate tamonu sashiyajaara soj?"

²¹ Nojori tiuquijiosacari Jesuucua, jiyacaritij, Jesuuri queraatia pueya naatanijoree nojori niquiara; cusosuhua, pueyaracaanu nootonejaca, samaruhuaraca pueyano. Mariyata queraatia cariojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequereeri:

—Nia quiaarohua. Tiuquinijiona Juan nia pohuatasuhua taa nia niquiriicujani, nia tojishanonio. Nia sequesuhuanoj: "Cariojuarujuriiri niquijiacara quiriohua. Shipiniujujiuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojjiacara quiriohua. Macunucuaari

samiitianijiosaarohua. Casamiijiuniucua pueyari Pueyaso rupaa pohuatasaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niqiniucua nia quiojocanu cariiquia jiyajiniani? ¿Niaate noojia niqijioiteja niqiniucua quiojocanu? ¿Tiuquinijiona Juante juhua paratu piyarojosano naajua jiyareta na tacarajosano? Majaruhua. ²⁵ ¿Casaa niqiniucua nia quiojocanunitioj? ¿Niaate maniniuqui toque cushijia niqiniucua quiojocanu? Niaacuajaari niishiya, shanohua toqueya cushiyonuujuaaari saaja jiyaniijianucua tijajinia quiyano niquishano. Nojoriiri tama na panishanojuaaja miijiaa. ²⁶ ¿Taateerinitioj? ¿Casaa niqiniucua nia quiojocanuurini? ¿Pueyaso sequenu panishano caminiujuniatae quiquianu? Taaquiriririni. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujuniataejijianaa. ²⁷ Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaritij:

“Cua sequenu panishano caminiujuriquiano jiyaroyanjia, na puetanura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujuniamia-jiniijiojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasa, nojuajaari socua cutara pueyano Tiuquinijiona Juanjiniji.

²⁹ Puetunu pueyajanaa, mariyata cumaneeca masejonaa Roma tiacajinia quijia jiyani-ijiarani, nojoriiri niishiquianu Tiuquinijiona Juan pohuatasano Pueyasojinijiiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijosaacanu.

³⁰ Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquini-jiosaanu quiquianu, nojori seetanuucua nojoriiri sesa miijiacajuhua. Nojoriiri Pueyaso miiniu panishano nojoriiria soocanu saaja. Naacuajitij, majaari nojori jiyanooshaanu quiquianu.

³¹ Jesuuri socua sequeree:

—¿Quiarjia nio pa quishacari pueyarjiataj? ³² Nojoriiri juhua naatujoori, na tacuarishijionu panishacari, na cajitiushacari tiaca jiuujijajinia cajitiucuaa curotasanojinia. Nojoriiri narta naatujooriicua naca: “Canaari juucua naajua jonenejijiani. Majaari nia nianujunu paniniu. Canaari taraatia jaaquequejosano jaaquequejijiani. Majaari nia sapuenu paniniuujuhua”. ³³ Naajuhua pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhua. Cunora niaari cua sequequiaa: “Cunoori sacuarataa miaquejoru, ratunu porocuanio, sesa miijiaa rupueja sacuarataa, mariyata pa soosano cumaneeca masejonaa rupuanio”. Naa nia sequesacartij, niaari cua tojitiaaquiyajacuhua. ³⁵ Naajaa, pueya jaara canaa pohuatasano tojijiaa quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojijiaa jatasacari maninia quijiacara.

Jesu miaquesacari Fariseo Simón tijajinia

³⁶ Tamonu Fariseo pueyanoori Jesu masuquiaari na tijajinia na miaquenura. Jesuuri na tijajinia quiaaree. Miaquenuujua shuriquiumia roshishiiri. ³⁷ Paanatuuri cuno tiacajinia quijia quiquiaari. Na niishishacari Jesuuri cuno Fariseo tijajinia tiuquirii miaquenura, nojuajaari cuno tijajinia quiquiaarijuhuaj. Shiitaniyojua seesariquijaja pataconiyojua cacatariquiaari, cohuaja saajijiniiji quejasano. Mishaja quiriquiaari shanohua jaanuta-jata. ³⁸ Maajiiri Jesu cashacuucuma mojuquetasee. Nujuqueriquiaari. Na namijiaacaari Jesu niohuacaacia totejoriquiaa. Naa Jesu niohuaca piquiojoreeri. Na nuhuaji, na

muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquishacari naa cuno maaji miishanotej, noojajinia niishiriojoriquiaari: “Jesu jaara seetanujuanaa Pueyaso sequenu panishano caminiujunia quiri, mariqui niishiri cante na coyani, taamueca maajitijiano-joni”. ⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

⁴¹ Jesuuri na sequere:

—Caapiqui pueyanoori cumaneeca masequiaari rupaquijjara tamonu cumaneeca niquitiojanajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano. ⁴² Na nuhuaji, nojori sequesano juuca jaara tari quiquiaari na camaru nojori niquitiohuara na cumaneeca, majaari nojori jiitianu quiquiaari cumaneeca. Naaratej, cumaneeca niquitiojonaari nojori sequere: “Naajaa, maja socua nia niishiriojonu nia niquitiohuara tarijia cua niquitiosano cumaneeca nijajaniya”. Cumaneeca niquitiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niquitiojona panijjara quiniutianiyani?

⁴³ Simónri Jesu riucuaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequere:

—Taaquiririnj.

⁴⁴ Jiyacaritij, Jesuuri cuno maajicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niquitio quirii mohuaca janiya, cua niohuaca cua jeequetajara. Nio maaji cutaraari cua niohuaca jeequere na namijiaacata. Na sacuanijiarohua na muecacataari. ⁴⁵ Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. ⁴⁶ Naajuhuj, majaari quia totanu quirii muesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiri jiyanhua sesa miijia quiriquiaa. Naaratej, jiyanhua cua paniyari puetunu sesa na miishanojinijijianaa cua jiyanooniuucua nojuaja. Saniniujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequere:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiyanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequere saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

8

Jesura pueraquena maajipohuajiniji pohuatasano

¹ Na nuhuaji, Jesuuri rucuanajoquiaari queraatia tiacajinia, shiitianiyojua tiacajinia-juhuaj. Nojuajaari tii Pueyaso rupaa pohuatariquiaa, taa Pueyaso jiitianu paniya na muerasuni. Na doce saquiriojosano pueyari na cojiriquiaajaacuhuj. ² Noojiaqueya maajipohuari na tarajariquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhtej. Nojorijinijioori quiquiaari María Magdalena. Jesuuri cuno Maríajiniji tohuatanijioquiaari siete samaruhua. ³ Quiriquiaajaariuhua Juana, Cuza niquiocuani. Cuzaari jiyaniijia Herodes jiitiasano casami cojuana quiquiaari. Susaanaari nojorijinijinio quiquiaarijuhuaj. Socua queraatia maajipohuari quiriquiaa. Puetunu cuno

maajipohuajanaari Jesu naacutaquiaari tama nojori jiiitasano casaatajaaja. Nojoriiri nera pueraquenuunaa quiquiaarijuhuaj, tiqiyocua nojori rucuanejosacari Jesuta.

Jesu pohuatasano natoojona pueyanojiniji
(Mt 13.1-9; Mr 4.1-9)

⁴ Queraatia cuno jiya tiacajinjinio pueyari nijioquiaari nojori niqiniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasano. Nojori sequereeri:

⁵ —Tamonu pueyanoori na cuhuariquiajinia quiaquiaari natojonuucua. Na jacutasacari, secajaari totequiaari nuacuaco. Tii rapijiosaaquiaariiri. Shuhuari na miojoquiaari. ⁶ Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari toteree riyocuaca tajinia. Riyocuacaari socua ritia maashiquiaari. Na natasanoori tarinitiuacua qiriiri. ⁸ Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:
—Niaa jaara numaaraca qiri, nia tojitiare cua pohuatasano!

Casaarate miriqui pohuatasano
(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitiojonu panyani. ¹⁰ Jesuuri nojori riucaaree:

—Niaari saquiriojosaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niqiara pohuataquiaa miriqui cutarani. Naacuajitij, nojoriiri cua pohuatasano niishiaquiquiaa na tojitiacari. Naajuhuj, cua cumaacata cua miishano cariyoshitiquiaari, nojori niqiara cua miishacari.

Jesu niishitiojosacari na pueya, miriqui na pohuatasano natoojonajiniji
(Mt 13.18-23; Mr 4.13-20)

¹¹ Naa niishitiojoreera miriqui cua pohuatasano natoojonajiniji. Pueyano natojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nuacuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. ¹³ Sai tajinia toteno jajauri juhua noo pueya, canapueete Pueyaso rupaa tojiriini. Na nuhuaji, rupaquijia Pueyasoocua tiuquiciaa shuquiriaatiaari. Naa miijtacaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasoocuai rupatequiaa. ¹⁴ Riyocuaca tajinia toteno jajauri juhua noo pueya, canapueete maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiuacua riyocuaca tariyoshitishano. ¹⁵ Maninia jiyajinia toteno jajauri saniniuujia juhua noo pueya, canapueete maninia tojitiareecuaa Pueyaso rupaani. Na racataa maninia noojiajiniaari. Pueyaraaanu na tojtiaquiaari. Majaari na pishiniu Pueyasoocuai. Naacuajitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶ Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhatanura, pueya tiuquitasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuataaaria puetunu pueya niqiarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijosanojuanaari niishishaanutanijahuaj. Cuhuataasaanutaniyari maninia niqishocoriquiano. ¹⁸ Cunora, cua sequesano tojtiajaca nia qiri maninia. Cante maninia jitiaa cua rupaani, nojuajaari socua na niishijara jiyatesaanutaniya. Saniniuujia,

cante cua rupaa tojiyashijiani, secaja najuhuana na niishishanoori jaariutiasaanutaniya, puetunu shaaquiriajanaa.

Jesu tapueyocuaca tiuquiiijosacari Jesuucua nojori nucuata
(Mt 12.46-50; Mr 3.31-35)

¹⁹Jiyacaritij, Jesu nucuata Jesu tapueyocuacata tiuquiiioquiaari Jesu quishaqui. Majaari nojori naata tiuquitianu quiriqiaa Jesuucua. Jiyano-hua queraatia pueyari nocuara ritiariqiaa saaja tia tohuateyaji. ²⁰Tamonuuri Jesu numooteree:

—Quia nucuata quia tarajanuhuata jati carijiniacuma quiya. Quia niqitiuniu paniyaquinia.

²¹Jesuuri tii quinia niqiyara sequeree saaja:

—Canapue teetanujuanaa Pueyaso Rupaa tojitiyacani, nojoriiri cua nucuata cutara, cua tarajanuhuanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²²Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niutiariqiaa. ²³Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyano-hua. Mohuata queya-queteriqiaa bote jiniacumaraari. Boteeri quera tiuquitiariqiaa tari. ²⁴Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacari ritia suraajequee. Paratu piyarojonuuri tajimaa, caminia quey-ocuaanonio. ²⁵Jesuuri na pueya sequerohua:

—Niaacujaja juucua Pueyasoocua tiuujia. ¿Casa nia tojetareerini?

Nojoriiri Jesuucujaja jiuujiatecoree. Shiriiquitiuriqiaari Jesu miishano nojori niqishacari. Tama nojorijiaarijia nequesoreetooriquiaa:

—¿Cantucuaanonio? ¡Paratu, mohuacari na tojirii na sequesacari!

Gerasa jiyajinijinio samaruhuaraca pueyanojiniji pahuatasano
(Mt 8.28-34; Mr 5.1-20)

²⁶Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷Jesu jaara rosequiaari botejiniji, jiyacaritij, samaruhuaraca pueyanoori nocua niqiaari, cuno jiya tiacajinijinio pueyano. Cuno pueyanoori pueyacaanu samaruhuaraca quiquiaari. Majaari toque na cushiniu quijia. Naajuhua, majaari tiajinia na quiniu quijia. Saaja raacajinia quijiaari, macunucua nucuata paaquiosaqui. ²⁸Na niqishacari Jesu, na cariquimijia mojuquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishianijia! ¡Quiaacujajaari Jiyaniijiajanaa Pueyaso Niyanu! ¡Cua tarinitiare quenaaja! ¡Maja naquiyaa cua miiniu!

²⁹Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequerucua cuno pueyano mii-tiquiaari sesa. Narta pueyari juucua na cashacua, na numatucua morojuquiaari cumay-ocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiqiyocua, pueya quiyaquishaqui na quiniuria. ³⁰Jiyacaritij, Jesuuri na nequesotaree:

—¿Taateja quia sesani?

Samaruuri na riucaaree:

—Cua sesa “Queraatia”.

Naa Jesu sequequiaariiri jiyanoehua queraatia samaruhua na jitiiasacari. ³¹ Samaruhuari jiyanoehua secojoree Jesu, maja nojori na jiyaronura puequeetuujy raama saniitiosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuateree. Tacobiniji totesee caminiyajiniaari. Tii shushiniuuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariquiacajiniajuhuj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pohuatanuusanoininiji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. ³⁶ Jiyacaritij, Jesu miishano niqitiuniaari shusha nijiono pueya pohuataree taa samaruhuaraca pueyano naatanishaarohuani. ³⁷ Cunora, puetunu Gerasa jiyajinijinio pueyajanaari jiyanoehua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. ³⁸ Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeeree:

³⁹ —Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinijanaa pohuatasuhuari taa Jesu miiriucua maninia nojuajani.

Jesu naatanishacari Jairo niyatu, Jesu toque quiana maajinio

(Mt 9.18-26; Mr 5.21-43)

⁴⁰ Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyajinija quiquiaari cuno tiacajinia. Jesu cariquimijaji mojoquetaseeri na secojonura na tiajinia Jesu quianura. ⁴² Neyatuniyojuuari quera cusoriquiaa jiyacari. Majaari socua niquiohuaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanoehua queraatia pueyari nata quiojoriquiaajuhuj. Pueyari jiyanoehua na tanuujiriquiaa, nata nojori quiojosacari nuucaco.

⁴³ Tamonu maaji cusosuuri cuno pueya tajinia quiriquiaajuhuj. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijianaa najuhuanaj, na naarajosaanura juucua. Naarajonaari maja na naata na naataniniu quiquiaari. ⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeeree:

—Maja canaa quianu quirii quiajaniani.

Pedroori Jesu sequeeree:

—Niishitiojonanaa, ¿majateeri quia niquiniucuja? Queraatia pueyacuajaari quia tanuujiya.

⁴⁶ Jesuuri saaja sequeeree:

—Maja. Cusosu cua quiareeni. Niishiyanjia cua cumaacaari tari na naatanirii.

⁴⁷ Maaji niishishacari na miishano jiyasohuja tari niishishaaree. Jesuucua nimiaari. Na puerenuta tetecariquiaari. Jesu cariquimijaji mojoquetaseeri. Puetunu pueya niquiara-janaa pohuatareeri casaara Jesu na quiareeni. Pohuatareeariuhuj taa na naataquee ritiani, Jesu na quiasacari. ⁴⁸ Jesuuri na sequeeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua.

Juhujajaniya quia quiaarohua.

⁴⁹ Jesu poccojosacarjija cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajinia.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaaja naatanutaniuha.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriuucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhuana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricuaajaari niishiriquiaa maaji samiriuuri seetanjuanaa macu quiriquiaa. ⁵⁴ Jiyacaritij, Jesuuri macucua tiuquiquii. Na juaashiquiajiniji na quiaaseeri. Jiyanhua na sequereeri:

—Maaji samiriuniaa, ¡quia sanere!

⁵⁵ Na sohanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶ Na queyari jiyanhua jiuujiateree. Jesuuri nojori sequeree, maja nojori pohuatanura tamasaca niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niqutioree cumaacaari, puetunu tamaatia sesa samaruhujanaa nojori tohuatejonura, cusosuhua nojori naatanijionurajuhuj. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanajotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Naa jaara tamonu tiajinia tiuquishiiquia, niocua cuniqui jiyojetaseequiaja, nia jaara cuno tiacajiniji quiaarejaatijia. ⁵ Naa jaara tamonu tiacajinia tojinu paniaquishaare, cuno tiacajiniji nia quiaare. Nia nuhuajiria, cuno pueya niquiara niocua nia nihuacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoyaquiniutianiya, nojori tojitianu paniaquiniucua Pueyaso rupaa pohuataanaa.

⁶ Na nuhuaji, Jesu pueyari quiojooquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniija Herodes niishiniu panishacari cante Jesuni

(Mt 14.1-12; Mr 6.14-29)

⁷ Jiyaniija Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuaajaari jiyaniija Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuj: “Supuetana Elfascuaaja tari tiuquiriohua”. Nojuacuajaari tariucuaaanu Pueyaso sequenu panishano caminiujiunia quijia. Saniniuujia, tamasaca pueyari sequeriquiaajuhuj: “Jesucuaajaari tamonu tariucuaaanu Pueyaso sequenu panishano caminiujiunia samiitianohua”. ⁹ Herodesri saniniuujia sequeree:

—Janiyacuaajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojinuiyuni.

Cunora, Herodesri jiyanhua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

¹²Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuosocoriquiano, na maquetujuarajuhuj. Nojori panishanoori shaaqui niya pa quishaquini.

¹³Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuara naa cajitiuuriatej.

¹⁵Nojoriiri Jesu sequesano miirii. Puetunu pueyajanaari cajitiurii. ¹⁶Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niquitioreeri puetunu pueyajanaa nojori serotasocoriquiano. ¹⁷Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio.

Pedro sequesacari Jesuuri seetanujuanaa Cristo
(Mt 16.13-19; Mr 8.27-29)

¹⁸Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹Nojoriiri na riucaaree:

—Noojiaqueya pueyari quia sequequiaa, quiaana nacatasano samiitianohua Tiuquini-jiona Juan. Tamasacaari quia sequequiaajuhuj, quiaana Elías, tariucuacaanu Pueyaso sequenu panishano caminiujuunia. Tamasacaari saniniuuja quia sequequiaa, quiaa naasucuaana tamonu tariucuacaanu Pueyaso sequenu panishano caminiujuunia samiitianohua.

²⁰Jesuuri saniniuuja nojori nequesotaree:

—¿Niajaniryuhuj? ¿Taa nia sequeyani, cante janiyani?

Pedroori na sequeree:

—Quiajaniyacujaari Cristo, Pueyaso Jiyarosano.

²¹Jesuuri jiyanhua nojori rootaree maja nojori pohuatanura tamasaca niqiuara cante nojuajani.

Jesu numootesacari na pueya, nojuaja mosaanutaniya
(Mt 16.20-28; Mr 8.30-9.1)

²²Jesuuri naa nojori sequerohuacuhuj:

—Janiyani jiyanhua naquiya miishaanutaniyani. Pa Judiocuaca camarucuaari cua niquiniu paniyaquiniutianiya, na tojitianu paniyaquishacari janiya. Naajuhuj, pa pueyacuaa secojonaa jiyanijianucuaari cua niquiniu paniyaquiniutianiya, Moisés Rootasano-jiniji niishitiojanaanio. Nojoriiri cua monutaniya. Naajaa, jiuujianaraca juucajinia, janiyani samiitianutaniuhuanu.

²³Na nuhuaji, Jesuuri puetunu pueyajanaa sequeree:

—Cante cua nuhuajiniu panyani, cua pueyano na quiniuria, nojuaja cuaara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojijia na quiniuria seetanujuanaa. ²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanhua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijianaa jiitiana quiri, cuno maara najuhua quiri, nojuaja jaara na shaajesacari jatasaa mani quiquiojinia Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiya cua tiuquishacariuhua Jiyaniijia cua quiniuria. Janiyari shanhua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaj. Naajuhuj, cante cua rupaa pohuatanu caririquiya sesa mijijaa pueya niquiarani, janiyari nojori seera caririquiniutianiyajuhuj. ²⁷ Seetanujuanaa nia sequeyanijia, noojiaqueya nijaniyajiniinooori maja nia cusununu quiniutianiya juhuanajuaja, niaa cuaara niquirijiaatijia Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara

(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhananuucua tacaquiaari na Que Pueyaso na secojonura. Nata quiaareeri Pedro, Santiago, Juanio. ²⁹ Jesu secojasacari Pueyaso, na jiquiocoori tamaatiara jataquiaari. Na toqueeri jiyanhua cohuajara jataquiaarijuhuaj, shacantuquera. ³⁰ Jiyacaritij, caapiqui pueyari nocua muetaquiaari. Jesuta pocojoriquiaari. Nojoriiri quiriquiaa supuetana Moisés, supuetana Elíasnio. ³¹ Nojori nujuatusaquiiri shacantuuca quiriquiaa puetunu nojori shocujanaa. Nojoriiri pocojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanhua maquenuujiriquiaa, nata quiniaajuhuj. Naajaa, majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niquitiurijiaariuhuj, Jesuta pocojoriquiaa. ³³ Cuno caapiqui pueya quiojonu panishacariuhua Jesu shuriucuaji, Pedroori Jesu sequeree najuhuanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elíasranio!

Pedroori naa najuhuaa pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirij pocuaano cuno cohuaja najacajiniji. Naa sequereeri:

—¡Nioori cua Nyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojinu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitiariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaajatiijaj.

Caya samijiajini Jesu tohuatesacari samaru

(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyanjouanaari quianuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocatequiaariuhua! ¡Na rupaamajiiri cushaaquiaa! ¡Na cuaqueya miiquiaa moquitiuriariaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojtiaashijiacanaa, niaaqui Pueyasooocua tiyashijiacajuhuanajaj. ¿Janiya-teeri pueyaracaanu rejeretanutaniya nijaniyani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocu- atereeri. Jesuuri samaru sequeree na tohuatanura. Caya samijia naataniriiri. Na niq- uitiorohua na queeri. ⁴³ Puetunu pueyajanaari jiyanohua jiuujiatereee nojori niqushacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya nijaniyani. Majaari na niyajetanu. Janiyari niqutiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhua, casaa nojori na pohuatasano sequenu paniriquiaani.

Cante jiyaniijijianaa cutarani
(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijinijiniote jiyaniijijianaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nojuatereee na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuan, nojuajaari cua rupueyajuhua. Cante cua rupueyani, cua Jiyarona rupueyajaariuhua. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari jiyaniijijianaa quiniutianiya puetunu narta Pueyaso muera- sujiniijiniojuanaa.

Cante maja pa paracani, nojuajaari pa jiyano
(Mr 9.38-40)

⁴⁹ Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiaquiniucua pajaniyajinijinio.

⁵⁰ Jesuuri na riuucaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiaquiyani, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵² Jerusalén tiacaacuaa nuu cajiniocua Samaria jiyajinia Jesu quishacari na pueyata, noojiaqueya na pueyajinijinio pueratereee tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara no- jori pajenura. ⁵³ Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu neque- sotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuaaanu Pueyaso sequenu panishano caminiujiunia Elías miiquiaar- icuaani?

⁵⁵ Jesuuri nojoriicua tacatereee. Nojori nacasureeri naa nojori saniitonu panishacari cuno Samaria pueya. Naa nojori sequereeri:

—Majaari nia niishiniu cana sohanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojiyaree tii maquenura.

Tamasaca pueya quiniu panishacari Jesu pueyara juucua
(Mt 8.19-22)

⁵⁷ Nojori quiojosacari nuucaco, tamonu pueyanoori Jesu sequequiaari:

—Jiyaniijanaa, quia pueyanora quiniu paniyanijia. Janiyacua quia tarajareni puetunu tiqiyocua quia rucuanajosacarijanaa.

⁵⁸Jesuuri na riucaaree:

—Quioojuapueeri na raaca jiitiaa cutara. Shuhuari na jesuhua jiitiaajuhujaj. ¿Saniniuu-jia Pueyaso Niyanuurijataj? Majaari cua jiitanu tama cua maquejarajaaja.

⁵⁹Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijanaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiata rucuanajore cutarani.

⁶⁰Jesuuri na riucaaree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanajore cutara Pueyaso rupaa quia pohuatanura.

⁶¹Na nuhuaji, tamonu pueyanoori Jesu sequeree:

—Jiyaniijanaa, janiya cutara quiata quienu paniyani. Coteenu cua tiajinia quiquooraj, cua pueya cua niqiniuria cua nuhuajiria.

⁶²Jesuuri miriqui na riucaaree:

—Pueyano jaara na juyaca poonitijia, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na camaru jaara na nijiniara niquiri, sesa naaniutianiyari shuyorocotiuocuara. Naajuhujaj, cua pueyano jaara na quiquojinia tacatenu panijiohua quiri, nojuajaari maja maninia Pueyasoora poonijiona.

10

Jesu jiyaramiquishacari setenta y dos na pueyajinijinio, Pueyaso rupaa nojori pohuatanura

¹Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesu-urii nojori nuhuaji tii quienu paniriquiaajuhujaj. Puetunu nojorijianaa jiyaramiquiriiri caapiqui, caapiqui. ²Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quia, juhua senoosocoriquiano. Saniniuuja, secaja na senoonaari quia. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. ³Nia quiojijare pueyanaa. Nia niishiri, janiyari nia jiyaramiquia juhua borrego niquiohuani puereeta sareya tajinia. Pueyaso paraari juhua puereeta sareya. ⁴Nia quiojosacari, majaari nia caashoque nia patanu, nia cumaneeca quiquiojuhujaj, nia sapatunio. Majaari nucuaco nia tarishiniu pueya nia saruhuatasacari. ⁵Tamonu tiajinia nia tiuquishacari, coteenu nia sarhuatate na camaru nio sequesano: “Juhujaniya nia quiri, nio tiajinia quiniaanaa”. ⁶Cuno tiajinia quiniaa pueya jaara jiyanoojiaca quiri, naa nia sequesacari, Pueyasoori nojori miiniutianiya maninia. Nojori jaara juaajia quiri saniniuuja, Pueyasoori nojori shuquir-itiyaquiniutianiya. ⁷Tee nia masasaareni, cuno tiajinia nia jiyojere. Naa miaquere, nia rature nojori niquitiosano nijaniya. Naa pohuatanucua Pueyaso rupaa nojori niquiara, nijaniya cuaara niquitiosaa nia panishano. Majaari tamasa tiajinia nia pacunujunu tii nia miaquenura. ⁸Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu.

⁹Cusuhua nia naatanijore cuno tiacajinia. Pueya niquiara nia sequere: “Pueyasoori quarijia nia jiyatenu paniya na muerasu nia quiniuria”. ¹⁰Nia tiuquishacari tamonu tiacajinia, pueya jaara tii nia tojinu paniyaquiri, niocua cuno tiaca nuucujinia naa nacare pueya niquiara: ¹¹“Nia tiacajinijinio jaaquiani, canaari canaa nihuacaacuaji na majiriutuiani. Cunoori nia niishiniuria, Pueyaso jaara nia saniitiore, majaari canaacia na tiutuasiia quiniutianiya. Pueyasocujaari nia jiyanooni paniriquiaa juuca, na muerasu nia quiniuria”. ¹²Seetanujanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiisaanutaniya Sodoma tiacajinia quiniaa pueyajiniji.

Jesu piriyojosacari Pueyaso tojtiaashijiaca pueya
(Mt 11.20-24)

¹³ ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanoehua saniitiosaanutaniya! ¡Niaari socua Pueyaso tojtyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niqiquiaari, taacua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miniuucua. Naajuhuj, nojori maara juaca nojoquiaari nojori nacaacua quera nojori macaashacari, sesa miijiaca nojori quiniuucua. ¹⁴ Niaa cutaraari cua cumaacata cua miiijosano niqijiaca. Naajaa, majaari nioojia nia tacatonu quiquianu Pueyasocua. Naaratej, Pueyaso saniitonu juucajinia, ¡niaari socua jiyanoehua saniitiosaanutaniya Tiro tiaca pueyajiniji, Sidón tiaca pueyajinijinio! ¹⁵ Niajanijarijiaataj, Capernaum tiacajinia quiniaa pueyanaa, ¿niaateeri jiyaniya niaari jiyocuaaanu quiniaara jiyatesaanutaniya? ¡Maja! ¡Niaari puequetuuju raama quejoosaanutaniya saniya!

¹⁶ Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pohuatascarini, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

Jesu jiyaramiquishano setenta y dos pueya tiuquijiosacariuhua nocua

¹⁷ Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jiyanoehua shuquiriaatia quiriqiaa. Jesu sequetureeri:

—¡Jiyaniijianaa, samaruhuari canaa tojtianacuni canaa tohuanijiosacari nojori, canaa jiyaniquishacari quia sesa!

¹⁸ Jesuuri nojori sequeree:

—Taaquiririnij. Janiyari Sesaaca niqiquianuni juhua niaco tiyano jiyocuaaanuji.

¹⁹ Janiyacuajaari cua cumaaca nia niqutiocanuni, juhuajaniya nia rucuanenura sacocua caco, turucuaniniu caconio. Cua cumaacata, niaari puetunu Sesaaca cumaacajanaa shocotanutaniya, juhuajaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. ²⁰ Naajaa, majaari saaja shuquiriaatia nia quiniu samaruhua tojtianuucua nijaniya. Shuquiriaatia nia quiri cutara nia sesaca naajiotasano quishacari jiyocuaaanu, Pueyaso muerasu sesaca naajiotasaqui.

Jesu shuquirishacari
(Mt 11.25-27; 13.16-17)

²¹ Jiyacaritij, Pueyaso Sohuanuuri Jesu shuquiriritii jiyanoehua. Cunora, Jesuuri na Que Pueyaso sequeree:

—¡Quia shuquiritiaanjia cua Quena! ¡Quiaacuajaari Jiyaniijajanaa quiya jiyocuaaanu, mijiriano! ¡Quiaari maninia miiri! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacacuaji. Jaa, cua Quena, quiaacuajaari naa nojori panitiaja.

²² Cua Queeri tari cua niqutioquiaari puetunu na jiitasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecuajani.

²³ Na nuhuaji, Jesuuri na pueyacuatacaterree. Saaja nojori sequereeri:

—Shuquiriaatia quijiaca cutaraari nijaniya, nia niqiniuucua puetunu nia niqishanojuanaa nia rupeuuucua janiya. ²⁴ Seetanujuanaa nia sequeyanijia, queraatia tariucuacaanu Pueyaso sequesano caminiujunaa pueya, mariyata jiyaca jiyanijianucuanio, nojoriiri nia niqishano niqiniuucua jiaatiaquiaari juucua. Majaari na niqitiuniu quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhuj. Majaari na tojitiuniu quiquiaari.

Samaria jiyajinjiniio maninia miijajinjiji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riuquaree:

—¿Taate Moisés Rootasanojinia naajiotasani? ¿Taa quia niishiriojoquiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riuquaree:

—Naa sequeyano:

“Quia Jiyajinjia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishitijatajanaanio. Naa-juhuaj, quiarta pueyano quia paniri taa quia paniyacuaa tama quia cuaqueyajaajani”.

²⁸ Jesuuri na sequere:

—Quiaacujaari maninia riuquaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyano?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajinjiji. Nohuasenujuaca pueyari na quiaree. Puetunu na jiiitiasanojuanaa na jaariuutiatuereeri, na cushishano toquenio. Na piquitiuriiri. Quera macu na tiujiatuqueeri. ³¹ Na nuhuaji, pueyacuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquicora, na shocortamaa saajaari.

³² Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj. ³³ Na nuhuaji, Samaria jiyajinjiniio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinjiniio tahueri nocua taraajeree. ³⁴ Na cacataseeri. Nohuasenujuaca piquiyashiquia matejoree shiyocutaari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniijaarijia. Ritia na jiyataaree rucojojuaca tiuquijiojua tiajiniaraari. Cuniqiu na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniujujia quia niquitorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinjiniioni, ¿teyano cuno pojorijinjiniote narta pueyanocua taraajeja cutarani?

³⁷ Moisés Rootasanojiniji niishitiojona pueyanoori Jesu riuquaree:

—Cuno Samaria jiyajinjiniio tahuecuajani, nocua taraajequiaarini.

Jesuuri na sequere:

—Taaquiriirinj. Quia quiaarohua. Naa pueyacuara taraajeja quia quirijiuhuj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na miishocoriquiano na jiiitiasacari. Cunora, Martaari Jesuucua catecanoree. Na sequereeri:

—Jiyajinjianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¡Quia sequere na naacutanura janiya!

⁴¹ Jesuuri saaja na sequere:

—Martanaa, quioojia quia cajitiri sanaanaa. Quiaari puera quia miishano tacaataia.
⁴² Saaja niquiriyatu casaa cutaraari jiyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

11

Jesu niishitiojosacari na pueya nojori secojonura Pueyaso
 (Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijiniiori na sequere:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacaani.

² Jesuuri nojori sequere:

—Pueyaso nia secojosacari, naa nia sequere:

“Jiyocuaaanu quijia canaa Quena, puetunu pueyajanaa cuaara niishiiria quiaari toje-taarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuaaanu miishiyacaani. ³ Canaa quia niqitioriquia canaa miaquesocoriquiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jiyanoquiaacuaa sesa canaa miiniaani. Naajuhuj, canaa quia cojuare, maja sesa canaa miitishaanura”.

⁵ Jesuuri naa sequerejuhuaj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura nojuajiniji, ¿nojuajaticua taa quia sequereni?, quiaa jaara na sequere: “Cua rupuenanaa, cua niqitioire jiuujianaraca pan. ⁶ Tamonu cua cojiniaari shusha tiuquiriohua tucuaaanuji, miaajeyari. Shaaquiiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupena jaara na tiajiniaacumaji quia riucuaere?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quinitianiya saaja nia rupena na quiniucua. Sanenutaniyari pueyaracaanu taajeta nia piquishacari na tia tiotiu. ⁹ Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riataaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riataaanutaniyari.

¹¹ ¿Niaatucua nia niyanu niqitioire saajia, neecaru na masacari nijaniya? Maja. ¹² ¿Niaatucua soconu niqitioire nia niyanu, sapitiaaja na masacari nijaniya? Maja. ¹³ ¿Niaatucua turucuaniiinu niqitioire nia niyanu, caacaraja riuriquiu na masacari nijaniya? Maja. ¹⁴ Puetunu nijaniyajanaari sesa miinu niishijia. Naajaa, niaari maninia casaa niqitionu niishiya nia niquiohua. ¿Taatucua socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuaajaari na Sohuanu niqitionu niishijia na muerasu, canapue na masequiaacujani.

Pueya sequesacari Jesu, samaru cumaacaracana
 (Mt 12.22-30; Mr 3.20-27)

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiaari samaru na jitiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. ¹⁵ Tamasaca pueyari saa sequequiaarijia:

—Cuno pueyanoori samaruhua tohuatanijia samaruhua jiyaniijia Satanás cumaacata.

¹⁶ Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojininjio. ¹⁷ Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritiano nojori quishacari. Naajuhuj, niquiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. ¹⁸ Naajuhuj, niaari cua sequeriquiaa, janiyana samaruhua tohuatanijiya Satanás cumaacatani. Jaara naa quiriritij, ¿Satanástucua taa pueyaracaanu qiri jiyaniijiani, nojuaja jaara tama na samaruhuaaja tohuatanijiya tama na cumaacatajaaja? ¹⁹ Naajuhuj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuj, cana cumaacata nojori tohuatanijioquiaa samaruhanu? ¿Taa nia sequeyani? ¿Satanás cumaacateetee? Majaruhua. Naacuajitij, tama nijaniyajaaja nia niishiri, niaari jiyajeneya. ²⁰ Naa Pueyaso cumaacata cua tohuatanijosacari samaruhaatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

²¹ Niojinia nia niishiriojorejuhuaj: cumueeca pueyano jaara na tia cojuua queraatia na miaquejetaja casaata, majaari tamonu naata na jiitiasano casami jaariuutianu.

²² Saniniujia, socua cumueeca pueyano jaara nocua tiuquiri, na miaquejetaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuj, janiyari Satanás jiitiasano jaariuutiajani.

²³ Cante cua jiyano quiyaquiyani, nojuajaari cua paraca. Cante cua naacutaaquiyua pueya rerecojonura Pueyasorani, nojoriiri saaja pueya cocuataa Pueyasooquaji. Naaratej, jacaria nia niishiriojore casaa nia niishiriojiya janiyajinjini.

Samaruhuari riujuuja na quiquiojiniohua

(Mt 12.43-45)

²⁴ Samaru jaara tohuatare pueyanojiniji, joojuashiquio rucuaneyari na samaatejara na pajenura. Jaara na riuriataaquiri, niishiriojiyari: “Cua quiquiojinia riujuiyarahuaraku teje cua tohuatacanucujani”. ²⁵ Samaru tiuquishacariuhua cuno pueyanooocua, na riuriasuhuari shaaco, juhua maninia netoonujusano tia, maninia jeenucusanuuhuj.

²⁶ Naaratej, cuno samaruuri socua sesa miijiaca nojuajinjiji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajinjiji naa nacaree:

—¿Shuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucaaree:

—Socua shuquiriaatia quijia saniya sajara cante Pueyaso rupaa tojjijiani, cante Pueyaso panishano miiquiaajaanuhuj.

Sesa pueyari saaja Pueyaso cumaacata miishano niqiniu panjiaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujuanaa majaari socua cua niqitiniu qiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. ³⁰ Jonás miishaanuuri nocuaji jiuujatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyaajaanuhuj, nio pa quishacari pueya niishiniuria janiyari Pueyaso Jiyarosanoni. ³¹ Cua supuetana Salomón jaara Israel

pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanhua tucuaaanuji niquiaari narta jiyaniijia Salomón tojiniuucua, jiyanhua niishijia Salomón quishacari. Jiya puequesacari Pueyaso saniniujushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruoretanuucua socua Niishijijanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuaaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutanijuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujunua Jonás jaara Pueyaso rupaa pohuataquiaari nojori niquiara. Pueyaso sequenu panishano caminiujunua quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano
(Mt 5.15; 6.22-23)

³³ Pueya jaara samaritiu noshitiri, majaari na jamotanu. Majaari na niatanu conatu cariQUIACO. Maninia cutaraari jiyocuacaanu na morotanu, tiaco tiuquitianaa cuhuatariquiano. ³⁴ Pa namijaari juhua pa cuaqueya cuhuatanajuhuj. Naacujitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniujia, pa namijia jaara sesa casaa niquiniuucua jiaatiaja quiri, paari niishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijia quiri puetunujanaa, juhua samaritiu cuhuatasacari nijaniya. Naacujitij, niocua niishijia quiri, maninia mijia nia quiniuria.

Jesu nacasusacari Fariseocuaca, Moisés Rootasanojiniji niishitiojonaanio
(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucoojosacari tamasaca pueya tajinia, tamasaca sesa miishanoori na naata nojoriicua pacunu. Nocujia nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuaanaa, niaari juhua noo pueya, canapete saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhuj. Niaari sapuenu maninia pueya niquishano. Saniniujia nioojiaacari jiyanhua sesa quiya, casami nia masejonuucua nia nohuasejonuta, puetunu sesa nia miiniutijanaajuhuj. ⁴⁰ Mosanucuaanaa, ¿niaateeri niishiyaquiya, pa cuaqueya Shipiniiaari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojajinia nia jittiasanojuanaa jiyatere Pueyasora na quiniuria, niaa maara juhua jeequesano quiri puetunujanaa.

⁴² ¡Niaari taraatia miishaariquiano, Fariseocuaanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiniojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricujani. Naajaa, Moisésri niishitiojoquiaarijuhuua maninia pa miiniuria parta pueya, Pueyaso pa paniniurajuhuj. Majaari cuno na sequesano nia miiniu quiquiaa. Puetunu na sequesanojuanaa tojijia nia quiri. Majaari saaja jaamasucua niqutiojojuaca nia quiniu.

⁴³ ¡Niaari taraatia miishaariquiano, Fariseocuaanaa! Niaari jiyaniijanucua shuriucua cajiniuucua jiaatiaquiaa, Pueyaso secojua tiajinia nia quishacari, juhua cutara pueya

nia quiniuria pueya niquiara. Naajuhuj, niaari pueya paniquiaa nojori saruhuatanura niajanija juhua jiyaniijianucua, nia rucuanijosacari tiacajinia.

⁴⁴ ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucoquiaa na niishiyaquishacari. Naajuhuj, pueyari juhuajaniya nia rupuequiaa, nojori niishiyaquishacari nioojaari jiyanhua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojonaari Jesu sequere:

— ¡Niishitiojonaana, naa quia sequesacari Fariseocuacatej, quiaari canaa sequeyajuhuj!

⁴⁶ Jesuuri na riuacuare:

— Taaquiririnij. ¡Niaari taraatia miishaariquianojuhuaj, Moisés Rootasanojiniji niishitiojonaana! Puetunu nia rootasanojuanaari juhua jiyanhua niiquia casaa nitiaso-coriquiano. Majaari nia tojitajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeteranu nia niishitiojosano.

⁴⁷ ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuacaanu pueyara Pueyaso sequesano caminiujiuniaa nucuhuacuaji, teyano nia supuetanaa puecooquiaaricujani. ⁴⁸ Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹ Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaano. Israel pueyari noojiaqueya puecoonutaniya. Tamasacaari naquiya miishaanutaniyajuhuj”.

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacujanaa, canapute nio jiya coteejajiniji puecoosaaquiaricujani. ⁵¹ Coteenujanaa mosaaquiariri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuaj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquo tacoji, Pueyasoocua catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² ¡Niaari taraatia miishaariquiano, Moisés Rootasanojiniji niishitiojonaana! Niaari najuhuana Pueyaso Rupaa jitiaa. Majaari nia tojinu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaana, mariyata Fariseocuacaari jiyanhua juaaquioree. Jiyanhua nojori juaaquiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua.

⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanhua jiyanhua queraatia pueyari Jesuucua rerejoree. Tama nojoriijia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

— Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijica pueya niquishano tamasa niquiara. Saniniuujia, nojori jiuujiaari saa sesaja pueyaracaanu. ² Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuj. ³ Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamaraajajani, cunoori jiyocuaanu tia nijiniji nacatasaanutaniya puetunu pueya tojishocoriquianojuanaa.

*Cante puereshiya cutarani**(Mt 10.26-31)*

⁴ Cua rupuenanaa, majaari nia puerenu canapute nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani.

⁵ Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura nijaniya mani quiquiojiniani, na cusojuanu nuhuaji nijaniya. Saaja nojuaja nia puerere cutara.

⁶ Cinco shuhuari saaja caapiqui cumaneecaniyojuata masesano. Pueyara, cunoori na-juhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷ Naajuhuj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanoohua Pueyaso panishano cutara queraatia na cojuasano shuhujajini.

*Tamasaca niquiara pa sequere paari Jesucristo pueyani**(Mt 10.32-33; 12.32; 10.19-20)*

⁸ Cua tojitiare. Cante tamasaca niquiara sequejani: “Janiya Jesucristo pueyanoni”, naajuhuj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹ Cante saniniuujia tamasaca pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhaaj.

¹⁰ Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

¹¹ Cua muerasu nia quiniucua, niari Pueyaso secojojua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari nijaniya, majaari nia niishiriojonu taa nia riucuanutaniyanoj, casaa nia sequenutaniyajaanihuaj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquisitionura janiya canaa shipininio jiitiasanojiniji, taa canaa shipininio sequequiaari canaacuajani, saminio na quishacarjia.

¹⁴ Jesuuri saaja na riucuaare:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

¹⁵ Jesuuri naa nojori sequequiaarijuhuaj:

—Jiyanoohua nia cojuare tama nia cuaqueyajaaja, maja casamiicua jiaatijaca nia quiniuria. Pa naata shuquiriaatia quiniu casamijiu. Queraatia casamiiri maja na naata seetanujuanaa shuquiriaatia quijacara na jiyatenu pajaniya.

¹⁶ Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanoohua casamiriaca. Na cuhuariquiajinia na natoosanoori jiyanoohua muetuquiaari. Naacuajitij, queraatia miaquesocoriquiano jiitiquiaariiri na cuhuariquiajiniji na carojotasano. ¹⁷ Tama sequereearijia: “¿Taa cua miiniutaniyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸ ¿Jaj, niishiQuiinijia! Coteenu cua tiajosano cua casamiicua jiyanoorohuaraqij. Janiyari socua puereetucocura tajanutaniyani. Janiyari cuniqui mishinijionutaniya puetunu cua carojotasano cua cuhuariquiajinijiniojuanaani, puetunu cua jiitiasano casamijianaanio.

¹⁹ Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarjia cutara juhuajaniya quia quiri. Quiaari queraatia casamiriacaajaja, queraatia marijia. Quiaari queraatia quia miaquesocoriquiano jiitiaacuaja. Quiarjia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. ²⁰ Cuno niucuaaja, Pueyasoori na sequequiaari: “Moseecanaa, quiaari quiarjia macu juhuaquenu-taniya. ¿Canteeri puetunu quia jamuesano casamijianaa jiitianutaniya quia nuhuajini? ¿Canra na quiniutaniyarini?” ²¹ Naa miishaanutaniyari puetunu pueyajanaa, cante saaja

tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamiijiuniucua Pueyasora.

Pueyasoori na muerasu cojuaja maninia
(Mt 6.25-34)

²²Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutianiyani. ²³Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhaaj. Naajaariuhaaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhaaj. ²⁴Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na mijosocoriquiano. Naajuhuaaj, majaari nojori jitianu na mijosano na racataja. Majaari tiaca nojori jitianu na carojotasano nojori racatajarajuhaaj. Naajaa, Pueyasoori nojori mijotequiaa. Niaa cutaraari socua jiyanhua Pueyaso panishano cuno riquiacuhujiniiji. ²⁵Naajuhuaaj, nia nequesotaanijia, niaa jaara socua tamonu juucara rishiniu paniriqquia quera nia shaajenu panishacari, ¿nia naatateeri socua rishiniu, jiyanhua nia tacaaniutia? Maja nia naata. ²⁶Naaratej, nia tacaaniu jaara najuhuaana quiya socua shiitaniyoyua nia rishiniuria, ¿niaatucua casaara tacaari tamonu casaacuanii?

²⁷Natau shuucua nia niquishurij, taa nojori corequetaani. Majaari nojori poonijionu. Majaari na shuupenuunujuhuaaj. Supuetana jiyaniijia Salomónri jiyanhua shanhua toqueyaraca quiquiaari. Cuno jiyanhua shanhua niquishano na cushishano toqueni, naajaa, majaari na shocotanu cuno natau shuucua. ²⁸Pueyasoori cuno natau shuucua shipiniquiaari rupaquijia naa shanhua niquishocoriquianotej. Jaara sorere, tariqui catijiashiya saniniurijia pan majeetetajara. Pueyaso jaara naa maniushitiyacuaa shuucuatej, ¿majateeri na naata cushitiniu nijaniyajuhaaj, jatarinitiaja Pueyasooocua tiuujacanaa? ²⁹Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰Pueyaso niishiyashijiaca pueyari pueyara-caanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. ³¹Naaratej, nia niishiriojore Pueyaso panishano nia miiniuria. Nojuajaari saniniuujia nia niqutionutaniya puetunu nia panishanojuanaa.

Nia casami nia racatare Pueyaso shuriucua
(Mt 6.19-21)

³²Maja nia puerenu, cua muerasuniyoyuanaa. Niaari secajaniyoyua. Naajaa, cua Queeri nia panijia. Capora na quiniucua, ¿nia niqutionutaniya puetunu na jitiiasanojuanaari!
³³Nia casami nia niqutiojore cumanee cara. Na nuhuaji, cuno cumanee ca nia niqutiojore nareja casamiijiuniucua pueya. Naa nia miishacari, niaari jiyocuacaanu racataa nia jitiiasano. Tee Pueyaso racataa nareja nera nia niqutiosanocuajani, cuniqui, nia cumanee ca quiquioori maja na piquiniu. Niaari tii nia racatasano jitianutaniya pueyaracaanu. Majaari nohuasejojua na naata nocua tiuquiniu na nohuasenu. Naajuhuaaj, surequeyari maja na naata miaquenu nia casami tii. ³⁴Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasooocua niishiriojonutaniya, tee nia casami racatasano qiyacuuaani.

Jeenucuasano nia quiri nia Jiyaniijiaacuaji

³⁵Juhaata jeenucasano nia quiri pueyaracaanu, nia sashishacari nia Jiyaniijia, taa tianijiaaco maninia seyacuuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhaaj. ³⁶Naa jeenucasano nia quiriujuhuaaj, juhua cuno seyaja. Nojoriiri na jiyaniijia sashiya na caminiujiniiji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷Shuquiriaatia quijiaca cutaraari cuno seya, canapue te na jiyaniijiaacuaji sutyeyajani, na jiyaniijia cuara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyani na

mianuutenura nojori. ³⁸Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹Nio nia niishirijihuhaj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenua. ⁴⁰Naajuhuj, jeenucuasano nia quiri pueyanaa, juhua cuno sutejaca seyaja. Niaa jaara jiyaniya juhuanajuaja maja cua tiuquiniu quiniutianihua, janiyari jiyacari nia jiyajenetenutaniyani.

Jesu pohuatasano maninia serujiniji, sesa serujinijinio
(Mt 24.45-51)

⁴¹Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴²Jiyaniijaari na riucaaree:

—Tamonu seru jaara maninia seru quiri, nocua tiuushano, niishijajuhuj, na jiyaniijaari cuno na seru jiyatenutaniya narta seya jiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijajanaa mianuutequiaa nojoricuaani. ⁴³Cuno seruuri shuquiriaatia quiniutianiya na jiyaniijia jaara na riuratasuhua naa maninia miyanojua, taa na sequesaaquiari na miiniuracuajani. ⁴⁴Seetanujuanaa nia sequeyanijia, na jiyaniijaari cuno maninia seru jiyatenutaniya puetunu na jiitiasano casamijianaa cojuana na quiniuria. ⁴⁵Saniniuujia, cuno seru jaara sesa miiniuria niishiriojore, na jyanishacari na jiyaniijaari jyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miquejonutaniya. Pueyaracaanu rarujunutaniyari. Mashaasequejonutaniyajaariuhuj. ⁴⁶Na jyanishacari na jiyaniijia juhuanajuaja maja na tiuquiniu quiniutianihua, jiyacaritij, cuno juucaja, na jiyaniijaari tiuquiniutianihua canashyaquiji. Naa cuno seru miiniucua sesatej, na jiyaniijaari jyanohua na saniitonutaniya. Na jatanutaniyari Pueyaso tojiyashijia pueyata na saniitiosocoriquiano.

⁴⁷Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhujiriacuajani, nojuajaari jyanohua majacusaanutaniya cutara. ⁴⁸Saniniuujia, tamonu seru jaara sesa miiri na niishyaquiniucua na jiyaniijia panishano na miiniuria, nojuajaari saaja secaja majacusaanutaniya. Naajuhuj, cante queraatia niquitiosareeni, cuno serujinijiiri queraatia masenu panishaanutaniya. Naajuhuj, cante jiyatesaree queraatia jiitiana na quiniuriani, na jiyaniijaari nocua tiuuniutianiya socua jyanohua maninia miijia na quiniuria.

Jesuucua tiuujiaacari narta pueya panishoo
(Mt 10.34-36)

⁴⁹Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. ⁵⁰Coteenu, janiyari jyanohua saniniuujishaanutaniya juhua manitiani. Nocuaji cojiaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. ⁵¹¿Niaateeri jiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. ⁵²Naaratej, pueyari quiarijia juayonuutano coteenutaniya. Pueyano jaara necocataa jiitiare jiuujianaraca niquiohua na tijinia, jiuujianaraca nojorijinijinio jaara cucua tiuuri, cuno caapiqui cucua tiuyashijiaacari saniniuujia nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacaresetanutaniyajaacujua. Naacuajitij, tamonu tijinia, queraajaa pueyari caapiquiriyatu cucua tiuujiaa juaajiaa quiniutianiya. ⁵³Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua.

Naajuhuj, maajipohuari necohua niquicohua paracaajia quiniutianiya, necohua niquicohua quiniucua cucua tiuujia. Naajuhuj, pueya niquicohuari na quinia paracaajia quiniutianijuhuj, cucua tiuujia na quinia quiniucua.

Pueya cuaara niishiiria quiarjia Pueyaso miishanoiniji, casaa na niishitiniu paniani
(Mt 16.1-4; Mr 8.11-13)

⁵⁴Jesuuri naa sequequiaari pueyajuhuj:

—Niaa jaara niqitioocua niqiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵Naajuhuj, paratu jaara piyarojoquiaa pananu shuucujaji, niaari sequequiaa: “Tacareejonuqui quiniutianiya”. Naa quiquiaari. ⁵⁶Pueyanaa, ¿niaateeri seetanujuanaa niishijia? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarjia Pueyaso miishano nia niqiara, majaari cuno nia niishiniu, casaa na sequenu paniani. Naaratej, majaari seetanujuanaa niishijia nijaniya.

Niaacuara tonujunata nia jeecatoore

(Mt 5.25-26)

⁵⁷Niaacuajaari niishiya, sesa miijiaaari saniitiosaanutaniya. Naaratej, tama nianianijaja nia niishiriojore, casaate maninia nia miiniuriani. ⁵⁸Tamonu pueyano jaara quicuara tonujure quia sesonuucua na casaa, quia saniri juhuata nata pocoojonu maninia, na jaatucosacari quajaniya nequesoreena pueyanocua. Quia sequerenoj casaa quia miiniutianiya nerani, na jiyanooniuria quajaniya. Quiaa jaara jeecatoyaquiri nata, nojuajaari quicuara saquiriojotanutaniya nequesoreena pueyano. Jaara quicuara saquiriojotare nequesoreena pueyano, nequesoreenaari saniniuujia quia niqutionutaniya na pueya, quia nujuatesaanura nujuatejojuajinia. ⁵⁹Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneccajanaa niqitiojreajaatjia niaacuara tonujuna pueyano.

13

Nioojia nia tacatore sesa nia quiniujiniji

¹Jiyacari, tamasa pueyari Jesuucua tiuquijioquiaari. Cuno pueyari naa Jesu pohuataquiaari:

—Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasocua nojori puecoosano seya nanacata!

²Jesuuri nojori sequere:

—¿Niaateeri jiyaniya cuno Galilea pueyari naa miishaarucuaa socua jiyanohua sesa miijia nojori quiniucua narta Galilea pueyajiniji? ³Seetanujuanaa nia sequeya cutaranijia, nojoriiri maja socua sesa miijia quiqianu nijaniyajiniji. Nijaniyajuhuj, niaa jaara tama nioojiajaja tacatoyaquiri sesa nia miiniujiniji, niaari taraatia puecoosaariquianojuhuaj. ⁴¿Cuno dieciocho pueyarihuaj, canapete cusonuucanu cuno jiyaconaja tia jaara nojori shiniacacanu Siloé cuari shuriucatej? ¿Niaateeri jiyaniya nojori socua sesa miijia quiqianu narta Jerusalén tiacajinia quiniaa pueyajiniji? ⁵Seetanujuanaa nia sequeyanijia, nojoriiri maja socua sesa miijia quiqianu nijaniyajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

Miriqui Jesu niishitiojosano muetuhuo naanajiniji

⁶Jesuuri na nuhuaji pueya niishitiojquiaari nio miriqui pohuatasana:

—Tamonu pueyanoori higo naana jiitiaquiaari na uva cuhuariquajinia. Tamacari, na camaruri nocua quiaquiaari na niqiniuria. Na jajau mianu paniriquiaa juucuaari. Shaanoori quiriqiaa. ⁷Cunora, na cuhuariquia cojuana sequereeri: “Quia niqiri nio naana. Janiyari pueyaracaanu najuhua niquiaani na jajau pajenura. Pueyaracaanu muetuyaquiyari. Tari na shocorucuaari jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”. ⁸Cuhuariquia cojuanaari na riucaare: “Jiyaniijanaa, quia tariniarejaara tamonu marijia. Janiya na pajama jiya

tacarototanutaniyani na sasetanura. Na nuhuaji, janiyari juunu cueaca na pajama paa-tiniutianiyani. ⁹Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

Jesu jeeacasacari porocuatucua samaatenu juuca

¹⁰Tamonu samaatenu juuca, Jesuuri tamonu tiacajinia niishitiojoriquiaa Pueyaso sec-
ojoua tiajinia. ¹¹Tamonu maaji cusosuuri tii quiriquiaajuhuj. Dieciocho marijiari na
shoconujuquiaari porocuatuu na quishacari. Samaruuri naa na jiyatequiaari. Majaari
quenaaja na naata maninia nujuanu quijia. ¹²Jesu jaara na niiquiquiaari, na sequereeri:

— ¡Maajiniaa miji! ¡Quia nijiniacujaja tari jeequerohua!

¹³Jesuuri na juashiquia niaree maajiicua. Jiyacaritij, maajiiri maninia jeequequee.
Nojuajaari Pueyaso maniniuhuaqueetanu coteeree naa na miishaanuucatej. ¹⁴Pueyaso
secojoua tiajinia jiyaniijaari juaari naa Jesu miiniucua samaatenu juuca. Naaratej, tii
quiniaa pueya sequeree Jesu niiquiaari:

— ¡Seis juucacujajaari quiya puetunu semaanajinijanaa pa poonijionura! ¡Niocua cuno
juuca nijioriquia nia naatanijiosaanura, maja samaatenu juuca!

¹⁵Jiyaniija Jesuuri sequeree:

— ¡Sapueno juhua maninia miijiaca niquishano pueyanaa, puetunu nijaniyajanaari nia
juunu, nia burro samaacartaquiaa samaatenu juuca, nia jaatucucoriquiano mohuaca
na raatenura! ¹⁶¿Nio maajiirihuhuj? Nojuaja cutaraari supuetana Abraham niqiuo-
huacuajinio supueno. ¿Majateeri maniniajuhua samaatenu juuca pa samaacatanura
Satanás morojosano? Dieciocho marijiari tari nio maaji shoconujurucuaa pueyaracaanu
porocuatuu na quishacari.

¹⁷Naa Jesu sequesacaritij, puetunu na paraajanaari caririquitiurii. Saniniujia, puetunu
pueyajanaari shuquiriaatia quiriquiaa nojori niquishacari queraatia maninia Jesu miis-
hano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸Jesuuri sequequiaari:

— ¿Taate cua naata niishitiojonu nijaniyani, nia niishiniuria taa Pueyaso poonijia
pueya jiuujiajinia na rupaatanii? ¹⁹Na rupaari juhua mostaza jajauniyojua, pueyano
natasano na cuhuariquiajinia. Cuno jajau jaara moritiare, puereetucara caneyari.
Naacuajitij, shuhuari na cashacucuaacua jesuya. Naajuhuj, Pueyaso rupaari caneya
pueya jiuujiajinia puetunu nio jiyajinijanaa maninia miijiaca nojori quiniuria.

Miriqui Jesu pohuatasano pan poreetajiniji

(Mt 13.33)

²⁰Jesuuri nio pohuataquiaari socua:

— ¿Casaa cua pohuatanutaniya nia niishiniuria taa Pueyaso poonijia mijiria na ru-
paatanii? ²¹Pueyaso rupaari juhua pan poreetaja maaji cojitishano trigo cashojuata,
shanacusano jiuujianaraca shiitianiyojua tohuatashijinia. Pan poreetajaari puetunu cuno
cashojua miniquiootasanojuanaa poreeteja. Pueyaso rupaari naa poonijiojuajuhuj.

Juhua shiitianiyojua tohuateyari quiya Pueyasocua pa quianura

(Mt 7.13-14, 21-23)

²²Jesuuri Jerusalén tiacajiniara quiariquiaa na pueyata. Nucucua na quiasacari,
pueya niishitiojoriquiaa tiacajiniari, shiitianiyojua tiacajinianio. ²³Jiyacaritij, tamonu
pueyanoori na nequesotaree:

— Jiyaniijanaa, ¿saaja quenaaracua pueyateeri Pueyaso pueyara jiyatesaanutaniya?

Jesuuri nojori riucaare miriqui:

²⁴— Jiyanojua nia saniniujuri shiitianiyojua tohuateyaco nia tiuquiniuria, Pueyaso
nia rupenura. Juhucarijia nia numooteyanijia, queraatia pueyari nocua tiuquitianu
paniniutianiya juucua. Majaari nojori naata quiniutianiya saaja. ²⁵Cua tojitiare. Tia
camaru jaara sanere, tohuateya tionutaniyari. Nijaniya, cante na tia carijiniacuma

quiyajaani, niaari tohuateya piquiniuniutianiya najuhuanaj. Naa jaara naa nacare: “¡Jiyaniijianaa, canaacuaji quia riatare tohuateya!”; nojuajaari nia riuacuanutianiya: “Maja cua niishiniu tejenote nijaniyani”. ²⁶ Jiyacaritij, niaari juhuacatecara sequenutianiya: “¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucucacajinia niishitiojua”. ²⁷ Tia camaruri nia riuacuanutianiya: “Janiyacujaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu nijaniyajanaa sesa miijiacanaa”. ²⁸ Naa na taanuusacari nijaniyatej, niaari nujuquetunutianiya. Niaari nia quiaca miaquenutianiya jiyanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiuninaa Pueyaso shuriucua quiyanocuaa. ²⁹ Queraatia tamasa pueyapueeri nijionutianiya puetunu jiyacajinijuanaa Pueyaso shuriucua cajitiniuria, nojori miaquenuunura nata. Nijionutaniyari pananu metasamaji, pananu tiuquishacojinio, pananu shuucujaji jiyacajinijuano, pananu metasamaji miaquetajara jiyacajinijuhuaj. ³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniujia, nojori cutaraari seetanjuanaa tojishano pueya quiniutianiya Pueyasora, Pueyaso tojtijajaca nojori quiniucua mijiria. Naajuhuj, quiarijiani, queraatia pueyari juhua tojishano pueya quiya narta pueyara. Saniniujia, jiya puequesacari, nojoriiri najuhuaa quiijaca quiniutianiya Pueyasora, nojori tojtiaaquiniucua nojuaja.

Jesu taraajesacari Jerusalén tiacajinia quiniaa pueyacu

(Mt 23.37-39)

³¹ Jiyacari nojiaqueya Fariseocuaari Jesuucua tiuquijioquiaari. Nojoriiri Jesu nu-mooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajani-uhuj. Janiyari naa miya quiarijiani, tariquijiuhuaj. Janiyari tama tariqui tucuanutianiya puetunu cua miiniu panishanojuanaani”. Naa nia sequesuhua cuno pueyano. ³³ Cuara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuninaajanaa puecoosaaquiaaricuaani. Majaari tamaqui cua monu quishaanutianiya.

³⁴ Jerusalén tiacajinia quiniaa pueyanaa, niaacuajaari Pueyaso sequesano caminiujiuninaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatijani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura nijaniya. ³⁵ ¡Cunora, cua tojtitiare! Nia quiquioori tojetaarucujanaa shaaqui quiniutianiya. Naajuhuj, majaari socua nia niquiniu quiniutianiya janiya, niaa jaara nia timitiasacari janiya sequerejaatijia: “¡Cuara shuquiriaatia quiiria pa Jiyaniijia, Pueyasojiniji tiuquihuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaa jiyaniijia tiajinia quiaquiaari miaquenura, socua tamasa Fariseocuatano. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. ² Jiyacaritij, tamonu pueyanoori Jesu tacoji nuuariquiaa, poreeno cusotaano. ³ Jesuuri Moisés Rootasanojiniji niishitiojanaa nequesotaree, Fariseocuaconi:

—¿Taa nia serojuquiaa Moisés Rootasanojiniani? ¿Maniante cusosu pa naataniniu samaatenu juuca?

⁴ Nojoriiri saaja sanaa na tojtitariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. ⁵ Na nuhuaji, Jesuuri cuno Fariseocuaa sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca chocoterejaara, raamaji nia jaaniuhuaa nia seru?

⁶Majaari nojori riucuanu quiri quenaaja.

Taa pa miyani queranacunura masuusano pa quishacari, taamueca pueyate masuushiyajaa-niuhuj

⁷Jesuuri shootiariquiaa taa masuusano pueya socua panishano cajitiucujinia nojori cajitiuniuria riuticoneetariquiaani. Jesuuri cunora nojori niquiara pohuataree nio pohuatasano. Naa sequereeri:

⁸—Quiaa jaara masusaariquia camishacari queranacunura, maja cumaati quia cajiniu socua tojishano pueyano cajiijaranojinia, tamonu pueyano mariqui tiuquiriiri socua tojishano pueyano quiajanijini. ⁹Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shi-iquia. Quia sanere nio pueyanocuaaji”. Naacujitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. ¹⁰Nocuaaji nia sequenanjia, niaa jaara masusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacujitij, quia masuuna jaara niquiri quiajanija, nojuajaari quia sequenutaniya: “Cua rupuenanaa, ñiya quia cajishii socua panishano cajitiujiniani!” Naacujitij, cuniqui quiata quiniaari niishiniutianiya, quiajanijaqui nia masuuna panishano pueyano. ¹¹Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹²Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaa, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniujia. Naacujitij, quiaari tari namishaarohuacuja. Cunora, majaari socua quia masenu quiniutianiya Pueyasojiniji. ¹³Naaratej, quiaa jaara queranacunu paniya, quia masuure casamijiunucua pueya, sesaruneca pueya, sesacujuanucua pueya, cariyujuarur-jurinio. ¹⁴Naacujitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniujia. Naaratej, Pueyaso cutaraari maninia miiniutianiya quiajanija saniniujia, na samiitianijosacariuhua maninia miijica pueya.

Miriqui Jesu pohuatasano na queranacunujiniji
(Mt 22.1-10)

¹⁵Jesuta cajiyano pueyano tojishacari naa Jesu pohuatasantej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenutaniya jiy-ocuaaanuni!

¹⁶Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuucuaari. ¹⁷Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucusaaree niaacuaaji. Nia miaquesee”.

¹⁸Puetunu masuusano pueyajaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niqiniucuanu. Cua jiyanoori quenaaja. Maja cua naata quianu quiata queranacunuucua”. ¹⁹Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniucua quiaanjia. Quiocua cua jiyanoori cua quiaaquishacari queranacunujinia”. ²⁰Tamonu masuusano pueyanoori sequereejuhuj: “Shusha camiriinjia. Cunora, maja cua naata quianu”. ²¹Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaqui. Na seru sequereeri: “Ritia quia quiaare tamasa pueya masuunuucua tiaca nucuaacaco. Miji quia rijiocoo casamijiunucua pueya, sesaruneca pueya, sesacujua pueya, cariyujuarur-juri pueyano”. ²²Seru tiuquishacariuhua, na jiyaniijia sequesuhuari: “Jiyaniijianaa,

janiyari tari miiriini taa quia sequeree janiyacujani. Juhuanajuaja maja tia mishiniu".²³ Na jiyaniijiaari na sequeree: "Socua pueya quia pajecoo tiaca nucuaacaco, tamasa tiacajiniara nucuaaconio. ¡Socua pueya quia nenecojocoo nojori niniuria, cua tia mishiniuria! ²⁴ Seetanujuanaa nia sequeyanijia, coteenu cua masuusano pueyajiniinioni, majaari quenaaja niquiriyatu nojorijiniinio saniniu quiniutianiya cua sumatusano".

Saaja tama na cuaqueya panitajajaarijia na naata Cristo nuhuajiniu
(Mt 10.37-38)

²⁵ Jiyanohua queraatia pueyari Jesuta quiojoriquiaa. Jesuuri nojoricua tacateree. Nojori sequereeri:

²⁶ —Cante cucua niya cua pueyano na quiniuriani, nojuaja cuaara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujiniinio! Nia niquiocua, nia niquiohua, nia tapueyocua, nia rimiathuahuaj, nia panishacari nojori socua janiyajini, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajini! ²⁷ Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸ Naa jaara jiyaconaja tia tianu paniri, ¡majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuanaa? Naajuhuj, niaari niishiriojiya, queraatia quiyacuajate nia cumaneeca. ²⁹ Naa jaara coteenu naa miyaquiri, niaari najuhua morijucua nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macaatinutianiya. ³⁰ Nojoriiri sequenutaniya: "Cuno pueyanoori tianu coteecanu najuhanaj. Majaari na naata na tucuatunu quiarijia". ³¹ Naajuhuj, jiya jiyaniijia jaara quianu paniri narta jiyaniijata miaquetonura, ¡majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Saniniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoonura. ³³ Naajuhuj, naa jaara carteyaquiri puetunu nia jiiutasanojuanaa, majaari nia naata cua pueyanora nia quiniu.

Miriqui Jesu pahuatasano shonijini
(Mt 5.13; Mr 9.50)

³⁴ Shoni jaara tiquiriquia quiya, maniniaari, pa panishano. Jaara shaacara quiqui, ¡taate na naata tiquiriquiara na quiniuhuanu? Maja na naata. ³⁵ Najuhua quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria natacuaca. Majaari quenaaja maninijuhuj, na paatishaanura na moquijianura, natau pajama niojosocoriquiano. Jaara naa maninia quiyacuriti, nareja jatashiyari. Cante numaacarani, cuaara tojtiaara miriqui cua pahuatasano. Cuaara na niishiirijuhuj. Seetanujuanaa cua tojtiajaca pueyani, nojoriiri juhua shoni mijiria.

15

Jesu pahuatasano miriqui tashucuanu borregojini
(Mt 18.10-14)

¹ Roma tiacajinia quijia jiyaniijiaara cumaneeca masejona, mariyata sesa miijiaca pueyari Jesuucua nijoriquiaa na pahuatasano nojori tojtianura. ² Cuno pojoriiri Fariseocua soosano pueya quiriquiaa, Moisés Rootasanojiniji niishitiojona soosano pueyano. Cunora, Fariseocuaari, mariyata Moisés Rootasanojiniji niishitiojonaari tama rimiaqueturiquiaaja Jesuucua. Naa pocaturiquiaa Jesuuri:

—Cuno pueyanoori sesa miijiaca pueya shanacuquiaa nocua nojori nijionura. ¡Juhua-janiya nojoritia miaquequiaajaariuhuj!

³ Naaratej, Jesuuri nojori niquiara pahuataree nio miriqui pahuatasano:

⁴—Niaa jaara cien borregohua jiitariquia, nojorijinijinio niquiriyatuniyojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquiajinia, tashucuaano borrego nia pajenura, niaa cuaara na riuriatarohuaajaatijia? Taaquiririni. Niaacuajaari naa miiquiaaqui. ⁵Niaa jaara na riuriatasee, niaari nia shuquiriniutia na paquiohua nia numueecua. ⁶Niaa jaara na tiuquitarohua nia tiajiniohua, niaari nia rupuenaa, mariyata nia shuriucua quinia rerejotenutaniya nia sequenura nojori: “¿Cuata nia shuquiriri quiarijia! ¿Tari riuriatarohua cua borregoniyojua tashucuanonijia!” ⁷Seetanjuanaa nia sequeyanijia, naajaarihuaj, jiyocuaaanu quiniaari jiyanohua shuquirituquia niquiriyatu sesa mijia jaara noojia tacatore sesa na miiniujinijia. Cuno pueyanoori socua jiyanohua shuquiritiasano tamasa noventa y nueve pueyajinijia, canapuetucuaa tari maninia pueyacuani.

Jesu pahuatasano miriqui juurequetesano cumaneejinijia

⁸Naajuhaj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatareajaatijia. ⁹Na riuriatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¿Miji nia nimia! ¿Cuata nia shuquiriri! ¿Tari riuriatarohua cua juurequetesano cumaneenijia!” ¹⁰Seetanjuanaa nia sequeyanijia, jiyocuaaanu Pueyaso seyari naa shuquiriquiaajuhaj sesa mijia jaara noojia tacatore sesa na miiniujinijia.

Jesu pahuatasano taa tamonu pueyano jiyanoquiaari neyanuni

¹¹Na nuhuaji, Jesuuri nio pahuatareejuhuaj:

—Tamonu pueyanoori caapiqui niyanuraca quiquiaari. ¹²Socua naatujuaari na que sequeree: “Cua quenea, quiarijia cua niqitioie quia jiitiasanojinijia, quiria quiriqiano quiaa jaara shaajeyare”. Naacuajitij, na queeri puetunu na jiitiasanojuanaa niqitiojoree necohua. ¹³Socua naatujuaari rupaquijia camueenujuquiaari na que tiajinia. Na nuhuaji, puetunu na que niqitiosanojuanaa nojuajani, nojuajaari saniniuujia tamasa na niqitiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴Nojuaja jaara puetunu na cumaneeca puecaquiaarijianaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. ¹⁵Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqitioquijia quenea nia quiaa na miaquesocoriquiano. ¹⁷Na nuhuaji, tama sequereearijia: “Cua queeri queraatia na tiajiniaaco seyara. Nojoriiri maninia miaquenuquiaa taquiya. Nojori sumatuuri cureequiaajuhaj. ¿Janiyarijiatia? ¿Janiyari niya quera cusoya cua miaajenutani!” ¹⁸¿Cua queecua tacateyarohuarajui? Janiyaru na sequesuhuanu: ‘Cua quenea, janiyari Pueyaso miiquianu sesani. Janiyari sesa miiquianu quiajanijuhaj. ¹⁹Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiaa cua poonijionura’”. ²⁰Naa na niishiriojonu nuhuajitij, mashajaari quiaquiaariuhua na queecua.

²¹Tucuaaanu na quishacarijia na que tiajinijia, na queeri na niquiri. Nocua taraajereeri. Nocua neteyareeri na naacunura. Na cacaseeri. Na nujuuneequereeariuhaj. ²²Neyanuuri na que sequeree: “Cua quenea, janiyari sesa miiquianu Pueyasoni, quiajanianio. Majaari cua sequenu quia niyanuta”. ²³Na queeri saaja na tiaco seya sequeree: “¿Ritia! ¿Socua maniniuqui toque miji nia riquioo! ¿Niocua quianu cushitirinioj! ¿Janiisho nia cushitiri! ¿Sapatu nia cushitirijuhaj! ²⁴Pa riutianishano juunu niqiojua nia quiaaco mosocoriquiano. Quiarijia pa queranacure. Pocua miaquenureni, quianu pa shuquiritiasacari. ²⁵Nio quianuniyojuaari juhua macu quiriqiaa. Quiarijia samitiarohuari. Nojuajaari shaajequiaari. ¿Tari pocua muetarohuari!” Naacuajitij, nojoriiri juhuacatecara queranacuquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenyanoori, nianujuniyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riucaaree: “Quia nuhuajishanacuaa tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. ²⁸ Jiyacaritij, jiyapueranuuri jiyanohua juaaquii. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuaaari niishiya, janiyari pueyaracaanu poonijioquiaa quiarani. Majaari quenaaja cua tarijionu quiquiaa quiajaniya. Naa maninia tojjia cua quishacari quiajaniyatej, ¡majaari quia niquitoniu quiquiaari janiya quenaaja niquiriyatu cabraniojua, cua queranacunura cua rupuenata! ³⁰ Quiarjia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecacan paanaturicua!” ³¹ Na queeri na sequeree: “Sanajanaa, quiaari pueyaracaanu cuata quiya. Puetunu cua jiiitiasanojuanaari quia casaa. ³² Naajaa, quiarjiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarjia samiitarohua pajaniyaraari. Nojuajaari juhua tashucuaanu pocuaji. Quiarjia pocua muetarohuari”.

16

Miriqui Jesu pohuatasano pueyanoiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riutiocoriquiaa jiyasohuaja, tama nerajaaja. ² Cunora, jiyaniijaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarjia cua niquitioe quia naajiotasano puetunu quia miishanoinijijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojooquee. Tama sequereearjia: “¿Taa cua miiniutianiyarini cua jiyaniijia jaara cua jatare cua poonijiosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanohua cararaatiaari quira, pueyajiniji nareja cua mashiniquijionura cua panishano. ⁴ ¡Ja! Tari niishiquiniijia taa cua miiniutianiyani tamasa tarajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jatasaareni”. ⁵ Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niquitiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niquitiojocanu quiajaniyani?” ⁶ Pueyanoori na riucaaree: “Cua niquitiocanu cien patacocua mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. ⁷ Na nuhuaji, tamonu pueyano nequesotareeri: “¿Quiajaniyariuhua? ¿Casaa cua jiyaniijia niquitiojocanu quiajaniyani?” Na riucaareeri: “Cua niquitiocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸ Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanohua niishijia tama quia cuaqueyajaja quia cojuanura!”

⁹ Setanujanaa pueyanaa, Pueyaso niishiyashijiaca pueyari socua jiyanohua niishijiaca cuhuashiqui quijiaca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹ Naarate nia nacasuyanijia, naa capora nia quirijuhuj, maninia nia miiniuria pueya. Maja nia casami nia jamuenu. Cunocuaari nareja Pueyaso niquitiosano niajaniya. Naacujitij, capora nia quishacari mijiria jaara puequema, nia Jiyaniijaari nia tiuquinitianutianiya pueyaracaanu quishaqui jiyocuaanu, jiyanohua na shuquiritiasacari niajaniya.

¹⁰ Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaaree secaja casaa cojuana na quiniuriani, cuno pueyano jaara secaja na cojuasanojiniji nohuase-joquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaarihuaj. ¹¹ Naajuhuj, niaa jaara maninia jiiti-aaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocuaaanuji casami nia jiitianura. ¹² Naacujitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

¹³ Poonitijosano pueyanoori maja na naata caapiqui jiyaniijara poonijionu. Jaara caapiqui jiyaniijaraca quiri, tamonu samiritiaari, na panishacari tamonu. Naajuhuj, niquriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijjotesaanutaniya saaja. Naacujitij, Pueyasoori maja na naata nia poonitijionu nera.

¹⁴ Fariseocuacaari jiyanoohua cumaneeca panijiaa quijia. Naaratej, nojori tojishacari Jesu sequesano, nojoriiri saaja na rerequeteree. ¹⁵ Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocujaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jiitiasacari. Saniniuujia, casaa pueya jiyatequiaa socua jiyanoohua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ Moisés Rootasano, mariyata puetunu tariucuacaanu Pueyaso sequenu panishano caminiujuunaa pohuatasanojuanaari pueya tojitasocoriquiano quiquiaari, Tiuquiniujiona Juan pohuatasanojuhuaj. Quiarijia saniniuujia, maninia rupaa Pueyasojinijiiri pohu-atasaaquiaa, taa Pueyaso jyanooniu paniya pueyani, na muerasu nojori quiniuria. Quiar-ijiani, puetunu pueyajanaari jyanohua saniniuujia Pueyaso muerasu nojori quiniuria.

¹⁷ Nio jiyari shaajeriquiano, jiya cajiniocuanio. Saniniuujia, tariucuacaanu pueyara Pueyaso sequesano caminiujuunaa pohuatasano cutaraari maja na shaajenu quiniutianiya quenaaja.

Jesu niishitiojosano, pueyano carteyaquiniuria necocua

(Mt 19.1-12; Mr 10.1-12)

¹⁸ Pueyano jaara necocua cartere tamonu maajitia na caminiuria, cuno pueyanoori jyanohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinio

¹⁹ Casamiriaca pueyanoori quiquiaari. Jyanohua maniniuqui toqueya cushiyojojuuari, juhua jiyaniijianucua toqueya. Jyanohua na shuquiriniutia, puetunu juucajanaa quer-anacujjuuari. ²⁰ Jiyacaritij, casamijiu pueyanoori quiijajuhuj. Jyanohua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. ²¹ Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. ²² Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquojinia. Cuno casamiriaca pueyanoori cusoquiaarijuhuaj. Jamosaaquiaariiri. ²³ Sesa miijiacarano quiquojinia na quishacari, naquiya na miishacari tii, nojuajaari mauquiaari. Cuniqiji tucuaaanu niqiriir Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacare: “¡Cua supuetana Abrahamnaa, cucua quia taraajere quenaaja! ¡Lázaro quia jyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jyanohua naquiya miya nio manijiniani!” ²⁵ Abrahamri saaja na riucaaree: “Sanajanaa, quia niishiri taa jyanohua maninia quia quiquiaarini, pueyaracaanu jiyocua

¹¹ Jesuuri Jerusalén tiacajiniara na pueyata quiariquiaacuhuj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucuaji nujuatusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niqitishii pueyacuara secojonaa, taa supuetana Moisés seque-
quiaaricuajani.

Nojori canujuucuatucarijia, nojori cusonuuri shaajequee. ¹⁵ Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu cariquimijia mojo-
quetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinijinio tahue quiquiaari. ¹⁷ Jesuuri na pueya niquiara naa sequereeri:

—¿Majateeri diez cusosuhua naatanijiosaanu quiiri? ¿Teeteeri narta naataconohua nueve pueyani? ¹⁸ ¿Saaja nio tahueteeri tacaterohua Pueyaso na maniniuhuaqueetanura?

¹⁹ Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiyani, Jiyaniijia Cristo tiuquishacariuhua

(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriquiano niniu-
tianiya jiyaniijia na quiniuria mijiriani. Jesuuri nojori riucaaree saaja:

—Pueyaso Jiyarosano jiitiasacari na muerasu, majaari namijiatana niquishano. ²¹ Majaari na naata sequesaaanu: “Niya quiya pa Jiyaniijia quiquio”, “Jati quiyaruhua”. Pueyasocua-
jaari tari niya jiitiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatianu-
tianiya niaata cua quiniuria rupaquijia, taa niaata cua quiya quiarijiacuaani. Majaari nia niquiniu quiniutianiya janiya. ²³ Tamasacaari nia sequenutianiya: “¡Niya quiyacuaja nia Jiyaniijia!” Tamasacaari saniniuuja sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuaani na nunujasacari.

²⁵ Saniniuuja, mijiria cua quishacarijia, janiyari coteenu jiyanhua naquiya miishaanutaniyani. Nio pa quishacari pueyari cua paniaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacari. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojaari. Pueyari necojori camiyoteja. Pueyari naa juhuajaniya mijioriquiaa Noé jaara tiuquitiaquiaari na puereetuca buquejinia. Canashiyaquiji, maruuri jiyanhua niquiaari. Puetunu mijiria quiniaajanaari cusonuquiaari pajaacajinia. ²⁸ Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojaari. Juhuajaniya na casami niqitiojojaari. Na cuhuariquiaca natojojaari. Na tiacara tiajojuajaariuhuj. ²⁹ Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacaanuji. Puetunu cuno sesa mijiacajanaari manijinia catequiaari. ³⁰ Naa quiniutianiyajaariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutianihuani.

³¹ Cuno juuca, pueyano jaara na tia cacojiria quiya, cuaara roseyaquiiira na casami-
cua tijajiniaaco. Naajuhuj, pueyano jaara na cuhuariquiajinia quiya, nojuaja cuaara tacateyaquihuara na tijajinia. ³² Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niquiniuucua, na casamiicua na taraajesacari. ³³ Cante saaja shuquiriaatia mijiria na quiniuria niishiriojojuani, nojuajaari na nuhuaji jiyanhua taraatia quiniutianiya Pueyasooju. Saniniuuja, cante tama na

cuaqueyajaaja panitiaja cua tojjijara na quiniuriani, nojuajaari pueyaracaanu shuquiri-aatia quijjara jiyatesaanutaniya.

³⁴ Cua tojiri. Cuno niucujuhujaj, caapiqui pueya jiuriatoosacari juucua na maquetu-jinia, niquiriyatujuaari rishaanutaniya jiyocuaaanura, Pueyaso pueyano na quiniucua. Tamonuuri tiujiasaanutaniya saniitiosocoriquiano. ³⁵ Cuno juucajuhujaj, caapiqui maa-jipohua riiquiniushacari jatiqiu juucua, cucua tiujjiaari tarajanu shuriucujaji rishaanu-taniya. Tamonuuri tiujiasaanutaniya saniitiosocoriquiano. ³⁶ Caapiqui pueya quishacari cuhuariquiajinia, cua pueyanoori rishaanutaniya. Tamonuuri tiujiasaanutaniya sani-itiosocoriquiano.

³⁷ Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pohuatasano niqishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejiya.

Naajuhujaj, majaari quenaaja niquiriyatu Pueyaso tojjiyashijia cureenu quiniutianiya saniitiosoo.

18

Jesu pohuatasano mashiquiojiniji, pueya nequesoreena pueyanojinijinio

¹ Jesuuri na pueya pohuataquiaari nio miriqui pohuatasano nojori na niishitiojonura, nojori cuara Pueyaso secojora pueyaracaanu, nojori taacanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijjiaari, pueya rerequetejano. ³ Cuno tiacajiniaja tamonu mashiquioori quiquiaariji-uhujaj. Mashiquioori cuno nequesoreenaacua rucuanerjotua pueyaracaanu. Na secoj-juuari sesa na miinia pueyano cuara na niqutihuara na casaa saniniuuja, sesa na miishanojiniji nojuaja. ⁴ Majaari nequesoreena tojinu paniniu quijia pueyaracaanu cuno mashiquio. Naajaa, pueyaracaanu nocua na rucuanesacari, cuno nequesoreenaari socua tama sequequiaarijaaja: “Janiyari maja Pueyaso puerejani. Janiyari pueya tojjiyashijia cutarani. ⁵ Naajaa, naa nio mashiquio taajetesacari janiya pueyaracaanutej, janiyari quiarjia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶ Maninia na pueya niishiniuria na pohuatasano, Jiyaniijia Jesuuri naa nojori sequero-huacuhujaj:

—Naa miiquiaariiri, cuno pueya nequesoreena seque. Jiyanojua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷ ¿Nia que Pueyasoorijiataj? ¿Niaateeri jiyaniya maja nojuaja tojinu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyajaara? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijiaa pueyacujaji. Sesa nia miijiaaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiuujiaa riuritanutaniya naa pueyaracaanu secojonuujuacani?

Jesu pohuatasano miriqui Fariseo pueyanojiniji, Romano jiyaniijjara cumaneeca masejojua-jinijinio

⁹ Jesuuri socua nio miriqui pohuatasano pohuataquiaari noo pueya niqiuara, canapuate tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasa pueya soojea, nojori jiyaniishacari cuno pueyari socua sesa miijiaa nojorijiniji. Cunora, Jesuuri nojori niqiuara naa pohuataquiaari:

¹⁰ —Fariseo pueyanoori quiaquiaari Pueyaso Secojotua tijinia na secojonura Pueyaso. Jiyacartij, Romano jiyaniijjara cumaneeca masejojua pueyanoori quiaquiaari Pueyaso na secojonura tijiuuhujaj. ¹¹ Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasa pueyani. Tamasaca cutaraari nohuasenujuuca, sesa miijiaa, maaji porocujuhujaj. Naajuhujaj,

shuquiriaatia quiyanjia, janiyari maja sesa miijiani juhua nio pueyanojua niya cuata sec-
 ojiyani, cumaneeca masejona pueyanoni. ¹² Janiyari caapiqui juuca miaqueyaquiquiaani
 puetunu semaanajanaa cua shuquiritiniuria quiajaniya. Naajuhuj, janiyari pueyaracaanu
 puetunu cua masesanoinijijianaa niqutioquiaa quiarani, taa Moisés rootaquiaaricua-
 jani". ¹³ Cumaneeca masejonaari saniniuujia tucuacaanuji nujuasee. Na secosacari,
 majaari quenaaja na maunu quiriquiaa jiyocuacaanu. Tama nojuajaari na jiriquia
 piquiriquiaa na taraajenuta sesa na miishanoiniji. Naa sequereeri: "Pueyasonaa, cucua
 quia taraajere. ¡Cua jiyanoori! ¡Sesa miijianijia!" Naa secojoquiaariiri. ¹⁴ Seetanujanaa
 nia sequeyanijia, cumaneeca masejonaari Pueyaso jiyanooshano tacateyarohua cutara.
 Fariseo pueyanoori saniniuujia jiyanoyaquishoo tacateyarohuacujua. Naacuajitij, cante
 tama na cuaqueyajaaja jiyateya juhua maninia pueyano na quiniuria tamajaajani, no-
 juajaari cararosaanutaniya. Saniniuujia, cante sesa na miishano seetaaquijiani Pueyaso
 jiyanooniuria nojuajani, Pueyasoori cuno pueyano jiyatenutaniya seetanujanaa sesa
 miyaquijia na quiniuria.

Jesu niasacari na juaashiquia conajaacua
 (Mt 19.13-15; Mr 10.13-16)

¹⁵ Jiyacaritij, conajaari poosaariquiaa Jesuucua, Jesu nianura nojoriicua na juaashiquia,
 Pueyaso jitianura maninia nojori. Jesu saquiriojosano pueya jaara niqiquiaari conaja
 pooshiyano Jesuucua, nojoriiri na poonaa juaari. ¹⁶ Jesuuri saaja conaja poonaa sequeree,
 conaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujuna. Cante Pueyaso
 muerasura quiniu paniyani, nojori cuara jiyateera tama na cuaqueyajaaja juhua nio
 naatujooriria. ¹⁷ Seetanujanaa nia sequeyanijia, cante tama na cuaqueyajaaja jiy-
 ateyaquiya juhua naatujooriria Pueyaso rupaacua na tiuniuriani, cuno pueyanoori maja
 na naata Pueyaso muerasura na quiniu.

Casamiriaca pueyano pocojosacari Jesuta
 (Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitian-
 ishaanura, pueyaracaanu quijiaara cua quiniuria Pueyasotani?

¹⁹ Jesuuri na riucaaree:

—¿Casaara quia sequeya janiya maninia pueyanotani? Saaja Pueyaso cutaraari
 seetanujanaa maninia. Majaari socua tamonu quiniu. ²⁰ Pueyanonaa, quiaacuajaari
 Moisés Rootasano niishijia. Naa naajiotasanocujaari quiya: "Maja quia camishoo maaji
 numuetucunu. Maja monu. Maja nohuasenu. Maja tamonuucua saquiriojotanu quia
 sapojonuta. Quia que, quia nucua tojjia quia quiri".

²¹ Pueyanoori Jesu riucaaree:

—Janiyacuajaari cua naatujajiniji puetunu cuno tojjijajanaani.

²² Naa na sequesacaritij, Jesuuri na sequeree:

—Quiyajaari niquiriyatu casa quia miishoojua. Nio quia miiri: puetunu quia ji-
 itiasanojuanaa quia niqutiojore cumaneecara. Na nuhuaji, casamijiuniucua pueya
 cuno cumaneeca quia niqutiojore nareja. Naacuajitij, quiaari jiyanoohua casamiriaca
 quiniutianiya cutara jiyocuacaanu. Na nuhuaji, quiocua nimiohua cutara, cua pueyano
 quia quiniuria.

²³ Na tojishacari Jesu sequesano, nojuajaari jiyanoohua taraajequee, jiyanoohua queraatia
 casamiriaca na quishacari. ²⁴ Jesu niquishacari nojuaja taraajeyano, Jesuuri na pueya
 sequeree:

—Casamiriaca pueyara, jiyanoohua jiyajenetaari Pueyaso muerasu nojori quiniuria.

²⁵ ¿Camelloteeri na naata cusupetaja huhuoco tamajiria tajiniu? Maja na naata.
 Naajuhuj, casamiriaca pueyanora, socua jiyanoohua jiyajenetaari Pueyaso muerasu na
 jatanishaanura.

²⁶ Pueya tojishacari naa Jesu sequesanotej, nojoriiri naa na nequesotaree:

—¿Canteeri Pueyaso muerasura quiniutianianitioj?

²⁷ Jesuuri nojori riucaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijiana, ¿canaarijataj? Canaari puetunu canaa jiiatiasanojuanaa tiujiaquiaarini canaa nuhuajiniuria quiajaniya.

²⁹ Jesuuri na riucaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanohua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso ship-inishocoriquiano quiarinio jiyajinia.

Jesu pacutesacari pohuatenu, nojuaja mosaanutaniya

(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujuninaa sequerquiaaricuaa janiyajinjini. ³² Naacuajitij, janiyari tahua niquitiosaanutaniyani. Nojoriiri cua macaatiutianiyari. Taraatia cua miitiuniutianiyari. Cua riocojotunutaniyari. ³³ Cua piquitiuniutianiyajaarihuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutanihuani.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariyujuaru pueyano Jericó tiacajinia

(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariyujuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. ³⁶ Cariyujuaru tojishacari queraatia pueya tajiyano, pueya nequesotareeri:

—¿Casaatejanojoni?

³⁷ Pueyari na sequeree:

—Nazaret tiacajinijinio Jesucuaa tajiya.

³⁸ Cariyujuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanohua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequeree cariyujuaru cuaara jaatucusaaria nocua. Cariyujuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajaniyani?

Cariyujuaruuri Jesu riucaaree:

—¡Jiyaniijiana, niquijiara quiniu paniuhanijia!

⁴² Jesuuri na sequeree:

—¡Niquijiara quia quiriohua! Quia namijiacuaa tari jeequerohua cucua quia tiuushacari.

⁴³ Jiyacaritij, cariyujuaruuri maninia niquijiara quiqui. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

¹ Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari. ² Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijara cumaneeca masejonaa camarnu quiquiaari. ³ Nojuajaari Jesu niishiniu panijia juucua. Majaari na naata niqiniu quiriquiaa Jesu, puera jiyanohua pueya quiniuucua Jesu shocua. Naajuhuj, Zaqueori puera posucuaashi quijia. ⁴ Cunora, Zaqueori netequiaari Jesu tacoji. Nu shuucuaaji sicómoro naanaacua macaseeri, maninia na niqiniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tijajinia maquenutaniyani.

⁶ Zaqueori ritia rosemohua. Jesu tiuquiiaree na tijajiniaari jiyanohua na shuquiriniu-tia. ⁷ Tamasaca pueya jaara Jesu niqiuquiaari Zaqueo tijajinia tiuquiyano, puetunu nojori-jianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa mijia pueyano tijajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuanaa quia sequenyajia, Jiyaniijanaa, janiyari quiarijia quiocua tiuuriini. Naacuajitij, janiyari casamijiuniucua nareja niqutiojonutaniya puetunu cua jiitiasano cajiniocuajinijijianaani. Naajuhuj, janiya jaara puera cumaneeca masecanu tamasa pueyajiniji cua sapojonutani, janiyari nojori niqutionutaniuhua socua jiyanohua quer-
aatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarijiani, nio tijajinia quinia pueyari tari jiyanooshaaree! Nio pueyanocujaari supuetana Abraham niqiohuacuajinio supuenojuhuj. Nojuajaari cucua tiuuri taa Abraham tiuquiaari Pueyasocucuaani. ¹⁰ Janiyacujaari cunora mijiria niqiaarini, tashucano pueya cua pajenura, nojori cua jaariutianura Sesaaca.

*Miriqui Jesu pohuatasano diez cumaneecajiniji
(Mt 25.14-30)*

¹¹ Tii quinia pueyari Jesu pohuatasano tojtitariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jyanijia quiniutianiya tari, Pueyaso muerasu na jiitianura mijiria. Nocua, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuataree:

—Tamonu jyanijia niyanuuri quiquiaari. Nojuajaari tucuaaanu tamonu jiyajinia quiaquiaari jyanijia na jiyatesaanura. Jyanijia na jiyatesaanu nuhuaji, nojuajaari tacateriquianohua quiriquiaa, narta pueya jyanijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijanaa niqutiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijore, janiya cuara tiuquiriohuajaatiimijiaj”. ¹⁴ Na nuhuaji quiaqueeri. Na jiyajinijio pueyari maja na niqiniu panini quijia cuno pueyano. Cunora, nojoriiri pueya jiyaramiquirii na nuhuaji, jyanijijanaa nojori sequenura: “Maja canaa panini cuno pueyano, canaa jyanijia na quiniuria”.

¹⁵ Naajaa, nojuajaari saaja jiyatesaaree jyanijia na quiniuria. Na nuhuaji, na jiyajinia tacateyaroahuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca. ¹⁶ Coteenu seru-
uri nocua nimiaa. Na jyanijia sequeseeri: “Cua jyanijianaa, cua poonitijosacari quia niqutiosano cumanee janiya, janiyari socua diez cumaneeca reratecanuni”. ¹⁷ Na jyanijiaari na sequeree: “¡Maniacua! ¡Quiaacujaari maninia cua seru! Quiaari secaja cua niqutiosano quajaniya poonitijori quiaa shitimia quiria. Naaratej, janiyari quia jyatenuutaniya diez tiaca jyanijia quia quiniuriani”. ¹⁸ Na nuhuaji, tamonu na seruuri nocua nimiaajuhuj. Nojuajaari na jyanijia sequeree: “Cua jyanijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni”. ¹⁹ Na jyanijiaari na sequereehuj: “Quiaari cinco tiaca jyanijia quiniutianiya”.

²⁰ Na nuhuaji, tamonu na seruuri nocua nimiaajuhuj. Na jyanijia sequeseeri: “Jyanijianaa, niya quia quia cumanee quia niqutiosano janiya. Janiyari na cojuacanu

maniniani, toqueraujinia jiuniososano. ²¹ Janiyari naa miiquianuni cua pueresacari quiajanija. Janiyari niishiyani, quiaari quiarta pueyacia taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhua. ²² Na jiyaniijaari na juaarii: “Sesaacanaa, tama quia sequesanoatajaaja janiyari quia nequesoreenutaniyani. ¿Naatee? ¿Quiaateeri niishiquianu janiyari pueyacia taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhua?” ²³ Quiaa jaara jiyaniquianu janiya naa miijiani, ¿casaara cua cumanee quia niquitioyiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuani, cua tiajinia cua tiuquishacariuhua”. ²⁴ Cunora, na jiyaniijaari tii quiniaa pueya sequeree: “¿Cua cumanee nia jaariutiare cuno! Nia niquitiore cua maninia seru, cante diez cumaneeca jiitiaacuajani”. ²⁵ Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jiitiaa”. ²⁶ Jiyaniijaari saaja nojori riucaaree: “Seetanujuanaa nia sequeyanijia, cante tari jiitiaani, nojuajaari socua niquitiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiyashijia na quiniuucua. ²⁷ Quiaarjia, cua paraa saniniuujia, cuno pojori canapuee cua paniyaquiquianu nojori jiyaniija cua quiniuriani, miji nia jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia

(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetaareecuahuaj Jerusalén tiacajiniara. ²⁹ Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhua. Jesuuri caapiqui na pueya sequeree:

³⁰ —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare nijaniya casaara nia samaacartaanoj, niocua na riucaare: “Jiyaniija na paniya”.

³² Jesu pueyari quiaaree. Nojoriiri na riuriatasee taa Jesu sequequiaaricuajani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacarta canaa burroni?

³⁴ Nojoriiri na riucaaree:

—Jiyaniija na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muevoquiaari nucuaco Jesuucua. ³⁷ Nojori rosetanu panishacari Olivo cuhuariquia tuhuananujiniji, puetunu Jesu pueyajaari juhuacatecara nacoquiaari nojori shuquiriniutia. Nojoriiri Jesu maniniuhuaqueetariquiaa puetunu na cumacata na miishanojuanaa nojori niqiniuucua. Nojoriiri cunora jiyanojua shuquiritariquiaa Pueyaso. ³⁸ Nojoriiri naa nacooriquiaa:

—¿Pueyaso cuara shuquiritiiria pa Jiyaniija, Pueyaso Jiyarosano na quiniuucua! Pueyaso pocua taraajerohuani. Pa jiyanoorihuani. ¡Nojuajaari jiyanojua maninia! ¡Pa shuquiritarienoj!

³⁹ Cuniqi pueya tajinia quiniaa Fariseocuaca tojishacari naa nojori sequesantej, nojoriiri Jesu sequeree:

—¿Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequerejaa:

—Seetanujuanaa nia sequeyanijia, nio pojori jaara sanaajetare, ¿sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiri quia quiarijiani, casaa quia paniya jiyanooshano quia quiniuriani, shuquiriaatia quia quiniurijuhua. Taraatia quijianaa, quia Jiyanooriquianoori juucua niya quiya. Majaari quia niishiniu nojuaja, juhua nimishitii

quia quishacari. ⁴³ Cunora, na nuhuajiiri jiyano hua tارااتيا quiniutianiya quia ra. Quia paraari quia mataconutaniya quia shocuaqueya, na cosenura maninia quia janiya quia mashiaquiniucuaaji. Naacujitij, quia paraari quia quocua juhuacunutaniya na miaquejonura quia janiya. ⁴⁴ Quiaari jiyareta sureesaanutaniya. Quia tiacajinia quiniiaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiaquiniucua, Pueyasoori quia quocua niquiaari najuhuanaj, quia quocuaaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuete na seya niqutiojori quia quocuaaji na Pueyasoo cuara puecoosocoriquiano. ⁴⁶ Jesuuri nojori sequeree:

—Tariucuaaanu Pueyaso Rupaajinia naa naajiotasaquiariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuuquaja quiquiora!

⁴⁷ Puetunu juucajanaa, Jesuuri jiyacari pueya niishitiojori quia quocuaaji na Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuaara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiari quia quocuaaji na puetunu Jesu sequesanojuanaa. Cunora, majaari cuno jiyaniijianucua naata monu quiri quia quocuaaji na Jesu.

20

Pueya nequesotasacari Jesu, cante na jiyaronani

(Mt 21.23-27; Mr 11.27-33)

¹ Tamonu juuca, Jesuuri Pueyaso Secojoua tiajinia niishitiojori quia quocuaaji na Pueya niquiaara pohuatariquiaari taate nojori naata Pueyaso muerasura quiniuni. Jiyacaritij, pueyacuaara secojonaa jiyaniijianucuaari Jesuucua niijomaa. Moisés Rootasanojiniji niishitiojonaari nojoritia niijomaa juhuaj, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riucuaare! ¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu panijaju huaj. Cua riucuaare. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujanaa Pueyaso sequenu panishano caminiuujia quiquiaari”.

⁷ Nojoriiri cunora Jesu riucuaare:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyajuhuaaj, majaari cua sequenu quiniutianiya niajaniya, cante cua jiyaroquiaarini naa cua miiniuriatej.

Miriqui Jesu pohuatasano sesa mijiaca poonijonaajiniji

(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu coteerohuacuhuaaj nio miriqui pohuatasano. Sequereeri:

—Tamonu pueyanoori cuhuariquijinia uva nattooquiaari. Na nuhuaji, na niqutioquiarini tamasa pueyari, nojori cojuanura nera. Na camaruari tucuaaanu quiaaree, ti

na shocotejonura marijia. ¹⁰Uva quishacari noshuriujua, saniya cuhuariquia camarujua-naari na seru jiyaroree cuhuariquia cojuanaa pueyacia. Jiyarosaareeri tiji na masenura na camarurajanaa, uva carojotasanojiniji. Na camarujuaa cuajaari tarijia pocoojo-quaari cuhuariquia cojuanaa pueyata, taa nojori niqutionutaniya na carojotasanojiniji. Cuhuariquia camaru seru tiuquishacari, ¡cuhuariquia cojuanaari na piquitiuri saaja! Na jiyaroturohua juhuasuuri. ¹¹Cunora, cuhuariquia camarujuaaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuri. Na jiyaroturohua juhuasuajaariuhuj. ¹²Cuhuariquia camarujuaaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

¹³Naaratej, cuhuariquia camaruuri tama sequereaja: “¿Taa cua miiniutianiyarini? Quiyanuniyoja jiyaroreeraquij. Cuno pojori jaara cua panishano niyanu niqitiuri, maja naasucua nojori rerequetenu quiniutianiya nojuaja”. ¹⁴Saniniujia, cuhuariquia cojuanaa jaara cuhuariquia camaru niyanujanaa niquirii nojoriicua niyano, tama nojorijiaarijia sequetoree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqiu na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini?

¹⁶Seetanujanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuaara naa miyaquiiriatej!

¹⁷Jesuuri nojori niqiniijoree. Nojori sequereeri:

—¿Naatee? ¿Nio naajiotasanooriuhuj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutaniya, nojori jyanishacari cuno saajia sesarujau. Na nuhuaji, cuno saajiaari socua panishano saajiaari jiyatesaanutanihua”.

¹⁸Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyani. Shahuej.

¹⁹Jiyacaritij, pueyacuara secojonaa jyanijianucua, mariyata Moisés Rootasanojiniji ni-shitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaa pueya.

Jiya jyanijia cuaara niqitiosaaria na sequesano cumaneeca

(Mt 22.15-22; Mr 12.13-17)

²⁰Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujasaanura. Jesu jaara nojori riucuaquiaari sesa, maara Romano jyanijia niqitiosaaquiaari saniitosocoriquiano. ²¹Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niqiniu pueya. Quiaacuajaari seetanujanaa niishitioquiaa, taa Pueyaso paniya canaa miiniuracuajani. ²²Cunora, canaa quia sequere taa canaa miiniutianiyani. Roma tiacajinia quijia jyanijiaari pa sequequiaari Judiucuaca cuaara cumaneeca niqitiojora nera, na jitianasano pueya pa quishacari. Naaratej, ¿maniateeri pa miiniuria na sequesano?

²³Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

²⁴—Cua niquitiri quia cumanee. ¿Niooriuhuj? ¿Cana naaquiti nocuani? ¿Cana sesate nocua naajiotasanoni?

Jesu riuacuatureeri:

—Cunocuaa canaa sequesano Roma tiacajinia quijia jiyaniijia César naaqui, na sesajuhuj.

²⁵Jesuuri nojori sequeree:

—Jiyaniijia César cu meta na casaaja niquitiosaaria. Nojuacuajaari na camaru. Saniniuujia, Pueyaso nia niquitiore cutara nerano meta na casaaja. Nojuajaari pa camarnu.

²⁶Saaja maninia Jesu riuacuasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riuacuasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhua?

(Mt 22.23-33; Mr 12.18-27)

²⁷Na nuhuaji, noojiaqueya Saduceocacajiniiniiori Jesuucua niquiaari. Saduceocacacari jiyaniijia macunucua pueya meta na samiitiaconu quiniutianihua. Naaratej, nojoriiri Jesu sequeree:

²⁸—Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu meta camiriia mashiquio, mueya na mueratenura tarajanu niti. ²⁹Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhujua. ³⁰Cunora, na nuhuajishanaari na mashiquio camirii. Nojuajaari muetuhujua cusoquiaarijuhuaj.

³¹Naaratej, neyaca tarajanuuri mashiquio camiquiaarijuhuaj. Nojuajaari muetuhujua cusoquiaarijuhuaj. Puetunu cuno mashiquiorijianaari naa camiyoquiaari cuno maajitia. Puetunu nojorijianaari cusunuuquiaari muetuhujua. ³²Na nuhuaji, pueya mashiquioori shaajequiaarijuhuaj. ³³Naacuajitij, macunucua jaara samiitacorohua, ¿teyano cuno siete neyacaajiniiniote seetanu neyacajanaa quiniutianiyani? Cuno mashiquiocuajaari puetunu cuno siete pueya niquiocua quiquiaari.

³⁴Jesuuri nojori riuacaree:

—Mijiria pa quishacarijia, canuu, maajipohuari camiyoquiaa. ³⁵Saniniuujia, majaari noo pojori camiyonu quiniutianiya canapute samiitianijiosaanutaniuhacuajani, maninia quijia nojori quiniucua Pueyaso niquiara mijiria. ³⁶Majaari nojori shaajenu quiniutianihua. Nojoriiri shaajeyashijia quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujanaa quiniutianiya cutara.

³⁷Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoari naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijajuhuj”.

³⁸Naacuajitij, paari niishiyani, puetunu Pueyasocua tiuujiaca shaajecono pueyajanaani, nojoricuajaari saminiucua quiya Pueyasora. Pueyasoari maja macunucua Jiyaniijia. Na pueya shaajeconocuaari saminiucua quiya nera cutara.

³⁹Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequeree:

—Maniniacuajaari quia sequesano, Niishitiojonanaa.

⁴⁰Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹Jesuuri naa nojori nequesotaree saniniuujia:

—¿Casaara na sequesaaquiacuaraarini, Pueyaso Jiyarosanoari supuetana David niquihoacuajinio supuenutaniya? ⁴²⁻⁴³Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia’ ”.

⁴⁴¿Cristotucua taa David niqiuohuacuajinio supuereni? Davidcuajaari na sequeya “cua Jiyaniijiaata”.

Cuno pueyari maja na naata na riuवानु quiriqiaa.

Jesu numootesacari na pueya, Moisés Rootasanojiniji niishitiojonaa pueyacuaji

(Mt 23.1-36; Mr 12.38-40; Lc 11.37-54)

⁴⁵Puetunu pueyajanaa tojtiasacarijia Jesu, Jesuuri naa na saquiriojosano pueya sequeere:

⁴⁶—Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniucuaaji taa nojori miiquiaacuani. Nojoriiri tucuaque toqueya cushiniu maniniucuaquiaa na rucuanejotajara pueya niqiuara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanijosacari tiaca jiuujiajinia curotasano cajitiucujinia. Nojoriiri socua panishano cajitiucujinia cajiniu maniniucuaquiaa Pueyaso Secojojuatiajinia, tamasaca tiajiniajuhuaj, nojori jaara masuusaare queranacunura. ⁴⁷Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niqiuara, nojoriiri najuhuana tucuyocua secojoquiaa Pueyaso, pueya jiyaniinuria nojori maninia pueya cutara. Naa nojori miiniuucuatej, nojoriiri jiyanhua saniitiosano quiniutianiya.

21

Casamijiu mashiquio niqitiosacari na cumanee juurane Pueyasora

(Mr 12.41-44)

¹Pueyaso Secojojuatiajinia, Jesuuri casamiriaca pueya shootiariquiaa na cumaneeca nojijano cumaneeca racataja quiquiojinia, nojori niqitiosano Pueyasora. ²Jesuuri tamonu casamijiu mashiquio niqiriijuhua caapiqui cumaneeniyoju niaano tiijuhuj. Na niasanoori nareja cobrejiniiji shipinishano cumaneeca quiquiaari. ³Jesuuri na pueya sequeere:

—Seetanujanaa nia sequeyanijia, cuno casamijiu mashiquioori socua queraatia niquitioree Pueyaso, cuno casamiriaca pueyajiniji. ⁴Puetunu cuno pojorijianaari saaja na cureeno cumaneecajiniiji niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niquitioree.

Jesu pohuatasacari, Pueyaso Secojojuatia niyartasaanutaniya

(Mt 24.1-2; Mr 13.1-2)

⁵Noojiaqueya tii quiniaa pueyari pocoojoriquiaa Pueyaso Secojojuatiajiniji. Jiyanhua shanhua saitia shipinishano quiriqiaari. Nojoriiri na shootiariquiaa, naajuhuj taa na maniniushitishaaquiaari nareja pueya niqutiojosano casamitiani. Jesuuri nojori sequeere:

⁶—Puetunu cunojuanaa niaa na niquiyani, tamacari niyartasaanutaniyari. Majaari que-naaja tamonu saajia cureenu quiniutianiya tamonu caco maano. Puetunu niyartasaanutaniyanaari.

Taa nio jiya puequenu panishacari quiniutianiyan

(Mt 24.3-28; Mr 13.3-23)

⁷Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutianiyarini, canaa niishiniuria quia sequesanoori quera tohuateya?

⁸Jesuuri nojori riuवानु:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuuja pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojinu cuno sapojonuuja. ⁹Naajuhuj, majaari nia puerenu niaa jaara tojiri tamonu

jiyajinijinio pueyari tamasaqa jiyacajiniji pueyata miaquetoojiya, naajuhuaq, pueya jaara juaatooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰Jesuuri naa nojori pohuatariquiaa socua:

—Tamonu rupaa pocuajacaari miaquetoojonutaniya tamaatia rupaa pocuajacata. Naa-juhuaq, tamonu jiyajinijinio jiyaniijiaari miaquetoojonutaniya tamonu jiyajinijinio narta jiyaniijiaata. Naa queraatia miaquetoojonuuri quiniutianiya. ¹¹Rijiaari jiyanojua jiu-quiuijutiutanutaniya queraatia jiyacajinia. Jiyanojua miaajenuuri quiniutianiya queraatia tamonu jiyacajiniajuhuaq. Paaqueja cusonuuri quiniutianiya niya, tamaquicuajuhuaq. Naajuhuaq, jiyanojua puereeta casaari niqushaanutaniya jiyocuaaanu, mijiria quiniaa niishiniuria jiya puequenuraari tari catecanoya.

¹²Cuno puereeta quiaquishacarijia, niaari quioosaanutaniya naquiya nia miishaanura, cua pueya nia quiniucua. Niaari jaatucusaanutaniya Pueyaso secosonuuja tiajiniaqueya nequesoresocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoresocoriquiano. Niaari naa miishaanutaniya nia pohuatanuucua janiyajiniji pueya niquiara. ¹³Naacuajitij, nia naata cuno jiyaniijianucua niquiara pohuatani janiyajiniji. ¹⁴Nioojia nia cajitiri, maja juhuacarijia nia niishiriojonura taa nia riucuanutaniya nojorini. ¹⁵Janiyacujaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jiyanojua cua niishitiajatani. Niaari nojori sanaajanutaniya maninia nia riuhuanesacari saaja. Nia paraari maja na naata nia sequesano rerequetenu quiniutianiya. ¹⁶Jiyacarijiuhuaq, tama nia queyajaarijia nia tacartanutaniya, cua pueya nia quiniucua. Nia tapueyocuaacari nia tacartanutaniyajuhuaq, nia jiya-soocujinijo supueno pueyajuhuaq, nia rupuenaanio. Nojoriiri noojiaqueya nijaniyajinijinio puecoonutaniya. ¹⁷Puetunu mijiria quiniaa pueyajanaari nia niquiniu paniyaquiniutianiya cua pueya nia quishacari. ¹⁸Naajaa, majaari nia puereenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara nia nia muesu cojuaacuaa, ¿maatucua casaara cojuaacuiri saniya nia-janiyani? ¹⁹Naaratej, rejeretajaca nia quiri. Naa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa nijaniya.

²⁰Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. ²¹Jiyacaritij, canapuete Judea jiyajinia quiyani, cuno pojori cuara mashiiria tuhuanaanuhuaqua. Canapuete Jerusalén tiacajinia quiyani, nojori cuara ritia mashiiria tiji. Canapuete na cuhuariquiajinia quiyani, nojori cuara tacateyaquiuhuaa Jerusalén tiacajiniuhua. ²²Cuno quishacari, jiyanojua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenu-taniya. ²³Jiyanojua taraatia quiniutianiyari noo maajipohuaa, canapuete manajaatohua quiya jiyacarini, mariyata canapuete conaaja supueja jiitiaani. Jiyanojua naquiya quiniutianiyari cuno quishacari nio jiyajinia. Nio jiya pueyari jiyanojua saniitiosaanutaniya. ²⁴Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijiosocoriquiano. Taucuaacari Jerusalén tiaca jiitianutaniya tama nojoririjaaja, Jerusalén tiaca nojori jiitianu cuara puequierejaatijia, taa Pueyaso sequequiaari tamajacuajani.

Taa na quiniutianiyani Jesu tacatesacariuhua

(Mt 24.29-35, 42-44; Mr 13.24-37)

²⁵Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaq. Shoniniacu caminiaacuaji shiriitiutiutianiyaajaariuhuaq, jiyanojua na queyocuasacari. Nojoriiri cushitiutiutianiya na puere-tunutajuhuaq, jiyanojua cojuata shoniniacu caminia cajiniucuasacari. ²⁶Mijiria quini-aari cusosonunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuquiutiasaanu-

taniya jiyano hua. ²⁷Jiyacaritij, mijiria quiniaari cua niqutiuniutianiya cohuaja najacajinia niyano, jiyano hua shacantuuca cua cumaacata. ²⁸Naaratej, niaa jaara nio cua pohuatasano niquri tari coteyano, niocua tama cumaquitioorejaaja. ¡Niocua timiri! ¡Niaacuajaari quera rijiosaanutaniya niquriji, pueyaracaanu cuata nia quiniuria!

²⁹Jesuuri nojori pohuataree nio miriqui pohuatasanojuhuaj:

—Higo naana nia niquri, tamonu jaranacujua naananio. ³⁰Na jaamasucua jaara mueratuure, niaari niishiya, tacareejonuqui quera quiniutianiya. ³¹Naajuhuj, niaa jaara puetunu cua pohuatasanojuanaa niquri tari tohuateyano, niocua jiyacari niishiri, janiyari quera tiuquihuani, Jiyaniijajanaa cua quiniuria.

³²Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaa pueya puequeyaquishacarijia. ³³Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

³⁴Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵Cua tiuquishacariuhua, juhua norijiotaja quiniutianiyaari puetunu mijiria quiniaa pueyarajanaa, taa norijiotaja canashiyaquiji majaacuaani. ³⁶Cunora, cucuaji jeenucuasano nia qiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tajoji, cua nequesoreesacari puetunu pueyajanaa.

³⁷Jesuuri puetunu juucajanaa niishitiojua Pueyaso Secojojuajia. Saniniuujia, niucua quiojojuuari Olivo cuhuariquia tuhuananujinia tii na quiniuria. ³⁸Puetunu pueyajanaari tariquicuaji quiojojuajia Pueyaso Secojojuajia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura
(Mt 26.1-5, 14-16; Mr 14.1-2, 10-11; Jn 11.45-53)

¹Quera Pascuara queranacunuusacari quiquiaari, pueya miaquesacari pan na poreetajaaju shipinishano. ²Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriqiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyano hua queraatia pueya paniniuucua Jesu.

³Jiyacaritij, Satanásri Jesu pueyano Judas Iscariote jiuujiajinia tiuquiquiaari. ⁴Nojuajaari pueyacuara secojonaa jiyaniijianucuaacua quiaquiaari, Pueyaso Secojojuajia tia cojuanaa jiyaniijianucuaacujuhuj. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohujani.

Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

⁷Poreetajaaju pan miaquenu juucaari tari quiquiaari. Cuno juucajuhuj, borregoori mosano quijia, Pueyaso niquiara miaquesocoriquiano Pascuara queranacuasacari. ⁸Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara.

⁹Nojoriiri na nequesotaree:

—¿Tee quia paniya canaa majeetenurani?

¹⁰Jesuuri nojori riucaaree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tijajinaria. ¹¹ Cuno tijajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’ ” ¹² Nojuajaari nia niqunitiutianiya puereetuuca sohuaca, nataco na tijajinia, tariucua jeenucasano. Niocua cuniqui miishii puetunujuanaa pa miaquesocoriqiano.

¹³ Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriqiano.

¹⁴ Jaara tari quiquiaari Pascuara miaquesacari niucua, Jesuuri na saquiriojosano pueyata cajitiushii miaquejajinia. ¹⁵ Jesuuri nojori sequeere:

—Janiyari jiyanohua niaata miaquenu paniriquiaa nio Pascua niucuan, pueya moyaquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu nijanyajanaa. ¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqunitiojoreeri. Nojori sequereeri:

—Niiori cua cuaqueya niaacuara mosocoriqiano. Niocua naa miiriquia pueyaraaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniyani taa janiyajiniji juhuacarijia pohuatasaaquiaaricuajani tariucuaaanu Pueyaso Rupaajinia. Saniniuujia, cua tacartanaari jiyanohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetooree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonuutariquiaajaacujua, teyano nojorijinijiniote jiyaniijajanaani. ²⁵ Jesuuri nojori sequeere saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jitiiasano pueya, juhua nojori poonitijiosano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. ²⁶ Nijaniya saniniuujia, majaari naa nia quiniu juhua nojorijia. Cante socua tojishano pueyano quiya nijanyajinjini, nojuaja cuaara tama na cuaqueyajaaja jiyateyaquiiiria na cumaaca paaretaja pueyacua. Cuaara quiriia jacaria pocuaja. Naajuhuj, cante jiyaniijajanaa quiya nijanyajinjini, nojuaja cuaara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¿Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria nijaniya. Naajuhuj, naa maninia miijica nia quiriqia.

²⁸ Niacuajaari pueyaracaanu cua cojiriqiaa janiya jaara saniniuujishaariquiaani.

²⁹ Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰ Niacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuj, Jiyaniijajanaa

cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreenaa nia quiniuria.

Jesu sequesacari Pedro, nojuaja nocuaji seetanutaniya
(Mt 26.31-35; Mr 14.27-31; Jn 13.36-38)

³¹Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanhua na saniniujiuniuria niajaniya. Naacuajitij, niaari jiyanhua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. ³²Janiyari saniniujia Pueyaso secojoree quiocuara cutarani Simónnaa, cucua tiuuniu quia tarinitiaaquini-uucujaji. Naacuajitij, quiaa jaara quioojia tacatorohua cucua, quiocua quarta pueya cumaquiriohuajuhuj, nojori tiuuniuria seetanujuanaa pueyaracaanu cucua.

³³Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuara nujuatesaaria quiatajuhuaj! ¡Quiaa jaara mosaare, naajaa, janiya cuara cojiritiasaaria quiajanijajuhuj!

³⁴Jesuuri na sequeree:

—Pedronaa, seetanujuanaa quia sequeyanijia, caacaraja niunijiaquishacarijia quiarjia, quiaari tari naa cucujaji seetanu caminiujiuniutianiya pueya niquiara: “¡Maja cua niishiniu Jesu!”

Quera Jesu miishacari taraatia

³⁵Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoquee-juni, cumaneeca quiquioju, sapatuujunio, ¿niaateeri nia panishano casaa niquitioy-aquishaaquiaari?

Nojoriiri Jesu riucaaree:

—Maja. Canaacuajaari puetunu canaa panishanojuanaa niquitiojosaaquiaarini.

³⁶Jesuuri nojori sequeree:

—Quiarjia saniniujia, cante caashoqueracani, cuara na pataara. Cante cumaneeca quiquioracani, cuara na pataarajuhuj. Cante nijiniaquetucuja mueruu jitiiaaquiyani, cuno cuara niquitioora na shiniquiaacuaji toque, nijiniaquetucuja mueruu na masenura na toque samitia. ³⁷Seetanujuanaa nia sequeyanijia, tariucuacaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyaniishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa naajiotasaaquiaaricujani.

³⁸Nojoriiri Jesu sequeree:

—Jiyaniijianaa, niya quiya caapiqui nijiniaquetucuja mueruu.

Nojori riucaareeri:

—Tariucuaja.

Jesu secojosacari Pueyaso, Getsemani cuhuariquijajinia
(Mt 26.36-46; Mr 14.32-42)

³⁹Na nuhuaji, Jesuuri tohuataquiaari tijajiniji. Olivo cuhuariquia tuhuananujiniara quiaareeri. Nojuajaari cuniqui quianura jitiiquiaari. Na saquiriojosano pueyari na nuhuajiyaree. ⁴⁰Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

⁴¹Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojuquetasee Pueyaso secojonuraari. ⁴²Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuara miyaquishaaria taa cua paniyani. Janiya cuara miishaaria cutara taa quia paniyacuajani.

⁴³Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴Jesuuri jiyanhua naquiya miiriquiaa. Noojaari quera jiaqueriquiaa na tacaaniutia. ¡Jiyanhua, jiyanhua secojoriquiaa Pueyasoori! Cunora, na paneyacaari puereetujuaca juhua nanaca quiriquiaa, na caatesacari jiyocua. ⁴⁵Na secojonu nuhuaji, Jesuuri sanerohua.

Na pueyacuatacateyarohuari. Nojori niqishuhua maquetiuyano saajaari, puera nojori taraajenuucua. ⁴⁶Jesuuri nojori sequeree:

—¿Casaara nia maquetiuyani? Nia saneecuatere. Pueyaso nia secojore na cojuanura nijaniya, maja sesa nia miiniuria niaa jaara saniniujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷Jesu pocuasacari nia pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajiniinio quiquiaari. Judasri Jesuucua nimiaajanaa. Na saruhuataseeri na nujuunuta. ⁴⁸Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹Jesu pueya niqishacari casaa cuno pueya miini paniriquiaani, nojoriiri Jesu neque-sotaree:

—Jiyaniijianaa, ¿canaate nojori miaqueyani?

⁵⁰Tamonu nojorijiniiniori pueyacuara secojonaa jiyaniijia seru piri na mueruuta. Saaja na miaquetajara numoco jaatereeri. ⁵¹Jesuuri na sequeree:

—¡Tariucuaaja! Maja naa miiniu.

Jesuuri numoco riri. Na ruporohuari. ⁵²Judasta quiriquiaari pueyacuara secojonaa jiyaniijianucua, Pueyaso Secojoua tia cojuanaa jiyaniijianucuaajuhuj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijoree nijiniaquetucuaaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatee? ⁵³Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiarijia cutaraari nijaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji
(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhajiriquiaa. ⁵⁵Jiyacaritij, pueyari jiyaniijia tia carijiniacuma mani noshitirii. Na shocua cajitiurihuari. Pedroori nojori tajinia cajishiijuhuaj. ⁵⁶Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

⁵⁸Na nuhuaji, tamonu pueyanoori Pedro niquiriijuhuaj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijiniinio pueyanojuhuj!

Pedroori saa sequereejaa:

—¡Maja, pueyanonaa! ¡Janiya maja nojorijiniinioni!

⁵⁹Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocuaajaari cuno pueyanota quijia. Nojuajaari Galilea jiyajiniinijuhuj.

⁶⁰Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijoree. ⁶¹Jiyaniijia Jesuuri tacate-quee. Na nijinaria niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujiuniantianiya janiyajiniji pueya niqiuara, caacaraja niunijiaquishacarijia”. ⁶²Pedroori cuniquiji tohuataquee. Jiyano hua nujuquereeri na taraajenuta, sacuaratata na seetanuucua.

Pueya macaathishacari Jesu
(Mt 26.67-68; Mr 14.65)

⁶³ Jesu cojuanaa pueyari Jesu macaatiiriquiaa. Nojoriiri na piquitiuriquiaa. ⁶⁴ Nojoriiri Jesu namijia morotuquiaari coteenu. Na jiquioco piquitiuriuhuari. Na nuhuaji, na sequetureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macaatiinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojona jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequereni: “Taaquiriirinij”, niaari saaja cua sequenutaniya: “Quiaa sapojia”. ⁶⁸ Saniniuuja, janiya jaara nia nequesoreere Pueyaso Jiyarosanojinijini, majaari nia riucaanu quiniutianiya janiya. ⁶⁹ Naajaa, quiarijiani, janiyari puetunu cumaacaraca Quijiajanaa miaquetajara cajiniutianiya jiyocuacaanuni.

⁷⁰ Naa Jesu sequesacariitij, puetunu nojoriijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiriirinij. Naacuaaquinatejaj, taa nia sequeyacuajani.

⁷¹ Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriqianoni? Paacuaaari tari tama pa numaatajaaja sesa na sequesano tojtiaareeni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojoriijianaari sanetaree. Jesu jiyatatiuyareeri jiyaniijia Pilatoocua. ² Cuniqwi, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasajoquiaa pocuara. Nojuajaari niishitiojoquiaajuhuj, maja canaa Israel pueya niqutiojonura canaa cumaneeca pa jiyaniijiajanaa Césarra, taa César sequequiaaricuajani. Naajuhuj, tama nojuajaari nia sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiriirinij. Naacuaaj, taa quia sequereecuajani.

⁴ Jiyacariitij, Pilatoori pueyacuara secojona jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miijia.

⁵ Nojoriiri saaja socua jiyacateere Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniyani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niqiniuucua jiaatija juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniu panijia juucua. Naacuajitij, na niqishacari Jesu,

nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riu-cuanu quiquiaari nojuaja. ¹⁰ Pueyacuara secojonaa jiyaniijianucuaari tii quiriqiaajuhujaj, Moisés Rootasanojiniji niishitiojonaanio. Cuno pojoriri jiyanoahua Jesuucuaara saquirio-jotariquiaa queraatia sesa casaa. ¹¹ Herodesri na soldadohuata Jesu rerequeteriquiaa. Na macaatiiri. Na cushitirii jiyanoahua shanohua toqueeri juhua jiyaniijia cushishano. Na nuhuaji, Herodesri pueya jiyarotrohua Jesu Pilatoocua. ¹² Herodesri cuno juuca Pilato rupuenara quiquiaari. Coteenu, majaari nojori niquitioonu paniniu quijia. Nojoriiri saaja shocotetoojua.

*Puetunu pueyajanaa sequesacari Jesu cuaara mosaaria
(Mt 27.15-26; Mr 15.6-15; Jn 18.39-19.16)*

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhujaj, tii quiniaa pueyano. ¹⁴ Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niqiarani. Ni-aacuajaari cua tojtariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanajuanaari maja seetanujuanaa. ¹⁵ Jiyaniijia Herodesqui-iri tari niishiyajuhujaj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. ¹⁶ Janiyari na majacutenutaniya narejani, cartesaarohuari.

¹⁷ Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajini. Nojuajaari naa miiquiaari pueyaracaanutej, pueya na shuquiritiniuria.

¹⁸ Jiyacaritij, puetunu pueyajanaari juhuacatecara jiyanoahua nacaree jatiqui:

—¡Jesu quia more! ¡Barrabás quia cartere saniniuujia!

¹⁹ Tarijia cuno Barrabási narta nasojosano Judiocuacata Romano pueya taanuuquiaari juucua Jerusalén tiacajini. Nojuajaari jiyacari pueyano moquiaarijuhujaj. Cunora, nojuajaari nujuatejojuajinia nujuatesano quiriqiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoojorohua socua. ²¹ Pueyari saaja jiyacaterree jiyanoahua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

²² Pilatoori pueya sequenu pacuterohuacuhujaj:

—¿Maatucua casaara mosaarejarani? ¿Sesa miiritijiaaraj? Janiyacuajaari tari na nequesoreereni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³ Pueyari saaja socua jiyanoahua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanoahua nacooriguiaa. Puera jiyanoahua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriqiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequesano pueyano cartereeri, cante nujuatesaquiari nujuatejojuajiniacuajani na taanuunu paniniuucua Romano pueya, na monuucua pueyano-juhujaj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriqiaacuajani.

*Niyacutesanojinia Jesu teetesacari
(Mt 27.32-44; Mr 15.21-32; Jn 19.17-27)*

²⁶ Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaree Jesu nuhuaji.

²⁷ Queraatia pueyari Jesu nuhuajiriqiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuaaja nia nujuquette, nia niquiohuacuano. ²⁹Na nuhuaji, jiyano hua taraatia quishacariiri quiniutianiya niaara, jiyano hua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuanu, mariyata cante mueya supueteyashijianucua janiuhua”. Mueyaraca maajipohuari jiyacari jiyano hua taraajenutaniya, nojori niquishacari necohua miishacari naquiya. ³⁰Naquiya miishacari, jiyacaritij, pueyari tuhananuhua sequenutaniya: “¡Canaacua quia jiyaretaare!” Naajuhua, shiitianiyojua tuhananuhua sequenutaniya: “¡Canaacua nia tiyare canaa nia jamonura!” ³¹Jiyacariiri jiyano hua naquiya miishacari quiniutianiya. Quiarijia, janiya jaara naa naquiya miishiyacuani, ¿taaquitijia Pueyaso tojtiaashijia miishaanutaniyatejaj?

³²Caapiqui sesa miijiaacari jaatucunuusaariquiaajuhua, mariyata teetesocoriquiano Jesuta. ³³Nojoriiri puecoosaqui tiuquijiosee. Cuniqiu pueya puecoosaquini, na sesa quiquiaari “Pueyano Nacaco”. Nojoriiri tii Jesu teetere maca niyacutesanojinia. Cuno caapiqui sesa miijiaacari teetesosaareejuhua, niquiriyatu na miaquetajara, tamonu na muenecara. ³⁴Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenea, quia jiyanoori nio pojori! Majaari nojori niishiniu casaa na miitiyani.

Na nuhuaji, soldadohuari saitia tacuarishijioree, nojori niishiniuria taa nojori seraanutaniya Jesu toqeni. ³⁵Pueyari Jesu shootiariquiaa. Judiocuaca jiyaniijianucuaari jaaraaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuaana Pueyaso Jiyarosano Cristo quiri, cuaara roseera niyacutesanojiniji pa niquiara.

³⁶Soldadohuari Jesu macatiriquiaajuhua. Nojoriiri Jesu raateree piiquia vino juucua.

³⁷Jesu sequetureeri:

—Quiaa jaara Judiocuaca jiyaniijia quiri, niyacutesanojiniji quia rosereluarajaj!

³⁸Jesu nacaacua, suruhuatuneeri rupotasaaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhua. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserējaaja cuniquiji. ¡Canaa quia roshinijorejuhua!

⁴⁰Narta sesa miijiaari na juaari:

—¿Quiaateeri Pueyaso puereshijia? Quiaari mosaanutaniyajuhua. ⁴¹Pajaniya cutaraari sesa pa miiniucua naquiya miishiyani. Paacuajaari maninia saniitioshiyani sesa pa miiniucua. Saniniuujia, nio pueyano pa tajinia nujuataani, nojuajaari sesa miyashijia cutara!

⁴²Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyaniijiajanaa quia quiniuria.

⁴³Jesuuri na riuacuaree:

—Seetanujuaana quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴Panacari, jiyari ninishiquiria quiquiaari puetunujuanaa, juhua niucua! Pananu priuushacari, cuhuatemohuari. ⁴⁵Jiya quishacarijia ninishiqui, jiyacaritij, Jerusalén tiacajinia Pueyaso Secojojua tijajinia, jiyano hua shiquiquiaa toquejiniji sohuacaari noojiaacoji sutequiaari puetunujuanaa querajaquera! ⁴⁶Jiyacarijijuhua, Jesuuri nacaree:

—¡Cua Quenea, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequere:

—¡Seetanujanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriquiajaaja piquiniuuquiaariuhua, jiyanohua nojori tacaaniutia naa nojori monuucua Jesu. ⁴⁹ Saniniuujia, puetunu Jesu niishishano pueyajanaari tii jiyojetarohuajaa, maajipohuajuhua, canapuate Jesu nuhujia-jiquiaari Galilea jiyajinjicujani. Puetunu nojorijianaari tucuaaanuji niqutiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinjini. Cuno tiacaari Judea jiyajinjiajuhaj. Cuno pueyano sesa quiquiaari José. Nojuajaari Judiocuaca jiyaniijianucujinjini quiquiaari. ⁵¹ Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijiaara jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. ⁵² Naacujitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojinijiiri. Na jiunioceeri cohujaque quenaaruque toquejinia. Jesu quete niaree tarijia na jiuutianishano saajiajiniaari. Cuno raajinia, juhuanajuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajinjicujani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasareeni. ⁵⁶ Nojori riujuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriuhua samaatenu juuca, taa Moisés rootaquiaaricujani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquijiosacari raajinia, saajiajiniji quejasano raa tiotiu niqutiushiiri tariucua tamocora shuquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Majaari nojori niishiniu quiriquiaa taa nojori miiniutianiyan. Canashyaquiji caapiqui pueyari nojori shuriucua nujuatuquee. Nojori toqueeri shacantueque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequere:

—¿Casaara nia pajeya saminio pueyano macu niojosaquini? ⁶ Maja tari niya na quini. ¡Tari samiitarohuano! ¿Niaateeri tari niyajetaree na sequesano nijaniya, Galilea jiyajinia na quishacarijia? ⁷ Nojuajaari tari nia sequecanucua, nojuaja sesa miijica niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiuujishuhua puetunu niojuanaa, puetunu Jesuucua tiuuniaa pueyajanaano. ¹⁰ Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhua, socua tamasa maajipohuano. ¹¹ Jesu

once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiuniocotaja cohuajaque toque niqiquiaari maanoori. Pedroori juhua jiuujiaaju tacateyarohua na shiriqiniutia, na niquishanojiniji, maajipohua pohuatasanojinijinio.

Jesu tojtianaa pueya niquishacari Jesu, nojori quiasacari Emaús tiacajiniara
(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriqiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tiriara.

¹⁴ Nojori quiojosacari nuacuco, nojoriiri Jesujiniji pocojoriqiaa, mariyata shusha naataja pueya miishanojiniji Jesu. ¹⁵ Naa nojori pocojosacari nuacuacotej, Jesujuanaari jiyacari nojori rupuesee. Juhujaniya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casaa nia pocojotaacuuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiqianujuhuaj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano camini-
ujinua quiqianu. ¡Jiyanohua maninia quiqiaari na cumaacata na miijiosano, na ni-
ishitiojosanojuhuaj! Pueyaso timitiasano quiqiaari, puetunu pueya panishanojuanaanio.

²⁰ Pueyacuara secोजना jiyaniijianucua, mariyata pa camarucuaari na niqitorucuaa Romano jiyaniijia na motesocoriquiano. Niyacutesanojinia mosaarucuaari. ²¹ Canaari ju-
ucua jiyaniqianuni, nojuajaari Romano pueya taanuunutaniya, pa Israel pueya qiniuria
juhujaniya tama pajaniyajaaja. Quiarijiani, jiuujanaraca juucaari tari na shoconujia
na mosaanujiniji. ²² Tamasaca maajipohua canaa maanujinijinoori canaa shioree nojori
pohuatasano. Nojoriiri quiaritia tariquicuaji quiojoomaa Jesu raajinia. ²³ Nojoriiri maja
na riuritanu quishii na quete. Nojori tacatesacariuhua, nojoriiri canaa pohuatasuhua,
nojorinia Pueyaso seya niquirii juhua na maquenujinia. ¡Cuno Pueyaso seyanaari nojori
sequeree, Jesu tari samiitarohua! ²⁴ Na nuhuaji, tamasaca canaajinijinoori raajinia quio-
jiyareejuhuaj. Seetanujanaa naa quiriqiaari, taa maajipohua sequeree canacuajani.
Maja cutaraari nojori niqiniu quirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiiri juhuanojuaja nia niishiniu. Niaari taacanuyajaa puetunu
tariucuaaanu Pueyaso sequesano caminiujinuaa naajiotasanoocujanaa nia tiuuniuria.

²⁶ ¿Majateeri naa na pohuatasaanu quiqiaaricuaaja: “Cristoori coteenu naa mosaanu-
taniyaquij. Na nuhuaji cutara, jiyanohua cumaacaraca quiqiaari jiyatesaanutaniuhuari
tianiijiajanaa na quiniuria”?

²⁷ Jesuuri juhuacatecara nojori niishitiojoree puetunu tariucuaaanu Pueyaso Rupaajini-
jijianaa, tee nojuajiniji naajiotasano quiyacuajani. Moisés naajiotasanojiniji pohuatanu
coteereeri, na nuhuaji, puetunu Pueyaso sequesano caminiujinuaa naajiotasanojiniji-
jianaanio.

²⁸ Nojori tiuquishacari cuno tiacajinia, terara nojori quiojoriqiaacuajani, Jesuuri juhua
shocoriquiano canujuriqiaa. ²⁹ Nojoriiri nojoritia na jiyojetenu paniriquiaa jiyanohua.
Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. ³⁰Jesu jaara nojoritia cajiriquiaa tari mi-
aquejajinia, nojuajaari pan ririi. Nocuara Pueyaso secojoreeri. Nojoriria na neecasereeri.
Na nuhuaji, nojori serotareeri. ³¹Jiyacaritij, nojori namijaari juhua riatequequee.
Jiyacariqui na niishitiquiiri. Jesuuri saaja shaajequee cuniquijia nojori tajiniji. ³²Nojoriiri
sequeotooree:

—¡Jesucuaajaquiiri quiriquiaa! ¡Cunora poojiaqui jiyamitia timiriquiaa na pocoojosacari
pajaniyata nucuamaji, nojuaja jaara niishitiojoriquiaa pajaniya Pueyaso Rupajinia naa-
jiotasanotej!

³³Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén
tiacajiniara tacaretaarohuari. Nojori tiuquishacariuhua, nojoriiri puetunu Jesu once
saquiriojosano pueyajanaa riuriatasuhua tii tariucua rerejono, mariyata socua narta Jesu
pueyata. ³⁴Tariucua tiajinia quiniaari Emaús tiacajiniji tiuquijionaa sequeeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵Na nuhuaji, shusha tiuquijionaari nojori pohuatareejuhua, taa Jesu pocoojoriquiaa
nojoritiani, nucuaco nojori quiasacari, mariyata taa nojori niishirii nojuajani, pan na
neecasacari nojoriria.

Jesu muetasacariuhua na saquiriojosano pueyacua

(Mt 28.16-20; Mr 16.14-18; Jn 20.19-23)

³⁶Nojori pocoojosacarijia nojori niquishanojiniji Jesu, jiyacaritij, Jesujuanaari
canashiyaquiiji nojori tajinia nujuaquee. Naa nojori sequeereeri:

—¿Niaate quiyajaa? Nioojia nia cajitiri.

³⁷Nojoriiri shiriquitiquii. Jiyanoehua puereturiquiaari. Nojoriiri Jesu jiyaniriquiaa
naaqui. ³⁸Jesuuri nojori sequeeree:

—¿Casaara nia pueretiuyani? ¿Casaara nia jiyajenetaa janiyani? ³⁹Cua juaashiquia nia
niquiri, cua nioluacanio, nia niishiniuria janiyacuaajaari quiyani. ¡Cua cootiuri! ¡Cua
niqitiuri! Naaquiiri maja cuaqueyaraca, maja nucuahuaraca taa nia niquiya janiyacujani.

⁴⁰Naa nojori na sequesacaritij, Jesuuri nojori niquitijioree na juaashiquia, na niolu-
acanio. ⁴¹Puera nojori jiuujiatesacari, puera nojori shuquirishacarijiuhua, nojoriiri
taacanuuriquiaajaa, maja naasucua Jesu. Cunora, Jesuuri nojori sequeeree:

—¿Niaate miaquesocoriquiano jitiaacuaa?

⁴²Nojoriiri Jesu niquitioree sapitiaaja raqui caquishano. ⁴³Jesuuri na maseree. Nojori
niquiara na miaqueereeri. ⁴⁴Na nuhuaji, nojori sequeereeri:

—Janiyari naa miishaarucuaani taa cua pohuataquiaari niajanijacujani, pueyaracaanu
niaata cua quishacari tarijia. Nia sequequiaaricujani, janiyari naa miishaanutaniyani,
taa Moisés naajiotaquiaari janiyajinijicujani. Puetunu Pueyaso sequesano camini-
ujunaaajanaari janiyajiniji naajionuutaquiaarijiuhua. Supuetana Davidri janiyajiniji
naajiotaquiaarijiuhua na jaaquequejoneejinia. Quiarjia tari tohuateerucuaari puetunu
janiyajiniji cuno naajionuutasanojuanaa.

⁴⁵Jiyacaritij, Jesuuri nojori niishitirii tariucuaaanu Pueyaso Rupaa naajiotasano.
⁴⁶Nojori sequeereeri:

—Tariucuaaanu naa naajiotasanoori quiya: “Pueyaso Jiyarosocoriquianoori
mosariquiano, na nuhuaji, jiuujianaraca juucajinia samiitianutaniuhuari”. ⁴⁷Naa
naajiotasaaquiaarijiuhua, Jerusalén tiacajinia, janiyajinijiiri pohuataaanutaniya pueya
niquiara, na nuhuaji puetunu jiyacajiniajanaano. Pueya tiushacari cucua, nojori jaara
noojiaa tacatorohua sesa nojori miiniujiniji, sesa nojori miishanoori tuujusaanutaniya,
Pueyaso jiyanooshacari nojori. ⁴⁸Niaacuaajaari puetunu cua miishanojuanaa niquijia.
⁴⁹Cua tojitiare. Janiya jaara jiyocuaaanu quiaarohua cua Queecuani, janiyari Pueyaso
Sohuanu jiyaronutaniya niaacuani, taa cua Que sequequiaaricujani. Niyaja pootia nia
quiri Jerusalén tiacajiniani, niaa jaara jiyocuaaanuji niriquiano cumaaca maserejaatjia.

Jiyocuaaanu Jesu tacasacariuhua

(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqwi nojori quishacarijia, Jesuuri na juaashiquia shiitioquiaari nojoriicuara na sec-
ojosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuara na
secojosacarijia, Jesuuri nojori shuriucuaji tacanishaaquiaari jiyocuacaanu. ⁵² Nojoriiri
na shuquiritari. Na nuhuaji, nojoriiri Jerusalén tiacajinia panaatia tacateyarohua.
Nojoriiri jiyanoehua shuquiriaatia quiriqiaa. ⁵³ Nojoriiri pueyaracaanu quijia Pueyaso
Secojojua tiajinia. Tii Pueyaso maniniuhuaqueetatumia pueyaracaanuuri. Tariucuaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiaaariuhuj. ² Jiya co-teesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴ Nojuajaari quijiajuhuanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniurajuhuj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante sanyia poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanerjuaa quiquiaari. Pueyari tama nojori Shipininia-jaaja niishiyaquiquiaari. ¹¹ Tama na saquiriojosano Israel pueyacua niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuquiquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijiosano niquiquiaariiri. Jiyanoohua maninia quiquiaariiri. Na Que Pueyasoori na cumaquijia jiyanoohua maninia na miiniuria, Neyanuniyojua na quishacari. Nojuajaari saaja seetanu rupajanaa sequeja Pueyasojiniji. Jiyanoojia quijiaari. ¹⁵ Tiuquinijiona Juanri Jesucristojiniji pohuataquiaari pueya niquiara. Jiyanoohua na rupaa paaretaquiaariiri pueya tojtianura nojuaja. Naa sequejaari:

—Janiyacuaajari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijijajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyaniijijajanaa Jesucristo quiniuuucua, puetunu pajaniyajanaari na jittiasanojiniji masequiaani. Jiyanoohua capora na quiniuuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajotequiaari na rootasano pajaniyara. Cunoori maja na cumaquiniu quiquiaari pajaniya. Quiarjia saniniuuujia, pa panijia Pueyaso quiniuuucua, nojuajaari Neyanujanaa jiyaroquiaari pocua, pa jiyanooshaanura, naajuhuj, seetanu rupajanaa pa niishiniuria nojuajiniji. ¹⁸ Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

¹⁹ Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya

cuno pojorijinijinoori quiquiaarijuhua pueyacuara secोजना pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujuunia Elías soj? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujuunia, nooj tariucuacaanu seque-saaquiaari niriqianotej?

Juanri saaja nojori riucaaree:

—Maja.

²² Cuno pueyari socua na sequeree:

—Canaa quia pohuatareja, ¿cante quiajaniyani? Canaacua saniniujujia canaa camarucua pohuatasuhanijia.

²³ Juanri saaja naa nojori riucaaree:

—Janiyacuajaari nooni, cariquia jiyajinia nacajatej, taa supuetana Isafas juhuacarijia naajiotaquiaari janiyajinjicuajani: “¡Jiyaniijiaacuaji nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiyaquiri Cristo, Elíasjuhuaj, cuno tariucuacaanu sequesaaquiaari niriqiano Pueyaso sequenu panishano caminiujujiatej, ¿casaara pueya quia tiuquinijia moojiniacuaraarini?

²⁶ Juanri nojori riucaaree:

—Janiyari nareja moojinia tiuquinijia pueyani. Saniniujujia, tamonuuri niya quiya, nia niishiyaquishoojua. ²⁷ Nojuajaari cua nuhuaji niniutianiya. Nojuajaari Jiyaniijajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyanihano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniojua pocuara mosaariquiano

²⁹ Tariqui saniniujujia, Tiuquinijiona Juanri Jesu niquirii nocua niyano. Juanri naa sequeree canaa niqiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura!

³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijajanaa cutara. Nojuajaari tari rishijia cucuaji cua quiyaquishacarjia”. ³¹ Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequerejuhuaj:

—Janiyari Pueyaso Sohuanu niquiriucuaani jiyocuaaanuji roseyano nocua juhua mococoonu. Nocua tiuushiiri. ³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanooocua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniujujia nia pohuataani pueyanaa, ¡nojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquiuhua caapiqui na pueyata. Janiyari niquiriyatu cuno caapiqui pueyanojinijinio quiiriquiaani. ³⁶ Tiuquinijiona Juan jaara Jesu niquiriquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara moso-coriqiano juhua borrego, sesa poojia seque jeequesaanura.

³⁷ Naa canaa tojishacari Juan sequesantej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaaree:

—Miji. Nia niquiriqui.

Canaari nata quiaareeni. Canaari na quijia niqutiushiini. Tari pananu piriuushacariiri quiiriquiaa jiyacari. Cunora, canaari tii maquetusee Jesutani.

⁴⁰ Tiuquinijiona Juan niqitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. ⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajanunaa, canaari Cristo niquiriquiaacuaani, tariucuaaanu Pueyaso sequesano na jiyarosocoriqianotej!

⁴² Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuaajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelnio

⁴³ Tariqui, Jesuuri Galilea jiyajiniara quiariquiaa. Felipe riuriasamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijiuhuj. ⁴⁵ Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaanutej! Tariucuaaanu Pueyaso sequesano caminiujiuniaa pueyari nojuajiniji naajionuutaquiaar-ijiuhuaj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riucuaareejaa:

—¡Jaj! ¿Na naatate maninia miijia pueyano supenujuuara cuno sesa miijiaa Nazaret tiacajiniji?

Felipeeri na sequere saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquihuacuajinio supenujuanaa culara. Majaari na niishiniu sapojonu.

⁴⁸ Natanaelri na sequereeri:

—¿Taa quia niishiya janiyarini?

Jesuuri na riucuaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitiojonanaa, ¡quiaacuaajaqui Pueyaso Niyanu! ¡Quiaari parta Israel pueya jiyani-ijiaranojuhuaj!

⁵⁰ Jesuuri na sequereeri:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijiosano niquniutianiya cutara.

⁵¹Jesuuri cuniqui quiniaa pueya sequerejuhuaj:

—Seetanujuanaa nia sequeyanijia, niaari jiya cajiniocua niquniutianiya riateno. Pueyano cua quishacari, niaari Pueyaso seya niquniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹Jiuujanaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masusano pueyari queranacuriquiaa. Jesu nucuaari tii quiriqiaajuhuj.

²Jesuuri na saquiriojosano pueyata masusaaquiaarijiuhuj, camishacari queranacunura. Janiyari na saquiriojosano pueyano quiriqiaa jiyacari tarijiuhuj. ³Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. ⁴Jesuuri na nucua riucaaree saaja:

—Maajinia, ¿casaara quia sequeya janiyani? Juhuanajuaja maja cua poonijiosacari Pueyaso cumaacata.

⁵Na nucuaari pueya raatojonaa sequeree:

—¡Niocua Jesu tojirijia! Jaara nia seque, niocua puetunu na sequesanojuanaa miiri.

⁶Tii cajitiriqiaari seis conatu, saajiajiniji quejasano. Canaa Judiocuacaari sequeyaru-cua shuquiriojua tiajinia nojori tiuquishacariuhua, juhua jeequesano nojori quiniuria Pueyaso niqiara. Nojori mohuaca cajiticojua quiquiaari cuno conaa. Jiyanohua pueretucocua quijaari. Cuno conatuuri setenta tumococua mishaja mohuacata mishin-ishano quijia. ⁷Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioore. Mohuacaari conaa rupaacuma puecacosee.

⁸Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricujaari mohuaca mishinijioore cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰Na sequereeri:

—Pueyaruhatijia coteenu raateja shocuanacu vinote. Puetunu masusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua ratusanoni, cunoori socua maniniuniacu vino coteenu quia raatojote-sanojiniji!

¹¹Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojujaari naa niqitiquiaari Pueyasojiniji na cumaaca. Naacujitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

¹²Na nuhuaji, Jesuuri Capernaum tiacajinia quiaaree na nucuaata, tapueyocacatajuhuaj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niqutiojonaa Pueyaso Secojoju tiajiniji

(Mt 21.12-13; Mr 11.15-18; Lc 19.45-46)

¹³Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataarejuhuaj. ¹⁴Na tiuquishacari, Pueyaso Secojoju tiajinia quiamarii. Tii niqishii pueyari juyaca niqutiojivano Pueyasocuara puecosocoriquiano, borregohua, noseyanio. Pueyari tii na juhuacutucujinia cajitiriqiaajuhuj, pueya na tacatojonura taucuaa cumaneeca, Pueyaso Secojoju tiajinia niqutiojosocoriquiano cumaneecara.

¹⁵Naa na niquishacari pueya miyano Pueyaso Secojoju tiajiniatej, Jesuuri seya morojotaja

jiyocua taticuaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaani. Cumaneece rerecojoree jiyocuara juhuacutucujinijiiri. Naajuhuj, cumaneece juhuacutucua caponeetareeri. Pojotaariquiaacuaari. ¹⁶Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷Jiyacaritij, canaa, Jesu saquirojosano pueyani, canaari niishiQuiini, seetanujanaa tariucuaaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanoJuanija, jyanohua cua panishacari quia tia”.

¹⁸Naa Jesu miiniucuatej, narta Judiocuaca camarucuari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutiricuaraja Pueyaso cumaacata quia miishano, canaa niishiniuria quiaari seetanujanaa Pueyaso Jiyarosano!

¹⁹Jesuuri nojori riucuaaree miriqui:

—Pueyari tia nia niyartare, janiyacua saaja jiuujianaraca juucajinia na tucuatrohua tianu tamajaajani.

²⁰Narta Judiocuaca camarucuari na riucuaaree:

—¡Cuarenta y seis marijaari shoconujuquiaari pueya tucuatnura nio secojousa tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹Jesuuri tama na cuaqueyajaaja pohuatariquiaa, Pueyari tia na sequesacari.

²²Naacuajitij, Jesu jaara samiitiaquiaariuhua, canaa na pueyari jiyacari shusha niishiQuiaari naa Jesu sequesano miriquini. Naaratej, canaari tariucuaaanu Pueyaso Rupaajinia naajiotasanoocua tiuqujaarini, Jesu sequesanoocuanio.

Jesu puetunu jiuujia niishijianaa cutara

²³Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijosano niqiquiaari. Naaratej, queraatia pueyari nocua tiuqujaarini. ²⁴Naajaa, majaari Jesu tiuuniu quiriquiaa seetanujanaa nojoriicua. Nojuajaari nojori niishiriquiaa, taamueca pueyate nojorini. ²⁵Tamonu pohuataaquishacarija nojuaja, nojuajaari tari niishiya taamueca jiuujiaracate pueyani.

3

Nicodemo pocojosacari Jesuta

¹Niucua, tamonu pueyanoori niqiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijiniojuhuaj. Tojishano pueyano. ²Jesuucua na tiuquishacari, naa na sequeseeeri:

—Niishitiojonanaa, quia cumaacata quia miiniucua canaa niqiaara, canaari cunora niishiyani quiaari Pueyaso jiyarosano, canaa niishitiojoriquiano. Seetanujanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijonu taa quia miiquiaacuaani.

³Jesuuri Nicodemo sequereeri:

—Seetanujanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jitianura nojuaja.

⁴Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quia? Majaari na naata na nucua saracajinia tiuquiniuhua na rasauhuara.

⁵Jesuuri na riucuaaree:

—Seetanujanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniuujia, cante quiarinio pueyanora jataniaquishano Pueyaso Sohuuanutani, nojuajaari maja Pueyaso jitianoniyojua na quiniu quiniutianiya. ⁶Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano.

⁷ Naaratej, majaari quia shiriiquiniu puera, naa cua sequenuucua quiajaniatej, quiaa cuara rasuhuara, seetanjuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacujani. Paari nareja na cojuatunenu tojiquiaani. Majaari pa niishiniu teje na piyarojiani, tee cunocora na quiaaajaniuhuj. Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotaruahuacuhuj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucaaree:

—¿Majateeri quia niishiniu cua sequesano quiajaninya? Quiaari Pueyaso Rupaa niishitiojonacuja Israel pueyara. ¹¹ Canaari seetanjuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaninya seetanu rupaajanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriqiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhuj, janiyari macaacua nujuaretasocoriquianoni. ¹⁵ Naacuajitij, puetunu cucua tiuuniaajanaari pueyaracaanu quijiaa quiniutianiya.

Pueyasoori puetunu mijiria quiniaa pueyajanaa panijia

¹⁶ Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanjuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutianiya cutara. Nojori cutaraari pueyaracaanu rishijiaa quiniutianiya Pueyaso shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanjuanaa cua jiyaroquiaari cutaraari pueyacujaji Tacuna cua quiniuria.

¹⁸ Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiaa. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa mijijia nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitiosaanutianiya. ²⁰ Puetunu sesa mijiacajanaari cua niquiniu paniyashijia, pueya jiuujia cuhuatana cua quishacari. Majaari nojori niniu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya na Rupaajiniacujani, nojoriiri cuhuashiqui quiniu panijiaa cutara. Nojoriiri cucua nijioquiaa na niishishaanura nojori miishano cutaraari puetunu maninijanaa, taa Pueyaso paniyacujani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquirojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijiosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niqiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiaa quiqianu Jordán moo taquijiratej, nojuajana pueya tiuquinijiyajuhuj. Puetunu pueyajanaa nocua quiojiaa tiuquinijiosano nojori quiniuria.

²⁷ Tiuquinijiona Juanri nojori riucaaree saaja:

—Saaja Pueyaso cumaquishacari pueyano, pueyano na naata maninia miiniu Pueya-sora. ²⁸Niajanicyaajaari cua tojiqianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹Pueyano rupüena jaara camiya necocuara, quiarjia cutara necocuara seetanujuanaa saaja nerano. Naajaa, na rupüena quishacari na shuriucua, na timitiaari na tojishacari necota pocoojiyano shuquiriaatia. Naajuhua, janiyari cunora shuquiriaatia quiarjia quiyani pueya rupuesacari Jesucristo. ³⁰Janiyari cunora jiyarosaaquiaaricujani, pueya cua tojtiniuria nojuaja. Naaratej, pueya cuara carteera janiya, Cristoocua nojori pacunura saniniuuja, nojori tojiniuria nojuaja. ³¹Cante jiyocuacaanuji niqiaaricujani, nojuajaari Jiyaniijia-janaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuuja, nojuajaari jiyocuacaanuji ninio cutara. Nojuajaari Jiyaniijiajanaa. ³²Naacujitij, na pohuatasanoori tama na niquishanojuaja jiyocuacaanu, na tojishanonio. Pueyari na pohuatasano cuaracashitiquiaa saaja. ³³Canapüete Jesucristo pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴Pueyasoori jiyanoohua queraatia na Sohanu niqitioquiaari na Jiyarosano. Naacujitij, seetanu Pueyaso rupaajanaa pohuataari. ³⁵Pueyasoori jiyanoohua panijia Neyanu. Naaratej, nojuajaari na jiyatequiaari puetunu casaa jiitianarajanaa na quiniuria. ³⁶Canapüete Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapüete Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocojosacari Samaria jiyajinjinio maajitia

¹Fariseocuacaari pohuatasaaquiaari, jiyanoohua queraatia pueya Jesuucua quiojija na tojtianaa nojori quiniuria. Nojoriiri pohuatasaaquiaarijuhua, Jesuuri socua queraatia pueya tiuquinijija Tiuquinijiona Juanjiniji. ²Seetanujuanaa majaari Jesujuanaa tiuquinijionu quiriqiaa pueya. Saaja canaa cutaraari pueya tiuquinijioriquiaani. ³Jesu jaara niishiquiaari Fariseocuaca naa pohuatasaarucuaa nojuajinjitij, nojuajaari Judea jiyajiniji jiyataquiaarihua canaa Galilea jiyajiniara.

⁴Canaa quiasacari nucuaco, canaari Samaria jiyacuma tajiriquiano quiriqiaani. ⁵Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriqiaari supuetana José cuhuariquia, na que Jacobo niqitiosano nojuaja. ⁶Cuno cuhuariquiajia quiriqiaari cuari, supuetana Jacobo jiuutiasano tariucuaacuana. Pueyaracaanu Jesu rucuanenucua nucuamaji, nojuajaari cuno cuari shuriucua cajishii na samareenuta. Panacariiri quiriqiaa. ⁷⁻⁸Jiyacariitij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinjinio maajiiri cuarimia quiaquiaari mohuaca taqititanura. Jesuuri na sequeree:

—Cua raatere.

⁹Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinjinio maaji raatenura quia-janiyani? Quiaacuajaari Judio.

Cuno maajiiri naa sequeree Jesutej, na niishiniuuca Judiocuacacujaari maja na niqiniu paniniu quijia Samaria jiyajinjinio pueya.

¹⁰Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹Maajiiri na sequeree:

—Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanoohua tucuaa. ¿Quiaatucua teje taqitiare cuno mohuacani, pueya samiitiani-jiani? ¹²¿Quiaateeri jiyaniijiajanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niqiji ratujua quiquiaari necohuata, na seesano seyano.

¹³ Jesuuri na riucaaree miriqui:

—Puetunu nio cuarijiniji ratujuacajanaari saaja jiyamuecoquiaa. ¹⁴ Saniniuujia, cante cua mohuaca ratunutaniani, majaari socua na jiyamueni quiniutianihua. Cua mohuacaari juhua samo naca pacartanutaniya pueyaracaanu noojiajinia, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratusocoriquiano, maja socua cua jiyamuenura, naajuhua, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequeco coteenu.

¹⁷ Maajiiri na riucaaree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. ¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarjia quiata quiyani, majaari quia niyacajuhua.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijanaa, ¡quiaaqui Pueyaso sequenu panishano caminiujunial! ²⁰ Canaa supuetanaa pueyari niya nio tuhananuucua Pueyaso secojonuuja tarijia. Nijaniya saniniuujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹ Jesuuri na riucaaree:

—Seetanujuanaa quia sequereera maajiniaa. Cua sequesanoocua quia tiuuri. Quera quiniutianiyari Pueyaso nia secojosacari puetunu tiquiyocua nia quishacarijanaa. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhua, taa quia sequereecujani. ²² Nijaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocujaaari canaa Judiocuaca supuetanaa niishitioquiaari pueyacuaji Tacunaari supenutaninya tama canaa Judiocuacajinjinojuaaja. ²³ Quiarjia cutara, cante seetanujuanaa Pueyaso shuquiritiajacani, nojoriiri na Que Pueyaso secojonutaninya puetunu noojiatajanaa, seetanujuanaa na tojjiaa nojori quishacari. Pueyasoori na paniya pueya secojonura nojuaja, cante na secojonuujuacacujani. ²⁴ Pueyasoori sohanu. Naaratej, cante Pueyaso shuqiritini panijiacani, nojori cuara secojoora Pueyaso puetunu nojiatajanaa, Pueyaso Sohanu tojjiaa nojori quishacari.

²⁵ Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriquianoori niutiutianiya. Nojuaja jaara tiuquiri, nojuajaari puetunu maninia pa pohuatanutanijanaa.

²⁶ Jiyacaritij, Jesuuri maatia na sequeree:

—Janiyacuajaari canoni, quiata pocojijacuajani.

²⁷ Jiyacaritij, canaari Jesuucua tiuquijioruani. Canaari jiuujiatequiaarini canaa niquishacari Jesu pocojijano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quinaa pueya sequesuhuari:

²⁹ —¡Miji pueyanaa, nia niquiqui pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianootej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuj, cua tuatuatasacari na panishano. ³⁵ Niaari sequequia: “Cuaara shocojooajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquniuria. Nataacuacacuja tari noshiquia, carojotasocoriquiano. ³⁶ Na carojotanaari na poonijionu sami niqutioshiya. Na carojotanasoori pueyaracaanu quiriquiano. Naacuajitij, cuhuariquia natoonaari jatiqai shuquiriniutianiya nataacuaca carojotanaata. ³⁷ Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. ³⁸ Janiyari saniniuujia nia jiyaramiquianuni nataacuaca nia carojotanura quenaaja nia poonijiyaquishoo cuhuariquajinia. Cunoori tamasa poonijosano quiquiaari. Niaari juhuajaniya tamasa poonijosanojiniji carojotaquia shuquiriaatia.

³⁹ Queraatia pueya cuno Samaria tiacajiniinoori Jesuucua tiuquuaari, nojori tojishacari naa cuno maaji sequesano: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquuaari, nojoriiri na masuquuaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajiniinoori Jesuucua tiuquuaari, nojorijianaa jaara Jesu tojiqiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucu nojuajiniji. Quiarijia cutara, canacuajaari tama canaa numaatajaaja tojirii na pohuatanoni. Naaratej, canaari quiarijia niishiyani, Jesuuri seetanujuanaa Pueyaso jyanootiriquiano pajaniya, puetunu mijiria quiniaa pueyajanaano.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataare Galilea jiyajiniara. ⁴⁴ Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujiunaaari maja tojishano quijia tama na jiyajiniaaja’”. ⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiqiaari saaja. Nojoriiri naa maninia na tiuquitiqiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniqiaari mohuaca vinoracuajani. Jiyacaritij, Capernaum tiacajinia quiquaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jyanohua cusosu matariquia. ⁴⁷ Cuno camarnu jaara niishiquaari Jesu tari tiuquirohua Judea jiyajiniji, nojuajaari jiyacari niqiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseeri:

—Jiyaniijianaa, cucua quia taraajere! ¡Cua niyanu quia naataniqui, quera cusoyano!

⁴⁸ Jesuuri na riucaaree:

—Naa jaara cua cumaacata cua miishano niqiyaquiri, niaari cucua tiuyaquiquiaa.

⁴⁹ Cuno camarnuuri saaja Jesu sequeree:

—Jiyaniijianaa, mijijijaj, jati pa quiaare cua tijinia, quiyanu cusoyaquishacarijia!

⁵⁰ Jesuuri na sequeree:

—Quia quiaarohua. Quia niyanucuja tari naatarohua.

Cuno camarnuuri Jesu sequesanoocua tiuuri. Quiaarohuari. ⁵¹ Jiyacari na tijinia, na seyari niqiyaquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusunu tajiyatemohuacuaani?

Nojoriiri na riucaaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuurii, puetunu necohuata-janaanio.

⁵⁴ Judea jiyajiniji Jesu tiuquishacariuhuj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiaca-jinia. Naaratej, canaari Jesuta nocua quiojoquiaarijuhuaj. ² Jerusalén tiacaari puetunujua-naa puereetuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquico. ³ Queraatia cusosuhuari tii matacojua cuno cuari shuriuquico. Cuno cusosuhuari quiquiaari cariyujuarujuri, shipiiniquiujuiniaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishirijiaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riuuaree:

—¿Cantucua cua naacure cuarijinia cua rosenurani, mohuaca jaara queyaquetesaare-cuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujaj!

¹¹ Cusosu naatanohuari nojori riuuaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riuuareeri:

—Johuj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocuaji. ¹⁴ Na nuhuaji, Jesuuri na riuriataquiaari cuno juucaja Pueyaso Secojoja tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeeseeri:

—Jesuqui cunocuaja cua naataniriini.

¹⁶ Naa Jesu miiniucua samaatenu juucatej, narta Judiocuaca camarucuaari na quietunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijija. Janiyari cunora poonijijaacuahuaj.

¹⁸ Naa Jesu sequesacari nojoritij, narta Judiocuaca camarucuaari jiyanoehua na monu paniriquiaa. Nojoriiri maja na monu paniniu quiriquiaa saaja samaatenu juuca na

poonijionuucua. Socua jiyanoehua na motunu paniriqiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹Nocuaij Jesuuri narta Judiocuaca camarucua sequereee:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niqiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaij shiriquitiuniutianiya. ²¹Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaa, cana cua samiitianiniu paniyacujani. ²²Cua Queeri maja na nequesoreenu quiniutianiya pueya. Nojuacuajaari tari cua niquitocanu na cumaaca, puetunu pueyajanaa cua nequesoreenura. ²³Nojuajaari naa miiquianu puetunu pueyajanaa quiniuria cua tojtijajaca, naatej, taa cua Que na tojtijiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

²⁴Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaanuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵Seetanujuanaa nia sequeyanijia, quera quiniutianiyari juhua macunucua quijiaa samiiticosacari. Seetanujuanaa quiar-ijiaari, juhua macunucua quijiaacari cua rupaa tojtianutaniya. Cua rupaa tojtijajacaari samiitiaconutaniya, pueyaracaanu rishijiaa nojori quiniuria. ²⁶Cua Queeri quijijuhua-najaj. Majaari na naata shaajenu. Nojuajaari naa quijiaa cua jiyatequiaarijuhuaj, juhua nojuarajuhuj. Naacuajitij, cua naata pueya jiyatenu naa quijiarajuhuj. ²⁷Pueyanora cua quiniucua, na cumaaca cua niqitioreeri cuarta pueya cua nequesoreenura, nojori cua saniitonurajuhuj. ²⁸Cua tojtijare. Majaari nio sequesanoocuaij nia shiriqiniuu. Tamacari, puetunu macunucujanaari cua rupaa tojtitiuniutianiya. ²⁹Macunucua tojtitiushacari cua rupaa, nojoriiri samiitiaconutaniya, na jamacajiniji nojori tohuaretanura. Cante maninia mijiaa quiquiaarini, samiitiaconutaniuhuari pueyaracaanu shuquiriaatia quijiaa nojori quiniuria Pueyasota. Saniniujia, cante sesa mijiaa quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijajanaa na quiniucua, Jesu tama nojuajiniji pahuataajaaja

³⁰Pueyaso Niyanu cua quishacari, naajaa, majaari cua miiniu tama cua panishanojuajaaja. Janiyari sesa mijiaa juaquiaacuajani, saaja cua Que niishitishacari janiya, nojori miishanoori sesa. Tama cua panishanojuajaaja miyashijia cua quiniucua, janiyari namitajanaa nojori juaquiaaani. Janiyari pueyaracaanu miiquiaa saaja cua Jiyarona panishanoni. ³¹Pueyano jaara tama nojuajinijiaaja pahuataa narta pueyano, na pahuatasanoocua maja tiushano. Naaratej, janiya jaara tama janiyajiniji pahuatariquia nia niquiarani, tama cua pahuatasanojuajaaja maara najuhua quiriqiaaj. ³²Naajaa, quiarijia cutara nia naata niishiniu cua pahuatasanoori seetanujuanaa. Tamonucujaaari janiyajiniji pahuataa seetanujuanaa. Nojuajaari cua Que. Cunora, niishianijia na pahuatasano janiyajinijiri maja najuhuanaj.

³³Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pahuatacanu janiyajiniji. Majaari na seetanu quiquianu janiyajiniji. ³⁴Nojuaja jaara seetacanu janiyajiniji nijaniya, quiria, naajaa. Janiyacuajaari niishiyani seetanujuanaari cua pahuatasano nijaniya tama janiyajinijiaaja. Tiuquinijiona Juanri seetanujuanaa pahuatacanu janiyajiniji nijaniya. Naa cuara na pahuatasanoocua tiuria, Pueyaso jiyanooniuria nijaniya. Janiyari saaja cunora nia pahuataa Tiuquinijiona Juanjinijini. ³⁵Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhua tojiqianu na pahuatasano. ³⁶Tiuquinijiona Juan pahuatasano janiyajinijiri

seetanujuanaa. Naa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojinu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuacaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiri, niaari naa pueyaracaanu quijiara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninu paniaquiquiaa cua jiyatenura nijaniya pueyaracaanu quijiacara cutara.

⁴¹ Maninia cua miishanoori maja pueya sequenura janiya: “Quiaari maninia pueyano”. Janiyari saaja cua Que shuquiritiquiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia paniaquishacari nojuaja. ⁴³ Cua Quecuajaari cua jiyaroquiaari cua niishitiojonura nijaniya nojuajiniji. Quiarijiani, majaari nia tojinu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosanoora na quiniuria, niaa maara cuno tojiri cutara, nojuaja jaara niaacua nimia na niishitiojonura nijaniya tama na niishishanojuaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jianiniu janiya niaacuara tonujunutaniya cua Queni. Tama Moiséscuajaari niaacuara tonujunutaniya, cua tojtiaashijiaca nia quiniucua. Niaari jiyaniya niaa Pueyaso muerasu, juhua Moisés tojijiaca nia quishacari. ¿Niaateeri seetanujuanaa Moisés tojijiaca? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. ⁴⁷ Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuan?

6

Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanhua queraatia pueyari Jesu niquiquiaari tari, cusosuhua na naatanijosacari. Naaratej, nojoriiri Jesu neteyotariquiaa caminia shuriuquico. ³ Canaa shiitiasacari caminia taquijiria, Jesuuri canaa tacatamaa tuhuananuucua. Tii cajitisee canaari. ⁴ Jiyacartij, quera Pascuara queranacusacariiri quiriquiaa. ⁵ Jesu niquishacari jiyanhua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. ⁷ Felipeeri na riuacuere:

—¡Paa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuaana secaja quiri puetunu nojorirajanaa!

⁸ Jiyacartij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiritiosano pueyanohuhaj. Jesu sequeeseeri:

⁹ —Jiyanijianaa, caya samijia niya cinco pan jiitiaa cebada cashojuajiniji shipinishano, caapiqui sapitiajanio. Naajaa, cunoori najuhuaana puetunu cuno pueyarajanaa.

¹⁰ Jesuuri saaja canaa na saquiritiosano pueya sequereeri:

—Puetunu pueyajanaa nia sequere cuara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijinojuanaani, saaja canuuri quiquiaari cinco mil pueya. ¹¹ Jiyacartij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniiri. Canaari cajitiuyano pueya puetunu na

panishanojuanaa niqutiojoreeni nojori miaquenuosocoriquiano. Jesuuri naa miirii sapi-tiaajajuhuj. ¹²Puetunu pueyajanaa jaara tooquioquiaari, Jesuuri canaa na saquirojosano pueya sequereeni:

—Puetunu miaquesano raquiquiajanaa nia reraterohua, maja najuhua na niitiasa-nura.

¹³Canaari cuno cinco panjiniji pueya miaquesano raacua reratereni. Canaa rerate-sacari, canaari doce canaasatu mishinjiooreeni. ¹⁴Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujiunia, nooj, tariucuaaanu sequesaaquiaari pocua niriquianotej!

¹⁵Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶Tariucua pananu tiuquishacari, canaa, Jesu saquirojosano pueyani, canaari rose-taaroehua caminiajiniarani. ¹⁷Canaari botejinia tacataseeni, cuniquiji Capernaum tiaca-jiniara canaa niuutianura caminia taquijiria. Tariucua ninishiquiiri quiriquiaa. Ma-jaari Jesu tiuquiniu quiriquiohua juhuanajuaja canaacua. ¹⁸Tari canaa niuutiasacari, paratuuri jyanohua piyarojoriquiaa. Caminiaari cunora jyanohua cajiniuucuariquiaa. ¹⁹Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriqitiurii jyanohuanoni! ²⁰Jiyacaritij Jesuuri canaa sequereeni:

—¡Maja pueretunul! ¡Janiyacujaniijia!

²¹Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quariquiriaacuajani.

Jesu mianuutesano pueya pajesacari nojuaja

²²Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitiariquiaa. Saaja canaa, Jesu saquirojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. ²³Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. ²⁴Cuno pojori niishishacari maja Jesu quiniu quiriquiaa tari tii, canaa na saquirojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesu Cristo juhua poojia miaquesano

²⁵Cuno pojori tiuquijiosacari caminia taquijiria, Jesu riariatatuseeri. Na nequeso-tatureeri:

—Niishitiojonanaa, ¿taacari quia niyarohuacuarini?

²⁶Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niqiniuucua cua cumaacata cua miishano. Niaari cua pajenuya saaja cua mianuutenuucua nijaniya, taa nia tooquiorucuaacuajani, cua mianuutesacari nijaniya. ²⁷Maja saaja miaque-sanoocua nia tacaani, nia cuaqueya nia cumaquitiajara. Cunoori maja na jiyatenu quiniutianiya nijaniya pueyaracaanu rishijia. Saaja nia tacaari cutara nioojia sami-itianijia miaquesanoocua, pueyaracaanu rishijia nia quiniuria. Janiyacuajaari cuno nia niqitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanoni.

²⁸Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa miiniuria, Pueyaso shuquiri-tiasano canaa quiniurijuhuj?

²⁹ Jesuuri nojori riucuaeree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqitiniutianiya canaa tiuuniuria quiocuari? ³¹ Canaa quia niqitiricuaraja quia cumaacata quia miishano, taa Moisés niqitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuacaanu Pueyaso Rupaajinia:

“Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moiséscuajaari Pueyaso jiyarosano quiquiaari.

³² Jesuuri nojori riucuaeree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarjia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno, Pueyaso niqitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeeree:

—¡Jiyaniijianaa, quiocua pueyaracaanu canaa niqitioriquia cuno pan!

³⁵ Jesuuri nojori sequeeree:

—Janiyacuajaari cuno panni, pueya samiitianijiojua. Cante cucua niyani, majaari na miaajenu quiniutianiya socua. Cante cucua tiuuriijaaanihuaj, majaari na jiyamuenu quiniutianiyajuahuaj. ³⁶ Taa cua sequeeree tari niajaniyacuajani, niaari juucua cua niqiyua. Majaari quenaaja cucua nia tiuuniu. ³⁷ Naajaa, puetunu cua Que niqitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua rosenu quiquiaari cua miiniuria tama cua miiniu panishanojuaja. Mijiria niqiaarinijia saaja cua Que panishano cua miiniuria, cante cua jiyaroquiaaricujani. ³⁹ Majaari cua Jiyarona paniniu cua juurequetenura quenaaja niqiriyatujua na niqitiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuate cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaa nojori quiniuria. Naacuajitij, janiyari nojori samiitianijionutaniya jiya puequesacari.

⁴¹ Jesu sequenucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucuja, José niyanutej? ¡Paacuajaari na queya niishiyani! ¿Casaara quiarjia na sequeyari: “Jiyocuacaanuji rosenonijia”?

⁴³ Jesuuri nojori sequeeree:

—¡Tariucuaja! ¡Maja nia juaaquiону! ⁴⁴ Pueyanoori maja na naata tiuuniu cucua tamajaaja, cua Que jaara noojiajinia poonijiyacuri. Janiyari puetunu cucua tiuuniaajanaa samiitianijionutaniya jiya puequesacari. ⁴⁵ Tariucuacaanu pueyara Pueyaso sequesano caminiujunna naajiotasanojuaari naa sequeya:

“Pueyasocujaari puetunu nojorijianaa niishitiojonutaniya”.

Naacuajitij, cante cua Que niishitiojosano tojjia seetanujuanaani, nojuajaari cucua tiuya.

⁴⁶ Cua Queeri maja pueya niqishano quenaaja. Saaja na niqinia cutaraari janiya cante Pueyasojiniji niqiaaricujani. ⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiaa jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuquiaari juucua. Naajaa, saaja cusonuuquiaariiri.

⁵⁰ Saniniujia, cante quiarjia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqitiojonutaniya puetunu mijiria quiniaa pueyacuajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa sequetoree tamajaaja na juaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijiaca nia quiniuria. ⁵⁴ Cante cua shu miaquereeni, cante cua nanaca raturejeaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianiuhua jiya puequesacarini. ⁵⁵ Cua shu-uri seetanujuanaa miaquesano cutara. Naajuhuaaj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuaaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojoja tiajinia Capernaum tiacajinia.

Queraatia Jesu nuhuajiniaa pueya cartesacari nojuaja

⁶⁰ Naa pueya tojishacari Jesu niishitijosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaaraajaanijia?

⁶¹ Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? ⁶² ¿Niaatucua taa sequere socuani, niaa jaara cua niqiri tacaano jiyocuaaanuhua, teje cua niquiaaricujani? ⁶³ Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. ⁶⁴ Noojiaqueya nijaniyajinijinoori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quietanutaniyani.

⁶⁵ Naa sequeree socua cuno pojoriiri:

—Janiyacujaari cunora nia sequereeni: “Maja pueyano naata cucua tiuuniu, cua Que jaara noojiajinia poonijyaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajaniyariuhuaaj, niaateeri cua cartenutaniyaacuhuaaj?

⁶⁸ Simón Pedroori Jesu riucuaaree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasanocujaari na naata canaa jataniniu pueyaracaanu rishijia canaa quiniuria. ⁶⁹ Canaacujaari tari quiocua tiuuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacujaari tama cua saquiriojosano doce pueyajaaja. Saniniuuja, niquiriyatu nijaniyajinijinoori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajinijinio Jesu doce saquiriojosano pueyajinijinio quiquiaari. Naajaa, tama na Jiyaniijiajaaja tacartariquiano quiriqiaaquiri.

7

Tama Jesu tapueyocuacajaaja Jesuucua tiuyashijiaca quiquiaari

¹ Na nuhuaji, Jesuuri Galilea jiyajinia rucuanajoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujania nojori quishacari. Naa miitiquiaariiri puetunu marijiarajanaa canaa niishiriojonura, canaa supuetanaa Israel pueyari saaja suhuorotucujania quijiaa quiquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajaarijia naa Jesu sequeturee nojori macaatinuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquniuria puetunu quia miishanojuanaa. ⁴ Pueyano jaara puetunu pueyajanaa tojinu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiarajanaa Jerusalén tiacajiniajuahuaj.

⁵ Majaari quenaaja tapueyocuaca tiuuniu quijia Jesuucua. Cunora naa na sequetureeri. ⁶ Jesuuri saaja nojori riucuree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajaniya quiaaretej. ⁷ Niarta mijiria quijiaa pueyari maja na naata juuanu niyajaniya. Janiya cutaraari nojori niquniu paniyaquishooni. Cua niqitiuniu paniyaquiquiaari, nojori cua niishitishacari nojori miishanoori sesa. ⁸ Naa juoijiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijiaari cua miiniuria taa nia sequeree janiyacujani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojojua najuhuanaj!

¹³ Puetunu pueyajanaari naa sasacotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojua tiajinia. Tii coteeree pueya niishitiojonuuri.

¹⁵ Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacujitij, nojuajaari jiyacari niishiniutianiya, cua niishitiojosanocujiaari Pueyasojiniji seetanujanaa, maja tama cua niishishanojuaja. ¹⁸ Cante tama na niishiriojosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuujia, cante na jiyarona niishitiojosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujanaa. Cuno pueyanoori maja pueya sapojojua.

¹⁹ ¿Niaateeri seetanujuanaa supuetana Moisés Rootasano tojjitajaca? Majaarua. Majaari quenaaja niquiriyatu nijaniyajinijinio na rootasano tojjija. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riuucaturee na juaaniutia:

—¿Quiaaqui samaruraca! ¿Cante quia monu paniyani? ¿Canaa quia sequeretoj!

²¹ Jesuuri nojori sequeree:

—Puetunu nijaniyajanaari shiriqitiuquianu samaatenu juuca cua miishacari niquiriyatu casaaniyojua cua cumaacata. ²² Supuetana Moisés cuajaari nia rootaquiiaari nia mueya cararaatiuquia co nia miatenura, ocho juuca jaara na shocojore na rasaanjini. Seetanujuanaa, nio niishishanoori maja tama Moisés niishishanojuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniurijahuaj. Naaratej, jaara quiri samaatenu juuca, naajaa, niaari naa nia niquiohua cararaatiuquia co miatejoquiaa. ²³ Naa nia miishacari samaatenu juucatej Moisés Rootasano nia tojjiniuria, ¿casaara nia juaya janiyani, cua naataniniuccua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyjanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhua pueya juaariiri na miishano jaara sesa quiaquiri.

Jesu pahuatasacari tama nojuajinijiaaja

²⁵ Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriqianotej? ²⁶ ¿Taateni? Noocujaruhua juhuajaniya pahuataa pueya niquiaratej. Majaari quenaaja pa camarucua tenuityunoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariqianotej? ²⁷ Paacuajaari nio pueyano niishiyani, tejenote nojuajani. Saniniuuja, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojuajinia. Naa na tojishacari pueya sequesanotej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuj, tejenote janiyani? Naajaa, majaari cua ninu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. ²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriqiaa na quianura. Majaari na naata quianu quishaaquiiaari, juhuanojuaja na monu juuca quiaquishacarijia. ³¹ Saniniuuja, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojjiquiaari naa nojori maninihuaqueetaano Jesu. Naaratej, cuno Fariseocuaca, pueyacuara secोजना camarucuanio, puetunu nojori-jianaari Jesuucua rojotooquiaari. Na nuhuaji, nojoriiri Pueyaso Secojuua tia cojuanaa pueya jiyaramiquiiaari Pueyaso Secojuua tiajinia, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiya. Na nuhuaji, janiyani cua Jiyaronaacua riujiuutiutianihuani. ³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuani.

³⁵ Nocuaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhuj? ¿Parta Judiocuacaacua quianutaniya soj, noo pojoriicua Griegohua tajinia niaquejio-quiariitij? ¿Tii niishitiojonutaniya cuno taucuca soj? ³⁶ ¿Casaa na sequenu paniya

pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pohuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiuara. Jiyanoehua na rupaa paaretareeri. Naa sequereeri:

—¡Cante jiyamueyani, nojuaja cuaara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequesacari, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanajuaja maja na quiniu quiriquiaa mijiria, Jesu tacaquishacarijia Jiyaniijijajanaa na quiniuria. Naaratej, tii quiniaa pueya sequeriquiaari, cante quiarjia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatiosacari Jesuucua

⁴⁰ Jesu jaara pohuatanu puecaquiaari, tii quiniaa pueyari tama poccojoriquiaajaaja. Noojiaqueya nojorijinijinoori sequereeri:

—¡Nio pueyanoqui seetanjuanaa Pueyaso sequenu panishano caminiujunia, nooj, tarijia sequesaaquiaari pocua niriqianotej!

⁴¹ Tamasacaari saniniuujia na sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniji supuenutaniya? ¡Maja! ⁴² Tariucuacaanu Pueyaso Rupaajinia naajiotasanoiniji, paari niishiyani, Cristoori pa supuetanaa jiyaniijia David niqiohuajiniji supuenutaniya. Belén tiacajinia rasaanutaniyari, supuetana David tiacajinia.

⁴³ Naacuajitij, puetunu pueyajanaari Jesuucua juayonuutaquiaari. ⁴⁴ Tamasacaari saniniuujia Jesu quianu paniriquiaa juucua. Naajaa, majaari na quiatunu qiriiri.

Judiocuaca camarucua tiuyaquishacari Jesuucua

⁴⁵ Pueyaso Secojoja tia cojuanaa pueyari Jesu tojitiariquiaa juhuajaniya. Na nuhuaji, socua quiojyaroahuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequereeri:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucaaree:

—¡Majaari quenaaja tamonu pueyano pocuanu juhua cuno pueyanojua, seetanu rupaa-janaa pohuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na sapojonura nijaniyajuhuj? ⁴⁸ ¿Tamonu pa camarucujinijiniote nocua tiuurii, canaa Fariseocuacajinijiojuhuaj? ¡Maja! ⁴⁹ ¿Cuno pojori Jesuucua tiuujiacani, nojoriiri Moisés Rootasano niishiyashijiaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niqiaari niucuatej. Nojuajaari narta Fariseocuaca sequereeri:

⁵¹ —Pueyanaa, supuetana Moisés cuajaari pa rootaquiaari maja najuhuaana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juarii saaja:

—¿Quiaateeri narta Galilea jiyajinijinio pueyanojuhuaj? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueno quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojyaroehua.

8

Jesu jiyanooshacari maaji

¹Jesuuri saniniuujia Olivo cuhuariquiajinia quiaaree. ²Jesuuri tariquicuaji tiuquiriohua Pueyaso Secojoua tiajinia. Canaari nata quiriquiaajuhua. Pueyari nocua rerejoquiaari. Nojuajaari cajirii pueya na niishitiojonura juucua.

³Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaquiaari numuetucushiyano. Nojoriiri cuno maaji nujuateree pueya tacoji. ⁴Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. ⁵Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijarijataj, taa quia sequeyanijia?

⁶Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucaanu quirii. Nojuajaari saaja jojoree, jiyajinia na naajionura na juashiquiata. ⁷Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano nijaniyajinjiniote sesa miyashijiani, nojuaja cuaara na coteetaara janu.

⁸Jesuuri jojorohuacuhua socua na naajionura jiyacua. ⁹Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojoriijiniji. Nojoriiri naa quiojoquiaariuhua puetunujuanaa. Saaja Jesuuri jateequue cuno maajitia. ¹⁰Jiyacariitj, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

¹¹Maajiiri Jesu riucaaree:

—Shaaqui puetunujuanaa, Jiyaniijianaa.

Jesuuri maaji sequereeri:

—Janijari quia jiyanoya cutarani. Juhujaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹²Nojori nuhuaji, Jesuuri pueya niishitiojonu coteerohua. Nojori sequereeri:

—Janijari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pahuataa! ¡Puetunu quia pahuatasanojuanaari maja tojishano!

¹⁴Jesuuri nojori riucaaree:

—Tama cua cuaqueyajinijiaaja cua pahuatasacari, cunoori maja najuhuaa pahuatasano. Cua pahuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuanani. Niaari saniniuujia niishiyacuquijua teje cua niquiaarini, tee cua quianutaniuhuanani. ¹⁵Niaari pueyacuara saquiriojotaquiaa saaja nia niquishanojiniji, nia tojishanojinijijuhua. Janiya cutaraari maja cua saquiriojotanu pueyacuara. ¹⁶Janiya jaara juaari sesa mijia cutarani, cua sequesano cutaraari seetanujuanaa, niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaaniuria sesa mijia. ¹⁷Niaacuajaari Moisés Rootasanojiniji niishitiojoquiaa: “Caapiqui pueyano pahuatasano jaara juhua tarajanu pahuatasano quirijijuhua, cuno cutaraari seetanujuanaa”. ¹⁸Naajuhua, canaari caapiquini. Tama cua cuaqueyajaaja cua pahuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹Fariseocuacaari na nequesotaree:

—¿Teeteeri quia queni?

Jesuuri nojori riucaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijihuaj.

²⁰ Jesuuri puetunu nio pohuatariquiajanaa Pueyasora niqutiojosano cumaneeca racataja shuriucuaaji, Pueyaso Secojoua tiajinia. Naajaa, majaari pueya quianu quiriiquinioj, juhuanojuaja na monu juuca quiyaquishacarijia.

Jesuucua tiyashijiaacari jiyanoyaquishaanutaniya

²¹ Jesuuri cuno Fariseocuaca sequerohuacuhuj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiacaja, jiyanooshoo nia quishacarijia, cucua nia tiyuaquiniucua. Naaratej, majaari nia naata quianu quiniutianiya tee cua quianutaniyacuaani.

²² Naa Jesu sequesacariitij, cuno narta Judiocuacaari tama sequetooreejaaja:

—¿Casaara na sequereecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

²³ Jesuuri nojori sequereee:

—Niaari ninishiqui quiqiojinijinio. Janiya cutaraari jiyocuaaanujinijinioni. Niaari saaja mijiria quijia. Janiya cutaraari maja niqijinioni. ²⁴ Janiyacuajaari cunora nia sequereeni, niaari jiyanooshoojua cusonuunutaniya nia cuaracashitiniucua janiyari maja Pueyaso Niyanuni, taa cua sequequiaa nijaniyacujani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucaaree:

—Janiyari najuhuaana niaata pocoojiyani. Majaari nia tojinu janiya. Janiyacuajaari tari nia sequereeni cante janiyani. ²⁶ Janiyari queraatia jiitiaajaa cua sequesocoriquiano nijaniyani. Niaa jaara nocua tiyuaquiri, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. ²⁸ Jesuuri cunora nojori sequereee:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuj, majaari tama cua niishiriojosanojuaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuunaa narta Judiocuaca sequereee:

—Niaa jaara seetanujuanaa cua pohuatasano tojjijiaa quiri pueyaracaanu, niaari cua pueya quiniutianiya. ³² Niaa jaara naa miiritij, niaari seetanu rupajaanaa niishijiaa quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijia nia quiniuria.

³³ Narta Judiocuacaari Jesu riucaaree:

—Canaacujaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijjotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequereee:

—Seetanujuanaa nia sequeyanijia, cante sesa miijiacani, nojoriiri juhua poonijjotesano pueya quiya. Majaari na naata maninia miijia na quiniu. ³⁵ Poonijjotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuj, janiya jaara nia jaariutiare nia poonijjotenaajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham

jiuhuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricuara, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaca taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanajuani! ¡Pueyasocujaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninio quiquiaari. Cua Que Pueyasocujaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaquiya. ⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojouaari. Na sapojosacari, naa miyari sapojoua na quiniuucua. Sapojonu niishiniuni, cunoori nojuajiniji supuequiaari. Niaari cunoro nia que tojijia. Nocuaji niaari naa sapojonuujacuajuhua. ⁴⁵ Saniniuujia, cua pohuatasacari seetanu rupaajanaa nijaniya, majaari cucua nia tiuunuu quiquiaa. ⁴⁶ ¿Casaa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiucuaarini, seetanu rupaajanaa cua pohuatasacari nijaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Nijaniya saniniuujia, niaari na rupaa tojiyaquiya, na muerasu nia quiyaquishacari.

Jesucristoori tariucuacaanu quijiajuhanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacujaquiiri maninia sequeriquiaa quiajanijajinijini, quiaari Samaria jiyajini-jinu tahue, samaruraca pueyanotuhua!

⁴⁹ Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaani naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

⁵² Narta Judiocuacaari na sequeree:

—¡Quiarijia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujuniaajanaano. Quiaari saniniuujia quiarijia sequeyacuaja: “Cante cua rupaa tojjiani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujuniaa pueyajanaari shaajequiaarijiuhua. ¿Canteeri quiajaniani naa quia sequenuratej?

⁵⁴ Jesuuri nojori riucuaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori na-juhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵ Niaari seetanujuanaa na niishiyashijia. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani. ⁵⁶ Nia supuetana Abrahamri timiquiaari na niishishacari janiya

mijiria supenutaniyani. Nojuaja jaara cua niquiquiaari mijiria quiyano tari, jiyanhua timiquiaariiri.

⁵⁷Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanajuaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸Jesuuri nojori riucaaree:

—Janiya nia sequeya seetanujuanaani, Abraham raaquishacarjia, janiyari tari quijiani.

⁵⁹Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicujaji jamaarii saaja. Pueyaso Secojoua tiajiniji tohuatamaari.

9

Jesu jeeacasari cariyouaru namijia, naa rasanouhuanajaj

¹Tamacari Jesu rucuanesacari canaata, canaari cariyouaru pueyano niquiriini, naa rasanouhuanajaj. ²Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaniquiaari cariyouaruni, na queya miiniuucua sesatee, tama sesa na miiniuucujaja soj?

³Jesuuri canaa riucaaree:

—Maja. Maja cunora naa na rasaanu quiquiaari. Naa rasaaniquiaariiri Pueyaso cumaaca niishishaanura, na namijia jaara jeeacaare niquijiaara na quiniuria. ⁴Juua quishacarjia, pa tucutare miiniu cua Jiyarona sequesano cua miiniu. Paa quera niniyani. Jaara niniquii, majaari pa naata poonijionu quiniutianiya tari. ⁵Mijiria cua quishacarjia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariyouaru namijiaacuaari. ⁷Cariyouaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariyouaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquiri-ohua. ⁸Cariyouaru na quishacarjia, nojuajaari na miajajau na masetajara cumaneeca mashiniquijiojua quiquiaari. Puetunu pueyajanaari na niquitijua naa na mashiniquijiosacari. Naacujitij, nojuaja jaara niquijiaara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiarjiaaja:

—¿Cante cuno pueyanojaaraní? ¿Majate noocujaja tarijia cumaneeca mashiniquijiojuatej?

⁹Noojiaqueya pueyari sequeree:

—¡Taaquiririnij, nojuajacujaj!

Tamasacaari saniniuuujia sequereecujua:

—Nojuajaquinio naasucua. Juhua nojuaja niquishiyacujaj, majaari seetanujuanaa nojuaja.

Tarijia quijia cariyouaruuri saa sequereejaa:

—Taaquiririnij, janiyacuaaquinatejaj.

¹⁰Naaratej, pueyari na nequesotaree:

—¡Quiaacujaj cariyouaru quijiaruhua! ¿Taa niquijiaara quia quiriouharini?

¹¹Nojuajaari pueya riucaaree:

—Cuno, Jesu jiyaniushano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, janiyari niquijiaara quiquiini!

¹²Pueyari na nequesotaree:

—¿Teeteeri quia namijia jeecana pueyanoni?

Nojori riucaareeri:

—Johuj. Maja cua niishiniu.

Fariseocuaca nequesoreesacari na namijia jeeacasano pueyano

¹³ Pueyari Fariseocuacaacia jiyataaree Jesu jeeacasano cariyajuaru pueyano. ¹⁴ Jesu jaara mara coniquioquiaari na jeeacanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaij Fariseocuacaari tarijia cariyajuaru quijia nequesotaree taa niqijijara na quirini. Nojuajaari nojori riucaaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeeseeni. Naacuajitij, janiyari quiarijia niqijia quiyani.

¹⁶ Noojiaqueya cuno Fariseocuacajinijinooori saa sequereejaa:

—Cuno pueyano, nio pueyano namijia jeeacarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniucua samaatenu juuca!

Tamasacaari saniniuuja sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucaatej, nojoriiri juhua raqititirii. ¹⁷ Nocuaij tarijia quijia cariyajuaru nequesotaturouhuarihuaj:

—Niquijia quia quishacari quiarijia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucaaree:

—Janiyara, nojuajaari Pueyaso sequesano caminiujuunia.

¹⁸ Tii quinia Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyajuaru cuno pueyano quiniu quijia. Nocuaij nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyajuaru rasanujuhanani? ¿Taa quiarijia niqijijara na quiriohuarini?

²⁰ Na queyari cuno pojori riucaaree:

—Taaquiririni, nojuacuaaquinateja canaa niyanujuaj. Naa cariyajuaru rasaaniaari-iri. ²¹ Majaari canaa niishiniu cutara taa na quiriohua niqijiarani. Majaari canaa niishiniujuhuaj, cante na namijia jeeacarucuaani. Nojuaja nia nequesotare, tari cumantumacacujua. Nojuajanaa cuaara nia pohuataara cutara.

²² Na queyari naa riucaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenujusaaria maja Pueyaso secojojuatiajinia na tiuquiniuria socua”. ²³ Naaratej, na queyari naa narta Judiocuaca riucaquiaari: “Nojuaja nia nequesotare, cumantumacacujua”.

²⁴ Cunora cuno Judiocuacaari socua piiriohua na namijia jeeacasano pueyano. Nojoriicua na nishacari, na sequetureeri:

—¡Paacuajaari Pueyaso niqiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jeeacasano pueyanoori nojori riucaaree:

—Naajaa, jaara sesa miijia quiri, jaara maninia miijia quirijihuaj, maja cua niishiniu cuno. Janiya cutaraari niishiyani, ¡janiyari tarijia niqiyashijia quiquiaarini! ¡Janiyari saniniuuja quiarijia niqijia quiya cutarani!

²⁶ Nojoriiri na nequesotaruahuaj:

—¿Taa na miiriucuaa quiajanijjaarani, niqijia quia quiniuriani?

²⁷ Narta Judiocuaca camarucua sequere saajaari:

—Janiyacuaja tari nia pohuataareni. Majaari nia tojinu paniniu janiya. ¿Casaara nia paniya socua cua pacutenura sequenu nijaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojijiacujaja! ¡Canaa cutaraari supuetana Moisés Rootasano tojitiajacani! ²⁹ ¡Canaa cutaraari niishiyani Pueyasajuanaari Moisésua muetaquiaari na rootanura nojuaja! ¡Saniniuuja cuno pueyanoorijiataj, majaari quenaaja pa niishiniu teje na supuequiaarini!

³⁰ Na namijia jeeacasano pueyanoori nojori riucaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! ³¹¡Paacuaajaari niishiyani Pueyaso maja na tojiniu quijia sesa miijiaa secojosano! ¡Saaja na timitiajaca secojosano tojiya cutaraari, cante na panishano miiquiaacuajani! ³²¡Majaari quenaaja pa tojiniu quijia tamonu pueyanojiniji, cante cariojuaru namijia jeecajani, naa cariojuaru rasanujuhanaj! ³³Cuno pueyano jaara Pueyaso Jiyarosano quiyaquiri, ¿taa cua namijia na jeecarucuaacuaraarini?

³⁴Cuno pojoriiri na juaaniutia na sequeturee:

—¡Quiaari sesa miijia rasaquiaari! ¿Quiaateeri jiyanojuua canaa niishitiojonu paniruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojuu tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

Jesu tojitiaashijiaa pueya juhua cariojuaru

³⁵Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuuja?

³⁶Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷Jesuuri na sequeree:

—Quiaacuaja na niquiyaruhua. Nojuajaari cunocuaa, quiata pocoojiyani.

³⁸Jiyacaritij, pueyanoori Jesu cariquimijaji mojqetaree. Na sequereeri:

—¡Quiocua tiuanijia, cua Jiyaniijianaa!

³⁹Na nuhuaji, Jesuuri cuniqui quiniaa pueya niqiara sequeree:

—Janiyari mijiria niqiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niqijia cutara, nojuajaari juhua cariojuarura tari jiyatesaaree, cucua na tiuyaquiniuucua.

⁴⁰Tii quiniaa Fariseocuaca jaara tojiqiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariojuarujurijihuhua?

⁴¹Jesuuri nojori riucaaree:

—Naa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucuaajaaja, “Canaa niqijia cutarani”, niaari jiyanooshoojua nioojia nia tacatoyaquiniuucua.

10

Jesu pohuatasano miriqui borrego cojuanajiniji

¹Jesuuri socua pohuatarohua pueya niqiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyajiani, nojuaja jaara tamocoji tiuquimia, cunoori nohuasejojua. ²Saniniuujia, cante tohuateyaco tiuquijia cutarani, cunoori borregohua camarujuanaa cutara. ³Tohuateya cojuanaari toiotiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainijia. ⁴Puetunu na borregohujanaa jaara tohuareetama, na camaruuri na puetaja. Na seyari na nuhuaji sacuaaja, na camaruuri rupaa nojori niishishacari. ⁵Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶Jesuuri naa pohuataquiaari miriqui nojori niqiara. Nojoriiri saaja niishiyaquiaari casaa na niishitiojonu paniriquiaa nojorini.

Jesu Cristo, maninia pa cojuana

⁷Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. ⁸ Cante cua niyacarijia nijioquiaari coteenuni, nojoriiri sesa miijiaa quiquiaari, nohuasenuujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuan, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ Nohuasejojuuari saaja tiuquijia borregohuacua na nohuasenura, na puecoonura-juhuaj. Naa na shaaaja puetunujuanaari. Janiyari saniniuuja niquiaarini cua borregohua cua jiyatenura pueyaracaanu quijiacara, seetanujuanaa jiyanohua shuquiriaatia quijiaa nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitaja na seyacuuari. ¹² Saniniuuja, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyakinuucua na seyajanaa. Naacuajitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sarecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niqitiosaanura.

¹⁴ Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuj, taa cua Que niishiya janiyacuaani, mariyata taa cua niishiya cua Quejanihuahuj. Janiyari tama cua cuaqueyajaaja panitaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujinjinio. Janiyari nojori rijiunutaniya niyarujuhuaj. Nojoriiri cua tojtiriqiuano. Naacuajitij, puetunu cua borregohujanaari jatiqui quiriqiuano, niquiriyatu cojuanaracajuhuj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacua. Janiyari tama cua panishacarijaaja mosaanutaniyani, na nuhuaji cua samiitianuhua, pueyaracaanu quijia cua quiniuhua. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuj cua samiitianuhua. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijaaja Jesuucua. ²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhua pocuaano!

²¹ Tamasacaari saniniuuja sequeriquiaacujua:

—¿Samaruraca pueyanoteeri maninia casaa pohuatajaara juhua nio pueyanojua? ¡Maja! ¿Pueyanoteeri na naata samaru cumaacata jeeacan cariyujuaru namijijaara? ¡Maja na naata!

Judiocuaca camarucua niqiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriqiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhua. Jiyacariiri shuniya quiriqiaa.

²³ Jesuuri tii quiriqiaajuhuj. Pueyaso Secojoua tiajinia quiriqiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujiuuni-uqiojoriquiaa. ²⁴ Jiyacartij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaninyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucaaree:

—Janiyacuaja tari nia sequecanuni. Niaari saaja na cuaracashitiquianu. Niaa cuaara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiyauquiquiaa cua borregohua maanujinjinio nia quiyaquishacari. ²⁷ Cua

borregohuari cua rupaa tojjia cutara. Janiyari nojori niishiyajaanihuaj. Nojoriiri cunora cua nuhuajiquiaa. ²⁸ Janiyari pueyaracaanu quijiara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajiniji. ²⁹ Cua Queeri cua borregohua cua niqitioquiaari. Nojuajaari socua jiyanohua cumaacaraca tamasaca cumaacaraca quijiacajiniji. Naacuajitij, maja quenaaja tamonu naata cua borregohua jaariutianu cua Quejiniji. ³⁰ Janiya cua Queta, canaari juhua niqiriyatuni.

³¹ Jiyacaritij, canaa Judiocuaca camarucuuari sai rijiorohuacuhaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niqiarani. ¿Teyanoocua nia jacunu paniya janiyani?

³³ Nojoriiri Jesu riuacuaree:

—Majaari canaa jacunu quiniutianiya quiajaniya maninia quia miiniucua. ¡Canaari quia jacunutaniyani sacuaraatia quia pocuanuucua Pueyaso niqiarani! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanohua sesa! ¡Quiaacuajaari pueyano, juhua canaajuhuj!

³⁴ Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacuajaari nia sequequiaarini, niaari pueyasohua”.

³⁵ Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiitianaaracuajani. ³⁶ Naajuhuj, Pueyasocuajaari cua saquiriojoquiaari mijiria na jiyarosocoriquiano. Naa Pueyasojuaanaa Jiyarosano cua quishacaritij, ¿niaatucua casaara sequerene janiya Pueyaso niqiarani pocuaree sesani, cua sequesacari janiya Pueyaso Niyani? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniucua. ³⁸ Niaacuajaari cua Que cumaacata cua miishano niqiquiaa. Naa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaanihuaj.

³⁹ Jiyacaritij, nojoriiri socua Jesu quiatunu paniriohuacuhaj. Jesuuri saaja nojoriicujaji mashiquii.

⁴⁰ Jesuuri canaa jiyatarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriqiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quiija casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuaanaa quiija.

⁴² Naacuajitij, queraatia pueyari Jesuucua tiuquiciaari tii, tee canaa quiriqiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari Marfa, Martanio. Nojoriiri cuno Betania tiacajinijinio quiquiaarijuhuaj. ² Lázaro rimiatu Marfani, nojuajaari noo maajicuaja Jesu niohuaca sacuanijiaquiaari na mucacatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuhuaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijanaa, quia panishano pueyanona cusosu mataa.

⁴ Jesu tojishacari naa cuno pueyano sequesanootej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiitasanojinijini, pueyari Pueyaso cumaacata miishano niquiniutianiya. Pueyari cunora Pueyaso Nyanu maniniuhuaqueetanutianiya, cua Que Pueyasojuhujaj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaaquiaari Lázaronijiji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacuajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

⁹ Jesuuri canaa riucuaare miriqui:

—Janiyara, juuca juhuanojuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefonori, paari maninia niquiya pocujani. Majaari pa tiuriiniu. ¹⁰ Paa jaara ninishiqui rucuanefonori saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequeree socua:

—Pa rupena Lázaroni tari maquequee. Janiyari na niucujanuucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniacuajaqui. Naacuajiti paari niishiyani naatanutaniuhacuajaqui. ¿Paatucua casaara najuhuaa nocua quiaareni?

¹³ Naa Jesu pahuatasacari canaa Lázaronijitij, canaa sequeriquiaa juucuaari Lázaro tari macu quiriquiaa. Canaari saniniuujia jiyaniquiriquiaani Jesu naasucuaari canaa pahuatariquiaa Lázaro nareja maqueriquiaa. ¹⁴ Nocuaji Jesuuri maatia canaa sequeree:

—Lázaro tari cusoyarucuaa. ¹⁵ Janiyari timiyani tii cua quiyaquiniucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriojosano pueya sequeree:

—Pa Jiyaniijata pa quiaarejuhuaj, nata pa cojiritiasaanura pueconu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷ Canaa jaara tiuquijioseequiaarini, Jesuuri pahuatasaaquiaari Lázaro tari cuatro juuca shocotejoriquiaa raaco na niasaanujiniji. ¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji.

²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María ninu quiriquiaa cutara. Tiajiniaja qiriiri. ²¹ Canaacua Marta tiuquishacari, nojuajaari Jesu sequeese:

—Jiyaniijianaa, ¡quiaa jaara niaa quiquianu, cua nanu maara shaajeyaquiquianu!

²² Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequeree:

—Quia nanucuaa samiitianutaniuhua.

²⁴ Martaari na riucuaare:

—Taaquiririnij, janiyacuaa niishiyani nojuajaari samiitianutaniuhua macunucua samiiticosacariuhua jiya puequesacari.

²⁵ Jesuuri na sequeree:

—Janiyacuajaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷Nojuajaari Jesu riucaaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Nyanu, noj tariucuacaanu sequesaaquiaari mijiria niriqianotej.

²⁸Naa Marta riucaanu nuhuaji Jesutej, na tiajinia quiaarohuari. Naa María numaama sasasahuari:

—Niishitiojona jati quiya. Quia sequeyano nocua quianura.

²⁹Naa María tojishacari Marta sequesantej, ritia sanequeeri. Jesuucua nimiaari tee canaa quiriqiaacuajani. ³⁰Jesuuri juhuanojuaja maja na tiuquitianu quiqiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canaacuajani, Jesuucua na nishacari. ³¹Nojori cumanjianaa pueya jaara María niquiqiaari ritia tohuataano tiajiniji, nojoriiri na jiyaniqiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³²María tiuquishacari canaacua, Jesu cariquimiaji mojuquetaseeri. Naa na sequereeri:

—Quiaa jaara niya quiqianu, cua nanu maara shaajeyaquiqianu.

³³Jesu niquishacari María nujuqueyano, mariyata nata quinia nujuqueyanujuhuaj, Jesuuri nojori taraajetaree. ³⁴Jesuuri pueya nequesotaree:

—¿Tee na niasaarucuaani?

Pueyari Jesu sequere:

—Miji, Jiyaniijianaa. Quia niquiqii. Niya niasaarucuaano.

³⁵Jesuuri nujuquese. ³⁶Tii quinia Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanohua Lázaro panijiaquiiri.

³⁷Noojiaqueya cuno pojoriijiniinooori sequeriquiaajuhuj:

—Jesu jaara cariojuaru namijia jeecacanicuaa, maara Lázaro naataniquianujuhuaj maja na shaajenura.

Jesu samiitanishacari Lázaro

³⁸Jesuuri jiyanohua na taraajenuta raa jiyajiria catecanoquiaari, canaajuhuj. Raari puereetuca saajiaata mishiquiosano quiriqiaa. ³⁹Jesuuri pueya sequere:

—¡Saajia nia ruutiniri tamocora!

Martaari Jesu sequere:

—¡Jiyaniijianaa, cuatro juuca tari na shoconujia! ¡Tari mocuaatia jaaniuya naasucua!

⁴⁰Jesuuri Marta sequere:

—Janiyacuaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quena, quia timitiaanijia. Quiaari tari cua sequesano tojiriucuaacua. ⁴²Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quinia pueya niishiniuria quiaari mijiria cua jiyaroquiaari.

⁴³Naa Jesu sequenu nuhuajitij, jiyanohua na rupaa paaretareeri. Naa sequereeri:

—¡Lázarona, quia tohuatama!

⁴⁴Macuuri tariucua saminio tohuatamaa. Na juaashiquiaa, na niohuacaari jiunio-cosano quiriqiaajaa. Na nacaari puetunu na jiquicotajanaa mishiquiosano quiriqiaajuhuj, toquerata morosano. Jesuuri pueya sequere:

—Nia saacatare, cuaara rucaneera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵Naa Jesu samiitanishacari Lázarotej, queraatia narta Judiocuacaari nocua tiuquiaari, noo pojori canaputee Mariacua nijioquiaari na cumanjianuracuajani. ⁴⁶Noojiaqueya cuno Judiocuajiniinooori Fariseocuaca quiojoquiaari nojori pohuatanura Jesu miishano.

⁴⁷Naaratej, Fariseocuaca, pueyacuara secojonaa jiyaniijanucuanio, nojoriiri rerejoquiaari puetunu Judiocuaca camarucuatjanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niquiara. ⁴⁸ Paa jaara nareja na shanacure naa na miiniuriatej, ¡puetunu pueyajaanaari na pueyara quiniutianiya, nocua nojori tiushacari! Nojoriiri na jiyaniijiaara socua na jiyatenutaniya. Naaratej, pa jiitianaa Romano pueyari pocua nijionutaniya Pueyaso Secojoua tia nojori niyartanura, pa pueya na pucoonurajuhujaj.

⁴⁹ Caifásri tii quiriquiaajuhujaj. Nojuajaari canaa pueyacuara secojonaa jiyaniijiaanaa quiriquiaa cuno marijiara. Jiyacaritij, nojuajaari narta camarucua sequeree:

—¡Niaquiiri niishiyashijiaca seetanujuanaa! ⁵⁰ ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuaa puetunu pa pueyajaanaa pucoosaanura.

⁵¹ Caifás sequesanoori maja tama na sequesanojuaja quiquiaari. Pueyacuara secjonaa jiyaniijiaanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. ⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhujaj, tee tiqiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na qutiuniuria juhua niquiriyatu maanu. ⁵³ Naacuajitij, cuno juucajiniji, cuno Judiocuaca camarucuaari rojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucanejonu quijia narta Judiocuaca niquiara. Cunora tamaquiria canaa jiyataquiariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijiaaja. Nojoriiri quiojoquiaari juhuacarijia nojori jeenucuanura na cuaqueya nojori pucoosacari tama na seyajaaja nojoriucara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquihaaricujani. Nojoriiri naa miiquiaari juhuajaniya nojori queranacunura Pueyaso niquiara Pascua juuca. ⁵⁶ Pueyari tii Jesu pajenuuriquiaa. Pueyaso Secojoua tiacijina nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secjonaa jiyaniijianucua, Fariseocucanio, nojoriiri tari pueya rootaquiari, tamonu pueyano jaara niishiri tee Jesu quiyani, cuara nojori numooteera nojori quiatenura Jesu.

12

María totasacari na shanhua jaanutaja Jesuucua

(Mt 26.6-13; Mr 14.3-9)

¹ Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitiani quiaaricujani. ² Cuno tiacajinijinio Jesu rupuenaa pueya timitiasacari Jesu, nojoriiri sumatunu quiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatano. ³ Jiyacaritij, Mariari Jesuucua pataree na shanhua jaanutaja. Cunoori “nardo” jiyaniishano nataujiniji shipinishano quiquiaari. Jiyanhua queraatia cumaneecata masesano. Puereetuca motiiquio cajiniocua puecariquiaari cuno shanhua jaanutaja. Maríari Jesu nioluacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanhua jaanuriquiaa. ⁴ Naa María miishacaritij, niquiriyatu canaajinijinio Jesu saquiriojosano pueyanoori juuarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanhua jaanutaja niqutioyaquishaaree queraatia cumaneecarani, casamiijiunucua pueya niqutiosocoriquianoni? ¡Jaara masenu panishaare, maara niqutiosaaere juhua niquiriyatu marijiara pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiriquiaa casamiijiunucua pueyacuua. Naa sequereeri saaja cumaneecaacua jiaatijaa na quiniucua, nohuasejouw

na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejoja, pueya niquitiojosanojiniji canaara. ⁷Jesuuri saaja Judas sequeeree:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuaatajara cua cuaqueya, pueya niaaquishacarijia janiya raajinia, janiya jaara mosaareni. ⁸Casamiijiuniucua pueyari pueyaracaanu niaata quiriqiano cutara. Saniniuujia, janiyari maja pueyaracaanu niaata quiriqianoni.

Pueyacuara secोजना jiyaniijianucua roojotoosacari Lázaroocua

⁹Queraatia canaa Judiocuacaari niishiquiaari Jesu Betania tiacajinia quiriqiaa. Cunora, nojoriiri nocua quiojoquiaari na niquiniucua, Lázaro niquiniucuaajuhuaaj, teyano Jesu samiitiani quiaaricujani. ¹⁰⁻¹¹Jesu samiitianiucua Lázaro, queraatia canaa Judiocuacaari Jesuucua tiuuquiaari, na pueya nojori quiniuria. Cunora, canaa pueyacuara secोजना jiyaniijianucuaari roojotooquiaari Lázaro na motunurajuhuaaj.

Juhua Jiyaniijajanaa Jesu tiuquishacari Jerusalén tiacajinia

(Mt 21.1-11; Mr 11.1-11; Lc 19.28-40)

¹²Cuno queraatia pueya, tari Jerusalén tiacajinia quiriqiaacuaa Pascua juucara queranacunurani, nojoriiri niishiquiaari Jesu tariqui tiuquiniutianiyajuhuaaj. ¹³Nocuaaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuriquiaari. Naa nacooriquiaajaariuhua nojori shuquiritiasacari Jesu:

—¡Pocuaaji Tacuna! ¡Pocuaaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacuajani! ¡Nojuacuajaari Israel pueya Jiyaniijajanaa!

¹⁴Jesuquiiri jiyacari burro niquiojua riuriatamaa. Tari na nijinia cajiriqiaari, taa tariucuacaanu Pueyaso Rupaajinia naajiotasano quiyacuajani. ¹⁵Naa sequeyari:

“¡Sión tuhananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua nijimia cajiyari!”

¹⁶Jiyacaritij, majaari canaa niishiniu quiriqiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohua-teeriquiaani. Pueyaso jaara Jesu samiitiani quiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. ¹⁸Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree.

¹⁹Nocuaaji, Fariseocuacaari tama sequeooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanooocua pacuree, na pueya nojori quiniuria!

Grecia jiyajinijinio taucuaca pocojonu panishacari Jesuta

²⁰Grecia jiyajinijinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. ²¹Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocojonu paniyani.

²²Jiyacaritij, Felipeeri Andrés sequeesee cuno pojori sequesano nojuaja. Na nuhuaji, Andrésri Felipe quiaaree Jesuucua. Nojoriiri Jesu pohuataseejuhuaj. ²³Jesuuri naa nojori riucaaree:

—Quiarijiani, tama janiyajaarijia mosaanutaniya pueya nitini. ²⁴Seetanujuanaa nia sequeyanijia, sohuajajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵Naajuhuaaj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitijia na tojiniuria janiya mijiriani, nojuajaari pueyaracaanu shuquiriaatia rishijijara jiyatesaanutaniya. ²⁶Cante quiria poonijionu paniyani, cuaara seetanujuanaa cua tojijia

quiria. Tee cua quiniutianiyacuani, cua tojitiajacaari tii quiniutianiyajuhuj. Cua Queeri cua tojjiaca timitianutaniya. ¡Jiyanohua maninia nojori miiniutianiyajaariuhuj!

Jesu pahuatasacari nojuaja mosaanutaniya

²⁷ Quiarijiani, janiyari jiyanohua tacayani. ¿Casa cua sequeyarini? ¿Janiyate sequeya soj: “Cua Quenea, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquaari mijiriani. ²⁸ ¡Cua Quenea, janiya cuaara miishiiriqui taa quia paniyacuajani, pueya niishiniuria quiaari jiyanohua maninia!

Jiyacartij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuuja sequereecujua:

—¡Pueyaso serucuaja nocua pocuareeno!

³⁰ Saniniuuja, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. ³¹ Quiarijiani, mijiria quiniaa miishacari naquiya janiya, nojoriiri saniniuuja saniitiosocoriquiano jiyatesaaree tari. Naajuhuj, mijiria jiyaniija Sesaacaari jataasaanutaniyajuhuj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuniuria, nojori ruuretanura janiya soj.

³³ Naa Jesu sequesacartij, canaa niishitiriiri taa pueya monutaniya nojuajani. ³⁴ Tii quiniaa pueyari na riucaaree:

—Canaacuajaari tariucuacaanu Pueyaso Rupaajiniji niishiyani, Pueyaso Jiyaroso-coriquiano Cristoori pueyaracaanu rishiriquiano cutara. Quiajaniyarijijataj, ¿casaara quia sequeyariniija, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuri juhuacarjia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuri, niaata cua quishacarijia, seetanujanaa cuhuashiqui quijia nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaaji jamaashiiri.

Judiocuaca tiuyaquishacari Jesuucua

³⁷ Jesuuri jiyanohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸ Naacuajitij, tariucuacaanu Pueyaso sequenu panishano caminiujuunia Isaias pahuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pahuatasanoocua tiuriini, canaa pahuatasacari quia Jiyarosocoriquianojinijini? ¡Shaaqui! ¿Cante niishiriijianiuhuj, jiyajeneta casaa nojori niquishanoori seetanujanaa quia cumaacata miishano quiriquiaa? ¡Shaaqui!”

³⁹ Naacuajitij, majaari nojori naata tiuniu quiquiaari Jesuucua. Isafasri naa naajio-taquiaarijiuhuj:

⁴⁰ “Pueyasoori nojori jiyateree juhua nimishitiria, maja nojori niquiniuria na namijia. Nojori niishitija cushitioeejaariuhuj, maja nojori niishiniuria nojori jiuujata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijuhuj”.

⁴¹ Supuetana Isafasri naa caminiujuquiaari Pueyaso niishitishano nojuajatej, Jesu na niquiniucua na shacantuuca cumaacajinia quiyano. Naa na pahuatasacartij, nojuajaari juhuacarjia Jesujiniji pahuatariquiaa.

⁴² Naajaa, queraatia narta Judiocuacaari Jesuucua tiuuquiaari. Queraatia canaa jiyani-
jijanucuaari nocua tiuuquiaarijiuhuj. Cuno jiyaniijianucuaari maja na pohuatanu qui-
jia pueya niquiara, Jesuucua tiuujiaca nojori quishacari. Nojoriiri na pohuataaquijia,
Fariseocuaca na pueretusacari, Fariseocuaca mariqui nojori tenujureeri maja socua nojori
tiuquitianura Pueyaso secujojua tiacajinia. ⁴³ Nojoriiri saaja narta pueya shuquiritiasano
pueya quiniu panijia, maja Pueyaso shuquiritiasano cutara.

Pueya tojtiaaquiniucua Jesu sequesano, nojoriiri saniitiosaariquiano

⁴⁴ Jesuuri jiyano hua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijaari-
uhuj, cante cua jiyaroquiaaricujani! ⁴⁵ ¡Cante cua niquiriini, nojuajaari cua Jiyarona
niquiriijuhuj! ⁴⁶ Janiyari mijiria niquiaarini cua cuhuatanura nijaniya. Naacuajitij,
cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa
tojiriquia najuhuanaj, janiyajanaari maja nocuara cua saquirojotanu quiniutianiya na
saniitiosaanura. Majaari cua ninu quiquiaari mijiria, pueya cua saniitionura. Janiya
cutaraari niquiaarini nojoriicujaji cua tacunura. ⁴⁸ Cante cua ruuretaja saajani, cua seque-
sano tojijaquiyajaariuhuj, nojuajaari tari nocuara saquirojotana jiitiaa na saniitiosa-
nura. Nojoriria cua sequesano cutaraari tama nojoriicua saquirojotariquianojuaja
nio jiya puequesacari. ⁴⁹ Cua pohuatasanoori maja tama cua niishishanojuaja. Cua
Jiyarona cua Quecuajaari cua niishitiquiaa casaa cua sequenutaniyani, mariyata casaa
cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari
pueyaracaanu quijia quiniutianiya cutara. Naaratej, janiyari seetanujuaana saaja na
sequesano caminiujuquiaani, taa na niishitiquiaa janiyacujani.

13

Jesu jeequejosacari na saquirojosano pueya niohuaca

¹ Jesuuri canaa na saquirojosano pueyata rerejoquiaari Pascuaacuara juucajinia. Je-
suuri jiyacari niishiquiaari tari quiquiaariiri quera na tiujiasacari canaa mijiria, na
Queecua na tacanuhua. Nojuajaari canaa paniriquiaajaa, taa canaa na paniquiaari
pueyaracaanucujani, mijiria na quishacari canaata.

² Cuno niucuaja, Jesuuri canaa na saquirojosano pueyata miaqueriquiaa. Sesaa-
caari tari Judas Iscariote niishitirii noojajinia, nojuaja cuara Jesu quiateera na paraa,
na mosaanura. Cuno Judasri tamonu Simón jyanishano pueyano niyanu quiquiaari.

³ Jesuuri niishijia nojuaja seetanujuaana Pueyasojiniji niquiaari. Naajuhuj, nojuajaari
niishiquiaari, na Que Pueyasoori na jiyatequiaari Jiyaniijiarajanaa, puetunu casaa jiitiana-
janaa na quiniuria. Niishiriquiaajaariuhua nojuajaari quera na Queecua tacanutaniuhua.

⁴ Jiyaniijijajanaa na quishacari, naajaa, nojuajaari miaquejajinjiji sanequiaari. Na tucuaque
toque jocuareeri. Na nuhuaji na cajiniocua camarucuteree cuaqueya tuujutajaari. ⁵ Na
nuhuaji, mohuaca shuurii tohuatashijiniaari. Canaa niohuaca jeequejoriquiaari juhua
tiaco seru. Na nuhuaji, na sacuanijiariquiaajaariuhuj na cajiniocua na camarucutesano
cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequereeri:

—Jiyaniijiana, ¿taa quia miyani? ¿Quiaateeri cua niohuaca jeequenutaniya?

⁷ Jesuuri Pedro riucaare:

—Quiarijiani, majaari quia niishiniu casaara naa cua miyani. Naajaa, quiaacuaja na
nuhuaji niishiniutianiya.

⁸ Pedroori Jesu sequereeri:

—¡Cua Jiyaniijiana, janiya cutaraari maja quenaaja cua shanacunu quiniutianiya cucua
quiajaniya, cua niohuaca quia jeequenura!

Jesuuri na riucaare:

—Janiya jaara quia niohuaca jeequejiyaquirini, majaari cua pueyano quia quiniu
quiniutianiya.

⁹ Simón Pedroori na sequereeri:

—Jaara naa quiriritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu nijaniyajanaari tari jeequejosano quiyacuaaja. Saa niquiriyatujaari jeequesoo quiya saniniuujia.

¹¹ Jesuuri tari niishiquiaari cante na quietenutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajaniija, taa nia jiyaniquiquiaa janiyacuaajani. ¹⁴ Naaratej, janiya jaara jeequejoree nia niohuacuaani, nia Jiyaniija cua quishacari, nia Niishitiojonajuhuaaj, naa nia miiriquia niarta Pueyaso muerasujuhuaaj. ¹⁵ Janiyari naa miiriini, cua niishitiojonura nijaniya, naa nia miitioonu-rajuhuaaj taa cua miirii nijaniyacuaani. ¹⁶ Seetanujuanaa nia sequeyanijia, seruuri maja socua tojishano quijia na camarnujiniji. Naajuhuaaj, jiyarosano pueyanoori maja socua tojishano quijia na jiyaronajiniji. ¹⁷ Naa jaara cua rootasano niishiri, niaari shuquiriaatia quijiaa quiniutianiya niaa jaara na tojjijiaa quiri.

¹⁸ Shusha cua sequesano nijaniyani, cunoori maja puetunu nijaniyaranujuanaa. Janiyacuajaari niishiyani canapue cua saquirojoquiaarini, taamueca pueyate nijaniyani. Naacuajitij, tariucuaaanu Pueyaso Rupaajinia janiyajiniji naajiotasanoori tohuateenu-taniya. Naa sequeyari:

“Tama cuata miaquenajaariija cua paracara quiri”.

¹⁹ Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyani seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquishano pueya tojjijiani, nojuajaari cua tojiyajuhuaaj. Cante cua tojjijara quiriini, nojuajaari cua Jiyarona tojjijara quiriijuhuaaj.

Jesu pohuatasacari, Judascuaajaari na paraa na quiateriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canaatej, jiyanojua na taraajenuta naa canaa sequereeri:

—Seetanujuanaa nia sequeyanijia, niquiriyatu nijaniyajinijinioori cua paraa cua quietenutaniya.

²² Canaari jiyacari tama niquitiooreejaanijia. Majaari canaa niishiniu quiriquiaa cana-jiniji naa Jesu sequeriquiaani. ²³ Jiyacaritij, janiyani na shuriucuaaji cajiriquiaa miaque-nuujuajiniani, na panishano pueyano cua quiniucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyani Jesuucua tatereeni, jiyasohuaaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶ Jesuuri cua riucuaaree:

—Janiyani pan rau piquiojonutaniya caacajimiani. Cana cua niquitionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niquitioereeri. Nojuajaari tamonu Simón jiyanishano niyanu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquirojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. ²⁹ Judasri canaa cumaneeca cojuatana quijia. Naaratej, noojiaqueya canaajinijinioori jiyaniquiriquiaani Jesu naasucua na jiyaroriquiaa socua casa na masenura canaa queranacunuatajara, casamiijituniucua na niquitiojonura cumaneeca soj. ³⁰ Judas jaara masequiaari Jesu niquitiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaqueetasanutaniyani. Pueyasoori jiyano hua maniniuhuaqueetasanutaniyajuhua, naa cua miishanojiniji. ³²Pueyaso jaara maniniuhuaqueetasaaare naa maninia cua miiniucuatej, nojuajaari cua jiyatenu-taniya cumaacaraca quijia cua quiniuria na shuriucua. Quera naa cua miiniutianiyari. ³³Quiquiohuaniojuanaa, janiya rupaquijia niaata quiniutianiyajaarani. Taa cua seque-canu parta Judiocuacacuaani, janiyari naa nia sequeyajaaniuhua. Niaari cua pajenu-unutaniya juucua. Majaari nia naata quianu quiniutianiya cucua, tee cua quianutaniy-acuaani. ³⁴Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. ³⁵Niaa jaara naa panitioojuaca quiri, puetunu Pueyaso niishiyashijiaa pueyajaanaari naacuaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetananiya

(Mt 26.31-35; Mr 14.27-31; Lc 22.31-34)

³⁶Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷Pedroori na sequeree:

—Jiyaniijianaa, ¿casaara quia sequeyarini, quiarijia cutara maja cua naata quianu quiaata? Janiyacuaja tama cua cuaqueyajaaja tarinijiotaaree quiocuarani.

³⁸Jesuuri na riucaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasoocua

¹Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasoocua nia tiuuri. Cucua nia tiurijihua. ²Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiaa. Jaara naa quiyacuriritij, janiya maara nia sequeyquirini janiya nia puetanutaniyani, niaacuaji cua jeenucuanura. ³Cua jeenucuanu nuhuaji nia quiquiora, janiyari niaacua tacatenutani-uhua, cua rijionuhuaa nijaniya, cuata nia quiniurijuhua tee cua quiniutaniyacuaani. ⁴Niaacuajaari cua quiquiojiniara neteja nuu niishiya, tee cua quianutaniyacuaani.

⁵Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶Jesuuri na riucaaree:

—Janiyacuajaari cuno nuuni, Pueyasoocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya rupueteja Pueyasoni, nojori tiuushacari cucua. ⁷Niaa jaara seetanujuanaa cua niishiquiaaricuaa, niaa maara cua Que niishirijihua. Seetanujuanaa, niaari tari na niishiyacuaja. Niaari na niquiquiaajuhua.

⁸Felipeeri na sequeree:

—Jiyaniijianaa, quiaa jaara canaa niqitiri quia Que Pueyaso, canaacua panaatia quiriuhua.

⁹Jesuuri Felipe riucaaree:

—Felipenaa, janiyacuaruhua pueyaracaanu niaata quiquiaa juucuan. ¿Majateeri juhanouaja quia niishiniu janiya? Cante cua niquiquiaani, cua Que niquiquiaaajar-iuhuj. ¿Casaara quia sequeya cua niquitiniuria cua Que nijaniyarini? ¹⁰ ¿Majateeri quia tiuuniu cucua cua sequesacari quiajaniya, janiyari cua Que jiuujajinia quiyani, cua Queeri saniniuujia coojajinia quiyacujua? Canaari maja rimiajatani. Nio, cua sequesano nijaniyani, cunoori maja tama cua niishishanojaa. Cua Que, coojajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari nijaniya, janiyari cua Que jiuujajinia quiyani, cua Queeri saniniuujia coojajinia quiyacujua. Naa jaara cua sequesanoocua tiuuniu paniaquiri, cucua nia tiuuriqui na cumaacata cua miiniuucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuj. Cua tacasacariuhua cua Que shuriucua cua quiniuhua, cucua tiuujiaacari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojajinia cua quishacari, janiyari naara miiniutianiyani puetunu nia masanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyano hua maninia miijia. ¹⁴ Nioojia rupuetosacari coojata, janiyari puetunu nia masanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ Naa jaara seetanujuanaa cua panijiaa quiri, niaari cua rootasano tojtiaajaca quiniutianiya. ¹⁶ Naajuhuj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriqiano. ¹⁷ Nojuajaari Pueyaso Sohuanu, seetanu rupaa jiitianajanaa. Pueyaso tojyashijia pueyari maja na naata cuno Sohuanu na jitianu, nojori niquyaquiniuucua nojuaja, na niishitiyaquiniuucua nojuajuhuj. Naa cutaraari na niishijia. Nojuajaari niaata quiyacuja. ¡Pueyaracaanu nioojajinia quiriqianojaariuhuj!

¹⁸ Majaari seetanujuanaa cua tiujianu quiniutianiya nijaniya juhua japueyojuaca nia quiniuria. Janiyacujaari tacatenutaniuhuan niaata cua quiniuhua. ¹⁹ Pueyaso tojtiaashijia pueyari quiari naataja cua niquyaquiniutianiya socua. Naa cutaraari cua niquijiaa quiniutianiya. Samiitianijiojua cua quiniuucua, niaari pueyaracaanu quijiaa quiniutianiyajuhuj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhuj. Janiyari saniniuujia nioojajinia quijiani. ²¹ Cante cua rootasano niishijiani, nojuaja jaara na tojjia quiriuhuj, nojuajaari cua panijia cutara. Cante cua panijiani, cua Queeri na panijia quiniutianiyajuhuj. Janiyari na panijia quiniutianiyajuhuj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucatej, nojuajaari Jesu nequesotaree:

—Jiyaniijanaa, ¿casaara saaja canaacua quia niniutianiyarini, maja puetunu mijiria quiniiaa pueyacujanaa?

²³ Jesuuri na riuucaree:

—Cante cua panijiani, cua rootasano tojjiajaariuhuj. Cua Queeri jiyano pueyano panijia. Naaratej, canaari nocua niniutianiyani, noojajinia canaa quiniuria, canaa quiquiora canaa jiyatenura nojuaja. ²⁴ Saniniuujia, cante cua paniaquijiani, jiyano pueyari cua rootasano tojyashijiaacajuhuj. Puetunu cua rootasanojuanaa, niaa na tojiquaani, cunoori maja tama cua niishishanojaa. Cunoori cua Que niishitishano janiya, cante mijiria cua jiyaroquiaaricujani.

²⁵ Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitiojonutaniya panishanojuanaa nijaniya. Naajuhuj, nojuajaari nia niishitiniutianiyuhua puetunu tari cua pohuatasano nijaniyajanaa.

²⁷ Janiyari nioojia cajitiniutianiyani. Janiyari coojia nianutaniya nioojajiniani, juhua-janiya quijiaa nia quiniuria taa cua quiyacaani. Naacuajitij, niaari seetanujuanaa juhujaniya quiniutianiya. Mijiria quiniiaa pueyari maja na niishiniu cumanijianu juhua janiya. Naaratej, maja nia tacaani. Majaari puerenujuhuj. ²⁸ Tari nia sequerecujajia:

“Janiya quera quiohuani. Janiyari na nuhuaji tacatenutaniuhuani niaata cua quiniuria”. Niaa jaara seetanujuanaa cua panijiaa quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijijanaa cutara janiyajini. ²⁹Janiyacujaari juhuacarijia nio nia sequeyani. Naacujitij, niaa jaara niquiri tohuateyano cua sequesano nijaniya, niaari niishiniutianiya puetunu cua pohuatasanojuanaari seetanujuanaa.

³⁰Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojitiaashijiaa jiyaniijia. Pueyaracaanu cua Que Pueyaso tojjiaa cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹Naajaa, na miishanojiniji janiya, puetunu pueyajaanaari niishiniutianiya, janiyari puetunu cua Que sequesanojuanaa tojjiani, na panijiaa cua quiniuucua.

’Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹Jesuuri naa pohuataquiaari socua canaa niqiaara:

–Janiyari juhua uva jiyonani, cua Que natau. ²Cua pueyari juhua cua cashacucua. Tamonu cua cashacucujinijiniote muetujua saniniunijia, cua Queeri na nacareetaja, socua queraatia na muetunura. ³Nia tojiniuucua cua rootasano, niaari tari juhua nacareetasano quiya. ⁴Pueyaracaanu coojia nia rupeere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijiaa quiri.

⁵Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya nijaniyacuaani, naacujitij, niaari juhua queraatia muetujuaa quiniutianiya. Cucuaji rupatejacaari maja na naata casaa miiniu janiyajju. ⁶Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, taticuusaarohuari manijinia quejoosocoriquiano. Tii cateyari.

⁷Niaa jaara coojia rupuejaca quiri, niaa jaara cua rootasano tojjijiaa quirijihuj, puetunu nia panishanoocuarajanaa nia secojore Pueyaso. Nojuacuajaari nia masasano miiniutianiya. ⁸Naa cua Que miishacari nia panishanotej, niaari juhua queraatia muetujuaa quiniutianiya. Naacujitij, cua Queeri jiyanojia timitiasaanutaniya. Naacujitij, niishishaanutaniyajaariuhua niaari cua tojitiajaca pueyaniyojua. ⁹Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojjijiaa quiriquia, niaari pueyaracaanu cua panishano pueya quiniutianiyajuhuj.

¹¹Janiyari naa nia sequeyani, shuquiriaatia quijiaa nia quiniuria, taa shuquiriaatia quijiaa cua quiyacuaani. Naacujitij, niaari tojetaarucujanaa shuquiriaatia quijiaa quiniutianiya. ¹²Cua tojiri. Nioori cua sequesano niaara: “¡Pueyaracaanu panitioojuaa nia quiriquia, taa cua paniya nijaniyacuaani!” ¹³Cante tama na cuaqueyajaaja panitija na cusionura na rupuenaa nitini, naa miijia cutaraari seetanujuanaa jiyanojia narta pueya panijia. ¹⁴Niaa jaara cua sequesano miijiaa quiri, niaari cua rupuenaa. ¹⁵Naacujitij, majaari cua sequenu quiniutianiya tari nijaniya cua seyata. Pueyano seruuri maja na niishiniu casaa poonijiosano na camarmu miiquiaacuaani. Janiyari quiarijia nia sequeya cua rupenaatani, cua niishitiniuucua nijaniya puetunu cua Que sequesanojuanaa janiya. ¹⁶Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria nijaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia

miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masanojuanaa nia niqutionutaniya seetanujuanaa coojia rupuejaca nioojia quishacari. ¹⁷Janiyari cunora nia sequeyani: “Pueyaracaanu panitiojuaca nia quiri”.

Pueyaso niishiyashijiaca pueyari Pueyaso muerasu niqiniu paniyashijiaca

¹⁸Pueyaso niishiyashijiaca jaara nia niqiniu paniyaquiriquia, majaari nia tacaaniu. Cuno pojoricuaajaari naa cua niqitiuniu paniyaquijiacuaa. ¹⁹Niaa jaara Pueyaso muerasu quiaquiriquia, Pueyaso niishiyashijiaca maara nia panijiaca quiriquia, taa nojori paniquiaa narta Pueyaso niishiyashijiacaani. Niaari Pueyaso niishiyashijiaca quiquiaarijuhuaj. Naajaa, janiyari nojori tajiniji nia saquiriojoquiarini, cua pueya nia quiniuria. Cunora, Pueyaso niishiyashijiacaari nia niqiniu paniyaquiriquiaa, maja tari nia quishacari juhua nojori. ²⁰Majaari nio cua sequesano nia niyajetanu: “Seru- uri maja socua tojishano na camarnujiniji”. Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuahuaj. Naajuhua, nojori jaara cua rootasano tojiqiaacuaa, nojoriiri nia rootasano tojijiaca quiniutianiyajuahuaj. ²¹Nojoriiri naa naquiya miiniutianiya nijaniyatej, cua pueya nia quiniucua, nojori niishiyaquishacari cua Jiyarona.

²²Janiya jaara niyaquiriquiaari nojori cua pohuatanura Pueyaso rupaani, nojoriicuaa maara saquiriojotaaquishaare, sesa nojori miishanojiniji. Nojori niquiara cua pohu- atanuucua Pueyaso rupaa, majaari nojori naata sequenu quiniutianiya: “Cua jiyanoori. Maja cua niishiniu quiquiaari quia rootasano”. ²³Cante cua niqiniu paniyashijiani, nojoriiri cua Que niqiniu paniyashijiajuhuaj. ²⁴Sesa nojori miishano maara nojoriicuaa saquiriojotaaquishaare, janiya jaara cua cumaacata miyaquiriquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niqitiuniu paniyaquijiacua, cua Que niqitiuniu paniyaquijiacajaar- iuhua. ²⁵Naajaa, naa nojori miiniucua janiyatej, tariucuaaanu Pueyaso Rupaajinia naajiotasano janiyajinijiiri tari tohuateeree. Naa sequeyari: “Janiyari najuhua nia niqiniu paniyaquishiyani”.

²⁶Janiya jaara cua Que shuriucua quishuhuaani, janiyari tiji Pueyaso Sohuanu jiyaronu- taniya mijiriani. Nojuajaari seetanu rupajanaa jitiata. Nojuajaari janiyajiniji niishitiniu- tianiya pueya. ²⁷Niaari janiyajiniji pohuatanutaniya pueyajuhua, pueyaracaanu cuata nia quiniucua shushajanaa cua coteesacari pohuatanu Pueyaso rupaa.

16

¹Janiyari naa nia numooteyani maja nia tarinitianura cucua tiuuniu niaa jaara naquiya miishaare. ²Cua pueya nia quiniucua, majaari nia shanacusaanu quiniutianiya nia tiuquitianura Pueyaso secojojuatiacajinia. Pueya jaara nia puecoorejuhuaj cua tojtiajaca nia quiniucua, nojoriiri jiyaniutianiya nojori maninia miya Pueyasaara, naa nojori miishacari. ³Nojoriiri naa miiniutianiya nijaniyatej, nojori niishiyaquiniucua janiya, cua Quejuhuaj. ⁴Janiyacuaajari juhuacarijia naa nia sequeyani. Naacujitij, niaa jaara naquiya miishaare, niocua jiyacari niishiri janiyacuaajaari tari naa nia sequequiaarini. Majaari quenaaja nio cua sequenu quijia nijaniya, pueyaracaanu niaata cua quiniucua.

Pueyaso Sohuanu miishanojiniji pohuatasano

⁵Quiarijiani, janiyari cua Jiyaronaacua quiohuani. Quiarijiani, majaari quenaaja nia- janiyajinijinio nequesotanu janiya: “¿Tee quia quiohuarini?” ⁶Janiya jaara nia sequereeni janiya qianutaniuhuaani, niaari saaja taraajequee. ⁷Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaqui- yarohuani, majaari Pueyaso Sohuanu niqiniu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. ⁸Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijiacua. Nojori niishitiniutianiyajaariuhua nojoriiri na naata

sesa miyashijiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia que-joonu. ⁹Seetanujuanaa, Pueyasora, nojoriiri sesa miijiaca nojori tiuyaquiniuucua cucua. ¹⁰Jiyocuacaanu cua tacasacariuhua cua Queecua, majaari socua nia niqiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. ¹¹Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacuajitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniuucua.

¹²Janiyari queraatia jiitiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua. ¹³Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiitiaja. Nojuajaari maja tama na niishishanojuaja na niishitiniu quiniutianiya nijaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. ¹⁴Niaari cua shuqiritianutaniya, nojuaja niishitiniuucua nijaniya janiyajiniji. ¹⁵Puetunu cua Que jiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiitiasano niaara, na caminiujiuniuria nijaniyarajuhuj.

¹⁶Niaari saaja quiarijia cua niquiya. Na nuhuaji cutara, majaari socua nia niqiniu quiniutianiya janiya. Pasa naataja na nuhuaji, niaari cua niqiniutianihuacuuhuj.

Nia taraajenuuri jatanutaniya shuquiriaatia nia quiniuria

¹⁷Jiyacaritij, noojiaqueya canaa na saquirojosano pueyajinijinioori tama nequesoree-tooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niqiniu quiniutianiya janiya?” ¿Casaa na sequenu paniyajaaranuhua na sequesacari: “Pasa naataja na nuhuaji niaari cua niqiniutianihuacuuhuj”, na sequesacarijuhuaj: “Cua Queecua qianutanihuanijia?” ¹⁸Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¿Majaari pa niishiniu casaaraqui na sequeyatejaj!

¹⁹Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niqiniu quiniutianiya janiya. Pasa naataja na nuhuaji, niaari cua niqiniutianihuacuuhuj”. ¿Niaatejaara niojiniji nequesoreetoya tama nijaniyajaaja? ²⁰Seetanujuanaa nia sequeyanijia, niaari nujuquenutaniya. Niaari taraajeconutaniyajuhuj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa nijaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹Naajaariuhuj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²²Quiarijiani, niaari naa taraatia quiyajuhuj. Naajaa, niaacua tacatenutanihuanijia. Niaari jiyanohua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniu jaariutianu.

²³Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqitionutaniya puetunu nia masanojuanaa nojuaja, seetanujuanaa coojia rupuejaca nioojia quishacari. ²⁴Majaari juhuanujuaja nia secojona Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niqitiosaa, seetanujuanaa shuquiriaatia nia quiniuria.

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojiniuria nijaniya. ²⁷ Cua Quejanaacuajaari nia panijia, nia paniniucua janiya, nia niishiniucujuhujaj janiyari na jiyarosaroni. ²⁸ Niaacuajaari niishiya, janiyari cua Que shuriucujaji niquiaarini pueyanora cua quiniuria mijiria. Quiarjia saniniuujia, janiyari nio jiya tiujianutaniyani, cua Queecua cua quianuhua.

²⁹ Naa Jesu sequesacari canaatej, canaari na sequereeni:

—Quiarjia cutara, quiaari maatiajanaa sequeree, maja miriqui. ³⁰ Quiarjia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuajaqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiyuruhua? ³² Tari quenaacoyari naquiya cua miishaanura. Seetanujuanaa quiarjiaari. Niaari cucujaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuaajaari cua cojiyani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuajaari mijiria jiyaniijia shocotareeni. Naacuajitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuaaanu na mausacari, naa na Que sequereeni:

—Cua Quenaa, janiya nio juuca naquiya miishaanutaniyani taa quia sequequiaaricuaajani. Cua tojiniucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacu saniniuujia quia jiyatere pueya timitiasano quia quiniuriani, tojetaarucuaajanaa maninia mijia quia quiniucua. ² Quiaacuajaari quia cumaaca cua niqutioquiaari puetunu pueyajanaa cua jiitianura. Naacuajitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niqutioquiaari janiyacuajani. ³ Nojori niishishacari saaja quiajaniyari seetanujuanaa Pueyasocuaaja, naajuhujaj, nojori niishishacari janiyari quia jiyarosaroni, naacuajitij, nojoriiri pueyaracaanu quijiara quiniutianiya shuquiriaatia.

⁴ Janiyari tari tucuatee quia sequesano cua miiniuria mijiriani. Naa cua miiniucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jiyanohua shuquiriaatia quijia quiquiaari quia shuriucuan, jiyaniijiajanaa cua quishacari. Cua Quenaa, naa quijiara cua jiyaterohua quiarijiani, quia shuriucua cua quiniuhua.

⁶ Quia niqutiosano pueya janiya, quia saquiriojosano pueya quia niishiyashijica pueyajinijinioni, quiarjia cutara, nojoriiri niishiya cante quiajaniyani. Nojoriiri quia niishiya, nojori niqiniucua cua mijiosano quia cumaacata, cua pohuatasano quiajanijiniji nojori tojiniucujuhujaj. Nojoriiri quia pueya quijia. Quiaari saniniuujia nojori cua niqutioquiaari. Nojoriiri quiarjia quia rupaa tojtiaajaca cutara. ⁷ Nojoriiri niishiya puetunu cua jiišanasojuanaani, cunoori quia niqutiosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiuuri. Nojoriiri seetanujuanaa niishiya, janiyari quia shuriucujaji niquiaarini. Niishitiyuajaariuhujaj, janiyari seetanujuanaa quia jiyarosaroni.

⁹ Janiyari cunora nojoriicua quia secojiyani, seetanujuanaa quia pueya nojori quiniucua. Majaari cua secojonu quia niishiyashijica pueyacuara. Saaja noo pojoriicua quia secojiyanijia, quiaa na niqutioquiaari janiyatej. ¹⁰ Naaratej, puetunu cua jiišanaso pueyajanaari quia pueyajuhujaj. Maryata puetunu quia jiišanaso pueyajanaari cua pueyajuhujaj. Nojori tiuniucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhujaj, naa nojori niqishacari cua cumaaca.

¹¹ 'Majaari puera cua tarishiniu quiniutianiya mijiria. Cua pueya cutaraari mijiria quiniutianiyajaara, janiya jaara quiaarohua quiocuani. Jiyanoehua maninia cua Quenaa, nojori quia cojuare quia cumaacata, teyano pojori quia niquitioquiaari janiyacujani. Naa quia jiitieri nojori, jatiqui nojori quiniuria juhua niquiriyatu jiuujiaraca, taa pa quiyacuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaca nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa nojuuari juurequecanu cutara, tariucua juurequeriquiano quijiacuajatej. Naacuajitij, tariucuaaanu quia rupaajinia naajiotasanoori tohuatecanu.

¹³ 'Quiarijiani, janiyari quiocua quianutianiya, tee quia quiyacuaani. Niya cua quishacarijia, janiyari nio sequeya nojori niquiarani, nojori jiitianura cua shuquiriniujihuaaj, tojetaarucujanaa shuquiriaatia quijiaca nojori quiniuriajuhuaj. ¹⁴ Janiyari nojori niishitioeanu quia rupaani. Naa nojori tojishacari quia rupaatej, quia niishiyashijiaca pueyari nojori niqiniyu paniaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niqiniyu paniaquiquiaa. ¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niiquiji. Saaja quia secojiya cutaranijia, nojori quia cojuanura Sesaacaacujaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiaquiyacuaani. ¹⁷ Quia rupaa quia poonijitotere nojori jiuujiajinia, tojetaarucujanaa quia tojijiaca nojori quiniuria. Quia rupaari seetanu rupaajanaa cutara. ¹⁸ Quiaacuajajari cua jiyaroquiaari mijiria quiniaa pueya niquiara cua pohuatanura quia rupaa. Naajuhuaaj, janiyari cua pueya jiyaramiquiyani mijiria quiniaa pueyacuajuhuaaj. ¹⁹ Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri tojetaarucujanaa maninia miijiacara jatanishaanutaniya.

²⁰ 'Majaari saaja cua secojonu nio pojoriicuaru, tariucua quia tojitiajacacuaani. Janiyari secojiyajuhuaaj na nuhuaji cucua tiuuriquiano pueyacuara, noo pojoriicuaru cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanijia puetunu cucua tiuuniaajanaa cuaara quiiria jatiqui, juhua rupuetootesano, taa pa quiyacuaani, cua Quenaa. Naatej, taa cua quiya quioojiajiniaacuaani, quiaari saniniuuja coojiajinia quiyacujua. Nojori jiuujia cuaara juhua rupuetootesano quiiria poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaquiya quia Sohuanutani, quia niquitiosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. ²³ Quiaari coojiajinia quia. Naajuhuaaj, janiyari nojori jiuujiajinia quijajaacuhuaaj. Naacuajitij, paari nojoritia juhua niquiriyatu quiniutianiya. Naacuajitij, mijiria quijiacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuaaj, quiaari jiyanoehua cua pueya panijia, taa quia pania janiyacuaani.

²⁴ 'Cua Quenaa, cuno pueya quia niquitiosano janiyani, janiyari paniani nojori quiniuria cuata quia shuriucua, nojori niqiniuria cua shacantuca cumaaca. Quiaari cuno cumaaca cua niquitioquiaari pueyaracaanu quia paniniucua janiya, jiya shipiniyaquishacarijia. ²⁵ Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuaaj, janiyari seetanujuanaa quia jiyarosanoni. ²⁶ Janiyari nojori niishitioeanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajiniji, seetanujuanaa nojori niishiniuria quiajaniya. Naacuajitij, taa quia pania janiyacuaani, nojori cuaara cuno paniniyu jiitiaara nojori jiuujiajinijuhuaaj. Naa nojori niishishacari quiajaniyatej, janiyari nojori jiuujiajinia quiniutianiyajuhuaaj.

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jiitiquiaari canaata na rerejonura. Naacujitij, na paraa na quiateriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matakajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riuacuaree:

—Canaa Nazaret tiacajinijinio Jesu pajeyani.

Jesuuri nojori riuacuaree:

—Janiyacuaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacuaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riuacuaree:

—Janiyacuaja tari nia sequereeni, janiyacuaja nojuajani. Naa jaara cua pajeya, nareja nia niqiri nio, cua cojiniaani.

⁹ Naacujitij, tama Jesu sequesanojuaarjia tohuateequiaari, nojuaja jaara naa na Que sequequiaari: “Majaari quenaaja niqiriyatu pueyano cua juurequetenu quiquiaari quia niqitiosano pueyajinijinio janiya”. ¹⁰ Jiyacaritij, Simón Pedroori tama na mueruujuaaja shitiaree na shuucujaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiririnij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijara, Caifásri pueyacuara secojonaa jiyaniijijanaa quiriquiaa. ¹⁴ Cuno Caifáscujaari tari naa sequequiaari narta Judiocuaca camarucua: “Maniniacuajaari niqiriyatu pueyano mosaanura puetunu pueya nitijianaa, maja najuhuana puetunu pueyajanaa puecoosanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuaanuaji. Janiya cutaraari pueyacuara secojonaa jiyaniijijanaa niishishano pueyano quiquiaarini. Naacujitij, janiyari tiuquin-ishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateese. Jiyaniijijanaa niishishano pueyano cua quiniucua, janiyari tohuateyaji cojuana niyacoota poccojoseeni, Pedro na tiuquininiurajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riuacuaree:

—¡Maja janiya!

¹⁸ Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhua. Mani jitiuriquiaari.

Pueyacuara secojonaa jiyaniijia nequesoreesacari Jesu
(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaariuhua.
²⁰ Jesuuri na sequeree:

—Janiyacuajaari pueyaracaanu puetunu pueya niqiarajanaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitiojoquiaa pueyani. Naajuhua, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacujani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuete cua pohuatasano tojiquianuni. Nojorijuaari quia sequenutaniya casaa cua rootaquiaa nojorini.

²² Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riuucasacari jiyaniijia Anástej, Secojonuujuaca tiaco cojuana pueyanoori Jesu jiquioco maseteree. Naa Jesu sequereeri:

—¿Naa riuucasante pueyacuara secojonaa jiyaniijia?

—Jesuuri na riuucaree:

—Janiya jaara sesa riuucareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquiococuaraarini?

²⁴ Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifásua.

Pedro pacutesacari seetanu Jesujiniji
(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhua?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacuaruhua quia niquirii cuno pueyanota quia quishacari olivo cuhuariquia-jiniani!

²⁷ Pedroori na seetarohuacuhua. Caacarajaari jiyacari niunijioquee.

Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jiyanhua puereetuuca quiriqiuase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitanu quiquiaari Pilato tiaco, nojori mariqui juhua curuushiriiri Pueyaso niqiara, nojori tiuquitanuucua tahue tiajinia. Nojori jaara juhua curuutuuca quiri Pueyaso niqiara, naacuajitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riuucaree:

—Jaara sesa miyashijia quiriqia, ¿canaatucua casaara quiocua na nitiamani?

³¹ Pilatoori nojori sequeree:

—¡Niiquiji nia jiyataarohua! ¡Tama nia nequesoreesuhuaajaaja, taa nia supuetanaa rootasano sequyacujani!

Canaa Judiocuaca camarucuuari Pilato riucaaree:

—¡Niajaniya Romano pueyani, niaacuajaari canaa sequecanu maja canaa monura pueyano!

³² Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴ Jesuuri Pilato sequeere:

—¿Cunote tama quia niishishanojuaja naa quia nequesotanura janiyatej? ¿Tamonu soj quia pohuatacanu janiyajiniji?

³⁵ Pilatoori Jesu juaarii. Na sequeereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacajuajaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequeere casaa quia miiriucuaani!

³⁶ Jesuuri na riucaaree:

—Janiyacuajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucaaree:

—Jaa. Janiyacuaja Jiyaniijiani. Janiyacuajaari cunora rasaanuacuarini. Janiyari mijiria niqiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

³⁸ Pilatoori najuhuaana na nequesotaree:

—¿Casaateeri cunoseetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

Pueya sequesacari Jesu cuuara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeere:

—Nio pueyano nequesoreereecuajaniija. Nojuajaqui maja sesa na miiniu quiqianu.

³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyanohua nacoorohuacuahuaj:

—¡Maja cunoseetanu! ¡Barrabás quia cartere cutara!

Cuno Barrabásri nohuasejoja quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiiniuria, shaaruque toque cushitishaarohuari, juhua jiyaniijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquituri.

⁴ Pilatoori socua tohuataquiaari canaa Judiocuacaacua. Nojori sequeereeri:

—¡Nia niquiri! Janiya na tohuateya niaacuani, nia niishiniuria janiyacuaja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriucuua.

⁵ Jesu muetasacari nojoriicua, juhuacontucujiniji nacaque cushiriqiaari, shaaruque toquenio. Pilatoori Judiocuaca sequeere:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojojua tiaco cojuanaa pueya-juhuaj, nojori jaara Jesu niquiquiaari, naa nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacyoanu riuuaree saaja:

—¡Maja! ¡Janiyacuajaari niishiyani, nio pueyano maja sesa na miiniu quiqianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riuuaree:

—¡Canaari Pueyaso Rootasano naajione jiiitiani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyanura!

⁸ Pilato tojishacari naa canaa Judiocuaca sequesantej, nojuajaari socua puerequiaari.

⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanijani?

Jesuuri maja na riuuanu quirii. ¹⁰ Pilatoori na sequeree:

—¡Cua riuuarejaj! ¿Quiaate niishiyaquia, janiya jiyaniijiani? ¡Janiya jaara panirini, cua naata cua pueya sequenu na teetenura quiajanija! ¡Janiya jaara paniaquirijihuaj, cua naata quia cartenujuhuaj!

¹¹ Jesuuri saaja na riuuaree:

—Jiyocuacaanu Quijia jaara quia jiyateyaquiaari jiyaniijia quia quiniuria, quiaa maara quia cumaaca paaretaquiri cucuaj. Naaratej, cante niyara cua nitiamaa quiocuan, nojuajaari socua jyanohua sesa miirri quiajanijajiniji.

¹² Naa Pilato tojishacari Jesu sequesantej, nojuajaari socua shiriquiquiaari. Nocuaji, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijia-janaa César rupuenta quia quiniu quiniutianija!

¹³ Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitujinia. Pilato tii cajiriquiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujuja, cunoori quiquiaari “Gábata”. ¹⁴ Jiyacariiri panacari quiriqiaa. Cuno juuca, canaa Judiocuacaari juhuacarijia jeenucariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

¹⁵ Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcuajaari canaa jiyaniijajanaa! ¡Maja socua tamonu jiyaniijia canaa jiiitanu!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenuucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniujuja, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretsaaree. ¹⁹ Pilatoori naa naajitequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰ Naajiosano quiriqiaari canaa Judiocuaca rupaajinia, Romano pueya rupaajinijahuaj, Griego rupaajiniano. Jesuuri catecaja teetesaaquiaari Jerusalén tiacajiniji. Naacujitij, queraatia Judiocuacaari

cuno naajio serojoquiaari. ²¹ Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucuaaree saaja:

—Janiyacuajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panataniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueeuara tacuarishiyonuureeri, na pasocoriquiano”.

Seetanujuanaa, naa miitiquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuaj, María Magdalenanio. ²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuajaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereejariuhuaj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajinianani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateere. Naajuhuaj, tariucuacaanu Pueyaso Rupaajinia naajiotasano tohuateenurajuhuaj, Jesuuri sequequiaari:

—¡Jiyamueyanijia!

²⁹ Cuniqui, vino jereecaari patacojinia mishaja cajitiariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuataree puetunujuanaacuajanjia!

Naa na sequenu nuhuajitij, naniquiiri. Cusoqueeri.

Soldado jitasacari Jesu shuucujaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijiara, Pascua juucaari Sábado juucajinia quiriquiaajuhuaj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequereee cuno teetejosano pueya cashacucua na shuniitianiniuria, ritia nojori cusonuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatuureejaariuhuaj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaquirii.

³⁴ Naajaa, tamonu soldadoori Jesu shuucujaji jitiaree na cashanata najuhanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocujaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajarjia niishiyani cua sequesanoori seetanujuanaa, nocua nia tiuniuria. ³⁶ Jesuuri naa miishaaquiaritij, tariucuacaanu nojuajiniji naajiotasano tohuateenura. Naa sequeyacuajaari juhuacarjia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷Tamaquiiri nojuajiniji naa naajiotasano quiyajuhua;
 “Cashanata na shuucuaji na jitiatusano niqitiuniutianiyari”.

Jesu quete niasacari raaco
 (Mt 27.57-61; Mr 15.42-47; Lc 23.50-56)

³⁸Na nuhuaji, Arimatea tiacajinijinio Joseeri Pilato sequesee:

—Cua niqitiore Jesu quete raaco cua niasocoriqiano.

Nio Joseeri jiyasohuaja Jesuucua tiuujia quiqiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹Nicodemohuaj, noo pueyano Jesuucua niqiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanhua jaanutaja nitiariquiaa, macuucua niojosocoriqiano. Na niqiaari quiqiaari cuarenta y cinco kilo. Cuno shanhua jaanutajaari quiqiaari mirra, aloeta cojittijosano. ⁴⁰Joseeri Nicodemota Jesu jiuniocoree toqueneecajinia. Nojori jiunioosacari, nojoriiri nocua niojoriquiaa cuno shanhua jaanutaja. Canaa Judiocuacaari naa miitiujia quiqiaari, na macu na niatunura raaco. ⁴¹Tee Jesu teetesaaquiaricujani, cuniquijia na shuriucua quiqiaariiri cuhuariquia. Cuno cuhuariquajiniani, quiarinio jiuutiasano raari quiqiaa, macunucua niojojuara. Cuno raaconi, juhuanohuaja maja macu niasaanu quiqiaari. ⁴²Macuuri cuno raaco niasaaquiaari, cateca na quiniucua. Naajuhua, quera puequeriquiaari canaa Judiocuaca jeenucuanu juuca. Cunoori, Pascuaacua juuca.

20

Jesu samiitiasacariuhua
 (Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquicuaji quiaquiaari Jesu raajiniara. Ninishiquiiri quiriqiaajaa. Na tiuquishacari, cuno puereetuca saajia niqishiiri tariucua tamocora ruutinishano, teyanota raa tiosaaquiaricujani. ²Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquitijia na niasaaretejaj!

³Naaratej, janiyari Pedrota netequiaari raajinarajuhua. ⁴Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. ⁵Janiyari raaco cuuqueseeni. Janiyari saaja Jesu jiuniocotaja toque niqiriiri maanoni tee Jesu quete niasaarucuaacujani. Majaari cua tiuquiniu quimiaa raaco. ⁶Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanohuaj. ⁷Jesu naca jiuniocotaja niqiriijiaariuhua tamoco maano, maninia mariquiosano. Majaari na manu quiqiaa Jesu cuaqueya jiuniocotaja toqueta. ⁸Pedro tiuquiniu nuhuaji raaco, janiyari shusha jiyacari tiuquimiaajaaniuhua. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. ⁹Canaari juhuanohuaja maja canaa niishiniu quiqiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitanutaniuhua macujiniji. ¹⁰Na nuhuaji, canaari tijajinia quiaarohuani.

Jesu muetasacari María Magdalenaacua
 (Mr 16.9-11)

¹¹Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹²Raaco na niquishacari, caapiqui Pueyaso seya niqiriiri, cohuajaque toqueyaraca. Nojoriiri macu niasaqui cajitiriqiaa, tamonu na nacaacora, tamonu na cashacuucumara. ¹³Pueyaso seyari María Magdalena sequere:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niqiji pasaarucuaa. Majaari cua niishiniu teeriquitijia na niasaarucuaatejaj.

¹⁴Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuaanoori. Maja cutaraari na niishiniu quiriquiaa nojuaja Jesu.

¹⁵Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jiyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaa-jinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷Jesuuri María sequeree:

—Maja cua quianu. Juhuanajuaja maja cua tacanu quiquiioo cua Queecua. Quia quiaarohua. Cua tapueyocua quia sequesuhua: “Janíya cua Que Pueyasocua tacanutaniuhuaní. Nojuajaari nía Quejuhuaj. Nojuajaari cua Jiyaniijia, nía Jiyaniijiajuhuaj”.

Jesuuri naa na saquiriojosano pueya sequeree na tapueyocucata, na Que Pueyaso na jiyatesacari nojori Quejuhuaj. ¹⁸Jiyacaritij, María Magdalenaari nimiohua canaacua, Jesu saquiriojosano pueyacuaní. Nojuajaari canaa pohuatasuhua taa Jesu na niquiriini. Naajuhuaaj, Jesu sequesano caminiujiurii canaaraari.

Jesu muetasacari na saquiriojosano pueyacua

(Mt 28.16-20; Mr 16.14-18; Lc 24.36-49)

¹⁹Cuno domingo juucajani, shusha ninishacari, canaa, Jesu saquiriojosano pueyani, canaari jatiquí quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiucua. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nía quiri.

²⁰Naa canaa na sequenu nuhuajitij, canaa niqitijoree na juaashiquiaari, na shuucujaji cashana jiyanio. Canaari jiyanhua timiriini canaa niquishacari canaa Jiyaniijia. ²¹Jesuuri socua pacuterohua sequenu:

—¡Juhujaniya nía quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nía jiyaramiquiniutianiyajuhuaaj.

²²Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nía tiuquiniri nioojiajinia. ²³Níaa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujía, níaa jaara pueyano jiyanoaquiri sesa na miishanojiniji, Pueyasora, jiyanooshoo quiniutianiyajaari-huaaj.

Tomás niquishacari Jesu, saminio seetanujuanaa

²⁴Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nía sequesanoocua, janiya jaara Jesu juaashiquia-jinia niqiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujajihuuaaj, janiyari nía cuarachitiniutianiyani.

²⁶Cuno nuhuaji, socua tamonu domingora, canaa, Jesu saquiriojosano pueyani, canaari rejejoquiaariuhuaní. Tomásri jiyacari canaata quiriquiaa cutara. Tia tiotiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nía quiri.

²⁷Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaj. ¿Casaara cucuaji quia taacanuyajaani? Cucua quia tiuuri.

²⁸Tomásri jiyacari Jesu sequeree:

—¡Cua Jiyaniijanaa! ¡Cua Pueyasonaa!

²⁹Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapueete cucua tiuuniutianiya saaja nojori tojishacari janiyajinjini, nojori niquiyaquishacari janiya.

Casaara Juan naajioquiaari nio naajioneeni

³⁰Jesuuri jiyanohera socua queraatia casaa miiquiaari na cumaacata canaa na saquiriojosano pueya niqiiara. Cunoori nio nequesoreetuneejinia naajiotasoo. ³¹Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujanaa Pueyaso Jiyarosano, Pueyaso Niyanutuhaj. Janiyari nio naajioneeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquiriojosano pueyacua

¹Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. ²Nio pojoriiri jiyacari mariyata quiriqiaa: Simón Pedro, Tomás (Caapueyano jyanishano), Natanaeljuhuaj. Nojuajaari Caná tiacajinjintio quiquiaari, Galilea jiyajinjintio. Janiyari cua tarajanuta tii quiriqiaajaaniuhuj. Canaari Zebedeo niquiohuani. Socua caapiqui Jesu saquiriojosano pueyajinjinioori tii quiriqiaajuhuj. ³Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucaareeni:

—Canaa quiata quiaajuhuj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucuajanaa shiyaru quejootariquiaa sapitiaajara juucuaani. Canaari shaa juhuaquetumaani. ⁴Jiyacaritij, Jesuuri caminia casaqueyaji jaaquiajina njuuariquiaa. Majaari canaa niishiniu quiquiaari cante nojuajani. ⁵Jesuuri canaa jiiquiooree. Canaa nequesotareeri:

—¡Sanajooriniaa! ¿Niaate na quiaree?

Canaari na riucaareeni:

—¡Maja! ¡Shaaqui sacaj!

⁶Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutianiya cutara!

Canaari naa miiriini taa na sequeree canaacuajani. Na nuhuaji, majaari canaa naata canaa shiyaru jaatianu quiriqiaa, queraatia sapitiaaja canaa ritiasacari. ⁷Jiyacaritij, janiyari Pedro sequereeni:

—¡Pa Jiyaniijiaquil!

Naa Pedro tojishacari cua sequesantej, nojuajaari ritia na toque cushirii. Nojuajaari juhuaquiriqiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriqiaa. ⁸Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriqiaa, saaja cien metruruhua. ⁹Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. ¹⁰Jesuuri canaa sequeree:

—Nia sapitiaajinjini miji nia riri rarishocoriquiano.

¹¹Simón Pedroori ritia botejinia tacamaa. Shiyaru tacanitiaree jaaquiajinaari. Queraatia sapitiaajaari quiriqiaa. Ciento cincuenta y tres sapitiaaja, saa puereetunucua. Naa queraatia sapitiaaja quishacaritij, naajaa, majaari shiyaru turejetanu quirii quenaaja.

¹²Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinjiniio nequesotanu quiriquiaa, cantejaaranajoni. Canaacuajaari niishiriquiaani nojuacuajaari canaa Jiyaniijia Jesu. ¹³Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaariuhuj.

¹⁴Jiyacari Jesu muetasacari canaa na saquirojosano pueyacuajte, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocojosacari Simón Pedrota

¹⁵Canaa miaquenuunu nuhuaji, Jesuuri Simón Pedrota pocojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio cuarta saquirojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuanijoyua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶Jesuuri Pedro nequesotarohuacuhuj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajeeque pueyaracaanu Jesu nequesoresacari nojuaja. Seetanujanaa Jesu riucuaareeri:

—¡Jiyaniijianaa, quiaacuajaari puetunujanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuanijoyua cojuanara quia quiriqui. ¹⁸Seetanujanaa quia sequeyanjia, mashaja quia quishacari, tama quiajanijaaarjia quia toque cushijia, quia quianura quia panishaqui. Saniniuuja, quiaa jaara saaquiano quiri, quiaari nareja quia numatucua shi-itionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquira.

¹⁹Naa Jesu pahuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequeree:

—¡Pueyaracaanu cua tojjia quia quiri! Pa quiaarej.

Juanjiniji pahuatasano

²⁰Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocujani, canaa miaquenuusacari Pascuara, Jesu shuriucua cua cajishacari na nequesotaquiaritij: “¿Cantejaara cunoni, quia quiatenutaniyani?” ²¹Quiarijiani, Pedro niquishacari janiya saniniuuja, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijataj, taa na mi-shaanutaniyarini?

²²Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuaanuji tiuquiriohuajaatijia, quiaara, naajaa. Quiajanija cutara, pueyaracaanu cua tojjia quia quiri.

²³Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiriquianoni. Jesuuri seetanujanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuaanuji tacatemohujaatijia, quiajanijara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jiyano hua queraatia socua casaa miiquiaari na cumacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuteroahuanija, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijiosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuaaanu na Queta na quiniuhua.

² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquirojosano pueyacia. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminiyo quia. Nojoritia pocoojuquiaariiri taa Pueyaso jitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijiaara cua Que cuaara niqutioorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiujuquiaari tari niaaracujani. ⁵ Naa sequequiaari nijaniyacujani: “Tiuquiniujiona Juanri nia tiuquiniujuquiaari moojinia, Pueyaso tojjijia nia jatasacari. Pueyaso saniniujia na Sohuanu noojiajinia tiuquiniutionutaniya, seetanujuanaa Pueyaso tojjijia nia quiniuria”. Quera niaacua tiuquiniutionutaniyacujani. Naaratej, nia sashiri.

Jesu tacasacariuhua jiyocuaaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijanaa, ¿quiaate Jiyaniijia jiyatesaanutaniya quiarjia Israel pueyara, maninia pa quiniuhua tama pa jiyaniijataaja, taa pa supuetanaa quiquiaaricuaani?

⁷ Jesuuri nojori riucaaree:

—Nio cutaraari maja nia niishishocoriquiano, taacari Israel pueya jiyaniijia cua jiyatesaanutaniyani. Pa Que Pueyaso cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacujani, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajinijanaano, Samaria jiyajinijuhuaj. Naa pohuataasanutaniyaaariuhua puetunu jiyacajinijanaa, socua tucuaaanu jia puequetujiniano.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajinia shaajemaari pueya niquiyaquiniucujani nojuaja. ¹⁰ Nojori mautasacari jia cajiniocua Jesu tacasacari, canashiyaquiji, caapiqui pueyari nojori shuriucua nujutuquiaari. Nojori toqueeri jiyanoahua cohuajaque quiriquiaa. Nojoriiri jiyocuaaanujinio Pueyaso seya quiquiaari. ¹¹ Nojoriiri Jesu pueya sequere:

—Galilea jiyajiniyo pueyanaa, ¿casaara nia mautaa jiyocuaaanuni? Taa nia niquirii tacaanocujani, niaari naa na niquiniutianiya tacatehuanohujahuaj.

¹² Nojoriiri jiyacari Olivo nacuhua tuhananuucua quiriquiaa. Pueyaso seya nuhuaji, Jesu pueyari Jerusalén tiacajinihua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuaacari naa rootasaaquiaari maja socua tucuaaanu nojori rucuanenura samaatenu juuca. ¹³ Nojori tiuquijiosacari Jerusalén tiacajinia, nojoriiri nojori quijia tijinia tiuquitiaquiaariuhua. Nojoriiri natoa tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo nianu quiquiaaricujani. Quiquiaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. ¹⁴ Nojoriiri jiyacari pueyaracaanu Pueyaso secojonuiriquiaa tii maajipohuata, mariyata Jesu nucua Maríata, Jesu tapueyocuatania.

Pueya saquiriojosacari Matías Judas niti

¹⁵Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriqiaa puetunujuanaa. Naa nojori sequereeri:

¹⁶—Cua tapueyocuaacanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyani-ijia David. Naacujitij, Judasri Jesu monaarano niishitiqianu tee Jesu quiriqiaani, nojori na quiatenura. Judasri cunora niquitiosaacanu cumaneeca, naa nojori na niishitiniucua Jesu quiasaanura. ¹⁷Nojuacujaari parta Jesu saquiriojosano pueyano quiquiaar-ijihujaj. Nojuajaari mariyata Jesu jiyaramiquishano quiriqiaa juhua pajaniyajuuhaj. ¹⁸Tamonu cuhuariquiaari masesaanu sesa na miishano samitia. Na nuhuaji, tama cusoyareejaarijia. Jiyocuaaanuji tiqianu na nacaraari. Na saracaari cocuaretasee. ¹⁹Jerusalén tiacajinia quiniaa jaara na niishiqianu, nojoriiri cuno cuhuariquia seso-joree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. ²⁰Judasjinijiiri naa naajiotasaaquiaarijihujaj tariucuaaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camaruuju”.

Sequeyajaariuhujaj:

“Tamonu pueyano cuaara jiyatesaaria na poonijosano miiriquiano na niti”.

²¹Cuarta Jesu saquiriojosano pueyanaa, niya quiyacuaa pueya, canapuetucuaa pa tara-jaquiaarini pueyaracaanu pa Jiyaniijia Jesu quishacari pata. ²²Nojoriiri Juan niquiquiaarijihujaj Jesu tiuqiniyano moojinia, Jesu tacasacariuhua jiyocuaaanunio. Canapuetucuaa puetunu nio niquiquiaarijianaani, niquiriyatu nojoriijiniio cuaara jiyatesaaria Jesu jiyaramiquishanora, pata na quiniuria, Jesu samiitanujiniiji na pohuatanurajuhujaj.

²³Naaratej, pueyari caapiqui pueya saquiriojoquiaari. Cuniqiu quiriqiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriqiaajuhujaj, Matías. ²⁴Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

²⁶Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matiascuara tacatasee. Naacujitij, Matíasri Jesu saquiriojosano pueyanora quiquiaarijihujaj. Naacujitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹Pentecostés juuca jaara quiquiaari, puetunu Jesuucua tiuniaajanaari rerejono quiquiaari tamonu tiajinia Jerusalén tiacajinia. ²¡Canashiyaquiji, paratuuri tojishaaquiaari jiyocuaaanuji, juhua paratu pocuaano jyanohua cojuata! Jyanohua tojishaareeri cuno tiajinia tee Jesu pueya cajituriquiaacujani. ³Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. ⁴Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuqiriiri. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵Cuno quishacari, queraatia Judiocuaca puetunu jiyacajinijiniiojuanaari camueenu-juriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtiajaca quiquiaari. ⁶Nojori tojishacari cuno cojuatunenu, nojoriiri cuquereee tee Jesu pueya pocooriquiaa tamaatia rupaacacujani. Nojori tojishacari naatej, nojoriiri jyanohua cushitiriiri. Naatej, puetunu rucoonaajanaari tama na jiyajinijinio rupaacajaaja tojtiaariquiaa, cuno pojori pocoosacari. Nojoriiri maja

na niishiniu quiquiaari casaara naa nojori miiriini. ⁷Nojoriiri jiyanoehua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajiniinio pueyacuaja naa pocoyaniquitij?⁸ ¿Taa nojori pocuaa puetunu coteenu pa rupacajanaani? Pajaniyacuajaari queraatia tamaatia jiyajiniinio, puetunu tamaatia rupaaca pocuajacajanaa.

⁹Seetanujuanaari. Cuno pojoriiri Partiya jiyajiniinio nijiono quiquiaari, Media jiyajiniinio, Elam jiyajiniinio, Mesopotamia jiyajiniinio, Judea jiyajiniinio, Capadocia jiyajiniinio, Ponto jiyajiniinio, Asia jiyajiniinio. ¹⁰Quiquiaarijiaariuhuj Frigia jiyajiniinio, Panfilia jiyajiniinio, Egipto jiyajiniinio, África jiyajiniinio. Cuno Africa jiyajiniinio pueyari quera Cirene tiaca shuriucuaji quiquiaari. Roma tiacajiniinio pueyari tii quiquiaarijihuaj, canapueete Jerusalén tiacajinia pacunaa quiquiaarijiaari. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatuuquia co miatejosaaquiaari Judiocuacara na quiniuria, Pueyaso tojjiacara nojori quiniu panishacari. ¹¹Creta jiyajiniinio pueyari tii quiquiaarijihuaj, Arabia jiyajiniinio. Puetunu cuno jiyacajiniianaari tamaatia rupaaca pocuajaca quiquiaari. Nojoriiri socua naa sequetoquiaari:

—¿Taateni? ¡Puetunu pajaniyajanaari cuno Galilea pueya tojtiaani Pueyaso cutara miishano pohuataano, tama pa coteenu rupaajiniajaajal!

¹²Puetunu nojorijianaari jiuujiteriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiyajaaranonjoni?

¹³Tamasaca nojorijiniinoori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojtiaare casaa cua sequenutaniya nijaniyani. Puetunu Jerusalén tiacajinia quiniacajanaa cuara niishiiria cua pohuatasano. ¹⁵Niaari canaa jiyaniya mashaasequenuyano. Pananucuajaari shusha taqueejia. Maja canaa mashaasequenuu. ¹⁶Niaari canaa tojtiaa tamaatia rupaaca pocuana. Niocuajaari taruucuacaanu Pueyaso sequesano caminiujunia Joel pohuatasano. Cuno niaa na niquiiani, cucocuajaari na sequesano, shusha tohuatayani. Nojuajaari naa sequequiaaritij:

¹⁷“Pueyasoori naa sequeyaquij: ‘Quera jiya puequesacari, janiyari cua Sohuanu niqutionutaniya puetunu pueyarajanaani. Naacuajitij, mashiquoriiri janiyajini pohuatanutaniya, niyacoojorinio. Cua Sohuanuuri cua niishishano niqitiniutianiya mashiquori juhua na maquenujia. Cua niishishano niishitiojonutaniya saaquiapue na maquenujiaariuhuj. ¹⁸Cuno qushacari, janiyacia cua Sohuanu niqitioore puetunu cua tojtianaajanaani, canuu, maajipohuanio. Nojoriiri janiyajini pohuatanutaniya pueya niquiara. ¹⁹Puereeta cua miishanoori jiya cajiniocua niqushaanutaniya. Cua miishanoori jiyacua niqushaanutaniyahuaj, pueya na numootenura. Nanacaari niqushaanutaniya, mani, jiyanoehua najacanio. ²⁰Pananuuri ninishiquiria quiniutianiya. Racaari juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyaniijaajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jiyanoehua shanohua quiniutianiyari na rosesacari. ²¹Puetunu Jiyaniija seconaa pueyajanaari jiyanooshaanutaniya Pueyaso pueya nojori quiniuria’ ”.

¹⁸Puuetana Joelri naa naajotaquiaari Pueyaso sequesano tarijiatej. ²²Naaratej, socua cua tojtiaare cuarta Israel pueyanaa. Jesujini nia pohuatanutaniyanijia, Nazaret tiacajiniinio pueyano. Pueyasocuajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanoehua jiyajeneta

casaa na miiniuria. Paacuaajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanicyaajaari maninia niishiya puetunu maninia na miishanojuanaa. ²³Saniniuujia, Jesu jaara niqutiosaarucuaa nijaniya, niaari na quiarucuaa juhua sesa miijia. Na nuhuaji, niaari Pueyaso tojiyashijiaa pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. ²⁴Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵Pueyaso Sohanu jaara pohuatequiaari pa supuetanaa jiyaniijia David, nojuajaari juhuacarijia na pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶Naaratej, coojiaari timirii. Cua niti taqiriocuateree cua shuquiriniutianijia. ²⁷Naajuhua, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaa cua quishacari quia niqiuara. ²⁸Quiaari cua niishitiojoree maninia cua miiniuria, pueyaracaanu quijiaa cua quiniuria. Quiaari jiyanhua cua shuquiriniutianiya quiaa cua quishacari pueyaracaanu”.

²⁹“Cua pueyanaa, paacuaajaari niishiyani, pa supuetanaa jiyaniijia Davidri jamosaaciaari na cusosacari. Na jamaari niya quiyajaa Jerusalén tiacajinia. ³⁰Nojuajaari niishiquiaari Pueyasoori tari na sequesocoriquiaa:

“Davidnaa, tamonu pueyanoori supenutaniya quiajanijianijia, jiyanhua quia nuhuaji. Cuno pueyanoori Jiyaniijiaa cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa na quiniutianiyaari Davidnaa. Maja cua sapojonu”.

‘Pueyanaa, paacuaajaari niishiyani Davidri Pueyaso sequesano caminiujuunia quiquiaari. ³¹Naacuajitij, Davidri Cristojiniji pohuatariquiaa jiyanhua tariucuaaanujiniji, juhua tari na niquishano. Pueyaso Sohanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyaari”. ³²Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³Cutara na cumaacata, Pueyasoori na tacaniriohua na miaquetajara cajiriquiano, Jiyaniijiajanaa na quiniuria. Na nuhuaji, Jesuuri Pueyaso Sohanu maseree na Quejiniji, taa Pueyaso sequesocoriquiano tarijiacuajani. Jesuuri saniniuujia quiarijia canaa na niqutioree. Naaratej, niaari canaa niqurii tamaatia rupaaca pocuaano. ³⁴Majaari David tacanu quiquiaari jiyocuaaanu cutara. Nojuacuajaari Jesujiniji sequesocoriquiaari:

“Jiyaniijia Pueyasoori cua Jiyaniijia sequesocoriquiaari: ³⁵‘Cua miaquetajara quia cajishijiaara, janiya cuara quia paraa shocotarejaatijia’”.

³⁶Cunora, puetunu nijaniyajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijiajanaa na quiniuria. Niaacuajaari niyacutesanojinia na mocanucuaa. Nojuajaari Cristo, Pueyaso jiyatesano Jiyaniijia. Majaari canaa pohuatasanojiniji nia taacanuunu pueyanaa.

³⁷Pueya tojishacari naa Pedro pohuatasanojiniji, nojoriiri tetecatuquiaari. Pueyari saniniuujia Pedro nequesocoriquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸Pedroori nojori riucuaquiaari:

—Nioojia nia tacatore sesa nia miiniujiniji. Nijaniya cuara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacari, Pueyasocua nia niqutiore na Sohanu. ³⁹Pueyaso sequesacari nojuaja na

Sohuanu niqutionutaniya pueya, cunoori niaaranocujaja, nia niqiuohuaranonio, tucua-
caanu quijiicarajuhujaj. Pueyaso Sohuanucujajaari puetunu pueyajanaa niqutiosaanu-
taniya, cana pa Jiyaniijia Pueyaso sequeya na muerasura na quniuriacuajani.

⁴⁰ Pedroori jiyacari pueya pohuataree queraatia socua Jesujiniji na niishishano.
Jiyanohua nojori nacasureeri. Naa nojori sequereeri:

—Nioojia nia tacatorohua Pueyasoocua, maja Jesu ruuretajaca nia cojiritiasaanura
quejooonu mani quiqiojinia.

⁴¹ Pedro pohuatasanoocua tiuuniaari tiuquinijosaaquiaari. Cuno juuca, tres mil
pueya naasucuaari coteenu Jesu tojtianaa rupuenara quiqiaari. Pueyaso pueyari
naa canequiaaritij. ⁴² Puetunu nojorijianaari maninia tojtiaquiaari pueyaracaanu Jesu
jiyaramiquishano pueya niishitiojosano. Nojoriiri jatiqiu quiqia maninia. Majaari nojori
juayonuujutanu quiqia. Nojoriiri pueyaracaanu rerejojua neecaruu serotanura Jesu
cusunu niishiniuria. Mariyata Pueyaso secojonuujua pueyaracaanuuri.

Panitiojuuca Jesu tojtianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata.
Naacujatij, puetunu pueyajanaari puereturiquiaa. Pueyari shiriqitiurii. ⁴⁴ Puetunu
Jesuucua tiuuniaajanaari maninia rupuetooquiaari juhua tapueyocucata. Nojoriiri
maja jamuejaca quiqiaari. Casamiriaca pueyari na casami niqutiojoquiaari nareja
casamijiuniucua pueya. ⁴⁵ Tamasacaari na jiitiasano casami niqutioquiaari na cumaneeca
na masenura na casami sami. Na cumaneeca na masenu nuhuaji, nojoriiri tamasa
niqutioquiaarijuhuaj, casamijiuniucua jiitianura puetunu nojori panishanojuanaa-
juhuaj. Tamasaca pueyari na cuhuariquia niqutioquiaari nojori jiitianura na cumaneeca,
tamasaca na naacunurajuhujaj. ⁴⁶ Nojoriiri jatiqiu rupuetooquiaari. Nojoriiri rerejojua
puetunu juucajanaa Pueyaso Secojoua tiajinia. Mariyata tama nojori tiajiniajaaja no-
joriiri rerejojua, neecaruu neecasenura Jiyaniijia Jesu cusunu nojori niishiniuria, mariya-
ata jatiqiu nojori miaquenuunura nojori shuquiriniutia. Nojoriiri maninia jiuujiaraca
quiquiaari. Nojoriiri maja tamonu pueya shocotanu panijaca quiquiaari. ⁴⁷ Nojoriiri
pueyaracaanu Pueyaso maniniuhuaquetariquiaa nojori shuquiriniutia. Puetunu Jesuu-
cua tiuyashijaca pueyajanaari nojori paniquiaari. Puetunu juucajanaa, Jiyaniijia Jesuuri
nojori canijiariquiaa, socua pueya tiuushacari nocua.

3

Sesarunocua pueyano jeecasacari

¹ Tamonu juuca, Pedroori Juanta tacatariquiaa Pueyaso Secojoua tiajinia. Tari
quiquiaariiri pananu piriushacari. Nojoriiri jiyacari quiojonu jiitiquiaari Pueyaso seco-
jonura Secojoua tiajinia. ² Jiyacaritij, tamonu sesarunocua pueyanoori tii cajitiariquiaa
Secojoua tia tohuateyaji. Nojuajaari naa rasanohujanaja quiquiaari. Pueyaracaanu
patoojotasaaquiaariiri Pueyaso Secojouajiniara, pueya na mashiniquiniuria cumaneeca
nojori tiuquitasacari. Na cajitiasaqui tohuateya sesa quiquiaari “Tohuateya Maniniu”.
³ Sesarunocua pueyano jaara niqiuquiaari Pedro, Juannio, nojori tiuquitanu panishacari
Secojoua tiajinia, nojori maseree juucua na cumaneecaari. ⁴ Pedroori Juanta na shootiaree
tacuriitia. Jiyacaritij, Pedroori na sequereeri:

—Canaa quia niqiri.

⁵ Sesarunocuaari juucua shootiariquiaa nojori. Cumaneeca niqutiosariquiano
jiyaniriquiaa juucuaari. ⁶ Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiitiasanota
quia naacureera quiarijia. Quia sequeya Jesucristo sesajimianijia: “Quia sanere. Quia
rucuanerajuhujaj”.

⁷ Pedroori na juashiquiajiniji na quiaquiaari. Na nujuatereeri. Na niohuacaari
jiyacari ritia jeequequiaari na sanesacari. Na sairi maniniujiaacara quiqiujuhuaj.

⁸ Sesarunocuaari juhuacatecara rucuanequiaari. Nojoritia tiuquiquiaari Pueyaso Seco-
jojoua tiajiniaari. Maninia rucuaneriquiaari. Jaacuatariquiaari. Pueyaso manini-
uhuaquetariquiaajaarihuaj. ⁹ Puetunu pueyajanaari na niqiuquiaari rucuaneyano,

Pueyaso maniniuhuaqueetaanojuhuaj. ¹⁰Puetunu pueyajanaari na niishiquiaari nojuajaari sesarunocuaaja, Secojoja tiajinia tohuateya Maniniujinia cumaneeca mashiniqijiojuatej. Pueyari cunora jiuujiatequiaari. Jiyanohua shiriqitiuquiaariiri.

Pedro pahuatasacari Pueyaso rupaa pueya niquiara

¹¹ Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojojuajinia nujuaturiquiaa tamocora. Nojori nujuatasaquiiri pueya jiyaniquis-hano tariucuaacaanu jiyaniijia Salomón canujuucojoja quiquiaari. Puetunu pueyajanaari nocua netecuatuquiaari na shiriqiniutia. ¹² Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niqituaa canaani? ¿Niaate jiyaniya canaa na niohuaca jeeicareeni? Maja canaa. Majaari canaa cumaacata na jeequenu quirri. Naa naasucuaari jiyaniya canaari nio miiriini socua maninia miiija canaa quiniucua Pueyaso niquiara tamasa pueyajini. ¡Maja! ¹³ ¡Jesucuaajaari na jeececarhua! Nojuacuajaari na Que Pueyaso jiyatesano Jiyaniijijanaa na quiniuria. Jiyaniijijanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricujani: Abraham Jiyaniijia, Isaac Jiyaniijiano, Jacobo Jiyaniijajuahaj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijijanaa na quiniuria. Naa cutaraari Pueyaso Nyanu niqitioicanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Naa maara maninia pueyanoocuaaji tacucanu saniya cutara, niaari pueyano puecoojuaacua shiriqitiurii saaja Pilato cartenura jiyano sesoriquia pueyano seque. ¹⁵ Naaari naa motecanu pueyano samiitianiicujatej. Naajaa, Pueyasoori na samiitiani-quianuhua macujiniji. Canaari na niquiquianuni. Naacuajitij, canaari nojuajiniji nia pohuataani. ¹⁶ Nio sesarunocua pueyanoori Jesucuaa tiuurii. Naacuajitij jeequerohuari. Nojuacuajaari sesarunocua quiquiaari taa nia niquiquiaaricujanoj. Jesucuaa na tiuushacari, na cuaqueya cumaquiriiri. Na cuaqueyari seetanujuanaa jeequerohua maninia, taa nia niquiyacuajanoj. ¹⁷ Cuarta Israel pueyanaa, quarijia niishiyaniija, majaari nia niishiniu quiquianu casa nia miiquianuni. Majaari pa camarucua niishiniu quiquianujuhuaj. Naaari Pueyaso Jiyarosano mocanu nia niishiyaquishacari cante nojuaja quiquianuni. ¹⁸ Naacuajitij, Pueyasoori na sequesano tohuatecanu, tarijia na niishitishano na rupaa caminiujunaa. Seetanujuanaa, puetunu Pueyaso sequesano caminiujunaaajanaari pa supuetanaa niquiara poojotaquiaari: “Pueyaso Jiyarosanoori naquiya miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miini tuujusaanura. ²⁰ Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhua mijiria na jiyarosacariuhua Jesu. Pueyasoori tarijia na sequequiaari pa Jiyaniijia nia quiniuria. ²¹ Nojuajaari jiyocuaacaanu quiniutianiya na Que shuriucua, Pueyaso cuara tucutarejaatijia puetunu tariucuaacaanu na pohuatanishanojuanaa na sequenu panishano caminiujunaa. ²² Moisés cuajaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuatana tama nia niquihuacuajinio supenujuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³ Canaputee cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

²⁴ Pueyanaa, puetunu Pueyaso sequesano caminiujunaaajanaari Moisés nuhuaji naa Jesujiniji pohuatanuquiarijihuaj. Naacuajitij, Samuelri Jesucristojiniji pohuataquiaari taa na niutiutianiya. Naajuhua, Samuel nuhuaji, puetunu Pueyaso sequesano caminiujunaaajanaari naa pohuatanuquiarijihuaj. ²⁵ Puetunu Pueyaso sequesano Jesujinijijanaani, cunoori quarijia pajaniyara, taa Pueyaso pohuataniquiaari tariucuaacaanu na sequenu panishano caminiujunaaacujani. Nojoriiri pa supuetanaa quiquiaari. Pajaniyarojaariuhua Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajinijanaacuajani”.

²⁶ Pueyaso jaara na tojjia Niyanu samiitianiquianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriatia quijara pa quiniuria.

Pedroori naa pohuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquiara, nocua nijoquiaariiri pueyacuara secojonaa, Pueyaso Secojoua tia cojuanaata, Saduceocuatatanio. ² Nojoriiri Pedro tojjiquiaari pueya niishitiojijano. Nojuajaari pueya niishitiojoriquiaa macunucuaari saneecuatumutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojjiquiaari sequeshyanotej, nocuaji jiyanoohua juaaquoiquiaariiri, na ruuretasacari Pedro sequesano. ³ Cuno juaaquoioyanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuuquiaari Pedro pohuatasacari Jesujiniji. Quera cinco mil saaja canuuri tari Jesuucua tiunnaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. ⁶ Anásri tii quiriquiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriquiaajuhuj, tamonu Juannio, Alejandro, mariyata puetunu secojonaa jiyaniijia tapueyocucanico. ⁷ Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreeree:

—¿Taa nia miiriucuaa noonijia, sesarunocuatej? ¿Cana cumaacata nia jeecaro-huacuaanoj? ¿Cante nia sequecanu naa nia miiniuriani?

⁸ Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitijata na pocuanura. Naacuajitij, Pedroori naa nojori riucuaquiaari:

⁹ —Canaa camarucuaanaa, nia pohuatareera sesarunocujiniji, taa na jeequero-huacuaani. ¹⁰ Naa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniurajuhuj. Nio pueyano niya nujuaaani, nojuajaari Jesucristo cumaacata jeequerohuacuaa. Naaari Nazaret tiacajinijinio Jesu cusajuacanun niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. ¹¹ Nijaniyari juhua saitia tijaonaa Pueyasora. Naa tiasacari, niaari maniniujajau saajia jataquiaari, nia jiyaniishacari sesarujajau naasucua. Na camaruuri saniniujajau sequeya:

“Cuno nia jatasano saajiani, cunoori saniya cua maniniujajau saajia”.

Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³ Judiocuaca camarucuaari jiyanoohua na namijiaa riunitiquioquiaari nojori niqishacari taa Pedro, Juan seetanujuanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari.

¹⁴ Sesarunocua jeequenohuari cuniqui nojori shuriucua nujuariquiaajaacuhuj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵ Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaarijiaaja. ¹⁶ Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura

nojori, cuno sesarunocuaari jeeccasoo. Nojoricuajaari tari maninia na niishitiuya. ¹⁷ Nio pojori pa piriyojore juhuari, maja socua quiarjia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

¹⁸ Camarucuaari socua piiquiaariuhua Pedro, Juannio. Nojori nacasuree jiyanoahuari, maja socua quenaaja nojori pohuatanura Jesujiniji pueya niquiara.

¹⁹ Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequeyani jiyaniijianucuaanaa? ²⁰ Maja cutaraari canaa naata tarinitianu pohuatanu canaa niquishano, canaa tojishanonio.

²¹ Camarucuaari nojori piriyojoquiaari juucuoahuaj. Puetunu pueyajanaari saaja manini-uhuaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu qirii. ²² Pedro jeeccasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³ Pedro, Juan jaara cartesaaquiaari, nojoriiri narta Pueyaso pueyacia quiojoquiaari-uhua. Nojori pohuatureeri Judiocuaca camarucua sequesano nojori, camarucua nacasunaa sequesanojuhuaj. ²⁴ Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipininia, jiyanio. Shoniniacu caminiari quia shipinishanojuhuaj. Puetunu casaajanaari quia shipinishano. Quiaari jiyanohua maninia. ²⁵ Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacia quiniiaa pueya juayani? Pueyari najuhuaana sesa niishiriojoriquiaa juucua. ²⁶ Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueyasoocua roojotooree, na jiyarosano Cristoocuaranio”.

²⁷ Pueyasonaa, naacuaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatano. Quia Niyanuucua roojotoocanuuri, tama quia Jiyarosanoocuarajaaja. ²⁸ Naa nojori miiniuucuatej, nio pueyari tari quia miiniu panishano miiruucuaa, taa quia sequequiaari tariucuaanucujani: “Cua Niyanu cuara mosaaria puetunu pueyacuaraanaa”. ²⁹ Canaa Pueyasonaa, quia tojishuriucuaraj. Nojoriiri quiarjia canaa miananojiya saniniuujia. Canaacuaajaari quia seyani. Canaa jiuujia quia cumaquiri quiarjia, canaa pohuatanura socua quia rupaa canaa puereyaquiniutia. ³⁰ Cusosuhua cuara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuara mijiosaaria quia cumaacata pueya niquishocoriquiano. Nojuacuajaari saa maninija.

³¹ Nojori puecasacari secojonu, nojori quishaqui tiaari canashiyaquiji jiuuquintiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

Jamueyashijiaa Jesu tojitianaa quishacari

³² Jesuucua tiunnaari maninia juhua rupeutootesano quiquiaari puetunujuanaa. Nojoriiri juhua seetanujuanaa tapueyocacataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiitiasano casamiiri saniniuujia puetunu narta Jesuucua tiunnaarajanaa quiquiaarijuhuaj. ³³ Jesu saquirojosano pueyari Jesu samiitianujiniji poojotaquiaari jiyanohua cumaacata. Naajuhuj, Pueyasoori puetunu Jesuucua tiunnaajanaa naacuriquiaa jiyanohua, shuquiriaatia nojori quiniuria. ³⁴ Puetunu Pueyaso pueyajanaari na panishano jiitiaquiaari puetunujuanaa. Nojorijinijio jaara cuhuariquiaa jiitiaquiaari, tianio, nojoriiri na niquitioquiaari cumaneecara.

³⁵ Jaara cumaneeca masequiaari na casaa sami, nojoriiri nareja na niquitioquiaari Jesu

saquiriojosano pueya. Nojoriiri saniniuujia casamiiju Pueyaso pueya na serotaquiaari, nojori jiitianura na panishanojuhuaj. ³⁶Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. ³⁷Bernabeeri cuhuariquia jiitiaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamiiju narta Pueyaso pueya niqutiojosaanura saniniuujia.

5

Ananías, Safira sesa miishanojiniji pohuatasano

¹Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. ²Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueycuaari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriqiaa Ananías niqutiosacari nareja na cumaneeca. ³Ananías niqutiosacari na cumaneeca, Pedroori na sequeere:

—Ananíasnaa, ¿casaara quia tiuquinirri Sesaaca quioojianiani, quia sapojonura Pueyaso Sohuanu juucuan? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! ⁴Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriqiaa. Na nuhuaji, quiaa jaara quia cuhuariquia niqutioree cumaneecara, quia cuhuariquia samiiri quia casaa quiriqiaajuhuj. ¿Casaara naa sesa quia niishiriojoreerini? Naa sacuaaraatia quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jyanohua shiriqutiuquiaariiri. ⁶Mashiquioriiri na jiuuicoquiaari toquejinia. Na nuhuaji, na patuquiaari na jamonuraari.

⁷Jiuujianaraca hora nuhuaji, necocuaari juhuajaniya tiuquiquiaari Pedrocuajuhuj.

⁸Pedroori na nequesotaree:

—Cua sequeere, ¿niojuanaate nia cuhuariquia sami quiriucuaa?

Na riucuaareeri:

—Jaa, niojuanaacuaaquinatejaj.

⁹Pedroori na sequeere:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquiiijohua. Nojoriiri quiarijia quia panutaniyajuhuj.

¹⁰Jiyacaritij, maajiiri macu pojoquee Pedro shuriucujuhuj. Mashiquiori tiuquijiosacariuhua, nojoriiri Safira niquishuhua pojyanojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuuquiaariiri. ¹¹Puetunu Pueyaso pueyajanaa, tamasaca pueyano, nojori jaara tojinuuquiaari puetunu nio miishanojinijijianaa, jyanohua pueretuuquiaariiri.

Queraatia miijiosacari Pueyaso cumaacata pueya niqiaari

¹²Jesu jiyaramiquishano pueyari jyanohua cutara casaa miijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaaanu jiyaniijia Salomón canujuucojojuajinia, Pueyaso Secojoja tiajinia. ¹³Tamasaca pueyari nojori pueretuuquiaari. Majaari nojori rupesaanu quijia. Na pueretuuquiaari nojorijiniji sequetujua:

—Cuno pojoriiri maninia pueya.

¹⁴Queraatia pueyari Jiyaniijia Pueyasocua tiuquiquiaari, canuu, maajipohuanio. ¹⁵Naajuhuj, cusosuhuari patootasaaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquiuoico tajimia, cusosuhuari naataconutaniuhua Pedro naaqui jaara nojori caco netema. ¹⁶Queraatia Jerusalén tiaca shocua quiniaa pueyari na cusosuhua patootaquiarijuhuaj, Jerusalén tiacajiniara.

Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijiosaaquiaari.

Pedro, Juan nujuatejosacari nujuatejojuajinia

¹⁷ Naaratej, pueyacuara secojonaa jiyaniijia, nata quiniaa narta Saduceocucacano, nojoriiri juaaquoiquaari shocotasano nojori quishacari. ¹⁸ Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. ¹⁹ Pueyaso seruuri niucua jiyocua-caanuji nojoriicua rosequiaari. Nujuatejojuua tohuateya riataseeri. Na tohuatejosacari Pedro, Juannio, nojori sequereeri:

²⁰ —Juhujaniya nia quiaarohua. Pueyaso Secojoua tiajinia puetunu Jesujiniijianaa nia pohuatare pueya niquiara. Nia pohuatarejuhuaj taa jatanishano pueya nia quiya quiarijiani.

²¹ Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojoua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniuujia quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriquiano. ²² Na pueya jaara tiuquitiaquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. ²³ Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tootiu. Canaa riatasacari tohuateya, jshaacoori quiriquiaa!

²⁴ Secojoua tia cojuanaa camarnu, mariyata pueyacuara secojonaa jiyaniijianucuaari tama sequetooquiaariijiaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

²⁵ Jiyacaritij, tamonu pueyanoori camarucuaacua tiuquishii. Naa nojori sequeeseeri:

—¡Noo nojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojoua tiajinia!

²⁶ Tari nojori niishishacari tee Jesu jiyaramiquishano pueya quiriquiaani, Secojoua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojoua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuuriija. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. ²⁷ Jaara tiuquitasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrincuaca tajiniatuhuj. Pueyacuara secojonaa jiyaniijiaari nojori sequequiaari:

²⁸ —¡Majaquiiri nia niishiniu tojiniu! Canaacuajaari tari nia tenujucanu juucuanii maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, puetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutanitari: “Cuno nojoriiri Jesu motucanu”.

²⁹ Pedroori narta saquiriojosano pueyata nojori riucuaquiaari:

—Seetanujanaari, pueya cuara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyani-ijianucua sequesano cuara miishaaria. ³⁰ Pueyasoori tariucuaaanu pa supuetanaa Jiyani-ijia quiquiaarijuhuaj. Cuno Pueyasojuanacuajaari niyacutesanojinia nia cusojuasano samitianiuanuhua. ³¹ Pueyasoori na tacaniquianu jiyocuaaanu. Na miaquetajara na cajitiquianuuri Jiyaniijijanaa na quiniucua, pocuaji Tacuna na quiniucujahuaj. Naa miiquianuuri Israel pueya tacatonuhua noojia Pueyasocua, Pueyaso jiyanooniuria pajaniya sesa pa miishanojiniji. ³² Naaratej, canaari canaa tojishano pohuataani, canaa

niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocuajaari na tojitananaa niquitioquiaa na Sohuanu.

³³ Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuj, nojuajaari jiyanoehua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani.

³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijiaa quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niaquejoquiaariuhua. ³⁸ Naaratej, naa nia sequeyanija: nia tarinitiare nio canuu. Nojori niishitiosano jaara tama nojori niishishanojuaja quiri, shaajenutaniyari. ³⁹ Saniniuuja, nojori miishano jaara seetanujanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocujaji tama nia cuaqueyajaaja nia cojuare, majaari Pueyasota nia miaquetoojonuruhua, naa nojori nia miishacaritij.

⁴⁰ Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiesaaruhua. Camarucuaari nojori mojooree nareja. Nojori tenujuteeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. ⁴¹ Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tijinia, mariyata puetunu Jerusalén tiacajiniaqueyajanaano.

6

Mashiquiopue mianuutenaara saquiriojosacari

¹ Jiyacaritij, Jesuucua tiuunaa pueyari socua canequiaari. Puetunu nio pojorijinijin-
iojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyiquiaa miaquesanonijia?

² Nocujaji, Jesu jiyaramiquishano doce pueyari puetunu Jesuucua tiuunaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³ Cunora canaa tapueycuacanaa, tama niyajaniyajinijinio nia saquiriojore siete maninia miijica pueya, niishijica, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue. ⁴ Canaacia saniniuuja saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

⁵ Puetunu pueyajanaari na shuquirinitia nia riucuaquiaari:

—Taaquiririnj, naacuaaquinateja maninijaj.

Jiyacaritij, pueyari Esteban saquiriojoquiaari. Nojuajaari jiyanoehua Pueyasocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio

pojoriiri Estebanta saquiriojosaquaarijiuhuj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaanquaaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶Puetunu pueyajanaa jaara cuno siete pueya saquiriojosaquaari, nojori jiyataquaariiri Jesu jiyaramiquishano doce pueyacia. Jesu saquiriojosano pueyari cuno siete canuu nacaacia niaquaari na juaashiquiaca. Pueyaso secojoturee nojoriicuaaraari Pueyaso Sohuanu cumaquiniuria nojori, miaquesano niqutiojona nojori quiniuria.

⁷Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijiuhuj. Queraatia Judiocuacaacua secोजना pueyari Jesuucua tiuquaaarijiuhuj.

Jesu ruuretajaca quiasacari Esteban

⁸Estebanri Pueyaso cumaacaraca quiquiaari jyanohua. Pueyasoori maninia na jiiatiaquaari. Naacujitij, nojuajaari cusosuhua pueya naatanijioquaari Pueyaso cumaacata. Pueyari niishiquaari Esteban pohuatasanoori seetanujuanaa Pueyasojiniji quiquiaari, nojori niqushacari jiyajeneta na miishano Pueyaso cumaacata. ⁹Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaquaari “Quioosanojiniji carteqesano pueya”. Quiquaaarijiuhua Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu nojorijianaari Estebanca rerejoquaari nata juayonutanura. ¹⁰Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquaarijia. Nojuajaari Pueyaso Sohuanu niishitiojosanota saa maninia pohuataquaarijia nojori niquiara. ¹¹Maja socua nojori rejeretasacari Esteban pohuatasano, nojoriiri tamasaca pueya niqutioquaari cumaneeca, najuhua nojori cuaracashiniuria camarucua niquiara Estebancua. Cuno pueya, cumaneeca niqutiojosaquaari na cuaracashiniuriani, nojoriiri naa sequequaari Judiocuaca camarucua niquiaratej:

—¡Taaquiriirinij, canaacuaajaari cuno pueyano tojiquianu Moisés sesacaanoni, Pueyaso sesacaanojuhuaj!

¹²Naa nojori sequesacaritij, puetunu pueyajanaari juaaquioree, Judiocuaca camarucujuhuj, Moisés Rootasano niishitiojonaanio. Puetunu nojorijianaari Estebanca catecanoquaari. Na quatureeri. Na nuhuaji, na jaatucutuquaari pueya nequesoreesaquiriaari, Israel pueya camarucua nequesoresocoriquiano tii nojuaja. ¹³Socua pajesaaquaariiri tamasaca, Estebancua tonujuriquiano najuhuanaj, na cuaracashiniutia. Cuno pojoriiri naa sequequaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaariquihuariuhuj. ¹⁴Canaari socua naa na sequesano tojiquiaajaaniuhuj: “Nazaret tiacajinijinio Jesuni, nojuajaari Pueyaso Secojoua tia niyartanutaniya”. Naajuhuj, tariucuacaanu Moisés niishitiojosano pajaniya pa cartetenutaniyaquiniaari.

¹⁵Puetunu camarucujanaari na cajitiushaqui niqutiariquiaa Esteban. Nojoriiri na jiquioco niquiquiaari shacantuuca, juhua Pueyaso seru jiquioco.

7

Esteban pohuatasano

¹Pueyacuara secोजना jiyaniijaari Esteban nequesotaquaari:

—¿Seetanutejanaa taa nio pojori sequereecuajani?

²Nojuajaari na riucaaree:

—Cua panishano pueyanaa, cua camarucuaanaa, cua tojitiare. Pueyasoori jyanohua maninia. Nojuajaari pa sapuetana Abrahamcua muetaquaari Mesopotamia jiyajinia na quishacari, na pacuyaquishacarijia Harán tiacajinia. ³Pueyasoori jiyacari naa na sequequaari:

“Quia tiujiaare quia jiya, quia pueyano. Niiquiji quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaaajaquiaari na shipininioori. Na nuhuaji, niyara pacuquiaariiri, paa tii quiyani. ⁵Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuohuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niqiuohuaju quiquiaari. ⁶Pueyasoori naa pacutequiaari sequenu Abrahamtej:

“Puetunu quia jinianuucujainio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanhua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

⁷Pueyasoori Abraham sequerejuhuaj:

“Janiyari saniniujia cuno taucuaca naminiutianiya quiocujainio supueno pueyacuani. Janiyari nojori saniitionutaniya saniniunijia nojori poonijiotenuucua quiocujainio supueno pueya. Na nuhuaji, nojoriiri tiji quiojonutanihua niyara. Nojori tiuquijiosacarihua, nojoriiri cua secojonuujuaca quiniutianiya niya”.

⁸Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano najaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohujahuaj. Necohuari quiquiaari doce canuu. Cuno doce canuu, Jacobo niqiuohuani, nojoriiri puetunu pa doce Israel pueyapue supuetanaajanaa.

⁹Pa supuetana Jacobo niqiuohujainijinioni, tamonuuri sesojosaaquiaari José. Tapuey-ocuaacari José juajiacua quiquiaari jiyanhua, puera na que panishano José quishacari. Majaari nojori niqitiumu paniniu quijia nojuaja. Na queeri socua jiyanhua José panijia quiquiaari na pueranaajiniji. Tapueyocuaacari cunora casami niqutiojonaa pueya niqutioquiaari cumaneecara tarajanu José. Casami niqutiojonaari José jiyataquiaari Egipto jiyajinia, saniniujia tii na niqitiosocoriquiano serura. Naajaa, Pueyasoori Joseeta quiriquiaa. ¹⁰Pueyasoori na naacuquiaari naquiya na miishacari. Pueyasoori na jiyatequiaari niishijia. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaarihuaj.

¹¹Na nuhuaji, miaajenuuri quiquiaari puetunu Egipto jiyajinijanaa, Canaán jiyajiniano. Pa supuetanaa quishacari Canaán jiyajinia, nojoriiri quera titiacoquiaari na mijajajara. Seetanujanaa shaaqui quiquiaariiri nojori miasano. ¹²Jiyacaritij, Jacoboori caminiujiushaaquiaari: “Egipto jiyajinia quiyaquinia trigo”. Naaratej, necohua jiyaroreeri trigo masenura. Jiyacari nojori quiojosacari, cunoori shushajanaa nojori qianu quiquiaari Egipto jiyajinia. Cuno Jacobo niqiuohuani, nojoriiri pa supuetanaacuja. ¹³Coteenu nojori masenano jaara puequequiaari, nojoriiri Egipto jiyajinia tacatequiaar-ihua socua trigo nojori masenura. Jiyacaritij, Joseeri tapueyocua sequequiaari: “Janiya nia tarajanuni”. Joseeri Faraón niishitiquiaari tapueyocuaajahuaj. Naaratej, Faraónri shusha niishiquiaari tejeno pueyanote José quiquiaari. ¹⁴Joseeri tapueyocua sequequiaari: “Pa que Jacobo nia riquioo niyara, puetunu necohuatjanaa”. Puetunu nojoriijianaari quiquiaari setenta y cinco pueya. ¹⁵Jacoboori naa pacuquiaari Egipto jiyajinaratej. Na nuhuaji, saaquianoori tii shaajesequiaari. Necohuari tii pueque-seequiaarijuhuaj, tariucua saaquiapue. ¹⁶Na nuhuaji, Egipto jiyajiniji pacusaaquiaariiri

nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuacaanu pueyajiniji raa na jiitianura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷ Pueyasocujaaari tariucuacaanu Abraham sequequiaari nojuajaari nio jiya na niq-
uionutaniya. Quera na niqutionu panishacari, Israel pueyari jiyanoahua canequiaari
Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia.
Cunoori jiyanoahua tarijia quiquiaari José shaajenu nuhuaji. Naacuajitij majaari cuno
jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano
pa supuetanaa niqiohuhua. Pa supuetanaa sequequiaariiri shusha roosano cuara que-
joosaaria moojinia. Pa supuetanaari taraatia miiquioquiaari naacuatej. ²⁰ Moisésri jiyacari
rasaquaiaari. Pueyasoori na maniniucuaquiaari. Na queyari na jiitiaquiaari rupaquijia.
Jaara na shoconujuquiaari jiuujianaraca raca, conajaari carijiniacuma niasaquaiaari.
²¹ Faraón niyatuuri na paquiaari saniniuujia. Na canashitiquiaari juhua na mueyari.
²² Egipto pueyari Moisés niishitiojoquiaari puetunu nojori niishishanojuanaa. Puetunu
Moisés sequesanojuanaari jiyanoahua tojishano quiquiaari cutara. Puetunu na miishano-
juanaari maninia quiquiaarijuhuaj.

²³ Cuarenta marijia jaara shocojoquiaari Moisés, mashaja na quishacarijia, narta Israel
pueyacia rucuanenu paniquiaariiri, nojori na niqiniuria. Judiucacuajaaari cuno
pojori, naa sesojoshiya Israel pueyatani, maja tamonu. ²⁴ Naacuajitij, Moisés jaara
quiaquiaari narta Israel pueya niqiniucua, saaja Egipto pueyano niqishii narta Israel
pueyano majacuyanoori. Moisésri narta Israel pueyanocua namiquiaari. Na juaaniutia
moquiaari saniniuujia cuno Egipcio pueyanoori. ²⁵ Moisésri juucua jiyaniquiaari narta
Israel pueyari niishiniutianiya Pueyasoori na jiyaroree nojori na mashiquiniuria Egipto
jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari
narta Israel pueya niqiniuuquiohuaj. Nojuajaari saaja riuriatasee tama nojori piy-
otaanojuaja. Juucua nojori ruparetanu panishiiri. Nojori sequereeri: “¿Niateeri
tamonu, niaa jaara naa miitioyaniquitij? ¿Casaara naa nia nootujutoyani?” ²⁷ Cuno
narta pueyano piquiriquiaani, nojuajaari saaja Moisés caporee. Na sequereeri: “¿Cante
quia jiyatecanu juhua canaa jiyaniijia quia quiniuriani, naa quia sequenura canaatej?
¿Cante quia jiyatecanu canaa nequesoreenarani?” ²⁸ ¿Quiaateeri cua monu panijahuaj,
naatej taa quia morucuaa cuno Egipto pueyanocuaani?” ²⁹ Moisés tojishacari naa cuno
pueyano sequesantej, ritia mashiquiaari Egipto jiyajiniiri. Madián jiyajinia quishiiri
tamonu pueya jiyajinia. Moisés quishacari cuno jiyajinia, tii camiquiaariiri. Caapiqui
canuuniyojua mueratejoquiaariiri.

³⁰ Cuniqui na quishacari, na shocojoquiaariiri cuarenta marijia socua. Tamonu juuca,
Moisésri rucanejoriquiaa cariquia jiyajinia, pueya sesojosano Sinaí tuhananu shuri-
ucua. Pueyaso seruuri tii nocua muetaquiaari nequeru casaja noshiyanojiniji. ³¹ Moisés
niquishacari mani noshiyano, nojuajaari shirriiquiaiaari. Jaara nocua catecanoquiaari na
niqiniuria maninia, saaja Jiyaniijia Pueyaso tojirii manijiniji pocuaanoori. ³² Pueyasoori
naa na sequequiaaritij:

“Janiyacuajaaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniiji-
ajuhua, Jacobo Jiyaniijianio”.

Moisés jaara naa tojiquiaaritij, tetecareeri. Majaari mani noshiyano na niqiniu paniniu
quiquiaari na puerenuta. ³³ Pueyasoori na sequequiaari:

“Cuniqijia quia jocojore quia sapatu. Niya, quiaa tii nujuaani, nioori cua quishaqui.

³⁴ Janiyacuajaaari cua pueya niqiquiaa Egipto jiyajinia quiyanoi. Egipto pueyari
nojori miitiaa puera. Cua pueyari noonu rejeretacoya. Janiyari nojori sariyocu-
atunu tojiquiaa taraatiani. Nojoriicua roseyareenijia cua mashiquiniuria nojori
Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaaritij.

³⁵ Israel pueyari tarijia Moisés juaaquaaricua. Naa na sequetuquiaariiri: “¿Cante quia
jiyatecanu juhua canaa jiyaniijia quia quiniuriani, canaa nequesoreenarajuhua?” Naajaa,

Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshianojiniji. Na jiyaroquiaari-iri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niuutiasacari Naatunacu jiyaniishano caminiajuhuaj. Naa miiquiaari pueyaracaanu cariquia jiyajiniaariuhua. Cuarenta marijiaari nojori shocojoquiaari pueyaracaanu nojori rucuanajosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiura, taa na jiyaroquiaari janiyacuaani. Tama nia niquiohuacuajinijouaja supenutaniyari. Niocua saa nojuaja tojiri cutara”.

³⁸ Nio Moisésni narta Israel pueyata quiquiaari cariquia jiyajinia. Nojuajaari Pueyaso seruta pocojoquiaari Sináí tuhananuucua pa supuetanaa jateesacari tuhananu cari. Moisésni Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹ Pa supuetanaari saa na ruuretaquiaarijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saajaari. ⁴⁰ Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucua-juhuanajaj, mariqui tiuquiriohua. Nojuajaari najuhuaana pa mashiquiquianu Egipto jiyajiniji”. ⁴¹ Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juashiquiata na shipinitiushano pueyasooacara. Nojoriiri jiyacari sacuaraatia timiquioriquiaa. ⁴² Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuaaanu Pueyaso sequesano caminiujiuniaa naajioneefinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariquia jiyajinia nia camarucuneetasacari cuarenta marijia cuara nia shocojoquiaarijiaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuacuarajaaja. ⁴³ Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataquiaarijiuhua, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimijia nia mojqetacacura, nia shuquiritiasacari nojori. Nocuaaji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniucua sesa.

⁴⁴ Estebanri socua pohuataquiaari naatej:

—Pa supuetanaari Pueyaso secojojua suhuorotu jiitiaquiaarijiuhua, cariquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacu. Cuno suhuorotuuri shipinishaaciaari taa Moisés niqutishaaquiaaricuaajani Sináí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niqutiquianu quiajanijacuaajani”.

⁴⁵ Na nuhuaji, pa supuetanaa, canapuate naatujoori quiriquiaa Moisés quishacari, nojoriiri cuno suhuorotu pataquiaari. Na patatuaariiri Josuéta nojori pacusacari nio jiyajinia paa tii quiyani. Nojori miaquetoojosacari taucacata, nojoriiri Pueyaso secojojua suhuorotu patariquiaa. Pueyasoori cuno taucua jataquiaari nio jiyajiniji, saniniujia pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari. ⁴⁶ Jacoboori pa supuetanaa jiyaniijia David supuetana

quiquiaarijuhuaj. Davidri Pueyaso tojjia quiquiaarijuhuaj. Pueyasoori na shuquiriti-aquiaari. Naaratej, Davidri Pueyaso Secojoua tiara tianu paniquiaari juucua. ⁴⁷ David niyanu Salomón cutaraari Pueyasora tiaquiaari. ⁴⁸ Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajjotaquiaari Pueyaso sequesano nojuaja:

⁴⁹ “‘Jiyocuacaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajaarani?’ Jiyaniijiaari naa sequeyaquij. ‘¿Taa nia sequeyani: na mueecjuara pa miiri, shuquiriaatia na quijara? Maja. ⁵⁰ ¿Majateeri puetunu nio jiyajinia niquishanojuanaa cua juaashiquiata cua miishanocuja, jiyocuacaanujahuaj?’”

⁵¹ Estebanri socua nojori sequequiaari:

—¡Niaari tojjitiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojaari maja juhua Pueyaso pueya jiuujia. Nia numaacaari maja Pueyaso rupaa na tojjini paniniu. Niaari pueyaracaanu tojjiaquia Pueyaso Sohuanu niishitijosano. Niaari Pueyaso tojjiyashijianucua juhua nia supuetanaajuhua. ⁵² Nia niishiritioj, ¿nia supuetanaate quena niquiriyatujua Pueyaso sequesano caminiujiuniaa miitiaaquiquiaari? Nia supuetanaari puetunu Pueyaso sequesano caminiujiuniaa-janaa miiquioquiaari naquiya. ¿Quenaaja niquiriyatu nojorijinijiniote miitiasoo cureequiaari? Maja. Nojoriiri tari puecooquiaari noo pueya, canapete maninia miijia mijiria niriqianojiniji pohuatanuquiaricujani. Cuno maninia miijia jaara tiuquiquiaari, niaari sesa miijia pueya na niquitocanu nojori mosocoriquiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! ⁵³ Naacujitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojjini quiquiaajuhua.

Jesu ruuretajaca mosacari Esteban

⁵⁴ Pueya jaara naa tojjituquiaari Esteban sequesantej, nojoriiri jiyanohua juaaquioree. Na juaaniutia miaquenuuree na quiaaari. ⁵⁵ Jiyanohua Pueyaso Sohuanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuuca niquiri-iri. Jesu niquirijiaariuhua na Que Pueyaso miaquetajara nujuaano. ⁵⁶ Naa na niquishacari-itij, nojori sequeree juucuaari:

—¡Nia niquishuriniaja! Jiyocuacaanu niquiya riatenonijia. ¡Pueyaso Niyanu niquiyani-ja na Que miaquetajara nujuaano!

⁵⁷ Pueyari na numaaca mishiquiojonuquiaari saaja, maja na tojjituniuria Esteban sequesano. Jiyanohua sariyocuatiquiaari na juaaniutiaari. Na nuhuaji, Estebanca cocuatequiaariiri. ⁵⁸ Na caponeetiquiaari Jerusalén tiacajiniiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacuturiqianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo.

⁵⁹ Nojori jacutusacari saitia Esteban, Estebanri Pueyaso secoriquiaa naatej:

—Jiyaniijianaa, cua sohuanu quia riri quia shuriucuaa.

⁶⁰ Na nuhuaji, mojoquetareeri. Jiyanohua nacaquiaari na nuhuajiaari:

—¡Jiyaniijianaa, majaari nio pojori sanitionu naa nojori miiniucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuuniaa

¹⁻² Pueyaso panijaca pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocujaj, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejejoquiaari puetunu Judea jiyajiniajanaa, Samaria jiyajiniarano. ³ Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari,

na jayoquiaari tiacojiiri, na nujuatejosocoriqiano nujuatejojuajinia, maajipohua, canuunio.

Jesujiniji pohuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pohuatanuuquiaari pueya niquiara. ⁵ Nojorijinjinio quiquiaarijuhuaj Felipe. Nojujaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaarihuaj. ⁶ Puetunu pueyajanaari Felipe pohuatasano tojinuuca rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. ⁷ Samaruhua tohuatanijioriquiaa pueyajinijiiri. Samaruhua tohuareetasacari pueyajiniji, sariyocumaquiaari. Queraatia cumat-acuruhuana cusosuhuari naatanijosaaquiaarijuhuaj, sesacujuanucuanio. ⁸ Naaratej, puetunu cuno tiacajinia quiniaa pueyajanaari jiyanoehua shuquiriquiaari.

⁹ Shimiacuuri cuno tiacajinia quiqijuhuj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojojuuari jiyajeneta na miijosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰ Puetunu pueyajanaari na tojjia quiquiaari, camarucua, muerasunio. Nojoriiri seque-tuquiaari: “Nio pueyanoqui jiyanoehua Pueyaso cumaaca jiiitia”.

¹¹ Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. ¹² Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijiuhuaj, cuno Samaria pueyari Jesuucua tiuquiaari cutara. Canuu, maajipohuajuhuj, nojoriiri tiuquinijosaaquiaari moojinia. ¹³ Simónri Jesuucua tiuquiaarijuhuaj. Tiuquinishaaquiaarijuhuaj. Na tiuquinisahaanu nuhuaji Felipeecua sacuaquiaariiri. Felipe shootiaquiaari tacuriitiaari Felipe miijosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquirijosano pueya jaara tojiquiaari taa Samaria pueya tiurii Pueyasoo cuani, nojoriiri cuniquiji jiyarotuhuj Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitiuriia na Sohuanujuhuj. ¹⁶ Majaari Pueyaso Sohuanu tiuquini quiquiaari juhuanojuaja nojori jiuujajinia. Nojoriiri nareja moojinia tiuquinijosano quiquiaari Jesuucua nojori tiushacari. ¹⁷ Pedro, Juan, cunora na juaashiquia niojoquiaari pueyacu, nojoricuara na secojotusacari Pueyaso. Naa nojori miishacari, Pueyaso Sohuanuuri cuno pueya jiuujajinia tiuquiquiaari cutara.

¹⁸ Simónri niquiriquiaa taa Pueyaso Sohuanu tiuquiquiaari pueya jiuujajinia Jesu saquirijosano pueya niasacari na juaashiquia nojoriicuan. Naaratej nojujaari Jesu saquirijosano pueya niqitionu paniquiaari cumaneeca juucua, cuno cumaaca na jiiitanurajuhuj. ¹⁹ Simónri naa sequequiaari nojori:

—Cua niqitiotureja cuno cumaaca. Janiyacu Pueyaso Sohuanu panijiaacua niare cua juaashiquianijia, Pueyaso Sohuanu nojori masenurajuhuj, taa nia miyacuani.

²⁰ Pedroori na sequequiaari saaja:

—¡Quia cumaneeca cuara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqitioquiaa nareja na tojtiajaca pueya. ²¹ ¡Pueyaso Sohuanu cumaacaari maja quiarano! Quioo-jiari jiyanoehua sesa quia Pueyaso niquiara, nocuaji maja na cumaaca niqitiosaanu quiniutianiya quiajaniya. ²² Jiyanoehua sesa quia niishirijosanojiniji quia pishiriohwa. Pueyaso quia secojore na jiyanooniuria quiajaniya naa quia niishirijosanojiniji quioo-jiajinatej. ²³ Niishiyacuajaniija, quiaari juhua cartesoo quiyajaa, sesa miiniucua jiiitio quia quishacarijia. Quioo-jiari puera najiqitishano quiyajaa jiyanyoshijia quia quiniucujuhuj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niquiara. Pueya niquiara pohuataureeri socua Samaria jiya tiacajinia, cuniqui quiniaa

tiuuniuria Jesuucujuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etope pueyano

²⁶Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Felipeana. Pananu shuucujiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariquia jiyacuma neteya.

²⁷Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopia jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniucua, maaji na jiyaniijia quiniucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jitianara, na cumaneeca cojuariquiano nera. Nio Etope pueyanoori Jerusalén tiacajinia quiaquiaari Pueyaso secojonuucua. Cuniqiji tacateyanoori Felipea naacuneetooquiaari nuujinia. ²⁸Nucuacoji na tacatesacariuhua na jiyajinihuara, caballoori na jaatiariquiohua, rucuanetotarujinia cajiyano. Pueyaso rupaa serojoriquihuari, tariucuaaanu Pueyaso sequesano caminiujunia Isafas naajoneejiniji. ²⁹Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰Jaara nocua catecanoquiaari, Felipeeri Etope pueyano tojiquiaari Isafas naajiosano serojiano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹Etope pueyanoori na riucaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

³²Etope pueyanoori nio serojoriquiaa tariucuaaanu Pueyaso Rupajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³Naquiya miishaquiaari cararaatiaari. Nocua namiyaquishaquiaariiri. Mashaja na quishacarijia, nojuajaari shaajasaaquiaari nio jiyajiniji. Cunora, majaari na muetunu quiquiaari. Niquiohuajuuri mosaquiaari”.

Etope pueyanoori nio serojoriquiaa Pueyaso rupajiniji.

³⁴Na nuhuaji, Etope pueyanoori Felipe nequesotaree:

—Cua sequere pueyanonaa, ¿canajiniji Isafas pohuataa niya na naajiosanojiniani? ¿Tama nojuajiniji pohuataate? ¿Tamonujiniji soj?

³⁵Felipeeri Etope pueyano niishitiojonu coteeqiaari Jesujiniji shusha na serojosano Isafas naajiosanojiniji. Felipeeri naa na sequeree:

—Isafas naajiosacari nio, nojuajaari juhuacarijia Jesujiniji pohuataquiaari, taa quiarijia Jesu miishaacanun taaatiacujani.

Felipeeri socua na pohuataquiaari Jesu miishanojiniji. ³⁶Nojori quiasacari nucuaco, caminiaco shuriuquico tajitariquiaari. Etope pueyano jaara caminiaco niqiquiaari, Felipe sequereeri:

—¿Majate maninia cua tiuquinishaanura niya?

³⁷Felipeeri na sequeree:

—Quiaa jaara seetanujanaa tiuuri Jesuucua, quia naata tiuquinishaanu.

Cuno pueyanoori na riucaaree:

—Jaa, janiya Jesucristoocua tiyani. Nojuacuajaari Pueyaso Niyanu. Na niishiyanijia.

³⁸Etope pueyanoori jiyamitia na seru sequeree:

—Quia nujuaretare rucuanetotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiushacari. ³⁹Nojori tacatasacariuhua caminiacojiniji, Pueyaso Sohuanuuri Felipe riquiaari

canashiyaquiji cuno Etíope pueyano shuriucujaji. Nojuajaari juucua tacareecuaquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhua-janaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojinia na quiniuria

¹ Sauloori jiyacari pueyaracaanu Jesuucua tiuuniaa miananajoriqiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyani-ijiaacua quiaquiaari. ² Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rere-jojuacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaniya niyara Jerusalén tiacijinarani, canuu, maajipohuanio.

³ Naacuajitij, nucuaco Saulo quiasacari, tari quenaacoturiquiaa Damasco tiacajinaraari. Jiyacaritij, ¡shacantuucaari canashiyaquiji nunuquiaari jiyocuacaanuji! ⁴ Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riucuree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutiataj, quiaari tama quia cuaqueya sesoyajacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

⁶ Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijaari na sequeeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷ Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niqiniu paniquiaari. Saaja shaaquiri quiriquiaa. ⁸ Na nuhuaji, Sauloori na pojosaquiji sanerohua juucua. Majaari na naata niqiniu quiquiaari saaja. Nata quiniaari na jaatucutaquiaari Damasco tiacajinara. ⁹ Nojuajaari tii camueenujuquiaari jiuujianaraca juuca, cariojuaru na quishacari. Majaari na miquenu quiquiaari pueyaracaanu cariojuaru na quishacari. Ratuyaquiquiaarijiaariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijaari na sequeeree:

—Quiarjia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiacijinia quiya. Judas tiaari jati tamonu nuujinia quiya. Cuno nuu sesa, Nu Maniniu. Sauloori cuno tiacijinia secojija Pueyaso. ¹² Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiyajariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niqiniuhuara.

¹³ Ananías jaara naa tojiquiaari Jiyaniijia sequeyanotej, nojuajaari sequeeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniaari! ¹⁴ Pueyacuara secojonaa jiyani-ijia jiyarosanonaari cunohuj, quiarjia niya tiuquiriini. ¡Nojuajanaari quia secojonaa pueya quioonutaniya, morojonucuaca canaa na jiyatasocoriquiano Jerusalén tiacajinara!

¹⁵ Jiyaniijiaari Ananías sequequiaari saaja:

—Naajaa, quia quiaare. Janiyacuaajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijiaariuhuaq, Israel pueyano. ¹⁶ Janiyacuaajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pahuatasacari.

¹⁷ Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacua-jani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nuquamaji niyara quia nishacarin, nojuajaari quiocua cua jiyaroreeni. Cua jiyaroreeni quia namijia jeequenuhuaa maninia, Pueyaso Sohuanu tiuquiniuria quioojiajiniajuhuaj.

¹⁸ Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiushacari. ¹⁹ Na nuhuaji, miaquereeri, raturohuajaariuhuaq. Noojia jatarohuari. Pasaja camueenujuquiaari Damasco tiacajiniaari Jesuucua tiuunaa pueyata.

Jesujiniji Saulo pahuatasacari Damasco tiacajinia

²⁰ Sauloori juhuacatecara coteequiaari Jesujiniji pahuatanu narta Judiocuaca secojo-juaca tiajinia Damasco tiacajinia. Nojuajaari pueya niquiara na pahuatasacari sequeja:

—¡Jesuuri seetanujuanaa Pueyaso Niyanu!

²¹ Naa nojori tojishacari Saulo pocuaanotej, pueyari shiriiquiquiaari. Na shiriiquitiuni-utia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuunaa pueya Jerusalén tiacajinatej? Niyara niyareejaariuhuaq, Jesuucua tiuunaa pueya na moro-jonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiojosocoriquiano, nojori nujuatejosaanura.

²² Sauloori socua noojia cumaquiquiaari Pueyaso Sohuanuta, jiyanohua maninia na pahuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pahuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaaji

²³ Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. ²⁴ Tamonuuri Sauloocua jiyanoocuaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuca sohuacaraca quiquiaari puetunu na shocujanaa. Jesuucua tiuunaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuaaanuji puereetuca canaasatujiniaari. Sauloori naa mashiquiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuunaa pueya rupeenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasocua tiuujaquinio naasucua jijanotej.

²⁷ Bernabé cutaraari maja na puereenu quiquiaari Saulo. Nojuajaari Jesu saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nuquamaji. Jiyaniijiaari nata pocojojocanu. Sauloori cunora juhuajaniya pahuatariquiaa Jesujiniji Damasco tiacajinia.

²⁸ Sauloori narta Jesuucua tiuunaa pueyata jiyojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pahuataja juhuajaniyari. ²⁹ Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na

tiuushacari. Griego rupaa pocuanaa Judiocuacata pocojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniqiji jiyarosaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quiija. Nojoriiri socua Jiyaniijia tojtiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³²Pedroori pueyaracaanu rucuanajojua Jesuucua tiuuniaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niqiniuucua quiaquiaari Lida tiacajiniajuhuaj. ³³Tii quiquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quiija. Tari na shocojoquiaari ocho mariija pootia na matasacari na matujinia. ³⁴Pedroori cuno cusosu sequequiaari:

—Eneasnaa, ¡Jesuucristo tari quia naatanirii! ¡Quia sanere! Quia matu quia jeeicare.

Eneasri ritia sanequiaari. ³⁵Puetunu pueyajanaa Lida tiacajinia quiniaa, mariyata Sarón tiacajinijinio pueyajuhuj, puetunu nojorijianaari nio miishano niqiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

Dorcas samiitianishaanujiniji pohuatasano

³⁶Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miijia maaji quiquiaari. Casamiijiuucua pueya niqitiojojua nareja na jiiti-asanojinijiiri. ³⁷Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸Jope tiacaari cateca quiya Lida tiacajiniji. Pedroori Lida tiacajinia quiquiaajaa Dorcas shaajesacari. Jesuucua tiuuniaa pueyari tari niishiriqiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹Pedroori nojoritia tacatequiaariuhua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqitijioquiaari Dorcas cusupuenusano toqueya, cacojoquiano. Cunoori quiquiaari na cusupuenusano saminio na quishacari. ⁴⁰Pedroori jiyacari puetunjuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequeereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri.

⁴¹Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, ¡nia nimia!

Nojori tiuquitiasacari, saaja maaji niqitiusii nujaanoori, tariucua saminio. ⁴²Pedro miishanoori puetunu Jope tiacajinijanaa niishishaaquiaari. Queraatia pueyari cunora Jesuucua tiuquiaari. ⁴³Pedroori na nuhuaji janiya camueenujuquiaariijaara Jope tiacajinia. Nojuajaari Simón tijajinia quiquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujuanaa Pueyaso shuquiritini puenijia quiquiaari. Cornelioori queraatia na cumaneecajiniji niqutiojojua quiquiaari nareyajuhuj, casamiijiuniucua Judiocuaca niqutiojosocoriquiano. Pueyaso secojojua pueyaracaanuuri. ³ Tamonu juuca, tariucua pananu piriuushacari, Cornelioori Pueyaso seru niqiuquiaari juhua na maquenujinia nocua niyano na tiajinia. Na sequeseeri:

—Cornelionaa.

⁴ Cornelioori saaja Pueyaso seru shootiaquiaari na shiriqiniutia. Na nuhuaji na riucaareeri:

—¿Casaate jiyaniijianaa?

Pueyaso seruuri na sequere:

—Pueyasoori quia secojosano tojiquiaa. Quia timitiaari capora quia quiniucua, quia jiiitiasanojiniji quia niqutiojosacari nareja casamiijiuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuaj. ⁶ Nojuajaari na sesaanucua pueyano tiajinia quia. Tia camaruuri shoque majeetejojua piqiuajinia. Cunoori na poonijosano. Na tiaari shoniacu caminia casaqueyaji naniya. Simón Pedroori quia sequenutaniya casaa quia miiniutianiyanu Pueyaso jiyanooniuria quiajanija.

⁷ Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaarijaariuhuj. ⁸ Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹ Tariqui, Cornelio seya quiasacari nucoo, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasahuojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niqutiquiaari juhua na maquenujinia, na quishacari tia cacojiria. ¹¹ Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. ¹² Sonaque jiniacuma quiriquiaari puetunu casaajanaa: sacocua, jiyacua rucoojuacanio, jiyocuacaanu jacuatujuacajuhuj. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. ¹³ Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

¹⁴ Pedroori na riucaaree:

—¡Maja cua Jiyaniijianaa! ¿Janiyatucua taa miaquere sacuraatia cua miaquesooni? ¡Cunocujaaari tarijia quia sequesano canaa pueresocoriquiano!

¹⁵ Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, sonaqueeri tacanitasaaquiaariuhua jiyocuacaanu. ¹⁷ Pedro tacaashacari naa na niqiniucua juhua na maquenujinatej, jiyacari Cornelio jiyaramiquishano pueyari tia tohuatayaji tiuquijioquiaari, Simón tia na pajetunura. Cornelio pueyari nequesoreetariquiaa nucooji nojori tiuquiniuria Simón tiajinia. ¹⁸ Nojoriiri tohuatayaji nacaquiaari:

—¿Niya quiyate Simón jiyaniishano pueyano? Na sesaari Pedrojuhuaj.

¹⁹ Pedroori juhuanujuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequere:

—Pedronaa, jiuujianaraca pueya quia pajeya. ²⁰ Tariucujia. Quia sanerohua. Nojoriicua quia roseyarohua. Quiocua nojoritia quiaarohujuhuj. Majaari taacanuunu. Janiyacuajaari nojori jiyaramiquiriucua quiocuani.

²¹ Pedroori Cornelio jiyarosano pueyacia rosequiaari. Nojori sequeeseeri:

—Janiyacuaja nia pajesano pueyanoni. ¿Casaacia nia niyareecuarani?

²² Nojoriiri na riucaaree:

—Canaa jiyaniijaari Romano soldadohua jiyaniija. Na sesa Cornelio. Nojuajaari canaa jiyarorucuaa quiocuani. Maninia mijia pueyanoori. Jiyaniija Pueyaso tojjijaariuhuj. Puetunu Judiocuacajanaari maninia na miiniucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³ Pedroori Cornelio pueya tiuqunitiaquiaari na quijia tiajinia. Nojori sequereeri:

—Niyaja nia maqesejaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaariuhuj Jope tiacajini Jinio Jesuucua tiuunia pueya.

²⁴ Tama tariqui saniniujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupenaatanio. Cornelioori puetunu nio pueyajanaa masuquiaari, nojori rerejonura juhucarijia na tiajinia Pedro tiuquiyacuquishacarijia. ²⁵ Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuaa mojuquetaquiaariiri juhua Pueyasocua. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

²⁷ Tiaco na tiuquitasacari, pocojoriquiaa Pedrotari. Pedro tiuquishacari, saaja queraatia pueya niqishiiri. ²⁸ Pedroori nojori sequereeri:

—Taucuacanaa, niaacuajaari niishiya canaari Judiocuacani. Judiocuacari rootasaaquiaari maja cana rupenura taucuaca, maja quenaaja tahue tiajinia cana tiuquiniurijuhuj. Saniniujia, Pueyasoori quarijia cua niishitorucuaa cutara maja cua soonura tamasa. Taucuacari maja sacuaraatia quarijia quiria. ²⁹ Naaratej, cua niishishacari niari cua masuucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuucuaa janiyani?

³⁰ Cornelioori na riucaaree:

—Cuatro juucaari tari shoconujia. Janiyari jiyacari Pueyaso secojoriquiaa juucua cua tiajiniani, pananu muecosacari. Jiyacarijij, pueyanoori cucua muetarucua. Jiyacaricuajaari quiriquiaa, tee pananu tiuyanijia. Cuno pueyano toqueeri shacantuque quiriquiaa. ³¹ Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niqitiojoquiaa quia casami casamiijiuniucuaani. ³² Naaratej, quia seya quia jiyaramiquiri Jope tiacajinia, cuara Simón masuucuaa quiatuura. Na sesaari Pedrojuhuj. Nojuajaari na sesaanucua tiajinia quia, shoniniacu caminia casaqueyaji. Tia camaruuri piiquajinia shoqueya majeetejonu poonijiojua. Simón Pedro jaara nimia quia tiajinia, quiata pocojonutaniyari”. Pueyaso seruuri naa cua sequerucuaaqui Simónnaa. ³³ Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quarijiani, puetunu pajaniyajanaari niya Pueyaso niqiara quiyani. Naa quia pohuatara cana tojishocoriquiano quarijia, taa Pueyaso niishitiojorucuaa quiajaniya cana quia pohuatanuracuajani.

Pedro pohuatasacari Cornelio tiajinia

³⁴ Pedroori juhucatecara pohuatanu coteequiaari. Sequereeri:

—Quarijia niishiya seetanujuaana cutaranijia, Pueyasoori maja rimiajata na niqiniuri pajaniya. Majaari nia jiyaniini Pueyasoori saaja Judiocuacacua jiaatia, Israel pueya nojori quiniucua. Maja. Nojuajaari tamasaacua jiaatiajuhuj. ³⁵ Tiquiyocua jiyacajinia Pueyaso secojiojua pueya quishacari, nojoriiri Pueyaso jiyanooshano pueya quiyajuhuj, maninia mijia nojori quishacari. ³⁶ Pueyasoori na rupaa pohuataniquiaari puetunu cana Israel pueyarajanaa, jiyanooshano cana quiniuria Jesucristoocua cana tiuushacari. Nio Jesucristoori puetunu mijiria quinia Camarnujuanaa. ³⁷ Tiuquinijona Juanri Pueyaso rupaa pohuataquiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano cana Galilea jiyajinia, na nuhuaji na miishano puetunu Judea jiyajinijanaano. ³⁸ Niaari

niishiyajuhuj, Pueyasoori na Sohanu niqutioquiaari Jesu, na cumaaca na jiitianura. Nojuajaari maninia miiquiaari pueya, tiqiyocua na rucuanesacari. Cusosuhua naatani-jioujaari. Samaruhua camarnu sesosano jeecaquiaarjiaariuhuj. Puetunu naa mijia maniniajanaari na Que Pueyaso quiniucua nata. ³⁹ Canaari puetunu na miishanojuanaa niqiuquiaarini, puetunu canaa Judiocuaca jiyajiniajanaa, Jerusalén tiacajiniajuhuaj. Janiyari seetanjuanaa canaa niqishano pohnuataani. Na nuhuaji, pueyari na teetequiaari niyacutesanojinia. Tii na cusojuatuquiaariiri. ⁴⁰ Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacua na mueratereeri. ⁴¹ Majaari na muetanu quiquiaari puetunu pueyacuajanaa. Saaja canaacua muetaquiaariiri, teyano Pueyaso saquiriojuquiaari coteenu tariucuacaanucujani, Jesujiniji pohnuatuuriquiano. Na samiitiasacariuhua, canaari nata miaquenuquiaari mariyatani. Canaari nata raru-ucuaarijiuhuj. ⁴² Jesu jaara canaa jiyaramiquiaari, nojuajaari canaa sequequiaari: “Naa nia pohnuatare pueya niqiuara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’”. ⁴³ Tariucuacaanu pueyara Pueyaso sequesano caminiujuniaari naa juhuacarijia sequetuquiaari Jesujinijiji-uhuj: “Cante nocua tiuyani, nojuajaari jiyanooshaanutaniya sesa na miishanojiniji”.

Pueyaso Sohanu tiuquishacari taucuaca jiuujiajiniajuhuaj

⁴⁴ Pedro pohnuatasacarijia taucuaca niqiuara, Pueyaso Sohanuuri Pedro tojitianaa taucuacaacua niqiuiaari, nojori jiuujiajinia na tiuquiniuria. ⁴⁵ Pueyasooacua tiuuniaa Judiocuacani, Pedrota nijioquiaari Joje tiacajinijini, nojoriiri shiriiquiaari Pueyaso niq-uitiosacari cuno taucuaca na Sohanu. ⁴⁶ Cuno taucuacaari nojori niqiuara pocooriquiaa tamaatia rupaacajinia. Pueyaso maniniuhuaqueetaturiquiaari. ⁴⁷ Naaratej, Pedroori sequequiaari:

—Nio pueyari tari jiitiaa Pueyaso Sohanu noojiajinia, taa pa jiitiaacuani. Naaratej, nojori cuara tiuquiniijosaaia quiarijia. ¿Cantucua nojori tenujure maja na tiuquini-jiisaanurani?

⁴⁸ Pedroori na nuhuaji sequequiaari cuno taucuaca tiuquiniijosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.

11

Taucuacajiniji Pedro pohnuatasacari Jerusalén tiacajinia

¹ Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pohnuatasaaquiaaritij: “Taucuacanaari Pueyaso rupaacua tiuuri-ucuaajuhuj”. ² Nocuaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiariuhua. Na juaaniaari taucuaca cararaatiuquua co miate-jonu panijiaa quiquiaari, taucuaca quiniuria seetanjuanaa Pueyaso pueya nojoriria. ³ Nojoriiri naa juaaquiari Pedro:

—¿Casaara quia quiaarucuaa cuno taucuacaacuanii? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuaj! Quia miishanoori maja maninia taa Pueyaso rootaquiaari tariucuacaanucujani.

⁴ Pedroori suraatiaja nojori pohnuataquiaari puetunjuanaa tahuajiniji. Coteenu pohnu-ataree na niqishano juhua na maquenujiniaari. Naa sequereeri:

⁵ —Joje tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niqiriini. Jiyareta cucujanaa roshinitiasareeri. ⁶ Cua niqishacari sonaquejinia cua niishiniuria casaate mii quiriqiaani, janiyari saa puereeta casami niqiriijiaani. Janiyari niqiriini jiy-ucua rucoojuaca, sacocujuhuj, jiyocuaanu jaacatujuacanio. Puetunjuanaari pa miaquesocoriquiano pa pueresano casaa quiriqiaa. ⁷ Janiyari jiyacari jiyocuaaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucaareeni: “¡Maja cua jiyaniijianaa! ¿Janiy-atucua taa miaquere sacuaraatia cua miaquesooni?” ⁹ Jiyocuaaanuji rupaari socua cua sequeruhuanii: “Pedronaa, majaari miaquesocoriquiano Pueyaso jiyatesano soonu”.

¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuaaanuuri. ¹¹ Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. ¹² Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojiniuucuatej, janiyari cunora juhuajaniya nojoritia quiaarucuaani. Nio seis parta Jesuucua tiuuniaa pueyari cuata quiojyarucuaajuhuj. Canaari mariyata cuno tahua tiajinia tiuquishiini. ¹³ Tia camaruuri canaa pohuatarucuaa taa na niqiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. ¹⁵ Saaja cua coteesacari Pueyaso rupaa pohuatanu nojori niqiara, Pueyaso Sohuanuuri nojoriicua niqianu, taa pocua coteenujuanaa na niqianucujani. ¹⁶ Janiyari jiyacari niishiquii pa Jiyaniijia sequesanonni. Naa na sequesantej: “Juanri moojinia tiuquinijiya pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. ¹⁷ Naacujitij, taucuaca tiuushacari pa Jiyaniijiaacua, Pueyasoori na Sohuanu niqitiorucuaa nojorijuhuj, taa na niqitiocanu pajaniyacuuaani. Cante Jesucristoocua tiuyani, Pueyasoori na Sohuanu na niqitioya. ¿Janiyatucua taa Pueyaso sequereruhuarini: “Maja cuno pojori niqitioy quia Sohuanu”?

¹⁸ Jerusalén tiacajinia quiniaa Pueyaso pueya jaara tojiquiaari naa Pedro sequesantej, nojoriiri sanaajetaquiaari. Tama nojorijiaarijia Pueyaso maninihuaqueetaquiaari. Naa sequetuquiaariiri:

—¡Pueyasojuhuanaja jiyanoohua maninia! Nojuajaari taucuaca panijayuhuj nojori tacatonura noojia sesa nojori miishanojiniji, jiyanooshano nojori quiniurijuhuj, pueyaraaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaricuaa, Judiocuacaari juhuacatecara Jesuucua tiuuniaa miiquiaari naquiyajuhuj. Queraatia Jesuucua tiuuniaa pueyari nocuaji mashiyocuatucuaari. Nojoriiri tiqiyocua niyaquejoquiaari. Noojiaqueyari na mashiyocuatucuaari tiuquiijoquiaari Fenicia jiyajinia. Tamasacaari tiuquiijoquiaari Chipre jiyajinia. Noojiaqueyari Antioquiya tiacajinia tiuquiijoquiaarijuhuaj. Nojoriiri tii pohuatanuquiaari Pueyaso rupaa Jesujiniji saa Judiucacaraja, maja taucuacaa. ²⁰ Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiijoquiaari Antioquiya tiacajinia, nojoriiri Jesujiniji pohuataquiaari Griegohua niqiarajuhuj. ²¹ Jiyaniijia Jesu cumaacaari nojoritia quiquiaarijuhuaj. Naacujitij, queraatia Griegohuari tariucuaaanu tama nojori niishishanojuaja cartequiaari, Jiyaniijia Jesu tojijiaca nojori quiniuria.

²² Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotucuaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jiyanoohua shuquiriquiaari na niquishacari taa Pueyaso miirucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijia nia qiri.

²⁴ Bernabeeri jiyanoohua maninia pueyano quiquiaari. Pueyaso Sohuanuuri noojia cumaquiquiaari jiyanoohua. Naacujitij, na pohuatasacari Jesujiniji, queraatia pueyari Jiyaniijiaacua tiuquiaari.

²⁵ Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriatucuaari, na jiyataquiaari Antioquiya tiacajiniaari. ²⁶ Nojori quishacari Pueyaso pueyata cuno tiajinia, nojoriiri tii shocotequiaari niqiriyatu marijia. Nojoriiri queraatia Pueyaso pueya niishitiojnuquiaari. Tii Antioquiya tiacajiniani, Jesuucua tiuuniaa pueyari coteenu sesojosaaquiaari “Cristiano”. Nioori pueyano rupaaajinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiujuiniaa pueyari tiuquijioquiaari Antioquiya tiacajinia. ²⁸ Tamonu nojorijinijini, na sesa quiquiaari Ágabo. Nojuajaari Jesuucua tiuuniaa pueya rerejonaa tajiniji nujuaquiaari pocuanura. Naa caminiujuquiaari Pueyaso Sohanu niishitosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaari Ágabo. Cuno miaajenuuri quiquiaari Claudio quishacari jiyaniijajanaa, Césartuhaj. Nojuajaari Roma tiacajiniji jiitiaquiaari puetunu jiyacajanaa.

²⁹ Antioquiya tiacajinia quiniaa Pueyaso pueya tojishacari naa Ágabo sequesantej, nojori-iri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitiaquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jiitiasanojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiitianaa niqutioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinijio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuuniaa miiquiaari naquiya. Noojiaqueya quiootequiaari na saniitosocoriquiano nujuatejojuajiniaari. ² Naa Juan tarajanu Santiago motequiaaricujaari nijiniaquetucuja mueruuta. ³ Judiocuacari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuahaj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoresocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootooquiaariiri; coteenu cuatro, na nuhuaji socua cuatro. Nojoriiri naa sanitijiootooquiaariti. ⁵ Pedroori maninia cojuasaaquiaari nujuatejojuajinia. Jiyacaritij, Jesuucua tiuuniaa pueyari saniniuujia nocuara secojonuuriquiaa jiyanohua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na nequesoresocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuahaj tohuateyaji cojuariquiaacujua. ⁷ Jiyacaritij, Pueyaso seruuri canashiyajiji coretaquiaari jiyareta Pedro shuriucujajanaa nujuatejojuahaj jiniacuma. Na shacantuucaari jiyanohua cuhuataquiaari nujuatejojuahaj. Pueyaso seruuri Pedro jiuuquirii na shuucujaji. Na niucujareeri. Na niucasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. ⁸ Pueyaso seruuri na sequereejuhaj:

—¡Quia cajiniocua camarucujua quia saatiri socua! ¡Quia sapatu quia cushirijuhaj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seruuri nuhuaji sacuariquiaajaa. Jiyanohua jiyajeneriquiaari. Majaari na niishiniu quiriqiaa puetunu na niquishanojuanaa. Nojuajaari jiyaniriqiaa na maquenujini niquiya naasucua. ¹⁰ Nojoriiri coteenu shocomaa na tacoji cojuanaa soldadohua. Socua na tacoji cojuanaa tajitiumiaajariuhaj. Naa quenaacoturee nujuatejojuahaj tohuateyajiiri. Nojuajaari Pueyaso seruta nujuatusee jiyareta tohuateyaji.

Tohuatayari cumueeca casaata shipinishano quiquiaari. Jiyacaritij, tohuatayari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuuara tiaca jiuujiaaco. Na nuhuaji, na shuriucuaji shaajequeri. ¹¹ Pedroori jiyacari shusha niishiqui. Naa sequereeri:

—¡Seetanujuanaaqui quiriquiaa! ¡Cua Jiyaniijiaquiiri na seru jiyaroree cucua, na mashiqiniuria janiya Herodescuaji, cuarta Judiocuacaacuajijihuaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tiajinia, queraatia Pueyaso pueyari Pedrocuara tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuatayaji. Tiaco seruuri na tojiquiaari piquiyano. Nio seru sesaari quiquiaari Rode, niyadoo. Nojuajaari juucua catecanoquiaari tohuatayaji, na niquiniuria cante quiriquiaani. ¹⁴ Nojuajaari saaja Pedro tojishii tia camaru jiyaniquiyano, na tiootiu na riatanura nocuaji. Niyadoo tojishacari seetanujuanaa Pedro rupaa, majaari tiootiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuatayaji nujuatej!

¹⁵ Pueyari saa niyadoo riucuaquiaarijia:

—¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaariuhua:

—¡Taaquiriirini! ¡Pedrocuaaquinatejaj, nooj nujuatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuacuaja.

¹⁶ Nojori nacojosacari tiaco, Pedroori tohuatayaji piquijoriquiaajaa. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriiquitiuquiaari. ¹⁷ Pedroori nojori sanaajaree jiyacari na juaashiquiata. Cuniqiu quiniaa pohuatareeri taa Pueyaso tohuaterohua nojuaja nujuatejojuajinjini. Pedroori naa sequequiaari nojoritij:

—Niocua naa pohuatare Santiagojuhuaj, parta Jesucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuajinia cojuanaa soldadohuari jiyanohua shiriiquitiuquiaari. Majaari nojori niishiniu quiquiaari taa Pedro miirii nujuatejojuajinjini nojori tajinjini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaaquiniucua Pedro!

¹⁹ Herodes niishishacari, na shuriucua nujuatunaa soldadohua jiyaroquiaariiri nujuatejojuajinia nojori pajenura Pedro. Nojori jaara na riuriataaquiquiaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequeree nojori shuriucuajini. Na nuhuaji, Herodesri jiyanohua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajinjini pacuquiaari. Cesareya tiacajinia quishiiri.

Herodes shaajenujijini pohuatasano

²⁰ Jiyacaritij, Herodesri jiyanohua juariquiaa Tiro tiacajinia quiniaa pueyata, Sidón tiacajinia quiniaatanio. Nio caapiqui tiacajinjini pueyari jiyaniijia Herodes tiajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequereeri:

—Quiocua quia jiyaniijia sequere, canaa nata jyanootioonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaariiaariuhua. Tiro tiacajinjini pueya, mariyata Sidón tiacajinjini, nojoriiri na cumaneecata masetujua na miaquesocoriquiano jiyaniijia Herodes jitasano pueyajinjini. Nojoriiri jiyamitia jecatoonu paniriquiaa cuno

jiyaniijiata, maninia nojori quiniuhuara nata, Herodes niqutiojotenuhuara na jiitiasano pueya na miajajaura Sidón tiacajinijinio pueya, Tiro tiacajinijinio pueyano. ²¹ Herodes seruuri nojori sequequiaariuhua:

—Niocuana tamonu juuca nimia, jiyaniijiata nia pocoojonura.

Na nuhuaji, cuno pueyari na sequesano juucajinia niqiaariuhua. Jiyaniijia Herodesri nojoriicuaqi maniniushiquiaari. Na maniniuqui toque cushiquiaariiri. Jiyaniijiaacujinio shipinishano cajitiujinia cajiriohuari. Tiji pocuaquiaari cuno pueyacuaari. ²² Puetunu cuniqui quiniaa pueya tojishacari naa maninia Herodes pocuaano nojori niqiaratej, nojoriiri nacoonu coteeqiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqi Pueyaso!

²³ Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴ Pueyaso rupaari saniniuujia socua niyacasaquiaari, tiqiyocua pohuatasacari puetunu pueya niqiarajanaa. Naacuajitij, Pueyasoocua tiuuniaa pueyari socua queraatiara caneqiaarijiuhua. ²⁵ Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jiitianaa, nojoriiri ritia quiojoquiaariuhua Antioquiya tiacajiniohuua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijiuhua Marco.

13

Saulo Bernabeeta rucanejonu coteesacari Jesujiniji pohuatanura tiqiyocua

¹ Antioquiya tiacajinia Jesuucua tiuuniaa pueyajinijinioni, noojiaqueyari quiquiaari Pueyaso sequenu panishano Pueyaso pueyara caminiuujinia. Quiquiaarijiaariuhua Pueyaso Rupaa niishitiojanaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijiosaaquiaari. Quiquiaarijiaariuhua Saulo. ² Tamonu juuca, puetunu nojorijianaari Pueyaso seconuuriquiaa. Cuno juucajuhua, majaari nojori miaquenuunu quiriqiaa socua na seconuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuaaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso seconuuriquiaa socua jiyanohuari. Na seconuunu nuhuaji, nojoriiri Bernabé nacaacua, mariyata Saulo nacaacua niatuquiaari na juashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohuua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nucauco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuca buquejinia Chipre jiyaniishano jiyajiniara. Chipre jiyari jiya tucuaatiaja, shoniniacu caminia juuujajinia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteeqiaari puetunu cuniqui quiniaa Judiocuaca sechojuuca tiajiniaqueyanaari. Juanri nojoritia quiriqiaajuhua, nojori naacuriquiano. ⁶ Naa nojori rucoojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuritaquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuaja Pueyaso sequenu panishano caminiuujinia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohuua niishijia quiquiaari. Nojuajaari Bernabé

masuuquiaari Saulonio, nojori pohanuana Pueyaso rupaa nojuaja. ⁸ Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niquiara cuaracashitiquiaari Pueyaso rupaa. Naa sequeere cuno jiyaniijiaari:

—Maja cuno pojori tojinu. Jiyanohua sesaari nojori pohanuana. Quia sapojotiuano.

⁹ Saulo sesaari Pablo quiquiaarijuhuaj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ —¡Sesaaca niyanu sequena! ¡Maninia miijiaa paracaajiana! ¡Casaara pueya quia tenujia Pueyasooajini? ¹¹ ¡Cua Jiyaniijiaari quiarjia quia saniitnutaniya! ¡Quiaari cariojuarura quiniutianiya seetanujanaa! ¡Quiaari pasaja tarishiniutianiya cariojuaru quia quishacari!

Jiyacari, juhua niniquiaari na namijiajina cajimaa. Cariojuarura quiquiri. Juhua ninishiqui quiaquejoquiaari puetunu cunocojuanaari, na juaashiquiajini na jaatucusaanura juucua. ¹² Cuno jiyaniijia jaara naa niquiquiaariti, Pueyasooa tiuuri na niquiara nojori pohanuana shanohua Jiyaniijia Jesujini.

Pablo, Bernabé quishacari Antioquiya tiacajinia, Pisdia jiyajinia

¹³ Pabloori na cojiniaata Pafos tiacajini quiaquiaari buquejina Perge tiacajinara, Panfilia jiyajinia. Juanri Perge tiacajinia cateseequiaari nojoriicua. Tiji riujuuquiaariuhua Jerusalén tiacajinihuari. ¹⁴ Na nuhuaji, Pabloori Bernabeeta Perge tiacajini quiaquiaari Antioquiya tiacajinia. Antioquiya tiacari Pisdia jiyajinia. Tii nojori quishacari, nojori samaatenu juuca quiaquiaari narta Judiocua seconuujua tiajina. Na tiuquishacari, cajitushiiri. ¹⁵ Jiyacari, tariucuaaanu Moisés Rootasanoori serojosaaquiaari. Tariucuaaanu Pueyaso sequesano caminiujunaa naajiotasanoori serojosaaquiaarijuhuaj. Na nuhuaji, rerejua tia camarnuuri naa sequequiaari Pablo, Bernabeenio:

—Cuarta Judiocuaanaa, niaa jaara Pueyasojinini nia niishishano casaa sequenu paniri, nia niishitiojore quiarjia niya quinia niquiara.

¹⁶ Pabloori sanequiaari. Na juaashiquata sanaajaree pueyari. Naa nojori sequeere:

—Nia tojitiare cuarta Israel pueyanaa, nijaniyajuahuaj, canapete Pueyaso tojitiajacuajani tamasa pueyapejini. ¹⁷ Paari sequequiaani: “Pueyasoori pa Jiyaniijia, Israel pueya pa quiniucua”. Seetanujanaa, paacuaari Pueyaso saquiriojosano pueyacuajini. Tariucuaaanu, Pueyasoori maniniushiquiari pa supuetanaa saquiriojoquiaari na pueyara quiriqiano. Na nuhuaji, jiyanohua pa supuetanaa canetequiaari Egipto jiyajinia nojori quishacari. Na nuhuaji, Pueyasoori nojori mashiquiaari cuno jiyajini na cumaacata. ¹⁸ Cuarenta marijiaari pa supuetanaa shoconujuquiaari pueyaracaanu nojori rucojosacari najuhua cariquia jiyajinia. Pueyasoori jiyacari nojori rejeretaquiaari na tojitiaquishacari nojuaja. ¹⁹ Na nuhuaji, Pueyaso cumaacata, siete tamaatiucua rupaa pocuajaca taucuaari puecoosaaquiaari Canaan jiyajini, saniniujia cuno jiya na niquitiosocoriquiano pa supuetanaa. ²⁰ Pa supuetanaa jaara Canaan jiya camaruhua quiquiari tari, socua cuatrociento cincuenta marijiaari nojori shoconujuquiaari saaja nequesoreena jitiacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujunaa quiquiaarijuhuaj. ²¹ Samuel quishacari, pa supuetanaari Pueyaso seconuujiaari na panitushacari jiyaniijia, nojori jitiariquiano nequesoreena niti. Naacuajiti, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiuhacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. ²² Na nuhuaji, Pueyasoori Saúl sojotaquiaariuhua Saúl tojiyaquiniucua nojuaja. Saúl niti David jiyatequiaariuhua Israel pueya jiyaniijia saniniurijia. Pueyasoori naa sequequiaari Davidjini, na timitiasacari nojuaja:

“Isaí niyanu Davidcuajiaari cua shuquiurijua. Nojuajaari cua panishano pueyano.

Nojuajaari puetunu cua panishano miiniutianijanaa”.

²³ Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niquiohuacuajinio supuenoni. Pueyasoori na seer-ataquiaari Israel pueyacuaji Tacuna quiriquiano, taa na sequequiaari tariucuacaanucujani. ²⁴ Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niqiarajanaa. Tiuquinijiona Juanri nojori sequequiaari noojia nojori tacatonuhuara Pueyasocua, naajuhuj, moojinia nojori tiuquinijiosaanura, Pueyaso tojjijara nojori qiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanoni taa nia jiyaniquiaa najuhuana janiyacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijajanaa cutara. Janiya maara jiyanohua shuquiriaatia quirini, nojuaja jaara cua seque na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ Cuarta pueyanaa, nijaniya cante Abraham niquiohuacuajinio pueyacuajani, cua tojitiare, nijaniyajuhuj taucuacanaa, canapute Pueyaso tojjijacuajani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiunio quiquiaarjijuhuj Pueyaso sequesano caminiujuninaa naajiotasano tariucuacaanu. Cunoori najuhuana nojori serojonuuasano puetunu samaatenu juucajanaa. Naacuajitij, nojori jaara moquiaari Jesu, maninia tohuateequiaariiri Pueyaso sequesano caminiujuninaa naajiotasano, taa Jesujiniji seque-saaquiaari tariucuacaanucujani. ²⁸ Jesuuri seetanujuanaa maja na miiniu quiquiaari sesa. Tama nojoriijarijia juhua sesa miijia na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹ Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinitiuquiaari niyacutesanojinijiri. Raaco na niatureeri. ³⁰ Naajaa, macu na quishacari, Pueyasoori saaja na samiitianiquiaariuhua. ³¹ Na samiitianu nuhuaji, Jesuuri sequeyarucua na pueyacia mueranacujuquiaari, noo pojoriicua canapute na tarajaquiaari na quiasacari Galilea jiyajiniji Jerusalén tiacajiniaruacuajani. Nojoricuajaari quiarijia nojuajiniji poojotaniuhua puetunu pueya niqiarajanaa.

³² Canaari timiyani canaa pohuatasacari nijaniya, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! ³³ Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia: “Quiaari cua Niyanucujaja. Janiyari quiarijia quia samiitianirini”.

³⁴ Pueyasocujajaari sequequiaari, nojuacuajaari na samiitianiniutianihua na moqueyaquiniucujaji na raaco. Nioori naajiotasano quiyajuhuj tariucuacaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcujani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijanaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. ³⁷ Noo Jesu saniniujia, Pueyaso cutaraari na samiitianiquiaariuhua. Majaari na moquenu quiquiaari cutara.

³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. ³⁹ Moisés Rootasanojinia, paari tariucuacaanu niishitiojosaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapute Jesuucua tiuya saniniujia, nojoriiri puetunu

sesa na miishanojinijijianaa jiyanooshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaca saniitionutaniya taa tariucuacaanu Pueyaso sequesano caminiujuiniaa sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyan. Tamasaca jaara nia pohuatate, niaari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniataa. Taucuacaari tii quiriqiaajuhuj. Nio taucuacaari Judiocuacaacia pacunaa quiquiaari, Judiocuaca nojori quiniurijuhuj, Pueyaso sequesano tojtianaara na quiniuria. Nojoriiri Pablo sequequiaari, Bernabeenio:

—Niocua tamonu sábadó canaa pohuatateeruhuj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucacajinijinio Judiocuacaacia pacunaanio. Cuno nojoriiri maninia Moisés niishitiojosano tojtianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasoocua tiuujiaca nia quiri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejoquiaari. ⁴⁵ Judiocuaca secojojua tia camarucua jaara niquiquiaari queraatia pueya na rerejojuajinia mishiyano, Pablo pohuatasano na tojtianura, nojoriiri juaaquoquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojtijacara quiniutianiya. Pa tojiyaquiniutianiya saniniurijia.

Naa sequeturiquiaa pueya niqiara Pablojinijijaariuhuj:

—¡Pabloori maja maninia na niishiniu Pueyaso rupaa! ¡Najuhuaana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocacanaa. Canaacuajaari naa panitiaja nijaniyatej, Pueyaso rupaa canaa coteetanura pohuatanu nijaniya, Pueyaso saquiriojosano Judiocuaca nia quiniucua. Niaacuajaari saa na ruuretareeja. ¡Majaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniujia taucacaacia quianutaniyani, Pueyaso rupaa canaa pohuatanura nojori niqiara. ⁴⁷ Canaa Jiyaniijia jaara canaa jiyaramiquiquiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janiyajiniiri caminiujiushaanutaniya taucuaca niqiara puetunu jiya puequeetujinijianaa, Pueyaso jiyanooniuria nojorijuhuj”.

⁴⁸ Cuniquí quiniaa taucuaca jaara naa tojiqiaari sequeshyanotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanhua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriqianocujani, pueyaracaanu nata rishiniuriacuajani, jiyacaritij, nojoriiri Jesuucua tiuuquiaari.

⁴⁹ Jiyaniijia rupaari pohuatasaquiaari puetunu cuno jiyajinijianaa. ⁵⁰ Judiocuacaari na juaaniutia Pueyaso panijia maajipohua shiniujuquiaari na cojitiuniuria nojori, nojori miiniuria naqiya Pablo, Bernabeenio. Naa rootatuquiaari cuno tiacajiniji camarucuaariuhuj, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na niocuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeecua na tiuutianu quiniutianiya Pueyaso jiyanoaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵² Jesuucua tiuunaa pueyari saniniujia shuquiriaatia jateequiaari Antioquiya tiacajinia, nojori jitiiasacari Pueyaso Sohuanu.

Pablo, Bernabé quishacari Iconio tiacajinia

¹ Pablo, Bernabeeta naa miiquiaarijiuhua Iconio tiacajinia. Nojoriiri narta Judiocuaca rerejoia tiajinia tiuquitiaquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuquuaari, Judiocuaca, taucuacanio. ² Noojiaqueya Judiocuacajinijinoori maja na tojinu paniniu quiquiaari Jesujiniji pohuatasano. Cuno pojoriiri taucuaca shiniuquuaari nojori juaaniuria Jesuucua tiuuniaa pueya. ³ Pabloori, Bernabeeta cunora socua jiyojequiaari pueyaracaanu cuniqui, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujuanaa, Jiyaniijiaari nojori naacuquiaari jiyanohua cutara maninia miishano nojori miiniuria, pueya naatanijionurajuhuj. Jiyaniijiaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. ⁴ Cuno tiacajinia quiniaa pueyari raquitiuquiaari. Noojiaqueyari tama narta Judiocuaca tojiuquiarajiaaja. Saniniuujia, tamasaacari Jesu jiyaramiquishano pueya tojijiaa quiquiaari. Nojoriiri naa quiquiaari cuno tiacajinia. ⁵ Naa nojori quishacaritij, Judiocuacaari taucuacata rojotooquiaari cuno tiacajinia jiyaniijianucuata. Naa rojotooquiaari nojori sesacanura Pablo, Bernabeenio, na jacutunura saitiajuhuaj. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuquiaari Licaonia jiyajiniara. Nojoriiri Listra tiacajinia quiojoquiaari, Derbe tiacajiniaranio, cuno caapiqui tiaca shocua quijiaa tiacajiniajuhuaj. ⁷ Nojoriiri tii poojotaquiaari Jesujiniji nojori niishishano.

Listra tiacajinia pueya jacutusacari Pablo saitia

⁸ Listra tiacajinia quiquiaariiri sesarunocua pueyano. Majaari na rucuanenu quijia. Nojuajaari na rasaquiaarijuhuanajaj. Majaari na pooniniu quijia na cajitiujiniji. ⁹ Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuanaa tiuuriquiaa na pohuatasanoocua. Naa Jesuucua na tiuuniucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jiyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri. ¹¹ Cuno Licaonia pueya jaara niquitiuquiaari naa Pablo miishanotej, nojoriiri tama na rupajiniajaaja sequetuquiaari:

—¡Cumaacaraca quijiaacari juhua pueyasohua pocua rosetareeni, juhua pueya niquis-hano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanohua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jitiiasano juhua na pueyasohuara cuno jiyajinia. ¹³ Júpiter secojoia tiaari Listra tiaca tohuateya shuriucua quiquiaari. Jiyacaritij, Júpiter secojoia tia cojuanaari juyaca jaatucunuquiaari, Pabloori nojori puecosocoriquiano Bernabeecuaranio, juhua nojori pueyasohuacuara. Maniniushitajara naana shuucua shiyosano patootaquiaarijiuhuuaj. Cuno pueyanoori puetunu pueyatajanaa Pablo, Bernabé shuquiritanu paniriquiaa juucua, juyaca na puecosacari nojoriucua juhua Pueyasocuara. ¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaari nojori miiniu panishano nojori tarinitianura. Pabloori naa nacaquiaari puetunu cuno pueya tojihocoriquianojuanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa nijaniy-acuaani! ¡Canaari naacua niyarucuaa niaacuatej canaa sequenura nijaniya, puetunu nio najuhua nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na

shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuaa na puecoonu panishano juyaca.

¹⁹ Jiyacaritij, Antioquiya tiacajinjiniio Judiocuacaari tii tiuquijioseequiaari, Iconio tiacajinjiniio. Nojoriiri cuniqui quiniaa nasojosee Pabloocuaa, Bernabeecuaranio. Cuniqui jacutreee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiquiaari tiacajiniji tamamaari. ²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pahuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujuutiaciaariuhua. Tiuquijioquiaariuhuari Litra tiacajinia, Iconio tiacajinia, Antioquiya tiacajiniano. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuee Pueyaso shuriucua quiriqianoni, nojoriiri naquiya miinitianiya mijiria.

²³ Nojoriiri maninia Pueyaso tojjijaca pueya saquiriojotuaari, nojori jiyatesocoriquiano Pueyaso pueya jiitariquiano. Naa miitiquiaari puetunu cuno tiacajinijanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocuaa:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiitianura maninia.

Pablo tacatesacariuhua Bernabeeta Siria jiyajinia Antioquiya tiacajiniana

²⁴ Nojori riujuuniuhua Antioquiya tiacajiniohuara, Pisidia jiya shocotumohuari. Na nuhuaji, tiuquijioquiaariuhua Panfilia jiyajiniaari. ²⁵ Tii Pueyaso rupaa pahuatatuquiaari Perge tiacajiniaari cuno pueya niquiaa. Nojori pahuatanu nuhuaji, Atalia tiacajinia quiojoquiaarijuahuaj. ²⁶ Cuniqiji, buquejia jaaretatuquiaari Antioquiya tiacajinaraari. Cuno Antioquiya tacaari quiquiaari tee cuniqui narta Pueyaso pueya niaquiaari nojoricua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pahuatanura tucuaa. Cunoori quiquiaari shushajanaa nojori coteenu panishacari rucuanefonu tamaquicua. Naacujitij, nojori tohuateenu nuhuaji puetunu Pueyaso panishanojuanaa, jiyacari shusha tiuquijioriquiohuari. ²⁷ Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijianaa. Cuniqui pahuataturee puetunu nojori niquiarajanaari, taa Pueyaso naacucanu maninia nojori pahuatasacari Jesujinjini. Pahuatanuquiaarijuahuaj taa Pueyaso taraajetequiaari tucuaa jiuujiani, Jesuucua nojori tiuuniuriajuhuaj. ²⁸ Pabloori, Bernabeeta cuniqui tarishiquiaarijaara narta Jesuucua tiuuniaata.

15

Jesuucua tiuuniaa jiitianaa nacoosacari Jerusalén tiacajinia

¹ Jiyacaritij, Judea jiyajinjiniio pueyari Antioquiya tiacajinia quiojoquiaari. Nojoriiri tii seaa niishitiojonu coteequiaari cuniqui quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniaa pueya cuaara na cararaatiuquua co miatejoteera, taa Moisés niishitiojoquiaaricujani! ¡Jaara mialesoo quiri, majaari Pueyaso jiyanooniu quiniutianiya jiyanotej, na pueya nojori quiniuria!

²Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanoehua. Naacujitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canaacujajani?

³Naacujitij, Pabloori Bernabeeta jiyarosaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pahuatanumaquiaari taa taucuaca cartequaari tama sesa nojori miishanojuaajani, Pueyaso tojjiara nojori quiniuria. Jesuucua tiuuniaa pueya jaara naa tojiquiaaritij, nojoriiri jiyanoehua shuquiriquiaari.

⁴Nojori tiuquijiosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pahuataquiaari puetunujuanaa, naajuhuj, taa Pueyaso naacujiaari maninia nojorini, nojori pahuatasacari taucuaca Jesujiniji. ⁵Cuniqui quiriqiaajaariuhua Fariseocuaca, tariucua Jesuucua tiuujiaca. Cuno pojoriiri rerejonaa tajiniji nujuatquiaari. Naa sequeureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjiara quiriia, taa Moisés rootaquiaari tariucuaaanucujajani.

⁶Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiitianaata. Nojoriiri maninia niishiriojonuuquiaari taa na miiniutianiyan. ⁷Naa pueyaracaanu nojori pocoojosacaritij, Pedroori socua nojori tajiniji nujuatquiaari. Naa nojori sequeureeri:

—Pueyanaa cua tojitiare. Niaacujajari niishiya, pa Jiyaniijiaari cua saquiriojquiaari na rupaa pahuatariquiano taucuaca tojishocoriquiano, nojori tiuuniuria Pueyasocujuhuj.

⁸Pueyasocujajari poojia niishijia. Nojuajaari cuno taucuaca niishitioquiaari, nojuajaari nojori jiyateere na pueyarajuhuj, na Sohuanu na niqitiosacari nojori, taa na niqitioquiaari pajaniyacuaani. ⁹Majaari nia jyaniniu Pueyasoori saaja Judiocuaca paniya. Pueyasoori maja rimajata na paniniu. Nojuajaari puetunu pueya panijajanaa. Cuno taucuaca jaara nocua tiuquiaari, nojuajaari nojori jiuujia jeequerejuhuj saaja Jesuucua nojori tiushacari. ¹⁰Naa nia tamacasacari taucacajinijinio parta Pueyaso pueyatej, niari Pueyaso miishano sojotaaruhua. ¿Casaara nia tamacaa Pueyaso miishanoni? Niaari quarijia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojquiaaricujajani. ¹¹Paari niishiyani pa Jiyaniijia Jesuuri pa jyanoojia. Naaratej, pa jyanooquiaari, na pueya pa quiniuria. Mariyata naa miiquianu cuno taucacajariuhuj. Majaari seetanujanaa maninia pa miiniu quiquiaari pa jyanoošanaura.

¹²Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pahuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. ¹³Naa nojori pahuatanu nuhuajitij, Santiagoori sequequiaarijuhuaj:

—Cuarta Pueyaso muerasunaa, cua tojitiare. ¹⁴Simón Pedrocuajaari tari pa pahuataree taa Pueyaso coteecanu shusha na Sohuanuta poonijionura cuno taucuaca jiuujajiniani. Pueyasocujajari nojorijinijinio jiyateya seetanujanaa na pueyara, nojori maniniuhuaqueetanura nojuaja. ¹⁵Seetanujanaari nio. Naajuhuj, tariucuaaanu Pueyaso se-
quenu panishano caminiujuiniaacujajari naa naajionuutaquiaari Pueyaso sequesantej:

¹⁶“Janiyari David niquihuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijajanaa quiriqiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷Naacujitij, puetunu

taucucajanaari cua pajenuunutaniya, noo pojori teyano cua saquirojoquiaari tar-
iucuaaanucujani, nojori jiyatesocoriquiano na Jiyaniijara janiya'. ¹⁸Jiyaniijiaari
naa sequeyaquij. Nojuajaari tariucuaaanu pueya toquiaari nio".

¹⁹Naaratej pueyanaa, janiyari nia sequeyani, nareja nia niqiri cuno taucua, Jiyaniijia
Jesuucua tiuuniani. Majaari nojori najiuitiniu Pueyasooquaji, nia tojitiniu panishacari
nojori tariucuaaanu Moisés niishitiojosano. ²⁰Nareja nojoriicuaa pa naajiore. Pocua
pa naajioneejinia sequere nojorini, maja tari nojori miaquenuunura shipinishano pueya-
soocuaa na puecootusano casaa, juunu, borregonio. Cuaara quituuria saa necocuataja,
maja tamonu na numuetucunura socua. Jaara shu miaquetunu paniri, cuaara na
miaqueera puetunu na nanaca caatinijiasanojuanaa, naajuhuj, maja na miaquenuunura
casami nanaca. ²¹Puetunu nio cua sequesanojuanaari parta Judiucuaa tojishano. Cuno
niishitiojosanoori pueyaracaanu parta Judiucuaa rejejojuaca tajiniaqueya naa sero-
josaaquiaa Moisés naajioneejiniji puetunu samaatenu juucajanaa, puetunu tiqiyocua
tiacajiniajanaa.

²²Naa nojori pocoojonu nuhuajitij, Jesu jiyaramiquishano pueya, puetunu tii quiniaa
Jesuucua tiuunaa pueyajanaano, nojori jiiitianaajuhuj, puetunu nojorijianaari mariyata
niishiriojonuuquiaari. Naacuajitij, nojoriiri narta Pueyaso pueya saquirojotuquiaari
na jiyarotusocoriquiano Antioquiya tiacajinia Pablota, Bernabeetanio. Jiyacari saquiro-
josaaareeri Judas, Silasnio. Judas sesaari Barsabás quiquiaarijiiuhuj. Cuno pojoriiri
Jesuucua tiuunaa pueya tojishano quijia cutara, cuniqui Jerusalén tiacajiniani. ²³Nojoritia
jiyarotasaaquiaariiri naajione. Cuno naajioneejiniaari naa sequequiaari:

"Niaacuara naajionaani, canaari Jesu jiyaramiquishano pueyani, Jesuucua tiuunaa
jiiitianaano, Jerusalén tiacajinia niarta Jesuucua tiuunaa pueyajuhuj. Canaari nia saruhu-
ataani pueyanaa. Taucua nia quishacari, naajaa. Jesuucua tiuunaa nia quishacari,
niaari canaa tapueyocucajuhuj, tiqiyocua Antioquiya tiacajinia quijiaa, Siria jiyajinia
quiniaano, Cilicia jiyajinia quinaajuhuj. ²⁴Canaari nijaniyajiniji pahuatasaarucuaani,
niiquiji pueyanaari niaacua quiacanu. Canaa nia jiyanoori. Majaari canaa jiyaronu
quiquianu nojori. Cuno pojoriniaari nia taajetecanu tamaatia nojori niishitiojosacari
nijaniya. Naajuhuj, nia cushitocanuuri nojori sequesacari nia cararaatiuuquia co nia
miatejonura taa Moisés niishitiojoquiaaricujani. Nojoriniaari nia shiniujuquianu nia
tojitianura socua Moisés Roodasanojuhuaj. Quiarijia maja naate pueyanaa. ²⁵Naaratej,
saa jiyareta canaajaari nia rejeoreeni canaa niishiriojonura canapue canaa saquiro-
jonutaniyani niaacua jiyaramiquishocoriquiano. Canaari nojori saquirojoree tarini
canaa jiyarosocoriquiano Pablota, Bernabeetanio, nojori pocoojoriquiano maninia niaata.
²⁶Canaa panishano pueya Pablo, Bernabeenio, nojoriiri tama na cuaqueya panitiaquiaar-
ijiaaja Jesujiniji nojori pahuatasacari tiqiyocua. ²⁷Quiarijiani, canaari niaacua jiyaroya
canaajininijio canaa saquirojosano pueyani. Nojoriiri Judas, Silasnio. Nojoriiri nia
sequenutaniya casaa nia miinutianiyani, naatej, taa canaa pocoojoree canaa rejeosacar-
icujani. ²⁸Canaa niishiriojosanoori maninia quiya Pueyaso Sohuanura. Canaari na
shuquiritiaajuhuj. Majaari canaa cushitocanu paniniu nijaniya puera canaa supuetanaa
niishitiojosanota najuhanaj. ²⁹Canaari saaja nio nia sequenu paniyani pueyanaa. Nia
tojitiare. Majaari socua nia miaquenu shipinijosano pueyasohuacuara puecoosano
casaa. Majaari nanaca miaquenu. Naajuhuj, nia jaara shu miaquenu paniri, nia
miaquere maninia na nanaca caatinijiasano. Naajuhuj, saaja nia niquicohuata nia
quiriquia. Majaari socua tamonu numuetucunu. Naa jaara nio tojjiaa quiri, niaari maninia
miyacuaaja. Tariucuaaja pueyanaa".

³⁰Naacuajitij, cuno cuatro pueyari jiyarosaaquiaari Jerusalén tiacajiniji. Jaara
tiuquijioquiaari Antioquiya tiacajinia, nojoriiri puetunu Jesuucua tiuunaa pueya-
janaa numotejoquiaari na rerejonura. Puetunu nojorijianaa jaara tari rerejoquiaari,
jiyacari niqitiosaaquiaariiri cuno naajione puetunu nojori niquiarajanaa serojoso-
coriquiano. ³¹Naajione jaara serojosaaquiaari, puetunu Jesuucua tiuunaa taucua-
cajanaari shuquiriquiaari jiyanoohua. Naacuajitij, nojoriiri noojia cajitiquiaariuhua

tacaquioyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujiuniuria. Naacujitij, nojoriiri Jesuucua tiuunias pueya cumani-jiaciaaari jiyanoehua. Na rootatuquiaari maja nojori tarinitianura Jesuucua tiuuniu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacarihua Jerusalén tiacajinihua na jiyaronaacua, Antioquiya tiacajinia quinaa Pueyaso pueyari nojori sequequiaari:

—Maniniacujaja. Juhuajaniya nia quiaarohuaqui.

³⁴ Silasri saaja na cojiniaacujaji jateequiaari cuniquijia Antioquiya tiacajinia. Naacujitij, Judasri tamajaaja tacatequiaarihua Jerusalén tiacajinihua. ³⁵ Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuunias pueya niishitioquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pohuataquiaari tamasaca niqiarajuhuj.

Pablo pacutenu panishacarihua quianu Pueyaso pueya na niqiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocua socua niqiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuunias pueya quiyani.

³⁷ Bernabeeri na riucaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. ³⁸ Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaaranuhua? Nojuacuajaaari pa tiu-jiaciaarihua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacujajaa.

³⁹ Saa nojorijiaari socua juayonuutaquiaari Juan Marcoocua. Nocuaji Bernabeeri jiyacari Pabloocujaji rupatequiaari. Na rupatesacari na rupeua Pablojiniji, nojuajaari Juan riqiiaari cutara na tarajariquiano. Jiyacaritij, tama nojorijiaarjia buquejinia quiaquiaari Chipre jiyajiniara. ⁴⁰ Pabloori saniniujjia Silas saquirojoquiaari na tarajariquiano. Nojori quiaaquishacarijia, Jesuucua tiuunias pueyari nocuara Pueyaso secojotuquiaari. Naa na miituniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹ Nojori quiasacari Jesuucua tiuunias pueya shiniujiuniucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuunias pueyari.

16

Timoteo cojishacari Pablo, Silasnio

¹ Pabloori Silasta tiuquijioquiaari Derbe tiacajinia, Litra tiacajinianio. Tii riuri-atatuquiaari Timoteo jyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunijuhuj. Timoteo queeri tahue quiquiaari cutara. ² Litra tiacajinia Jesuucua tiuunias pueyari Timoteo maniniucuatujua. Naa sequetjuuajari nojori: “Timoteori jyanohua maninia pueyano”. Iconio tiacajinjio Jesuucua tiuunias pueyari naa sequetjuajuhuj. ³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuquia co miatequiaariiri, cuno jiyajinia quinaa Judiocuaca sojotanuucaari nojuaja. Puetunu pueyajaanaari na niishijia, na queeri seetanujuaanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuunias taucua niqiquiaari puetunu tiacajinijanaa. Nojori niqiaari caminiujiuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuunias pueya jitianaa sequesanojuhuaj. ⁵ Naa Pablo caminiujiushacaritij, puetunu Jesuucua tiuunias pueyajaanaari socua noojia cumaquiquiaari jyanohua. Tamasacaari socua Jesuucua

tiuquaaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumano. ⁷ Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuaaj, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. ⁹ Pabloori cuno niucua juhua na maquenujia niquiquiaari Macedonia jiyajinijinio pueyano nocua nujuuano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰ Naa Pablo niquniu nuhuaji juhua na maquenujiatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequi! Pueyasocuaajari pa panitiaa Jesujiniji pa pohuatanura cuno pueya niquiarajuhuaaj.

Pablo quishacari Filipo tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaati-ajaaquia tiuquishiini. Canaari cuniquiji sanequiaari tariquiniuhuaaj, tiuquishiiri Neápolis tiacajinia. ¹² Canaari cuniquiji quiaamaa Filipo tiacajiniani. Filipo tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiora. Canaari tii camueenujuquiaari rupaquijiani. ¹³ Cuniqi canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiitiquiaari Pueyaso secojonura. Canaari tii narejashiquijia cajitiuquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiaara pohuataree Jesujinijini. ¹⁴ Cuniqi maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niquitiojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojinuria maninia. Jesuucua tiuuriiri. ¹⁵ Na nuhuaji, Lidiaari puetunu na tiajinia quiniaatajanaa tiuquinijiosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojjiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonuujuajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhua maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuaaanuji Jiyaniijajiniji pohuataanaa! Nia niishitiojijari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajiniji quia tohuatare!

Naa Pablo sequesacartij, samaruuri na tojiqiaari. Ritia tohuataquiaari cuno niyacoo-jinijiiri.

¹⁹Cuno niyadoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyadoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuuquiaari tiaca jiuujiajinia curotasano pueya cajitiucujajiniaraari. Tiaca jiyaniijianucuaari tii quijiaca pueyaracaanu, nojori jitianura pueya. ²⁰Niyadoo camaruhuari Pablo, Silas nujuatejoquiaari tiaca jiyaniijianucuaa tacoji, cuniqui na nequesoreesaanura. Jiyaniijianucuaa sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiose. ²¹Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

²²Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jyanohua, na jocojosacari nojorijiniji. Na nuhuaji, tamasaari seeratasaaere nojori na mojoonura macata. ²³Jyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojuua tia camarnu seeratasaaereeri maninia na cojuatenura nojori nujuatejojuajinia. ²⁴Naacuajitij, cuno nujuatejojuua tia camarnuuri Pablo, Silas nujuatejoquiaari socua mij, nujuatejojuua cariquimiatej. Cuniqui nujuatejosaaquiaariiri tii na cojuasaanura maninia, na mashiyocuatunuucujaj. Nojori cashacuaari suruhuatuneecca quejasano tajiniocoma saatijiosaaquiaarijuhuaj.

²⁵Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maninihuaqueetaturiquiaari na jaaquequejosanota. Cuniqui nujuatejosano pueyari nojori tojitiariquiaa. ²⁶Jiyacartij, rijiaari canashiyaquiji jiuuquiutiaquiaari jyanohua cuno nujuatejojuua tia. Puetunu na tiotiuhuajanaari riataquequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷Nujuatejojuua camarnuuri ritia niucuaquiaari. Saaja niquirii puetunu tohuateya riataquenoujanaari. Cunora, na nijiniaquetucujaja mueruu shitiaree ritia na shuucujajiri tama na cuaqueya na miaquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashiyocuatunee. ²⁸Pablo jaara na niquiquiaari, nocua nacareeri:

—¡Maja najuhuana naa miiniutij! ¡Canaacuajajari puetunjuanaa niya quiyani!

²⁹Nujuatejojuua camarnuuri na shiriqiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojuua jiniacumara. Pablo, Silas cariquimijaj mojoquetaseeri. ³⁰Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinjia, Pueyaso jiyanooshano cua quiniuriajuhuaj?

³¹Nojoriiri na riucuree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³²Naaratej, Pabloori Silasta na niqiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³Jiyacartij, nujuatejojuua camarnuuri cuno niucujaja Pabloocua jiyanoocuaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari moojinia Jesuucua nojori tiushacari. ³⁴Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojuua camarnuuri jyanohua shuquiriaatia quiriqiaa puetunu na tiajinia quiniaatajanaa, Pueyasoocua tiuuniaa nojori qishacari.

³⁵Cuno tariqui, Filipino tiaca jiyaniijianucuaari na seya jiyaroquiaari nujuatejojuua tia camarnuucua, na sequenura nojuaja cuaara Pablo, Silas tohuatanijioora tari. ³⁶Nujuatejojuua camarnuuri Pablo sequeese:

—Tiaca jiyaniijianucua cucua jiyaroree na rupaani, cua cartenura quiarijia nijajaniya. ¡Juhujajaniya nia quiaarohuaqui!

³⁷Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhujaj? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu

quiriucuaa. Canaari jiyanojuua nujuatejosaarucuaani. ¿Taa na miituniu paniya quiarijia canaarini, jiyasohuaja tohuatejonu paniniu? ¿Jiyasohuaja mojooturiquiaacuaa canaatu-cuaa? ¡Nojorijianaa cuaara niiria quiarijia, niiquiji nojori tohuatejonura canaa!

³⁸Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipo tiaca jiyaniijianucua niquiaraari. Nocuaji jiyaniijianucuaari puere-tuquiaari nojori niishishacari Pablo, Silas Romano pueya quiquiaarijuhuaj. ³⁹Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuaara quio-joora quenaaja nojori tiacajiniji. ⁴⁰Naacuajitij, Pablo, Silas jaara tohuareetaquiaari nuju-atejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuuniaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

17

Tesalónica pueya juaashacari Pueyaso pueya

¹Pablo rucuanesacari Silasta Jesujiniji nojori pohuatasacari, nojoriiri jiyacari shoconujutuquiaari Anfipolis tiaca, Apolonia tiacanio. Naa tiuquiiijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. ²Taate Pablo quiijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pohuataquiaari Pueyaso rupaari. ³Pabloori nojori niishitiojoquiaari taa tariucuaaanu Pueyaso sequesano camini-ujuninaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuatejequiaari Jesu jaara naquiya miishaaquiaari, naajuahuaj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

⁴Jiyacaritij, noojiaqueya Judiocuacaari Jesuucua tiuuquiaari. Queraatia taucuaacari Jesuucua tiuuquiaarijuhuaj, canapute tari Moisés niishitiojosano tojjijiaa quiquiaar-icuajani. Queraatia cuno tiacajinia quiniaa pueya tojishano maajipohuari Jesuucua tiuuquiaarijuhuaj. ⁵Pueyasocua tiuyashijiaa Judiocuacatej, nojoriiri juaaquiopiaari juhua shocotano nojori quiniucua. Nocuaji, nojoriiri sesa mijijiaa taajecori masu-unujuquiaari. Nooj, nareja rucoojuaca tiacaacacotej. Cuno pojoriiri masuusaquiaari nojori na cojiniuria, tamasaca nojori nasojonura. Na nuhuaji, puetunu cuno pojori-jianaa jaara tonujutooquiaari taa na miituniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquioyano pueya nojori niqutiosocoriquiano. ⁶Nojori jaara na riuriataaquiopiaari, noojiaqueya Jesuucua tiuuniaa pueyari Jasón ta cojiritiasaquiaari quioonu. Cuno tiacajinia jiyaniijiacuacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquiiijioreejaariuhua naa na miiniurajuhua! ⁷¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojtiaashijiaa! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

⁸Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquiopiaari. ⁹Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajiniinjio. Naa sequereeri nojoriiri:

—¡Pablo jaara niiquiji quiaaquiri, majaari canaa niqutionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata cartequesaquiaariuhua.

Berea tiacajinia Pablo quishacari Silasta

¹⁰Cuno niucujaja, cuno tiacajinia quiniaa Jesuucua tiuuniaa pueyari Berea tiacajiniara mashiquiaari Pablo, Silasnio. Berea tiacajinia na tiuquiiijosacari, cuniqui quiniaa Judiocuaca rerejojua tiajinia quiojoquiaariiri. ¹¹Cuniqui quiijia Judiocuaca cutaraari

maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pahuataquiaari nojori niquiara, nojoriiri maninia tojtiaquiaari na pahuatasano. Na nuhuaji, puetunu juucajanaa, tama nojorijiaarijia tariucuacaanu Pueyaso Rupaajinia naajiotasano pajenuquiaari, nojori niishiniuria seetanujanaa quiriquiaate Pablo niishitijosano. ¹² Naacuajitij, queraatia Judiocuacaari Jesuucua tiuuquiaari, queraatia taucacanio, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pahuataseecuahuaj, nojoriiri nocua quiojoquiaari nojori taanuunura nojuaja cuniquijijuhuj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria. ¹⁴ Nocuaji, Jesuucua tiuuniaa pueyari cuniquiji ritia mashiquiaari Pablo shoniniacu caminiajiniara. Silasri Timoteota Berea tiacajinia jateequiaari saaja. ¹⁵ Berea tiacajinijinio pueyari Pablo mashitiquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaarihuua cuniquiji Berea tiacajiniohuara, Pabloori nojori sequequiaari: —Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucuanesacari pueya na sashishacari, Pabloori niquiquiaari tama cuno pueya shipinijosanojuaaja na pueyasohuara. Nojori shipinijosanoori puetunu cuno tiacajinijanaa quiriquiaa. Pabloori cunora jyanohua tacaquiaari. ¹⁷ Pabloori Jesujiniji Judiocuaca poojotaquiaari nojori rerejonuuja tiajinia, noo pojori taucacajuhuj, canapuee Pueyaso tojtiajaca quiquiaaricujani. Naajuhuj, Pabloori cuno tiaca jiuujiajinia pueya cajitucuaa curotasanojinia pahuataquiaari Jesujiniji cuniqui quiniaa niquiara. ¹⁸ Tamasaca niishijiaacari Pablo pahuatasacari Jesujiniji tojtiaariquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jyanishano niishijia niishitijosano tojtiajaca nojori quiniucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaari Zenón jyanishano niishijia niishitijosano nojori tojiniucua. Pablo pahuatasacari nojori niquiara, nojoriiri maja na niishitiniuu quiquiaari casaa na pahuatariquiaani. Nocuaji tama nojorijiaarijia sequetooquiaari:

—¿Casaariquitijia cuno paateca pahuataa pajaniyatejaj? Najuhua pocuaa pueyara-caanuuri.

Tamasacaari saniniuujia sequetuquiaari:

—Tamasaca pueyasohujiniji poojtana juhuanaruhua.

Nojoriiri naa sequeriquiaa Pablo pahuatanuucua Pueyaso rupaa Jesujiniji, mariyata taa cusonuuno samiitiaconutaniuhua. ¹⁹ Na nuhuaji, nojoriiri Pablo jiyataquiaari tuhananujiniji, tee nojori jiitiquiaari rerejonuunucujani. Cuno tuhananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pahuataqueeruhuj. Canaari quia pahuatasanojiniji socua maninia niishiniuu paniani. ²⁰ Quiaari jiyajeneta sequeriquiaa canaa niquiara quia pahuatasacari. Quiaarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miitiniuu quijia. Saaja quiarinio sequesanojiniji niishitiniuu panijiaacari.

²² Jiyacaritij, Pabloori Areópagojiniji nujaquiaari na pahuatanura na tojtianu panijiaacari niquiara. Naa coteereeri:

—Atenas tiacajinia quiniaa pueyanaa, janiyari quiaarijia niishiyani, niaaqui pueyasohuacua jiaatiajaca jyanohua. ²³ Janiyari naa nia sequeyani pueyanaa, cua niquiniucua queraatia nia shipinijosano pueyasohua, cua rucuanesacari nia tiacajinia. Naajuhuj, janiyari saajiajiniji nia shipinishano juhua juhuacutura niquiriucuaajuhuj. Nocua naajioori sequeya, “Niishishoo Pueyasora”. Cuno Pueyaso niaa na tojtiaquiaa na niishiyaquiniutiani, nojuajaari nio Pueyasocuaa janiya nia pahuataani.

²⁴ Cuno Pueyasoori nio jiya shipiniquiaaricujaja, puetunu pa niquishanojuanaano. Nojuajaari jiyocuaaanu camarnujuhuaj. Nojuajaari puetunu tiqiyocujajanaa Quijia. Majaari pueya tiajosano secojoja tiajinia na quiniu. ²⁵ ¿Taa nia jiyaniyani pueyanaa, cutara Pueyasojuaate pa jiiitasano casamijiniji panijajuhuj? Maja. Nojuacujaari puetunu pa jiiitasanojuanaa shipiniquiaari puera. Pa rishiniuria, na Sohuanujiniji pa niquitioquiaarijiaariuhuj, pa rijiosocoriquiano paratunio.

²⁶ Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarijia sequequiaari tee pueya quiniutianiyani. Sequequiaarijiaariuhuj taacari tii pa quiniutianiyani. ²⁷ Pueyasoori naa panitiaquiaaricujaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyani pa riuriantanura nojuaja? Pueyasocujaari maja na quiniu tucuaaanu pajaniyajiniji. ²⁸ Pueyasoori pa samiitianiya. Pa cumaquiquiaajaariuhua pa poonijionura. Pa rishitiquiaajaariuhuj. Naatej, taa nia pohuatajaca sequequiaaricujani: “Paari Pueyaso muerasuni”. ²⁹ Paa jaara seetanujuanaa Pueyaso muerasu quirini, majaari socua pa jiyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajajiniji shipinishanonio. Pueyaso cutaraari maja na niquishaanu juhua tama pa niishirijosanojuaja. Majaari na niquishaanu taa pueya shipinijioquiaacujani, nojori jyanishacari Pueyaso naasucuaari naa niquishanotej. ³⁰ Pueyasocujaari pueya miiniu sesa rejeretariquiaa pueyaracaanu. Saniniuujia, nojuajaari qiarijia puetunu tiqiyocua quijijaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojtianura. ³¹ Pueyasocujaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunjuanaari. Pueyasoori tari na saquirijosano pueyano jiiitia pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocujaari na saquirijosano pueyano.

³² Nojori jaara tojiquiaari Pablo pohuatasacari taa macunucua samiitiaconutaniuhuanu, cuno niishijiacaaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuj.

³³ Na nuhuaji, Pabloori cuno pueya tajiniji quiacuhua. ³⁴ Noojiaqueya cuno pueyajini-jinioori Jesuucua tiuquiaari, Pablo pohuatasano nojori tojtiasacari. Nojorijiniinioori quiquiaari Dionisio jyanishano pueyano. Nojuajaari Areópago niishijia pueya maanujiniinio quiquiaari. Jesuucua tiuquiaarijiaariuhua tamonu maaji. Dámaris na sesa. Socua tamasa pueyari Jesuucua tiuquiaarijuhuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia. ² Cuniqui riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jyanijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiiitiaquiaari Roma tiacajini-iri. Nojuajaari tama na tiacajinia pueyajaaja sequequiaari puetunu Judiocujajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojortia na pocojonura. ³ Aquilaari necocuata suhuoronutaja toqueya cusupenuujua quiquiaari juhua Pablojuhuaj. Naaratej, Pabloori nojortia quishii, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaa erejojua tiajinia rucanejojua. Tii nojori pohuataquiaari Jesujiniiji, taucua niquiaranio, noo pojori canapute Judiocucara jiyatesaquiaaricujani, tariucuaaanu Moisés niishitijosano nojori tojishacari.

⁵ Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohuatanura Judiocuaca niquiara. Nojori sequequiaariiri:

—¡Jesucuaajaari nia sashishano, Pueyaso Jiyarosano seetanujuanaa pocua!

⁶ Judiocuaca jaara tojiquiaari naa Pablo sequesano, na tojtiaaquirii saajaari nojori cuaracashitiniutia Pablo sequesano. Saaja juaaquioreeri. Sesa pocooreejaarihuaj. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiarijia taucuacaqua quiaa cutaranijia, nojori cua pohuatanura Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejovia tiajiniji tohuataquiaarihuua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejovia tia shuriucua quiriqiaasi.

⁸ Crispoori jiyacari cuno Judiocuaca rerejovia tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuahuaj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijiosaaquiaari. ⁹Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojihocoriquiano. Majaari sanaajenu. ¹⁰Janiyacuaajaari quiaa quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiiitia cucua tiuuriquianoni.

¹¹ Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqui na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriqiaasejuhuaj. Jiyacari, Judiocuacaari tii Pabloocuaa rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴ Pabloori jiyacari juucua pocuanu paniriqiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaa sequenio, janiya maara jiyano pueyanooacara nia tonujusacari tojiri cutarani.

¹⁵ Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jeecatoorejaaja!

¹⁶ Na nuhuaji, cuno camarnuuri nojori juaarii. Na shuriucuaari na jiyaramiquiriohuari.

¹⁷ Naa Galión miishacari nojortij, narta taucuacaari cuniquijia quiatuquiaari Sóstenes, Judiocuaca rerejovia tia cojuana. Na piquitiurii camarnu Galión niquiara cuniquijiaari. Majaari Galión tenujunu quirii nojori. Nareja na niquiriquiaari.

Pablo riuujiushacarihuua Antioquiya tiacajinihuua. Na nuhuaji jiuujianaraca pacutequiaarihuua quianuuri

¹⁸ Pabloori cuniqui queraatia camueenuquiaarijiaara Corinto tiacajinia. Tari na riuujiushacarihuua cuniquiji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajinihuuari. Na cojiriquiaajaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiarijia riuujiutirii na nacaari. ¹⁹Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejotia tiacajinia. Cuniqui rerejono Judiocuaca pohuatasee Jesujiniiri. ²⁰Nojoriiri Pablo nenecojoquiaari juucua cuniqui na camueenujunurajaraa nojoritia. Majaari Pablo panini quiquiaari. ²¹Cuniqui quiniaa sequeereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquiniuria tacatemohuaranihuaj.

Cuniquiji tacaquiaariuhua buquejiniari. Éfeso tiacajiniji quiaarohuari. ²²Pablo tiuquishacariuhua Cesareya tiacajiniuhua, cuniquiji quiaama Jerusalén tiacajiniari, puetunu Jesuucua tiuuniaa na saruhatanurajanaa. Na nuhuaji, quiaarohua Antioquiya tiacajiniari. ²³Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajiniarajanaa. Quiariquiaari na niquiniuhua Jesuucua tiuuniaa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaajiniji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

Éfeso tiacajinia Apolo pohuatasacari Pueyaso rupaa

²⁴Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijio pueyano. Na sesaari Apolo quijia. Nojuajaari maninia Pueyaso rupaa pohuatana quiriquire. Tariucuacaanu Pueyaso Rupaa naajiosano niishijia quiquiaarijiaarihuaj. ²⁵Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niquiaraari. Maninia niishitiojotia Jesujiniji na pohuatasacarijiaarihuaj. Seetanujanaa sequeja Jesujiniji puetunujuanaari. Maja cutaraari na niishini quijia Pueyaso Sohanute pueyano jiuujiajia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶Apoloori na puerenu jataquiaari tii na pohuatasacari Pueyaso rupaa narta Judiocuaca rerejotia tiacajinia. Aquilaari Priscilata tii quiriquireahuaj. Apolo pohuatasano tojtiriquire. Apolo jaara puecaquiaari pohuatano, nojoriiri tamocora na jaatucuquiaari na niishitiojonura taa pa jatanishaquiaa Pueyaso Sohanutani, Pueyaso muerasu pa quiniuria cutara. ²⁷Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiquiaari Acaya jiyajinia, Apoloori Jesuucua tiuujiaa cumaquiquiaari jiyano, nojori na niishitiojosacari. ²⁸Apoloori nojori niquiara niishitiojoquiaari tariucuacaanu Pueyaso Rupaajiniji naajiotasano. Jiyano, maninia na niishitiojosacari Jesuuri seetanujanaa nojori sashishano quiquiaari, naacujitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nuacuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiquiaari Éfeso tiacajiniari. Tii riuriataquiaari Pueyaso pueya maanuuri. ²Pabloori jiyacari nojori nequesotaquiaari:

—¿Niaate Pueyaso Sohanu tiuquiniquianu nioojiajia, Pueyaso rupaacua nia tiuushacari?

Pablo riucuatereeri:

—Majaari quenaaja canaa niishiniu quijia Pueyaso Sohanute quiyajuhuj.

³Pabloori nojori sequequiaari:

—¿Casaara nia tiuquinijiosaanucuararini?

Nojoriiri na riucuaquiaari:

—Canaari tiuquinijiosaaquiaarini taa Tiuquinijiona Juan niishitiojoquiaaricuaani.

⁴ Pabloori nojori riucaaree:

—Taaquiririnj. Tiuquinijiona Juancuaaquinateja pueya tiuquinijioquiaarrijaj, nojori jaara noojia tacatoquiaari sesa na miitushanojiniji. Nojori sequequiaarjiaariuhuj: “Cua nuhuaji Niriqianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaaquiaariuhua Jesuucua nojori tiuushacari seetanujuanaa. ⁶ Naacujitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacujitij, nojoriiri niishishoo rupaacajinia pocooree. Naajuhuj, Pueyaso Sohanu niishitiojosano Pueyasojiniji pohanuanuquiaariiri. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raza. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pohanataja Pueyaso rupaa pueya niqiaaraari. Naajuhuj, nojori niishitiojojuuari taa Pueyaso jitianutaniya pueyaracaanu Jesuucua tiuuniaa pueyani. Pueyari na tojtiaquiaari maninia, na puereyaquiniutia na niishitiojosacari. ⁹ Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocoquiaari Jesu rupajiniji pueya niqiaaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuuja tiajiniaari. Tirano jyanishano pueyanoori cuno serojonuuja tia camaru quiquiaari. Pabloori cuniqui puetunu juucajanaa niishitiojojuuari Pueyaso rupaa Jesuucua tiuuniaa pueya. ¹⁰ Caapiqui marijiaari socua Pablo shocjojuuari tii na poojotasacari Pueyaso rupaa Tirano serojonuuja tiajinia. Naacujitij, puetunu Asia jiyajinia quiniaa pueyajanaari Pueyaso rupajiniji caminiujiushaaquiaari, Judiocuaca, taucuacajuhuj.

¹¹ Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. ¹² Naacujitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, jcusosuhuari naatacoquiaariuhua! Naajuhuj, samaruhuari tohareetaquiaarijiuhuj, samaruhua jiitiaja pueyacuaji.

¹³ Tamasaca Judiocuacajinijinoori quiriquiaajuhuj, pueyajiniji samaruhua tohuatanijojua. Nojoriiri puetunu tiacajinijanaa rucoojojuaca quiquiaari. Jiyacaritij, nojoriiri juhua Pablo miiniu paniquiaarijiuhuj. Juucua naa sequetuquiaari samaruhuari:

—Pablo pohanatasano Jesu sesajinia nia sequeyanijia: “¡Nio pueyanojiniji nia tohuareetare!”

¹⁴ Naa miijicaari siete canuu quijia. Nojoriiri Esceva jyanishano pueyano niqiohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuj. ¹⁵ Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucaquiaari:

—Jesu niishiyacuajanjia. Janiyari Pablo niishiyajaaniuhuj. ¿Canteerini nijaniyanijia, naa nia sequenura janiyatej?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. ¹⁷ Puetunu Éfeso tiacajinia quiniaa Judiocuacajanaa, mariyata tii quiniaa taucuacano, nojori jaara niishiquiaari naa miishanojinijitij, jyanohua puertuquiaariiri. Naacujitij, puetunu Éfeso tiacajinia quiniaa pueyajanaari sequequiaari:

—¡Jesuqui seetanujuanaa Jiyaniijajanaa cutara!

¹⁸ Naajuhuj, queraatia Jesuucua tiuuniaa pueyari nijioquiaari, tarijia sesa na miitushano pohanatunura puetunu pueya niqiarajanaa. ¹⁹ Naajuhuj, queraatia pueyari juhua shimiacuri miijiojuaca quiquiaari. Nojoriiri na nequesoreetuneca mueratejotaquiaari. Cuno nequesoreetunecajiniaari serojosano quijia taate pueyano cumueca shimiadura quiniuni. Na camaruhuari jiyacari puetunu cuno nequesoreetunecajanaa patootaquiaari. Na catijiaquiaari puetunu pueya niqiarajanaari. Puetunu cuno nequesoreetunecajanaa catijiasaaquiaarini, cunoori cincuenta mil platajiniji shipinijosano

cumanecata masesano quiquiaari. ²⁰ Naacujitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujajinia.

²¹ Na nuhuaji, Pabloori cuniquiji naquerejoquiaari Macedonia jiyajiniarajuhuj, Acaya jiyajiniarano. Cuniquiji riujuuniu paniriquiohua Jerusalén tiacajiniohuaraari. Sequequiaarijiaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaarijaara.

Éfeso pueya cushitiishacari na juaaquionuta najuhuanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanhua juaaquioquiaari Pablo niishitiojonuucua Jesucristojiniji. ²⁴ Naa quiquiaariiri. Demetrio jiyanihano pueyanocuaajaari juhuacatecara narta pueya nasojoquiaari. Cuno pueyano, Demetroni, nojuajaari shiirijaa tia platajiniji shipinijiojua quiquiaari. Cuno shiirijaa tiacaari juhua nojori jiyanihano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niqutiojojua na cumaneecaraari. Naacujitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojorijuhuj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuaajaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. ²⁶ Quiarjia cuno Pablo jyanishano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohujanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacujitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. ²⁷ Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajinia, tii nojori secojonura, naa cuno Pablo niishitiojonuucua pueyaracaanu pueyatej. ¡Naacujitij, puetunu pa Asia jiyajinjinio pueya, mariyata puetunu jiyacajinjinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqui quiniaa pueya jaara tojiquiaari naa Demetrio sequesantej, nojoriiri jiyanhua juaaquioquiaari. Naa nacoquiaariiri:

—¡Pa timitiasano Artemisa cuaara pueyaracaanu quiiria Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuno tiacajinijanaa pueyari cushitiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinjinio pueya. Nojoriiri quiquiaari Gayo, Aristarconio. Na jayoturee Éfeso tiacajinjinio pueya rerejojua tiajiniaari. ³⁰ Pabloori cuno pueya nacoosaqui tiajinia tiuquiniu paniquiaari juucua-juhuj. Quera na pocuasee cuno pueya tajiniani. Jesuucua tiunnaa pueyari saa na cosequiaarijia na tiuquiyaquiniucujaji. ³¹ Asia jiya camarucuaari na seya jiyaroquiaari Pablocuajuhuj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia.

³² Cuno nasojosano rerejono pueyari saaja cushitiquiaari na juaaquionuta. Jiyanhua

nacooreeri. Tamasacaari saniniuujia tamaatia nacooriquiaajuhua. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriquiaani. Secaja nojorijinijinioori na niishiquiaari cutara. ³³Jiyacaritij, Judiocuacaari Alejandro jiyaniishano pueyano caponeequiaari pueya nacoyano tacoji na nujuatesocoriquiano. Cuniqijiniio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijuhuaj. Naaratej, Judiocuacaacuaji tacunu paniriquiaa juucuaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. ³⁴Saniniuujia, cuno pueya jaara niishiquiaari Alejandroori Judio pueyano, puetunu pueyajaanaari socua jiyacatequiaari nacoonura. Nojoriiri caapiqui hora shocoteree pueyaraaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriquiaari. ³⁵Cuno tiaca camarucuaa naajiona pueyano jaara na naata quiriqiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishitiyajaari-uhua paacuajaari cuno casaajuhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. ³⁶¡Canteeri nio niishiyaquiyaniija! Shaaqui. Cunora tariucua. ¡Nia sanaajetarohua! Majaari najuhuaana sesa nia miitiuniu, maninia nia niishirojiyaquishacari. ³⁷Nio canuu niaa niyara na jayoreeni, nojoriiri maja na nohuasenu quiri casa pa pueyaso secojojua tiacajiniji. Majaari na sesacatunu quiquiaa pa pueyasojuhuaj. ³⁸Demetrio jaara nata poonijionaata cuno pueyacuara tonujunu paniri, ¿casaara na quiaaquia pa nequesoreenaa niqiaara tonujunuraariiri? ¿Casaara pa jiitiaa nequesoreenaa pa tiacajiniaariiri? ¿Najuhuanaj? Pa nequesoreenaa pa paraa tacujua pocuaji. ³⁹Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucua pa jeecanura puetunu nia sequesanojuanaa. ⁴⁰Pueyanaa, ¿majate nia puerenu, Roma tiacajinia quijia pa jiyaniijijanaa jaara pocuara tosaare pa nacojonujiniji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹Tiaca camarucuaa naajiona pueyano jaara puecaquiaari pocuanu, pueya sequeriquiaariiri:

—Nia quiojorohua pueyanaa.

Naacuajitij, puetunu pueyajaanaari cuniquiji niyaquejoquiaariuhua.

20

Pablo rucuanesocariuhua Macedonia jiyajinia, Grecia jiyajiniano

¹Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuuniaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ²Nojuajaari puetunu cuno jiyajinia rucuanequiaarijanaa. Jesuucua tiuuniaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiquiaari Grecia jiyajiniaari. ³Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴Nucuaco na quiasacariuhua, na tarajaquiaariiri Sópater jiyaniishano pueyano Berea tiacajinijinio, Pirro niyanu. Na tarajaquiaariiriuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariiaariuhua Gayo, Derbe tiacajinijinio. Timoteori nojoritia quiriqiaajaacuhua, Tiquiconio, Trófi-mojuhua. Nojoriiri Asia jiyajinijinio quiquiaari. ⁵Puetunu nio canaa tapueyocua-janaari canaa puetaquiaari. Canaacuaji tiuquijioseequiaari coteenu Troas tiacajiniaari. Cuniqui sashitiquiaari canaari. ⁶Jiyacariiri queranacunuusacari quiquiaari, poreetajaaju

shipinijiosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojiosacari Troas tiacajinia

⁷Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunnaa pueya rootariquiaa niucua. Nojuajaari cuno tariqui quiariquiano quiiriquiaa cuniquiji. Naaratej, na nuhuajiria pocojoriquiaa pueyataari. Pueyaracaanu na pohuatasacari, shiyaqueyari tari quiquiaari. ⁸Cuno tiajinia canaa tii quiiriquiaani, canaari jiyocuacaanu tercero na nat-acojina rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiara. ⁹Jiyacaritij, tamonu mashajaari tia shuucuaaji tacuhujiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanoehua na maquesacari, jiyocua tiquii socuaari. Cusoseejanaari. ¹⁰Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuunnaa pueya sequereeri:

—Maja najuhuaana shiriiquitiuniu. Saminiocuaja.

¹¹Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹²Cuno mashajaari saminio jaatucusaaquiaariuhua na tiajiniuhua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵Canaari tariqui shocomaa Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishini. ¹⁶Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniuhua paniquiaariuhua Jerusalén tiacajiniara. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuunnaa jiitianaa pueya

¹⁷Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunnaa pueya jiitianaa. ¹⁸Nojori jaara canaacua tiuquijioquiaari, Pabloori nojori sequereeri:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹Niaata cua quishacari, janiyari pueyaracaanu nia niishitiojiojuani, pueyaracaanu pa Jiyaniijiaara cua poonijiosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰Naajaa, majaari cua pishiniu quijia nia niqiara cua pohuatanura Pueyaso rupaa. Janiyari nia niishitiojiojuani puetunujuanaa maninia nia quiniuria, maninia mijia nia quiniuriajuhuaj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojiojuani, tama nia tiacajiniaqueyajaajani. ²¹Janiyari Judiocuaca sequejani tau-cuacanio, nojori tacatonuhuaa noojia Pueyasocua, sesa nojori miishanojiniji, pa Jiyaniijiaacua nojori tiuuniuria cutara. ²²Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³Janiyari

saaja niishiya cutarani, puetunu tiacajinijanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhua”.²⁴ Janiya jaara naa niishirini, majaari cua tacaani quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatenu paniya cutarani. Pa Jiyaniijia Jesuuri cua jiyaroquiaari cua pohuatanura pueya niqiiara, taa Pueyaso jiyanooni paniya pueyani.

²⁵ Janiyari seetanujuanaa nia sequeyani pueyanaa. Puetunu nijaniyajanaa, cana niqiiara cua pohuataquiaari Pueyaso rupaacujani, majaari socua nia niqiniu quiniutianiya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. ²⁷ Janiyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quarijiani, tama nia cuaqueyajaaja nia cojuare. Maninia nia cojuare Jesuucua tiunuaa pueyajuhua. Pueyaso Sohuanucujaari nia jiyatequiaari Jesuucua tiunuaa pueya jitiianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹ Janiyari seetanujuanaa niishiyani, janiya jaara niqiiqi quiaqueeni, tamasacaari cua nuhuaji nijionutaniya. Jesuucua tiunuaa pueya sesonutaniyari, sacuraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiunuaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. ³⁰ Naajuhua, tama nijaniyajinijiojuari nia najuhua tamaatia niishitiojonu coteenutaniya na sapojonuta. Majaari Pueyaso panishano na niishitiojonu quiniutianiya tari. Naa sapojonutaniya Jesuucua tiunuaa pueyari, pueya tojiniuria nojori saniniujia. ³¹ Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijihua, jiuujianaraca marijaari tari cua shocjoree pueyaracaanu cua niishitiojosacari nijaniya. Majaari cua tarinitianu quijia rootanu nijaniya, juuca, niucuanio. Janiyari naajaa cua namijiaacatenuta niishitiojua puetunu nijaniyajanaani. Majaari naa cua miishano nia nijajetanu pueyanaa.

³² Naa tiujianutaniya tarinjia. Janiyacuajaari pa Jiyaniijia juaashiquiajinia nia jataani. Na rupaa nia tojiriqia pueyaracaanu, juhua rishimiaca pueyano nia quiniuria, cumuecara. Naa jaara naa miiritij, Pueyasoori nia rijionutaniya na shuriucua, na saqiriojosano pueyana nia quiniuria. ³³ Naaata cua quishacari, majaari tama quiriijaaja cua paniniu quijia cumaneeca, toqueno. ³⁴ Naaari naa quiyano cua niqijijuhua. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhua. ³⁵ Janiyari nia niishitiojuani, naa poonijiosanotej casamijiuucua pa naacunura pa jitiisanota. Majaari pa Jiyaniijia Jesu sequesano nia nijajetanujuhua. Naa sequequiaariiri: “Maninia pueyano jaara na jitiisanojiniji niqitiore nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniji”.

³⁶ Naa nojori na sequenu nuhuajitij, Pabloori mojuquetaree. Puetunu nojoritajanaa secjoreeri. ³⁷ Puetunu pueyajanaari nujuqueturee. Pablo cacanuuturi. Na nujuunetureejaariuhua. ³⁸ Pueyari jiyanohua taraajeriquiaa Pablo sequenucua nojori, maja tari socua na niqitiniu quiniutianiya nojuaja. Nojoriiri caminijaniara rosetaquiaarijuhua, Pablo na niqitiniuria buquejinia na tacasacari.

21

Pablo quiasacari Jerusalén tiacajinara

¹ Éfeso tiacajiniji canaa ruparetasacari, canaari shoniacu caminia jiuujiaaco quiaareeni. Canaari Cos tiacajinia tiuquishiini. Cuniqiiqi canaa quiasacari tariqui, canaari Rodas tiacajinia tiuquishiiniuhua. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ² Pátara tiacajinia canaa tiuquishacari, canaari tii riariatasee tamonu buque quera Fenicia jiyajiniara ruparetaanoni. Canaari tii tacataareeni. ³ Canaa jaaretasacari, canaari canaa muenecara niquimiohua Chipre jiya tucuaatijani. Canaari Siria jiyajinia tiuquishiini. Cuno buquejinia canaa tii quiriqiaani, casami pariquiaari

Tiro tiacajinia jatasocoriquiano. Naaratej, canaari Tiro tiaca tacatajajiniji tiutiaseeni, casami jatanura tii. ⁴Jesuucua tiuunიაa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuunიაa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. ⁵Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunიაa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquiajinia. Puetunu canaajanaari mojoquetacoquiaarini shoniniacu caminia casaqueyaji. ⁶Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaarihua na tiajiniohua.

⁷Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqui tacatasee puetunujuanaani. Canaari tii quijia Jesuucua tiuunიაa pueya saruhataseeni. Canaari nojoritia quishii niquriyatu juucani. ⁸Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriqiaa. Canaari na tiajinia quishiini. Felipeeri Jesujiniji pohuatana quijia. Nojuacuaajari Jerusalén tiacajinia coteenujuanaa tamascata jiyatesaquiaari mashiquopue mianuuteriquiano. ⁹Felipeeri necojori jiitijaja, saa caqueetacaneea, niyacojori. Cuno niyacojoriiri Pueyaso Sohuanuuri jiitijaja. Naacuajitij, Pueyaso Sohuanuuri niishitiojosano nojori jiuujiajinia Pueyasojiniji pohuatenujuuajari. ¹⁰Canaa camueenujusacari cuniqui, jiyacari tiuquishiiquiaariiri Judea jiyajinijinio pueyano. Nojuajaari Pueyaso sequenu panishano caminiujunia quijiajuhuaj. Ágabo jiyaniushano pueyano. ¹¹Nojuajaari canaacua niquaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajarjia, na numatucuanio. Na nuhuaji sequerohuari:

—Jerusalén tiacajinia parta Judiocuaacari naa morojonutaniya nio cajiniocuaque camarutej. Na nuhuaji, taucuaa niquitiosaanutaniyari. Pueyaso Sohuanuuri naa cua sequereeqij.

¹²Naa Cesareya tiacajinia quiniaa Jesuucua tiuunიაa pueya tojishacaritij, canaajuhuj, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³Saa canaa sequerejajari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatenuucua cua Jiyaniijia Jesujiniji.

¹⁴Maja canaa naata na tarinitiniu quishacari, canaari socua na tarinitiareeni.

—Cuaajaquij. Pueyaso cuaara miiria taa na miiniu paniyacuajani.

¹⁵Naa canaa sequenu nuhuaji nojuaja juucatej, canaari canaa jiitiasano casaa jeenucuaareeni. Canaari Jerusalén tiacajinia quiaareejaaniuhuj. ¹⁶Canaata quiojoquiaariiri Cesareya tiacajiniji Jesuucua tiuunიაa pueyajuhuj. Canaata quiariquiaajaarihua Mnasón jiyaniushano pueyano. Nojuajaari Chipre jiya tucuaatijajinijinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocojosacari Santiagota

¹⁷Canaa tiuquijiosacari Jerusalén tiacajinia, cuniquijinio Jesuucua tiuunიაa pueyari canaa timitiaree canaa tiuquijiosacari. ¹⁸Pabloori tariqui canaata quiaquiaari Santiago niquniuucua. Tii quiriqiaajaarihua puetunujuanaa Jesuucua tiuunიაa jiitianaa pueya. ¹⁹Canaa tiuquishacari, canaari nojori saruhataciaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatenuucua Jesujiniji, na rucanejosacari tucuaaanu taucuaa quijia jiyacajinia. ²⁰Pueya jaara naa tojiquiaari Pablo pohuatasantej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanhua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojtijajacajuhua, nocua nojori jiaatianuta jiyanhua. ²¹Nio Jerusalén tiacajinia quiniaa Jesuucua tiuuniaa pueyari quocuaji tojiquianujuhuaj. Quiaanaari tamonu jiyacajinia quijiaca parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhua maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. ²²Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴Nojori quia jiyataare Pueyaso Secojoua tiajinia. Niocua nia cuaqueya jeequejosee taa pa supuetanaa sequequiaaricujani. Naajuhua, quiocua nojoriria cumaneece niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujanaa quiqianu pueya sequesano quiajanijajiniji. Niishitiunutiianiya jaariuhua, quiaaqui tariucuacaanu Moisés niishitiojosano miyajaa. ²⁵Majaari Jesuucua tiuunio taucuacaacua quia tacaaniu. Canacuajaari tari nojori nacasuquiaari canaa naajionejiniani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara pucoosano casaa, naajuhua, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacatura, naajuhua, maja na numuetucunura na camishoo maaji. Puetunu pa supuetanaa rootasanojinijianaani, saa niojuuari taucuaca tojishocoriquiano rootasano.

Na cojiniaata Pablo quioosacari Pueyaso Secojoua tiajinia

²⁶Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miiniu nuhuajitij, Pueyaso Secojoua tiajinia tiuquitiaquiariiri pueyacuara secोजनाacua. Na sequetuquiaariiri casaa juuca na tucutatunutaniya na cuaqueya na jeequejonuununi, naajuhua, casaa juuca nojori panutaniya Pueyasora na niquitiosocoriquiano.

²⁷Quera nojori tucuatasaari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. ²⁸Na quiatusacari Pablo, pueya na jiiquioonutareeri:

—¡Israel pueyanaa, miji! ¡Canaa nia naacuseeja! Niiori noo pueyanocuaa tiqiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojoua tiaacuarajuhua. Naajuhua, tariucuacaanu Moisés Rootasano sesacatequiaa pueyajaariuhua. ¡Quiarijiani, pa Secojoua tiajinia sacuaraatia tiuquiniitiree taucuacaari!

²⁹Cuno Judiocuacaari naa sequetuquiaari Pablotej, Trófimo jiyaniushano pueyanota nojori niqiniucua nojuaja tarijia na rucuanesacari cuno tiacajinijaja. Trófmooori Jesuucua tiuuniaa tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tiajinia.

³⁰Puetunu Jerusalén tiacajinia quiniaa pueyajanaari juaaquiocuaari. Pablocua netecatuquiaariiri. Na quiatureeri. Pueyaso Secojoua tiacoci na jaatiuquiaari carijiniacumaari. Pueyaso Secojoua tia tohuateyari ritia tionujusaaquiaari na nuhuaji. ³¹Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaca na juaaniutia nacoya!” Cuno comandanti, nojuajaari soldadohua capitancuaca jiyaniijia. ³²Jiyacaritij, comandanteeri na soldadohua rerejotequiaari ritia, na capitancuacano. Tee pueya nacooriquiaani, nocua netecatuquiaariiri. Judiocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. ³³Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴Pueyari saaja jiyajeneta nacooriguiaa. Nioori tamaatia nacooriguiaacuaja. Tamasacaari socua tamaatia nacooriguiaajanaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

³⁵Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicujaji Pablo shiitioquiaari jiyocuacaanu.

³⁶Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijiaaja

³⁷Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucaaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajini-jinio pueyanoni. ³⁸¿Majateeri noo quiajanija quiquianucuaja, cariiquia jiyajinia jiyatacanu cuatro mil puecoojuaca pueyatej?

³⁹Pabloori saaja na sequereeri:

—Janiyari Judio pueyanoni, Tarso tiacajinia rasanotuhuaj. Naacuajitij, janiyari Tarso tiacajinijinio pueyanoni, teyano tiacatucuaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

⁴⁰Comandanteeri socua na sequereeri:

—Quia pocuare.

Pabloori jiyacari tacatujiniji nujuaquiaari. Na juashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicua pocuaree tama nojori Hebreo rupaajiniaari. Naa nojori sequereeri:

22

¹—Cua tapueyocucanaa, cua jiyaniijianucuaanaa, nia tojitiare cua sequesano nijajaniya tama cua tacusacarijiaaja cucuaji.

²Cuno pueya jaara tojiquiaari Pablo pocuasacari nojoriicua Hebreo rupaajinia, pueyari maninia sanaajetaquiaarijianaa. Pabloori nojori sequereeri:

³—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaquiaari pa supuetanaa niishitiojosanonijia. Janiyari pueyaracaanu Pueyaso panishano miiniucua jiaatiaquiaani, taa quiarijia nia miiniu paniyanijia. ⁴Janiyari tarijia Jesuucua tiununiaa pajejani naquiya cua miitiasocoriguiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriguiano nujuatejojuajinia. ⁵Pueyacuara secojonaa camarnuuri cua miijiosano niishiyajuhuj, puetunu pa jiyaniijianucuaajanaanio. Nojoricuajaari cua niqitioquiaari nojori naajionee Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiununiaa pueya cua pajenura Damasco tiacajiniani. Quera cua quioosano cua nitiamohua nia Jerusalén tiacajiniani, saniitiojosocoriguiano.

Pablo pahuatasacari Jesuucua na tiunuijiniji

⁶Janiyari juucua nuucua quiariquiaani. Quera cua tiuquishacari Damasco tiacajinia, panacariiri quiriquiaa. Canashiyajiji jiyanohua shacantuuca juhua miacanaari cua nunuquiaari. ⁷Janiyari juhua jatasaareeni. Jiyacaritij, janiyari rupaa tojirii cua sequeyanoni: “Saulo, Saulonaa, ¿casaara quia miitiaa puera janiyani?” ⁸Janiyari na

nequesotareeni: “¿Cantequia Jiyaniijianaa?” Cua sequereeri: “Janiyacujaari Jesuni, Nazaret tiacajiniiminio pueyano. Cunocujaari quiaa na miitiaani”. ⁹ Cua cojiniaa pueyari cuno shacantuuca na niquishacari shiriqituuquiaari. Majaari na tojitiuniu quiquiaari cutara jiyocuaaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹ Cuno shacantuuca cua nunuquiaari jiyocuaaanujini, cua namijia sesoquiaariiri. Janiyari cariojuaru quiriqiaani. Naacujitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuaacaanu Moisés niishitiojosano tojjia cutara. Puetunu Damasco tiacajinia quiniaa Judiocuaacari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niqiniucua niquiaari. Jaara tiuquiquiaari cucua, cua sequeeri: “Cua tarajanu Saulonaa, maninia niqijia quia quiriuhua”. Jiyacariitij, cua namijiaari ritia jeequee. Janiyari maninia niqiqui Ananíasni. ¹⁴ Cua sequereeri: “Pa supuetanaa Jiyaniijia Pueyasocujaari quia saquiriojoquiaari tariucuaaanujiniji, na niishitionura quiajaninya na panishano quia miiniuria. Quia saquiriojoquiaariiaariuhua quia niqiniuria taquiya pocujinio sesa miyashijia cutara, tama na camaru rupajiniji quia tojiniuria na sequesanojuhuaj. Nojuacujaari pa Jiyaniijia Jesucristo. ¹⁵ Quiaari puetunu pueyapue niqiarajanaa pohuatanutaniya nojuajiniji quia niquishano, quia tojishanonio”.

¹⁶ Ananíasri socua cua sequeeriaari: “¿Casaara quia tarishiyarini? Quiarijiani, quiaa cuaara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuaacaacuan

¹⁷ Janiya jaara riuiuuquiaariuhua Jerusalén tiacajiniohuani, janiyari Pueyaso Secojonuujua tiajinia secojoriqiaani. ¹⁸ Cua secojosacari, janiyari Jesu niqiquiaari juhua cua maquenujiniani. Cua sequereeri: “Ritia quia quiaare niqijiji. Nio pueyari maja na tojitanu quiniutianiya quiajaninya, nojori quia pohuatasacari janiyajiniji”. ¹⁹ Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuuniaa pueya quiojuani puetunu rerejoju tiajinijijianaa cua nujuatejosocoriquiano nojori. Janiyari nojori mojuajujuhuaj. ²⁰ Naajuhua, quia rupaa pohuata Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhua, nojori mosaicari Esteban. Janiyari jaarajaaja sequequiaarini: ‘Cuaara mosaaria’”. ²¹ Naa cua sequesacariitij, Jiyaniijiaari saaja cua sequereeni: “¡Niiquiji quia quiaarejaj! Janiyacujaari tucuaaanu quia jiyaronutaniya taucuaacaacuan”.

Comandante jiitiasacari Pablo

²² Pueyari sanaa tojitiariquiaa Pablo pohuatasacari. Saniniuuja, Pablo jaara jiyaniquiquiaari taucuaa, pueyari jiyacari coteequiaari nacoonu, taucuaa soojeaca nojori quiniucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriquiaa.

²³ Na juaaquionuta na nacoosacarijia, na toqueya quejootuquiaari jiyocuaaanuuri quera na macaniutia. Naa quejootuquiaari jiyajuajaariuhua. ²⁴ Comandanteeri na capitánucua sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesooju nia majacunura narta Romano pueyanotej?

²⁶ Capitán jaara tojiqiaari naa Pablo sequesantej, ritia neteqiaariiri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riuacuaree:

—Taaquiriirinj.

²⁸ Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuucua.

²⁹ Cuno pojori, Pablo majacunura seeratasaaquiaari juucuan, naa nojori tojtiasacaritij, Pablo shuriucujaji ritia shiriqutiaquiaariiri. Comandante niishishacari Pablo seetanujuaana Romano quiquiaari, puererejaariuhuj, Pablo na morojotenuucua.

Tama nocuaji Pablo tacusacarijiaaja Judiocuaca jiyaniijianucua niqiuara

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pablóni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuaana rerejotequiaariiaariuhuj. Nojoricuajaari Sanedrín maanu. Jiyacari Pablo numatucua-jinjiji rupareetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

23

¹ Pabloori juhuacatecara pohuatanu coteeqiaari camarucua niqiuara. Nojori sequeereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojjia cua quishacari pueyaracaanu.

² Naa Pablo sequesacaritij, pueyacuara secojonaa jiyaniijajanaari juaarii. Ananías na sesa. Nojuajaari Pablo jiyaniquiaari najuhuana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piqui. ³ Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojjiyashijiana! Nia jyanishacari janiyari Moisés Rootasano tojjiyashijiani, niaari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojjiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riuacuaree:

—Cua tapueyocuaanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaatia rimiaaquenu nia camarnuucua”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquiuno Judiocuaca camarucua nacasunaa cuniqui quiriquiaani, nojjiaqueya nojorijinjiniioori Saduceocuaca maanujinjiji quiriquiaa. Tamasacaari saniniuujia narta Fariseocuaca maanujinjiji quiriquiaacujua. Naaratej, Pabloori jyanohua na rupaa paaretaquiaari naa na sequenura nojori:

—¡Cua tapueyocuaanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanija. ¡Niaaquiri jiyamitia cua nequesoreya!

⁷ Pablo jaara naa sequequiaaritiij, Fariseocuacaari Saduceocuacata juhuacatecara juay-onuutaquiaari tama nojorijiaaja. Naacuajitij, nojoriiri caapiqui maapuera raqutiitiquiaari. ⁸ Saduceocuacaari jiyaniya maja macunucua samiitiaconu quiniutianihua. Nojori-iri sequeyajuhaaj: “Maja Pueyaso seya quiniu”. Pueyapuenaaari sohanuujujuhuaj. Fariseocuaca cutaraari nojori cuaracashitishanoocua tiuya. ⁹ Naacuajitij, puetunu pueya-janaari nacooriguiaa na juayonuutasacari. Jiyacaritij, tariucuaaanu Moisés Naajio-tasanonijini niishitiojonaa pueyari sanetaquiaari. Nojoriiri Fariseocuaca qijijajuhaaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujire Pueyaso panishano na miishacarini?

¹⁰ Pueyari socua jiyacatequiaari nacoonu. Comandanteeri puerequiaari, na jyanishacari Pablo naasucua socua sureesaanutaniyaquij. Naa jyaniquiaariiri, puerajanaa pueya juaaquiosacari. Nocuaji, comandanteeri ritia na soldadohua jiyaramiquiquiaari, na tajinia nojori tiuquininiuhua Pablo pueya tajiniji. Naa miitiquiaariiri.

¹¹ Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablona. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhaaj, Césarjanaa niqiarajuhaaj.

Judiocuaca roojotoosacari Pablo na motunura juucua

¹² Tariqui saniniuuja, noojiaqueya Judiocuacajinijinioori Pabloocua roojotooquiaari na monura. Nojoriiri naa sequetuquiaaritiij:

—Paa jaara Pablo moyaquirini, pocua miaqueyaquirini, pocua ratuyaquirijianiuhua.

¹³ Nojoriiri cuarenta canuu quiquiaari, naa sequetuquiaarini. ¹⁴ Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casa, canaa cuaraa more Pablojaati-
jia. ¹⁵ Niajaniya, pueyacuara secojonaa jiyaniijianucuaanaa, puetunu Sanedrín maanujua-
naanio, nia sequere comandante cuaraa nitiaara tariqui Pablo niaacua. Niocua naa na
sequerenoj: “Miji Pablo quia nitiaare. Canaari socua maninia na nequesoreenu paniyani”.
Canaacua jiyacari niaacua na tiuquiyaquishacarijia nuu cajiniocua na moreni.

¹⁶ Tamonu pueyanoori Pablo raaquia caminiujuquiaari naa cuno pojori sequesano camarucatej. Pablo raaquiaari nocuaji ritia soldadohua quijia tajinia quiaquiaari na cama Pablo na pohuatanura. ¹⁷ Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

¹⁸ Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa qitiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casa quia sequenu paniya.

¹⁹ Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casa quia sequenu paniya janiyani?

²⁰ Caya samijiaari na sequeree:

—Noojiaqueya Judiocuacajinijinioori Pabloocua roojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuaanaa niqiuara nequesoresocoriquiano. ²¹ Quiaa jaara sequesaaare, majaari nojori tojinuu. Cuarenta canuuri tari nuu cajiniocua nocuaji jamaatiuya. Cuno pojoriniiaari maja na miaquenuunu quiniutianiya, majanaari na raruunu quiniutianiyajuhaaj, cuaraa moture Pablojatijia.

²² Comandanteeri caya samijia sequequiaari:

—Maniniacuaaja. Majaari tamasaca pohuatanu quia sequesano janiya. Tariucuaaja. Quia quiaarohua.

Soldadohua jiyatasacari Pablo camarnu Félix

²³ Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucuaja. Mariyata cuaara quiojooora setenta soldadohua caballohua nijinia cajitiujiacajuhuj, socua dosciento soldadohua saa cashiriacaanio. ²⁴ Comandanteeri na capitáncuaca sequequiaarijuhuaj, nojori niojotanura cajitiucua tamasaca caballohua nijinia Pablo cajjiara. Nojori sequequiaarijuhuaj:

—Niocua maninia cojuaare Pablo, cuaara tiuquiiiria camarnu Félix nequesoreeso-coriquiano.

²⁵ Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félix:

²⁶ “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotasano pueyanojini quia pohuatareeraj. Na sesa Pablo. Narta Judiocuacaari na motunu paniquiano. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacujaji nia quiare ritia cuno pueyano, mariqui na motureeri’. ²⁸ Maninia cua niishiniuria casaara naa pueya nacootariquiaa Pabloni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pabloni, nojori nequesoreenura nojuajanaa cua tojishocoriquiano. Janiyajanaa jaara Pablo tojiqianuni, casaara pueya monu paniriqiaanoj, janiyari jiyacari shusha niishiriini. ²⁹ Nojoriqiiiri na nacootacanu Pablo tojiyaquiniucua tariucuacaanu tama nojori supuetanaa rootasanojuaja. Cunora na motunu paniriqiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquiano, pueyaracaanu na nujuatesaanura. ³⁰ Janiyari sequesaarucuaajuhuj, noojiaqueya Judiocuacajinijionaaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

³¹ Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinia tiuquiiijoseeri. ³² Na niohuacata quiojonaa soldadohuari Antípatris tiacajiniji tariquicuajaji riujiuutiaquiaarihuua Jerusalén tiacajinihuua. Caballohua nijinia cajitiuníaa soldadohua cutaraari Pablo jiyataquiaari.

³³ Pablo jiyatanaa jaara tiuquiiijosequiaari Cesareya tiacajinia, nojoriiri comandante naajionee niqutiojee camarnu Félix. Pablo na niqutiojotatuura. ³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaanquiaarini?

Pabloori na riucuaree:

—Cilicia jiyajinia rasanonijia.

³⁵ Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiijore.

Jiyacariitij, camarnuuri na soldadohua sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaquiaari na quijiara.

24

Tama Pablo tacusacari nocuajijiaja camarnu Félix niqiiara

¹ Pabloori cinco juuca camueequiaari tari Cesareya tiacajinia. Jiyacari tiuquiiijioquiaari-iri nocuara saquiriojotanuuriquiano pueya. Nojoriiri quiquiaari pueyacuara secjonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jyanishano pueyanujuhuaj. Jyanohua pocuanu niishijia. Puetunu nio po-jorijianaari camarnu Félix cua tiuquiquiaari Pablocuara na saquiriojotatura. ² Pablo

jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiiitiaa. Canaari naacua juhuajaniya quiyani, maninia canaa quia jiiitiasacari. ³Canaari cunora quia timitiaani camarnunaa, maninia quia jiiitianucua canaa pueyaracaanu, puetunu canaa jiyajinijanaa. ⁴Maja puera cua tarishitiniu paniniu quiajaniya. Quenaaja rupaquijia canaa quia tojiricuara. ⁵Nio pueyanoori tariucuaaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quinia Judiocuacajuhuj. Naa sesa na niishitiojonuucua pueyatej, tamasaacari maja tari na rupeunu paniniu narta pueyano. Nio pueyano tojitajacaari sesojosaaquiaari Nazarenoocua tiunnaa maapue. Nio pueyanocujaari cuno pojori jiyaniijia. ⁶Juucua Pueyaso juaatiniu paniquianujaari iuhuj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuaaanu canaa supuetanaa rootasaaquiaaricujani. ⁷Comandante Lisiasri canaa na jaariutiurucuaa saajani. ⁸Canaa sequerucuaajaariuhuj: “Cante nio pueyanooacara saquiriojotanu paniyani, cuara quiaara camarnu Félixua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuj, canaari cunora nocuara quia saquiriojotaani.

⁹Cuniqui quinia Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquinatejaj, taa Tértulo sequeyacuajani.

¹⁰Camarnuuri na juaashiquia shiitioquiaari Pablo pocuanura saniniuuja. Pabloori jiyacari coteeree. Naa sequereeri:

—Taaquiriirinij, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹Janiyari shusha tiuquiriohuacuaa Jerusalén tiacajiniani, Pueyaso cua seconura Secojonujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹²Nojoriiri maja quenaaja na riuriatanu quiqianu janiya tamonu pueyanota juayonuutaano. Majaari na riuriatatunu quiqianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuriatanu quiqianu janiya canaa Secojoua tiajinia juayonuutaano pueyata. Majaari quenaaja naa cua miiniu quiquiaari puetunu tiacajinijanaa cua rucuanesacari. ¹³Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miiijiani. ¹⁴Nojori sequesacari janiyanaari Pueyaso tojjia tamaatia nojorijinijini, cua tojiniuucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjijiani seetanujuanaa cua tiuushacari puetunu Moisés naajiotasanooajanaa, naajuhuj, cua tiuushacari puetunu canaa supuetanaa caminiujuushano Pueyasojinijini naajionuutasanoocujanaano. ¹⁵Janiyari juhua cucuara saquiriojotanaa pueya tiuya Pueyasooajuhuj, taa Pueyaso samiitianijionutaniuhua macunucuaani; maninia miiijaca, sesa miiijacano. ¹⁶Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niquiara, pueya niquiaranio. Naacuajitij, janiya jaara samiitiarohuani, majaari cua macuhajenu quiniutianiya.

¹⁷Queraatia marijia cua shocotejonu nuhuaji cua rucuanesacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajinijini Jesuucua tiunnaa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhua Jerusalén tiacajinia, Jesuucua tiunnaa casamiijiuniucua niqutiojosocoriquiano, mariyata cua jiiitiasanojinijini cua niqutionuhua Pueyasora. ¹⁸Naa cua miiniu nuhuaji Pueyaso Secojoua tiajiniatej, Asia jiyajinijini Judiocuacaari cua naacutucanu tohuataano juucua Pueyaso Secojoua tiajinijini. Janiyari juucua tohuatariquohuani cua cuaqueya cua jeequenu nuhuaji, taa canaa supuetanaa niishitiojosaquiaaricujani. Cuno juuca, majaari queraatia pueya quiniu quiriquiaa Pueyaso Secojonuujaajinia. Majaari quenaaja pueyata cua juayonuutunu quiriquiaajuhuj. ¹⁹¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni.

²⁰ Cucuara saquiritotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quitiuquianu jiyacarijiuhuaj. Nojori cuuara sequeera, ¿cuno camarucuate cua sequecanu janiya sesa miiquianuni?
²¹ ¿Pueyateeri cucuara saquiritotanaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoreesacari janiyani.

²² Camarnu Félix jaara naa tojiquiaari Pablo sequesanotej, nojuajaari pueya sequequiaari:

—Comandante Lisias cuuara tiuquiriijaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pablocuara saquiritotanaa pueya tarinitiaquiaariijaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocucanio, nojori jaara Pablocuara nimiaquia, majaari nocuaji na tenujununoj. Nojori cuuara na niquitiotuura na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquiocuata na tojinu paniyani. Cuaara canaa niquiara pohuataara taate Jesuucua tiuushanojuaarani.

²⁵ Naacuajitij, Pabloori Félix pohuataquiaari nojori niquiara taate pa naata maninia mijiara pa quiniuni. Puhuataquiaariijaariuhuj taate pa naata tama pa cuaqueyajaaja pa cojuanu maniniani, sesa pa miyaquiniuucuaaji. Naajuhuj, Pabloori na numootequiaari Pueyasoori sesa mijiaca saniitionutaniya.

Camarnu Félix jaara naa tojiquiaaritij, jiyanhua shiriiquiaariiri. Pablo sequereeri:

—¡Tariucuaaja! Quia quiaarohuacuarajaara. Janiya jaara jeya quiriqiani, janiyacua quia sequereeraniuhuj.

²⁶ Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocojonura. Nojuajaari juucua jiyaniquiaari Pablo naasucuaari cumaneeca na niquitionutaniya na cartesaanura. ²⁷ Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuuja camarnura jiyatesaaciaari Félix niti. Majaari Félix tohuatenu quiquiaari na nuhuajiria Pablo. Naajaa na tiujaquiaari nujuatesanoori. Naa miiquiaariiri Judiocuaca timitianura nojuaja.

25

Pablo pohuatasacari Festo niquiara Jesujiniji

¹ Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari.

² Jerusalén tiacajinia na quishacari, pueyacuara secojonaa jiyaniujanucuaari tii Judiocuacajinijinio socua tojishano camarucuaata Pablocuara saquiritotanaa quiaari camarnu Festo.

³ Nojoriiri camarnu Festo sequequiaari cuuara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nuquamaji na nishacari. ⁴ Camarnu Festoori saaja nojori riucuaquiaari:

—Njuuatesano quiya Cesareya tiacajiniacuaruhua. ¿Maatucua casaara niyara rishaaren? Janiyacuajaari nocua tacatenutaniuhuanu.

⁵ Camarnuuri nojori sequequiaarijuhuaj:

—Niajanijinijinio socua tojishano pueya cuuara quiojohuara cuata Cesareya tiacajinia. Nojoriiri na naata Pablocuara saquiritotanu cua niquiara tii, cua niishiniuria maninia, Pablote seetanujuanaa sesa miiquianujuuara.

⁶ Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquinu nuhuaji, saniniuuja

tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreesocoriquiano. ⁷Judiocuacaari tari tiuquiijiocuaari Jerusalén tiacajiniijiuhuaj, Pabloocuara na saquiriojotanunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohera sesa nocuara saquiriojotanuquiaari najuhuana queraatia casaa. ⁸Jiyacaritij, Pabloori tama nocuaji na tacusacarijaaja naa sequequiaari:

—Maja sesa cua miiniu quiquianu. Janiyari tariucuacaanu Moisés Rootasano tojiquiaa-jaaniuhuaj. Majaari sesa cua miiniu quiquianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰Pabloori na riucuaciaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuracuaja? ¿Casaara niyaja quia nequesoreyaquia janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuaj, majaari sesa cua miiniu quiquianu Judiocuaca. ¹¹Janiya jaara sesa miiri seetanujuaanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhanani? Naaratej, janiyari quia sequeyani camarnunaa: jiyaniijia César-janaa cuaara cua nequesoreeraqui.

¹²Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia César-cua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

Jiyaniijia Herodes Agripa niquiara Pablo pahuatasacari Jesujiniji

¹³Naa Pablo sequesaaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta. ¹⁴Nojori camueenujusacari camarnu Festo tijaninia, Festoori socua jiyaniijia Agripa pahuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucuata. Nojoriiri cua sequetucanu Pablo cua motenura. ¹⁶Janiyari saaja nojori riucuacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijjoma niya nocuara saquiriojotanuunura-jaatijia. Monu panishano cuaara rihuaneera tamajaaja quenaaja nocuaji, jaara seetanujuaanaa quiaquiri nocuara saquiriojotasano”. ¹⁷Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquiijiocanu, majaari socua cua tarishiniu quiquianu. Janiyari tariquicuaji nequesoreeja cajitiujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. ¹⁸Cuno pojori Pabloocuara saquiriojotanuucanuni, nojoriiri maja quenaaja na saquiriojotanuuni quiriucuaa juhua cua niishiriojosano. ¹⁹Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuaj, Jesu jiyaniishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyaniishanonaari samiitiaquiaariuhua. Saminionaari quiari quiyajaa. ²⁰Naa cua tojihacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹Nojuajaari saaja cua sequecanu: “Jiyaniijia César Augustojanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocuajaatijia.

²²Jiyaniijia Agripaari camarnu Festo sequequiaari:

—Janiyari cuno pueyano tojinuu panijacuahuaj.

Festoori na riuquaquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niqiaariuhua Bereniceta. Nojoriiri tiuquiti-
aquiaari nequesoreeja sohuacajinia, shanohua jacaria na rucuanenuta, shanohua na
toqueya maniniuquiyatajuhuaj. Puereeta niquishano. Nojori tiuquitasacari, nojori co-
jiqiaariiri soldadohua camarucua, mariyata tama cuno tiacajinjiniio camarucuaajaanio.
Camarnu Festoori jiyacari na soldadohua seerataquiaari Pablo na riniuria, nojori tacoji na
nujuatesocoriquiano. ²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajaananaa, cua tojitiare.
Cuno pueyano niaa na niqiyani, queraatia Judiocuacaari nocuara cua saquiriojotanu-
uquiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri
pueyaracaanu cua taajetequiaa. Cua sequetuquiaari: “Cuno pueyano cuara mosaaria
camarnunaa”. ²⁵ Janiyacuajaari tari niishiyani, nio pueyanoori maja sesa na miiniu
quiquianu. Naacuajitij, janiyari niishiriojiyani, ¿pueyanotucua casaara najuhua
mosaareni? Tama nojuajaari cua sequerucuaani, cua jiyaronura nojuaja pa jiyaniijia
César Augustoocua, pa Jiyaniijiajanaa nequesoreenura nojuaja. Janiyari cunora na ji-
yaronutaniyani. ²⁶ Saniniuuja majaari cua niishiniu taa cua pohuatanutaniya cua jiyaniijia
cua naajiojiniani. Cunora, nio pueyano nitirii niya nia nequesoreesocoriquianonijia,
pueyanaa. Janiyari quia panitiaa cutara nojuajanaa quia nequesoreenurani, jiyaniijia
Agripanaa. Quia nequesoreere, cua naajionura pa jiyaniijia Augustoocua casaara nio
pueyano cua jiyaroree nocuani. ²⁷ Majaari cua naata naajaa jiyaronu quiasano pueyano,
maninia nequesoreyaquishoojua.

26

Pablo riuhuanesacari jiyaniijia Agripa

¹Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiaquiri quiocuara pueya saquiri-
jotasano.

Pabloori na juaashiquia sanaquiaari. Naa coteequiaari pocuanuuri:

²—Timiyaniijia jiyaniijia Agripanaa, quia sequesacari cua pocuanura quia niqiuara, tama
cua tacunura cucujijiaaja, Judiocuaca saquiriojotasanojiniji cucuara. ³ Quiaari puetunu
cuarta Judiocuaca miijosanojuanaa niishijiajuhuaj, puetunu canaa nacojotasanoju-
naano. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiyuquishacarijiani

⁴Puetunu Judiocuacajanaari niishiyajuhuj taa quijia cua quiquiaari cua naatujuajinjii
nojoritia cua quishacari cua jiyajiniani, Jerusalén tiacajiniano. ⁵ Cuno Judiocuaca
quia nequesotasureeraj. Nojori cuara quia pohuataara jaara paniri pohuatanu. Cua
mashajajinjii, janiyari seetanujuanaa Fariseo quijiani. Fariseocuacaari puetunu canaa
supuetanaa rootasano Pueyasojinjijianaa tojtiaja cutara, socua tamasaca cuarta Ju-
diocuacajinjii. ⁶ Nojorijaari cucuara saquiriojotacanu cua tiuushacari Pueyasoocua, taa
na samiitianijionutaniuhua macunucuanu. Pueyasoori nojori samiitianijionutaniuhua taa
na sequequiaari tariucuacaanu canaa supuetanaacuajani. ⁷ Quiarijiani, canaa supuetana
Israel doce niqiuohuacujiniio caneno pueyari naa seetanujuanaa Pueyaso sequesano
niqiniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca,
niucuanio, Pueyaso na tojtiasacari. Naa cua sashishacari Pueyaso sequesanojuhuaj
Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa.
⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹Janiyari tarijia sequequiaari tamajaajani sesa cua niishiriojosacari Jesujinjii: “Nazaret
tiacajinjiniio pueyanoocua tiuuniaa pueya paracaariiraj”. ¹⁰ Janiyari seetanujuanaa tara-
tia nojori miitiaquiaari Jerusalén tiacajiniani. Pueyacuara secojonaa jiyaniijianucuaari
cua jiyatequiaari nojori cua miitianura. Naacuajitij, janiyari queraatia Jesuucua tiuuniaa

riuniujuquiaari nujuatejojuajiniani. Nojori jaara puecoosaaquiaarijiuhuj, janiyari jaara-jaaja sequequiaarini: “Maniniacuaja, cuara puecoosaria”. ¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

¹² Janiyari naa miitiaquiaari nojorini puetunu cuarta Judiocuaca rerejoja tiacajiniaqueyayanaa canaa jiyajinia. Janiyari jiyanojua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuacaanu tamonu jiyaca tiacajiniani.

Pablo pahuatasacari taa Jesuucua tiuujiara na quiquiaarini

¹² Naacuajitij, janiyari juucua quiariquiaa Damasco tiacajiniani, pueyacuara secोजना jiyaniijianucua jiyarosano. Janiyari tiriaa quiariquiaani cua pajenura socua Jesuucua tiuuniaa pueya cua miitiasocoriquiano. ¹³ Nucuaco cua quiasacari jiyaniijia Agripanaa, janiyari jiyocuaaanuji nunusaaquiaarini, cuata quiojonaajuhuj. Cuno shacantuucaari socua jiyanojua shacantuuca quiquiaari pananujiniji. Panacariiri jiyacari quiriqiaa. ¹⁴ Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiqiaari rupaani. Hebreo rupaajinia cua sequeriquiaari: “¿Saulo, Saulonaa! ¿Casaara puera quia miitiaa janiyani? Naa quia miishacariitij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. ¹⁵ Janiyari na sequereeni: “¿Cantequia Jiyaniijianaa?” Cua riucauereri: “Janiyacuajaari Jesuni, quiaa na miitiaquiaani. ¹⁶ Quia sanerohua. Janiyacuajaari quiocua muetareeni puetunu cua panishanojuanaa miijiaa rupaani quia jiyatenura quiajaniya, quiarijia janiyajiniji quia niquishano quia pahuatanurajuhuj. Naajuhuj, na nuhuaji janiyari quiocua muetanutanihuani janiyajiniji quia niquishanorano pahuatana quia quiniuria. ¹⁷ Cua jiyarosacari quiajaniya, janiyari quarta Judiocuacaacujaji quia cojanutanijacuajani, tamonu jiyacajinijinio taucuaacujajinio, tiqiyocua quia rucuanesacari janiyajiniji quia poojotasacari. ¹⁸ Nojoriicua quia jiyaroyanjia, janiyajiniji nojori quia pahuatanura, maja juhua nimishitiu nojori quiniuria pueyaracaanu. Quia pahuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jitiisanonijijianaa nojori jitianurajuhuj”.

Pablo pahuatasano Jesu tojiijara na jatanujiniji

¹⁹ Naacuajitij jiyaniijia Agripanaa, janiya jaara naa tojiqiaari sequeshiyano jiyocuaaanujini, majaari cua tarijionu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pahuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaano. Maja saaja cuarta Judiocuaca cua pahuatanu quiquiaari Jesujiniji, janiyari taucuaa pahuataquiaarijiuhuj. Nojori nacasuquiaarinijia cuara sesa nojori miishano carteera, Pueyasooocua nojori tacatonuhua nojori jiuujia. Janiyari nojori sequequiaarijiuhuj, cuara saaja maninia miijica quiriia, na niishishaanura Pueyasoori seetanujuanaa nojori jataniquianu. ²¹ Naa cua pahuatanuucuatej jiyaniijianaa, cuarta Judiocuacaari cua quiatucanu Pueyaso Secojonuuja tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pahuatanu Pueyasojiniji; poonijionutesano pueya, tojishano pueyano. Majaari tama cua niishishanojuaja cua pahuatanu quiquiaa. Janiyari pueya niishitiojquiaani taa tariucuaaanu Pueyaso sequesano caminiujunaa naajionuutaquiaaricujajani, naajuhuj, taa Moisés naajiotasano quiya tariucuaaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara samiitarohua, nojuajiniji pahuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya

nojori jaara nocua tiuuri, nojoriiri samiitiaconutaniuahuajuhuj; Judiocuaca, tau-cuacanio”.

Pablo tiuutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacacuaiaari:

—¿Taa quia miyani Pablonaa? ¿Quia mueyocuaquui seseree puera quia niishiniucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuara-cashiniu. ²⁶Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaacuaiaaricuaa Jesujiniji, Jesuucua tiuuniaa pueya miishanojinijijuhuj. Puetunu canaa miishanojuanaari maja jiyasohujaja na miishaanu quiquiaa. ²⁷Jiyaniijia Agripanaa, ¿quiaate tariucuaaanu Pueyaso sequesano caminiujunaa naajionuutasanoocua tiuyajuhuj? Quiaacuajari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, taa quia paniyacujani. Pueyaso maara seetanujuanaa naara quia jiyatere taa quia sequeyacujani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniurajuhuj. Maja naatej, taa cumayocuata moronucua cua nujuatashujanijia.

³⁰Jiyacaritij, jiyaniijia Agripaari sanequee, camarnu Festojuhuj, Berenicenio, puetunu cuniqui nojoritia cajitiuniaa pueyano. ³¹Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuhuj.

³²Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyacuquianu pa jiyaniijiacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. ²Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Juloori jiyacari cuniqui maninia miiquiaari Pablo. Nojuajaari Pablo tarinitiaquiaari cuara tacaara na rupuenaa pueyacu, nojori na saruhuanura Sidón tiacajinia, naajuhuj, na rupuenaa niqutionura puetunu Pablo panishanojuanaano. ⁴Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatijani. Paratuuri buque nacaacoji piyarojoriquiaa saaja. ⁵Canaari Sidón tiacajiniji niutiaquiaari Cilicia jiyacuani, Panfilia jiyacuano. Canaari na shuriquiumia jaaretamaani. Canaari Mira tiacajinia tiuutiaseeni, Licia jiyajinia.

⁶Capitánri cuniqui riuriataquiaari Alejandría tiacajinijinio buque. Italia jiyajinia quariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. ⁷Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri

saa canaa patariquiaajaa. Naacuajitij, canaari Salmón jiya tucuaatijaniyojua shuriucuaratamaani. Canaari Creta jiya tucuaatija camarucutamaajaanihuaj. ⁸ Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

⁹ Canaari puera tarishiquiaari tarini. Judiocuaca miaquenuyaquiniu juucaari tari shocouquiaari. Jiyacaritij, shoniniacu caminiajiniaari puereeta quijia tari buqueta jaaretanura. Pabloori juucua sequequiaari:

¹⁰ —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiniutianiya. Paa naasucuaari cusununutanijahuaj. ¿Casaatejaj pa toyani?

¹¹ Pablo jaara naa sequequiaaritij, majaari buque jiyatana capitán tojinu quiquiaarinioj. Saaja buque camarucuaanaa tojiquiaariiri, buque capitánno. ¹² Cuno tacatajajiniiji canaa tii tiuutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—¡Niiquiji pa quiaare! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatijaacuaaja.

Shoniniacu caminiajinia paratu piyarojosacari jiyanojua nojori

¹³ Jiyacaritij, paratuuri jacaria piyarojonu coteequiaari pananu shuucuaaji, canaa muenecarajiniiji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatija shuriuquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyanojua piyarojocuaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacoci. Paratuuri saa canaa patariquiaajaa. Nocuaji, canaari buque tarinitiaquiaarini paratu cuara na capotaara tamajaaja. ¹⁶ Paratuuri canaa capotaquiaari tamonu jiya tucuaatija tamajiria. Cuno jiya tucuaatija sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojuaa poonijioquiaari cuniquini, canaa tacaninihuara buque cacojiria cuno boteniyojua. ¹⁷ Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucuaaji. Pueyari na puerenuta sequetuquiaari:

—¡Paratuuri pa capotanutaniya jaaquijiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaquequiaari, paratuuri saaja jiyanojua piyarojoriquiaajaa. Naaratej, nojoriiri buque pasano casami quejoonu coteequiaari moojinia. ¹⁹ Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. ²⁰ Tari canaa shocojoquiaariiri queraatia juuca. Majaari quenaaja canaa niqiniu quiquiaari pananu, riyano. Paratu piyarojosacari canaacua, mohuacaari socua jiyanojua cajiniuucuaquiaari canaacua. Nocuaji, canaari niishiriojoriquiaani canaari quiarijia cusununutanianiyani.

²¹ Majaari tojetaarucuaajanaa quenaaja canaa miaquenu quiquiaari pueyaracaanu. Pabloori jiyacari njuaquiaari canaata quiniaa tajiniiji. Naa nojori sequequiaariiri:

—Camarucuaanaa, niaa jaara tojiquianu quenaaja cua sequesano, maja pa ruparetanura Creta jiya tucuaatijajiniiji, paatuma naa miya naquiyani. ²² Naajaa, nioojia nia cumaquiri. Maja quenaaja niquiriyatu pajaniyajinijinio cusunu qiniutianiya. Pa buque cutaraari juhua rapitiasaanutaniya puetunujuanaa. ²³ Janiyari quiarijia cua maquenujiniua cua Jiyaniijia Pueyaso seru niquirii cua shuriucua njuuaanoni. Janiyari cuno Pueyaso tojjijiani. Janiyacuajaari na pueyanoni. ²⁴ Pueyaso seruuri cua sequeree: “Majaari puereenu Pablona. Quiaacuajaari jiyaniijajanaa Augustooocua tiuquiniutianiya Roma tiacajinia. Quiaari na

tacoji nujuanutaniya quia pocuanura. Naajuhuj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyajuhuj”.

²⁵ Naacuajitij camarucuaanaa, nioojia nia cumaquiri. Janiyacuajaari seetanujanaa niishiyani, naa quiniutianiyari taa Pueyaso seru sequeree janiyacujani. ²⁶ Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adria jinia quiri quiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetari quiaa jiyareta. Jaara shiyaqueya quiri quiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸ Buque jiniacuma poonijionaari jiya shanacuciaari, na niishiniuria queroniti quiri quiaajaa. Na shanacutusacari, saaja treinta y seis metro queroni quiri quiaari. Jaara socua na tacoji shanacuciaari-uhua, saaja veintisiete metro queroni quiri quiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohaneyocuata morojotasano cuatro niajaaca casaa quejootuquiaari, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. ³⁰ Jiyacaritij, buquejinia poonijionaa pueyari juucua cuno niucua jiyasohuaja mashiyocuatanu paniriquiaa buquejiniji. Naaratej, nojoriiri buque nacaacoji sapojonu tinijotari quiaa niajaaca casaa moojinia. Jiyasohuaja roshiniutiriquiaa jiyocuacaanu tacanishano boteeri, tii na mashiyocuatanura. ³¹ Pabloori jiyacari na jiyatana capitán toquiaari, na soldadohuano. Naa nojori sequequiaari:

—Cuno pojori jaara niya juhuaqueyaquimia pata, niaari cusonuuriquiano.

³² Soldadohuari ritia jiyocuacaanu tunusano bote neyocua jiyatajotaquiaari. Moojinia na tintiuriiri. Paratuuri na piyarojoquiaari tamoco nojorijiniji.

³³ Juhuaquenu panishacari, Pabloori puetunu buquejinia quiniaajanaa sequequiaari cuara quenaaja miaquenuura. Naa nojori sequequiaari:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuj. ³⁴ Quiarijia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu nijaniyajinijinio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji miaquerohuari.

³⁶ Tamasaca jaara naa niquiquiaari Pablotej, puetunu nojorijianaari nooja cajitiquiaari. Pan satureejaariuhuj. ³⁷ Cuno buquejinia, puetunu canaajanaari quiquiaarini dosciento setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajinia

³⁹ Jaara juhuaquequiaari, buquejinia poonijionaa pueyari maja na niishini quiquiaari teyano jiya tucuaatijatejaara cunoni, nojori na niquiriquiaani. Nojoriiri cuno jiya tucuaatijaacua niquiquiaari puereetuca surocohua. Jaaquiaari puetunu na shocujanaa quiri quiaa. Naacuajitij, nojoriiri sequetuquiaari:

—Buque pa saniri shiitianiuni cuno surocohuama.

⁴⁰ Buquejinia poonijionaa pueyari niajaaca sohaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niquinijotetajaa roshinitiaquiaarijuhuj, buque tacutajara. Buque nacaacuaji teja toque tacanitia-tureejaariuhuj. Buqueeri canujataree jaaquijaniara, paratu piyarojosano. ⁴¹ Buqueeri saacarijia jaaquijinia riitaseequiaari, caminia cajiniuucasacari mohuaca paatishano jaaquijinia. Buque nacaari jiyanohua tiuquishii cumaetia jaaquijinia. Majaari quenaaja na naata pooniu quiri quiaa na matasaquiji. Na pajaari maa rapuequiaarijia moo cajiniuucasacari jiyanohua nocua. ⁴² Soldadohuari nojori jiyatasano quioosano pueya pucoonu paniquiaari cuniquijia, nojori jiyanihacari cuacnutaniya naasucua, mashiyocuatumaaari.

⁴³ Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuara cuacoora coteenu, jaaquiajinia rupaatiushi-
icuaari. ⁴⁴ Cuaashijianucua saniniujia cuara buque jiniacumaji suruhuatuneeacaacia
jacamatuura na cuatajara. Tamasaca cuara buque neecaacia jacamatuurajuhuj.

Naa miitiquiaariiri. Puetunu pueyajanaari jaaquiajinia rupaatiushiiquiaari.

28

Pablo quishacari Malta jiya tucuaatiajajinia

¹ Puereeta canaa cuaconu nuhuaji shoniniacu caminiajinia, canaari namitia puetunu-
juanaa maninia tacataseequiaari cuno jiya tucuaatiajaacuani. Canaari jiyacari shusha
niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacia
quijia taucuaacari maninia canaacua jiyanoocuaari. Shiniquiaari quiriquiaa. Maruuri
niriqiaajuhuj. Naa canaa shiniquiosacaritij, taucuaacari canaara noshitiquiaari puere-
tuuca mani. Na nuhuaji canaa sequetureeri:

—Miji. Nia jitiushii.

³ Pabloori naanacucua reratejoriquiaajuhuj. Manijinia na quejooriquiaari. Jiyacaritij,
soconuquiiri maniucuaaji mashiriquiaa juucua. Pablo juaashiquia saariiri. ⁴ Cuno jiya
tucuaatiajaacia quijia pueyari soconu niquiquiaari Pablo juaashiquiaacuaji sohuataano.
Jaara naa niqitiquiaaritij, tama nojorijiaarjia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniniacu
caminiajinia na cuasacari buquejinijiri. Pueyasoori quiarjia saniniujia cunora soconu
na sajitirii na cusonura.

⁵ Pabloori saaja manijinia majiriatree soconu. Majaari quenaaja na sajiyashi
noonu quirii. ⁶ Puetunu pueyajanaari na sashiriquiaa, taacari na porenutaniyani.
Na sashituriqiaajaariuhuj na jiyaniushacari canashiyaquiji cusonutaniya naasucua.
Naa pueyaracaanu na sashitushacari juucuatej, nojoriiri socua tamaatia niishiriojonu-
quiaari. Nojoriiri Pablorini sequetooquiaari:

—¡Cuno pueyano naasucuaari pueyasojuhuanajaj!

⁷ Cuniqui canaa quishaquini, canaari tamonu pueyano cuhuariquia shuriucua
quiriquiaani. Na camaruri cuno Malta jiya tucuaatiaja camarnu quiquiaari. Na
sesaari Publio quijia, maninia pueyano. Nojuajaari canaa masuucuaari na tiacora.
Canaa mianuutequiaari maninia tiiri. Canaari jiuujianaraca juuca na tiajinia
camueequiaarini. ⁸ Cuno camarnu queeri jiyacari cusosu matariquiaa. Jiyanhua
nasecaari quiriquiaa. Coriyacu rurequeriquiaajaariuhuj, na jiniacuma noonunio.
Pabloori nocua tiuquiquiaari na matasaqui. Pueyaso secojoree nocuaraari. Na
secojosacari, nocua niaquiaari na juaashiquiaari. Pueyanoori naatarohua. ⁹ Cuno
jiya tucuaatiajaacia cusosuhua jaara niishiquiaari naa Pablo naatanishanocuaa cuno
pueyanotej, nojoriiri nijioquiaarjijuhuj. Pabloori puetunujuanaa na naatanijioquiaari.
¹⁰ Naa Pablo miiniucuatej, cuno pueyari na jiitiasano casamijiniji canaa niqitiojquiaari
nareja. Na nuhuaji, canaa jaara quiaquiaari cuniquiji tamonu buquejiniani, nojoriiri
canaa jiyatajara canaa panishano niqitiojotquiaari narejajuhuj.

Pablo tiuquishacari Roma tiacajinia

¹¹ Canaa sashishacari shuniya cuara tajiiria, jiuujianaraca racaari canaa shocojo-
quiaari Malta jiya tucuaatiajaacia canaa quishacari. Alejandria tiacajinijinio buqueeri
tii nujuatariquiaajuhuj. Shuniyacuaaji tiutiaquiaari tiiquiiri. Cuno buque nacatuuri
juhua nojori pueyasohua Cástor nacara quejasano quiquiaari, juhua Pólux nacanio.
Canaari cuno buquejinia quiojoquiaari cuniquijini. ¹² Canaari Siracusa tiaca tacatajajiniji
tiutiaseequiaarini. Canaari jiuujianaraca juuca camueenujusee tiini. Siracusa tiacaari
Sicilia jiya tucuaatiajaacia. ¹³ Cuniquiji canaa quiasacari, canaari cuno jiya tucuaatiaja

shuriucuataareeni. Canaari Regio tiacajinia tiuquishiini. Tariqui, paratuuri maninia piyaroriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. ¹⁴ Puteoli tiacajinia Jesuucua tiuuniaa pueyari canaa masuuquiaari na tiajinia. Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. ¹⁵ Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanshano tiacajinia. Pablo jaara narta Jesuucua tiuuniaa niiquiaari, noojia cumaquiquiaariiri. Naaratej, Pueyaso sequetquiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutioquiaari Roma tiacajinia quioosano cojuanaa camarnu. Pabloori saniniuujia tarinitiasaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaanaa, majaari cua miiniu quiquiaari sesa parta Judiocuacani. Majaari cua numueejushini quiquiaa pa supuetanaa niishitiojosanojuhuaj. Naajaa, pueyari cua quietucanu Jerusalén tiacajinia. Cua niqutiojukanu Romano pueyari, cua morosaanura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuara cua jiyarotuura jiyaniijajanaa nia Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicua, cuarta Judiocuaca nojori quiniucua. ²⁰ Janiyari cunora nia niqiniu paniriquiaani, cua pohuatanura nijaniya taa puetunujuanaa parta Israel pueya niishiyacujani, nijaniyajuhuj; macunucuaari samiitianijiosaanutanihua. Janiyari cunora cumayocuaa moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajonee, canaa pohuataaanura quiajanijajiniji. Cuniqijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. ²² Canaari saaja niishiyani, puetunu tiqiyocujanaa sesacasaaquiaaquiniaari Jesujiniji pohuatasano. Quiaa mariqui cunojiniji canaa pohuatare, canaa niishiniuria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishi-tiuquiaariiri. Pabloori nojori niqiuara pohuatanu coteeqiaari tariquicuaj. Naa ninijareejaari. Juucua nojori niishitioquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariiaariuhuj taa Pueyaso jitiaa na jiyanooshano pueyani. Naajuhuj, tariucuaaanu Moisés naajiotasano Jesujiniji niishitiojoquiaariiri, Pueyaso sequesano caminiujunaa naajionuutasanonio. ²⁴ Noojiaqueya nojorijinijiniori Pablo sequesano tojiquiaari cutara. Tamasacaari saaja na cuaracashitiquiaari saniniuujia. ²⁵ Nojorijinijinio jaara Pablo niishitiojosano tojiquiaari cutara, tamasaari nojoritia juayonuutano coteeqiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiiri seetanujuanaa tariucuaaanu Pueyaso sequenu panishano caminiujunia Isafas pohuataniquiaari parta Israel pueya niqiuara, jaara na sequequiaari:

²⁶“Quia quiaare cuno pueyacua. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianiyajuhuj. Majaari quenaaja nia niishiniu quiniutianiya’.

²⁷Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuj, na niquitiaquiniucuaaji, maja na numaata na tojitianura, noojiata na niishitiuyaquiniurianio. Naa jiyatecanu nojorinjia, maja na niishitiuniuria janiya, mariqui cucua tacateturohuari, nojori cua naarajonura”.

²⁸Pueyanaa, nia niishiri. Niaa jaara ruuretare cua pohuatasano Jesujiniji, taucuacaari saniniuujia pohuatasanutaniyacujua, taa Pueyaso jiyanooniu paniya pueyani, maninia na jiitianura nojori. Taucuacaari na tojitianutaniya cutara.

²⁹Pablo jaara naa sequequiaari nojoritij, Judiocuacaari quiojiyarohua. Tama nojorijiaar-ijia juayonuutaarohua na quiojosacariuhua.

³⁰Caapiqui marijiaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niquiniuria, nojuajaari maninia na masequiaari na quijia tiajinia. ³¹Majaari jiyasohuaja na pohuatanu quijia taa Pueyaso jiitiaa na jiyanooshano pueyani. Jiyaniijia Jesujiniji niishitiojuajaari-uhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupajaanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocujaari tariucuacaanu na sequenu panishano caminiujuiniaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujuanaa Pueyaso Niyanu. Paari quiarjia na niishiya seetanujuanaa cutarani, Pueyaso Sohuanu samitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumacajanaa na jitianurajuhujaj. Nojuajaari pa Jiyaniijia Jesucristo.

⁵ Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaqiriiri puetunu jiyacajinjini pueyajanaa canaa tiuutiinuria Neyanuucua, na tojtijaca nojori quiniuria. ⁶ Nijaniyajuhujaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhujaj. ⁷ Puetunu Pueyaso panishano pueyajaanaa, canapue Pueyaso saquiriojoquiaari saa maninijaja nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuaara cumaqiriiri niajanija, maninia na tojjiaca nia quiniuria. Naajuhujaj, nojori cuaara noojiaca cajitiria shuqiriiaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu panianijia, janiyari nia timitiaquiaani, maninia nijaniyajiniji pueya pohuatanuucua puetunu jiyacajinijajanaa. Nojoriiri pohuataquiaa, niaanaari maninia tiuujica pa Jiyaniijia Jesucristoocua. Naa Jesucristo miiniuucua nijaniyatej, janiyari cua Pueyaso sequequiaani: “¡Paacarasho! Quiaari jiyanoehua maninia”. ⁹ Janiyari pueyaracaanu cua Pueyasora poonijioquiaani puetunu cua cumacatajanaa, Neyanujiniji cua pohuatanura. Pueyasocujaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. ¹⁰ Naa cua secojosacari nojuajatej, janiyari na sequequiaani cuaara cua tiuqitiiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia niquiniuucua jiaatiaani, cua cumaqiniuria socua nijaniya na Sohuanu cumacata, socua jiyanoehua Pueyasooocua tiuujica nia quiniuria. ¹² Majaari cua cumaqiniu paniniu saa nijaniyaja. Janiyari paniani nia cumaqiniuria janiyajuhujaj. Naacuajitij, mariyata pa tiuushacari Jesucristoocua, paari mariyata cumaqitiojonutaniyani.

¹³ Cuarta Pueyaso muerasunaa, janiyari nia sequenu paniani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu panija tii Roma tiacajiniani, tee nia quiyacuajani, cuno taucuaca tiuuniuria Jesuucujuhujaj. Tamonu jiyacajinia taucuacaari tari Jesucristoocua tiuujica quiyacuaa, cua pohuatanuucua Jesucristojiniji nojori niquiara. Janiyari naa miini panija nia tajinijuhujaj. ¹⁴ Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojyashijia cua quini paniniu. Naaratej, janiya cuaara pohuataara na rupaa puereetuuca tiacajinia pueya niquiara, mariyata tiqiyocua quijica pueya niquiarajuhujaj. Janiya cuaara na rupaa pohuataara niishijica pueya, niishiyashijica pueyano. ¹⁵ Janiyari cunora quianu panija Roma tiacajiniani, cua pohuatanura Jesucristojiniji nijaniya.

Pueyaso Rupaari cumaacaraca na jataniniuria pajaniya

¹⁶Maja cutaraari cua caririquiniu Jesucristojiniji cua pohuatanura. Jesucristo rupaacuaa-jaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiushacari. Puetunu Jesuucua tiuunaa pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracaani. ¹⁷Jesucristo pohuatasanojiniji paari niishiyani, Pueyasoori pa jiyanoquiaa sesa pa miishanojiniji, saaja Jesucristoocua pa tiushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuacaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasoocua na tiushacari”.

Pueyasora, puetunu pueyajanaari sesa miijiaca

¹⁸Pueyasoori jiyocuacaanuji na tojiyashijiaca pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa saniitionutaniya jiyanhua na juaaniutia. Naa saniitiosaanutaniyajaarihuaj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹Nojori jaara Pueyaso niishiniuucua jiaatiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajiniji niishiya. ²⁰Majaari pa naata Pueyaso niqiniu pa namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niqishacari puetunu na shipinishanojuanaa. Na shipinishanojiniji niishishiyajaarihuaj, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijiniji”. ²¹Nojoricuaajaari Pueyaso niishijia najuhuanaj. Na niishijiaca nojori quishacari, nojoriiri saaja na rerequeteja. Nojoriiri na tojitiaaquiuaa-juhuaj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojoriijaarija jiyanhuaa cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua niishiquiria quiquiaa. ²²Nojori jiyanhacari nojori cutaraari seetanujanaa niishijiaca, naacuajitij nojoriiri socua niishiyashijiacara quiquiaa. ²³Nojoriiri Pueyaso shuquiritiaaquiuaa tama nojori shipinishano casaajaaja nojori shuquiritianura. Pa shipininiya Pueyaso cutaraari jiyanhuaa cumaacaraca, pueyaracaanu quijiajuhuanaj. Nojoriiri Pueyaso niti shuquiritiaquiaa tama nojori shipinijiosanojuaja. Cuno, nojori shipinijiosano Pueyaso niti na shuquiritiasocoriqianoni, cunoori quiquiaa juhua shaajeja pueya niqishano, juhua jaacuatujuaca niqishanojuhuaj, juhua nacujiniaaco canujuucuatujuaca niqishanojuhuaj, juhua roshiyocuatujuaca niqishanonio.

²⁴Naaratej, Pueyasoori nojori tarinitiaquiaa sacuaratia casaa nojori miiniuria tama na cuaqueyataajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. ²⁵Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonunu nojori tojniuria saniniuuja. Naaratej, pueyari Pueyaso shipinijiosano casami shuquiritiaquiaa, saniya na Shipininiya niti. Nojuajaari pa Pueyasojanaa cutara. Nojuaja cuara shuquiritiasaaria pueyaracaanu cutara.

²⁶Pueya jaara Pueyaso cartequiaa, Pueyasoori nojori tarinitiaquiaajuhua, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuaa cararaatia casaa miiquiaari juhua canuu. ²⁷Naajuhua, canuuri maajitia quiniu paniaquiquiaa, sacuaratia na jiaatiasacari narta canuucua. Canuuri jiyanhua cararaatia miitioquiaa. Naa nojori miiniuucatej, nojoriiri tama na cuaqueyajaaja miitiaquiaa naquiya na miishaanura.

²⁸ Nojori niishiniu paniyaquiniuucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonu-
ujuaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa
miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca
quiniuucua jiaatiajaca. Sesa miiquiaari na panishano nojori jiitanura. Nojoriiri tamasaca
pueya jiiitasano casamiicua jiaatiajaca. Nojoriiri pueya puecoojuaca. Nojoriiri pueya ruu-
taqueja. Nojoriiri na panishano casami nohuasenuujuaca jiyasohua. Nojoriiri narta pueya
miitianu panijiaca. Rimiaacaturijiaariuhuj. ³⁰ Nojoriiri sacuraatia sequejoju narta
pueya. Nojoriiri Pueyaso niquiniu paniyashijiaca. Nojoriiri tamasaca soojeaca. Nojoriiri
tama na cuaqueyajaaja jiyatequiaa juhua socua maninia pueyara tamasacajiniji. Nojoriiri
najuhuana sequeja: “Janiya maninia miijiani”. Nojoriiri jiyanohua niishijiaca, niishishoo
sesa casaa na miiniuria. Nojoriiri na queya tojiyashijiaca. ³¹ Nojoriiri seetanujuanaa
mosanucua Pueyaso na tojtiaaquiniuucua. Nojoriiri saaja tama na rupaajaaja jataja.
Majaari na sequesano na miiniu. Nojoriiri narta pueya paniyashijiaca. Majaari nojori
niishiniu jiyanooniu. Majaari nojori niishiniu taraajenu narta pueyacu. ³² Nojoricuajaari
tariucuaaanu naa Pueyaso sequesano niishiya: “Cante naa sesa miijiacani, cuaara
puecoosaaria”. Naajaa, nojoriiri saaja sesa miiquiaa juhuajaniya. Majaari nojori
quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuj
tamasaca jaara sesa miiri juhua nojori.

2

Pueyasoori sesa miijiaca saniitionutaniya sesa nojori miiniuucua

¹ Naacuajitij pueyanaa, niaa jaara tamonuucua tonujujua quiriquia, majaari nia
jiyaniniu niaari sesa miyashijiaca cutara. Niaa jaara tamonuucua tonujure sesa na
miishano, niaari tama niaacuarajaaja tonujija naa sesa miiniu niishijiaca nia quishacari-
juhuaj. ² Paacuajaari niishiyani, Pueyasoori puetunu sesa miijiacajanaa saniitionutaniya,
maninia na niishishacari nojori miijiosano. ³ Quiajaniya saniniuujia, quiarta pueyacuara
tonujujanaa, majaari quenaaja quia jiyaniniu quiaa saniitioyakuishaanutaniya. Quiaari
saniitiosaanutaniyajuhuj. Quiaacuajaari juhua nojori, sesa miijijuhuj. ⁴ ¿Majateeri
quia niishiniu, Pueyasocuajaari pueyaracaanu quia sashiquiaa juucua, quioojia quia
tatonuhua nocua? Naaratej, nojuajaari pueyaracaanu maninia quia miiquiaa. Quia
rejeretaquiaaariuhuj. ¿Quiaateeri jiyaniquiaa Pueyasoori naa maninia quia miiquiaa,
maninia quia quiniuucua na niquiara? ¡Maja! ⁵ Quiaari quioojia tacatonu paniyaquiquiaa,
sesa quia miishanojiniji quia taraajeyakuishacari. Cunora, quiaari puetunu sesa quia mi-
ishanojinijijanaa saniitiosaanutaniya jiya puequesacari. Jiyacaritij niishishaanutaniyari,
Pueyasoori seetanujuanaa maninia saniitiojua. ⁶ Pueyasoori puetunu pueyajanaa miiniu-
tianiya taa nojori miishano quiquiaari mijiriacuajani. ⁷ Naacuajitij, Pueyasoori maninia
miijiaca jiyatenutaniya pueyaracaanu rishijiacara. Nojoriiri pueyaracaanu maninia
miijiaca quiquiaari mijiria, Pueyaso timitiasano nojori quiniuria, shaajeyashijiaca nojori
quiniurajuhuj. ⁸ Saniniuujia, Pueyasoori na tojiyashijiaca saniitionutaniya jiyanohua
na juaaniutia. Naa saniitiosaanutaniyajaariuhua noo pojori, canapueje saaja sesa miiniu
panijaca quiquiaarini. ⁹ Puetunu sesa miijiaca pueyapuejanaa naquiyia miishaanutaniya,
taa Pueyaso tojiyashijiaca cuarta Judiocuaca miishaanutaniyacuaani. ¹⁰ Saniniuujia,
Pueyasoori puetunu maninia miijiaca pueyapuejanaa miiniuutianiya maninia, taa maninia
miijiaca Judiocuaca miishaanutaniyacuaani. Pueyaso timitiasano pueya nojori quiniu-
cua, nojoriiri jiyanohua shuquiriaatia quiijaca quiniutianiya pueyaracaanu. Naacuajitij,
nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacanio. Puetunu
maninia pueyajanaari maninia miishaanutaniya. Sesa pueyari saniitiosaanutaniyacujua.

¹² Naacuajitij, pueya jaara Pueyaso rootasano Moisés niishiyashijiaca quiriquia, naajaa,
nojori jaara sesa miijiaca quiri, nojoriiri saniitiosocoriquiano. Naajuhuj, pueya jaara

Pueyaso rootasano Moisés niishijiaca quiriquia, nojori jaara na tojiyashijiaca quiquiaar-iijuhuj, nojoriiri cuno Moisés Naajioneejiniji nequesoreesaanutaniya na tojitiaaquiniucua. ¹³ Majaari nia jyaniniu niaari jyanooshaanutaniya sesa nia miishanojiniji nareja najuhuana nia tojishacari Moisés Rootasano. Niaari jyanoyaquishaanutaniya maja seetanujuanaa na tojijiaca nia quiniucua. Noo pojori cutaraari jyanooshaanutaniya, canapueete seetanujuanaa na tojijiacaacujani. ¹⁴ Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacuajitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniucuatej, niishishiyari, Pueyaso rootasano Moisésri juhua nojori jiuujiajinia naajio-tasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajaanaani, jiyacaritij, tama pueya jiuujiaari nojoriicuaa tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacujani cua pohuatasacari Pueyaso rupaa Jesucristo-jiniji.

Pablo nacasusacari Judiocuaca nojori tojitiaaquiniucua Moisés Rootasano

¹⁷ Cuarta Judio pueyanonaa, quiaari jyaniya quiaa Pueyaso pueyano cutara, na saquirojosano Israel pueyajinijinio quia quishacari, Moisés Rootasano niishijia quia quishacarijihuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹ Quiaari sequequiaajuhuj: “Janiyacuaajari seetanu rupajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. ²⁰ Janiyari niishiyashijiaca niishitiojojuani, naatujoorinio, maninia cua niishishacari seetanu rupajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia mijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejoia quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinjicuaraarini? ²³ Quiaari sequequiaajuhuj: “Moisés Rootasanoori jyanohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. ²⁴ Cunora, tariucuacaanu Pueyaso Rupajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasooacara rimiaaquequiaa sacuaratia, Pueyaso tojiyashijiaca nia quiniucua nojori niquiara”.

²⁵ Cuarta Judiucacanaa, Pueyasocuaajari pa supuetanaa rootaquiaari pa cararaatiuuquia co cuaraa miatesano quiiria, na saquirojosano pueya pa quiniucua. Naacuajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojijiaca quiri. Saniniuujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhuana miatesano quiya. ²⁶ Saniniuujia, taucuaca jaara maninia mijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. ²⁷ Naacuajitij, na cararaatiuuquia co miatesoo tahue jaara maninia mijia quiri, taa Moisés Rootasano sequeyacuajani, nojuajari jyanooshaanutaniya, Pueyaso muerasu na quiniuria. Quiajaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya

quia tojiyaquiniuucua Moisés Rootasano. Naacujitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocujajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojjia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari nijaniyatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaaraini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajajaari pa quishacari Judiocuaca. Pueyasocujajaari Judiocuacaacia tiuuquiaari nojori jitianura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaa quiya, ¿Pueyasoteeri cunora na rupaa jatanutanijahuaj? ¡Maja! ⁴ Puetunu pueyajanaa jaara sapojonuucua quiriqia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhuj, pueya jaara quiocuara tonujure juucua, puetunu nojorijianaari sanaajasaanutaniya, saa maninijaa quia miiniuucua pueyaracaanu”.

⁵ Pa supuetanaa tiuyaquiniuucua seetanu Pueyaso rupaacujanaa, naacujitij, mijiria quiniaa pueyari niishiya, Pueyasoori socua jiyanoohua maninia pueyajiniji. Sesa pa miinujiniji, paari niishiyani Pueyaso cutaraari jiyanoohua maninia. Naacujitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Jua! Juhua niishiyashijia pocuareenijia. ⁶ ¿Seetanujuanaa, Pueyasoori sesa miyashijia! Nojuaja jaara sesa mijia quiriqiajuhuaj, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jitiaja. Naaratej, ¿Pueyasotucua casaara cua saniitioreni?” ⁸ Teyano pueyanote naa sequejani, nojuaja naasucuaari naa sequejajuhuj: “Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuucuaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa mijiacani

⁹ Quiarijia, jaara naa quiritij cuarta Judiocuacanaa, ¿paateeri socua maninia mijiaa taucacajiniji Pueyasorani? Maja. Janiyacuajajaari shusha nia pohuatariquiaani, puetunu mijiria quiniaa pueyajanaari sesa mijiaa; Judiocuaca, taucucania. ¹⁰ Tariucuacaanu Pueyaso Rupaajiniacuajajaari naa naajiotasano quiya:

“Majaari quenaaja niquiriyatu maninia mijia quiniu. Shaaqui tojetaarucujanaa.

¹¹ Majaari quenaaja maninia niishiriojojua pueyano quiniu. Majaari quenaaja Pueyasocua jiaatiaja pueyano quiniujuhuaj. ¹² Puetunu pueyajanaari Pueyasocujaj tashuquoorucuaa. Puetunu nojorijianaari seserucuaa. ¿Cante maninia mijiani? Shaaqui. Shaaqui tojetaarucujanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocuateja saa sapojonuraja. Cuno pojoriiri juhua soconu noonacu jitiaa na rupaama, rimiaacatuajuri nojori quiniuucua. ¹⁴ Nojori jaara pocuare, saaja tamasa sesacaquiaari, puera juaajia

nojori quishacari. ¹⁵Nojoriiri puecoojuaca. Puereeta nanaca shootejaca. ¹⁶Puetunu mijiria nojori miishanojuanaari casaa sesojua, narta pueya taraajetejajuhuj. ¹⁷Majaari nojori niishiniu jiyanooni. ¹⁸Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹Paacuaajari niishiyani, puetunu Pueyaso Rupaajinia naajiotasanojuanaari Pueyaso saquirojosano Judiocuacara quiquiaari, nojori niishiniuria, puetunu pueyajanaari sesa miijiaa. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaa; Judiocuaca, taucuaicano. ²⁰Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹Pueyasoori quiari naataja pa niishitiqianu cutara, taate pa naata maninia miijiaa pa jatanishaanuni. Moisés Rootasanojinia, tariucuacaanu Pueyaso sequenu panishano caminiujunaa naajionuutasanojiniaari naa sequeyajuhuj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaa quiiri. ²²Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucuaajuhuj, Pueyasoori puetunujanaa jiyanooquiaa Neyanuucua nojori tiuushacari. Majaari rimajata na jiyanooni. ²³Puetunu pueyajanaari sesa miijiaa; Judiocuaca, taucuaicano. Naacuajitij, nojoriiri juhua tucuaaanu quiya Pueyasojiniji. Sesa miijiaa pueya quiniucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴Naajaa, jiyanoohua panijia Pueyaso quiniucua, nojuajaari pa jiyanooquiaari Jesucristo cusonuucua pocuara. Naacuajitij, Pueyasoori pa jiyatequiaari juhua sesa miyashijara. ²⁵Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanooquiaa pueya. Naajuhuj, Pueyaso saniitioyaquishacari tariucuacaanu nocua tiuujiaa pueya Jesu cusoyaquishacari, majaari najuhuaa puera jiuujiaajia na quiniu quiquiaari. ²⁶Pueyasoori niishiquiaari Neyanu Jesucristoori nojoriicuaa mosocoriquiano, sesa nojori miijosano tuujusaanura seetanujanaa. Naaratej, nojuajaari pueyaracaanu sesa nojori miijosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujanaa maninia miijia. Nojuajaari maja najuhuaa na jiyanooni pajaniya. ¡Neyanu motequiaari pocuaraari!

²⁷¿Teyano nijaniyajinijiniote tojetaarucujanaa saaja maninia miijiani? Shaaqui. Naacuajitij, maninia miyashijiaa pa quishacari, puetunu pueyajanaari sanaajasaanutaniya Pueyaso nequesoresacari pueya. Saniniuujia, paa jaara puetunu Moisés Rootasanojuanaa tojitiaajaca quiriqia maniniani, paa maara tama pa cuaqueyajaaja shuquiritiaajaca quiriqia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuaja pa shuquiritasocoriquiano. ²⁸Naacuajiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

²⁹¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuaajari puetunu mijiria quiniaa pueyapuejanaa Jiyano. ³⁰Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquirojosano Judiocuaca, taucuaicano. ³¹Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuaajari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa miyashijiara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini?
² ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari.
³ Saniniuuja, tariucuacaanu Pueyaso Rupaajinia naa naajiotasano quiyari Abrahamjiniji:
 “Abrahamri Pueyasocua tiuquiaari. Naaratej, Pueyasoori na jiyatequiaari juhua sesa miyashijiara”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqitiojua. Jaara niqitiosaaere, cuno cumaneecaari maja nareja niqitiosano. Cunoori seetanujuanaa na poonijiosanojiniji. ⁵ Saniniuuja, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijiara saaja nocua na tiuuniuucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiara, maninia miyashijia pa quishacarijia. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanooya sesa na miijiosanojinijicuajani, Pueyaso jaara tuujure sesa nojori miijiosanojuhuaj.
⁸ Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooni panijia, noo nojori canapue na cararaatiuuquia co miatesano jiiitiaani, taa nojori supuetana Abrahamcuanaa? ¿Taa nia sequeyani? ¿Taucuacaarijiaataj? ¿Nojoriti jiyanooshiyahuhuj? ¿Taaquiririnij!
¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocujaari na jiyanooquiaari miatesoojua na quishacari. ¹¹ Na tiuuni nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiuushacari, Pueyasoori na jiyatequiaari juhua sesa miyashijiara, miatesoojua na quishacari. Naacuajitij, miatesoo taucua tiuushacari Jesucristocua, taa Abraham tiuquiaaricuaani, Pueyasoori nojori jiyateya juhua sesa miyashijia nojori quiniurijuhuj, mariyata juhua Abraham niqiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjuhuj. ¹² Naajuhuj, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niqiohua nojori quiniurijuhuj.

Pueyaso sequesano Abrahamni, cunoori Jesucristocua tiuujicarajuhuj

¹³ Pueyasocujaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesano quiquiaari Moisés Rootasano tojjia na miiniuucua. Jiyacarij, Moisés Rootasanoori maja na quini quiquiaari juhuanojuaja. ¹⁴ Pueyaso sequesano Abraham jaara saaja Moisés Rootasano tojjiacara quiriquia, na sequesano maara najuhua quiri Pueyasocua tiuujia pueyara. Naajuhuj, pueya maara najuhua Pueyasocua tiuujia quiriqiajuhuaj. Seetanujuanaa Pueyaso sequesano Abrahamni, cunoori puetunu Pueyasocua tiuujicarajanaa. ¹⁵ Cunoori maja saaja Moisés Rootasano tojjiacara. Pueyasocujaari niishiquiaari, pueyari maja na naata Moisés Rootasano tojini quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojtiaquiniuucua cuno rootasano. Saniniuuja, Moisés Rootasano jaara quiyaquiriquia, pueya maara sequeyaquishaare: “Niaari sesa miijia”.

¹⁶ Pueyasoori tariucuacaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujiaca. Naacuajitij, Pueyaso sequesanoori maja saaja Moisés Rootasano tojjiiacara. Cuno sequesanoori puetunu pueyapuerajanaa, canapueete Pueyasooocua tiuujiaca quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujiaca pa quishacari taa Abraham tiuuquiaari Pueyasooocuaani, paari Abraham niquiohuani. Naaratej, Pueyasora, Abrahamri pa que. ¹⁷ Pueyasocujaari naa sequequiaari Abrahamtej nojuajaari queraatia niquiohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuuquiaari. Nojuajaari niishiquiaari Pueyasoori macunucua samiitianijia. Niishiquiaarijaariuhuj, Pueyasoori cumaacaraca na panishano na shipininiuria shaaquijinjiji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuuquiaari. Naacuajitij, nojuajaari seetanujuanaa queraatia tamaatia rupaaca pocujaca pueyapue que, taa Pueyaso sequequiaari nojuacuajani. Pueyasoori naa na sequequiaari: “Quia niquiohuari tojetaarucujanaa queraatia quiriquiano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu. ²⁰ Saaja Pueyaso sequesanoocua na tiuushacari, nojuajaari maja noojia na niqijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishiyani quiaari canaa muetutenutaniya taa quia sequecanu janiyacujani. ²¹ Quiaacuajari cumaacaraca quia miiniuria puetunu quia sequesanojuanaa”. ²² Naa Abraham tiuuniuucua Pueyasooocuatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiuushacari, pa niishishacarijuhuaj nojuacuajaari pa Jiyaniijia Jesucristo samiitianiquiaariuhua macujinjiji. ²⁵ Pueyasocujaari mijiria na jiyaroquiaari sesa pa miishanoocuaara mosocoriquiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijia.

5

Jesuucua tiuunaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhujaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. ² Jesucristoocua tiuujiaca pa quishacari, Pueyasoori pa timitiaquiaa. Pa cumaquiquiaarijuhuaj maninia necohua pa quiniuria. Paari shuquiriyajacuhuj, pa niishishacari paari jatanishaanutaniyani, shacantuca quijia pa quiniuria juhua nojuajuhuj. ³ Majaari saa cunojua. Paari shuquiriquiaajuhuj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhujaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhujaniya sashijia quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacaritij, majaari sapojosano pa quiniu quiniutianiya. Pueyasocujaari tari jiyaroquiaari na Sohanu, poojajinia quiriquiano, seetanujuanaa Pueyaso paniniu pa jitianura poojajinia.

⁶ Pueyaso tojiyashijiaca pa quishacarijia, majaari pa naata quiquiaari Pueyaso jiyanoonitiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷ Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupueña pueyano jaara jiyanoohua na panijia quiri, nojuaja maara sequere: “Janiya cuaara na niti mosaaria juhuari”. ⁸ Saniniuujia, sesa miijiaca pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanoohua pa panijia. ⁹ Quiarjia, paari sesa miyashijiaca quiya Pueyaso niquiarani, Jesucristo cusunuucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniuucua. ¹⁰ Na paraa pa quishacarijia, Pueyasocujaari pa jiyanooquiaari, Neyanu cusunuucua pocuara. Quiarjia, nata jeecatoono pa quishacari, Neyanuuri saminio quiya pueyaracaanu pocuaji na tacunura. ¹¹ Majaari saaja cunora shuquiriaatia pa quiniu. Paari shuquiriyajuhuj, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusunuuquiaani? Juhuacatecara pa supuetana Adán miiniuucua sesa, naaratej puetunu pueyajanaari sesa miijiacajuhuj. Pueyasocujaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiaca pa quiniuucua. ¹³ Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriucara saquiriojotasaanu quijia sesa nojori miishacari. ¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesanoocuaani. Naajaa, puetunu nojorijianaari cusunuuquiaarijuhuaj sesa miijiaca nojori quiniuucua, sesa miijia Adáncuajinio nojori supuenuucua. Quiarjia saniniuujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanoohua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaaca nojori quiniuria cutara. ¹⁶ Pueyaso miishano maninia pajaniyarani, cunoori sesa Adán miishano shocotaa jiyanoohua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanooquiaa puetunu sesa pa miishanojinijijianaa. ¹⁷ Niquiriyatu pueyano miiniuucua sesa, puetunu pueyajanaari cusunuujuacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhuj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhuj, Jesucristo miiniuucua maninia, puetunu pueyajanaari na naata jiyanooshaanu, nojori saniitioyacquishaanucujia, pueyaracaanu quijiaaca nojori quiniuria. ¹⁹ Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiarjijuhuj. Saniniuujia, Jesucristo tojiniuucua Pueyaso sequesano, puetunu nocua tiujuacajanaari juhua sesa miyashijianucua jiyatesaaquiohua.

²⁰ Moisés Rootasano jaara niishishaquiaari, pueyari socua sesa miijiacara jiyatequiaari. Naa socua sesa miijiacara pa quishacaritij, naajuhuj, Pueyasoori socua jiyatequiaari pocua taraajenujuhuaj. ²¹ Sesa miiniu tarinitianu niishiyashijia pa quiniuucua, puetunu pueyajanaari cusunuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij,

nojuajaari juhua pa samiitianijioquiaariuhua, pueyaracaanu rishijiaca pa quiniuria pa Jiyaniijia Jesucristota.

6

Pablo niishitiojosano moojinia tiuquinijionujiniji

¹ Pueyaso jaara naa pa jiyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiyani, pueyaracaanu Pueyaso jiyanooniuria pajaniya, pueya niishiniuria, Pueyasocuaajaqui jiyanoohua maninia na jiyanooniuria pajaniya? ² ¡Maja pueyanaa! ¡Maja naa nia niishirojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuajaari tari cusunuuquiaari Jesutani. ³ ¿Niaateeri cuno niishiyaquiayajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niqiuara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhuj. Naa juhua macu pa quishacaritij, paari samiitianijosanohuani, taa Jesucristo samiitanishaaquiaariuhua macujiniji jiyanoohua Pueyaso cumaacatacuaani. Naa samiitianijosanohua pa quishacaritij, maninia miijia pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocua na cusosacarini, naajuhuj, paa cutaraari tari samiitianijosanohua juhua nojuajani, maninia quijia pa quiniuria. ⁶ Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jiitianura, sesa na miitiniuria pajaniya. ⁷ Naacuajitij, sesoriquia poojia seque jaara tari jatanishano quiya, majaari tari sesa miijia pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹ Cristocuaajaari samiitiaquiaariuhua. Paari niishiyajuhuj, majaari socua na pacutenu quiniutianihua cusunu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰ Majaari socua Jesucristo pacutenu quiniutianihua cusunu, sesa pa miishanoocua. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuj, niaacuajaari Jesucristota samiitiaconohua, Pueyaso tojjijia nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniurijaa. ¹⁴ Naa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari najaniya. Nia niishiri, niaari quiarijia Pueyaso tojtijajaca cutara, maja tari Moisés Rootasano tojjijia.

Pueyaso tojiyashijia pueyani, nojoriiri Sesaaca pueya

¹⁵ Cua sequesacari najaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! ¹⁶ Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojjia quiniutianiyani. Naajuhuj, niaa jaara sesa miijia quiriohua, niaari Sesaaca tojjijia. Naa sesa miijia nia quishacaritij, niaari cusunutaniya. Saniniuujia, niaa jaara Pueyaso tojjijacara quiri, niaari sesa miyashijia quiniutianiya. ¹⁷ Tarijia, niaari Sesaaca tojjijia quijia, juhua na seya, sesa miijia nia quishacari. Quiarijia, janiyari Pueyaso timitiaani nia tojinuucua Jesucristo

rootasano puetunu nioojiatajanaa, taa nia niishitiojosaaquiaaricuaajani. ¹⁸Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjiiacara jatanishano, saaja maninia miijiaca nia quiniuria. ¹⁹Janiyari naa pohuataa serujiniji najaniyani, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanohua sesa miijiacara jiyatequiaari. Naajuhuj, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucua-janaa maninia miijiaca quiniutianiya Pueyasora.

²⁰Naa jaara sesa miijiaca quiquiaarijia Sesaaca tojjiiaca nia quishacarijia, niaari juhuajaniya Pueyaso tojjiyashijiaa quiquiaari. ²¹¿Sesaacate maninia nia miiquiaari sesa nia miiniuucua nera? ¡Maja! Naa cutaraari saaja caririquiquiaa sacuraatia casaa nia miiniuucua tarijia. Niaari quiarijia niishiyajuhuj, cante sesa miijiaca quiquiaani, nojoriiri shaajasaariquiano. ²²Naa sesa miyashijia nia quishacari quiarijia saniniuujia, niaari Pueyaso tojjiiacara jiyatesaaquiaari, saaja na panishano nia miiniuria cutara. Naa Pueyaso tojjiiaca nia quishacarijia, nojuajaari nia jiyatenutaniya seetanujuanaa maninia miijiaca nia quiniuria. Naacuajitij, niaari pueyaracaanu shuquiriaatia rishijiaa quiniutianiya-juhuj. ²³Saniniuujia, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuujia, saaja Jesucristoocua tiuujiaca pa quishacari, Pueyasoori saa cunoraja pa jiyatequiaa pueyaracaanu rishijiaa pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹Pueyanaa, niaacuajaari Moisés Rootasano niishijiaa. Niaari niishiyajuhuj, paa jaara shaajequeeni, paari jiyacari Moisés Rootasano cartequue shushani. ²Naajuhuj, paacuajaari rootasaaquiaarini, maaji jaara camishano quiri, cuaara tamonu cayata quiyaquiriia, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojihocoriquiano. ³Saniniuujia, maaji jaara tamonu pueyanota quiriqia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojjiyashijia na quiniu cunora. Nojuajaari maja paanatu, naa na miishacari.

⁴Niaari naajuhuj pueyanaa. Jesucristo cusonuucua pa niti, niaari juhua cusonu-quiaarijuhuaj, maja Moisés Rootasano tojjiiaca nia quiniuria socua. Naacuajitij, niaari tamonu tojjiiaca quiya cutara. Nojuajaari pa Jiyaniijia Jesucristo, nooj, macujiniji samiiti-aquiaarihuatej. Naacuajitij, quiarijia pa Jiyaniijia Jesucristo tojjiiaca pa quishacari, paari maninia miijiaca Pueyasorani. ⁵Tarijia, Pueyaso tojjiyashijiaa pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacuajitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶Tarijia, paari juhua quioosano pueya Moisés Rootasano tojtishaaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojiniu cartequiaarini. Moisés Rootasano pa tojiaquishacari quiarijia, naacuajiti pa naata Pueyasojanaa tojiniu shitimia cutara, na Sohanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojtiajaca quiquiaari maniniani, pa puerenuta paa mariqui saniitiosareeri pa tojiaquiniuucua niquiriyatu queraatia na rootasanojiniji.

Poojiaari saa sesa miiniu niishijiaa

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyanoehua maniniacuaajaari Moisés Rootasano. Moisés Rootasanojiniji, paacuaajaari niishiyani paari sesa miijiacani. Moisés Rootasano jaara quiaquiriquia, janiya maara niishiyaquiquiaarini, cua jiaatiasacari tamasaca jiitiasano casamiicua, cunoori sesa Pueyasora. ⁸ Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacujitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹ Moisés Rootasano cua niishiyaquishacarijia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyanoehua taraajequiaarini, cua niishishacari janiyari jiyanoehua sesa mijia Pueyaso niquiarani. ¹⁰ Naa sesa mijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiqiaari shushajanaani, janiyari jiyaniquiaarini, janiya jaara cunoo rootasano tojirini, janiya naasucuaari pueyaracaanu rishijia quiniutianiyan. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. ¹¹ Naacujitij, janiyari jiyanoehua jiyajenequiaarini, cua jiyaniishacari cua naatacuaaja Moisés Rootasano tojiniu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jiyanoyaquiniutianiya.

¹² Seetanujuanaa nia sequeyanija pueyanaa, Moisés Rootasanoori jiyanoehua maninia. Tojetaarucujanaa maninia rootasano. Cunoori seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cunoo na rootasanoori pa cusouaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanoehua sesa Pueyasora. Naacujitij, paari Moisés Rootasanojiniji niishijiani, paari puetunujuanaa jatasocoriquiano quijia juucuan, seetanujuanaa sesa miijiaa pa quiniucua.

¹⁴ Paacuaajaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanoacuaajaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacujani. ¹⁶ Janiya jaara cua panishoo sesa casaa miirini, naacujitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaaja. Cuno sesa cua miishanoori coojiajiniji supueno tamajaaja. ¹⁸ Quiarijia niishiyacutaranjia, coojiaari tojetaarucujanaa sesa miiniu niishijia. Naacujitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacujitij, cua miishanoori maja maninia, taa cua miiniu paniquiaa juucucujani. Cua miishanoori saaja cua miiniu paniyaquishoo quiquiaa. ²⁰ Naacujitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaaja.

²¹ Quiarijia niishiyacutaranjia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniucua jiaatiaquiaa juucuanijia. ²³ Janiyari niishiyajaniuhua, coojiaari juhua cua niishitiaja paraca quiya. Naacujitij, cua niishirojosacari, “Maninia miiniutianiyanijia”, coojiaari saaja sesa cua miitiquiaa. Naacujitij, tama janiyajaarjia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuarini? ¿Tojetaarucujanaa taraatia quijianijia! Pueyaraaanu sesa miijianijia. Majaari cua naata tamajaaja maninia mijia cua quiniu. Naa sesa

mijia cua quishacaritij, cua cuaqueyari macu quiriquiano. ¿Cante na naata cua jatanini-uni, naa sesa mijia cua quishacaritij? ²⁵ ¡Pueyaso shuquiritiaanjia cua niishishacari, nojuacuajaari cua Jiyaniija Jesucristota cua jataniniutianiya tojetaarucujanaa maninia mijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquaari.

8

Pueyaso Sohuanu pa tojishacari, paari maninia mijia quiniutianiyan

¹ Pa rupuesacari Jesucristo, nocua pa tiuushacari, Pueyasoori pa jyanooquiaa. Naacuajitij, paari tojetaarucujanaa jyanoooshano quiyani. ² Puetunu pueyajanaari cusonuriquiano quijia, sesa mijia nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia mijia pa quiniuria. Naacuajitij, majaari tari sesa mijia pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jyanoooshano. Cunoori saaja sesa mijia pa quiniuucua. Naaratej, Pueyasoori Neyanujanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiiitiasacari juhua pa cuaqueyajuuhaj, Pueyasoori juhua sesa mijia na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiiitiasacari quiarijia, pa naata maninia mijia quiniu, taa Moisés Rootasano sequeyacuajani. Pueyaso Sohuanu tojjia pa quishacari, majaari tari pa quiniu sesa mijia, taa pa quiquiaari tarijiacuajani.

⁵ Canapuate tama na panishanojuaaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuujia, canapuate Pueyaso Sohuanu tojjia cutarani, nojoriiri saaja Pueyaso shuqiritiniuria jiaatiaquiaa. ⁶ Tama na cuaqueyajaaja shuqiritiniuria jiaatiajacaari saaja shaajecoriquiano cutara. Saniniuujia, Pueyaso shuqiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuqiriaatia quijiajuuhaj. ⁷ Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujanaa majaari na naata Pueyaso tojjia na quiniujuuhaj. ⁸ Naacuajitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniuria.

⁹ Nijaniya cutaraari maja nia quiniu juhua cuno pojoriija, tama na cuaqueyajaaja shuqiritiniuria jiaatiajacani. Naa cutaraari Pueyaso shuqiritijia, Pueyaso Sohuanu cumaquishacari nijaniya, nojuaja jaara seetanujanaa nioojiajinia quiya. Cante Pueyaso Sohuanu jiiitaaquiyani, nojuajaari maja Pueyaso pueyano. ¹⁰ Cristo quishacari poojiajinia, pa sohuanuuri tari jatanishano quiya maninia mijia pa quiniuria, pueyaracaanu rishijia pa quiniurajuhua. Pa cuaqueya cutaraari shaajasocoriquiano, sesa mijia pa quiniuucua. ¹¹ Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitianijiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia mijia pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuqiritiniuria pa jiaatianu tari, taa pa miiquiaari tarijiacuajani. ¹³ Cante naa mijia quiyajani, nojoriiri shaajasaariquiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuqiriaatia quijia quiniutianiya.

¹⁴ Canapuate Pueyaso Sohuanu tojitiyacani, nojoriiri Pueyaso niquiohua cutara.

¹⁵ Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuajitij, cuno pa jiiitiasano Sohuanuuri Pueyaso pa sequequiaa, “cua Quena”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniuucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiiitiasanojuaaari pa jiiitiasano quiniutianiyajuuhaj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujia pa quiniuucua.

Paa jaara naquiya miishaare nocuara mijiriani, paari jiyanoohua maninia quijiacara jiyatesaanutaniyani juhua nojuajuhua.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanoohua maninia miishaanutaniyani, pueyaracaanu shuquiriaatia pa quiniuria. ¹⁹ Quiarijiani, puetunu Pueyaso shipinishano casaajanaari pa niqiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquaari tama na panishacarijiaaja. Pueyasocuaajari naa paniquaari sesa na quiniuria, na shipinishano pueya sesenucuajuhua. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhua. Naacuajitij, puetunu Pueyaso shipinijosano casaajanaari maniniara quiniutianihua, maja na sesenura socua. ²² Quiarijiani, puetunu Pueyaso shipinijosanojuanaari jiyanoohua noojia niojija taraatia na quishacari. Quiatojiyari juhua maaji noyano, cuaara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhua, na panishacari tojetaarucujanaa jatanishano quijiaca pa quiniuria. Paacuajaari tari jiitiaa Pueyaso Sohuanu poojiajiniani, pa niishiniuria, paari seetanujanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. ²⁴ Paacuajaari tari Pueyaso muerasu quiyani. Jesucristo cutaraari pa saquiriojiquaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuaaanu pa rupuenera pa Jiyaniijia. Cunora, paari mijiria taraatia pa quishacari juhuaniani rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajari poojiajiniji Pueyaso secojoquiaa pocuara. Jiyanoohua na secojosacari pocuara, jiyasohua quiatojiya poojiajiniaari. ²⁷ Poojia niishijia Pueyasoni, nojuajaari niishiyacuaja casaa na Sohuanu secojija nojaja pocuarani. Na Sohuanucuaajari maninia secojiojua cutara, taa Pueyaso miiniu paniya na muerasuracuajani.

Jesucristo pa shocotanijia cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijacara. Nojuacuajaari pa saquiriojiquaari na muerasuniyojua pa quiniuria. ²⁹ Naajuhua, jiya shipiniyaquishacarijia, Pueyasoori tari niishiquaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocuaraca na quiniuria. ³⁰ Naacuajitij, canapue Pueyaso saquiriojiquaari na muerasu nojori quiniuriacuajani, juhua Jesucristo nojori quiniurajuhua, Pueyasoori cuno pojori niishitiquiaa nojori tiuniuria Neyanuucua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanoohua pa

panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarijia niqutioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacujaari pa jiyatequiaari juhua sesa miyashijiaca pa quiniuria. ³⁴ Jesucristocujaari tari cusoquiaari pa niti. ¿Cantucua saniniujia quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacujaari samiitiaquiaariuhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari jiyanojua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniinu Cristo pa paniyaquia, paa jaara taraatia miishiyani, paa jaara casaacua tacayani, tamasa jaara naquia miya pajaniyani. Naajuhuj, paa jaara quera titiacoya pa miaajenutani, majaari nia jiyaniinu Cristo pa paniyaquiyani, naajuhuj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacujaari taraatia miishocoriquianoni, naatej, taa tariucuaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniucua. Nojoriiri juhua miaquesocoriquiano borregohua canaa puecooquia juhua-janiya”.

³⁷ Paari naa miishaaquiaaaniuhuj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquia pa miishacari. Jesucristoori seetanujuaanaa cuno naquia pa miini jiyatequiaa maninia na jecanura pajaniya, juhua nojuaja pa quiniuria socua.

³⁸ Seetanujuaanaa niishiyaniija, Pueyaso panishacari jiyanojua pajaniya, majaari quenaaja tamonu casaa na naata rupatanu pajaniya Nojuajiniiji. Paa jaara quiri saminiujuani, macu soj, naajaa, pa panijia Pueyasocujaari pata quiyajaa. Naajuhuj, Pueyaso seya, samaruhuanio, puetunu cunojuaanari maja na naata pa rupatanu Pueyasocujaji. Naajuhuj, majaari quenaaja tamonu cumaacaraca quijia na naata pa rupatanu Pueyasocujaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. ³⁹ Naajaariuhuj, tee pa quiyani, jiyocuaaanu, jiya cariquimia soj, naajaa. Pa panijia Pueyasoori tii quia patajuhuj. Naacuajitij, pa Jiyaniija Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniiji.

9

Pueyasojuaanari pueya saquiriojojua na pueyara

¹⁻³ Naa Pueyaso pueyano cua quishacaritij, janiyari jiyanojua cuarta Israel pueyacuara taraajequiaani, nojori tiyaquiniucua pa Jiyaniija Jesucristocua. Janiyari pueyaraaanu nojoriicua taraajequiaa jiyanojua, maja cua naata quishacari cuarta Israel pueya tiutiniu Jesucristocua. Seetanujuaanaa nia sequeyanijia, Pueyaso jaara na naata quiri mani quiqiojinia na jatanura janiya nojori niti, janiya maara sequereni, maniacujaari naa cua miishaanura. Nojori jaara na naata quiri Jesucristocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniiji, saniya cuarta Israel pueya jiyatesaanura Pueyaso muerasura cutara”. Naa cua sequesacari nijaniyatej, janiyari coojajinia niishiyani, seetanujuaanari cua sequesano. Pueyaso Sohanuuri cua niishitijuhuj majaari cua sapojonu. ⁴ Cuarta Judiucuaari pa supuetana Israel niqiuhuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niqutiquiaari shacantuua na cumaaca, tariucuaaanu nojoritia na quishacari. Pueyasoori nojori sequesaciaari: “Janiyacujaari Pueyasoni. Niaari cua pueya quiniutianiya niaa jaara cucua tiuuri”. Naajuhuj, Pueyasoori Moisés niqutioquiaari caapiqui saajianeecua na naajiosano, saniniujia Moisés niishitiojonura tiji nojori. Pueyasoori nojori niishitiquiaarijihuuj taa nojori miiniutianiyani, tariucua jiyanooshano nojori rerejonura na niqiuara. Pueyasoori nojori

sequequiaarijiuhuj, nojuajaari puetunujuanaa na sequesano Abraham tohuateenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijijanaa na quiniuria, puetunu casamijianaa jiitiana na quiniuriajuhuaj. Nojuajaari Pueyasojuhuanajaj, juhua na Quejuhuaj. ¡Nojuaja cuaara pueyaracaanu maniniuhuaquetasano quiiria! ¡Cuaara naa quiiria pueyaracaanutej!

⁶ Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari nijaniyatej, majaari nia jyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririaarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. ⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocujaari naa sequequiaari Abraham: “Cua sequesano quiajanitari saaja quia niyanu Isaacuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequesanoocua tiuuquiaari, Pueyaso jaara naa na sequequiaari: “Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuritanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaarijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajinijiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocujaari naa Moisés sequequiaari:

“Janiyari pueya jiyanooniutianiyan teyano pueyano cua jiyanooni paniyacuajani. Naa-juhuaj, janiyari pueyanoocua taraajenutaniyani, teyano pueyanoocua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocujaari tama saquiriojoquiaajaaja cana na jiyanooni paniyani. ¹⁷ Naajuhuj, tariucuacaanu Pueyaso sequesano Egipto jiyaniijiarari naa naajiotasano quiyajuhujaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua mijiosano cua niquitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojanaa cutarani”.

¹⁸ Naacuajitij, paari niishiyani, Pueyasoori taraajeja teyanooocua na taraajenu paniyani. Naajaariuhujaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?”

²⁰ Majaari naa sequenu pueyanonaa. ¿Canteeri quiajaniani, naa quia juaaniuria Pueyasootej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”? ²¹ Paniyojuacuajaari na naata paniniu maraujiniji na panishano casaa, shanohua pataconiyojua, mashaca quiqiora manijinia cajitiriquiano conatunio.

²² Naajuhujaj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa mijiaca? Naajaa, Pueyasoori jiyanoohua rejeretaquiaa sesa mijiaca, cante tari saniitiosocoriquiano quiyacuajani. ²³ Pueyasoori naa tarishiyajaara na saniitionura na tojitiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriquianocujani. ²⁴ Paacuajaari cuno jiyanooshano pueyani, canapue tari Pueyaso saquiriojoquiaaricujani Judiocuajinijinio, taucuacajinijinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyaquiquiaarini, janiyari nojori sequenutaniyani: ‘Niaari cua quiquiohuanioyujua’. Naajuhujaj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhujaj:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’ ”.

²⁷ Saniniuujia, supuetana Isafasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. ²⁸ Pueyasoori mijiriara na sequesano tohuateenutaniya. Majaari na tarishiniu quiniutianiya”.

²⁹ Supuetana Isafascujaari naa sequequiaari tarijajuhujaj:

“Pa Jiyaniijia Pueyaso jaara Israel pueya niquiohua jiyanoyaquiquiaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya pucoosaaquiaaricuaani, Gomorra tiacajinia quiniaa pueyano”.

Judiocuacaari Pueyaso rupaacua tiuyashijia saaja

³⁰ Naa cua pohuatasacari nijaniya tariucuaaanu Pueyaso Rupaajinijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari.

³¹ Israel pueyari saniniuujia jiyanoohua Moisés Rootasano tojjijia juucua, nojori jiyaniishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. ³² ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiuyaquiniucua nocua. Nojoriiri jiyaniquiaari tama nojorijaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuniu quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequesanoocuaari naa naajiotasaaquiaari tariucuaaanu, Jesucristo niyacarijia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniujuia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10

¹ Cuarta Pueyaso muerasunaa, janiyari jiyanoehua Pueyaso secojoquiaani parta Israel pueyacuara, Jesucristoocua nojori tiuniuria, Pueyaso pueya nojori quiniurijahuaj. Janiyari jiyanoehua nojoriicua tacayani. ² Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijiaca juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequiaa, majana Pueyaso naata pueya jiyanooniua saaja nojori tiuushacari nocua. Naaratej, nojoriiri jiyanoehua saniniujuquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiyauquiquiaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojinu tohuateequiaari cutara. Naacuajitij, Pueyasoori puetunu nocua tiuniaajanaa jiyatequiaa juhua sesa miyashijiacara. ⁵ Moisés cuajaari naajioquiaari taa na rootasano tojijiaca miiniutianiyani, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojjiani, nojuajaari pueyaracaanu rishijara jiyate-saanutaniya”.

⁶ Saniniujuia, saaja Jesucristoocua pa tiuushacari, paari juhua sesa miyashijiacara jiyate-saaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojiajinia nia taacanusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej! ⁸ Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiitiaa. Niaari na niishiyajuhuj. Nioojiajinia quiyacuajaari”.

Cuno rupaa canaa na pohuataquiaa nijaniyani, cunocuajaari Jesucristoocua nia tiuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiujia jaara pueya niquiara pohuatare: “Jesucristoori seetanujuanaa Jiyaniijajanaa cutara”, noojiajinia na niishishacarijuhuj Pueyasoori Jesu samiitiani quiaariuhua macujiniji. ¹⁰ Seetanujuanaa naari: pojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuj, pa rupaata pa pohuatasacari: “Janiya Jesucristoocua tiujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuj:

“Puetunu nocua tiuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooniua nocua tiujia pueya. Nojuajaari jiyanoehua capora. Jiyaniijajanaa cutaraari. ¹³ Tariucuacaanu Pueyaso Rupaajiniari naa naajiotasano quiyajuhuj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’”.

¹⁴ Jaara naa quiritij, ¿pueyatucua taa Jiyaniijia seconuureni, nojori jaara nocua tiyauquiyajaa? Naajuhuj, ¿pueyatucua taa nocua tiuurini, nojori jaara nojuajiniji pohuataquishoo quiyajaa? ¿Nojoritucua taa nojuajiniji niishijia quirini, tamasa jaara quenaaja nojori pohuataquiri? ¹⁵ ¿Pueyaso Rupaa pohuataanaatucua taa cuno pojoriicua quiaareni, nojori jaara jiyaramiquiyaquishaare? ¿Pueyaso rupaa pohuataanaate jiyaramiquiyaquishaa quiaari? ¡Maja! Jiyaramiquishaa quiaaricua. Naaratej, naa naajiotasano quiyari tariucuacaanu Pueyaso Rupaajinia:

“Jiyanohua timitiasano pueya cutaraari, noo pojori canapuede tamasaacua quijani, nojori na pahuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niqiuara pahuatasaare. Naacuajitij, supuetana Isafasri naa sequequiaari na taraajenuta: “Jiyaniijianaa, majaari pueya tojiniu paniniu canaa pahuatasano quijaniyajiniji”.

¹⁷ Naacuajitij pueyanaa, paa jaara Jesucristo rupaa pahuatasaareni, paari pa numaata na tojiyani. Paa jaara pa tojishanoocua tiuuriini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso pueyara jiyateyaquishaquiaari-irini? ¿Cristo rupaateeri nojori niqiuara pahuataaquishaquiaari? Maja. Nojori niquiaracuaajaari pahuatasaquiaari. Naa naajiotasano quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajinijanaa pahuatasaquiaari. Na rupaari tojishaquiaari puetunu tiqiyocuajanaa, jiya puequeetujinia”.

¹⁹ Jaara naa pahuatasaquiaaritij, ¿Israel pueyateeri Pueyaso rupaa niishiyaquiquiaari nojori tojishacari? Maja. Nojoricuajaari na niishijiaa quiquiaari. Nojoriiri saaja na ruuretajaca quiquiaari. Supuetana Moisés cuajaari naa naajiotaquiaari Pueyaso sequesano Israel pueyara, tariucua na tojiyashijiaa nojori quishacari:

“Maninia cua miishacari tiqiyocua quijiaa taucuaca nia niti, janiyari nia juaatiniutianiyan. Niaari jiyanoohua juaaniutianiya cua jiyanooshacari mosanucua taucuaca”.

²⁰ Na nuhuaji, supuetana Isafasri naa maatia sequequiaari Pueyaso niishitiosano nojuaja: “Cucua jiaatiaashijiaa taucuaca cutaraari cua riuriataquiaa, cua tojjijiaa nojori quiniuria cutara. Naajuhua, janiyari cua pajeyashijiaa taucuacaacua muetaquiaani”.

²¹ Saniniuuja, Isafasri naa Pueyaso sequesano Israel pueyajiniji naajiotaquiaari:

“Janiyari puetunu juucajanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijiaa pueya nojori quishacari”.

11

Israel pueyajiniji curenoori Pueyaso saquirojosano

¹ Israel pueya jaara naa Pueyaso tojiyashijiaa quiya, ¿Pueyasote seetanujuanaa nojori tarinitiacanu, na tojiyashijiaa nojori quiniucua? ¡Maja pueyanaa! Janiyacuajaari Israel pueyanojaniuhua. Abrahamri cua supuetana. Janiyari na jinianu Jacobo niyanu Benjamincuaajinio supuenoni. ² Naacuajitij, janiyari niishiyani, Pueyasoori maja na cartenu quiquianu puetunu tariucuacaanu na saquirojosano Israel pueyajanaa. ¿Niaateeri supuetana Elfasjiniji naajiotasano niishiyaquiya? Tariucuacaanu Pueyaso Rupaajinia naa naajiotasano quiyacuajaari Elfas sequesano Pueyaso, na tacaashacari Israel pueya quiniucua sesa:

³ “Cua Jiyaniijianaa, cuarta Israel pueyari puetunu quia sequesano caminiujuninaa pueyajanaa puecoorucuaa! ¡Saa janiyajaari cureyani! Naajuhua, nojoriiri puetunu juhuacutucuaajanaa niyarequetarucuaa, tee quia tojtijajaca pueya catijiaquiaa na seya quiocuaracuajani. ¡Nojoriiri quiarijia cua pajenyajuhua, na motunura janiya!”

⁴ Pueyasoori naa Elfas riucuaciaari saaja:

“Janiyari siete mil pueya jiiitajaani. Nojoriiri cua tojtijajaca. Nojoriiri maja na mojuquetaconu quiquiaa cuno sacuraatia shipinishano Baalcuara cua niti, taa narta Israel pueya miiquiaacuani”.

⁵ Quiarijiaari naajuhua, Pueyasoori secaja na saquirojosano Israel pueyajinijinio jiiitiaa, jiyanootio na quiniucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquirojonu quiquiaari

nojori, maninia nojori quiniuucua. Nojori jaara maninia miijiaca quiriquia, nojori maara panyaquiri na jiyanooshaanura.

⁷ Naacujitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujanaa niishiyashijia nojori quiniuria. ⁸ Tariucuaaanu Pueyaso Rupaajini-acujaari naa naajiotasano quiya:

“Pueyasoori nojori jiyatequiaari niishiyashijiaacara, maja nojori niishiniuria nojuaja. Naaratej, majaari nojori niishiniu quiija, nojori niquishacari Pueyaso miishano. Majaari nojori niishiniu quiijajuhuaaj, nojori tojishacari na rupaa. Israel pueyari naa Pueyaso tojiyashijiaa quiyajaa quiarijiani”.

⁹ Supuetana David sequesanoori nojorijiniji naa naajiotasano quiyajuhuaaj:

“Pueyasonaa, Israel pueyari puetunu nojori panishanojuanaa jiitiaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiri-tiasano casaa cuaara quiiria juhua norijia tama nojoririjaaja, nojori saniitiosaa-nura. ¹⁰ Nojori jiuujia cuaara jataara juhua cariojuuarjuriria, maja nojori niishiniuria seetanu Pueyaso rupajanaa. Nojori cuaara porequetacoora socua, pueyacaanu taraatia nojori miishacari”.

Pueyaso jiyanoosacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijianaa, tojiyashijiaa nojori quiniuucua? Maja. Pueyaso tojiyashijiaa nojori quiniuucua, taucuacaari saniniuujia Pueyaso muerasura quiquiaa, nojori tiushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniurijuhuaaj. ¹² Quiarijia, puetunu jiyacajinijanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiushacari, jiyacaritij, socua jiyanohua maninia quiniutianiyari puetunu pueyapuerajanaa, puetunu jiyacajinijanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu paniyani-jia. Janiyari seetanujanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaaj. ¹⁴ Janiyari seetanujanaa naa miiquiaani cuarta Israel pueya jiaatianura niaacua, nojori tiuuni-uria Jesucristoocujuhuaaj, noojiaqueya nojorijinijinio Pueyaso jiyatenura na pueyara.

¹⁵ Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacujiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanohua maninia quiniutianiyari puetunu pueyapuerajanaa. Israel pueya tiushacari Jesucristoocua, nojoriiri juhua macujiniji samiitiaconutaniuuhua. ¹⁶ Seetanujanaa maninia nia niishiniuria nio miriqi cua pohuatasani, maatia nia pohuatareeraj. Nia tojiri. Coteenujanaa pa jiunocotasano neecaru jaara maninia quiri Pueyasora pa niqutiosocoriquiano, tariquiaari puetunujanaa maninijuhua Pueyasora. Naajuhuaaj, naana nujuaca jaara maninia quiri puetunujanaa, na cashacucuaari maniniuquicuajuhuaaj. Nio miriqi cua pohuatasanoori nia niishitiya cutara Israel pueyajiniji. Naacujitij, Pueyaso jaara Abraham jiyanooquiaaricuaa nocua na tiushacari, naacujiti paari niishiyani, Pueyasoori puetunu Israel pueyajanaa jiyanooniutianiyajuhuaaj, nojori jaara tiuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jiananuucujinjo supueno Israel pueyari juhua na cashacucua. Cuno na cashacucua-jinijinio jaara Jesucristoocua tiuyaquiquiaari, Pueyasoori na piyotaquiaari. Niajaniya saniniuujia taucuacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia

moritiasaciritij, cuno naana nujuacaari nia nujuacajuhuj. Naacujitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸Naa Pueyaso rupotanuucua nijaniya na panishano naanaacuatej, majaari tama nia cuaqueyajaaja nia shuquirritianu. Majaari nia jiyaniinu niaa cutaraari socua maninia pueya, Pueyaso cartesano Israel pueyajiniji. Niaa jaara jiyaniya niaari socua maninia pueya nojoriiniji, nia niishiri, niaari maja nia nujuaca rishitijia. Nia nujuaca cutaraari nia rishitiya.

¹⁹Niaa naasucuaari sequeya: “Taaquiririnij. Cuno olivo cashacucuaajaari canaacuaji piyotasaquiaari, saniniuujia canaa rupotasaanura nocua nojori niti”. ²⁰Taaquiririnij, seetanjuanaacuaaquinateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaquiaari, nojori tiuyaquiniuucua Jesucristoocua. Niaari saniniuujia cuno naanaacua rupotano quiya, saaja Jesucristoocua nia tiunniuucua. Naacujitij, maja tama nia cuaqueyajaaja nia shuquirritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucuaacanaa, niaa mariqui piyotasaarohuari, niaa jaara Pueyaso tojiyashjiacara quiriohua. ²¹Pueyaso jaara jyanoyaquiquiaari na saquiriojosano pueyacuua, nojori tiuyaquiniuucua nocua, ¿maatucua casaara jyanoori nijaniyanijia? Niaacuajaari taucua. Niaacuajaari maja na saquiriojosano Israel pueyacuajinio. ²²Naacujiti pueyanaa, nia niishiri. Pueyasoori jyanohua maninia. Naajuhuj, nojuajaari saniitonu niishijia cutara. Naaratej, nojuajaari na tojtiaashjiaca Israel pueya jyanoyaquiquiaari. Saniniuujia, nojuajaari jyanohua maninia miiquiaa nijaniya na jyanoooshano pueya nia quishacari, niaa jaara pueyaracaanu nocua tiuujiaca quiriquia. Nijaniya taucuaacanaa, niaa jaara nocua tiuyashjiacara quiriohua, niaari nocuaji rupatasaanutaniuhua. ²³Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracacuaaja na rupotanutuhua na panishano naanaacua. ²⁴Nijaniya taucuaacanaa, niaari maja seetanjuanaa Pueyaso saquiriojosano Israel pueya. Niaari juhua nacujiniaacoji olivo naana cashacucua. Naajaa, nia tiushacari Cristoocua, Pueyasoori nia rupotaquiaari na panishano olivo naanaacua-janaa. Naaratej, majaari jiyajeneta Pueyasora, na piyotano olivo cashacucua na rupotanutuhua tama neyonaacuajaaja, nojori jaara Jesucristoocua tiuujiacara quiriohua.

Pueyaso jatanishacari puetunu Israel pueyajanaa na pueyara

²⁵Taucuacajinijinio cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate cua tojtitiare. Quera puetunu Israel pueyajanaari Pueyaso tojiyashjiaca quiya. Nojoriiri naa quiniutianiya, puetunu Pueyaso saquiriojosano taucucujinijinio pueyajanaa cuara Jesucristoocua tiurijiaatijia. ²⁶Jiyaciritij, puetunu Israel pueyajanaari jiyatesaanutaniya Pueyaso pueyarajuhuj, taa tariucuaaanu Pueyaso Rupaajinia naajiotasaquiaaricuaajani. Naa sequeyari:

“Sión tiacajinia supenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquihuacuajinijio supueno pueya jiuujia-jiniji. ²⁷Naa cua jyanoooshacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

²⁸Quiarijia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jyanoniuria nijaniya saniniuujia, taucuaacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. ²⁹Pueyasoori maja na jaariutianu quijia na niqutiosano. Na saquiriojosano pueya jyanoojiaari. Majaari nojori na ruuretanu. Pueyasocuaajaari Israel pueya saquiriojoquiaari na pueya nojori quiniuria, maninia na miiniuria nojori. ³⁰Maniniushiquari, nijaniya taucuaacanaa, niaari Pueyaso tojiyashjiaca quijia. Israel pueya tojiyaquiniuucua Pueyaso quiarijia saniniuujia, Pueyasoori niaacua taraajequiaa. ³¹Nojoriiri Pueyaso tojiyashjiaca quiya quiarijia, Pueyaso taraajenura nojoriicua taa na taraajeya niaacuacuaani.

³²Naacujitij, Pueyasora, puetunu pueyajanaari na tojiyashjiaca quiya, Israel pueya,

taucuaicano. Naacujitij, Pueyasoori na naata jiyanooni nojorijihuaj, nojori tiuushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijijanaa cutara! ¿Cante niishiquiaarini casaa Pueyaso miiniutianiya? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujuanaari nio tariucuaaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! ³⁵ ¿Pueyasoteeri na panishano jiitiaaquiiaari tamonu niqutionura nojuaja na panishano, na nuhuaji na niqutionuhua? ¡Maja!”.

³⁶ Seetanujuanaa puetunu casaajanaacujaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niqiuojuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacujitij, niaari Pueyaso shuquiritiniutianiya, pueyaracaanu na tojjijaca nia quishacari. ² Majaari socua nia quiniu taa Pueyaso tojjiyashijaca quiquiaacuaani. Saniya Pueyaso Sohuanu tojjijaca nia quiri cutara, seetanujuanaa quiariniora jatanishano pueya nia quiniuria. Naacujitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacujiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanoohua maninia.

³ Jiyanoojia Pueyaso quiniucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarjia. Naa jaara Pueyaso cumaaca masequiaari nocua nia tiuushacari, nojuajaari puetunu nijaniyajanaa jiyatequiaari tamaatia poonijosano mijijaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijijaca nia quiniuria tamascajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuracuajani. ⁴ Pa cuaqueyajiniacuma, paari queraatia tamaatia casaa jiitiaani. Puetunu cunojuanaari tamaatia miiniu niishijia, maninia pa quiniuria. ⁵ Paari naajuhuaj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niqiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijosano miiniu niishiyacuaani, naajuhuaj, Pueyasoori puetunu na muerasujanaa na cumaaca niqutioquiaa, tamaatia miiniu niishijijaca pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niqiuara pohuatara na taacanuyaqiniutia. ⁷ Naajuhuaj, cante Pueyaso cumaaca jiitiaa pueya na naacunurani, nojuaja cuaara maninia naacuura pueya. Naajuhuaj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuaara maninia niishitiojoora Pueyaso rupaa pueya niqiuara. ⁸ Cante Pueyaso cumaaca jiitiaa pueya na shiniujiniuriani, nojuaja cuaara pueya shiniujiuura, maja pueya cartenura Pueyaso rupaa. Cante na jiitiasanoiniji nareja niqutiojojuaca casamijiniucua pueyani, nojuaja cuaara juhuajaniya niqutiojoora nareja, nojori na paniniutia. Naajuhuaj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranu.

Pueyaso tojjijaca nia quiri, taa Pablo rootaacujani

⁹ Seetanujuanaa panitioojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanoohua panitioojuaca nia quiri, taa nia

paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoehua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiitiaaquiri, nareja nia niqutiore nojori nia jiitiasanojiniji. Naacujitij, nojori jaara rucoonaa quiri, nojori nia masuure nia tiacora.

¹⁴ Naa jaara naquiya miishaariquia, majaari nia miitanaa nia sesacanu. Saaja nia secojore Pueyaso nojoriicuaa, Pueyaso taraajenura nojoriicua.

¹⁵ Cante shuquiriaatia quiyacuaani, nojoritia nia shuquiririjihuaj. Saniniuujia, cante nujuqueyacuani, nojoritia nia nujuquerejuhuaj.

¹⁶ Jiyanoetiojuaca nia quiriquia, jatiqui nia quiniuria maninia. Majaari tama nia cuaqueyajaaja nia jyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupenuura paniyaquishoo pueyajuhuaj. Majaari tama nia cuaqueyajaaja nia jyatenu juhua socua niishijaca pueya nia quiniuria tamasacajiniji.

¹⁷ Naa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuara quiri maninia puetunu pueya niquliarajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Naa jaara sesa miishaariquia, majaari nojori nia naminiu. Juhuajaniya nia rejeretare saaja. Pueyasocuaajari niaacua naminiutianiya nojori. Pueyaso sequesanoajari nia naajiotasano quiya na rupaajinia:

“Quiria nia tarinitiare puetunu sesa nojori miishanojuanaa niajaninya. Janiyacuajari nojori naminiutianiya niaacuani”.

Cua tojiri. Pueyasocuaajari nia sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuaaanu Pueyaso Rupaajinia naajiotasaaquiaricuajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaj, quia raatorenoj.

Quiaa jaara nia na miiritij, tama nojuajaarijia jiyanoehua caririquiniutianiya noojiajinia”.

²¹ Naacujitij, niaa jaara sesa miishaariquia, majaari nia juaaniu, niaa mariqui sesa miijjara quiriiaarihuaj. Saaja maninia nia miiriquia nia paraca. Naacujitij, niaari Sesaaca shocotanutaniya.

13

Pa jiya jiyaniijianucua tojijia pa quiri

¹ Pueyanaa, mijiria nia jiyaniijianucua tojitajaca nia quiri. Nojoricuaajari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. ² Naacujitij, cante mijiria jiyaniijianucua tojiyashijiani, nojuajaari jiyaniijara Pueyaso jiyatesano tojiyashijia. Cante nia mijiria jiyaniijianucua tojiyashijiani, nojuajaari saniitiosaanutaniya. ³ Paa jaara maninia miijjaca quirini, ɔpaatucua casaara pa jiyaniijianucua puereriquiani? Jiyaniijianucuaari maja na pueretenu maninia miijjaca. Sesa miijjaca cuara na puereera cutara, sesa miijjaca nojori quiniucua. Saaja maninia miijjaca nia quiri. Naacujitij, nia jiyaniijianucuaari maninia poojotanutaniya niajanijajiniji. ⁴ Nojoricuaajari Pueyasora poonijionaa, maninia nojori jiitanura niajaninya. Saniniuujia, niaa jaara sesa miiri, nia puereera cutara. Jiyaniijianucua pueyari maja najuhanaj. Nojoricuaajari jiyaniijianucua cumaacaraca, sesa miijjaca nojori saniitionura. ⁵ Naacujitij, nia jiyaniijianucua tojijia nia quiri maja nia saniitiosaanura, naajuhuaj, maja Pueyaso tojiyashijia nia quiniuria. ⁶ Naajuhuaj, nia cumaneecajiniji

nia niqutiore nia jiyaniijianucua, taa nojori sequequiaa nia niqutionuracujani. Nojoricuajaari Pueyasora poonijioquiaa pueyaracaanu, maninia nojori jiitianura niajanija. Naaratej, nojoriiri cumaneeca masequiaa nijaniyajiniji.

⁷Naaratej, puetunu nojorijanaa nia niqutiore, taa nojori sequequiaa nia niqutionuracujani. Naacujitij, niaa jaara sequesaaare nia cumaneecajiniji nia niqutionura nia jiya jiyaniijiaara, nareja nia niqutiore. Naajuhuj, cumaneeca jaara jiya jiyaniijiaara masenu cojiritiasaare, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucuaara na jiyatesano pueyano. Majaari nojori nia rerequetenu. Naajuhuj, nia jiyaniijianucua tojjijia nia quiri, nojori quiniuucua Pueyaso jiyatesano nia jiyaniijianucuaara.

⁸Pueyanaa, majaari najuhuaana casami nia poonu, niaa jaara cumaneecaaju quiri. Saniniuujia pueyanaa, maja cutaraari narta pueya paniniu nia puecanu. Pueyaracaanu nojori panijia nia quiri cutara. Naacujitij, cante narta pueya panijiani, nojuajaari Moisés Rootasano tojjijia cutara. ⁹Supuetana Moisés cuajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jiitiasano casamiicua jiaatijaja nia quiniu”.

Socua queraatia na rootasanoori quiya. Niocujaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojjijia quirini, paari tari puetunu na rootasanojuanaa tojjijia quiyani. ¹⁰Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojjijia cutarani.

¹¹Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuara niucuaara, pa Jiyaniijiaara na poonijionura.

¹²Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujuanaa pa cartere. Majaari juhua ninishiqui quijia nia quiniu socua. Taa pueya cushiquiaa na toque tariquicuaji na poonijionuracaani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhuj.

¹³Seetanujuanaa juhua Pueyaso pueya nia quiri. Majaari juhua ninishiqui quijia pueya nia quiniu. Niacujaari cuhuashiqui quijia. Naaratej, majaari mashaasequenujuuca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatijajaca nia quiniu. Majaari sacuaraatia casaa miiniuucua nia jiitiniu. Majaari juayonuujutajaca nia quiniujuhuaj. Naajuhuj, majaari tamonu pueya jiitiasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴Naacujiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitijaja nia jiitianura, na cumacanio. Naa nia miishacaritij, niari juhua soldadohua miaquetootajaja toque cushiyojua, maja Sesaaca miitiniuria sesa nijaniya.

14

Maja quarta Pueyaso pueyacuara nia rimiaaquenu sacuaraatia

¹Pueyaso pueyajinijinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji. ²Naacujitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujiani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³Cante puetunu casaajanaa miaqueja cutarani, nojuaja cuara soyaquiria narta Pueyaso

pueyano, cante na miaquesano miaqueyashijia saniniunijia. Naajuhuaaj, cante puetunu casaajanaa miaqueyashijiani, nojuaja cuaara sesacaaquiiria puetunu casa miaquejajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniurijahuaj. ⁴¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuaaj, pa Jiyaniijia Jesucristocuaajaari cumaacaraca, na muerasu na jiyatenura maninia quijiaca nojori quiniuria.

⁵Cua tojiri pueyanaa, noojiaqueya Pueyaso muerasujinijioori niquiriyatu juuca se-maanajiniji jiyatequiaa nojori maniniuhuaqueetanura Pueyaso. Tamasacaari saniniuu-jia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuaara taacanuyaquiiria tama nia miishanojinijijiaaja, maja nia macuhuajetenura nioojia. ⁶Cante niquiriyatu juuca se-maanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuaaj, cante puetunu casaa miaquejajanaani, manini-acuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuaaj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijahuaj na secojosacari Pueyaso, na natau na miaquenura.

⁷Seetanujanaa pueyanaa, majaari pa quiniu tama pajaniyarajaaja. Naajuhuaaj, majaari quenaaja pa shaajenu tama pajaniyarajaaja. ⁸Paa jaara mijiria quiyani, paari pa Jiyaniijiaara rishiquiaani. Paa jaara cusoyareni, paari pa Jiyaniijiaara cusoqueeni. Naaratej, paa jaara saminio quiyajaani, naajuhuaaj, paa jaara tariucua macu quiyani, paari pa Jiyaniijia jiiitiasanoni. ⁹Jesucristocuaajaari cunora cusoquiaari, macunucua Jiyaniijia na quiniuria. Nojuajaari samiitiaquiaarihuua saminiucua Jiyaniijia na quiniurijahuaj. Naacuajitij, nojuajaari pa Jiyaniijijanaa cutara.

¹⁰Naaratej, saaja niquiriyatu Jiyaniijia pa jiiitiasacari, ¿paatucua casaara parta Pueyaso muerasu soojeaca quirini, nojori miaqueyaquiniucua shuni? Naajuhuaaj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nuuatejosaanutaniya Pueyaso tacojini, Pueyaso nequesoreenura pajaniya. ¹¹Tariucuaaanu pa Jiyaniijia sequesanoori naa naajiotasano quiyaa na rupaajinia:

“Seetanujanaa sequeyanijia, puetunu pueyajanaari cucuara mojoquetaconutaniya, nojori niishishacari janiyari seetanujanaa Jiyaniijijanaa cutarani. Puetunu nojori-jianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹²Naacuajitij, paari niishiyani, puetunu pajaniyajanaari Pueyaso rihuanenutaniya tamaajani, na nequesoreesacari pajaniya.

Maja sesa pa miitiniu parta Pueyaso pueya

¹³Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaa quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyaniishano sesa casa. Nojori jaara saniri miiniu nia miishanocuaa, naacuajitij, niari tari sesa miitirii nojori Pueyaso niquiara. ¹⁴Janiyacuaajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniucua. Saniniuuja, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquiriiranoj. Jaara na puerasano saniri miaquenu, nojuajaari tama noojiaajaaja macuhuajanutaniya. ¹⁵Naacuajitij, paa jaara parta Pueyaso pueyano macuhuajetere pa miaquenuucua na miaqueyaquishoo casaani, majaari seetanujanaa parta Pueyaso pueyano panijia pa quiniu. Jesucristocuaajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casa pa miaquesacari na niquiarani? ¹⁶Naacuajitij, majaari nia shanacunu Pueyaso tojiyashijiaa pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷Seetanujanaa nia sequeyanijia, majaari

Pueyaso muerasu pa quiniu casaa pa miaqueyaquiniucua, casaa pa ratuyaquiniucuanio. Pueyaso muerasu pa quishacari, nojuaja cutaraari paniya maninia miijiaa pa quiniuria, jatiqúi pa quiniuria juhuajaniya. Pa panitiaajaariuhua shuquiriaatia quijiaa pa quiniuria. Paacujaari na Sohanu jiitiaani, naa maninia pa quiniuria. ¹⁸ Paa jaara naa quijiaa quiriqúiani Cristora pa poonijiosacari, Pueyasoori pa shuquiritiaa. Naacuajitij, Pueyaso tojiyashijiaa pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyanoehua nia saniniujiuri taate nia naata maninia rupetoosano quiniu puetunu niarta Pueyaso pueyatajanaani. Naacuajiti nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenucua nojori niqúiaara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niqúiaara nia miaquenura nojori miaquesoo casaa, niaa mariquí nojori cushitioreeri. Naacuajitij, majaari nia naata maninia rupetoosano quiniu niaa jaara nia miishanota taraajoriqúia niarta Pueyaso pueya. ²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereeca mashaca nojori niqúiaara, cuno naa pa miishano jaara quiri nojori shiniujiuniuria sesa nojori miiniuria. Naajuhuj, pa cartere puetunu parta Pueyaso pueya jiyaniishano sesa miiniu casaajanaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori maja sesa, tamajaaja nia miirinoj saash Pueyaso niqúiaara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhajetenura na miiniu nuhuaji. ²³ Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacujani. Paa jaara casaa miaquere seetanujuanaa pa tiuyaquiniutia Pueyasocuanio, pa miaquesacari, paari tari sesa miirí Pueyaso niqúiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojiaari macuhajenutaniya.

15

Parta Pueyaso pueya pa shuqiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiyashijiaa. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaacua tojiyacuaani, pajaniya cuaara nojori rejeretaara juhuajaniya. Paa jaara socua Pueyaso Rupaacua niishijiacuaani, nojori pa cumaquiri. Majaari pa niishiriojonu tama pa cuaqueyajaaja pa shuqiritiniuria tamajaaja. ² Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojiia na quiniurijuhuj. ³ Paacujaari niishiyani, majaari quenaaja pa Jiyaniija Jesucristo niishiriojonu quijia tama na cuaqueyajaaja na shuqiritiniuria. Saniniuujia, nojuaja cutaraari taraatia miiniu rejeretaquiaari na rupenura mijiria quinia pueya, nojori na jaariutianura Sesaaca. Naacuajitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quena, cuno pojori, canapute quia sesacajacani, nojoriiri cua sesacaajuhuj, cua miiniucua quia panishano”.

⁴ Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumaniijaajaariuhuj. Naacuajitij, paari juhuajaniya sashiya pa Jiyaniijiani. ⁵ Pueyasocujaari pa cumaquina, maninia rejeretajaca pa quiniuria, cumaniijasano pa quiniurijuhuj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniija Jesucristo maniniuhuaqueetanu, juhua niquiriyatu pueyano, maninia rupetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jiyanoootiojuaca nia quiriquia, taa Jesucristo jiyanooquiaa pajaniyacuaani, maninia rupuetoosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucacata Pueyaso maniniuhuaqueetaano jatiqúi. ⁸ Janiyari seetanujuanaa nia sequeyani, Cristoori mijiria niquiaari Judiocuaca, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucacara quiquiaarijuhuaj, nojori maniniuhuaqueetanura Pueyaso, na jiyanooniucua nojorijihuaj. Tariucuacaanu Pueyaso Rupaajinia supuetana David naajiotasanoori naa quiyajuhuaj:

“Maninia quia miiniucua janiya Pueyasonaa, janiyari quiajanijini poojotanutaniya maniniani taucaca jiyacajinia. Maninia quia miiniucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuaj:

“Pueyaso niishiyashijia taucacanaa, Pueyaso saquirojosano pueya nia cojiri, mariyata jatiqúi nia shuquiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhuaj:

“Pa Jiyaniijia Pueyaso nia maniniuhuaqueetare, puetunu nijanjajanaa, tamaatia rupaaca pocujaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniucua pajaniya”.

¹² Supuetana Isaías naajiotasanojinijihuaj, paari niishiyani Pueyasoori taucaca jitianu panijia pueyaracaanu, maja saaja Judiocuaca. Naaratej, Isaíasri naa naajiotajiaari:

“Supuetana Isaí nianujiniji supenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucacajanaari nocua tiujiaca quiniutaniya”.

¹³ Pueyasocujaari poojajinia poonijiojua, juhuajaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jyanohua. Naajuhuaj, nojuaja cuara nia jiitiaara juhuajaniya, canapueete nocua tiujiacacujani. Naacuajitij, mijiria nia sashishacari, niaari shuquiriaatia rejeretajaca quiniutaniya Pueyaso Sohanu cumaquishacari nijaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴ Cua panishano Pueyaso niquiohuanaa, naa cua naajiojia cua nacasusacari jyanohua nijanjatej, majaari nia jyaniniu janiyari niaacuaji taacanuyajani. Maja. Janiyacuajari niaacua tiuyani niaacuajaari seetanujuanaa maninia quijia. Niacuajaari Pueyaso rupaa niishijiacajuhuaj. Naacuajitij, nia naata tama nacasutojonujuaja maninia, maninia rupuetoojuaca nia quiniuria Pueyaso niquiaa. ¹⁵ Naajaa, quiarijia janiyari niaacuara naajiyani cua niishitiniuhuaa nijaniya tarijia nia niishishano. Cua jyanootiuri, nio cua naajiojia jyanohua cua nacasunuucua nijaniya. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucaca cua pohuatnura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucacani. Naacuajitij, Pueyaso Sohanu poonijionuucua nojori jiuujajinia, nojoriiri Pueyaso shuquiritiasano muerasu quiniutaniyajuhuaj.

¹⁷ Pueyasora cua poonijosacari, janiyari jyanohua timitiaa Jesucristoni, cua niquishacari taa taucaca tiuuquiaa na rupaacuaní. ¹⁸ Majaari cua timitianu tama cua miishanojuaja. Janiya cutaraari Jesucristo miishano timitiani. Nojuacuajaari taucaca tiutiquiaa na rupaacua. Nojoriiri nocua tiuuquiaa nojori niquiaa cua pohuatasacari na rupaa, naajuhuaj, Pueyaso Sohanu cumaacata cua miiniucua nojori niquiaa. ¹⁹ Nojori niquishacari Pueyaso Sohanu cumaacata cua miijosano, nojoriiri niishiquiaa cua pohuatasanoori seetanu rupaajanaa. Janiyari pocujaj Tacuna Jesucristojiniji tari pohuataquiaari puetunu tiquiyocujajanaani, Jerusalén tiacajiniji, puetunu liria jiyajinarajanaano. ²⁰ Naa cua pohuatasacari pa Jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniji tojyaquishaaquiaari juhuanojuajacujani. Majaari cua pohuatanu paniniu quiquiaari tee tamsaca pohuataquiaari tari Jesucristojinijini. ²¹ Naa cua pohuatasacari

Jesucristojiniji cuno pueya niqiaratej, janiyari nio tariucuaaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri:

“Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquniuucua cua quianura. ²³ Quiarijia cutara, janiyari Jesucristojiniji pohuatanu tucuatatucuaa tarini, tee Jesucristo rupaa tojiyaquishaaquiiaari juhuanuujacuajani. Janiyari Espania jiyajinia pohuatanu paniya Jesucristojinijiihuaj. Queraatia marijiaari tari cua shocojocanu pueyaracaanu cua naquerejosacari niaacua cua quianura. ²⁴ Naacuajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutiani nia naacunura janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niqutionuhua cumaneevani, niya quiniaa parta Pueyaso pueya niqutionosano nojoriria. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanojua maninia miya. Nojoriiri tama niishirionuucanujuaaja nareja na cumaneeva niqutiononura Jerusalén tiacajinia quiniaa casamiiuniucua Pueyaso pueyara. Cunora, nojoriiri quiarijia na rerateya cuata na jiyarosocoriquiano. ²⁷ Nojoriiri naa miya nojori niishirijosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaa niquiara. Naaratej, taucuaa cuara saniniujia quiarijia naacuara casamiiuniucua Judiocuaca, nojori jiiitiasano cumaneevata. ²⁸ Naacuajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria nijaniya. ²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiiitanuucujuhuj, mariyata Pueyaso Sohanu panitootesacari pajaniya, janiyari jiyanojua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaaji, Jerusalén tiacajinia cua quiasacari. Naajuhuj, nia secojore Pueyaso, Jerusalén tiacajinia quiniaa Pueyaso pueyacuara. Nojoricuara nia secojore, nojori masenu shuquiriaatia narta Pueyaso pueya taucuaa jiyarosocoriquiano cumaneeva nojoriria. ³² Naajuhuj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuni. ³³ Pa jiyanojua Pueyaso cuara maninia jiiitaaara puetunu nijaniyajanaa. Cuara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojijia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijia nia quishacari, nia paniniutia nia masure nia tiacora nio parta Pueyaso muerasu naacuna maaji. Niocua nia tiaco jiiitarenaj, taa nia jiiitiquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujuajaariuhuj.

³ Quiria nia saruhuatare Priscila, neyaca Aquilano. Nojoriiri cua cojiniia pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiiaari cucuara, nojori tacunura cucuaji cua moyaquishaanura. Janiyari cunora jiyanojua nojori timitiaani, naa nojori jiyanootiuniucua cucuatej. Majaari saa janiyaja nojori cua timitiano. Seetanujuanaa puetunu parta Pueyaso muerasu taucujajiniiojuanaari nojori

timitiaajuhuj, naa nojori miiniuucua. ⁵ Quiria nia saruhuatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secjonuunuratej. Quiria nia saruhuatarejuhua cua rupuena Epéneto. Nojuajaari coteenujuanaa Jesucristoocua tiuuquiaari Asia jiyajinia. ⁶ María nia saruhuatare quiriajuhuj. Nojuajaari jiyanoohua poonijioquiaari niaara. ⁷ Quiria nia saruhuatarejuhua Andrónico, Juniasnio. Nojoriiri cuarta Judiocuaca. Nojoriiri cuata njuatejosaaquiaari njuatejojuajinia, canaa pohu-atanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhuj. Andrónico, Junias, nojoriiri socua coteenu janiyajiniji tiuuquiaari Jesucristoocua.

⁸ Nia saruhuatarejuhua Ampliato. Nojuajaari cua panishano pueyano, Jesucristoocua na tiuniuucua. ⁹ Naajuhuj, quiria nia saruhuatare Urbano. Nojuajaari pa Jiyaniijia Cristora poonijionajuhuj. Cua rupuena Estaquis nia saruhuatarejuhuj. ¹⁰ Apeles nia saruhuatare quiriajuhuj. Nojuajaari puetunu casaajanaa rejeretaja cutara, Jesucristoocua tiuuja na quiniuucua. Aristóbulo tiajinia quiniaa pueya nia saruhuatare quiriajuhuj. ¹¹ Naajuhuj, quiria nia saruhuatare Herodión, parta Judio pueyano. Naajuhuj, Narciso tiajinia quiniaa pueya nia saruhuatare quiria, noo pojori pa Jiyaniijiaacua tiuujiaca pueyatej. ¹² Trifena nia saruhuatare quiria, Trifosajuhuj. Cuno maajipohuari pa Jiyaniijia poonijionuujuaca. Naajuhuj, pa panishano maaji Pérsida nia saruhuatare quiria. Nojuajaari jiyanoohua poonijiojua pa Jiyaniijia. ¹³ Rufo nia saruhuatarejuhuj. Nojuajaari maninia tojjija pa Jiyaniijia. Na nucua nia saruhuatarejuhuj. Nojuajaari juhua cua nucua quiquiaari quiria. ¹⁴ Nio pojori quiria nia saruhuatarejuhuj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuj, nio pojori nia saruhuatare quiria, Filólogo, necocua Julianio, Nereo, na rimiatunio, Olimpasjuhuj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhuatare seetanujuanaa nia paniniutia nojori. Puetunu niqijinio parta Pueyaso pueya maapuejanaari cua sequecanuni cua saruhuatana niajaniya.

¹⁷ Cuarta Pueyaso pueyanaa, nia numooteyanijia, jiyanoohua nia cojuare tama nia cuaqueyajaaja najuhuana tamaatia niishitiojonuujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacuajitij, Pueyaso pueyari juaatioquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonuujuacaacuaji nia rupatere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuana shanohua nojori pohuatasanota, nojoriiri niishiyashijiaca pueya sapojoquiaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara. Naaratej, janiyari jiyanoohua nia timitiaani. Naajuhuj, janiyari paniyani niishijiaca nia quiniuria, saaja seetanu rupaajanaa tojjijaca nia quiniuria, maninia miijaca nia quiniuriahujuhuj. Saniniuujia, sesa niishitiojosano niishiyashijiaca nia quitiriquiani, maja sesa miijaca nia quiniuria. ²⁰ Naacuajitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacanutaniya jiyocuara, Pueyaso tojjijaca nia quiniuucua. Pa Jiyaniijia Jesu cuaara nia cumaquiiria, shuquiriaatia nia quiniuria.

²¹ Timoteo, cuarta poonijiona Jesucristorani, nojuajaari cua sequeya nera cua saruhuatana niajaniya. Cuarta Judiocuaca Lucio, Jasón, Sosipater, nojoriiri nia saruhuatajuhuj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuatajaaniuhuj Cristoocua tiujia cua quishacarijihuaj. Niojuanaa, pueyanaa.

²³ Parta Pueyaso pueyano Gayoori nia saruhuatajuhuj. Nojuajaari na tiajinia cua quiniuria cua masuacano. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuatajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuatajuhuj.

²⁴Pa Jiyaniijia Jesucristo cuaara cumaquiiria puetunu nijaniyajanaa.

Pablo maniniuhuaqueetasacari Pueyaso, quera na tucuatasaacari na naajio

²⁵¡Pueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu nijaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa nijaniyacujani, cua pohuatasacari Jesucristojiniji. Pueyasajuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyojua, Pueyasoori jiyasohua tamajaaja na niishishano jiitiaja Neyanu Jesucristojiniji. ²⁶Saniniuujia, quiari naataja, paari niishiquiaarini, Jesucristocuaajaari mijiria niquiaari puetunu pueyajanaa na jaariutianura Sesaaca. Tariucuaaanu Pueyaso sequesano caminiujuniaa naajionuutasanojiniji paari quiarjia seetanujuanaa na niishiya cutarani. Pueyaracaanu Quijia Pueyasocuaajaari naa paniquiaari quiarjia pa niishiniuria Neyanujiniji. Quiarjiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaa nojori quiniuria, Judiocuaca, taucucanio.

²⁷Pa Pueyasoori jiyanoehua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pabloni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitiojonura nijaniya, Pueyaso saquiriojosano pueya nia quiniuucua. Niaari maninia quiya Pueyaso niqiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuee Jesucristoocua tiuujiacacuajani. Jesucristocuaaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuara cumaquiria nijaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuaaari jiyano hua maninia miiquiaari nijaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiquiaarijianaa nijaniya na cumaa-cata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶ Maninia nia tojitiyacari Cristojiniji pohuatasano, niaari maninia miishaaquiaari taa canaa sequequiaari nijaniyacuaajani. ⁷ Naacuajitij, niaari tari masequiaari puetunu Pueyaso niqutionu panishanojuanaa, maninia na muerasu nia quiniuria, nocua nia jiaatanuta nia sashishacari pa Jiyaniijia Jesucristo tiuquishacariuhua. ⁸ Pueyasoori nia cumaquiniutianiya pueyaracaanu, maja quenaaja niaacua casa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocuaaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuahuaj. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca niqitiooquiaari

¹⁰ Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteyani. Maninia nia niishiriojore. Maja juhua tamasaca nia niqitioonu. Maja tamasaca nijaniya. Maninia nia niishiriojore, maja tamaatia. Nia jiuujiaatioorejuhuaj. ¹¹ Naa nia sequeyanijia cuarta Jesuucua tiuuniaanaa, Cloe niqiohua pohuatanuucua janiya nijaniyajiiniji. Nojoriiri cua sequerucuaa niaana juayonuujutaquiaa. ¹² Naa pohuatasaarucuaa nijaniyajiinijinia: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuujia sequequiaacujua: “Canaari Apolo pueyani”. Tamasacanaari sequequiaajaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raqititijiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijiosaaquiaari moojiniajuhuaj? ¡Maja, cuarta Pueyaso pueyanaa! ¹⁴ Janiyaquiri namitia nia tiuquinijiaquiquiaari moojiniani. Naacuajitij, majaari nia naata sequenu niaa cua sesajinia tiuquinijiosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶ Quera nijajetaanijia. Janiyari Estéfanos tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

¹⁷ Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyarocuaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

Cristoori Pueyaso cumaaca jiitiaa, Pueyaso niishitiajajuhua

¹⁸ Canaa pahuatasano Cristo cusunujiniji niyacutesanojinia pocuarani, cunoori juhua mosanucua pahuatasano shaajecoriquiano pueyara. Naajaa, Jesucristo rupaari Pueyaso cumaacaracacua na tojtianaara, Pueyaso muerasura na jataniniuria pajaniya. ¹⁹ Pueyaso sequesanoquaajari naa naajiotasaaquaiariti:

“Janiyari niishijiaca niishishano cushitionutaniyani. Mijiria pueya niishishano jiyatenu-taniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuaa quiya Pueyasora. ²¹ Pueyari maja na naata Pueyaso niishiniu quiquiaari tama nojori niishitiajatajaaja. Pueyasoori tama sequequiaarijaaja na niishitiajata cutara:

“Jaaja. Maninia naatej. Pueya jiyanooriira saaja nojori tiuushacari cua Niyanuucua”.

Pueyari saniniujia jiyaniya Jesucristo rupaari nareja sequesanojuhanajaj, tojishoo.

²²⁻²³ Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquniu paniquiaa coteenu saaja. Cunora, nojoriiri canaa tojtiaaquiuaa canaa pahuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhua. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhuaa cusoquiaari juhua moseeca. Naacuajitij, canaa pahuatasacari Jesucristo niyacutesanojinia mosaaquiuaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhua Pueyaso Jiyarosocoriquianoori ritia Judiocuaca jiyaniijia quiniutianiya cutara. Majaari na niishitiuniu quijia Cristo cuaara coteenu miishaaria naquiya, jiyanooshano nojori quiniuria sesa nojori mijiosanojiniji. Griego pueyari canaa pahuatasano tojijaquiuaajuhua. Nojoriiri jiyaniya Pueyasoori niishiyashijia quiquiaari Neyanu na motenura. ²⁴ Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohanio. ¡Pueyasoori jiyanoohua niishijia cutara! ²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuquaiaari niyacutesanojiniaari. Naajaa, naacuajiti Pueyasoori pa jiyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhua, Pueyasoori cumueecaaju quiquiaari Cristo cusosacari niyacutesanojinia. Naajaa, naacuajitij, ¡Cristoori Sesaaca shocotaquiuaricua! Pueyasoori jiyanoohua socua cumueeca pajaniyajiniji.

²⁶ Cuarta Jesuucua tiuuniaanaa, niaacuajaari niishiya taamuca pueya nia quiquiaari pueya niqiarani, Pueyaso sequesacari nijaniya na muerasu nia quiniuria. Saaja secaja nijaniyajinijinoori niishijiaa quiriquiaa. Saaja secaja nijaniyajinijinoori tojishano pueya quiriquiaajuhua. Saaja secaja nijaniyajinijinoori jiyaniijianucua niqiohuacujinijo supueno quiriquiaa. ²⁷ Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacuajitij, mijiria niishijiaaari tamajaaja caririqiniutianiya nojori jaara saquiriojiaquishaare. Pueyasoori tojishoo pueya saquiriojoquiaarijuhua, na muerasu nojori quiniuria, mijiria tojishano pueya caririqiniuria nojori jaara saquiriojiaquishaare. ²⁸ Pueyasoori soosano pueya saquiriojoquiaarijuhua, tojishoo pueyano. Pueyasoori naa saquiriojoquiaari najuhuaa quijiaa. Canapuete tama na cuaqueyajaaja jiyaniya cutara pueyanoni, cuno pojoriiri saniniujia quejoosanutianiya. ²⁹ Naacuajitij, majaari quenaaja jiyanoohua pocuaja cureenu quiniutianiya Pueyaso niqiaara. Tojetaarucujanaa shaaquiiri pocuajaca quiniutianiya.

³⁰ Pueyasojuanaacujaari nia rupuetequiaari Jesucristo. Naacuajitij, niaari Pueyaso niishitiaja jiitiaa. Nia rupuesacari Jesucristo, niaari maninia mijia quiya Pueyasora. Pueyasoori nia jataniya saa na tojjiacaraja nia quiniuria, juhua Neyanu nia quiniurijahuaj. Nia-janiyari puetunu jeeasaanutanijajanaa. Paari naa miishiyani Jesucristo pa rupuesacari.

³¹ Seetanujuanaari nio sequesano tariucuacaanu Pueyaso Rupaajiniji:

“Cante shuquiriaatia quiniu paniyani, nojuaja cuaara shuquiritiaara pa Jiyaniijia”.

2

Jesucristo mosaanujiniji pohuatasano

¹ Cuarta Jesucua tiuuniaa pueyanaa, janiya jaara niaacua tiuquiquiaarini, niaacujaari niishiya taa cua pohuataquiaari Pueyasojiniji Jesucristo rupaa nijaniyani. Majaari jiya-jeneta cua pohuatanu quiquiaari niishijiaa niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa nijaniyani. ² Janiyari tari tama sequequiaarijiaanijia: “Janiyari saaja Jesucristojiniji pohuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”. ³ Cua pohuatasacari Jesucristo rupaa nia niquiara, janiyari sasaca quiriqiaa cua puerenutani. Janiyari tetecariquiaani. ⁴ Majaari cua paniniu quiquiaari cua tiutuniuria nijaniya Jesucristoocua tama cua niishitajata-jaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari nioojacajinia poonijioquiaari Pueyaso cumaacata cutara. ⁵ Naacuajitij, niaari Jesucristoocua tiuquiquiaari Pueyaso cumaaca miishacari maninia nioojiajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucujaari pa niishitiya Pueyaso

⁶ Naajaa, canapete Pueyasooocua tiuujia seetanujuanaa cutarani, nojoriiri niishiya canaa pohuatasano Jesucristojiniji seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaacari shaajeconutaniya. Nojori niishishanoori najuhuaa quiniutianiya. ⁷ Canaa pohuatasano cutaraari Pueyaso niishishano tarijia, jiya shipinishaacarijiojua. Pueyasoori jiyacari niishiriojquiaari jyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸ Mijiria jiyaniijianucuaari nio niishiyaquiquiaari. Nojori jaara na niishiquiaari tarijia, nojori maara pa Jiyaniijia moyaquiquiaari niyacutesanojinia. ¡Na Shipinina motuquiaarijiaari, pueyaracaanu shacantuuca quijia! ⁹ Naa naajiotasano quiyacujaari tariucuacaanu Pueyaso Rupaajinia:

“Pueyasoori jiyasohujaa casaa jeenucuasano jiitiaa na panijiaa pueyara. Cunoori maja pueya niquishano quenaaja. Majaari cunojiniji nojori tojjishano quenaajajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. ¹⁰ Pueyasocujaari quiar-ijia canaa niishitiquiaari canaa jiuujiajinia na miinu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya. ¹¹ ¿Cante pueyano niishiriojosano noojiajinia niishiyani? ¿Majate saa na camaru sohanujua niishiniu? Taaquiriirinij. Naajuhuj, saaja Pueyaso Sohuanu-urii Pueyaso niishiriojosano noojiajinia niishiya. ¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiitanu saaja tama pa sohanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jyanohua capora Pueyaso! ¹³ Naacuajitij, canaa pohuatasanoori maja saaja mijiria pueya niishishano. Pueyaso Sohanujuaanaari canaa niishitiojquiaari Pueyaso rupaa canaa niishiniuria

canaa jiuujiajania. Naacujitij, canaa naata Pueyaso Sohuanu jiitiaanaa niishitiojonu seetanu Pueyaso rupaaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiitiaani, nojuajaari na naata puetunu niishishanojuanaa saniniujuniu. Saniniuuja, tamasaca pueyari maja na naata Pueyaso Sohuanu jiitiana miishano niishiniu nocuara na rimiaaquenura. ¹⁶ Tariucuaaanu Pueyaso Rupaaajinia naa naajiotasaaquiarijiuhuaj:

“¿Cante pa Jiyaniija jiuujiajania na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacujitij, majaari pa niishiniu saa mijiria pueya niishishanoja.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesuucua tiunianaanaa, cua quishacari niata, majaari cua naata jiyajeneta Pueyaso niishishano cua niishitiojonu quiquiaari nijaniya. Niaari quera juhua Pueyaso Sohuanuuju quiriqiaajaa. Niaari juhua Cristo conaaja quiriqiaajaa, maja Pueyaso tojjiaa seetanujanaa. Nocuaiji, janiyari nia niishitiojoriquiaa jacariani, juhua Pueyaso niishiyashijiaa pueya nia quishacariija. ² Cua niishitiojosano nijaniyari niishishaatia quiquiaariija, maja jiyajeneta. Majaari cua naata Pueyaso cutara niishishano cua pohuatanu quiquiaari nijaniya. Cuno niishishanoori cumueca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacariija, majaari nia naata na tojiniu quiquiaari. Juhuanujuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaa pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaa pueya. ⁴ Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacujitij, puetunu nijaniyajanaari saaja juhua Pueyaso niishiyashijiaa pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionajuhuanani. Canaari saa Pueyaso panishano miiquiaaari, Jesucristo rupaa nia tojitianura. Canaari Jesucristo panishano miiquiaarini taa na sequequiaari canaa miiniuriacuajani. ⁶ Naacujitij, janiyari Pueyaso rupaa nia pohuataquiarini, naatej, taa casaa jajau pueyano natojoquiaacuaani. Apoloori saniniuuja socua Pueyaso rupaa nia niishitiojoquiaari na cumaquiniuria nijaniya, naatej, taa pueyano na natau shiijioya mohuacatacuaani, maninia na maashinuria. Pueyaso cutaraari na rupaa maashitiquiaari nioojiaajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiini na rupaa, seetanujanaa na muerasu pa quiniuria. ⁸ Naacujitij, paari niishiyani, cante natojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocuaari canaa niqitionutaniya na jiitiasano, nera canaa poonijionuucua. Cante socua poonijiooreni, Pueyasoori socua na jiitiasanojiniji na niqitionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pohuatanu coteequiaari maninia nijaniyani, Pueyaso muerasu nia quiniuria nia tiushacari cua pohuatasanoocua. Naacujitij, janiyari juhua Pueyaso tiara shipininiu coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji,

tamasacaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuara niishiiria maninia, maninia nojori niishitiojonura nijaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiiaari nijaniyani. Saa na rupaacuja nia tiuushacari, niocua maninia quiri, juhua maninia morijiucuaacua tiasano tia, maja na matanura. ¹²⁻¹³ Cante socua Jesucristo rupaa niishitiojiya nijaniyani, cuno cuara niishitiojooora jiyanoehua maninia. Cuara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniujuniuria juhua maninia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitianio, maniiri maja na naata na catijianu. Cante saniniujia tiaree macacatani, tucurutajuhuj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? ¹⁴ Tamonu jaara maninia miijia quiquiaari Pueyaso cumaacata, na miishanoori maja najuhua quiniutianiya Pueyasora. Pueyasoori cuno pueyano niqutionutaniya na jiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniujia tiaquiaari cateja casaatani, na tiasanoori catenutaniya. Puetunu na jiitiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapete maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cuno pueyano saniitonutaniya saniniujia. Puetunu Pueyaso muerasujuanaari juhua na tia quia. Pueyaso quiquio cuara quiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojure tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cuara jataara cuno na niishishano juhua niishiyashijia na quiniuria narta pueya niquiara. Na nuhuaji, cuara maseera Pueyaso niishitiaja, seetanu niishijia na quiniurajanaa. ¹⁹ Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quia:

“Pueyasoori mijiria quiniaa pueya cushiriquiitianiniutianiya, tama nojori niishitiushanooquajaaja nojori tiuushacari najuhuanaj”.

²⁰ Naa naajiotasanoori quiyajuhuj:

“Pueyasocujaari mijiria niishijia nia niishiriojosano niishiya. Naa sequeyari: ‘Najuhua-naari cuno pojori niishiriojonuusano’ ”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniurajuhuj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuja nia jiaatianu. ²² Pueyasoori canaa jiyaramiquiquiaari canaa cumaquiniuria nijaniya. Naacuajitij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhuj. Pueyaso shipinishanooquajaari niaara. Naajuhuj, mijiria nia quishacari, cunoori niaara quia, socua maninia quijia nia quiniuhua. Taa nia miishiya quiarjiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Naa shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacuajitij, puetunu casaajanaari

niaara quiya. ²³ Niajanियari Cristora quiya saniniuujia. Cristoori saniniuujia Pueyasora quiyacujua.

4

Jesucristo jiyaramiquishano poonijosano

¹ Naaratej pueyanaa, nijaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jiitiaani, cuno cuaara quiiria seetanujuanaa Pueyaso miiniu panishano panijia, na rupaa na pohuatanura puetunu maninijanaa. ³ Nijaniya, tamasa pueyajuhua jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaj. Maja cua niishiniu. ⁴ Janiya jaara sesa miiriquiaa cua Jiyaniijara cua poonijosacarini, majaari cua niishiniu. Majaari coojia macuhajenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijaja na naata sequenu taa cua quiquiaarini. ⁵ Naaratej, maja nia rimiaaquenu tamonuucua, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquiriohua, puetunu jiyashohua pa miishanojuanaari niishishaanutaniya. Niishishaanutaniyajaariuhua casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miijia quiriqiaa mijiria na quishacari.

⁶ Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajinijijuhua, maninia nia niishiniuria casaa cua niishitiojiya nijaniyani. Naacuajitij, nia niishitiojoriqiaanijia saa Pueyaso rupaa nia tojtianura suraatiaja. Majaari socua tamonu niishitiojosano nia tojiniu. Naajuhua, maja nia sequenu tamonu niishitiojajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriirij, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa. ⁷ ¿Nijaniyariuhua? ¿Taa nia sequeya tama nia cuaqueyajinijiaajani? ¿Niaateeri socua maninia pueya tamasaajiniji, socua niishijiacajuhua? Majaruhua. Naajaa, nia jaara seetanujuanaa socua niishijiaa quiri tamonujiniji, ¿taa jiyanhua niishijiacara nia quiquianuni? ¿Tamajaate? ¡Maja tamajaaja! Niaacuajaari Pueyaso niishitiaja jiitiaa. Naaratej, maja nia jyaniniu nia socua maninia pueya tamasa pueyajiniji, tama nia niishishanotajaaja.

⁸ Naa jiyoteeri jiyaniya niaa tari cutara niishijiacara quirii. Naa jiyoteeri jiyaniyajuhua, niaa tari jiitiaa puetunu Pueyaso niqitionu panishanojuanaa nijaniya. Naajuhua, niaa jiyoteeri jiyaniya Pueyasoori nia jiyateere jiyaniijanucua nia quiniuria. Naa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jyanijianucujuhua, shuquiriaatia pa quiniuria mariyata. ⁹ Janiyari cuarta Jesucristo jiyaramiquishanoocua niishiriojoriqiaani, Pueyaso naasucuaari canaa jiyatequiaari juhua najuhua quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canajuhua. ¹⁰ Canaa tojtiasacari Cristo, canaa naasucuaari niishiyashijiaa quiya tamasaacarini. Nijaniyari saniniuujia niishijiaa quiya tamasaara, Jesucristo nia rupesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueca quiya tama nia niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanohua. ¹¹ Canaari pueyaracaanu miaajequiaaani. Canaari jiyamuequiaaaniuhua. Canaa cushishano toqueniyoaari jiyareta sesaruqueniyojua. Pueyari canaa miiquiaa taraatiani. Shaquiiiri canaa tia, canaa rucoojonucua pueyaracaanu. ¹² Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na riucaquiaa saajani. Canaa jaara naquiya miishaareni, canaari na rejeretaquiaa juhujaniya saajani. Majaari canaa naminiu quiquiaa saniniuujia nojori.

¹³Pueya jaara tamasaqa niqiuara rimiaaquequiaa canaajinjiji, canaari nojoritia jeecatoonu saniquiaa juucuanu. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴Naa cua naajiosacari niaacuaratej, majaari cua cararonu paniniu njajaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani.

¹⁵Niaa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojitasacari Jesucristo rupaa cua pohuatasacari njajaniya, niaari Pueyaso muerasura quiquiaari. ¹⁶Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurijahuaj.

¹⁷Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuuhua taa cua niishitiojoquiaacuaa puetunu Pueyaso maapejanaa puetunu jiyacajinijanaacuaani. Naa nia rootanutaniyari nia niishiniuhua maninia cua niishitiojosano njajaniya tarijia. Nojuajaari nia pohuatanutaniyajuahuaj taa quijia cua quiyani cua tojishacari pa Jiyaniijia Jesucristo, naa maninia nia miiniurijahuaj.

¹⁸Noojiaqueya njajaniyajinjinioori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriqui nojori jyanishacari maja naasucuaari cua tacatenu quiniutianiuuhua, cua niqiniuhua njajaniya socua. ¹⁹Janiyacuaajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiunutiyaniani, cua niishiniuria casaate nojorini, maja naa sacuaarata nojori quiniuriatej. ¿Cumaacaracate nojori, saaja pocujaca soj? ²⁰¿Canteeri seetanujuanaa Pueyaso pueyanoni? ¿Saaja pocujatee? ¡Maja pocujaja! Cante Pueyaso Sohanu jiiitia na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹Nia niishiriojore, cuarta Jesuucua tiuuniaanaa. ¿Taa nia paniya cua miiniuria njajaniya cua quiasacari niaacuanu? ¿Niaateeri paniya cua saniitionura njajaniya, jacaria cua niishitiojonura njajaniya cua paniniutia soj? ¿Taa nia paniyani?

5

Na que niquiocuata quijijinjiji pohuatasano

¹Niajaniyajinjiji pohuatasaarucuaa taraatianijia. Tamonu njajaniyajinjinionaari jyanohua sesa miya. ¡Na que niquiocuata quiyaquiniaari! ¡Pueyanaa, cuno miishanoori socua jyanohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ²Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiiitiaruhua? ¡Niaa cuaara na tacaatiaara! Cuno sesa miijia cuaara taanuusaaria nia tajinjiji, maja na cojiniuria socua njajaniya nia rerejosacari. ³Cua tojiri taa pa miiniutianiani. Janiyari maja cua quiniu niaata. Naajaa, cojiaari niaata quiya cua niishiriojosacari njajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiuriini. ⁴⁻⁵Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Cojiaari niaata quiniutianiya naa nia miishacari pa Jiyaniijia Jesucristo cumaquishacari njajaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijia na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuuhujuhua puetunu Pueyaso muerasutajanaa.

⁶Cuarta Jesuucua tiuuniaanaa, ¿taate nia naata shuquiriaatia quiniu tamajaajani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacuaa paaquenutaniya. Niaacuajaari niishiya, shiitaniyojua pan

poreeteja jaara niasaare cashojuajinia, ritia poreeteja puetunu cashojua miniquootasanojuanaari. Naajuhuaaj, sesa miijia jaara sequeyaquishaare na miishano, sesa na miishanoori socua paaquenutaniya.

⁷Tarijia, Pueyasoori pa supuetanaa Judiocuaca rootaquiiaari puetunu na pan poreetejajanaa nojori jatanura puetunu marijarajanaa. Nojoriiri naa rootasaaquiiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiiaari miriquitij, nojori cartenura puetunu sesa nojori miitushanojuanaa, nojori rupuenura Pueyaso. Naajuhuaaj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiiaari pocuara, taa borregohua pucoosaaquiiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸Naa Pueyaso pa cojishacari quiarijiatej, tojetaarucuajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹Pueyanaa, janiyari tari niaacuara naajiocanuni cua sequenura nijaniya, maja nia cojiniuria sesoriquia pueya, cuno pojori canapute na camishoo maaji numuetucuquiaani. ¹⁰Naa cua sequesacari nijaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacujijianaa rupatenu. Nio jiyacua, pueyari naa sesa miijiaa quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujaja jiaatiaquiaa puera, maja Pueyasocua. ¹¹Cua tojitiare casaa cua sequecanu tari nijaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucuquiaa. Naajuhuaaj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocujaja jiaatiaquiaajaniuhuaaj, maja Pueyasocua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³Naa cua sequesacari nijaniyatej, majaari cua sequenu quiriquiaa tamasaca pueyajiniji, canapuetucuaja maja Pueyaso muerasuni. ¿Paate nojori nequesoreenaani? Maja. Pueyasocujaaari nojori saniniujiuniatianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaratia na que niquicuata quiyacuajani.

6

Sesa miijia cuaara nequesoreesaaria narta Pueyaso muerasu niquiara

¹¿Seetanutejanaa naa nijaniyajiniji pueya pahuatasanojuhuaaj? Niarta Jesuucua tiuunia jaara sesa miiri nijaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? ²¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocujaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³¿Majate nia niishiniujiuhuaaj, paari Pueyaso seya nequesoreeriquianojuhuaaj? Pueyaso jaara pa nequesoreetenu-taniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴Niaa jaara nia tapueyocuaacaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¿Maja maninia naatej! Cuno pojoriiri maja Pueyaso muerasu jiitianaa. ⁵Naa nia sequeyanijia cua cararonura quenaaja nijaniya, cua niishiriojotenura nijaniyajuhuaaj. ¿Seetanujuanaa tojetaarucuajanaa shaaquiti niishijia nijaniyajinijinio, cante na naata nia tonujutoosacari nequesoreenu nijaniya maniniani? ¿Quiya jiyotucuaajaaari! ⁶Nijaniyanaari tama niarta

Jesuucua tiuuniaacuarajaaja tonujutoojoquiaa Pueyaso niishiyashijiaca nequesoreenaa niquiara. Naa nia miishacaritij, ¡niaari sesa miiquiaa pueyanaa!

⁷ Niaari jiyanoohua jiyajeneya nia juayonuujutasacari. Naa jaara sesa miishaare, niaa cuaraa jyanootioora saniniuujia, nia casami jaara nohuasesaarejuhuaj. ⁸ Niajanijarijiataj, ¡niaari saaja sesa miiquiaacujual! ¡Niaanaari niarta Pueyaso muerasu miiquiaa sesa! Ni-
aanaari tama niarta Jesuucua tiuuniaajaaja nohuasejoquiaa, sesa miijiaca nia quiniucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapue-
te na camishoo maajipohua numuetucujuquiaani, naajuhuj, noo pojori, canapue-
te tama na panishanoocuaajaaja jiaatiaquiaani, maja Pueyasocua. Quejoosaanutaniyajaari-
uhua noo pojori, canapue-
te niarta Jesuucua tiuuniaajaaja nohuasejoquiaa, sesa miijiaca nia quiniucua numuetucujuuani, naajuhuj, cana-
pue-
te maajishuriutia quijia juhua maajitiani. Nohuasenujuacaari quejoosaanutaniya-
juhuaj, noo pojorijuhuj canapue-
te pueyaracaanu socua casami paniquiaa tama nera-
jaajani. Mashaasequenujuacaari puetunu quejoosaanutaniyajuhuj, tamasaca sesacaja-
canio, tamasacaacuara rimiaaquejajuhuj. Naa quejoosaanutaniyajaariuhua noo pojori,
canapue-
te nohuasejoquiaa na sapojonutani. Puetunu jiyano pueyajanaari maja Pueyaso
muerasu na quiniu quiniutianiya, Pueyasota nojori quiniuria shuquiriaatia pueyaracaanu.

¹¹ Noojiaqueya nijajaniyajiniinoori jiyano sesa miijiaca pueya quiquiaari tarijia. Na
nuhuaji, sesa nia miishanoori jeequesaaquiaari Jesucristoocua nia tiuushacari. Pueyaso
Sohuanuuri nioojiajista tiuquiquiaari, Pueyaso na tojitiniuria nijaniya. Naacuajitij,
nia rupesacari Jesucristo, Pueyasoori nia jyanooquiaari. Naa sequereeri: “Niaari saa
maniniaja quiya cua niquiara”.

Pa cuaqueya cuara quiiria saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tariniti-
asaaree puetunu pa miiniu panishanojuanaa pa miiniuriani”. Seetanujuanaa naacuaj.
Saniniuujia, majaari puetunu pa miiniu panishanojuanaa maninia na quiniu pajaniyara.
Seetanujuanaa cua naata miiniu puetunu cua miiniu panishanojuanaa. Naajaa, maja
cutaraari cua miiniu puetunu cua miiniu panishanojuanaa, janiya mariqui puera nocua
jyartuureeri. Naa pa jiyartuusacaritij, na nuhuaji majaari na naata pa jiidishano casaa
pa tarinitianu. ¹³ Pueyari sequequiaa: “Pueyasoori miaquesano shipiniquiaari pa seecora.
Pa seeco shipiniquiaari sumatuucujaj saniniuuriija, shuquiriaatia pa quiniuria”. Seetan-
juanaari cuno sequesano. Naajaa, majaari nio pa niyajetanu, na nuhuaji, Pueyasoori
na shaajanutaniya puetunujuanaa. ¿Pa cuaqueyariuhuj? ¿Pueyasoteeri pa cuaqueya
shipiniquiaari pa numuetucunura pa camishoo maajipohua? ¡Maja! Pa cuaqueya
cutaraari shipinishaaquiaari pa Jiyaniijia, na panishano pa miiniuria. Naajuhuj, pa
Jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria
pueyaracaanu. ¹⁴ Naajuhuj, taa Pueyaso samiitiani quiaaricuaa pa Jiyaniijia Jesu
na cuaqueyatani, nojuajaari macujiniji naa pa samiitiani quiniutianuhua na cumaacatajuhuaj.

¹⁵ ¿Niaateeri niishiyaquiyajuhuj, Pueyaso Sohuanu quiniucua poojajinia, pa cuaque-
yari seetanujuanaa pa Jiyaniijia cuaqueya quiya? Naaratej, Jesucristo cuaqueya pa
quishacari, maja cumaati pa curuushojonu pa cuaqueya, maaji paanatu pa numuetu-
cunuta. ¡Cunoori jiyanoohua sesa! ¹⁶ Pueyasocuaari coteenujanaa na shipinishano
pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri
niquiriyatu cuaqueyaracara quiqui? ¹⁷ Naajuhuj, paa jaara Jesucristo rupuereni, pa so-
huanuuri rupuetoree na Sohanuta, niquiriyatu sohanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo
maajini. Puetunu tamaatia sesa pa miishanojuanaani, cunoori maja pa cuaqueya sesojua.
Saniniuujia, cante na camishoo maajipohua numuetucujuani, nojuaja cutaraari tama
na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu

quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanhua naquiya na miiniutia nia masereeri Neyanu na motesacari pocuara! Naacujitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuquiriritiri pa Pueyaso pa cuaqueyata, pa sohuanatjuhuaj. Nojuacuajaari pa cuaqueya camaru, pa sohuanu camarujuhuaaj.

7

Pablo rootasano pa caminiuria, camiyojua pa quiniuria soj

¹ Quiarijiani pueyanaa, cucuara nia naajiosanojinia nia nequesotasano riucauereraj. Cante niquiriyatu quiniu paniya tamajaajani, cuno pueyanoori maninia miya, maaji na camiaquishacari. ² Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiiriajuhuaj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuaaj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuaaj, neyacaari maja tama na cuaqueya camarujuaaja na quiniujuhuaj. Necocuaari neyaca cuaqueya camaru cutara. ⁵ Naacujiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu nijaniya. Naajuhuaa nijaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanhua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujucarari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya nijaniyani socua panaatia nia quiniuria. ⁷ Naaratej, nia jiyateriquiani taa cua quiyacaarani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacaarani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajicuua nia jiaatianura pueyaraaanu. ¹⁰ Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanoootioora, na rupetoonuhuaa. Jaara maja na naata jiyanoootioonu, cuaara quiiria tamajaaja pueyaraaanu. Cuaara camiaquiiria socua. Canuunaa, pa Jiyaniijia Jesucristo sequesanoori mariyata niaarajuhuaaj. Naa sequeyari: "Maja nia cartenu nia niquiocua".

¹² Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu paniyajaa, majaari na cartenu. ¹³ Naajuhuaaj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiunuaatia caminio quiya. Nojori seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, nijaniya cuaara neyaca jiyanooria necocua quiniucua niarta Pueyaso pueyano. Nareja nia niquirininoj, niaata na rerejonu panishacari. Naajuhuaaj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niqishariajuhuaj, na rerejosacari niaata. Naajuhuaaj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanoojuaaja. ¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari nijaniya, niaari juhua camishoo

quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari nijaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijiosano quiquiaarini, cunocajaari Pueyaso panishano quiquiaari niaara. ¹⁸ Naacuajitij, cante tarija na cararaatiuquica co matesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiuushacari quiarijia. Naajuhuj, cante matesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. ¹⁹ Cante Judio pueyano na quiniuria matesaaquiarini, naajaa. Cante matesoo quiyani, naajaa. Saaja maninia cutaraari pa tojtianura Pueyaso niishitiojosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. ²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiri quia cartesano pueyano nia camarnujiniji, maniniacuajaaari. ²² Cante poonitijiotasusano pueyano quiquiaari Pueyaso sequesacari nijaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijia. Naajuhuj, cante camarnuuju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijiosano pueya quiya cutara. ²³ Pueyasoori jiyano hua naquiya miiquiaari na cusojuasacari Neyanuniojua, na masenura nijaniya, na muerasu nia quiniuria. Nia masequiariri tama nerajaaja nia quiniuria. Naaratej, majaari juhua tamonu camarnu poonitijiosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarija Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu nijaniya.

²⁵ Quiarijia nia sequeera cua niishiriojosano, taa camishoo pueya miiniutianiya. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquuaa na sequenu panishano cua caminiuuniuria nijaniya, na Sohuanu cumaquishacari janiya. ²⁶ Naacuajitij, naa nia sequeyanijia: niaacuajaari niishiya, quiarijiani, jiyano hua puereeta quishacari. Nocuaji nijaniya cuaara quiiria taa nia quiyacuajani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸ Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniucua quiarijiani.

²⁹ Cuarta Pueyaso muerasunaa, nijaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyano hua pa tojtiare pa Jiyaniijia. Naacuajitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanooocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niqitiojiojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. ³¹ Canapueete niishijiacani, queraatia casami na masejonura mijiriani, nojori cuaara niishiiria maja casami panijiaa nojori quiniuria puera. Nio jiyari tari puequeya

puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³²Janiyari panyani mijiria casaacua tacayashijiaca nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. ³³Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴Naacujitij, noojia niquijioteyari. Naajuhuj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacujitij, majaari puera jeya na quiniu Pueyaso panishano na miiniuria.

³⁵Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojtianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacujitij, niaari nioojia niquijioteyaquiniutianiya.

³⁶Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu panyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷Cante saniniuujia maja noojia niquijioteyaquiya na niishiriojosacari neyatuuucuan, cunoori maninia miiniutianiya na camitiyaquishacari, jaara na naata neyatu tojuanu maninia. ³⁸Naacujitij, cante neyatu camitiriini, maninia miyari. Cante neyatu camitiyaquiyajaanihuaj, nojuajaari socua maninia miya. Naacujitij, cuno neyatuuri na naata Pueyaso panishano miiniu socua, camishoo na quishacari.

³⁹Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquoori maja tari na quiniu juhua camishano. Na panishacari, cuaara camiiria cana na caminiu panyacuajani. Jaara caminiu paniri, cuaara camiiria Pueyasocua tiuujia pueyanota cutara. ⁴⁰Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasocuarajanaa?

¹Cuarta Jesuucua tiuuniaa pueyanaa, janiya quiarijia nia niishitiojonutaniyani teyano pa miaquesanojinijiti puereshiyani. Pueyaso niishiyashijiacaari na miaquesocoriquiano seya puecoonu niishijia shipinishano casaacuara juhua Pueyasocuarara. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuaj, cuno seru jaara taucuaa jyanishano cumaacaraca quijiaacuara mosano quiri? ¿Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanoocua. Cante narta pueya paniquiaani, cunoori narta pueyacua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ²Naacujitij, cante tama na cuaqueyajaaja jyaniani niishijiani, cunoori juhuanajuaja maja niishijia seetanujuanaa. ³Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴Juhuanujuajaari maja cua riucuanu nia niishiniu panishano: “¿Maninatenaari cuno shu pa miaquenu, seru jaara pueya jyanishano pueyasocuarara mosano quiri?” ¿Casaatejaara cuno nojori jyanishano pueyasoni? Paacuajaari niishiyani cuno shipinishano

casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuaacaanu Quijia. Maja socua tamonu quiniu juhua nojuaja. ⁵Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuaj. ⁶Naajaa, paari niishiyani saa niquiriyatu Pueyasojuuari quiya. Nojuacujaari pa Que Pueyaso, pa shipinia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhua. Cunoori pa Jiyaniija Jesucristo. Na Queeri na shipinitiquiaari puetunu na shipinishanojuanaa. Pajaniyajuhua, paari rishiyani saaja na cumaquishacari pajaniya.

⁷Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaa juhua Pueyasojuhuaj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miiri! Pueyaso niquiarani!” Naacuajitij, nojoriiri noojia macuhuaJETEQUIAA. ⁸Pueyanaa, paacujaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniujuhuaj. ⁹⁻¹¹Niaacujaari jyanohua tiuuquiaa Pueyasoocua. Naacuajitij, niaa naasucuaari na naata juhuajaniya tiuquiniu cuno shu miaquenura nojori jyanishano pueyaso quiquiojinia. Niaacujaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhujaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niqiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “¡Jaj! ¡Nojoriiqui cuno shu miaquenuyacuaa! Saniriirajataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacarihua cuno shu miaquenu, tamajaaja noojia macuhuaJanutaniyari. Naacuajitij, niaari niarta Pueyaso pueyano sesoya, na niquiara nia miaquesacari cuno shu. Na niquiniucua nijaniya cuno shu miaquenuyano, nojuajaari cnora na miaquerejuhuaj. Saniniuujia, nojuajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jyanooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuarihua, na rupesacari nijaniya. ¹²Nia miaquesacari, niaari na pueresano shu na miaqueteya. Naacuajitij, noojiaari macuhuaJenutaniya. Naacuajitij, niaari sesa miya niarta Pueyaso pueyano. Niaari pa Jiyaniija Cristo miya sesajuhua, naa nia sesosacari tama na pueyanajuaja. ¹³¿Taa nia sequeyani pueyanaa? ¿Maninate shu pa miaquenu, seya jaara taucuaca jyanishano pueyasoocua pucoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijacara nia jiyateriquiani, taa cua miiquiaa saaja maniacuaani.

9

Taa quijia Pablo quiquiaarini, Jesucristo jiyaramiquishano na quishacari

¹Janiya jaara cuno shu miaquenu paniyani, cua naata miaquenu cua panishano. Najuahuaj cua naata puetunu cua panishanojuanaa miiniu taa cua Jiyaniija sequequiaari na jiyaramiquishano pueyacujani. Janiyacujaari Jesucristo jiyaramiquishanojaanihuaj. Seetanujuanaa cua namijata Jesucristo niquiquiaarinijia. Nojuajaari cua jiyatequiaari na jiyaramiquishano cua quiniuria. Naajuhua, cua pohuatasacari Jesucristojiniji nia

niquiara, niaari na muerasura quiquiaari cua pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhuj. ²Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniujiuhuj taa cuarta Jesu jiyaramiquishano pueya miiquiaacuani.

³Tamonu jaara cua nequesoreere taa cua miiquiaani, janiyari saaja naa na riu-cuaquiaani: ⁴“Pueyasoori sequequiaari, na jiyaramiquishano pueya cuaara niqutiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niqutiojonura canaa panishano. Naajaa, majaari canaa masenu quiquiaa canaa panishano nijaniyajiniji, janiya, Bernabeeno. ⁵Naajuhuj, canaa jaara niqiuocaraca quiriquiani, canaa maara canaa niqiuocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniija Jesu tapueyocua-caari naa miiquiaajuhuj. Pedrojuanaari necocuata rucanejoquiiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶Jesucristoori sequequiaarijihuuj: “Cua jiyaramiquishano pueya cuaara niqutiosaaria cumaneeca, na panishano nojori masetajara”. ⁷Niaateeri jiyaniya cuno sequesano maja quiria, maja Bernabeerajuhuj? ¡Cunocujaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere nijaniyajinijini, canaa ni-ishitiojonuucua nijaniya. Naajaa, canaari tama canaa juashiquiatajaaja poonijioquiaani, canaa panishano canaa masetajara.

⁷Soldadoteeri tamonu poonijiosano jiitiaja, na miaquesano na masetajara? ¡Maja! Soldadohua jiyaniijaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijiosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano nijaniyajiniji. Naajaa, majaari canaa mashiniquijionu quiquiaa quenaaja canaa panishano nijaniyajiniji. Canaari nareja poonijioquiaa tama canaa juashiquiatajanija, Jesucristo rupaa canaa pohuatasacari nijaniya.

⁸Nio cua pohuatasano nijaniyani, majaari tama canaa niishiriojosanojuaja. Nio niishitiojosanoori tariucuaacuanu Pueyaso Rupaa naajiosanojinia quiyajuhuj, taa cua sequeriquiaacuajani. ⁹Supuetana Moisés caminiujiushano Pueyasojinijiiri naa naajio-tasaquiaaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja!
¹⁰Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojooora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririnij. Na camaruuri niishiya na poonijiosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuj? Jaa. Niishiyacuajaari na mianutaniyari. ¹¹Naajaa, niaata cua quishacari, canaari naa poonijioriquiaa Pueyosorani, nioojiaca canaa cumaquiniuria maninia. Naacuajitij, canaa cuaara niqutiosaaria saniniuuja canaa panishano. Naajaa, majaari canaa paniniu canaa panishano nia niqutionura canaa. ¹²Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiaari Jesucristo rupaa nijaniyani. ¿Majateeri coteenu canaa niqutiosaanu canaa panishanojuhuuj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitiaaquishacari canaa panishano. Canaari naa miiquiaaritij, niaa mariqui

Jesucristo rupaa tojiniu paniyaquiriiri canaa taajetesacari nijaniya, pueyaracaanu canaa mashiniquijosacari canaa panishano nijaniyajiniji.

¹³ Niaacuajaari niishiyajuhuj, Jerusalén tiacajinia Pueyaso Secojoua tiajinia, cuarta Judiocuaca miaquesocoriquianoori puecoosaaquiaa Pueyasocuara, taa Pueyaso rootaquiari canaa supuetanaacuajani. ¿Niaateeri niishiyaquiyajuhuj, shu camaruuri secujoajinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojoua tiajinia poonijionaari miaquesanoraca quiquiaajuhuj. ¹⁴ Pa Jiyaniijia Jesucristoori na rupaa pohuatanaara naa sequequiaarijuhuj: “Cua rupaa pohuatanaa cuaara niqutiojosaaria na panishano pueyaracaanu”. ¹⁵ Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuani. Naajaa, majaari cua masenu quijia nijaniya cua panishano cua masetajara. Niaa naasucuaari jiyaniya janiyari quiarjia niaacuara naajioree nioni, cua shiniujiuniuria nijaniya nia niqutiojonura janiya cua panishano. ¡Maja! Majaari cua paniniu nia niqutiojonura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojtianura, cua panishano cua maseyaquiniutia nijaniyajiniji. Naacuajitij, janiyari tamajaaja shuquiriaatia quiya Pueyaso niquliarani.

¹⁶ Cua tojtianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniucua nojuaja. Cua pohuatasacari na rupaa, janiyari saaja na tojiani. Nojuacuajaari cua jiyaroquiari na rupaa cua pohuatanura. Cunoori maja tama cua niishiriojosano cua miiniuriajaaja. ¹⁷ Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajanijara”. Janiya jaara naa na sequequiaarini, cua Jiyaniijia maara cua niqutiore cua poonijosanojiniji nera, na shuqiritiasacari janiya. Saniniuujia, tama na panishacarijaaja cua Jiyaniijiajanaacuajaari cua jiyaroquiari na rupaa cua pohuatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuqiritiniuria socuani? Naa miiquiaacuajanijia, nareja poonijioquiaanijia tama cua juaashiquiatajaaja cua panishano cua jitianura, na rupaa cua pohuatasacari. Naaratej, majaari cua sequenu quiquiaa cua tojtianaa, nojori niqutiojonura janiya cua panishano. Jesucristocuajaari sequequiaari na rupaa pohuatanaa cuaara niqutiojosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuqiritiniu socua, cua pohuatasacari na rupaa cua maseyaquishacari cua panishano cua tojtianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niqutiojonu quiquiaa janiya na jitiiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujanaa cua quiniuriani, socua pueya quiniuria pa Jiyaniijia Jesucristo tojtianaara. ²⁰ Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquliarani. Naacuajitij, socua Judiocuacaari Jesucristo rupaa tojtiaa. Jesucristoocua cua tiushacari, janiyari maja socua cua quiniu juhua cua supuetanaa Judiocuaca rootasano tojjijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojtiaajaani. Naacuajitij, cua quishacari juhua nojori, nojoriiri socua cua tojtiaa cua pohuatasacari Jesucristojiniji. ²¹ Naajuhuj, cua quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiquiaajuhuj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquliarani. Naajaa, Pueyaso rootasano tojiquiaa pueyaracaanu cutaranijia. Naajuhuj, puetunu Jesucristo niishitiojosanojuanaa tojiquiaanijia. ²² Noojiaqueya Pueyaso muera-

suuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiqiaajuhuaq nojoritia cua quishacari. Nojori jiyanihacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. ²³ Janiyari puetunu naa miiquiaajanaani, socua pueya cua tojtiniuria Jesucristo rupaa. Naa maninia poonijioquiaa cua Jiyaniijiaranjia, cua masenura puetunu maninia na sequesanojuanaa na muerasura.

²⁴ Niacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuatujua jaarajaaja. Cante narta netecuatunaa shocotajani, shanhua casaa niqitioshiyari. Ritiuquia pueyanoori jyanohua shuquiriaatia quijia na shocotanjini na masesacari casaa. Naajuhuaq pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jittiasanojiniji jiyocuaaanu. ²⁵ Naajuhuaq, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuuja, na masesano na shocotanuucuanu, cunoori saaja shanhua nacaque jaamasujiniji shitiasano. Majaari na rishiniu. Pajaniyari saniniuuja pueyaracaanu shuquiriaatia quiniutianiyanu Pueyaso niqitiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

²⁶ Pueya netecuatusacari, netecuatunaa cuara niishiiria tee netenu puequeetu quiyani. Majaari najuhuana na camarucuneejonu. Naajuhuaq, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuaq, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. ²⁷ Janiyari jyanohua saniniujuquiaa maja cua miiniuria tama cua cuaqueya miiniu panishanojuajaani. Janiyari cua cuaqueya jiyartutenu paniquiaani saa Pueyaso cua tojiniurija. Janiyari tari queraatia pueya niishitiojquiaari Pueyaso rupaani. Janiya jaara tama cua niishitiojosanojuaja tojiaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariquia jiyajinia. Majaari nia niyajetanu niaa mariqui Pueyaso tojiyashijiaa quiriohuajuhuaq. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuca shoniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niutiaquiaari jooquashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na quitiumi quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujua, Pueyaso tinshano nojori miaquesocoriquiano pueyaracaanu cuno cariquia jiyajinia nojori rucuanijosacari. ⁴ Naajuhuaq, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji na raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari na maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori nunora nojori shuquiritiaaquiquiaari. Naaratej nojori cusojuanuuriquiaari cuno cariquia jiyajinia nojori camarucuneeetasacari pueyaracaanu, cuara puequequiaaritiaatitia puetunu cuno tojiyashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijinijiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhuj. ⁷ Shushajanaa nojori coteesacari rucuanenu cariiquia jiyaco, noojiaqueya nojorijinijinioori caapiqui casaa shipiniquiaari orojiniji juhua juunu niqishano. Nojoriiri tama nojori shipinijosano casaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajitiruii queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miituquiaariiri”.
 ¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinijinioori sesa miiquiaari taaturitiani, cararaatia taucuaca miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijiaa!” Cunora, veintitrés mil Judiocuacaari puecoosaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taaturitiani.

⁹ Na nuhuaji, noojiaqueya nojorijinijinioori Pueyasota juaaquiocuaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuuquiaari. Naaratej pueyanaa, maja cumaati pa jaanuu, Pueyaso jaara pa saniniujiuri. Maja naa pa miiniuti paa mariqui Pueyaso juaatiriiri.

¹⁰ Tamacari, noojiaqueya cuno pueyajinijinioori Moisésa juayonuutaquiaari. Moisés-cuajaari nojori jitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaa na cusojuanura. Queraatia pueyari cusonuuquiaari jiyacari. Naaratej pueyanaa, majaari pa juaatianu pa jiyaniijianuucua.

¹¹ Puetunu pa supuetanaajiniji naajiotasanojuanaari tariucuacaanu naajiotasaaquiaari, pa numootesaanura quiarijiani, quera pa Jiyaniijia muetasacariuhua. ¹² Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata saniniujiushaaquiaajuhuj, taa puetunu parta Pueyaso pueyajanaa saniniujiushaaquiaacuaani. Naajaa, nia naata Pueyasocua tiunuu maja puera nia saniniujiushaanura. Pueyasocuaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuanu taraatia nia miiniucuaaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

Maja pa cojinuu tamasaca, na miaquenusacari na jyanitiushano na pueyasocuaara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jyanitiushano pueyaso quiquiojinia, na tojtianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojinuu, niaa mariqui sanitiosaareeri. ¹⁵ Niaacuajaari niishijiaa. Naaratej, nia niishiriojore cua sequesanoocua.

¹⁶ Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupesano quiquiaani, na nanaca shoonuucua puetunu pocuarajanaa. Naajuhuj, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqui pa Jiyaniijia cojiquiaani, na cuaqueya cusonuuucua pocuara. ¹⁷ Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniijatani, juhua niquiriyatu cuaqueyaja.

¹⁸ Nia niishiriojoriquia taa Israel pueya miiquiaacuaani. Nojori miaquesacari Pueya-soocuara na mosano Pueyaso niquiara, na niti nojori mosano seruuri juhua tama no-jorijaaja, Pueyaso jiyanooniuria nojori. Naacuajitij, nojoriiri na naata Pueyaso rupenu, nojori seconjura nojuaja. ¹⁹ Jaara naa quiriritij, ztaateerini, pueya jaara shipinijosano casaacuara mosano shu miaquere? zCasaate pueya jiyaniushano pueyasooacuara mosano shuni? Nareja shucuaajaari. zCumaacaraca quijiate cuno, pueya shipinishano casaa juhua Pueyasorani? iMaja! ²⁰ Naajaa, nia tojitiare casaa cua sequenutaniyani. iPueyaso niishiyashijiaca pueyari na miaquesocoriquiano na seya puecooquiaa samarhuacuara! Naa nojori miishanoniqitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. iMajaari cua paniniu nia rupenuara samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. ²¹ Majaari pa naata pa Jiyaniijata rupueoonu, samarhuata pa rupueoosacarijuhuaj. zPueyasote samarhuata cojitishiya? Pa Jiyaniijia cusonu juuca pa niishiniuria, zpaateeri na sequesano miaquenutaniyani, samarhuacuara mosano casaajuhuj? zCojitishiyatee? iMaja pueyanaa! ²² zPaateeri pa Jiyaniijia paraca cojiniu paniyani, pa Jiyaniijia pa juaatiniuriani? zPajaniyate socua cumueeca pa Jiyaniijajiniini? zMajateeri nia puerenu pa Jiyaniijia saniitonu?

Taa pa miiniutianiyani

²³ Tari sequereecuajaniija, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacu, maninia nojori quiniurajuhuj. ²⁵⁻²⁶ Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niqitiojosaquiji cumaneecata, majaari nia nequesotanu: “zNio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijiaca jaara nia masuure nata nia miaquenura, nia quiaare, niaa jaara quianu paniri. Juhujaniya nia miaquere na rupojosano niaara. Majaari nia nequesotanunoj: “zNio shuti casaacuara mosaarucuaa?” Majaari naa nia nequesotanu niaa mariqui nioojia macuhujeteereri niaa jaara niishiri nia miaquesanoori shipinishano casaacuara mosano juhua Pueyasooacuara. Juhujaniya nia miaquere nareja. Puetunujua-naari pa Jiyaniijia shipinishanocuaaja. ²⁸ Saniniujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasooacuara”, majaari nia miaquenunonoj, niaa jaara naa sequesaa. Maja nia miaquenunonoj, nia cojinia mariqui na miaquerejariuhuj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyani. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujateereri cuno shu na miaquesacari niaata.

Niaa naasucuaari cua nequesotanu paniya: “zPaatucua pa panishano shu miaqueyquirini saaja tamonu pueyano pueresacari pa miaquenu panishano shu?” ³⁰ Paa jaara Pueyaso sequereri ‘paacarasho’ cuno sumaturani, zmajateeri maninia pa miaquenura? zTamasacatucua casaara pa sesacare cuno miaquesano pa miaquesacari?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³² Puetunu nia miishanojuanaa cuara quiriia maninia Judiocuaa niqiarua, taucuaa niqiarajuhuj, parta Pueyaso pueya niqiaranio. Jiyanhua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyanitushano sacuraatia casaa. ³³ Naaratej, janiyari pueyaracaanu maninia miiniu paniquiaa puetunu pueya

niquiarajanaani, nojori cuaara tojtiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaraaanu maninia miiquiaari pueyacuua.

Maajipohuatucua taa quiriquiani Pueyaso pueya rerejosacari

² Cuarta Jesuucua tiuuniaanaa, janiyari nia shuquiritiaani, pueyaraaanu nia niishishacari janiya, naajuhuj, maninia nia tojtiasacari puetunu cua niishitiojosanojuanaa Pueyasojiniji. ³ Janiyari paniya cutarani socua nio nia niishiniuria: Cristocujaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuani. ⁴⁵ Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuaara jocuaara na nacaque na pocuasacari. Saniniuujia, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatijaariuhuj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririnij. Cararaatia quiyajaariuhuj, na secojosacari Pueyaso, na caminiujiushacari Pueyaso sequenu panishano pueya niquiarajuhuj, mishiquiosoo na naca quishacari. ⁷ Maajiiri neyaca shuquiritiya na tojjia na quishacari. Naacuajitij, neyacaari narta pueya shuquiritiasano quiyajuhuj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniurajuhuj. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

⁸ Pueyaso jaara coteenujuanaa caya shipiniquiaari, majaari maajijiniji na shipinini quiquiaari caya. Maaji cutaraari caya riuquiocujajiniji shipinishaaquiaari. ⁹ Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. ¹⁰ Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuj. ¹¹ Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuj, cayari maja na naata supueno tamajaaja maajijiu. ¹² Seetanujuanaari, maajiiri coteenu shipinishaaquiaari caya cuaqueyajiniji. Na nuhuaji, puetunu canuujuanaari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutojonura.

¹³ ¿Taa nia sequeyani pueyanaa? ¿Maniateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴ Naajuhuj, quera puetunu pueyajanaari sequeja, cararaatia niquishanoori caya jaara tucuumuejaru quiya juhua maaji. ¹⁵ ¿Maajiirijiataj? Jaara tucuumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucuumuejaru na quiniuria, na naca mishiquioriquiano na mucacata. ¹⁶ Tamonu jaara nacoonu paniyajaa socua pa

muesujiniji, niocua na sequere: “Pablocuajaari tari pa niishitiojoree puetunu na ni-ishishanojuanaa. Naajuhuj, puetunu Pueyaso pueya maapuejanaari tamaquiicua naa miiquiaa taa Pablo pohuateree pajaniyacuajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuujujinia, pa Jiyaniijia cusunu nojori ni-ishishacari

¹⁷ Cuarta Jesuucua tiunuaanaa, nio, janiya niaacuara na naajiyani, nioori maja cua shuquiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janyari naa pohuataaarucuaa nijaniyajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucuj. ¿Casaate cua toyani? ¹⁹⁻²⁰ Seetanu naasucujanaa niaari nioojiajinia naa niaaquejoquiaaqui. Paacuajaari tari niishiquiaarini noojiaqueya pueyari Pueyaso pueya maapuecuaji rupatenutaniya. Naa niishishanote canapuate maja Pueyaso muerasuni. Cante seetanujanaa Pueyasoocua tiuujiani, majaari na rupatenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusunu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusunu nia niishiniu quiquiaa seetanujanaa. ²¹ Nijaniyanaari tama nia patasanojuaja coteetaquiaa miaquenu. Niaanaari nia miaquesuno serotaquiaa. Naacuajitij, casamiijiuniucuanari miaajecoquiaacujua. ¿Saniniuujia casamiriicanaari juhujaniya mashaasequenuquiaacujua! ²² ¡Jiyanohua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratunonio? ¿Niaateeri niarta Pueyaso muerasuooquiaa? Naa nia miishacari casamiijiuniucuatej, niaacuajaari nojori cararoquiaa, casamiijiuniucua nojori quiniucua. ¿Taa nia sequeyari pueyanaa? ¿Janiyate nia maniniuhuaqueetaani? ¡Maja! Jiyanohua tacayanijia. Majaari cunora cua shuquiritianu nijaniya.

Pa Jiyaniijia rootasano na cusunu pa niishiniuria

²³ Janyacuajaari nia rootacanu tari pa Jiyaniijia Jesu pohuatasano janiyani, taa naa miaquequiaari na saquiriojosano pueyatani. Cuno niucua, Judasri pa Jiyaniijia quia-teriquiano quiriquiaa taucua mosocoriquiano. Cua tojitiarohuacuara pueyanaa. ²⁴ Judas quiateyaquishacarija nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quena”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secorejoreeri. Na nuhuaji, na pueya sequerohuari: “Pueyara-caanu nia ratusacari nio, nia niishiriquia, cua Queeri na nanaca seera nia niishinooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶ Naa nia miaquesacaritij, nia ratusacarijuhuaj, pueyari niishiniutianiya niaari Pueyaso jiyanooshano pueya, pa Jiyaniijia Jesu cusunucua pa niti. Naa nia miaqueriquia pueyaracaanu na sequesano pan, pa Jiyaniijia cuaara tiuquiriohuajaatijia.

Nia niishiri taate pa naata miaquenu pa Jiyaniijia cusunu pa niishiniuriani

²⁷ Naaratej, niaa jaara sesa miiri, Pueyaso nia secorejore ritia na jiyanooniuhua niajanija, nia miaquenuhuara pa Jiyaniijia cusunu nia niishiniuria. Niaa jaara pa Jiyaniijia pan miaquere jiyanooshoo nia quishacarija, niaa jaara na cusunu mashaca rature jiyanooshoo nia quishacarijuhuaj, ¡niaari na cusunu rerequeteya! Niaari juhua sequeyaruhua, pa Jiyaniijia najuhua cusoquiaari. Naa nia miishacaritij, niaa cutaraari saniitiosaanutaniya.

²⁸ Naaratej, tama nioojiajiniajaaja nia niishiriojore taa nia quiquiaani, casaa nia mi-
 iquianu sesani. Naa nia miiri coteenu, niaa mariqui sesa nia miishano miaquetareeri
 Pueyaso jiyanoyaquishacarijia nijaniya. Naa nia miiniu nuhuajitij, niocua shuquiriaatia
 juhuajaniya miaquerohua pa Jiyaniijia pan. Niocua juhuajaniya raturohua pa Jiyaniijia
 raatonuquejiniji cutara. ²⁹ Cante juhuajaniya miaquereeni, cante juhuajaniya raturee
 najuhuanani, jiyanooshoo na quishacarijia, cuno pueyanoori Pueyaso saniitietenutaniya
 tama na cuaqueyajaaja. ³⁰ Naacuajitij, jiyanooshoo nia quishacarijia nia miaquesacari,
 queraatia nijaniyajinijinioori cunora cusosuhua quiya. Noojiaqueya nijaniyajinijinio
 cutaraari tari cusonuucanujuhuj, Pueyaso saniitiosacari nojori. ³¹ Nocuaji tama nia
 cuaqueyajaaja nia jee care suraatia, pa Jiyaniijia mariqui saniniujia nia saniitoreeri.
³² Pa Jiyaniijia jaara pa saniniujiuri, canapuete sesa quiyani, Pueyasoori na saniitioquiaa
 na muerasu nojori quiniuucua, maninia nojori quiniuhua juhua maninia na muerasu.
 Naacuajitij, juhuacarjia na saniitiosacari na muerasu, majaari pa saniitiosaanu quini-
 utianiya na ruuretjacata jiya puequesacari, Pueyaso jaqueroosacari na tojiyashijia.

³³ Naaratej cuarta Jesuucua tiuuniaanaa, niaa jaara pa Jiyaniijia pan sanu paniriquia na
 cusonu niishiniuria, nia sashiri niarta Pueyaso muerasu, jatiqiu nia miaquenura maninia.
³⁴ Miaajeyano maaraja, cuara miaqueera coteenu tama na tiajiniajaaja, Pueyaso mariqui
 nia saniitoreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari
 niaacua.

12

Pueyaso Sohuanu cumaquishacari puetunu Pueyaso muerasujuanaa

¹ Cuarta Pueyaso muerasunaa, niaacuajaari tari niishiya Pueyasoori na Sohuanu niq-
 uitioquiaa puetunu pajaniyajanaa, na cumaaca pa jiitanura. Quiarijiani, socua nia
 niishitiojonu panya cunojinijiniija. ² Niaacuajaari niishiya taa nia quiquiaari tarini,
 Pueyaso niishiyashijia nia quishacarijia. Niaari puetunu sapojosaaquaaarijianaa, pueya
 shipinishanocua nia tiuuniuucua najuhuanaj. Sesaacaari naa nia tojitiquiaari najuhuaana
 pueya shipinishano, nia jyanishano pueyasohuani. ³ Naaratej cua pueyanaa, maja
 sapojosano nia quiniu socua. ¿Taate pa naata niishiniuni, cante seetanujuanaa Pueyaso
 Sohuanu cumaacata pohuataa Pueyasojinijini? Naa nia saniniujiuritij: Pueyaso Sohuanu
 pohuatesacari pueyano, nojuajaari maja na naata Jesucristo sesacanu. Naajuhuj, saaja
 Pueyaso Sohuanu cumaquishacari pueyano na naata sequenu: “Jesucajaari Jiyaniijia-
 janaa”. Naacuajitij, maja nia tojinuu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso
 muerasujuanaa cumaquiquiaa tamaatia miishano pa miiniuria na cumaacata. ⁵ Queraatia
 tamaatia poonijiosanoori Pueyasora quiya. Naajaa, puetunu pajaniyajanaari niquiriyatu-
 jua Jiyaniijia poonijioquiaani. ⁶ Puetunu pajaniyajanaari tamaatia miiquiaa pa poonijio-
 sanoni. Saniniujia, Pueyasojuaanaari na panishano miiquiaa puetunu pueya jiuujiajini-
 ajanaa. ⁷ Pueyasoori puetunu na muerasujuanaa cumaquiquiaa na Sohuanuta, maninia pa
 miitioonura, Pueyaso muerasu maapue cumaquishaanura puetunujuanaa. ⁸ Pueyasoori
 pa cumaquiquiaa tamaatia miishano pa miiniuria. Naacuajitij, Pueyaso Sohuanuuri ta-
 monu pueyano pohuataniquiaa Pueyaso niishishano na muerasura. Pueyaso Sohuanuuri
 tamonu pueyano niishitiquiaajuhua Pueyaso sequenu panishano pajaniya. ⁹ Pueyaso So-
 huanuuri tamonu cumaquiquiaa Pueyasocua na tiuuniuria jyanohua, na shiniujiuniuria
 Pueyaso miiniu panishano pa miiniuria. Pueyaso Sohuanuuri tamonu cumaquiquiaa-
 juhuaj cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu
 pueyano jiyajeneta miishano miitijuhuj Pueyaso cumaacata. Tamonuuri niishi-
 tishaaquiaa Pueyaso sequenu panishano na pohuatana pueya niqiara. Pueyaso So-
 huanuuri tamonu niishitiquiaa teyano sohuanute tamonu pueyano cumaquiyani, Pueyaso
 Sohuanu, sapojona samaru soj. Pueyaso Sohuanuuri tamonu pueyano pocuatequiaa
 tamaatia rupaaca, na niishishoo rupaa. Pueyaso Sohuanuuri tamonu pueyano niishi-
 tiojoquiaa tamaatia rupaajinia sequesano na pacunura pueya rupaajiniajuhuaj, pueya

tojinuria maninia tama nojori rupaajiniajaaja. ¹¹ Naacujitij, Pueyaso Sohuanujuanaari puetunu pa cumaquiquiaajanaa, tamaatia pa miiniuria. Naa pa poonitjioquiaari taa na paniyacujani, cana na paniyajaniuhuj.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jyanohua maninia shipinishano jyanohua Pueyaso niishitajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuj. Naacujitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiaari pa poonijionura jatiqui. ¹³ Pueyasoori pa rupuetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupuetootesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocuaca, taucucanio, poonitijosano pueyajuhuj, camarnuuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuj, majaari pa soonu tamaatia poonijosano pa jiitiasacari Pueyasora. ¹⁶ Naajuhuj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyate? Maja. ¹⁷ Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari nianucujani. Naajuhuj, Pueyasoori puetunu na muerasujanaa cumaquiquiaa mariyata, tamaatia poonijosano pa jitianura taa na paniyacujani. ¹⁹ Pa cuaqueya jaara quiriquia saa namijiaja puetunujanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuaa quijiaca. Maja nia naata niqiniu”, ¿majate pa juaashiquia pa panishanojuhuaj? Taaquiririnij. Naajuhuj, pa naca jaara pa niohuaca sequere: “Niohuacanaa, niaari najuhuaa quijiaca. Maja cua paniniu niya nijaniya”, ¿majate pa niohuaca pa panishanojuhuaj pa rucuanerotajara? Taaquiririnij. Pueyanaa, naa pa quiri jatiquijuhua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³ Naajuhuj, teyanote maja puera maninia niqishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niqishaanura. Paari caririquijia cutarani, juhua pa quishacari. ²⁴ Saniniuujia, maninia niqishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niqishano pa cuaqueyajiniani. ²⁵ Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitioquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. ²⁶ Pa niohuaca jaara noore, puetunu pa cuaqueyajanaari na

tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuaaj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuaaj, parta Pueyaso muerasu jaara maninia miishaare, nojoritia pa timirijuhuaaj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuaaj. Naajuhuaaj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniuriajuhuaj, Pueyaso Sohuanu cumaquishacari nojori. Tamasacaari jiyatesaaquiaarijuhuaj Pueyaso muerasu naacunaara nojori quiniuria. Tamasacaari jiyatesaaquiaarijuhuaj Pueyaso muerasu jitianaa nojori quiniuria. Tamasacaari pohuatesaaquiaari tamaatia rupaacajuhuaaj. Naacuajitij, queraatia tamaatia poonijosanoori quiya. ²⁹ ¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojonaa? Maja. ¿Puetunu Pueyaso muerasujanaateeri jiyajeneta miishano miijicaa? Maja. ³⁰ ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocuajaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujanaateeri na naata na pacunu tama nojori rupaajinijaaja? Maja. ³¹ Naaratej, nijaniya cuara jiaatiaara socua maninia poonijosano nia jitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaana, quarijiani nia niishitiojoreera casaate socua panishani, Pueyaso shuquiritianura pajaniya.

13

Panijicaa pa quirij

¹ Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuaaj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani. ² Naajuhuaaj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuaana quijia quirini. Naajuhuaaj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaano, naajaa, janiya jaara pueya paniyashijia quirini, janiya maara najuhuaana quijia quiri Pueyasorani. Naajuhuaaj, janiya jaara Pueyaso cumaacaraca quirini, tuhuananuhua cua jatanura tamocora Pueyasoocua cua tiuniuucua jiyanohuani, naajaa. Cua paniyaquishacari pueya, janiya maara najuhuaana quijia quiriquia Pueyasorani. ³ Naajuhuaaj, janiya jaara puetunu cua casamijianaa nareja niqitiore casamijiuucua cua paniaquiniutiani, cua Jiyaniijia maara cua shuquiritiaaquiri. Naajuhuaaj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuaaj, janiya jaara mosaare Pueyaso rupaa cua pohuatanuucuan, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jitiananoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuaaj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararojonu. Cante pueya

panijiani, majaari saaja nera niishiriojojua tamajaaja. Cante pueya panijiani, majaari ritia juuajia. Majaari na niishiniu naminiujuhuuaj, tamonu jaara sesa na miiri. ⁶ Cante pueya panijiani, nojuajaari pueyacia taaaja, nojori miishacari sesa. Saniniuujia, nojuajaari shuquiriaatia quia pueya miishacari Pueyaso panishano. ⁷ Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuaaj, majaari na tarinitianu maninia miiniu pueyaracaanu. Pueya panijiaari naa puetunu rejeretajajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijiaari pa quirij. Mijiria pa quishacari, Pueyaso Sohanuunu pa cumaquiya Pueyaso sequenu panishano pa caminiujuuniuria, pa niishishoo rupaaca pa pocuanurajuhuaaj, Pueyaso niishitishano pajaniya pa pohuatanuranio. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹ Mijiria pa quishacari, paari saaja shiitianiyojua Pueyaso niishishano jiitiaani. Pa niishishano Pueyasojiniji pa pohuatasani, cunoori saaja shiitianiyojua Pueyaso niishishanojiniji. ¹⁰ Naacujitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

¹¹ Janiya jaara naatujua quiquiaarini, juhua naatujua pocuaquiarinijia. Juhua naatujua niishiriojoquiarinijia. Saaja naatujua niishitijia jiitiquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiarini. Naajuhuaaj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueca Pueyaso pueya quiniutianiyani.

¹² Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuajaari pa niishishano. Na nuhuaj, Pueyasota pa quishacari, paari puetunu maninijajanaa niishiniutianiyani, naatej, taa Pueyaso niishiya puetunu pajaniyajanaacuani. ¹³ Quiarijiani, paari Pueyaso rupaaca tiuuni niishiyani. Naajuhuaaj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacuaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijujuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jiyanoehua pueya panijia nia quiniuria, Pueyaso panijiaajuhuaaj. Naajuhuaaj, nia jiaatiare Pueyaso Sohanuunu cumaaca nia jiitianura maninia nia miiniuria. Panishano cutaraari Pueyaso Sohanuunu niishitijia nia jiitianura, Pueyaso sequenu panishano nia caminiujuuniuria Pueyaso pueyara.

² Cante niishishoo rupaa pocuaa pueya niquiarara Pueyaso Sohanuunu cumaacatani, cunoo pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohanuunu niishitishano pohuataa pueya niquiarara najuhuaaj. Majaari pueya niishiniu casaa na sequeyani.

³ Saniniuujia, cante Pueyaso sequenu panishano caminiujuujia pueya rupaajiniani, cunoori narta Pueyaso muerasu cumaquiya. Na numooteyari. Na cumaniijaajariuhuaaj. ⁴ Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquijajarjia. ⁵ Puetunu nijaniyajanaa jaara niishishoo rupaaca pocuanu niishijiaa quiriqia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyajanaa jaara Pueyaso sequenu panishano caminiujuunijia quiriqia Pueyaso cumaacata. Cante Pueyaso rupaa pohuatanani, cunoo pueyanoori

socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhaaj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee nijaniya nia niishishoo rupaajiniani? ¿Niaatucua cumaquishaare cua pocuasacari najuhuana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatate nia rupaajiniajanaa Pueyaso niishitiojosano janiyani. Maniniajaariuhaaj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhaaj. Naaratej, paari shuquiriaatia tojtiaa naajua jonesesarini, jaaquequejotaja taquinosacarijuhaaj. Saniniuujia, pueyano jaara naajua jononejonu saniniuujia na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenu pania juucuan. ⁸ Naajuhuaaj, trompeta jaara sesa jonesesaare, ¿soldadohuate na naata niishiniu casaa na miiniutianiyan? Maja. ⁹ Mariyata naajaariuhaaj, niaa jaara niishishoo rupaa pocuaa pueya niqiara, ¿pueyatucua taa niishirini casaa nia sequeyani? Niaari saaja nia niti taquiriucateya najuhuana nojori niqiara. ¹⁰ Niaacuajaari niishiya queraatia rupaacaari mijiria quiya. Puetunu maniniajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhaaj. ¹² Cuarta Jesuucua tiunianaana, niaacuajaari Pueyaso Sohuanuucua jiaatiaquiaa, na cumaaca nia jiitianura. Maniniacuaja. Naajaa, nijaniya cuaara jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniurajuhaaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishano-tajanaa, Pueyaso Sohuanu cumaquishacari nijaniya.

¹³ Naaratej, cante niishishoo rupaajinia pocuaquiaa pueya niqiara Pueyaso Sohuanu cumaacatani, cuno cuaara secojoora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhaaj. ¹⁴ Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojoora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuhuaaj, pa sohuanu cuaara jaaquequejoora Pueyaso niqiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia sohuanu secojotere niishishoo rupaajinia, nia tojtianaari maja na naata sequenu: “Jaa, cuaara naa quiriiatej”. Majaari nojori niishiniu tamaatia rupaajinia nia secojosano. ¹⁷ Niaa naasucuaari jyanohua maninia secojia Pueyaso. Naajaa, saaja najuhuana quiyari tamasacari, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quiyanjia Pueyaso niqiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuja socua nijaniyajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niqiarani, cuno maara najuhuana quiriqiaaj. Rupaajia pohuatasano tama pueya rupaajiniajaajani, cunoori jyanohua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niqiara, naatej, taa naatujoori shuquiriaquiaa quiarinio tacuarishijitajacuaani. Niaa jaara juhua naatujoori quiniu panijajaa, sesa niishiriojyashijica nia quiri, taa naatujoori quiyacuaani. Saniniuujia, majaari seetanujuanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitionura nia rerejosacari. ²¹ Tariucuaaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyanjia, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuatasariaquiaa”.

²² Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiaca tojitiniu saniniujuquiaa na rupaa juucua. Paari saniniuujia tari na rupaa tojtiajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiujiushano cutaraari pajaniyara. Cunocuaajari tama pa rupaajiniajaaja. Cunoori maja Pueyasocua tiyashijiacara. ²³ Naaratej, majaari pueya maapue refejocari, saaja seaja nijaniyajiniinio cuaara pocuaara niishishoo rupaacajinia. Naa pocuanu nia tarinitiare quenaaja, tamasa Jesuucua tiyashijiaca quishacari nia rerejojuajinia, nojori mariqui jianiriiri: “¡Nio pueyaqui puetunu paatecoorijiuhanajaj!” ²⁴ Saniniuujia, puetunu nijaniyajanaa jaara Pueyaso sequenu panishano caminiuujia tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miijia na quiniucua. Tama nojuajaari nia niishiniutianiya: “¡Janiyaqui sesa miijia Pueyaso niqiarani!” ²⁵ Naa pohuatasano Pueyasojiniijiri puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojijira quiniutianiya. Sequenutaniyari: “¡Pueyasoqui seetanujuanaa nia tajinia niya qiyai!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyanii cuarta Pueyaso muerasunaa. Naa nia miiri nia refejocari. Puetunu nia miishanojuanaa cuaara quiri nia cumaquitioonura, socua maninia Pueyaso tojtianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia miiri maninia. Niqiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Naa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niqiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niqiarani. Na naata sanaa pocuanu noojiajinia tamajaaja, saa Pueyaso niqiaraja.

²⁹ Naajuhuj, niaa jaara Pueyaso Sohuanu niishitiojosano nioojiajinia pohuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaacajitianaa cuaara saniniujuuria nia pohuatasano, nia niishiniuria, canote seetanujuaanaa Pueyaso Sohuanu niishitiojosano, maja soj. ³⁰ Naa pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuaara sanaajeera, na tarajana pocuanura. ³¹ Naacuajitij, puetunu Pueyaso niishitiojosano jiitianaajanaari na naata na pohuatanu. Naaratej, niqiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu nijaniyajanaa na naata pohuatanu nia niishishano Pueyasojiniji. Naacuajitij, puetunu muerasujuanaari maninia niishitiojosano quiniutianiya, maninia cumaquishanojuhaj, maninia nia miiniuria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari nijaniya, tari tamonu pocuasacari. Naa naata cutaraari sashiniu nia pocuanura. ³³ Pa Pueyaso cutaraari maninia miijiajanaa.

Maja cushitiojjuua. Naarate pueyanaa, maja tamasaca pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na reijosacari. ³⁴Maajipohua cuaara sanaa tojtiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojijiaa quiiria, taa pa niishitiojosaaquiiaari Moisés Rootasanojinijicujani. ³⁵Maajipohua jaara niishiniu paniya socua pohuatana niishitiosanojiniji, nojori cuaara nequesotohuara neyaca tama na tiajiniaaja, na que maaraja. Cararaatia cutaraari maaji jaara nequesoretare caya pohuatasacari, Pueyaso muerasu rejejojuajinia. ³⁶Nia tojiri nio cua rootasano pueyanaa. Niaacuaajaari niishiya, Pueyaso rupaari supueyaquiiaari nijaniyajiniji. Naajuhuj, majaari Pueyaso rupaa pohuatanaa jiyaramiquiniu quishaaquiiaari saa niaacuaaja. Tamonu jiyacajinia, queraatia Pueyaso pueya maapueeri cua niishitiojosano tojtiaquiaa maninia cutara. ³⁷Nijaniyajinijinio, noojiaqueya pueyari Pueyaso Sohuanu cumaaca jitiiaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano nijaniya? ³⁸Cante nio niishiniu paniyaquiiani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniuujia.

³⁹Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jitianura, pueya niquiara nia pohuatanura Pueyaso Sohuanu niishitishano nijaniya. Naajuhuj, majaari nia tenujunu noo pojori, canapueete niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰Nareja maninia nia miiriquia puetunujuanaa. Naacuajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

15

Cristo samiitasacariuhua

¹Cuarta Jesuucua tiunuaanaa, Jesucristo rupaa nia niishiriohua, tarijia cua pohuatasano nijaniya, nia jiyanooshaanurani. Niaari nocua tiuquuaari maninia. Niaari quiarijia maninia na tojtiaajaa. ²Naacuajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiiaari nijaniyacujani. Niaacuajaari Pueyaso pueyara jatanishano quia niaa jaara maja najuhuaana na rupaa tojiyaquiiaari. ³Janiyari niaara caminiujuquiiaari Jesucristo rupaani, taa cua tojiyaquiiaari. Nio cutara rupaa nia coteetaquiiaari pohuatanunijia: Cristoori pocuara cusoquiiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujuniaari naa naajiotiaquiiaari, taa Cristo miishaanutaniya naquiiani. Seetanujuanaa naa miishaaquiiaari. ⁴Jesucristo cusonu nuhuaji, raaco niasaaquiiaari. Jiuujianaraca juuca jaara na shoconujuquiiaari macu na quishacari, na raaco samiitiaquiiaariuhuari. Naa tohuateequiaari puetunu tariucuacaanu Pueyaso Rupaajanaa, taa nojuajiniji naajiotasaaquiiaari. ⁵Na nuhuaji, Jesucristoori Pedroocua muetaquiiaariuhua. Na nuhuaji, na jiyaramiquishocoriquiano pueyacu muetaquiiaariuhua. ⁶Na nuhuaji, muetaquiiaarijuhuaj na tojtianaa rejejosaaquiiri. Socua quiniento pueyari na niquitiaquiiaari jiyacari. Queraatia jiyacari na niqiniiaajinijinio pueyari saminio quiyajaa. Noojiaqueyari tari shaajecocanu. ⁷Na nuhuaji, pa Jiyaniijaari Santiagoocua muetaquiiaarijuhuaj. Na nuhuaji, muetanu pacutequiiaariuhua na doce jiyaramiquishocoriquiano pueyacuari.

⁸Puetunu cuno pojori nuhuaji, Jesucristoori socua cucua muetaquiiaarijuhuaj, nocua tiuujia cua quiaquishacarijia. Naa na paraca cua quishacarijiatej, Jesucristoori cucua muetaquiiaari na jiyanooniuria janiya. Ritia cua jiyatequiiaari na jiyaramiquishano cua quiniuriajuhuaj. ⁹¿Casaarquitijia na saquiriojoquiiaari janiyatejaj, na jiyaramiquishano cua quiniuriajuhuaj? Janiyari puera sesa mijia quiquiaarini cua niishiyaquishacari Jesucristo. Cucua na muetaquishacarijia, janiyari Pueyaso saquiriojosano pueya mitiaquiiaarini. Cuarta Jesucristo jiyaramiquishano pueyari maja naa sesa miijiaa na qitiniuni quiquiaari. ¹⁰¡Pueyasoori jiyanohua maninia! Cua jiyanoquiiaari Jesucristo

jiyaramiquishano cua quiniurijahuaj, taa cua quiya quiarijiacuajani. Naa quiyanijia Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijiosanoori maja tama cua miishanojuuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

¹¹ Naacuajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaaacuhuj, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohuatasano. Niaari cuno rupaacua tiuquiaari maninia.

Pueyaso muerasu macunucua samiitiasacariuhua

¹² Cuarta Jesuucua tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya nijaniyajinijinio sequequiaani: “Macunucua maja na samiitiaconu quiniutianihua”? ¹³ Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhuj. ¿Cristoteeri macu quiyajaa? ¡Maja! ¹⁴ Cristo jaara macu quiriquiaja, canaa maara najuhuana pohuataa na rupaani. Naajuhuj, niaa maara najuhuana Jesucristoocua tiuya, na pueya nia quiniu paniniuria juucua. ¹⁵ Canaacuaajaari pohuatanuquiaani Pueyasoori Jesucristo samiitianiyaariuhua. Macunucua jaara samiitianiyaquishaanutaniya taa nia jiyaniquiaacuajani, canaa jiyoteeri sapojonuujaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitiani quiquiaariuhua Jesu. Saniniuujia, jniaari jiyajeneya cutara! ¡Pueyasocuaajaari seetanujuanaa Jesu samiitianiyaariuhua! ¹⁶ Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhujahuaj. ¹⁷ Cristo jaara samiitiaquiquiaari, niaa jiyoteeri Cristoocua tiuya najuhanaj, Pueyaso na jiyanootiniuria juucua nijaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuj. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹ Pajaniyajuhuj, canapue te saminio quiyajaani, paa maara jiyanoohua taraatia quiyani, pueyaracaanu najuhuana naquiya pa miishacari mijiria. Jaara naa quiriritij, pa Jiyaniijia Jesucristo jaara macu quiriquiaja, paa maara najuhuana poonijioriquia pa shuquiritiniuria nojuaja juucuaani.

²⁰ ¡Namitia naa quiyaquiyari! ¡Cristoori seetanujuanaa samiitianishaquiquiaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuuatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuaacuahuaj. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supenaajanaari shaajecoquiaajuhuj. Adán nuhuaji, parta pueyano Jesucristoori saniniuujia Pueyaso tojjia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijata. ²³ Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacari. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianihua, na tucuataniuhua puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijijanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijanucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacari jatasaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa

Jiyaniijia jatanu nuhuaji puetunu na paraajanaa, jiyacari pueya cusajuana shaajanutaniya-jaariuhuj. Majaari cusunu niishishaanu quiniutianiya socua, shaajenuio. Puetunu casaajanaa jaara maninia jiiitiasano quiriohua, Jesucristoori na Que na niqutionutaniuhua, na Que jiiitanuhua puetunujanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanoehua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijiajanaa. Saa na Que Pueyasoojaari socua Jiyaniijiajanaa, maja tamonu. Pueyasoojaanaari Neyanu jiyaroquiaari puetunu na shipinishanojuanaa na jeenucanura na cumaacata. ²⁸ Na tucuatascari, pa Jiyaniijia Jesucristoori na Que sequenutaniya: “Cua Quenaa, tari tucuataree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajaniyajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiiitanura maninia.

²⁹ Socua nia niishiriojore pueyanaa. Niaa jaara jiyaniyaja macunucuaari maja na samiitianishaanu quiniutianiuhua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarjia Jesucristoocua tiuuri? Paa jaara tiuquiniijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuaani. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiaquishaanutaniuhua taa nia jiyaniyacujani, ¿casaara pueya tiuquiniijosaaquiaa shusha shaajeno macu niticuaarini?

³⁰ Paa jaara samiitianiyaquishaanutaniyani taa nia sequequiaacuajani, canaquiiri najuhuaa tama canaa cuaqueyajaaja panitiaquiaani, pueyaracaanu canaa poonijiosacari pa Jiyaniijia. ³¹ Seetanujanaa nia sequeyanijia, janiyari jiyanoehua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujanaa-jaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuaani. ³² Pa Jiyaniijia jaara macu quiya taa nia sequequiaacuajani, janiyaqui najuhuaa Jesucristo rupaacuaji tacuriquiaani nio sesaaca pueya tajinia cua quishacari niya Efeso tiacajiniani. Nojoriiri juhua puereeta sayoru quiriquiaa cucujaji. Janiyaqui najuhuaa Jesucristo shuquiriritiquiaa juucuanu, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijia sequequiaacuajani: “Pa shuquiriri saminio pa quishacarjia. Pa queranacuure. Pa mashaasequenuurejuhuj. Naajaa, pa shaajesacari, pocua puetunu shaajeejajanaani”. Naa sesa miiquioquiaari noo pojori, canapueje jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujanaatej: “Maninia miiijiaari sesa miiijiaa jatanishaaree na cojinuucua sesa miiijiaa”. Naaratej, majaari nia cojinu sesoriquia pueya, niaa mariqui seserejaariuhuj. ³⁴ Niishiriojuara nia quiri. Sesa nia miiniu nia cartere. Noojiaqueya nijaniyajinijinioori Pueyaso niishiyashijia quiyajaa. Naa nia sequereenijia pueyanaa, quenaaja nia caririquiniuria.

Taamueca pa quiniutianiuhuani pa samiitiasacariuhua

³⁵ Tamonu nijaniyajinijinio naasucuaari niishiriojia: “¿Taa macunucua samiitiani-jijsaanutaniuhuaajarani? ¿Taamuecate na cuaqueya quiniutianiyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritianu. ³⁷ Naajuhuj, niaa jaara saaco natate, tamaatia jajajuhuj, nia natasano jajauri maja juhua neyonarano niqishano. Nia natasanoori saaja shiitianojua jajau quiya. Na moritiasacari, jiyanoehua tamaatia niqishiyari. ³⁸ Pueyasoori na maashitiya puetunu na jaamasucatajanaa, taa na paniyacujani. Pueyasoori puetunu jajajanaa

moritianijia tamaatia niquishano na quiniuria. Naa quiniutianiyajaariuhua macunucua samiitiacosacariuhua. Majaari pa cuaqueya quiniutianiya taa na quiya quiarijiacuajani. jPa cuaqueyari jyanohua maninia quiniutianiuhua!

³⁹Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhaaj. Sapitiaaja cuaqueyari tamaatia quiyajuhaaj, moojinia na quiniuria. ⁴⁰Jiyocuaaanu quiijacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹Naajuhuaaj, pananuuri jyanohua shacantuuca quiija. Raca shacantuucaari tamaatia niquishano pananu shacantuucainiji. Riya shacantuucaari socua tamaatia niquishano. Naajuhuaaj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴²Naajuhuaaj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaaari saniniuujia samiitianishaanutaniuhua, pueyaracaanu na quiniuria. ⁴³Jamosano pa quete sequeeri samiitianishaanutaniuhua, jyanohua shanohua niquishano na quiniuria. Cumaacaaju jamosanoori samiitianishaanutaniuhua jyanohua cumaacaraca na quiniuria. ⁴⁴Pa cuaqueya jamosanoori saaja jiyacua rucanejaca quiquiaari. Paari samiitianishaanutaniuhuanu tamaatia cuaqueyata, jiyocuaaanu quiijaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiriirinij.

⁴⁵Pueyasoori coteenu pa supuetana shipiniquiaari marajiniji. Na nuhuaji, na samiitianiquiaariiri. Moisés Naajioneejiniaari naa naajiotasaaquiaritij:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jyanohua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijiajanaa na Sohuanuta. ⁴⁶Coteenujanaa pa supuetanani, majaari na shipinishaanu quiquiaari jiyocuaaanu quiijiarano. Cunora, coteenu pa cuaqueyari saaja mijiria quiijara. Na nuhuaji, pa cuaqueyari jiyocuaaanu quiijara jatanishaanutaniya mariyata juhua Jesucristo cuaqueyara. ⁴⁷Adánri saaja mijiria quiiriquiano quiquiaari. Marajiniji shipinishaaquiaariiri. Jesucristoori saniniuujia jiyocuaaanujinio. ⁴⁸Puetunu Adáncuajinio supuenojuanaari saaja mijiria quiijaca. Naaratej, puetunu pajaniyajanaari saaja cusonuujacani, juhua pa supuetana Adánjuhuaaj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuaaanu quiijaca pa quiniuria. ⁴⁹Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuaaanu Quijia cuaqueya. Nojuacuajaari pa samiitianinia Jesucristo.

⁵⁰Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu. ⁵¹Naajaa, cua tojitiare. Nia pahuatareera pueya niishishoo. Majaari puetunu pajaniyajanaa cusonuuriqianoni. Puetunu pa cuaqueyjanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhaaj. ⁵²Jiyocuaaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyari ritia samiitianutaniuhuari. Pajaniyajuhaaj, canapuate saminio quiyajaani, pa cuaqueyari ritia jatanishaanutaniyajuhaaj, quiarinio cuaqueya pa jitianurajuhaaj, shaajeyashijiacaa pa quiniuria. ⁵³Cusunuujuua cuaqueya cuara jatanishaaria, rishijia cuaqueya pa jitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuaaanu sequesanoori tari tohuateeree. Naa naajiotasaaquiaari tariucuaaanu Pueyaso Rupaajiniatej:

“¡Jeje! ¡Pa Jiyaniijaari na muerasu mashiquirii macunucua quiquiojiniji! ⁵⁵Cusojuananaa, ¡quiaaqui tari shocotasaaree! ¡Quiaari shocotasaaree! Sesaacanaa, quia cusojuatajaari juhua mohuacara quiqiii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusunuuquiaa sesa miijiaca pa quiniucua mi-jiriani. Paari sesa quiquiaani pa tojiyaquishacari tariucuaaanu Moisés Rootasano Pueyasojiniji. Naaratej, puetunu pueyajanaari cusunuu niishiya. ⁵⁷ Naajaa, pa Jiyaniija Jesucristo miishanota pocuara, Pueyasoori pa mashiquiaa pa cusoyaquiniucuaaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniutianiya cusunuu, quia Niyanu cusunucua canaacuara, pueyaracaanu canaa quiniuria quia shuriucua. ¡Jiyanohua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitijosano nijaniya. Saa Pueyaso rupaaja nia tojitiare, maja tamaatia niishitijosano. Pa Jiyaniija nia poonijiore socua jiyanohua, na panishano nia miiniuria saaja. Pa Jiyaniija nia poonijosanoori maja najuhuana na quiniu.

16

Casamiijiuniucua Pueyaso pueyara cumaneeca reratesacari

¹ Quiarijiani, nia riucuaareera taa nia miiniutianiya, cumaneeca nia reratenura casamiijiuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuara maninia miiria, mariyata taa cuara rootacanucuaa Pueyaso pueya maapue Galacia jiyajiniani. ² Naa nia miiritij. Puetunu domingo juucajanaa, puetunu pueyajanaa cuara racataara tama na niqitiosocoriquiano cumaneeca, teyano nia niqitioantianiya niarta Pueyaso muerasuracuajani. Naa nia racatare juhuataja nia niqitiosocoriquiano cumaneeca puetunu seamanajanaa, maja na reratesaanura shusha cua tiuquishacari niaacua. ³ Niocua maninia pueya saquirojore, nia niqitijosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesucua tiuniaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiya. ⁶⁻⁷ Janiyari maja ritia cua tajiniu paniniu nijaniya. Niaata camueenujunu paniya pueyaracaanunijia, pa Jiyaniija jaara naa paniyajuhuaj. Janiyari shuniya shocotenu paniya niaatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacujani. ⁸⁻⁹ Janiyari niya Éfeso tiacajinia camueenujiyaajarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuaj, queraatia pueyari Jesucristo rupaa ruuretaa saniniujia. Naaratej, janiyari jiyanohua socua Jesucristo rupaa pohuatanu paniyajaa Éfeso pueya niqiarani. Naajaa, janiyari niaacua quianutaniya Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocujaari pa Jiyaniija poonijioquiaa mariyata taa cua poonijioquiaacuani. ¹¹ Naaratej, maja Timoteo nia rerequetenu. Niocua na naacure saniniujia, cucua na tiuquiniuhua shuquiriaatia, maninia nia miiniucua nera. Janiyari niya na sashiya parta Pueyaso muerasutani. ¹² Janiyari Apolota pocojoriquiaani. Janiyacuajaari na nenecojoriquiaa juucuanu, niaacua na quianura parta Pueyaso muerasuta

quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutanियाquiniiaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiuuniaanaa, niishiriojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. ¹⁴ Puetunu nia miishanojuanaa cuaara quiiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyara-caanu nojori paniniutia. ¹⁶ Naarate nia sequenu panianijia, nijaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuate naa maninia miiquiaa Pueyaso muerasucujani.

¹⁷ Jiyanhua shuquiririucuaanijia Estéfanas tiuquishacari nijaniyajiniji Fortunatota, Acaicotajuhuj. Nojoriiri cua shuqiritiriucuaa nia niti, cua jiaatiasacari cua niquiniuria nijaniya juucua. ¹⁸ Nojoriiri coojia cajitiriucuaa puera cua niishiriojiyaquiniucujaji niaacua. Nojori naasucuaari nioojia cajitiquianujuhuj, nojori pohuatasacari nijaniya janiyajiniji. Nijaniya cuaara shuqiritiaara nojori, naa nojori miishacari maniniatej.

¹⁹ Pueyaso muerasu maapue niya Asia jiyajiniiaari cua sequerucuaa, cua saruhuatanura nijaniya. Aquila, Prisciliano, nojoriiri jiyanhua nia saruhuataajuhuj, narta Jiyaniijia muerasu nia quiniucujuhuj. Pueyaso pueya maanuuri nia saruhuataajuhuj, nooj, teyanote Aquila tiajinia rerejoquiaacujani. ²⁰ Puetunu parta Pueyaso muerasujanaari niya nia saruhuataajuhuj. Nia sarhuatatoosacari, nia sarhuatatoore seetanujuanaa Pueyaso paniniutia.

²¹ Quiarijiani, tama cua juaashiquiatajaaja saaja nioniyojua naajioreeraj, cua saruhuatanura nijaniya. Naacujitij, niocua niishiri nio naajioneeri seetanujuanaa janiyajiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitiosocoriquiano.

¡Jiyaniijianaa, quia nimiohua!

²³ Pa Jiyaniijia Jesu cuaara cumaquiiria nijaniya na Sohuanuta. ²⁴ Janiyari puetunu nijaniyajanaa paniyani Jesucristo paniniutia. Tariucujaja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaa naajiyani, puetunu Acaya jiyajinia Pueyaso tojtijajaca pueyacuaraajanaanio. ² Pa Que Pueyaso, mariyata pa Jiyaniijia Jesucristo cuara cumaquiiria niajaniya. Nojori cuara jiyateera niajaniya juhuajaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanjiana. ⁴ Nojuajaari pueyaracaanu pa cumanjiaquiaa naquiya pa miishacari. Naacuajiti pa naata cumanjianu tamasaajuhuj, naquiya nojori miishacari, taa Pueyaso cumanjiaquiaa pajaniyacuaani. ⁵ Seetanujuanaa, Cristo rupuejaca pa quishacari, paari naquiya miishaaquiaajuhuj, taa naquiya na miishaaquiaaricuaani. Naajaa, nojuajaari pa cumanjiaquiaa shuquiriaatia pa quiniuria. ⁶ Naacuajitij, canaa jaara naquiya miishaaquiaa Cristojiniji canaa pohuatanuucuan, Pueyasoori canaa cumaquiquiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanjiasaanurajuhuj. Naajuhuj, Pueyaso jaara canaa cumanjiaquiea, naacuajitij, canaa naata nia cumanjianujuhuj. Canaari nia cumanjiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. ⁷ Canaari seetanujuanaa niaacua tiuyani, niaari cumanjiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucajuhuj, taa canaa miiquiaa naquiyacuani. Naacuajitij, Pueyasoori nia cumanjianutaniyajuhuj, taa na cumanjiaquiaa canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaquianuni, jiyanohua naquiya canaa miishacari Asia jiyajinia. Canaari puera jiyanohua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutaniya. ⁹ Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusununura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samiitianijiojua. ¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusununura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejuhuj. ¹¹ Naacuajitij, Pueyaso miishacari maninia canaa, queraatia pueya secojonuucua canaacuaraajuhuj, queraatia pueyari Pueyaso sequenutaniya, “paacarasho”.

Pablo pohuatasano casaara na quiaaquiiaari Corinto pueyacuan

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijaca niquiaranio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jiyatenuucua canaa nia panijaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. ¹³ Cunora, janiyari nia nequesotaani, ¿casaara nia cushitiquianu canaa naajionee nia serojosacarini? Puetunu canaa naajioneecajinijanaa majaari canaa naajionu quiquiaa jiyajenetata casa, nia cushitiiniuria. Puetunujuanaacuaajari maatia niishishaatia quiquiaa nia serojosocoriquiano. ¹⁴ Niacuajaari tari secaja niishiya taa canaa paniya jiyanohua niajaniyani. Pa Jiyaniijia Jesucristo tiuquishacarihua, niaari jiyacari seetanujuanaa canaa timitianutaniya, maatia

nia niishishacari canaari seetanujuanaa nia panijiaca quiquiaarini. Naajuhuj, nijaniyari canaa timitiasano quiniutianiyajuhuj.

¹⁵⁻¹⁶ Cua jiyaniishacari niaa naasucuaari seetanujuanaa cua panijiaca, taa cua paniquiaa nijaniyacuaani, janiyari cunora naquerejocanu niaacua juucuanii. Niiquiji cua quiasacari Macedonia jiyajiniara, janiyari nia niqiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuj, cua tacatesacariuhua cunocojiuhua. Janiyari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhua. ¹⁷ ¿Niaateeri jiyaniqianu janiyari nareya nia sequecanuni, naa cua sequesacari coteenujanaa cua naajijoniatej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiqianu naa cua sequesacari nijaniyatej. ¹⁸ ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocujaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacujaari seetanujuanaa. ¹⁹ Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. ²⁰ Jesucristocujaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuqiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. ²¹ Jesucristo rupuejaca pa quishacari, Pueyasocujaari pa cumaquiquiaa, socua maninia na tojjijaca canaa quiniuria, nijaniyajuhuj. Pueyasoori pa niqitioquiaari na Sohuanu, seetanujuanaa na muerasu pa quiniuria. ²² Pueyaso Sohuanu pa jiiitiasacari poojajinia, naacuajitij, paari tari Pueyaso sesa jiiitaa juhua naajiotasano poojajiniani, saa neraja pa quiniuria. Na Sohuanu pa jiiitiasacari poojajinia, paari niishiyani, paari puetunu na sequesanojuanaa maseriquianoni.

²³ Niaari cua jiyaniqianu janiyari najuhuaa coojia niqijiotejani, niaacua cua quiaaquiniucua taa cua sequecanu coteenu nijaniyacujani. Pueyasocujaari niishiya, majaari cua quianu quiqianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanohuani. ²⁴ Canaari maja nia jiyaniijiani canaa shiniujiuniuria puera nijaniya, Jesuucua nia tiuuniuria. Niaacujaari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria nijaniya, socua pa Jiyaniija tojjijaca nia quiniuria, seetanujuanaa shuquiraatia quijiaca nia quiniuria.

2

¹ Janiyari tama sequecanujuanijia, maja juhuari niaacua cua quianu quiniutianiya, maja cua taraajetenura nijaniya. ² Janiya jaara nia taraajetere cua nacasusacari nijaniyani, ¿cantucua cua timitiri quenaajani? ¿Cua taraajetesano pueyateeri cua shuqiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacariija nijaniya, cua taraajeyaquiniuria niaacua cua tiuquishacari. Janiya jaara sashiri cua nacasunura nijaniya cua tiuquishacari niaacuanii, janiya maara jiyanohua nia taraajetereni, jeecatoojua nia quishacari. Saniniuuja, niaa jaara juhuacariija jeecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiraatia pa quiniuria jatiqui. ⁴ Janiya jaara niaacuara naajiocanu coteenu cua naajioneeni, janiyari jiyacari jiyanohua tacaariquiaa niaacuanii. Coojaari jiyanohua taraajeriquiaa. Janiyari jiyacari nujuqueriquiaaaniuhuj. Majaari cua naajionu quiqianu cunoo naajioneecua taraajonura nijaniya. Cunoori seetanujuanaa quiqianu cutara cua niishitiniuria nijaniya, taa cua paniya jiyanohua nijaniyani.

Cuno sesa miijia cuaara jiyanooshaaria jaara tari pishirii sesa na miiniujiniji

⁵ Cuno sesa miijiaari maja na taraajetenu quiqianu saa janiyaja. Quera puetunu nijaniyajanaa naasucuaari taraajecanu cunoo pueyano miiniucua sesa. Seetanujuanaa,

majaari puetunu nijaniyajanaa taraajenu quiquianu. Janiya jaara sequereni: “Puetunu nijaniyajanaari taraajecanu”, janiya maara puera na maateyani. ⁶Puetunu nijaniyajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucujaja. Majaari socua na saniittonu. ⁷Quiarijiani nojuaja nia jiyanooriorohua. Nia cumanijiarohua, nojuaja mariqui puera tacaariiri jiyanoorohua na taraajesacari. ⁸Nocujaji janiyari jiyanoorohua nia rootaani, maninia nia miiriorohua cuno pueyano, na niishiniuria niaaqui na paniyajaa. ⁹Janiyacujajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojitiajaca. ¹⁰Cua tojitiare, cana nia jiyanooriciuaani, janiyari na jiyanooyajuhuj. Naacuajitij, pueyano jaara sesa miiriquia, janiyari Cristo niiquiara na jiyanooriquiaajuhuj, jatiqui nia quiniuhua. ¹¹Naaratej, niarta Pueyaso pueya nia jiyanooriquia, Sesaaca mariqui pocua riutiocoreeri, juaajiaara na jiyatenura pajaniya, pa jiyanoootioyaquiniucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanooyashijia quiriquiani.

Pablo tacaashacari Troas tiacajinia na quishacari

¹²Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanoorohua tojitianu paniriquiaa Jesujiniji cua pohuatanura juucua. Jiyacaritij, seetanujuanaa nojori niiquiara pohuataaati quiriquiaari. Pa Jiyaniijia Jesuuri juhua tootiu riatacanu cucujaji juucua, cua pohuatanura nojuajiniji tii. ¹³Janiyari saaja nojori tiujia-canuhuanu puera cua tacaashacari, cua riuriataaquinuucua pa tarajanu Tito. Janiyari juucua paniriquiaani cua pohuataasanura nijaniyajiniji. Janiyari cunora tacaariquiaa jiyanoorohuanu. Naaratej, janiyari Macedonia jiyajinia quiaarohuanu, Tito cua pajenuhuara tii.

Pa Jiyaniijia Cristoori pa paraa pa shocotaniijia

¹⁴Janiyari jiyanoorohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiquiyocujanaa. ¹⁵Pueyasora, canaari juhua shanohua jaanutajani, Cristo quishacari canaa jiuujajinia. Nojuajiniji canaa pohuatanuusacari, canaari puetunu pueyarajanaa jaanujuiaani: Pueyaso muerasurano, saniitiosaariquiano pueyaranio. ¹⁶Saniitiosaariquiano pueyara, Jesucristo rupaari mocuaatia jaanujua saniniuuja. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuuja, Jesucristo rupaari shanohua jaanujuiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueeteeri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuanu? ¹⁷¿Noo pojoritii, najuhuaana Pueyaso rupaa pohuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niqiarani, Cristo rupesano canaa quishacari.

3

Quiarinio rupaa Jesucristojiniji

¹Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuuj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niacuajaari canaa niishijia cutara. Puetunu tiquiyocujanaa quijiaa pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niquitionura nia naajionee,

canaa patasocoriquiano, tamasaca tiuuniuria canaacua. ² Naajioneetucua casaara pan-ishaareni? Puetunu pueyajanaari na naata niishiniucuaa canaari seetanujuanaa Pueyaso jiyaramiquishano pueyani, nojori niishishacari taa canaa paniya jyanohua nijaniyani. ³ Cristocujaari nioojiajinia naajiotaquiaari na rupaa, nojuajiniji canaa pohuatenuucua nia niquiara. Majaari na rupaa na naajiotanu quiquiaari nioojiajinia minianata. Seetanujuanaa na Sohanuta na naajiotaquiaari. Majaari na naajiotanu quiquiaari saajianeecua. Seetanujuanaa nioojiajiniananaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatenuucua nijaniya.

⁴ Naacujitij, canaari seetanujuanaa niishiyani canaari Pueyaso jiyaramiquishanoni. Cristocujaari naa canaa niishitiquiaa maninia. ⁵ Majaari canaa niishiriojonu canaa miijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishacoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojinuuca saaja. ⁷ Naajaa, cuno rootasano saajianeecaacia quejasanoni, cunoori jyanohua maninia quiquiaari. Naacujitij, Moisés jaara cuno rootasano niishitiojosaariquiaa Sinaí tuhananuucua, Pueyaso shacantuucaari nocua pacuriquiaa. Naacujitij, na rosesacariuhua Israel pueyacia, na jiquicoori puera shacantuuca quiquiaarijia. Naaratej, narta Israel pueyari maja na naata na jiquicoo niquiniu quiquiaari. Na nuhuaji, cuno shacantuucaari jacaria maquesaquiariuhua. ⁸ Quiarijiani, Pueyaso Sohanuuri poonijioquiaa pueya jiuujiajinia saniniuujia, nojori tiuuniucua canaa pohuatasanoocua. Cunoori socua shanohua shacantuuca cutara Moisés jiquicoojiniji. ⁹ Moisés pohuatasano Pueyaso rootasano nojuajani, cunoori seetanujuanaa jyanohua maninia quiquiaari. Naaratej, Moisés jiquicoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaa quiquiaari. Saniniuujia, quiarijiaari socua jyanohua maninia. Canaa pohuatenuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijacara nojori jiyatesaanura Pueyasora. ¹⁰ Pueyaso jyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jyanohua maninia rupaa canaa pohuatanura Moisés pohuatasanojiniji. ¹¹ Moisés shacantuuca maquesaquiariuhuanu, cunoori maja na jataniniu quiquiaari Israel pueya. Quiarijia saniniuujia, Pueyaso Sohanu cutaraari pa jataniquiaa seetanujuanaa pueyaracaanu shacantuuca quiijaa pa quiniuria.

¹² Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miijiaaricuaani. Nojuajaari quenaaruque toqueta na jiquicoo mishiquioquiaari narta Israel pueya niquiyaquiniuria na shacantuuca maquesaano. ¹⁴ Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaa nojori quiniucua, majaari Israel pueya niishiniu quiija Moisés camini-ujishano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanajuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiarijiaari naajuhuj. Moisés naajioneeca jaara serojosaariquia Israel pueya niquiara, nojori niishitijaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijaaciaa tiuuri, cuno toqueeri juhua na niishitijajiniji jaariutiasaquiaa, maninia na niishiniuria Pueyaso Rupaa. ¹⁷ Pa Jiyaniijaari Pueyaso Sohanujuhuanajaj. Pa Jiyaniija Sohanu jaara poojiajinia quiya, paari Sesaa-

cajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. ¹⁸ Naacujitij, puetunu pajaniyajanaari juhua niqitiu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupueetosacari nata. Naacujitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijiosacari poojiajinia.

4

¹ Naa pa Jiyaniijia poonijiosacari canaa jiuujiajiniatej, majaari canaa pishiniu quiquiaa canaa poonijiosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. ² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari canaa jataniniu quiquiaa Pueyaso rupaa. Canaari seetanujanaa maatia pohuataquiaa Pueyaso Rupaani, puetunu pueyjanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. ⁴ Pueyaso rupaacua tiuyashijiaca nojori quishacari, nojori jiyaniijia Sesaacaari nojori jiuujia jiyatequiaa juhua cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuriquia, nojori maara niishiri, Cristoori seetanujanaa shacantuuca quijia cutara, juhua na Que Pueyasojuhuj. ⁵ Canaa pohuatasacari Pueyaso rupaa nijaniya, majaari tama canaajinijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujanaa Jiyaniijijajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuaara coretaara ninishiquiji”.

Quiarijiaari naajuhuj, nojuajaari poojia cuhuataquiaajuhuj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujanaa shacantuuca quijia cutara, Pueyaso Niyanu na quiniucua.

Paari maninia quijiaca quiniutianiyani saaja Pueyaso rupaacua pa tiuushacari

⁷ Cuno cumaaca canaa na jitiiaani, cunoori Pueyaso cumaaca cutara. Saniniuujia, canaa cuaqueyari cumaacaju, saaja juhua marajiniji panishano pataco. Naacujiti niishishiyari, cuno cumaaca pueya jatanijiani, cunoori seetanujanaa Pueyaso cumaaca, maja tama canaa cumaacajaaja. ⁸ Naacujitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jitiiasacari. Jiyanojia canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaaquiaaaniuhuj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuaa jaqueroosaaquiaajaa-niuhuj. Naajaa, majaari canaa cusojuasaanu quiquiaani. ¹⁰ Puetunu tiqiyocujajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacujitij, canaa na niqitiosano cumaaca poonijiosacari canaa rishiyashijiaca cuaqueyajinia, pueyari niishiquiaa, Jesuuri seetanujanaa saminio. ¹¹ Mijiria canaa quishacarija, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacujitij, saminio na jitiiasacari canaa, Jesu cumaacaari niqishaaquiaa rishiyashijiaca canaa cuaqueyajinia. ¹² Canaari juhua piriuquiniuuquiaani, canaa pohuatanuucua Pueyaso rupaa nia niqiuara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

¹³ Tariucuaaanu Pueyaso Rupaajinia, supuetana David naajiotasanoori naa sequeya: “Pueyasooocua na tiuuniuucua, janiyari pocuareeni”.

Canaari naajuhuj. Pueyasooocua canaa tiuuniuucua, canaari na rupaa pohuataquiaani.

¹⁴ Canaa jaara puecoosaariquia na rupaa canaa pohuatanuucuaani, naajaa. Canaacujaari niishiyani, pa Jiyaniijia Jesu Samiitianiacujaari canaa samiitianijionutaniuhujuhuj,

Neyanu Jesu rupuesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriucua pa quiniuria. ¹⁵ Naacujitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucuan, puetunu cunajuanaa niaacuara, maninia nia quiniuria Pueyasora. Naa Pueyaso jiyanooniucua niajaniyacaatej, socua queraatia pueyari na timiniutia na sequenutaniya, “paacarasho”. Pueyasoori jiyanoohua shuquiritiasaanutaniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucajanaa socua mashajashiyacujua. ¹⁷ Janiyara, puetunu naquiya canaa miishacarijanaa mijiria, cunoori secaja, rupaquijijahuaj. Cuno naquiya miiniu canaa rejeretanuucua, ¡Pueyasoori cunora jiyanoohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. ¹⁸ Naaratej, majaari canaa jiaatianu quiquiaa canaa jiitianura mijiria canaa niquishano casaa. Canaa cutaraari Pueyaso jiitiasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiitiasano pa niquishoo casaa saniniunjia, cuno cutaraari shaajeyashijia.

5

¹ Mijiria pa quishacarijia, nio pa cuaqueyari saaja juhua suhuorotu qiya pa sohanura, nareja juhua rucoonaa pa quishacari mijiria. Mijiria pa jiitiasano pa shoque jaara cusoquee, paacujaari niishiyani, paari tari jiitiaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohanu quiquora. Cunoori maja pueyano shipinishano.

² Mijiria canaa quishacarijia nio canaa sohanu suhuorotujiniani, canaari taraatia miishaaquiaani. Cunora, canaari juhua quietojoquiaani, canaa jiaatiasacari canaa sohanu pacusaanura jiyocuacaanu. Tii quiyacuajaari canaa sohanuucujia tiasano quiquio.

³ Canaari cuno quiarinio cuaqueya cushiyonutaniya juhua toqueni, maja juhuasu canaa sohanu quiniuria. ⁴ Nio cuaqueyajiniaja canaa quishacari mijiria juhua suhuorotujinia, canaari quietojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasojuaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niquitioquiaa na Sohanu, pa niishiniuria nojuajaari seetanujuanaa naa pa miiniutianiya.

⁶ Naa canaa niishishacaritij, majaari canaa tacaaniu quiquiaa. Canaacujaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacujitij, paari tucuaaanu quiyajaani pueyaracaanu pa quijiarano quietojojiniji. ⁷ Cunora, mijiria canaa quishacarijia, majaari canaa quiniu tama canaa niishitijatajaaja. Canaa cutaraari canaa Jiyaniijiaacua canaa tiuuniutia quiquiaani.

⁸ Naacujitij, canaari shuquiriaatia qiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹ Naacujitij, canaa jaara nio cuaqueyajinia quiyajaa mijiriani, naajuhujaj canaa jaara na cartequeni, canaari saaja pa Jiyaniijia shuqiritiniucua jiaatiaani. ¹⁰ Puetunu pajaniyajanaacuajaari Jesucristo taccoji na neque-soreesaqi nujuatejosaariquianoni. Cuniqi, puetunu mijiria pueya miishanojanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijia. Saniniuujia, sesa miijiaari taraatia miishaanutaniyacujua.

Pueyasoori pueya jiyanooni panijia cutara

¹¹ Naaratej, canaa niishishacari jiyanoohua puereeta quiniutianiyari pa Jiyaniijia sanitiosacari na tojtiaashijia, canaari cunora saniniujuquiaa pueya tojtiniuria Pueyaso

Rupaani. Pueyasocuajaari niishiya canaari seetanujuanaa nera poonijionaani. ¡Seetanujuanaa naa nia niishitiriquiajaaniuhua! ¹² Majaari nia jiyaniinu canaari tama canaajinjijiaaja nia pohuatanu coteerohuanuhua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniucua. Naacujiti nia naata cuno pueya tacunu canacuaji, cuno pojori canapuate sapuenu juhua maninia quijiaa niquishano pueya najuhuanacuajani. Majaari nojori niishiniu tacaani taamueca jiuujiaracateja nojorini. ¹³ Noojiaqueya nijaniyajinjini naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quia Pueyasorani. Saniniujia, canaa jaara maninia niishiriojuaca qiriquiani, canaari naa quia niaarani, maninia canaa niishitiojonura nijaniya. ¹⁴ Cristo paniniucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canacuajaari niishiyani, nojuajaari puetunu pueyacuajanaa cusoquiaari. Naa na cusonucua puetunu pueya nitijianaatej, Pueyasora, puetunu pueyajanaari tari csonuquiaari Cristota. Naacujitij, Pueyasoori na naata jiyanooni puetunu Neyanuucua tiuniaajanaa. ¹⁵ Cristocuajaari puetunu pueyacuajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiquiaariuhujuhua. Naaratej, paa cuara miiria saa na panishanojua. Majaari socua pa miiniu tama pa panishanojuaaja. ¹⁶ Tariija, canaari saaja canaa panishano pueyacia taraajejani. Quariija saniniujia, Pueyaso jatanishano pueya canaa quishacari, majaari rimiajata canaa paniniu pueya. Tariija, canaari Cristo jiyanjiani nojuaja naasucuaari nareja pueyano, juhua pajaniyajuhua. Quariija cutara, majaari naa canaa niishiriojonu nojuajiniji. ¹⁷ Naajuhua, cante Cristo rupuesanoni, nojuajaari quiariniora jatanishano pueyano. Tariucacaanu sesa na quiniuri tari jatanocuaaja. Saniniujia, puetunujuanaari quiarinio quia.

¹⁸ Puetunu cunojuanaari Pueyaso miishano. Nojuajaari Neyanu Cristo cusojuquiaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiaari puetunu pueyajanaa canaa pohuatanura, nojori jiyanooshaanurajuhua. ¹⁹ Naacujitij, Pueyasoori mijiria quinia jiyanoocuaa saaja Neyanu Cristocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianuhua socua. Nojuajaari canaa jiyatequiaari na rupaa pohuataana canaa quiniuria, pueya canaa tiutiniuria Neyanu Jesucristocua, jiyanooshano nojori quiniurajuhua. ²⁰ Naacujitij, canaari Jesucristo jiyaramiquishanoni, canaa caminiujiunuria niaara na sequesano canaa. Naa canaa caminiujiushacari Jesucristo rupaatej, Pueyasojuaanaari nia masuya na muerasu nia quiniuria, Neyanuucua nia tiushacari. Naacujitij, canaari Cristo niti nia secojiyani, ¡tama nia cuaqueyajaaja nia jyanootiri Pueyaso! ²¹ Pa Jiyaniijiarano Jesucristoni, nojuajaari tojetaarucujanaa sesa miyashijajuhuanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitosocoriquiano. Naacujitij, Neyanuucua pa tiushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniucuatej, canaari jyanohua nia secojiyani cuarta Pueyaso muerasunaa, saa Pueyasoraja nia quiri, nia jyanoojia na quiniucua. Maninia na muerasu nia quiri. ² Tariucacaanu na sequesanojuaari naa naajiotasano quia na rupajimia:

“Quiaari namitia cua secojocanu, pueya cua naacunu panishacari. Pueya cua jiyanooshacarihua, janiyari quia naacuanujuhua”.

Cua panishano pueyanaa, quariijaari Pueyaso jiyanooshacari pueya. Nojuajaari quariija pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojuaquiaani, maja canaa miiniuria sesa tamasaca niqiaara. Canaari naa maninia miqiaani, nojori mariqui Jesucristocua tiyaquiriiri, nojori mariqui Pueyasora canaa poonijosano sesacarejaariuhua. ⁴ Canaa cutaraari saaja maninia miqiaa pueya niqiarani, puetunu pueya niishiniurajanaa canaari

seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. ⁵ Naajuhuj, canaari juhuajaniya rejeretaquiaa canaa jaara majajusaaquiaani, canaa jaara nujuatejojuajinia nujuatejosaaquiaajanihuaj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanohua poonijioquiaa nerani. Canaari sequeyarucua sutequiaani. Canaari miaajequiaajuhuj. ⁶ Naajuhuj, pueyari na naata niishiniu canaari seetanujuanaa Pueyaso seyani, sesa miyashijiaca canaa quiniucua, maninia canaa niishiniuucua Pueyaso rupaa-juhuaj. Niishishaatiacuajaari, canaari Pueyaso seyani, jacaria pocuajaca canaa quishacari juaajiaca pueyata, naajuhuj, maninia canaa miishacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. ⁷ Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniucua. Pueyaso rupaata, canaa cutaraari saaja Sesaaca jiyatequiaa canaacuajini. ⁸ Naa Pueyasora canaa poonijiosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuuja. Naajuhuj, noojiaqueya pueyari maninia pohuatanuucua tamasaca niqiyara canaajiniji. Tamasacaari canaa sesaaciaa saniniuuja. Noojiaqueya pueyari canaa sequequiaa sapojonuucuatani. Tamasacaari saniniuuja maninia tojtiaquiaa canaa, seetanu rupaajanaa canaa pohuatasacari. ⁹ Noojiaqueya pueyari canaa niiquiaa juhua najuhua quijiaca pueyani. Tamasacara saniniuuja, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajani. Canaari jiyanohua miitiasaaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniucua. Canaari seetanujuanaa casamijiuniucua juhuaj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamijiuniucua niquishanoni. Naajaa, canaari puetunu canaa panishanojuanaa jiitiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojtiare. Canaa jiaati-asacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanohua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniuuja, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashjiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijata na quishacari? Maja. Cua riucureto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijata? Maja na naata. ¹⁵ Seetanujuanaa pueyanaa, Cristoori maja Sesaaca rupueña. Naajuhuj, Pueyasooocua tiuuja pueyanoori maja na naata maninia rupuetoonu Pueyasooocua tiuyashijia pueyanota. ¹⁶ Paa jaara Pueyaso quiquio quirini, ¿paateeri Pueyaso quiquiojinia shanacanutaniya samaruha tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanoacuajaari naa naajiotasano quiya:

“Janiyari nojorijinia quiriqianoni. Janiyari nojori tajinia rucuanonutaniyani. Janiyari nojori Jiyaniijajanaa quiniutianiyanoni. Nojoriiri cua pueya quiniutianiycujua”.

¹⁷ Cunora, pa Jiyaniijaari na pueya sequeya:

“¡Cua tojtiaashijiaca pueya tajiniji nia pacure! Nia shiriquirei tamocora nojoriicuaji. Majaari sesa casaa nia saniniu paniniu. Naa jaara cua tojjiaca quiri, janiyari nia jiyatenutaniya quirianoni. ¹⁸Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

7

¹Naacuajiti canaa panishano pueyanaa, paacuajaari naa seetanujuanaa pa Jiyaniijia sequesano pajaniyarano jitiiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijahuaj.

Corinto pueya tacatosacari nojori jiuujia, maninia nojori quiniuhua

²Pueyanaa, ¿taa nia miiquianuni? ¡Canaa panijia nia quiriouhua! Majaari canaa miiniu quiquianu sesa nijaniya. Majaari quenaaja niquireiyatu nijaniyajinijinio canaa sesonu quiquianu canaa niishitiojosanota. Majaari canaa sapojonu quijia nijaniya. ³Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jiyanhua nia panyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijia quiniutianiya Pueyasotani. ⁴Janiyari seetanujuanaa nia nia sequeyani cua panishacari nijaniya. Quiarijiani, janiyari jiyanhua nia timitiaani, maninia cua tojiniuucua nijaniyajiniji. Canaari seetanujuanaa naquiya miiquiaani. Naa-ja, maninia canaa tojiniushacari nijaniyajiniji, cunoori cua cumanijiaanu. Cunora, janiyari jiyanhua nia shuquiritiaani.

⁵Canaa jaara tiuquiquianu niya Macedonia jiyajiniani, majaari quenaaja rupaquijia canaa quini quiquianu juhuajaniya. Canaari puetunu taraatia miishaacanujua-naani. Pueyasocua tiuyashijiaacari canaa juaariquiaa. Canaa jiuujiaari niaacua tacaariquiaa saniniuujia. ⁶Jiyacaritij, Pueyasoori canaa cumanijiaanu Tito tiuquishacarihua canaacua. ¡Pa Pueyasocujaari tacaajia cumanijiana! ⁷Canaa jiuujia canaa cajitishacari, cunoori maja saaja canaa niquishacari Tito canaacua tiuquihuaano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jiyanhua na timiniuta. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jiyanhua nia taraajetenucua janiya. Niaanaari cucua tacaya jiyanhua, cua rootasano tojjiaca nia quiniuria quiarijia cutara. Naa cua tojishacari niaacuajitij, janiyari jiyanhua shuquiriquianuni.

⁸Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenucua nijaniyatej. Quiarijia cutaraari maja cua taraajenu. Cua naajioneecua-jaari saaja rupaquijia nia taraajocanu. ⁹Quiarijiani, ¡shuquiriaatia quianijia! Majaari nia jiyaniinu janiyari shuquiriaatia quiyani naa cua taraajonucua nijaniyatej. Shuquiriaatia quiya cutaranijia, cua niishishacari, naa cua taraajonucua nijaniyatej, niaari nioojia tacatorohuacua Pueyasocua, Pueyaso tojtiaajaca nia quiniuhua. Naacuajitij, janiyari quiarijia niishiyani, majaquiiri cua sesonu quiquianu nijaniya, naa cua taraajonucua nijaniyatej. Pueyasocujaquiiri maninia poonijioriquiaa nioojiacajinia, naa nia taraajesacariitij. ¹⁰Pueyasojanaa jaara pa taraajetere, cunoori maninia, poojia pa tacatonuhua nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. ¹¹Nia taraajesacari cua nacasusacari nijaniya cua naajioneejiniani, cunoori seetanujuanaa Pueyaso taraajetesano quiquianu nijaniya. Naa nia taraajenucuatej, nia niquishuriiraj, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cunoo pueyano miishano sesa. Niacuajaari maninia miiquianu nia juashacari cunoo sesa miijia. Niaari na naaqui puerecanujuhuaj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia

miiquianu cua naajiojinia cua sequesano nijaniya. Naacuajitij, niaari ritia cuno sesa miihia taanuucanu nia tajiniji, maja socua nia rupuesano na quiniuria. Naa nia miiniucua puetunu maninijanaatej, janiyari quiarijia niishiyani, majaquiri nia maniniucuanu quiquianu naa sacuraatia cuno pueyano miishanotej. ¹²Pueyanaa, niaari maninia canaa tojjijia. Seetanujuanaa, cua naajiosacari niaacuara, majaari cua naajionu quiquianu saaja cuno sesa miihia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niqiara: niaacuajaari seetanujuanaa canaa panijiaa quiyajaa, nia tojishacari canaa. ¹³Naaratej, canaari canaa juujia cajitiquianuni, canaa tojishacari Tito pohuatasano nijaniyajiniji.

Majaari saaja Tito pohuatasano cumanijianu quiquianu canaa. Canaari Tito timitia-canujuhuj, canaa niqushacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhua na tacaaniucua niaacuajuhuj. ¹⁴Tito quiaaquisacari niaacua, janiyacujaari juhuacari nia pohuatacanu nijaniyajinijini, maja puera na taacanunura niaacuaji. Naa maninia nia quishacari Tito tiuquishacari niaacuatej, majaari cua caririquinu quiquianu nijaniyajiniji. Puetunu cua pohuatasanojuanaa Tito nijaniyajiniji seetanujuanaa quiquianu Titora. Naajuhuj, puetunu cua pohuatasano nijaniyajanaari pueyaracaanu seetanu rupajanaa quijia. ¹⁵Quiarijia Tito niishiriojosacari nijaniya, nojuajaari socua jiyano nia panijia quiya, nia tojinuucua maninia nojuaja. Niacujaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. ¹⁶Janiyajuhuj, jiyano nia shuquiriaatia quianijia, cua niishishacari quiarijia cutara cua naata niaacua tiunuu seetanujuanaa.

8

Capora pa quiriqiaj

¹ Quiarijiani pueyanaa, canaari nia pohuatanu paniyani, taa Pueyaso cumaquiya jiyano nia na muerasu maapue niya Macedonia jiyajiniani. ²Nojoriiri jiyano nia taraatia miiquioquia. Naajaa, nojoriiri saaja jiyano nia shuquiriaatia quiya. Naajuhuj, casamijiuiniucua nojori quishacari, naajaa, nojoriiri caporatujuri. Nojoriiri na cumaneecajiniji nareja niqutiojoquiaa queraatia, Judea jiyajinia casamijiuiniucua Pueyaso pueyara. Nojoriiri niqutiojosano nia juhua casamiriaca pueya niqutiojosano. ³Seetanujuanaa narta Pueyaso pueyacu nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jiiatasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano nijaniya. Janiyacuajaari nojori miishano niqiniani. ⁴Niya Macedonia jiyajinia quiniaa parta Pueyaso pueyani, nojoriiri nijaniyajiniji tojiquianu. Niaanaari cumaneeca reratenu paniriqiaacua, nia jiyarosocoriquiano Judea jiyajinia quiniaa casamijiuiniucua parta Pueyaso pueyara. Naaratej, nojoriiri jiyano nia canaa nenecojocanu canaa masenera nojori niqutionu panishano cumaneecajuhuj, parta Pueyaso muerasura. ⁵Seetanujuanaa Pueyaso tojjijia nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa jiyaniijara, taa Pueyaso paniya pa miiniuracuajani. Naajuhuj, nojoriiri tama na cuaqueyajaaja jiyatecanu canaa tojjijia nojori quiniurajuhuj. Cunora, canaari nojoriicuaaji juujiatecanuni. ⁶Naa capora niqutiojonaa nojori quiniucuatej, canaari Tito sequerucuaani, niaacua na quianuhua quiarijia. Nojuacuajaari tarijia naacucanu nijaniya, nia reratenu nia niqutionu panishano cumaneeca. Niacujaari maninia niqutiojocanu juhua capora pueya. Naaratej, nojuaja cuara nia naacuara, nia tucatanura reratenu puetunu nia niqutionu panishano cumaneecajanaa. ⁷Nijaniya, Corinto tiacajinia quiniaanaa, niaacuajaari jiyano nia maninia Pueyaso muerasu. Niaari Pueyasocua tiuujia jiyano nia. Naajuhuj, niaari jiyano nia maninia Pueyaso rupaa niishitijonuuca. Niaari Pueyaso niishitijia jiiitajuhuj. Niaari mariyata shitimia poonijionuuca, tamasa nia naacunura. Naajuhuj, niaari canaa panijiaa jiyano nia.

Naatej, taa maninia miijiacatucuaaja nijaniyani, capora nia quirijihuuj, nia cumaneeca nia niquitiojonura nareja parta Pueyaso pueyara.

⁸Majaari juhua nia jiyaniijia cua sequenu nijaniya, nia cumaneeca cua niquitiojotenua nijaniya. Janiyari nareja nia pohuatariquiaa capora Macedonia pueyajiniini, tama nia niishiniuriajaaja, niaate seetanujuanaa canaa panijiacajuhuuj, taa Macedonia jiyajiniini pueya paniya canaacuaani. ⁹Niaacujaari pa Jiyaniijia Jesucristojini niishiya; na Que Pueyaso shuriucua na quishacarijia, nojuajaari puetunu maninia casaajanaa jitiiaja quiquiaari. Naajaa, nojuajaari juhua casamiijuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jyanohua shuquiriaatia quijia na jiyatenura pajaniya, juhua jyanohua queraatia casamiriaca pueya pa quiniuria. Naa jaara seetanujuanaa panijiaa quiriqia, naa nia miirijihuuj, taa pa Jiyaniijia miiquiaaricuaani.

¹⁰Niaari niishirojoriqiaani, taate socua maninia nia naata miiniu parta casamiijiuuicua Pueyaso pueyarani, shuquiriaatia nia quiniuriajuhuuj. Cua tojiri. Niaacujaari niishiya, noo marijara pa shococanutej, niaacujaari juhuacatecara cumaneeca reratejonu coteecanu. Naaari naa maninia miiquianu tama nia tacaashacarijiaa niarta Pueyaso pueyacua. ¹¹Naaari shitimia juhuacatecara nia cumaneeca niquitiojonu coteecanucua. Naaratej, quarijia nia sequeyanijia, niaa cuara naa shitimia niquitiojonu tucutaara puetunu nia niquitionu panishano cumaneecajanaa. Naa jitiiasano cumaneecajini nia niquitiojore, taa cumaneeca nia niquitionu panyacuajani. ¹²Naa tojiri. Paa jaara seetanujuanaa nareja niquitionu paniriqia pa cumaneecajiniini, Pueyasoori pa niquitiosano shuquiritiaja, paa jaara juhua capora niquitiore pa jitiiasanojiniini. Maja cutaraari Pueyaso paniniu pa niquitionura, pa jaara na jitiiaquiyani.

¹³Majaari Pueyaso paniniu cutara puera nia niquitiojonura nia cumaneeca, tamasa quiniuria casamiriaca, saniniuujia nia jitiiaquiniuria nia panishano. ¹⁴Maninia cutaraari puetunu Pueyaso muerasujanaa jitianura na panishano. Naaratej, quarijiani, niaa cuara niquitiojora nia jitiiasanojini, nojori jitianura na panishanojuhuuj. Tamacari saniniuujia, nojori saniniuujia nia jitiiaquishoo casa nia niquitionutaniyacujua, niaa jaara na jitiiaquiri. Naacuajitij, puetunu Pueyaso muerasujanaa na panishano jitianutaniya mariyata, maja rimiajata. ¹⁵Naajuhuuj, tariucuaaanu Pueyaso Rupaajini, jiyocuaaanu Pueyaso tinishano Israel pueya miaquesocoriquiano panjiniijiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuuj, cante secaja reratequiaarini, majaari nojoriria na puetanu quiquiaari”. Naaratej, Pueyasoocua tiujuica nia quiri. Naa jitiiasanojini nia niquitiojore nareja, nia jamueyaquiniutia.

Pablo pohuatasano Titojini, Tito cojiniaajiniini

¹⁶Titoori jyanohua niaacua jiaatiaja, taa cua jiaatia niaacuacuaani. Pueyasocuaaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” ¹⁷Naacuajitij, janiya jaara Tito sequerucuaani nia niquiniuucua na quianura, nojuajaari cua timitiriucuaa. Tama nojuajaari nia niquiniuucua jiaatia. Naacuajitij, nojuajaari quarijia quianutaniya niaacua.

¹⁸Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritasano pueyano, maninia na pohuatanuucua pa Jiyaniijia Jesucristojini. ¹⁹Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niquitiojosano cumaneeca canaa jiyatanura nata, Judea jiyajiniara. Naa pa niquitiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuuj, parta Pueyaso pueya Judiucuaari niishiniutaniya, narta Pueyaso pueya taucuaquiri nojoriicua taraajecajuhuuj. ²⁰Maniniacujaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniini quiniutaniya canaari nio queraatia canaa reratesocoriquiano cumaneecajini nihuusenutaniyani. ²¹Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

²² Quiarijiani, niaacua canaa jiyarosocoriquiano pueyata, canaari niquijiniio tamonu parta Pueyaso pueyano jiyaronutaniyani. Pueyaracaanu na poonijiosacari pa Jiyaniijia, janiyajanaari na niqiquianuni. Nojuajaari seetanujuanaa pueya panijia, Pueyaso panijia na quiniuucuaa. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyano hua maninia Pueyaso pueyano. ²³ Tamonu jaara nia nequesotare cante Titoni, niocua na riucure: “Nojuacuajaari Pablota poonijiona, na cumaquiniuria pajaniya”. Naajuhujaj, Tito cojiniaari niquiji Pueyaso muerasu maapue jiyarosano niaacuajuhujaj. Pa Jiyaniijia Jesucristoori socua maniniuhuaqueetasano, maninia na tojitiajaca nojori quiniuucua. ²⁴ Naaratej, nio pojori jaara niaacua tiuquijiose, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhujaj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori nijaniyajiniji.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruhua najuhuana niaacuara naajiyani, cua sequenura nijaniya, nia cumaneecata nia naacunura Judea jiyajinia quiniaa parta Pueyaso pueya. ² Janiyacuajaari niishiyani, naari tarijia na naacunu paniquianucua. Cua shuquiritasacari cunora nijaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa nijaniyajinijini. Janiyacuajaari nojori pohuataquiaani, nijaniya Acaya jiyajinia quiniaa pueyani, naari nia cumaneeca niqitionu paniquianu noo marijia pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaaraja na cumaneeca niqitionu panijajuhujaj, naa nojori cua pohuatanuucua nijaniyajinijitij. ³ Janiyari niaacua tiuya seetanujuanaani, niaacuajaari canaacuaji tariucua reratesano jiitianutaniya nia cumaneeca, taa cua pohuataquiaa niya nijaniyajinijicujani. Naajaa, janiyari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niqitiosocoriquiano cumaneeca. Majaari cua paniniu cutara cua pohuatasano nijaniyajiniji cuaracashitishaanura. ⁴ Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyajuani, canaari caririqiniutianiya. Naari caririqiniutianiya juhuujaj. ⁵ Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqitiojonu panishano cumaneeca cuaara tari reratesano quiiria canaacuaji. Naacuajitij, nia niqitiojosano cumaneecaari seetanujuanaa nareja nia niqitionu panishano quiniutianiya, maja canaa niqitiojotesano nijaniya.

⁶ Pueyanaa, nio sequesano nia niishiriqia. Naa sequeyari: “Cante secaja natajani, secaja senoonutaniyajaariuhujaj. Saniniuujia, cante queraatia natajani, queraatia senoonutaniyajaariuhujaj”. Naajuhujaj, paa jaara capora quiriqiani, Pueyasoori saniniuujia socua queraatia pa niqitionutaniya pa niqitiosanojiniji. ⁷ Naaratej, puetunu nijaniyajanaa cuaara niqitioora taa nioojajinia nia niishiriojoree nia niqitiojonuracuajani. Majaari nia cumaneeca nia niqitiojonu nia jamuenuta, nocua nia taraajenutatio. Naajuhujaj, majaari nia niqitionu nia cumaneeca saaja tamasa shiniujiushacari nijaniya. Pueyaso cutaraari shuquiriaatia niqitiojaca timitiaja. ⁸ Pueyasocuaajaari cumaacaraca na niqitionura nijaniya puetunu nia panishanojuanaa nia jiitiasocoriquiano pueyaracaanu. Naacuajitij, naari pueyaracaanu socua queraatia jiitiajaca quiniutianiya, tamasa nia niqitiojonurajuhujaj, nojori jaara jiitiaquiriquia nojori panishano. ⁹ Naa jaara naa capora quiriqiatej, naari nio tariucuaanu Pueyaso Rupaa naajiotasano tohuateenu-taniya. Naa sequeyari:

“Maninia pueyanoori juhua capora nareja niqitiojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

¹⁰Pueyano natasacari casaa jajau na cuhuariquiajinia, Pueyasoori na canijiaquiaa. Naacua-jitij, na camaruuiri socua jiitianutaniya tamacari na natasocoriquianohua, na miaqueso-coriquianonio. Naajuhua, juhua capora nia niqutiojosacari nia jiitiasanojiniji, niaari juhua nia cuhuariquiajinia nataa. Naacujitij, Pueyasoori nia jiyatenutaniya socua queraatia jiitiajaca nia quiniuria, pueyaracaanu maninia nia miiniuria tamasarajuhua. ¹¹Naa capora nia quiniucua nia casaatatej, Pueyasoori juhua capora nia niqutiojonutaniya puetunu na jiitiasanojinijianaa, queraatia nia jiitianura, tamasaca nia niqutiojonura pueyaracaanu. Naacujitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniucua, nojoriiri Pueyaso sequenutaniya, “paacarasho”. ¹²Naacujitij, nojori jaara masere nojoririano nia jiyarosano cumaneeca, majaari saaja nojori jiitianu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. ¹³Nojori jiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoohua. Nojori-iri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojtiajacajuhua, naajaa, tucuaaca nia quishacari nojoriria. Nojoriiri Pueyaso maniniuhuaqueetanutaniyajuhua jiyanoohua capora nia quiniucua nojoriria, tamasarano. ¹⁴Nojoriiri Pueyaso secojonutaniya niaacuarajuhua, jiyanoohua nojori paniniutia niajaniya, Pueyaso jiyatenucua niajaniya nojori panijaca nia quiniuria. ¹⁵Naajuhua, janiyari jiyanoohua Pueyaso sequeyani, “paacarasho”, jiyanoohua maninia na miiniucua niajaniya, Neyanu Jesucristo jataniniucua nioojia.

10

Pablo cuaara tojishaaria, Jesucristo jiyatenucua nojuaja na rupaa pohuatanaa

¹Janiyacuaajaari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhua. Janiyari naa quiniu panijajuhua. Naaratej, janiyari quiarijia nia nenecojiani, cua tojitiare quenaaja. Tamasacanaari cua pocuquiaa, janiyanaari jacaria pocuaja quiquiaa juhua puerejani, nia tajinia cua quishacari. Sanini-uujia, tucuaacaanu cua quishacari, janiyanaari jiyanoohua nia nacasuquiaa cua naajione-jiniani, juhua nia pueresano jiyaniijia. ²¿Seetanutejanaa, janiyate naani? Janiya jaara naa quiya niaarani, naajaa. Quiarijia tucuaacaanu cua quishacarijia, janiyari nio cua naajiojinia nia nenecojiani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanohuani, sacuaraatia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoo-joinutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara. ³Seetanujuanaacuaquiniatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojo-quiaacuaani. ⁴Mijiria quiniaa pueyari miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacujitij, canaa naata Sesaaca niishishano shocotanu. ⁵Pueyaso cumaacata, canaari mijiria niishijaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhua pueya niishiriojosano jataniquiaani, Cristo tojijaca nojori quiniurajuhua. ⁶Canaacuaajaari Pueyaso jeenucuasano pueyani, canaa nacasunura puetunu tojishijiacajanaa. Naacujitij, niaa jaara puetunu Pueyasojiniji canaa niishi-tiojosanojuanaa tojtiajacara quiriohua, na nuhuaji cutara canaa naata puetunu cureeno tojishijiacajanaa saniitionu.

⁷Niaari tama cushitiiquiaajaacujua nia tiuushacari cuno sapojonuujuaa pohu-atasanooocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, niajaniya cante sapojosaacanuajani. Naa jaara niishiri niaari seetanujuanaa Cristo saquiriojosano pueya, naacujitij, niajaniya cuaara niishiiria canaari Cristo saquiriojosano pueyajaniuhua. ⁸Naa jaara jiyaniya janiyari juhua pueya shocotaja nia sequeyani: “Canaari nia jiitianaani”, naajaa, majaari cua caririqiniui

naa cua sequesacari nijaniyatej. Pa Jiyaniijia Cristojuanaacuajaari canaa jiyatequiaari nia jiitianaa canaa quiniuria. Canaari naa jiyatesaaquiaarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jiitanu najuhuana na cumaaca, canaa sesonura nijaniya. ⁹Naa cua naajosacari niaacuaretej, majaari nia jiyaniyu janiyari nia piriyojijyani nia puerenura janiya. ¹⁰Tamasaca nijaniyajini-jinio pueyanaari cua sequequiaajuhua: “Pabloori puera jiyanoehua pa nacasuquiaa na naajionejinia. Naajaa, pa tajinia na quishacari, nojuajaari juhua tojishoo pueyano niqishano quiquiaa. Naajuhua, na pohuatasacari pa niqiuara, na pohuatasanoori maja shanohua tojishano”. ¹¹¿Seetanutejanaa? Cante naa pucuquiaani, nojuaja cuaara ni-shiiria quiarijia, taa canaa naajiocanu niaacuacuaaja tuucaanu canaa quishacarijiani, canaari naa miiniutianiyani niaacua canaa tiuquishacari.

¹²Cuniqui niaata quiyajaariuhua tamasa pueya, canapueje nia sequequiaacuajani, nojoriniiaari socua maninia Pueyaso rupaa pohuatanaa tamasaajiniiji, canaajiniijiihuaj. ¿Nojoritiiri seetanujuanaa socua maninia Pueyaso rupaa pohuatanaa canaajiniiji? Juhua. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyanihacari nojori cutaraari socua tojishano pueya tamasaajiniiji. Naa nojori miishacarij, nojori cutaraari seetanujuanaa mosanucua. ¹³Canaa cutara, majaari tamasa poonijiosano canaa jiyatenu quiquiaa juhua canaa poonijiosano Pueyasa. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajaari canaa jiyaramiquiaari niaacua Corinto tiacajinia, nia niqiuara canaa pohuatanura na rupaa. Naacuajitij, niaari na muerasura quiquiaari. ¹⁴Majaari najuhuana canaa timitianu nijaniya, Pueyaso muerasu nia quiniucua. Niacuajaari Pueyaso muerasura quiquiaari canaa pohuatanucua nia niqiuara seetanu rupaajanaa Jesucristojiniiji. Canaa cutaraari seetanujuanaa Pueyaso rupaa pohuatanu coteetanaa nia niqiuarani. ¹⁵Majaari canaa shuquiritianu najuhuana nijaniya. Canaa cutaraari nia tiutuquiaari Jesucristoocuan, niaacua Pueyaso jiyaronucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuujiaca nia quiniuria. Naacuajitij, niaa jaara seetanujuanaa Pueyaso rupaa tojijaca quiri, niaari saniniuuja na naata canaa cumaquiniu. ¹⁶Niocua canaa cumaquiri canaa quianura tamaqui, tee Jesucristojiniiji pohuatasoojua quiyacuajani, tii canaa pohuatanura nojuajiniijiihuaj. Majaari canaa quiniu paniniu pootia tamasa poonijiosaqui, taa cuno rimiaacoori quiquioya shuquiriaatia canaa poonijiosaquicuuaani. ¿Nojori shuquiritiasanoteeri tama nojori poonijiosanojuaaja? Maja. Niacuajaari Pueyaso muerasura quiquiaari canaa nia tojitianucua.

¹⁷Pueyanaa, nio tariucuaanu naajiotasanoori niaara, nia niishishocoriquiano. Naa sequeyari: “Cante shuquiriaatia quijia quiniu paniyani, nojuaja cuaara pa Jiyaniijia shuquiritiaara cutara”. ¹⁸¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pohuatasano na paraajiniiji

¹Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu panianijia. Naajaa, quenaaja nia rejeretare janiya. ²Janiyari jiyanoehua nia tacaatiaquiaani, saaja Jesucristora nia quiniuria. Niacuajaari miishiya, naatej, taa pueyano cojuacuuaa neyatuniojua canuucujini, saaja na camiriquiano pueyanora na quiniuria, naajuhua, janiyari nia cojuanu paniyani sesosoo nia quiniuria nia Jiyaniijia. Cristocuaajaari juhua nia niyacaranu. Nia jiitiana cua quishacari, janiyari juhua nia queni. ³Tarijia, niacuajaari saaja Cristo tojitijaca quiquiaari, na panijia nia quishacari. Quiarijia saniniuuja, janiyari Sesaaca nia pueretaani, nojuaja mariqui nia sapojoreeri

Cristoocuaaji nia rupatenura, taa cuno Susanacu sapojoquiaari Eva tariucuaacaanucuaani.
⁴Cuno sapojonuucuaa tiuquiiijosacari niaacua, tamaatia nojori pohuatanura Jesujiniji
 nijaniya, niaari jaarajaaja ritia na tojiquiaa. Nojori niishitijosanoori tojetaruucujanaa
 tamaatia canaa niishitijosanojiniji nijaniya. Nojori nia tojishacari, niaari juhuajaniya
 samaruhua niishishano tojitiaquiaajuhuj. Niacuajaari tari tiuquiaari Jesucristoocua,
 Pueyaso jiyanooniuria nijaniya. Saniniuujia, cuno pojori pohuatasacari tamaatia, taa nia
 miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuj.
⁵¿Cuno sapojonuucuateeri socua tojishocoriquiano janiyajiniji, niaa na jiyatecanu juhua
 seetanujanaa Pueyaso jiyaramiquishano pueyarani? ¡Janiyara maja! ⁶Seetanujanaa,
 majaari cua niishiniu maniniuuhuaqueenu cua pohuatasacari Pueyaso rupaa, taa cuno
 pojoricuaani. Naajaa, Pueyasojiniji cua niishishano cutaraari seetanu rupaajanaa, to-
 jishocoriquiano cutara. Maja najuhuanaj. Niacuajaari cuno niishiya, pueyaracaanu saaja
 maninia cua miishacari nia niquiara, cua pohuatasanojinijinio.

⁷¿Casaara nia tojitiaa cuno pojori quiarjianijia, majaari saniniuujia nia tojitanu janiya?
 ¿Janiyateeri sesa miiquianu nijaniyani, cua masejoyaquiniucua nia cumaneeca cua
 pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama
 cua cuaqueyajaaja mueyashitiquiaarini cua cumaquiniuria nijaniya. Naa cua miiniu-
 cuatej, ¿cunoteeri sesa niaara? ⁸Janiyari tamonu jiyacajinia Pueyaso pueya maapuejiniji
 masejoquiaari cumaneecani, cuno cumaneecata cua quianura niaacua, nia niquiara cua
 pohuatanura Pueyaso Rupaa. ⁹Saniniuujia, nia tajinia cua quishacari, cua jiitiaaquishacari
 cua panishano, naajaa, maja cutaraari cua mashiniquijionu quijia nia cumaneeca. Naa cua
 jiitiaaquishacari cua panishanotej, Macedonia jiyajinijinio parta Pueyaso pueyari panitia
 tiuquiiioquiaari. Nojori cutaraari cumaneeca cua niqutioquiaari, cua panishano cua
 masetajara. Janiyari naa pueyaracaanu tama cua cuaqueyajaaja cojuaquiaani, maja cua
 taajetenura nijaniya cua panishano cua jiitiaaquishacari. Janiyari naa miiniutianiya
 pueyaracaanuni. ¹⁰Cua Jiyaniijia Cristocuajaari niishiya, majaari quenaaja cumaneeca cua
 masejonu quiquiaari Acaya jiyajinia quiniaa parta Pueyaso pueyajiniji. Naacuajitij, ma-
 jaari quenaaja niquiriyatu pueyano Acaya jiyajinijinio naata sequenu janiya: “Pablocua-
 jaari cumaneeca mashiniquijiojua canaajiniji”. ¹¹Pueyanaa, ¿niaate niishiya casaara
 pueyaracaanu cua sequequiaani, maja cumaneeca cua masejonu quiquiaa Acaya jiyajinia
 quiniaa Pueyaso pueyajiniji? Naa cua sequesacarij, ¿janiyateeri nia paniyaquiyani?
 ¡Maja! Pueyasocuajaari niishiya, janiyari jiyanohua nia panijiani.

¹²Nia sequereera casaara cua mashiniquijiyaquiquiaa nia cumaneecani, cua po-
 huatasacari Pueyaso rupaa nia niquiara. Cuno pojori, nia jyanishano Pueyaso ji-
 yaramiquishano pueyani, nojoriiri nia jiyajenetenu paniquiaa. Nojoriniaari seetanujanaa
 Cristo jiyaramiquishanojuhuj, taa canaacuaani. Saniniuujia, nojori mashiniqui-
 jiosacari nia cumaneeca, nojori nia niqutiojonura nareja, naacuajiti maatia niishishi-
 yari, ¡nojoriiri jiyanohua tamaatia canaajiniji! Naaratej, majaari quenaaja canaa
 mashiniquini quiniutianiya nia cumaneeca, canaa pohuatanuucua Pueyaso rupaa ni-
 ajaniya. ¹³Seetanujanaari, ¡nojoriiri maja Cristo jiyaramiquishano pueya! Nojoriiri
 tama nojori cuaqueyajaaja jiyatecanu sapuenu juhua Cristo jiyaramiquishano pueya
 nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo
 jiyaramiquishano pueya niquishano najuhuanaj. ¹⁴Cunoori maja jiyajeneta naa nojori
 miiniuriatej. Satanáscuajaari tama na cuaqueyajaaja jatanijia shacantuucara, juhua
 Pueyaso seru na niquishaanura, pueya na sapojonura. ¹⁵Naaratej, majaari cua jiuujiatenu
 cuno pojori jaara tama na cuaqueyajaaja jiyatecanu juhua seetanujanaa maninia miijiaca
 pueya nojori quiniuria. Nojoriiri naa miiquiaa, Satanás seya nojori quiniucua. Naajaa,
 ¡nojoriiri saniitiosaanutianiya sesa nojori miiniucua!

Pablo pohuatasacari naquiya na miiniujiniji, Cristo jiyaramiquishano na quiniucua

¹⁶Socua nia sequenu pacuteyanijia, majaari nia jyaniniu janiyari paatecani cua pohu-
 atasacari tama janiyajinijiaaja. Niaa jaara jiyaniya janiyari seetanujanaa paatecani,
 naajaa, rupaquijia cua tojitiare quenaaja. Janiyari juhua paateca tama janiyajinijiaaja

niaara pohuatanu paniyajaanihuuaj, taa nia tojishano pueya miiquiaacuaani. ¹⁷ Naa cua pohuatasacari tama janiyajiniijijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaja, juhua paateca cua quishacari. ¹⁸ Naatej, taa queraatia Pueyaso rupaa pohuatanaa tama nojorijinijijiaaja pohuatanuuquiaacuaani, janiyari quiarijia naa tama janiyajiniijijiaaja pohuatanu paniyajuhuuaj. ¹⁹ Jiyanhua niishijiaa nia quishacari, niaari cuno paatecoori tojtiaquiaa juhuajaniya. Naatej, taa nia tojtiaquiaa cuno pojoricuaani, quiarijia cua tojtiarejuhuaj. ²⁰ Naajuhuuaj, niaanaari juhuajaniya rejeretaquiaa cuno pojori, nojori jaara nia poonijitequiaa juhua nojori seya. Niaanaari nojori rejeretaquiaa nojori jaara nia jiitiasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuiquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaajuhuuaj, nojori jaara nia jiquioco maseteriquia. ²¹ ¡Nojoriquiri jiyaniijanucujanaa cutara! Saniniujia, janiyari nojori naaqui caririuiyani juhua nojori cua quiaquiniucua, maja naa canaa miiniucua niajaniya, taa nojori miiquiaa sesa niajaniyacuaani.

Naajaa, quiarijia cutara, janiyari tama janiyajiniijijiaaja pohuatanutaniyani, taa nojori pohuataquiaa juhua paateca tama nojorijinijijiaajacuaani. ²² ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacajuhuuaj? Janiyajuhuuaj. Janiyari Hebreo pueyanohuuaj, Hebreo rupaa pocuajanio. ¿Nojoritiniaari Pueyaso saquiriojosano Israel pueyajiniijinio? Janiyacuajari Israel pueyacuajinio supuenohuuaj. ¿Abrahamtenaari nojori supuetana? Abrahamcuajari cua supuetanajuhuuaj. ²³ ¿Nojoritiniaari Cristo jiyaramiquishano pueya? Janiya cutaraari seetanujanaa Cristo seruni. Janiyari jiyanhua soyani, juhua paateca naa cua pohuatasacari tama janiyajiniijijiaajatej. Naajaa, janiyari seetanujanaa nia sequeyani. Janiya cutaraari socua jiyanhua nojorijiniji poonijioquiaari Cristorani. Janiya cutaraari pueyaracaanu caminiuijushaaquiaari nujuatejojuajinia nujuatejonuni, Jesucristojini cua pohuatanuucua. Naajuhuuaj, janiyari pueyaracaanu caminiuijushaaquiaari majacununi. Naajuhuuaj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacaari cua caminiuijushaaquiaari majacunu puetunu niquiriyatu pa juaashiquajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari cartea na majacusanu pueyano. ²⁵ Naajuhuuaj, janiyari jiuujianaraca caminiuijushaaquiaari macata piquiniuni. Tamacari, janiyari saitia jacusaaquiaarini. Shoniniacu caminiajinia cua jaaretasacari buquejia, jiuujianaraca buqueeri tiuquitiaquiaari. Naa tamacari buque tiuquitasacarijuhuuaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniniacu caminia jiuujajinia. ²⁶ Janiyari pueyaracaanu tiqiyocua rucanejojua quiquiaarini. Naacuajitij, moocua cua niuuniuijushacari, janiyari cocuaatia miiquiaarini. Naa cua rucanejosacaritij, janiyari pueyaracaanu puereeta nohuasenuujuaca quishaqui shocoquiaarini. Naajuhuuaj, tama cuarta Judiocuacajarijia pueyaracaanu cua miitianu panijia, taucucanio. Puereetaari quiquiaarijuhua cua rucanejosacari tiacajinia, tiqiyocua pueya quiaquishaqui, shoniniacu caminiajiniano. Naajuhuuaj, puereetaari quiquiaari janiyara, cua jiyaniishacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷ Jiyanhua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuuaj. Janiyari nooji-aqueya miaqueyaquiariaarijuhuuaj, jeya cua quiaquishacari. Janiyari naquiya miiquiaari cua rucanejosacari shiniquajiniujuhuuaj, toqueeju cua quishacarijuhuaj.

²⁸ Janiyari naa naquiya miishaaquiaarini, mariyata tamaatia naquiya miiniuijuhuuaj. Naajuhuuaj, janiyari puetunu juucujanaa niishirojoquiaani, taariquitijia Pueyaso muerasu maapue quiya puetunu jiyacajiniajanaatej. Janiyari jiyanhua nojoriicua tacaquiaani. ²⁹ Naacuajitij, tamonu cuarta Pueyaso pueyano jaara rejeretaquiriquia Sesaaca saniniuijushacari nojuaja, janiyari jiyanhua taraajeja nocuani. Tamonu jaara sesa miitishaare, janiyari na naaqui caririuiyajuhuuaj. ³⁰ Naa jaara paniya socua cua pohuatanura niajaniya tama janiyajiniijiaaja, nia pohuatareeraqui pueyaracaanu taraatia cua miishaanujini.

Tama janiyajaaja, janiyari maja cumueecani. ³¹Pa Jiyaniijia Que Pueyasocuaajaari niishiya janiyari seetanujuanaa sequeyani. Nojuajanaa cuaara pueyaracaanu maniniuhuaqueeta-saaria cutara, maja nojuajiniji pohuatanaa. ³²Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuatayaji, nojori qianura juucua janiya. Nojoriiri cua quiatunu paniriquiaa Jesucristojiniji cua pohuatanuucua. ³³Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacujajini.

12

Pablo pohuatasano Pueyaso niqutishanojiniji nojuaja

¹Paa jaara tama pajaniyajiniji pohuatariquia juhua paatecani, cunoori najuhanaj. Naajaa, socua nia pohuatereeraj. Nia pohuatereera taa cua niqutishaaquiaari pa Jiyaniijia casaa jiyocuacaanuni. ²Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquojinjarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariqutijia cua tacanishaaquiaaritij, puetunu cua cuaqueyatajanaa, saaja cua sohanu soj. Johuaj. Saaja Pueyasocuaajaari na niishiya. ³Cua tojitiare, seetanujuanaa majaari cua niishiniu taariqutijia cua tacanishaaquiaaritij, puetunu cua cuaqueyatajanaa, saaja cua sohanu soj. Pueyasocuaajaari na niishiya. ⁴Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujuniuria jiyocuacaanu cua tojishano mijiria quiniaa pueyara. ⁵Naa Pueyaso niqutiniuucua janiyatej, janiya maara tama janiyajinijiaaja pootariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶Naajuhuj, janiya jaara tama janiyajinijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jyaniriri janiya jyanohua maninia pueyanoni. Pueya cuaara niishiiria cutara taamueca pueyanote janiyani, saaja nojori namijiata nojori niqushacari cua miishano, tama nojori numaatajaaja nojori tojishacari cua niishitiojosanojuhuaj. ⁷Pueyaso niqutishano janiyani, na niishitishano janiyajuhuaj, cunoori puera jyanohua maninia quiquiaari. ¡Cunoori jyanohua cua timitiquiaari! Naaratej, janiyari cua cuaqueyajinia nootusaquiaari juhua jiohuacatani, janiya mariqui pueya shocotajara quiriri. Cuno tajaeta noonuuri Satanás miishano quiquiaari, na tacaatiniuria janiya. ⁸Janiyari jyanohua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pacutejoquiaari secojonuni. ⁹Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniuucua. Saaja cunocuaajaari quiara. Cua naatacuaajari socua jyanohua poonijitotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riuucasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacuajitij, Cristo cumaacaari socua janiyajinia niqushaaquiaa poonijiyano. ¹⁰Naacuajitij, janiyari shuquiriquiaani cumaacaaju pueyano cua quiniuucua, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jiiitaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuj, janiya jaara naquiya miitiasaquiiani,

taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacujitij, janiya jaara tojetaaruucua-janaa cumaacaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniuucua janiya.

Pablo tacaashacari Corinto tiacajinia quiniaa Pueyaso muerasu maanuucua

¹¹ Janiyari seetanujuanaa juhua paateca tama janiyajinijiaaja pohuatareeni, juhua pueya shocotaja. Niaacujajari naa cua pohuateree, niaacujaja naara cucujaji tacuyaquiuianu cua sesacaja pueyatej. Janiyanaari najuhuaana quijia pueyanoni. Naajaa, niaacujajari niishiya, janiyari maja socua najuhuaana quijia cuno pojoriinjini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhuajaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocujaji juujiatecoquiaari. Naacujitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. ¹³ ¿Janiyateeri sesa nia jiitiaquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, najuhuj, taa cua miiquiaari tamasaca jiyacajinia quiniaa Pueyaso pueya maapuecuani. Majaari rimiajata cua miiniu quiquiaari nijaniya, niaata cua quishacari. Maja cutaraari cua mashiniquijionu quiquiaari cumaneeca nijaniyajiniji. ¡Cua jiyanoori cunora, jaara sesa quiquiaari nijaniyara!

¹⁴ Quiarijiani, janiyacujajari quera quiaa niaacuani. Janiya jaara niaacua quiaareni, cunota quiniutianiyari juujianaraca cua pacutenu niaacua cua quianu. Majaari nia jiyaniyu janiyari nia cumaneeca mashiniquijionuucua quianutianiyari. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacujajari juhua cua muerasuniyojua. Niaacujajari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyacuquishacari cumaneeca nijaniyajiniji, janiyari seetanujuanaa juhua nia queni. ¹⁵ Janiyari shuquiriaatia tama cua cumaneecajaaja puecanutianiyari cua quishacari niaata, socua cua niishitiojonura nijaniya. Naacujitij, janiyari tama cua cumaacajaaja puecanutianiyajuhuj, nioojia cua cumaquiniuria. Janiyara, niiori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacujajari niishiya, majaari quenaaja nia niquitionu quijia nia cumaneeca janiya. Naajaa, tamasaca nijaniyajinijionaaari soquecoya, janiya naasucuaaari jiyasohuaja nia cumaneeca nohuasejoquiaani, cua saaponuta nijaniya. ¹⁷ ¿Seetanutejanaa pueyanaa? ¿Janiyateeri nia sajojoquiaari niaacua cua jiyaramiquishano pueyatani? ¿Nojoritiri nia cumaneeca masequiaari? ¡Maja! ¹⁸ Janiyacujajari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanujuhuj. ¿Titoteeri jiyacari nia cumaneeca mashiniquijiaari? ¡Majaruhua! Niaacujajari niishiya, Titocujajari cumaneecaacua jiaatiaashijia, juhua janiyajuhuj. Janiya Titota, canaacujajari jiyanoehua nia paniquiaani.

¹⁹ Sacuaraatia canacuara nia rimiaaquenuucua pueyanaa, naajaa, majaari nia jiyaniyu canaa tama canaacujajiaaja tacuyani, juhua canaa nequesoreenaa nia quishacari. Sanini-uujia, canaari niya Pueyaso niqiara nio naajiya niaacuarani, Cristo pueya canaa quiniuucua. Naajuhuj, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjiaa nia quiniuria. ²⁰ Janiyari puereyani, niaacua cua tiuquishacari, janiyari niaacua taraajenutianiyari cua riuriatasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanujuani, jeecatoojua, niaari saniniuujia taraajenutianiya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiitiasanoocua jiaatiajaca quiyajaa. Niaa naasucuaari juaniyu porocua quiyajaa. Niaa naasucuaari tama nia panishanojuajaa miijiaa quiyajaa. Niaa naasucuaari niarta pueyacuara coriaacojuuca quiyajuhuj. Naajuhuj, niaa naasucuaari

narta pueyacuara rimiaaquenujuaca quiyajaa. Naajuhuj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqúi quiyashijiacajuhuj, pueyaracaanu nia juayonuujutanuucua. ²¹ Naacujitij, janiyari puereyani janiya naasucuaari Pueyaso niquiara caririquniutianiya nia naaquiní, niaa jaara naa sesa miijiaca quiyajaa. Janiyari puereyajaaniuhuj, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiuanujua. Noojiaqueya niajanijajinijinoori sacuaraatia miijiaca quiqúianujua: cararaatia miijiaca sacuaraatia, na camishoo maaji numuetucunu porocujuhuj, naajuhuj, majaari tama nojori cuaqueya panishanojuaaja nojori rejetenu quiqúiaa.

13

Socua Pablo nacasusacari Pueyaso pueya

¹ Nioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiuarini: querajaa pueya jaara mariyata pohuatate nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuj, niaacua cua tiuquishacari, janiyari naa miiniutianiyaní cua nequesoresacari cuno sesa miijiaca. ² Pueyanaa, janiya jaara pacutequiaariuhua niaacua quiantej, janiyacuaajari puetunu niajanijajinijinio cuno sesa miijiacajanaa priyojoquiaarini. Quiarijiani, tucuaaanu cua quishacarijia, janiyari puetunu cuno sesa miijiacajanaa socua priyojijiani. Naacujitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. ³ Cua nequesoresacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriqúiaacujani. Niacuaajaari tari niishiya, pa Jiyaniijia Cristoori maja na jiitianu niajaninya juhua cumaacaaju pueyano. Niacuaajaari na cumaaca niquiquiaa tama niajanijajinijiaaja na saniitiosacari niajaninya. ⁴ Seetanujuanaa, Cristoori juhua cumaacaaju quiqúiaari jaara niyacutesanojinia teetesaaquiari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhuj, canaa, na rupaa pohuatanaani, canaari naqúia miishaaquiajaaniuhua saaja mijiria quiniaa canaa quiniucua, taa nojuaja quiqúiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jiitianura niajaninya.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujiaa, maja soj? ¿Niaate maninia miijiaca taa Pueyaso muerasu miiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujiaa quiri, nojuajaari nioojiajinia quiya? ⁶ Naajuhuj, jacaria nia niishiriojore canaajiniji. Nia niishitiriqúiani, canaari seetanujuanaa Jesucristo jiyaramiquishano pueyani, maja sapojonuujua. ⁷ Canaari Pueyaso secojoquiaa niaacuarani, tojetaarucujanaa sesa miyashijiaa nia quiniuria, maninia Pueyaso muerasu nia quiniuria. Majaari naa canaa secojonu quiqúiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Niaa jaara naa maninia miijiacara quiriohua, majaari canaa saniitonu quiniutianiya niajaninya Pueyaso cumaacata. Naacujitij, majaari pueya niqúiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuaana quiqúiaa pueyani, naajaa. ⁸ Canaa jiitiasano cumaacaari maja canaa saniitotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria niajaninya, socua maninia Pueyaso Rupaa tojitiajaca nia quiniuria. ⁹ Naacujitij, canaari shuquiriquiaani niaacua canaa paaretaquishacari canaa cumaaca, canaa saniitonura niajaninya niaa jaara Pueyaso tojitiaashijiaa quiqúiaa. Naacujitij, canaari juhua cumaacaaju pueya niquishano quiniutianiyaní, cumueca Pueyaso muerasu nia quishacari saniniuujia. Canaari canora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneeginia jiyanojua nia nacasuyani tucuaaanu cua quishacarijia, maja jiyanojua cua nacasunura niajaninya, niaacua cua

tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura nijaniya, seetanujuanaa cumueeca na muerasu nia quiniuria. Pueyaso niquitiosano na cumaaca janiyari maja cua sesonura nijaniya.

¹¹ Cua tucuatánura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatiajaca nia quiri. Nioojia nia cumaquiri, maninia cua rootasanota. Naajuhuj, nia jiyanootooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhuj. ¹² Pueyanaa, Pueyaso tojijiaca nia quiniuucua, nia saruhajotooriquia nujuunuta, seetanujuanaa nia paniniutia niarta Pueyaso pueya. ¹³ Puetunu niiquijinio parta Pueyaso muerasujuaanaari cua sequeya cua saruhuatánura nijaniya.

¹⁴ Pa Jiyaniijia Jesucristo cuaara cumaquiiria nijaniya pueyaracaanu. Nijaniya cuaara quiiria pa Que Pueyaso panishano pueyaracaanujuhuj. Naajuhuj, niaa cuaara quiiria Pueyaso Sohanu rupuesano pueyaracaanu. Puetunu nijaniyajanaa cuaara naa quiiria.

PABLO NAAJIONEE GÁLATA JIYAJINIA QUINIAA PUEYASO PUEYACUARA

Gálata pueyacuara naajionee

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiníaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samitianishanohua macujiniji. ² Niya cuata quiníaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiníaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristoni, nojori cuara cumaquiiria nijaniya, nioojia cajitishano nia quiniurajuhuai. ⁴ Jesucristoori tama na cuaqueyajaaja panitiaquiaari pocuara na mosanura. Naacujitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. ⁵ Naaratej, pa Que Pueyaso cuara maniniuhuaqueetasano quiiria. Cuara naa quiiria pueyaracaanutej.

Maja tamonu maninia rupaa quiniu socua Jesucristo rupaajiniji

⁶ ¿Taa nia miiquianuni pueyanaa? Quiarijiani, janiyari jyanohua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuaajaari Neyanutaja nia cojiritiaquiaari panini, Jesucristo miiniuucua maninia niaara, na panishano pueya nia quiniuria. ⁷ Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaa tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhanaj, mariyateyacato nojori quiniuucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na saniitionutaniya. Naajuhuai, janiya jaara tamaatia pahuatare Jesucristojiniji nijaniyani, jiyocuaanuji roseno Pueyaso serujuhuai, Pueyasोजनाari canaa saniitionutaniya. ⁹ Janiyacuajaari naa sequeja nijaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Naa jaara tamaatia pahuataariquia Jesucristojiniji, maja naate taa tari cua pahuataquiaari nijaniyacujani, Pueyaso cuara saniitiooranaj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pahuatareera cante cua niishitiojoquiaari Jesucristo rupaani, cua pahuatasano nijaniyani. Pueyanaa, nio rupaa janiya na pahuataa nijaniyani, niiori maja mijiria quiníaa pueya niishitiojosano janiya. ¹² Taa cua sequeya nijaniyacujani, majaari nio rupaa cua niishini quiquiaari tamasaca pueyajiniji. Jesucristojuanaacuaajaari na rupaa cua niishitioquiaari.

¹³ Naa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano mijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jyanohua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquorijiniji. ¹⁵ Naajaa, jyanohua panijia Pueyaso quiniuucua, cua supueyaquishacarijia, ¡nojuajaquiiri tari cua saquiriojoquiaari na pueyano cua quiniuria! ¹⁶ Naacujitij, tama na panishacarijiaaja, nojuajanaari Neyanu cua niishitioquiaari, Neyanujiniji cua pahuatanura taucuaca. Neyanu na niishitini nuhuaji janiya, majaari quenaaja tamasaca

nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocujaari maninia cua niishitiquiaari puetunujuanaa Neyanujiniji.¹⁷ Naajuhuj, majaari cua quianu quiquiaari Jerusalén tiacajinia, tii cua niquniuria cuarta Jesu jiyaramiquishano pueya. Nojoriiri coteenujanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiaquishaqui Arabia jiyajiniani. Na nuhuaji, janiyari tacatequiaarihua Damasco tiacajinihuani.

¹⁸ Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquirojosano pueya cua niquniu quiquiaari. Janiyari saaja Santiago niqiquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocujaari niishiya, janiyari nio cua naajiojia seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniani, Cilicia jiyajiniano. ²² Saniniuujia, Judea jiyajinia Jesu tojtiajaca maapueeri juhuanojuaja maja na niishitiuniu quijia janiya. ²³ Nojoriiri saaja naa poojotasaaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiarijia pa Jiyaniijajiniji pohuataa pueya niquiarajuhuj”. ²⁴ Naa nojori tojiniushacari janiyajinijitij, nojoriiri Pueyaso maniniuhuaqueetaquiaari nojori paraca na jataniniuucua Jesu rupaa pohuatana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhuj

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaarihua quianuni. Janiyari jiyacari Tito rupoquiaari cucuajuhuj. ² Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojtiajaca jiidianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niquiara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaana sesa niishitiojiya taucuacani?” Cua sequetureeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”. ³ Naajuhuj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiidianaata, nojoriiri Tito niqiquiaari nareja, nojori na rupenurajuhuj. Nojoriiri niishiquiaari nojuajaari seetanujuanaa Pueyaso pueyanojuhuj, saaja Jesucristoocua na tiuuniuucua. ⁴ Saniniuujia, noojiaqueya canaa Judiocuacajinijinoori tama nojori cuaqueyajaaja jiyatequiaari juhua Jesu tojijica pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiushacari. Nojoriiri juucua canaa jiyatenu paniquiaari tariucuacaanu Moisés Rootasano tojijica canaa quiniuhua. ⁵ Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosanota.

⁶ Cuno pojori Pueyaso pueya maapue jiidianaa Jerusalén tiacajiniani, nojoriiri jiyanhua tojishano pueya quijia. Janiyara naajaa. Pueyasocujaari najuhuaa quijica jiyanooquiaajuhuj, taa na jiyanooquiaa tojishano pueyacuani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari

quenaaja niquiriyatu rupaa nojori sequenu quiquiaari, nojori niishitiojonura janiya socua. ⁷Nojori cutaraari niishiquiaari Pueyasocuaajaari seetanujuanaa cua jiyatequiaari na rupaa pohuatana cua quiniuria taucacara, taa Pedro na jiyatequiaari Judiocuaca niquiara pohuatana na quiniuriacuaani. ⁸Pedro Jiyatena Judiocuaca niquiara Jesucristojiniji pohuatariquanoni, cuno Pueyasojuanaacuaajaari cua jiyatequiaarijuhua taucuaa niquiara pohuatana cua quiniuria. Naacuaajitij, canaari mariyata Pueyaso jiyaramiquishano pueyani.

⁹Santiago, Pedro, Juannio, nojoriiri socua tojishano quijia puetunu Jesuucua tiuuniaa cuarta Judiocuacajinijiojuanaa. Nojoriiri seetanujuanaa puetunu Pueyaso muerasu jiyaniijianucujanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanooquiaari, na jiyatenura janiya Neyanujiniji pohuatana cua quiniuria taucuaa niquiara. Naaratej, nojoriiri na juaashiquia niquitioquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijuhua: “Maniniacuaaja. Nia quiojiyare taucuaacuaa tii nia pohuatanura Jesujiniji nojoriujuhua. Canaari saniniuujia parta Judiocuaca tajinia poonijionutaniyanijia, nojori niquiara canaa pohuatanura Jesujinijijuuhua”. ¹⁰Nojoriiri canaa sequequiaarijuhua: “Canaa panishano pueyanaa, majaari nia niyajetanu casamijiuucua pueya naacunu”. Naaratej cuarta Pueyaso pueyanaa, puetunu tiqiyocujanaa cua rucuanesacari, janiyari naa miiquiaa seetanujuanaani.

Antioquiya tiacajinia Pedro nacasusaanujiniji pohuatasano

¹¹Tamacari, canaa quishacari Antioquiya tiacajinia, Pedroori canaacua niquiarijuhua, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanoohua na nacasuquiaarini. Cuno na miishanoni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. ¹²Pedroori naa miiquiaaritij. Coteenu canaa cojiquiaari maniniaari tariucua Jesuucua tiuujiaca taucacata, canaata na miaquejonura jatiqui. Jiyacaritij, canaacua tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaaji rupatequiaari. Majaari tari na miaquenu paniniu quijia canaata, tariucua Jesuucua tiuujiaca taucacata. Narta Judiocuaca puerequiaariiri maja na sequesanaura: “Cunoqui sacuraatia miaquejojuua taucacata”. ¹³Tii quinia Jesuucua tiuujiaca Judiocuaca jaara niquiquiaari naa Pedro miishanocuaatej, nojoriiri jaarajaaja canaacuaaji rupatequiaarijuhua, Pedro na cojitiuniuria. Naajuhua, Bernabeeri jaarajaaja canaacuaaji rupatequiaarijuhua cuno mosanucua na cojiniuria! ¹⁴Naaratej, janiya jaara naa nojori niquiquiaari tariucua Jesuucua tiuunio taucuaa tamacatiuyanoni, janiyari niishiquini, cuno nojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaquiaari Pueyaso rupaacujani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarjia saniniuujia, quiaari Jesuucua tiuunio taucuaa shiniujiya nojori quiniuria seetanujuanaa juhua Judiocuaca, nojori rupenura pajaniya. ¿Casaara naa quia shiniujiya nojoriiriini? ¹⁵Paacuaajaari Moisés Rootasano tojijia cutarani, Judiocuaca pa quiniuucua. Paari maja tahuani, Pueyaso tojiyashijaca. ¹⁶Naajaa, paacuaajaari niishiyani, majaari Pueyaso jiyanooniu pajaniya Moisés Rootasano tojijia pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiushacari. Paari cunora Jesucristoocua tiuquiaani, nojuaja jiyanooniu pajaniya puetunu sesa pa miishanojinijijanaa. Sesu pa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhua, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

¹⁷Paacuaajaari Jesucristoocua tiuquiaarini, jiyanooshaanu pa quiniuria, maja socua Moisés Rootasano tojijia pa quiniuria. Na nuhuaji, paa jaara jiyaniyani paa sesa miijia quiriuhani Moisés Rootasano pa tojiyaquishacari tarini, saaja Jesucristoocua pa tiushacari, paari jiyanoohua jiyajeneyani. Naa pa jiyaniishacaritij, paari juhua sequeyani Cristoori pa jiyaterohua sesa miijia pa quiniuhara nocua pa tiuuniucua. ¿Quiaateeri

naa sequenu paniya Pedronaa? ¡Maja! ¹⁸ Paacujaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaca quiniutianiya Pueyaso niquiarani, paa jaara Moisés Rootasano tojjijaca quiriohuani? ¡Maja! Paa jaara naa niishiriojiyani, paari jiyanhua jiyajenyani. Paacujaari seetanujuanaa pohuatantuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatantuusano jaara sapojosano quiriquia, paa maara jiyanhua sesa miijiaca quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. ¹⁹ Pueyanaa, cua niishishacari maja cua naata Moisés Rootasano tojiniu maninia puetunujanaa, janiyari niishiquiaarini Pueyasoori cua shaajanutaniya na shuriucuaaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjia cua quiniuria socua. Naacuajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaciaari monu Cristota niyacutesanojiniani. ²⁰ Naacuajitij, quiarijiani, majaari nio janiya quiyani. Jesucristocujaari nio, coojiajinia quiyani. Majaari tamajaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Nyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaari cucuara na mosanura. ²¹ Majaari cua ruuretano Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanooniu Pueyaso, Moisés Rootasano tojjijaca pa quiniuucua, Jesucristo maara najuhuana cusoquiaari pocuara.

3

¿Teyano tojjia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacujaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaarihuaj, cante tari nia sapojocanuni, Jesucristoocua tiuuniujiniji nia pishinuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanooniuianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu paniyani. Cua riuucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacujaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³ ¡Niaaquiiri tojetaarucujanaa mosanucujuhuanajaj! Nia niqishuriirij, niaacujaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanooniu tama nia cuaqueyajaaja Moisés Rootasano nia tojishacarihuu juucua, tama nia cumacatajaaja? ¡Maja! ⁴ Pueyasocujaari jiyanhua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj? ⁵ Pueyanaa, Pueyaso jaara na Sohuanu niqitioquiaa nijaniya, na nuhuaji na cumacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiuujijaca nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaari saaja nocua na tiuuniuucua. ⁷ Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujuanaa canaa supuetana

Abraham niqiuohuajanaa cutara. ⁸Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajaanihuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuurii, Abrahamnaa. Naaratej, quia jinianuucujainio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajiniujiojuanaa nocua tiuuriquiano pueyatej”. ⁹Naaratej, cante Jesucristoocua tiuujiani, Pueyasoori na jiyanooniutianiyajuhuaaj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujiaa, taa na miiquiaari Abrahamcuaani.

¹⁰Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjia cuara tojiria puetunu Pueyaso naajiotanishanojuanaa. Cante niqiriyatu na sequesano tojiaquijiani, nojuajaari pueyaracaanu saniitiosocoriquíano”.

¹¹Naacuajitij, niaari niishiyacuaja, majaari quenaaja niqiriyatu pueyano jiyanooshaanu quiniutianiya, Moisés Rootasano na tojiniucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniucua”.

¹²Saniniuujia, Moisés Rootasanoni, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojiniucua rishiniutianiya”.

¹³Maja maninia pa tojiaquiniucua Moisés Rootasano, paari Pueyaso puecoosocoriquíano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaarihua tariucuacaanu Pueyaso Rupaajinia:

“Pueyaso sesacasanoori cuno, niyacutesanojinia teetesano”.

¹⁴Naa Jesucristo cusonuucua pocuaratej, saaja nocua nia tiuushacari, Pueyasoori na naata shuquiritiniu nijaniya taucuacajuhuaaj, puetunu na sequesanoatjanaa canaa supuetana Abraham. Naajuhuaaj, saaja pa tiuuniucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

Moisés Rootasanoori maja na naata Pueyaso sequesano Abraham jataniniu

¹⁵Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquíano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujainio superiquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujainio supueno pueyara”. Maatia sequeyacuajaari: “Abraham jinianuucujainio supueno pueyanora”. Niqiriyatu pueyano sequeyari, maja queraatia. Nojuajaari pa Jiyaniijia Cristocuaaja. ¹⁷Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniuujuhuaaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqitioquiaari na rootasano,

saajianeecaacua na quejasano. Moisésri saniniuuja pueya na niishitiojoquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. ¹⁸ Pueyaso niqutionu panishano pajaniya jaara pa niqitiosaariquia saaja pa tojiniuucua Moisés Rootasano, na niqitiosocoriquiano pajaniya maara nareja niqitiosoo quiri. Saniniuuja, Pueyasocujaari seetanujuanaa naa Abraham sequequiaari:

“Janiyari nareja quia niqutionutaniya cua sequesanoi”.

¹⁹ Naa naasucuaari sequeya: “Jaara naa quiritij, ¿casaarano socuateeri Moisés Rootasanoi?” Nia sequereera pueyanaa. Jiyanoahua Abraham nuhuaji, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijia. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujainio supueno pueyano cuara tiuquiariaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuja. Naacuajitij, Jesucristocujaari Pueyaso jiyaniquishano quiquiaari, na sequesacari Abraham, “quia jinianuucujainio superiquiano pueyano”. Cristocujaari puetunu Pueyaso sequesano Abrahamjanaa masequiaari pajaniyarajuhuj, taa Pueyasojuaana sequequiaari Abrahamcuajani. Saniniuuja, Moisésri saaja pueya niishitiojoquiaari Pueyaso seya caminiujiushano nojuaja. ²⁰ Abrahamra saniniuuja, majaari quenaaja tamonu pueyano quiniu quiquiaari nera na caminiujiuriquiano. Pueyasojuaanaacujaari nocua muetaquiaari, na sequenura seetanujuanaa taa Neyanuucua tiuujia na miniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanojiniji.

Casaarante Moisés Rootasanoi

²¹ Naa cua sequesacaritij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiquia Puyaso jiyanoootiniu pajaniya, paa maara Moisés Rootasano tojitiyajaca quiquiriani, Pueyaso jiyanooniuria pajaniya. ²² Saniniuuja, tariucuacaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miniu. Naacuajitij, paari maatia niishiyani, puetunu pueyajanaa cuara tiuuria Jesucristoocua, Pueyaso sequesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiiatasano pueya quijiani. Paari naa quijia taraatia pueyacuani, paa jaara tojiquiaari Jesucristojinijiaatijia, nocua pa tiuuniuria. ²⁴ Naacuajitij, Moisés Rootasanoori juhua pa jiiatiana quiquiaari. Juhua naatujooriniyujua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacuajitij, paa jaara Jesuucua tiuquiarini, paari puetunu sesa pa miishanojinijijianaa jiyanooshaaquiari. ²⁵ Naa Jesuucua tiuujia pueya pa quishacari quarijiatej, majaari socua pa tojinu tariucuacaanu pa canashitijona. Moisés Rootasanoori juhua pataaco seru quiquiaari, Pueyasora na canashitijonura pajaniya, juhua naatujoori pa quishacarijia. ²⁶ Quarijia cutara, puetunu nijaniyajanaari Pueyaso pueya, Jesuucua nia tiuuniuucua. ²⁷ Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyujua nia quiniuucujuhuj. ²⁸ Naa Pueyaso muerasu pa quiniuucuatej, majaari Pueyaso niquiniu rimijata pajaniya. Tamonu jaara Judio pueyano quiri, naajaa. Tamonu jaara tahue quiriuhuj, naajaa. Poonijotesano pueyano maaraja, camarnuujua pueyanonio, cunoori maja rimijata Pueyasora. Naajuhuj, caya, maaji, cunoori maja rimijata Pueyasora. Jesucristoocua tiuujia pa quishacari, Pueyasora, puetunu pajaniyajanaari juhua niquiriyatu pueyanoni. ²⁹ Naajuhuj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jiuhuacuajainio supueno pueya cutara. Naacuajitij, niaari Pueyaso sequesano Abrahamrano maseriquianojuhuaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quirri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanojuaja maja na naata na que casami jitianu. Nojuajaari saaja juhua pataaco seru, naatujua na quishacarijia. ² Naacuajitij, tamasacaari cuno mueya canashitijia, cuaara mashajara quirijiaatijia, jiyaniijia jiyate-socoriquiano, taa na shipininio sequequiaaricujani. Juhuacarijia niishitiojoshiyajaari-uhuj, maninia na jitianura nerano na que riuriotaca. ³ Paari naajuhuj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojtishaaquiarini, pa supuetanaa niishishanonio. Paari naa taraatia jitiiasaaquiarini. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajinjijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuajitij, nojuajaari na naata Moisés Rootasano tojijiaa jiyanooni, maja socua pa tojtishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojajinia na quiniuria. Naa poojajinia na quishacaritij, nojuajaari Pueyaso pa sequetequiaa, “cua Quenea”. ⁷ Naacuajitij pueyanaa, majaari tari nia quiniu Moisés Rootasano tojijiaa, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacaritij, niaari tariucuaaanu Pueyaso sequesano Abrahamrano maseriquianojuhuaj, taa na muerasurano niqutionu na sequequiaaricujani.

Pablo tacaashacari Galacia jiyajinia quiniaa Pueyaso pueyaca

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijiaa quiquiaari taraatia. Cuno casaari maja seetanujuanaa Pueyaso. ⁹ Quiarijia saniniuujia, niaari Pueyasojanaa niishiya. Pueyasojanaa cutaraari sanya nia niishiya. Naa Pueyaso panishano muerasu nia quishacaritij, ¿casaara najuhuana supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu nijaniya. Niaari najuhuana na tojijiaa quiniutianiya. ¹⁰ Niaanaari puetunu juucajanaa niishijiaa quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijiarajanaano. ¿Casaara naa miijiacara nia quiriohuacuaarini cuarta Pueyaso pueyanaa? ¹¹ Naa nia miiniucuatej, janiyari jiyanohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miirioharohua taa cua miiquiaaricuaani, shusha cua tiuquishacari niaacuani. Moisés Rootasano niishiyashijiaa nia quishacari, janiyari na tarinitiaquiaari tojiniuni, juhua nijaniya cua quiniuriajuahuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jitiiaquiaari niaata cua quishacari. ¹³ Niaacuajaari niishiya, cusosu cua quiniucua, janiyari shushajanaa Jesucristojiniji pohuataquiaari nia niquiarani. ¹⁴ Naa cusosu cua quishacari niaatatej, naajaa, majaari nia ruuretano quiquiaari janiya, naa sacaraatia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojtiaquiaari juhua Pueyaso serujanaa, nia niquiaari cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojanaa. Niaari naa timitiaquiaari janiyatej, Jesujiniji cua pohuatanuucua nijaniya. ¹⁵ Quiarijiaariuhua pueyanaa, ¿casaa nia tojetacaroni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteencujani? Janiyacuajaari niishiquiaarini, jiyanohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraajesacari. ¹⁶ Quiarijia naa cua sequesacari seetanujuanaa nijaniyatej,

¿niaateeri cunora cua niquiniutianiya juhua nia paraca? ¹⁷ Cuno pueya, najuhuaana tamaatia nia niishitiojoquiaa Pueyaso rupaani, quiarjia nojoriiri maninia miiquiaa nianiani na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojjijaca nia quiniuria. Naacuajitij, majaari tari cua rootasano tojjitajaca nia quiniu quiniutianiya. Niaari cua cartenutaniyajuhaaj. ¹⁸ Quiarijiani, cuno pojoriiri nia shuquirityacuaja. Majaari nia jyaniniu janiya nia sequeyani, maja maninia parta pueya pa shuquiritiniuria. Taaquiriirinij, maniacuajaari parta pueya pa shuquiritiniuria, seetanujuanaa pa naacunura nojori. Niaacuajaari niishiya pueyanaa, janiyari jyanohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹ Quiquiohuaniojuanaa, jyanohua cua tacaashacari niaacua, coojaari jyanohua noonu pacuterohuacuhuaaj, naatej, taa maaji nooquiaacuaa na manajani, quera na ranu panishacari. Naajuhuaaj, janiyari naa pueyaracaanu mijionutaniya naquiya niaacuani, niaa cuaara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjijacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijinio

²¹ Moisés Rootasano tojjitajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? ²² Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuacuajinijohuaaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaj. Na sesojoquiaariiri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuatteequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarr miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojjitajacaari juhua seya quiquiaa, taa Agar quiquiaari serucuaani. ²⁵ Seetanujuanaari, Agarr miriqui juhua Sinaí tuhuananu Arabia jiyajinia. Saniniuujia, nio pa quishacari, Jerusalén tiacaari juhua Sinaí tuhuananu, cuno tiacajinia quinia pueya quiniucua Moisés Rootasano tojjijaca. Cunora, Moisés Rootasanoori juhua nojori jiiatiana quiya, juhua poonijiotasano seya nojori quiniuria. ²⁶ Saniniuujia, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuaaanu Pueyaso sequesanojuajaari naa naajiotasano quiyajuhuaaj:

“Niyajaru maajiniaa, shuquiriatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniucua. Naajaa, quiaacuajaari socua queraatia niquiohuaraca quiriqiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac

raquiari. Quirijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniujia, saniya necocujanaa jaara nera muetuquiaari, cunoori Pueyaso Sohuanu cumaacata rasaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quirijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. ³⁰ Quirijia nia niishiri cutara, naa naajiotasaaquiaaricuaajaari tariucuaaanu Pueyaso sequesano Abraham: “Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohuanu cumaacata rasano mueyaranotuhuj”.

³¹ Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

5

Saaja Jesucristoocua tiuujiaa pa quiri

¹ Jesucristo cusunucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjiaa pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjiacara nia quiniuhua. ¿Moisés Rootasano tojjiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanoootiniu Pueyaso, Moisés Rootasano pa tojjiniucua. ² Cua tojitiare pueyanaa. Janiyari Pabloni. Janiyajanaari seetanujuanaa nia sequeyani, niaacuajaari Jesucristoocua tiuujiaa, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishirojiya, niaari Jesucristo cusunu jiyatenutaniya najuhuaana na quiniuria nijaniyara. ¡Pueyanaa, majaari nia tojjiniu cuno Judiocuaca, canapue te nia shiniujiquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniiniucua nia nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojjiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojjiniu, Pueyaso jiyanooniuria nijaniya? ¡Maja! ⁴ Naa tama nia cuaqueyajaaja nia jiyanoootiniu panishacari Pueyasotej, Moisés Rootasano nia tojjiniucua, niaari Jesucristojiniji carejerucua. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. ⁵ Pajaniya saniniujia, paari Pueyaso Sohuanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quirijiani, Jesucristo rupuesano pa quishacari nocua pa tiuuniucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiaa pa quiniuria, parta pueya pa paniniurajuhuj.

⁷ Cuarta Pueyaso pueyanaa, niaacuajaruhua Jesuucua tiuujiaa quijia seetanujuanaa. ¿Quirijiaariuhuj, cante nia tarinitiriohuacuaa seetanu rupaacuajanaa nia tiuyaquiniuriani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujuanaari nio sequesano: “Shiitianiyojua jereca mashaca jaara shoqueeca mashacajinia shuushaare, cuno shiitianiyojuari puetunu cuno mashacajanaa jereteja”. Naajaariuhuj, shiitianiyojua sesa niishitiojosanoori puetunujuanaa pa sesojuajuhuj. ¹⁰ Naajaa, janiyacuaajaari pa Jiyaniijiaacua tiuya seetanujuanaani, majaari nia tojjiniu quiniutianiya tamaatia cuno pojori niishitiojosano. Saniniujia, Pueyasoori noo pojori saniitioriquiano, tamaatia na niishitiojonuusanota

nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitiojonu quiquiaa taucacajinjiniio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuuja, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jiyanoohua cua juaaquiaani. ¹² Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonunu porocua jayosaanura nia tajiniji, maja socua nojori cushitiojonura nijaniya.

¹³ Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijioteseano pueya, taa nia quiquiaaricuani Moisés Rootasano nia tojishacari pueyaracaanu. Naa Moisés Rootasano tojijiaca nia quiyaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. ¹⁴ Naa jaara naa miijiaca quiriquitej, niaari puetunu Moisés Rootasanojuanaa tojiyacuaaja, taa na rootasanojinia naajiotasano quiyacujani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojure. Majaari pueyaracaanu nia juayonuujutanu, naatej, taa sareya sayonuujutaquiaacuaani. Naa jaara naa quiriquitej, niaari socua puecotoonutaniyaquij.

Taa quijiate tama na panishanojuajaaja miijia pueyanoni, Pueyaso Sohuanu tojjia pueyanonio

¹⁶ Janiya nia sequeya cutarani pueyanaa. Cua tojiri. Pueyaso Sohuanu tojjia nia quiri pueyaracaanu. Naacuajitij, majaari sacuaraatia tama nia panishanojuajaaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuaaj, Pueyaso Sohuanuuri poojiajinia sesa casaa pa panishano paracajuhuaaj. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniuuja, Pueyaso Sohuanu jaara nia cumaquiuaacuaaja saaja Pueyaso nia tojiniuria maninia, cunora, Moisés Rootasanoori tojiniu paniyacuishaanutaniya tari. Naacuajitij, niaacuajaari maninia miinutianiya saa Pueyaso Sohuanutaja.

¹⁹ Maatia niquishanocuaajaari taa pueya miiquiaani, noo pojori, canapute tama na panishanojuajaaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitioojua narta canuutajaariuhuaaj. Maajipohuari naa sacuaraatia miitioojua narta maajipohuatajuhuaaj. Pueyari saaja naa miiniuucua jiaatiajaca sacuaraatiej. ²⁰ Naajuhuaaj, nojoriiri tama nojori pueyasorajaaja nojori shipinishano casaa secojonuujuaca. Nojoriiri shimiacurijihuaaj, narta pueyano shimiojonuujuaca. Narta pueyano niqiniu paniyashijiacajaariuhuaaj. Nojoriiri juaatioojuacajuhuaaj. Nojoriiri narta pueyano jiihtasanoocua jiaatiajajuhuaaj. Cunora, nojori niqiniu paniyacuajiaari. Nojoriiri maja na niishiniu rejetenu na juaaquiaca. Ritia juaajiacaaari. Pueya nasojojua narta pueyanoocuarajaariuhuaaj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijia, canapute maninia miiquiaa nojoricujani. ²¹ Cuno pojori, naa sacuaraatia miijia pueyaracaanu Pueyaso niqiarani, nojoriiri maja na niqiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacajuhuaaj. Nojori mashaasequenuusacari, puetunu sacuaraatia casaa miijioquiaajanaari. Jiyanoohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuaaj. Nijaniya saniniuuja cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiihtasano na quiniu quiniutianiya, pueyaracaanu rishijia na quiniuria shuquiriaatia.

²² Saniniuuja, paa jaara Pueyaso Sohuanu shanacure poojiajinia na poonijionurani, nojuajaari parta pueya panijia pa jiyateja. Poojia jiyateya shuquiriaatia quijiaari.

Poojia cajitijiaaariuhuj. Jacaria pocujara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequia, jiyanoojiano. Pa sequesano mijiara pa jiyatejajaariuhuj, pueya tiuuniuria pocua. ²³Pueyaso Sohuanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa mijiaca quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. ²⁴Seetanujuaaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuaanaano. ²⁵Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuaanaa pueyaracaanu na tojjijaca nia quiri cutara. ²⁶Majaari tama pa cuaqueyajaaja pa jiyaniniu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyani. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa mijiaca nia quiniu Pueyaso pueyanaa. Saaja maninia quijjaca pa quiri cutara.

6

Niarta Pueyaso pueyata nia cumaquitiooriquia

¹Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno nijaniyajinijinio canapuate Pueyaso Sohuanu niishitijaraca cutarani, nojori cuara jacaria na nacasuuranøj, sesa miiniu na tarinitianuhua. Cante cuno sesa mijiia nacasuyani, nojuaja cuara na nacasuura seetanujuaana na paniniutia narta pueyano. Naajuhuj, jiyanohua nia cojuare tama nia cuaqueyajaaja Sesaaca mariqui nia saniniujiurijiaariuhuj, sesa nia miiniurijuhuj. ²Maninia cutaraari nia cumaquitioojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutiani.

³Najuhuaa quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojuuaari tama na cuaqueya sapojijajaacujua. ⁴Puetunu nijaniyajanaa cumaati tama niishiriojuquiaajaacujua, taamueca pueyanote nijaniyani, maninia mijiia, sesa mijiia soj. Niaa jaara seetanujuaana maninia mijiaca quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia mijiia quiri nijaniyajiniji, socua sesa mijiia soj, niaara, naajaa. Maja cunora taraajenu, maja cunora shuquiriaatia quiniujuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵Puetunu pajaniyajanaari tamaatia poonijosano jitiiani. Tama nijaniyajajaaja cumaati na miiquiaa maninia, Pueyaso shuquiritianura nijaniya, seetanujuaanaa shuquiriaatia nia quiniuria.

⁶Canapuate Pueyaso rupaa niishitiojosaquiaani, cuno pojori cuara na niishitiojonaa niqutiojoora nojori casamijiniji saniniuuja, nojori niishitiojonaa jitianura nojori panishanojuhuaj.

⁷Pueyanaa, maja tama nia cuaqueyajaaja nia sapojonu nia jyanishacari niaari sanitiyoaquisaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori sanitiiojua cutara. Naaratej, nio miriqui sequesano nia niishiri: “Casaajau pa nataareni, paari juhua cuno jajau senoonutaniyajaaniuhuj”. Nio miriqui sequesanoori nio niishitiojija: cante maninia mijiiani, nojuajaari maninia miishaanutaniyajaacuhuj. Naajuhuj, cante sesa mijiiani, nojuajaari sesa miishaanutaniyajaacuhuj sesa na miiniucua. Cunoori maja rimijata. ⁸Naacuajitij, canapuate tama na cuaqueyajaaja shuquiritijaca sacuraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuuja, cante Pueyaso Sohuanu tojjijani, Pueyaso panishano na miiniuria puetunujuaanaa, nojuajaari pueyaracaanu rishijijara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹Cunora pueyanaa, niaa jaara maninia mijiaca quiri, majaari maninia miiniuria nia taajenu. Pueyaracaanu maninia mijiaca nia quiri. Niaacuajaari niishiya,

pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuaara sashiirajuhuj. Na nuhuaji cutara paari jiyanoohua shuquiriaatia quijiacara jiyatesaanutaniyani, maninia pa miiniuucua. ¹⁰ Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatascari na naajio

¹¹ Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiya tama cua juaashiquiatajaani. ¹² Socua cua tojiri pueyanaa. Cuno pojori, nia shiniujuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanoohua paniya nia cararaatiuuquia co miatesano pueya nia quiniuriajuhuaj, taa puetunu Judiocuacajanaacuaani. ¹³ Cuno pojori, canapue te na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitia nia cararaatiuuquia co miatesano nia quiniuriajuhuaj. Naa jaara miatesosaare, nojoriiri tama timiquionutaniyaaja, nojori tojtiajaca nia quiniuucua. ¹⁴ Janiya saniniujia, Pueyaso cuaara cojuaara janiya maja cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritianu paniquiaani, pocuara na cusonucua niyacutesanojinia. Naacuajitij, janiyari mijiria niishishanoocua jiaatiaashijia jatanishaaquiaarini. Mijiria casaari maja na naata shiniujiuniu janiya, nocua cua jiaatianura socua. ¹⁵ Pueyanaa, pa cararaatiuuquia co jaara miatesano quiri, naajaa. Naajuhuj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. ¹⁶ Puetunu nio sequesanoocua tiujujiaacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucujaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota niajaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitijanio. Cuaara naa quiriitej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo sarhuatasacari Jesucristo tojtijaca

¹¿Niaate quiyajaa cuarta Pueyaso pueyanaa? Janyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricujani. Niaacuara naajiyanjia, canapue Pueyaso saquiriojoquiaari tama neracujani, canapueete Jesucristo tojtianaacuajani. ²Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria njajaniya. Nojori cuaara cajitirira nioojia pueyaracaanujuhuj.

Taa Pueyaso miiquiaa pajaniyani Cristo rupuesano pa quishacari

³Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupeuuucua, Pueyasoori capora pajaniyara. Nojuajaari jiyanoohua maninia miiquiaa pajaniya, puetunu jiyocuacaanu na jiitiasano cumaacatajanaa. ⁴Pueyaso niishishacari taa Neyanu miiniutianiya pocuarani, jiya shipiniyaquishacarijia, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaarijiaariuhua na tojjiaca pa quiniuria, tojetaarucujanaa sesa miyashijia pa quiniurajuhuj. ⁵Panjia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacuajani. ⁶Jiyanoohua maninia na panishano Niyanuniyotia miiniucua pocuara, nojuajaari pueyaracaanu jiyanooquiaa pajaniya. Nojuajaari jiyanoohua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. ⁷Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitonu quiniutianiya pajaniya. Puetunu sesa pa miishanojinijianaa pa jiyanooquiaariiri. ⁸Pueyasoori na paniniu niishitiquiaari pajaniya, na niquitiosacari na niishitijia pajaniya, puetunu casaa niishijiajanaa pa quiniuria. ⁹Nojuajaari jiyanoohua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuuja, nojuajaari jiyasohua na miini panishano niishitiquiaari pajaniya. ¹⁰Pueyanaa, nia niishiri casaa Pueyaso miiniutianiyani. Nojuajaari Cristo jiyatenutaniya Jiyaniijiajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricujani.

¹¹Pueyasoori tariucuaaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaanaari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miini paniquiaaricujani, niishijia na quiniucua. ¹²Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinjio pueyani, canaari co-teenujuanaa Jesucristoocua tiuquiarini. Naa jiyanoohua maninia Pueyaso miiniucua canaa, nojuaja cuaara maniniuhuaqueetaasaria jiyanoohua. ¹³Quiari naataja nia tojishacari Jesucristo rupaa, niaari cunoseetanu rupaacuajanaa tiuquiarijuhuj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupeutequiaari. Na Sohuanu niquitioquiaari njajaniyajaariuhuj taa na sequequiaaricujani. Naacuaji niishishaquiaari, niaari seetanujuanaa Pueyaso muerasu. ¹⁴Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranujuanaa masenutaniya Neyanutajuhuj. Pueyaso Sohuanu pa jiitiasacari, paari niishiyani, Pueyasoori pa rijionutaniya puetunu na saquiriojosano pueyatjanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niquishaanurajuhuj. Cunora, Pueyasoori jiyanoohua maniniuhuaqueetasano quiniutianiya, jiyanoohua maninia na miiniucua pajaniya.

Taa Pablo secojoquiaari Pueyaso pueyacuarani

¹⁵ Janiyari nijaniyajiniji tojiriucuaani, taa pa Jiyaniijia Jesuucua tiujujaca nia quiyani, taa parta Pueyaso pueya panijiaci nia quiyajaaniuhuj. ¹⁶ Cunora, pueyaracaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniuucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura nijaniya jiyocuacaanuji niishitajia. Naacuaji nia naata niishiniu na niishitiniu panishano nijaniya, maninia nia niishiniuria nojuajuhuj. ¹⁸ Janiyari niaacuara secojoquiaajaanuhuj, Pueyaso cuaara cuhuataara nioojia, maninia nia niishiniuria casaara Pueyaso saquirojoquiaari nijaniyani, casaa na miinitianiya naarajaniuhuj. Janiyari niaacuara secojoquiaajuhuj, maninia nia niishiniuria taa Pueyaso muerasu jiyatesaanutaniya shacantuuca quijiaci nojori quiniuriani. ¹⁹ Janiyari secojoquiaajuhuj, Pueyaso cuaara niishitiria na cumaaca nijaniya, cuno, nioojiajinia poonijiyani. Na cumaacaari jiyanhua, puequeyashijia. ²⁰ Pueyasocujaari cuno na cumaaca poonitijioquiaari Cristo quetejinia, nojuaja jaara na samiitianiquiaariuhua macujiniji. Jaara na samiitianiquiaari, cuno na cumaaca na cajitiquiaariiri Jiyaniijiajanaa cajitujinia na miaquetajara jiyocuacaanu. ²¹ Tii na cajitiquiaariiri puetunu tamasaca cumaacaraca quijiaci Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasaca jiyaniijanucujanaa Jiyaniijia. Puetunu mijiria quijiaci jiitiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianiyajuhuj, taa quiarijia na quiyacuajani. ²² Naacuajitij, Pueyasoori puetunu na shipinishanojuanaa jiyatequiaari Jesucristo jiitiasocoriquiano. Naajuhuj, Pueyasoori Jesucristo jiyatequiaari na saquirojosano pueya jiitariquiano, canapue te nocua tiujujacacuajani. ²³ Pueyaso saquirojosano pueyari juhua Jesucristo cuaqueya. Nojuajaari juhua poojia saninuujia, pa jiitiana na quishacari. Puetunu Pueyaso saquirojosano pueyajanaa jaara Cristo cuaqueyajinia rupuetesaare, Cristo cuaqueyari tucuateenutaniya seetanujanaa maninia jeecanamitishano na quiniuria. Na cuaqueya pa quishacari, nojuajaari puetunu poojiajinijanaa quiya. Naajuhuj, nojuajaari puetunu tiquiyocujanaa quijiajuhanajaj.

2

Panijia Pueyaso quiniuucua, nojuajaari pa jiyanooquiaari

¹ Sesa miijiaca nia quiniuucua tarijia, Pueyaso tojiyashijiacajuhuj, niaari macunucua quijia Pueyasora. ² Naa jaara naa sesa miijiaca quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruhua jiyaniijia tojiijiaci quiquiaari, cuno, paratu piyarojosaqi quijiani. Nojuajaari Pueyaso tojiyashijiaci shiniujujia, nojori miiniuria sesa, taa Sesaaca seque paniyacuajani. ³ Tarijia, puetunu pajaniyajanajanaari Pueyaso tojiyashijiaci quiquiaarini. Paari tama pa miiniu panishanojuaja miijiaca quiquiaarini. Naacuajitij, paari puetunu pa cuaqueya miiniu panishanojuanaa miijiaca quiquiaarini, puetunu sacuarataa pa niishiriojosanojuhuaj. Naa sesa miijiaca pa quiniucuatej, paari tojetaarucujanaa jiyanhua Pueyaso saniitiosocoriquiano quiquiaari juucuanu, juhua tamasacajuhuj. ⁴ Saninuujia, Pueyasoori pocua taraajeja cutara. Jiyanhua pa paniquiaariiri. ⁵ Cunora, macunucua pa quishacarijia nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jiyanootio Pueyaso quiniuucua, nojuajaari nia jiyanooquiaari. ⁶ Naa na samiitianijionuucua pajaniya Cristooocua pa tiuuniucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. ⁷ ¡Naa Cristota na cojiritianuucua maninia miiniu pajaniyatej, cunoori jiyanhua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanhua pa panijia. Maatia niishishaanutaniyari Pueyasoori tojetaarucujanaa jiyanootio cutara, na jiyanooniucua pajaniya, Neyanuucua pa tiuuniuucua. ⁸ Naa Pueyaso quiniuucua jiyanootiotete, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanootiniu quiquiaari tama nijaniyajaaja. Pueyasojuanaacuajaari nia jiyanooquiaari niaacua na

taraajenuucua. Naajuhuj, nojuacuajaari nia tiutuquiaari Neyanuucua. ⁹Majaari Pueyaso jiyanooni quiquiaari pajaniya, maninia mijiaca pa quiniucua. Paa jaara maninia pa miiniucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiarení juhua najuhuaana pocuaja. ¹⁰Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia mijiaca pa quiniuria. Nojuacuajaari tari naa niishiriojoquiaari, maninia mijiacara na jataniniuria pajaniya.

Jesucristoori pa jiyateja jiyanootiojuacara

¹¹Éfeso tiacajinia quinaa pueyanaa, quiarijia nia niishiriohua taa nia quiquiaari tariucuaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniucua. Canaa cutaraari canaa cararaatiuuquia co miatesanoni. ¹²Nia niishirijuhuj, naa nia quishacaritij, niaari Cristooju quiquiaari. Majaari nia naata rupueno quijia Pueyaso saquirojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia niishini quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiuria nijaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasoju quiquiaari mijiria. ¹³Tarijia, niaari seetanujuanaa tucuaaanu quijia quiquiaari Pueyaso-jiniji. Quiarijia saniniujia, Jesucristo shootenuucua na nanaca niyacutesanojinia, niaari nata rupuetootesaquiaari, nocua nia tiuushacari. Naacuajitij, niaari canaa rupuejajuhuj. ¹⁴Cristocuajaari pa jiyanootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupenura canaajuhuj, taucuaca nia quiniucua. Jesucristocuajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, nijaniya taucuacanio. ¹⁵Naa pa niti Jesucristo cusonuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaraanu paracaatiooju quijiani. Quiarijia saniniujia, Jesucristo cusonuucua, nojuajaari pa jiyanootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, nijaniya taucuaca, canaajuhuj. Naacuajitij, Jesucristoocua pa tiuushacari, paari juhua niquiriyatu tiaca nerani.

¹⁷Nijaniya taucacanaa, niaari juhua tucuaaanu quijia quiquiaari Pueyasojiniji. Canaa cutaraari juhua cateca quijia nojuajinjini. Jesucristoori mijiria niqiaari, na niishitiniuria puetunu pajaniyajanaa taa Pueyaso jiyanooni pania pajaniyani. ¹⁸Cristo jiyanootiiniucua na Que Pueyaso pajaniya, naacuajitij, pa naata pa Que Pueyaso rupueno pa secijosacari nojuaja, mariyata na Sohanuraca pa quishacari, nijaniya, canaajuhuj. ¹⁹Jesuucua tiuujiaca nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinjini ruconaa. Quiarijiani, niaari seetanujuanaa Pueyaso pueya cutara. Pueyasoori maninia nia jiitaajuhuj, taa na jiitiaquiaa puetunu na saquirojosano pueyacuani. ²⁰Pueyaso pueya nia quiniucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiunaa pueyani, nojoriiri juhua cuno tia pacaariana. Saniniujia, Jesucristoori juhua cuno tia morijujanaa cutara, cuno tia nujuatana. ²¹Pueyasoori naa saquirojoquiaa Neyanuucua tiuuriquiano pueya, na quiquiorano na tucuatnura. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijaara. ²²Niaari naajuhuj, Cristo nia rupuesacari, niarta Pueyaso pueya nia rupuesacarijuhuj, Pueyasora, niaari juhua riana, tucurumio. Nojuajaari nia morojotaquiaa na tia na tucuatnura, na Sohanu quiquiorano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatanuucua niarta taucuaca, janiyari cunora nujuate-sano quiya nujuatejojuajiniani. ² Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quini-urijahuaj. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuj, taa na jiyanooquiaacuaa Judiocuacani. Pueyasojuaanaacuajaari naa jiyasohuaja na miiniu panishano cua niishitiquiaaritij, taa shusha nio cua naajio cotee-jajinia cua pohuataa nijaniyacuajani. ⁴ Niaa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanhua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuacani. Na sequenu panishano caminiujuunia pueya na niishitiquiaariijaariuhuj. Pueyaso Sohanucua-jaari cuno canaa niishitiquiaari. ⁶ Nijaniya taucuacanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniuucua, Pueyasoori puetunu Judiocuacarano na sequesanojuanaa jiyatenutianiya niaarajuhuj. Canaari Judiocuacani. Naajaa, Jesucristoocua nia tiuuniuucua, Pueyasoori canaa ruquetequiaa nijaniya, juhua niqiriyatu pueyano pa quiniuria nera. Naajuhuj, cunora, Pueyasoori nia niqitiquiaa na Sohanujuhuj, taa na sequequiaari Neyanu Jesucristoocua tiuujiacuajani.

⁷ Janiyari Jesucristo ruuretaja quiquiaarini. Naajaa, jiyanhua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniuucua tarjia, janiyara, janiya cuara socua rerequetesano pueyano quiiria miishacari cuarta Pueyaso pueyajinijijanaa. Saniniuujia, jiyanhua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupajaanaa Neyanu Jesucristojiniji pohuatana cua quiniuria taucuacana. Janiyari cunora Pueyaso shuquiritiaa jiyanhua. Cristo jiiitasano pajaniyaranoni, puetunu cuno casaajanaari pa niishishoojua. ⁹ Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyaracaanu tama na niishitajajinia-jaaja. Saniniuujia, nio pa quishacari, nojuajaari na niishitiquiaari. Quiarijiani, jiyanhua maninia Pueyaso miishacari puetunu na saquiriojosano pueyajanaa, puetunu jiyocua-caanu cumaacaraca quijiacajanaari niishiya, Pueyasoori seetanujuanaa jiyanhua niishijia cutara. Naacuajitij, Pueyaso seya, Satanás, samaruhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriojosano tohuteequiaari pa Jiyaniijia Jesucristo cusosacari niyacutesanojinia. ¹² Naacuajitij, Jesucristoocua pa tiuuniuucua, pa naata juhujaniya rupeenu na Que Pueyaso pa puereyaquiniutia. ¹³ Naa Pueyaso miiniuucua pajaniyatej, majaari nioojia nia niqijiotenu Pueyasooquaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiiri juhuari. Naa naquiya cua miishacaritij, cuno cuara shiniujuuria nijaniya, socua pa Jiyaniijia tojjijaca nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucujuhuj, janiyari mojuquetaquiaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesaatiacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuaanu quiniaa Pueyaso muerasunio. ¹⁶ Naa nia Que na quiniuucujuhuj, janiyari niaacuara secojoquiaani, nojuaja cuara cumaquiria jiyanhua nijaniya na

Sohuanuta nioojiajinia. Na Sohuanuuri puetunu pa panishanojuanaa jiiitiana. ¹⁷Naajuhua, niaacuara secojoquiaanijia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujiaca nia quishacari. Naacuajitij, niocua niishiri taa Jesucristo paniya jiyanhua nijaniyani. Naacuajitij, majaari nioojia nia niqijiotenu quiniutianiya socua. ¹⁸Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhua, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. ¹⁹Seetanujuanaa, majaari pa naata niishiniu taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijiaa quiniutianiya taa Pueyasocuaani.

²⁰Naa Pueyaso miiniuucua maniniatej, nojuaja cuara shuquiritiasaaria. Naa jiyanhua na cumaacata na poonijiosacari poojiajiniatej, nojuajaari na naata miiniu socua jiyanhua queraatia pa masesanoinijini nojuaja, pa niishiriojosanoinijinio. ²¹Puetunu quijiacajanaa cuara niishiiria Pueyasoori jiyanhua maninia. Nojori cuara naa niishiiria nojori niqishacari Pueyaso jatanishano na saquiriojosano pueya, Jesucristo miishanonio. ¡Cuaara naa shuquiritiasaaria pueyaracaanutej!

4

Pueyaso Sohuanu pa jiiitasacari, paari rupuetootesano quijiani

¹Janiyari niya nujuatesano quiyani pa Jiyaniijiajiniji cua poojotanuuca. Cunora, cua tojitiare. Janiyari nia sequeyani, saaja pa Jiyaniijia tojjiaca nia quiri, seetanujuanaa maninia na muerasu nia quiniuria. ²Majaari niarta Pueyaso pueya rerequetejaca nia quiniu. Maninia miitiojuaca nia quiriqia. Puetunu casaajanaa rejeretajaca nia quiriujuhua. Naa jiuujiaatoojuaca nia quiri nia panitiosacari. ³Naa Pueyaso jyanootootesacari nijaniyatej, pueyaracaanu nia jyanootoore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari nijaniya. ⁴Naa quijiaa nia quiri pueyanaa, niquiriyatu cuaqueyaraca pa quishacari pa Jiyaniijia, mariyata niquiriyatu Sohuanuraca pa quishacarijuhua. Naa Jesucristoocua tiuujiaca pa quishacari, Pueyasoori puetunu pajaniyajanaa rijionutianiya, pueyaracaanu na shuriucua pa quiniuria. ⁵Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhua, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhua, puetunu pajaniyajanaari moojinia tiuquiniijosaaquiarini, Jesucristo pa jiyatesacari pa Jiyaniijia. ⁶Naajuhua, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷Saniniuujia pueyanaa, puetunu pajaniyacuaajaari tari jiiitaa tamaatia poonijosano pa miiniuriani, teyano Cristo niqitionu paniquiaari pajaniyacujani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. ⁸Tariucuaaanu Pueyaso Rupaa naajiotasanoinijini, paari niishiyani Pueyasoori na Sohuanu niqitionu paniquiaari na pueya. Cunora naa sequeya Jesucristojiniijiri: “Na quioosano pueya tacataquiaarihua jiyocuaaanuuri. Nareja na niqitionu panishano casaa serotaquiaari na pueyari”.

⁹Jaara sequeya “tacaquiaarihua”, cunoinijini paari niishiyani nojuaja jiyocuaaanuji rosequiaari coeteenu, taraatia mijiria na mosaanura pocuara. ¹⁰Nojuajani, jiyocuaaanuji rosequiaarini, nojuajaari tojetaarucujanaa jiyocuaaanu tacaquiaarihua, Jiyaniijiajanaa na quiniuria na Que shuriucua. Tacaquiaari puetunu jiya cajiniocujanaa na mishininiuria na cumaacata, puetunu jiyajanaanio. Naacuajitij, nojuajaari puetunu tiqiyocujanaa

quijia. ¹¹Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasa jiyatequiaari Pueyaso sequenu panishano caminiujunaa nojori quiniuria. Saniniuujia, tamasa jiyatequiaari-iri Jesucristo niishiyashijia niquiara poojotanaa nojori quiniuria, Pueyaso jiyanooniuria nojorijihuahaj, Jesucristo nojori tiushacari. Tamasa jiyatequiaari na tojtiajaca pueya jitianaa nojori quiniuria. Tamasa jiyatequiaari na rupaa niishitiojona nojori quiniuria narta Pueyaso pueyara. ¹²Naacuajitij, Jesucristoori na Sohuanuta cumaquiquiaa cana na panyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuniuria nocua, nojori cumaquishaanurajuhaj. Naa Jesucristoocua tiuujia pueya canesacari socuatej, Jesucristo cuaqueyari canequiaa. ¹³Jesucristora poonijona pueyari na poonijioquiatej, paa cuara tojetaarucujanaa pa Jiyaniijia tojijia quirijiaatijia, juhua rupuetootesano pa quiniuria. Cristo pueyari na poonijioquiaa Pueyaso Sohuanu cumaacata, paa cuara seetanujanaa Pueyaso Niyanu niishijia quirijiaatijia. Naacuajitij, paari tojetaarucujanaa jeencuasano quiniutianiyani, seetanujanaa juhua Jesucristo pa quiniuria. ¹⁴Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niquijotejajaariuhaj. Naa juhua tariucua cumueeca mashaja pa quishacaritij, majaari quenaaja tamasa naata sapojonu quiniutianiya pajaniya, tamaatia nojori niishitiojosana. Cuno nojori na tamaatia niishitiojonuujaca tariucua pa niishishanojinijini, nojoriiri jiyanojua sapojonu niishijia, nojori tojtiajaca na tashuquiootenura Pueyasojiniji. ¹⁵Nocujia pueyanaa, Pueyaso Rupaata pa cumaquiojore seetanujanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶Pueyanaa, niaacuajaari niishiya, puetunu pa cuaqueyajiniacuma casaa pa jitiananojuanaari maninia rupuetootesano. Puetunu cunujanaa jaara maninia poonijioquiaa jatiqui, paari maninia quiyani. Pueyaso muerasuri juhua pa cuaqueya jitianano casaa. Naacuajitij, puetunu Pueyaso muerasujanaa jaara tama na poonijiosanojuaja miiquiaa maninia taa pa Jiyaniijia panyacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujanaa panitiojuaca pa quiniuria.

Cristoocua tiuujiaari quiarinio pueya

¹⁷Jesucristo jiyaramiquishano pueyano cua quiniucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijia pueya quiyacuaani. Nojoriiri najuhuaa quijiaa, najuhuaa nojori niishiriojonuucua. Naajuhaj, nojoriiri tama na panishanojuaja miijiaa, najuhuaa casaacua nojori jiatianuucua. ¹⁸Nojoriiri na quijiatej, juhua ninishiqui nojori niishitija quiniucua. Nojoriiri seetanujanaa niishiyashijia, nojori tojiaquiniucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaa nojori quiniuria. ¹⁹Naa pueyaracaanu sesa nojori miijionuucuatej, nojoriiri maja tari na niishiniu caririqiniyu, sesa nojori miishacari. Nojoriiri puetunu tama na miiniu panishanojuaja miijiaa. Nojoriiri puetunu sacuraatia casaajanaa miiniucua jiyartucono. ²⁰Niajaniya saniniuujia, majaari naa nia niishitiojosaanu quiquiaari Cristojiniji, naa sacuraatia miijiaa nia quiniuria. ²¹Niaa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia miijiaa nia quiniuria, sesa nia miiniu nia tarinitianurajuhaj. ²²Pueyanaa, pa toque mocua jaara mocuaatia jaanure, paari ritia na jocujani. Naa nia jatarejuhua sacuraatia miiniu nia niishishano. Sesa nia miiniu panishanoori tama nia sapojuquiaarijaaja naa sesa miijiaa nia quiniuriatej. ²³Quiarijia saniniuujia, sesa nia niishitija nia jatara, maninia niishitajaraca nia quiniuria, maninia jiuujiaracano. ²⁴Seetanujanaa juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio jiuujiaraca nia quishacaritij, seetanujanaa juhua Pueyaso pueya nia quiri, maninia miijiaa, tojetaarucujanaa

sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

²⁵ Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano quiriia seetanujuanaa.

²⁶ Niaa jaara juaatishaare, tama nia cuaqueyajaaja nia cojure maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. ²⁷ Ritia nia jeecatoore, Sesaaca mariqui sesa nia miitiriiri nia jiyanoyaquishacari.

²⁸ Nio nia tojirijiuhuj. Cante nohuasejovia quiyajaani, cuara tarinitiaara nohuasejonu. Saniniuujia cuara poonijioora tama na numatucuatajaaja cutara. Naacuajitij, nojuaja na naata na jiiitiasanojiniji nareja niqutionu tamasaca, cante na panishano jiiitaaquiyani.

²⁹ Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasanujuhuj. Naacuajitij, nia naata nojori shiniujiumiu saaja Pueyaso tojjijaca nojori quiniuria. ³⁰ Majaari sesa miijica nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocujaari juhua na sesa naajiotaquiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiritiosano pueyani.

³¹ Pueyanaa, majaari jiyanoyashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. ³² Saniniuujia, maninia miitiojuaca nia quiri. Taraajetoojuaca nia quiriujuhuj. Naajuhuj, jiyanoootiojuaca nia quiriujuhuj, taa Pueyaso jiyanooquiari pajaniyacuaani, Neyanuucua pa tiushacari.

5

Seetanujuanaa juhua Pueyaso pueya nia quiri

¹ Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri. ² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanohua sacuaraatia Pueyasora. Majaari quenaaja jiyano sacuaraatia casaajiniji nia pocojonu. Naajuhuj, majaari tamasaca jiiitiasanoocua jiaatiajaca nia quiniu. ⁴ Majaari najuhuana sacuaraatia pocuajaca nia quiniujihuj. Majaari najuhuana nia niti nia taquiriocratenu juhua maninia pocuaja. Naajuhuj, majaari sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocojore cutara Pueyaso miishanojiniji, socua pueya maninihuaqueetanura Pueyaso. ⁵ Niaacuajaari tari niishiya, cante juhuajaniya na camishoo maajipohua numuetucujuani, maajishuriuhuanu, nojoriiri jiyanohua taraatia quiniutianiya. Pueyaso jiiitiasano na tojjijaca pueyaranoni, majaari na quiniu quiniutianiya naa miijica pueyara. Naa taraatia miishaanutaniyajaariuhua puetunu tamasaca jiiitiasanoocua jiaatiajacajanaa. Pueyasora, jiyano pueyari jiyanohua sesa, juhua juaashiquiata shipinijiosano pueyasohua secojonuujuaca. ⁶ Naacuajitij pueyanaa, majaari nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocujaari juaatishaare. Tari saniitioya na tojiyashijiaca pueyari. ⁷ Cunora pueyanaa, majaari quenaaja naa sacuaraatia miijica nia cojinu.

⁸ Pueyaso niishiyashijiaca nia quishacarijia tarijia pueyanaa, niaari ninishiqui quijiaca quiquiaari. Quiarijia saniniuuja, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaci nia quiri, juhua cuhuashiqui quijiaca. ⁹ Paa jaara seetanujuanaa cuhuashiqui quijiaca quirini, paari maninia miijiaci quiniutianiyani. Naajuhuj, paari tojetaarucujanaa sesa miyashijiaca quiniutianiyani. Paari seetanujuanaa Pueyaso Rupaa tojijiaca quiniutianiyajuhuj. ¹⁰ Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori miijosano sacuraatiaari tojetaarucujanaa jyanohua cararaatia. Puhuataaquishoo. ¹³ Saniniuuja, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacujajari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuaaanu Pueyaso Rupaajinia: “¡Maqueyanonaa, quia niucure! ¡Macunucua tajiniji quia sanere, Pueyaso Jiyarosano cuhuatanura quiajanial!”

¹⁵ Naacujitij cua panishano pueyanaa, tama nia cuaqueyajaaja nia cojuare jyanohua, seetanujuanaa maninia miijiaci nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaci nia quiniuria. ¹⁶ Nio pa quishacari, sesa miiniuuri socua caneya puetunu juucujanaa. Majaari pa niishiniu taate tariqui quiniutianiyani. Naaratej, jaara pa naata quiriquia maninia pa miiniuria, maninia pa miiri puetunu juucujanaa. ¹⁷ Majaari moseca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhuj, majaari nia mashaesequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaj. ¹⁹ Naa Pueyaso Sohanuraca nia quishacaritij, tariucuaaanu Pueyaso Rupaajinia naajiotasanojiniji jaaquequejonu nia naminiujitioore. Naajuhuj, quiari naataja Pueyaso Sohanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritari puetunu nioojiatajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaci nia quiniucua.

Taa quijia pa quiyani Pueyaso tojijia pa quishacari

²¹ Pueyanaa, maninia nititiojuaca nia quiri, taa pa Jiyaniijia Cristo paniyacujani. Nojuajaari pa Jiyaniijia cutara.

²² Maajipohuanaa, nia niyaca tojijiaca nia quiri, taa pa tojiquiaa pa Jiyaniijiacuaani.

²³ Nia niyacaari juhua nioojia quiya niaara, taa Jesucristo quiya na saquirojosano pueya jiuujiacuaani. Nojuajaari pocuaji Tacuna, juhua na cuaqueya pa quiniucua nera.

²⁴ Naacujitij, taa Jesucristo saquirojosano pueya na tojitijaca quiyacuaani, maajipohua cuaraa naa pueyaracaanu neyaca tojitijaca quiriujuhuj.

²⁵ Canuunaa, nia niquiocohua nia paniri taa Jesucristo na saquirojosano pueyarano paniquiaaricuaa jyanohuani. Nojuajaari cunora tama na cuaqueyajaaja tarinitiaquiaari na mosaanura. ²⁶ Nojuajaari naa miiquiaariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucujanaa tari jeequejosano quirini, pa Jiyaniijijajanaari pa tiuquinitianutaniya tama nocujajaaja, tariucua jatanishano shacantuucara. Jiyacaritij, paari tojetaarucujanaa sesa miyashiji quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano niyacoo, tojetaarucujanaa jyanohua cohuajaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri nia niquiocujuhuj. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja.

Paacujaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuani. ³⁰ Puetunu na saquiriojosano pueyajanaari juhua na cuaqueya nera. Paacujaari na cuaqueyajinijini. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuanaacujaari pa niishitiojoquiaari, pueyanoori juhua niquiriyatu cuaqueyaraca quiija jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuaari juhua pa Jiyaniijia niquirorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhuj, puetunu maajipohuajanaa cuaara neyaca tojjiaa quiriira.

6

¹ Muerasunaa, pa Jiyaniijia tojjiaa nia quishacari, nia queya tojjiaa nia quiriijuhuj. Niaa jaara naa miiritij, cunoori jiyanhua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjiaa nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujanaa rootasano tee Pueyaso sequeyacuajani taa na tojtiajaca na miiniutianiya maniniani.

⁴ Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Nia niishitijiore maninijuhuj. Nojori nia nacasurejuhuaj. Jaara nia tojtiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojtiajaca nia quiri. Majaari nojori nia rerequetenu. Puetunu nojori sequesanojuanaa nijaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niqushacari nijaniya, nojori shuquiritianura nijaniya. Maninia nia poonijiore pueyaracaanu puetunu nioojiatajanaa, seetanujanaa juhua Cristora. Niaa jaara naa maninia poonijionuujuaca quiriqiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutianiya maninia pa miiniucua mijiria, poonijiotasano pueya, camarnuuju pueyanio.

⁹ Niajanijuhuj seya jiitijacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijuhuj, niaari mariyata niquiriyatu Jiyaniijiaraca, nijaniya, nojoriijuhuj. Nojuajaari jiyocuacaanu quiija. Naaratej, tamonu pueyanoori maja rimiajata nera, narta pueyanojiniji.

Taate pa naata Sesaaca nujuatanuni

¹⁰ Quiarjia cua panishano cuarta Pueyaso pueyanaa, seetanujanaa pa Jiyaniijia rupuejaca nia quiri, jiyanhua cumueeca nioojia quiniuria jiyanhua na cumaacata. ¹¹ Puetunu Pueyaso niqutiosano casaajanaa nia cushiyore juhua toqueya, Sesaaca sapojiyaquiniucuaaji nijaniya. ¹² Pueyaso pueya pa quishacari mijiria, majaari pa quiaquetojonu quiquiaa pueyanota. Pa coopueeri maja pueya. Nojoriiri cumaacaraca quiijaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quiijaca pueya nojori jiitianura.

Nojoriiri Pueyaso paraajuhujaj. ¹³ Naaratej Pueyaso pueyanaa, puetunu Pueyaso niq-uitiojosanojuanaa nia paracata nia miaquetoojotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari nijaniya. Naa jaara naa nioojia jeenucuare juhuacarijia puetunu Pueyaso casaatajanaatej, niari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiy-onuujaari, puetunu na jiriqiuajanaa na mishiquiojonura cashiicuaji. Naajuhujaj, na sapatuhua cushiyonuujaariuhujaj. Na nareenee pootujuaari, nocuaji na nujutajara cashi. Naajuhujaj, na naca na cojuatajara, cumoco casaa cushiyonuujaari. Na nijiniaquetucua mueruu pootujuaariuhujaj.

Pueyaso pueya pa quishacari saniniujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniujia. Pueyara-caanu maninia miijiaca nia quiri, nioojia nia cojuanura Sesaacaacuaji, nojuaja mariqui nia cararoreeri nia jaara sesa miiri. Cunoori juhua nia turtuconee nia cushishano. ¹⁵ Pueyaraaanu jeenucuasano nia quiriqia juhua tariucua sapatu cushinio. Naa tariucua pueca nia quiriqia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panijajuhujaj. ¹⁶ Naajuhujaj, pueyara-caanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasooacuaji. Naajuhujaj, Pueyaso Rupaa nia niishiri maninia. Cunocujaari Pueyaso Sohuanu nijiniaquetucujua mueruu, pueya jiuujiajinia na poonijonura. ¹⁸ Naajuhujaj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriqia pueyaracaanu, naajuhujaj, na Sohuanu niishitishacari nijaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriqia puetunu niarta Pueyaso pueyacuarajanaa. ¹⁹ Naajuhujaj, cucuara nia secojonuure, Pueyaso niqutionura janiya na niishitija, maninia cua pohuatanura Jesujiniji cua puereyaquiniutia. Cucuara nia secojorejuhujaj, maatia cua niishitiniuria pueya, Pueyasoori puetunu pueyajanaa jiyanooni panija saaja Jesucristoocua nojori tiuushacari. ²⁰ Pueyasojuaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹ Pa panishano Tíquicoacuajaari niaacua quianutaniya, puetunujuanaa na pohuatanura janiyajiniji, naajuhujaj, casaa cua miyani. Nojuacuajaari shamaatia poonijojua pa Jiyani-ijia. ²² Jianiycujaari cunora niaacua na jiyaroyani, nioojia nia cumanijanura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuaara nia jiyateera panitiojuacarajuhujaj, seetanujuanaa Jesucristoocua tiuujia nia quiniuria-juhujaj. ²⁴ Naajuhujaj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiiriaatija nojori quiniuria, cuno pojori, canapuate seetanujuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹Janiyari Pabloni. Janiyari Timoteota nia saruhuataani, Filipino tiacajinia quiniaa Pueyaso pueyanaa. Canaari Jesucristo poonitijosano pueyajuhuj. Canaari nio naajiyani puetunu Pueyaso jatanishano pueyacuaraanaa, nojori tiuuniucua Neyanu Jesuucua. Canaari cuniqui nia jitianaa pueyacuara naajiyajuhuj, nia cumaquiniaa pueyacuaranio. ¿Niaate maninia quiyajaa pueyanaa? ²Pa Que Pueyaso, pa Jiyaniijia Jesucristonio, nojori cuara cumaquiiria nijaniya na Sohanuta. Nojori cuara cajitiiria nioojiajuhuaj.

Pablo secojoso, Filipino tiacajinia quiniaa Pueyaso pueyacuara

³Pueyaracaanu cua niishiriojosacari nijaniya, janiyari pa Pueyaso sequequiaani “paacarasho”, maninia na muerasu nia quiniucua. ⁴Cua secojosacari, janiyari pueyaracaanu puetunu niaacuaraanaa cua shuquiriniutia masequiaa Pueyasoni. ⁵Niaa jaara shushajanaa Jesucristoocua tiuquuaari, niaari jiyacari coteequiaari cua naacunura, Jesucristojiniji cua poojotanura tamaquicua. Quiarijiani, niaari naa cua naacuyajaaquij. Janiyari cunora nia timitiaani. ⁶Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuaani, nojuajaari naa nia jeenucuanu tucatanutaniya, Jesucristota pa naacuneetoosacariuhua. ⁷Majaari cua jiyajenenu naa cua taacanuayaquishacari niaacuaji. Janiyacuajaari tari naa niishiyani, jiyanoohua cua paniniucua nijaniya. Naajuhuj, niaari cua cojiritiasaaquiaa cumaaca niquitiosaanujuhuj. Naacuajiti cua naata Jesucristojiniji pohuatanu niya nio nujatejojuajinia, naajuhuj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jiyanoonuijuhuaj. Naa nioojia rupuesacari coojiatej, cunoori jiyanoohua cua shiniujuquiaa Jesucristojiniji cua pohuatanura. ⁸Pueyasocujaari niishiya taa cua paniya jiyanoohua nijaniyani, Jesucristo paniniu cua jiiitiasacari coojiajinia. ⁹Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jitianurajuhuj, seetanujuanaa maninia panitiojuaca nia quiniuria. ¹⁰Naacuajitij, niaari niishiniutianiya teyano casaate seetanujuanaa maninia niaarani, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia mijiaa quiniutianiya, tojetaarucujanaa sesa miyashijiaca. ¹¹Naacuajitij, puetunu maninia nia miishanojuanaa Jesucristo cumaquishacari nijaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniucua, pueyari Pueyaso timitianutaniya.

Pabloori saaja Jesucristora quiniu panijia

¹²Cuarta Pueyaso pueyanaa, majaari cucua nia taraajenu nujatejojuajinia taraatia cua miishacari. Nio nia niishiri cutara: nujatejojuajinia nujatesocoriquiano cua quiasaanucua, naquiya cua miishacarijuhuaj, cunoori seetanujuanaa pueya naacuya Jesucristojiniji tojishaanura socua. ¹³Naacuajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanucua. Majaari saaja soldadohua niishiniu cuno, mariyata puetunu pueyajanaari na niishiyajuhuj. ¹⁴Parta Pueyaso pueyari namitia niishiyajuhuj, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujiurucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiushacari socua.

¹⁵Seetanujuanaa, noojiaqueya nojorijinijinioori Cristojiniji pohuatanuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pohuatanuquiaa nojori

shuquiriniuria Pueyaso. ¹⁶ Nojoriiri naa pohuatanuuquiaaquij, Jesucristo panijiaca nojori quiniuucua. Nojoricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji. ¹⁷ Tamasacaari saniniuujia Jesucristojiniji pohuatanuuquiaacuaja nojori shocotanu paniniutia janiya. Naa nojori miishacaritij, nojoriiri socua cua tacaatinu pania juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. ¹⁸ Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuuquiaa. Janiyari cunora shuquiriaatia quiyani.

¹⁹ Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maniniaraja. Naa miiniutianiyari nia seconuunuucua cucuara, naajuhuj, Jesucristo Sohuanu cumaquiniuucua janiya. ²⁰ Naacuajitij, janiyacujaari Pueyasocua tiuyani, nojuajaari cua cojuanutaniya maja cua cararoy-aquishaanura janiya jaara nequesoreesaareni. Janiyari Pueyasocua tiuyajaanuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquijuhuj, naajaa, janiyari jiyanojua paniani cua Jiyaniijia Jesucristo timitiasaanura. ²¹ Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquajani, cua naata socua poonijionu cua Jiyaniijia. Naacuajitij, quiarijia, majaari cua naata saquiriojonu; rishiniu, shaajenu soj. ²³ Naaratej, janiyari coojia niquijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maniniaruhua mijiria cua rishiniuraja, pa Jiyaniijiaacua cua shiniujuniuria socua nijaniya. ²⁵ Naa cua niishiriojosacaritij, janiyacujaari tari seetanujuanaa niishiyani, janiyari juhuanujuaja mijiria niaata rishiniutianiyani. Naacuajitij, cua naata socua nia naacunu, socua pa Jiyaniijiaacua nia tiuniuria. Cua naata nia naacunujuhuj, socua shuquiriaatia quijaca nia quiniuria nocua nia tiuushacari. ²⁶ Naa cua rishishacari mijiriatej, janiyari niaacua quianutaniyani cua niquiniuria nijaniya. Naa cua quishacariuhua niaatatej, niari Jesucristo timitianutaniya maninia na miiniuucua janiya.

²⁷ Pueyaso pueyanaa, nio nia sequenu panianijia, seetanujuanaa maninia miijia nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijayanijiniji pohuatasariquiani, taa jiyanojua Jesucristo tojjia nia quiyajaani, jiyanojua panitiojuacajuhuj. Naajuhuj, jatiqui Jesucristora nia poonijioteriquiani, na rupaa nia pohuatanuucua. ²⁸ Naajuhuj, Jesucristo Rupaa paraa puereyashijacara nia jiyateriquiani. Nojori piriyojosacari nijaniya, majaari nojori puerenu quenaaja. Naa jaara naa nojori puereyashijaca quiritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari pueconu nijaniya, niari cunojiniji niishiniutianiya, niaaquí Pueyaso rijiosocoriquiano cutara. Pueyasocujaari naa cumaquijia na pueyatej, puereyashijianucua nojori quiniuria. ²⁹ Pueyasocujaari nia tiuutiquiaari Neyanuucua, na muerasu nia quiniuria. Naajuhuj, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuhuj, taa Neyanu miiquiaari naquiya pocuaracuaani. ³⁰ Naa niishiri, janiya, nijaniyajuhuj, paari mariyata naquiya miiniu rejeretaquiaani, pa Jiyaniijia pa poonijiosacari. Niacujaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niari janiyajiniji tojiniutianijuhuj, taa cua tarinitiaquiya Jesucristojiniji pohuatanuni, naajaa naquiya cua miishacari.

¹ Naacujitij pueyanaa, naquiya nia miishacari, nia niishiri taa Cristo shiniujuquiaa pueyaracaanu nijaniyani, maja nia tacaaniuria. Nia niishirijuhuaaj taa na paniniu cumanijaquiaa nijaniyani, naajuhuaaj, taa Pueyaso Sohuanu jiuujiaatiootequiaa nijaniyani. Nia niishirijuhuaaj taa Cristo taraajequiaa jiyanoehua niaacuani. Naa panitioojuaca nia quirijuhuaaj. ² Jiuujiaatioojuaca nia quirijuhuaaj, seetanujuanaa panitioojuaca nia quishacari. Naajuhuaaj, nareja nia shanacure Pueyaso Sohuanu niaacua, nojuaja cuaraa puetunu nijaniyajanaa ruputeera, jatiqui nia poonijionura pa Jiyaniijiaara. Naa jaara naa puetunu nio cua sequesanojuanaa mijiaa quiritij, niaari tojetaarucujanaa shuquiriaatia quijiaara cua jiyatenutaniya. ³ Maninia nia miishacari, majaari na miiniu juhua tamasa nia shocotanura, nia jyanishacari niaa naasucuaari socua maninia mijiaa tamasacajiniji. Puetunu maninia nia miishanojuanaa nia miiri tamasa nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia mijiaa nijaniyajiniji. ⁴ Naa jaara maninia mijiaa quiriquiacuaa, majaari tama maninia mijiacajaaja nia quiniu. Niarta Pueyaso pueyacua nia taraajerejuhuaaj, maninia quijiaa nojori quiniurijuhuaaj.

⁵ Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. ⁶ Nojuajaari naa miiquiaaritij: tariucuaaanu, nojuacuajaari Pueyaso quijiajuhuanajaj, juhua na Que. Naajaa, nojuajaari maja na cuaqueya na jyatenu quiquiaari seetanujuanaa juhua na Que Pueyaso na quiniuria. ⁷ Nojuajaari jyanohua cumaacaraca Jiyaniijia na quiniu tarinitiaquiaari, juhua nareja poonijioesano pueyano na quiniuria. Naaratej, mijiria rasaquiaariiri seetanujuanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia nia quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa mijia pueyano. ⁹ Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijanucujinijijianaa. Na sesojoquiaariijaariuhuaaj "Jesu". Nioori sequeya "pocujaji Tacuna". Majaari socua tamonu pocujaji tacuna quiniu mijiria, jiyocuaaanunio. ¹⁰ Puetunu pueyajanaari niishiniutianiya Jesuuri Jiyaniijiajanaa. Maja tamonu. Cunora, nocuara mojoquetaconutaniyari puetunu jiyocuaaanu quijiacajanaa, puetunu mijiria quijiacajanaajuhuaaj, puetunu jiya cariquimia quijiacajanaano. ¹¹ Puetunu tamaatia rupaa pocujacajanaari niishiniutianiya Jesucristoori Jiyaniijiajanaa cutara. Naa Pueyaso miiniucua Neyanutej, puetunu nojorijianaari niishiniutianiya, Pueyasoori tojetaarucujanaa maninia mijiaa.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaaricujani niaata cua quishacari, quiarijia socua cua tojtiajaca nia quiri, tucuaaanu cua quishacari nijaniyajiniji. Naacujitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretanu. Jyanohua puereeta quiniutianiyaari na tojiyashijianucuaa. ¹³ Pueyasojanaacuaajaari nioojiajinia poonijioquiaa maninia nia miiniu paniniuria. Na cumaaca nia niquitioquiaajaariuhuaaj maninia nia miiniuria nera nia panishano, taa na paniyacujani.

¹⁴ Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonuujutanuhuaaj. ¹⁵ Naa jaara naa maninia mijiaa quiritij, majaari Pueyaso niishiyashijiaa pueya naata quiniutianiya sesa na saquiriojotanura niaacuara. Naaratej, tojetaarucujanaa sesa miyashijiaa Pueyaso niquiohua nia quiri, mijiria sesa mijiaa pueya niquiara. Nojoriiri seetanujuanaa sacuaraatia, Pueyaso tojiyashijiaa. Cuno juhua ninishiqui quijiaa pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. ¹⁶ Pa samiitianijia rupaa Jesucristojiniji nia jiiitianoni, niaari cunota cuhuataquiaa mijiria quiniaa. Naa maninia Pueyaso pueya nia quiniucuatej, Cristo jaara tiuquiriohua na rijionuhuaa pajaniya, janiyari

jiyanohua nia timitianutaniyani. Janiyari naa nia timitianutaniya cua niishishacari puetunu cua poonijiosanojuanaari maja najuhuana na quiniu quiquiaari. Naajuhuaq, majaari najuhuana naquiya cua miiniu quiquiaarijuhuaj. ¹⁷Niaacuajaari maninia miijica Pueyasocua tiuuiaca nia quiniuucua, Jesucristojiniji cua pohuatanuucua nijaniya. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasaare Jesucristojiniji cua pohuatanuucua nijaniyani, cua nanacaari shoonutaniya juhua Pueyasora niqutiosocoriquiano. Janiya jaara naa miishaareni, janiyari cua nanacata tucuatanutaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu nijaniyatajanaa jiyanohua timiniutianiyani. ¹⁸Shuquiriaatia nia quirijiuhuaj, janiya jaara mosaareni, cua Jiyanijija tojjija cua quiniuucua. Cua cojitiuri shuquiriniujuhuaj.

Pablo pohuatasano Timoteojiniji, Epafroditojinijino

¹⁹Janiyari niaacuaji tojinu paniyani taa nia quiyani, shuquiriaatia cua quiniuriajuhuaj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua nijaniyajiniji saniniuujia. Janiyari cua Jiyanijija Jesuucua tiuyani na rishitiniuria janiya, nijaniyajiniji cua tojinuria. ²⁰Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuhuaq, na naacunura nijaniya, maninia nia quiniuria. ²¹Tamasacaari saniniuujia saaja tama nojori panishano casaacuajaaja tacaajia, maja Jesucristo casaacua. ²²Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. ²³Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴Naajaa, janiyacujaari cua Jiyanijiaacua tiuyani cua cartesaanura niiquiji, niaacua cua quianura ritiajuhuaj.

²⁵Cua sashishacari Timoteo cua jiyaronura niaacua, maniniacujaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuaq. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶Nojuajaari puetunu nijaniyatjanaa niqiniuucua jiaatiaa. Na niishishacari niaari jiyanohua nocua tacaquioya nia niishiniuucua nojuaja cusosu quiquiano, cunora, nojuajaari ritia nia niqiniuria tacaya. ²⁷Seetanujuanaa nojuajaari cusosu quiquiano. Quera cusocanujanaari. Pueyaso cutaraari nocua taraajecanu. Cucua taraajecanujariuhuaq, maja cua taraajenu jiyacatenura socua. ²⁸Janiyari cunora ritia niaacua na jiyaroyani, nia shuquiriniuria nia niqishacari nojuaja niaacua tiuquiuhuaano. Naa shuquiriaatia nia quishacarihuatej, janiyari coojia cajitiniutianiyajaacuhuaq. ²⁹Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijica nia quiri, noo pojori pa Jiyanijiaari poonijionuuacatej taa Epafroditocuaani. ³⁰Nojuacuajaari quera shaajeyarucuaa Cristora na poonijosacari. Cocuaatia miijiocanujaariuhuaq. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

3

Nio rootasano tojjiaa pa quiri cutara

¹Quiarijia saniniuujia, cuarta Pueyaso pueyanaa, pa Jiyanijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura nijaniya tari cua sequesano nijaniya. Cunoori seetanujuanaa maninia niaara. ²Tama nia cuaqueyajaaja nia cojuare cuno sacuraatia niishitiojonuujuaca pueyacujaji, cuno nojoriicujaji, sesa miijiacani. Nojoriiri pueya cararaatiuquia co miatejonuujuaca najuhanaj, nojori jiyanishacari nojori miatesano pueyari seetanujuanaa Pueyaso pueya. ³Paa cutaraari seetanujuanaa Pueyaso pueyani, Pueyaso Sohuanu jiyatenuucua pajaniya Pueyaso tojjiaa pa quiniuria. Paari timiquiaajaaniuhuaq Jesucristo rupuesano pa

quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijiuhuj. ⁵Naatej, janiya jaara rasaanquiaari, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicujani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicujajinio cua supuenuucua. Naajuhuj, janiyari Hebreo rupaa pocujani taa cua supuetanaacuaani. Cua que, cua nu-cuuari mariyata Hebreo rupaa pocujaca quiquiaarijiuhuj. Mashaja cua quishacari, janiyari Fariseo pueyanora quiquiaarini. Cuarta Fariseocuaacari socua jiyanoehua supuetana Moisés Rootasano tojjijia puetunu cuarta Judiocuacajinijiniojuanaa. ⁶Jiyacaritij, janiyari cua niishitiojonaa tojjijia quiquiaari jiyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojjitajaca miijia naquiyani, cua jiyanihacari nojori naasucuaari Pueyaso paraa. Naajuhuj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷Puetunu nio cua sequesanojuanaani, janiyari jiyanoehua na timitiaquiaarini cua jiyanihacari janiya naasucuaari naa seetanujuanaa Pueyaso pueyanoni. Quiarjia saniniuujia, Jesucristoocua cua tiuushacari, tarijia cua jiyanihano maninia casaani, puetunu cuno casaajanaari quiarjia najuhuaana janiyara. ⁸Quiarjiani, janiyari socua cua Jiyaniijia Jesucristo niishiniuria jiaatiaa jiyanohuani. Naaratej, puetunu tariucuacaanu cua timitiasano casaajanaari najuhuaana janiyara quiarjia. Cristo pueyano cua quiniuucua, janiyari juhua taanuusaaquiaari puetunu cuarta Judiocuacajinijijianaani. Naa Cristo tojjijia cua quiniuucuatej, cua shipinijojiniji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹Majaari cua jiyaniuu janiya sesa miyashijiani, Moisés Rootasano cua tojiniuucua. Saniniuujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jiyanoquiaari, maja na sesacanura janiya, Neyanuucua cua tiuuniuucua. ¹⁰Janiyari Jesucristo niishiniu paniya jiyanoehua socuani, seetanujuanaa nata rupuetootesano cua quiniuria. Janiyari na samiitianitajaja cumaaca panijajaaniuhuj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanoehua taraatia miishaaquiaari mijiria na quishacari, na Que tojjijia na quiniuucua. Janiya cuuara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiyara. ¹¹Janiyari tojetaarucujajanaa maninia miijia quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quirij, Pueyaso muerasu pa quishacari

¹²Juhuanujuaja majaari cua quiniuu tojetaarucujajanaa maninia miijia. Sesa miiniuu niishiyajaanijia. Jeecasojuaanijia. Naajaa, majaari cua tacaani. Jesucristocuaajari cua jiyatequiaari na pueyano cua quiniuria. Naaratej, janiyari jiyanoehua saniniuujiquiaani maninia na pueyano cua quiniuria. ¹³Cua panishano cuarta Pueyaso muerasunaa, janiyari niishiyacuajani, juhuanujuaja maja maninia cua quiniuu taa cua Jiyaniijia quiyacuani. Naajaa, majaari cua tariniuu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniara niquiyashijia. Naajuhuj, majaari cua niishiriojonu maninia cua miishano tariucuacuaa. Janiyari saaja cua tacoji niquiquiaani, socua maninia miijia cua quiniuria tari cua quiniujiniji. ¹⁴Pueya tacuarishijosacari, netena

jaara narta netecuataunaa shocotare, nojuajaari shanohua casaa niquitiosaaquiaa. Majaari najuhuana na netenu jiyanoehua. Janiyaraari naajuhujaj. Majaari najuhuana jiyanoehua cua saniniujuniu quiquiaa, maninia cua quiniuria juhua Cristojuhujaj. Mijiria cua quiniu cua tucuatasaari, Pueyasoari cua jataniniutianiya juhua Cristo cua quiniuria, Cristoocua tiuuja cua quiniucua.

¹⁵ Pueyanaa, niajaniya, cante seetanujuanaa Pueyaso tojjijaca quiyani, mariyata naa nia niishiriojore taa cua niishiriojiyacuani. Naatej, jiyanoehua nia saniniujiuri juhua Cristo nia quiniuriajuhujaj. Cante tama na cuaqueyajaaja jiyaniya nojuaja tariucua tojetaarucajanaa sesa miyashijiani, Pueyaso cuaara na niishitiria maninia. ¹⁶ Paa jaara maninia miiniu niishijaca quirini, majaari pa jiyacatenu saaja sesa miiniucua. Saniya maninia miijiacara pa quiri socua.

¹⁷ Cuarta Pueyaso pueyanaa, maninia miijiacara nia quiri taa canaa nia niquiquiaari maninia miyanocuaani. Naajuhujaj, maninia miijiacara nia niquiri, cante maninia mi-iquiaani taa canaa niishitiquiaari najaniyacujani, maninia canaa miishacari. Nojorijiniji nia niishiriquia, maninia nia miiniurajuhujaj. ¹⁸ Jesucristocujaari pocuara cusoquiaari niyacutesanoinia teetesano, maninia miijiacara pa jatanishaanura. Saniniuuja, queraatia pueyari juhujaniya miiquiaa sesa. Janiyacuajaari nojorijiniji pohuatanu pacutejo-quiaari najaniyani, maja juhua nojori nia quiniuria. Quirijia cua nujuquenuta, janiyari nia pohuatarohuanuhua jiyano sesa miijiacajini. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjijaca nojori quiniucua. ¹⁹ Nojoriiri puetunu quejoosanutaniyajanaa mani quiqiojinia. Nojoriiri tama nojori panishanojuaja jiyatecanu juhua nojori pueyasora. Naa sesa miijiacara nojori quishacaritij, majaari nojori niishiniu caririquiniu. Saaja sesa na miitushano timitiatiuyari. Nojoriiri saaja mijiria casaacua jiaatiajaca. ²⁰ Pajaniya saniniuuja, paa cutaraari tari jiyatesaaquiaari jiyocuaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. ²¹ Jiyanoehua na cumaacata, nojuajaari pa cuaqueya seque jataniniutianiya, shacantuca quijia pa quiniuria juhua na cuaqueyajuhujaj. Nojuajaari cumaacaraca puetunu casaajanaa na tojtiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiacara pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojjijaca nia quiri. Janiyari jiyanoehua nia niquiniucua jiaatiaani. Nia niqiuara cua pohuatanuucua Pueyaso rupaa, niaaquiiri seetanujuanaa na tojjijaca quiquiaari. Naa jiyanoehua maninia Pueyaso muerasu nia quiniucuatej, cunoori jiyanoehua cua timitiquiaa.

² Janiyari Evodia sequeya cutarani, narta maaji Sintiquenio, nojori cuaara jiyanoootioora juhua seetanujuanaa Pueyasoocua tiuujiaca maajipohua. ³ Quiajaniya saniniuuja Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maajipohua quia jiyanoootiooterohua, nojori rupuetoonuhua. Cuno maajipohuacuajaari jaarajaaja cuata poonijionuuquiaari, Clementejuhujaj, pa Jiyaniijiajiniji cua pohuatasacari. Naa cuata poonijionuuquiaarijiaariuhua tamasaca, canapete cuata quiqiaaricujani. Nojori sesacuaajaari tari naajiotasano quia Pueyaso nequesoreetuneejinia, tee cuniqui pueyaracaanu rishijiacarano sesaca naajiotasano quiyacajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. ⁵ Puetunu pueyajanaa cuaara niishiiria niaari seetanujuanaa maninia pueya, maja juaajiaca. Pa Jiyaniijiacujaari quera tiuquihua.

⁶ Majaari quenaaja nia tacaaniu. Saniniuuja, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhujaj "paacarasho". ⁷ Naa nia miishacaritij, Pueyasoari nioojia cajitiniutianiya. Naa Pueyaso cajitiniucua nioojiatej, majaari socua nioojia tacaaniu quiniutianiya, nia niishitijanio. Naacuajitij, niocua juhujaniya

panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoohua jiyajeneta. Nocuaji jiuujiatesano.

Saaja maninia casaacua niishiriojuuca nia quiriquia

⁸ Naajuhua cuarta Pueyaso pueyanaa, nio tojjiaa nia quirijiuhuaj. Pueyara-caanu saaja seetanujuanaa rupaacua niishiriojuuca nia quiriquia. Naajuhuj, saaja rerequeteyaquishoo casaacua nia niishiriojore. Saaja maninia casaacua niishiriojonu-juuca nia quiri, maja cararaatia casaacua. Naajuhuj, saaja Pueyaso shuquiritiasano casaacua nia niishiriojore, maja Pueyaso sesacasano casaacua. Naacuajitij, puetunu maninia casaacuajanaa nia niishiriojore, casaajinijiti pueya naata Pueyaso shuquiritia-nuni.

⁹ Maninia nia miiriquia pueyaracaanu, taa cua niishitiojuquiaari niajanianyacuajani. Niaacuajaari cua rootasano tojjiquiaari. Naajuhuj, niaacuajaari cua niqijia taa mijia cua quiquiaarini. Niaa jaara naa mijiaa quirijiuhuaj, poojia cajitinia Pueyasoori niaata quiniutianiyajuhuj.

Pablo pohuatasano, Filipo tiacajinia quiniaa Pueyaso pueya jiyaronuucua cumaneeca nera

¹⁰ Janiyari jiyanoohua cua Jiyaniijia timitiaani juhua shusha nia niishiniuuquiohua janiya, cucua nia jiyaronuucua nia reratesano cumaneeca. Naa cua sequesacari niajaniyatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajaniyatej cua panishano cua jiidiaquiniuucua. Maja. Janiyacuajaari tari jiyartuunoni, juhuajaniya cua quiniuria cua jiidiasanoniyojuata. ¹² Naajuhuj, janiyari niishiyani juhuajaniya cua quiniuria cua panishano cua jiidiaquishacari. Naajuhuj, janiyari niishiyani taa quishan-ote puetunu cua panishanojuanaa cua jiidiasacari. Janiyari tariucua saniniujuishanoni puetunu casaajanaa cua rejeretanura. Juhuajaniya quiniu niishiyani miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, maja saaja casamiriaca cua quishacari. ¹³ Cua naata rejeretanu puetunu-juanaa, Cristo cumaquishacari janiya. ¹⁴ Naajaa, niaari maninia miiriucuaa nia cumaneeca nia jiyarosacari cucua, naquiya cua miishacari niya. Niaari niarta pueyanocua taraajaja cutara.

¹⁵ Naajuhuj, Macedonia jiyajiniji cua quiasacari nia shuriucujaji Filipo tiacajiniji, tamonu jiyacajinia cua pohuatanura Pueyaso rupaa, saaja niajaninya cutaraari cucua jiyanooquiaari. Cunoori quiquiaari shushajanaa Jesucristoocua tiuujiaca nia quishacari. Jiyacaritij, niaari nia reratesano cumaneeca jiyaroquiaari cucua, shuquiriatia nia quishacari cua pohuatanuucua nia niqiuara Jesucristojiniji. ¹⁶ Juhuanujuaja nia Macedonia jiyajinia cua quishacarijia, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyara-caanu nia niqitiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuajitij, Pueyasoori saniniujia socua queraatia nia niqitiojonutaniyacujua. ¹⁸ Epafroditocujaari puetunu nia jiyarosano cumaneecajanaa cucua tiuquitiaseecua. Janiyari cunota puetunu cua panishanojuanaa maserucua tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niqitiosano casaa. Nera, cunoori juhua shanohua jaanutaja catijiasano nocuara. Na shuquiritiriiri. ¹⁹ Naaratej, cua Jiyaniijia Pueyasoori puetunu nia jiidiaquishoo casaajanaa nia niqitiojonutaniya. ¿Pueyasoteeri casamijiu? ¡Maja! Nia rupesacari Neyanu Jesucristo, puetunu na jiidiasanojuanaari niaaranujuhuaj. ²⁰ ¡Pa Que Pueyasoori jiyanoohua maninia! Saaja nojuaja pa shuquiritiare pueyaracaanu. Cuaara naa quiriাতেj.

Nata quiniaata Pablo saruhuatascari narta Pueyaso pueya

²¹ Quiria nia saruhuatate puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuj. ²² Naajuhuj, Jesucristoocua tiuujiaca

jiyaniijia Césarra poonijionaa pueyari nia saruhuataajaacuhuj, puetunu niya Jesucristoocua tiuujiacajanaanio.

²³ Pa Jiyaniijia Jesucristo cuaara cumaquiiria puetunu nioojijanaa. Tariucuja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaa naajioquiaari

¹¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaar-icuajani. Pa tarajanu Timoteota naajiyia nionijia. ²Niaacuara naajiyaniijia, canapue Pueyaso saquiriojoquiaaricuajani tama nerajaaja nia quiniuria. Niajaniyacuajaari maninia tiuuquiaa Pueyasooocua, Cristo rupuesano nia quishacari. Pa Que Pueyaso cuaara cumaqu-iria nijaniya, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucua tiuuniaa pueyacuara

³⁻⁴Canaari pohuatasaaanuni taa nia tiuuquiaa Jesucristoocua, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa sec-ajosacari Pueyaso niaacuara, canaari na sequequiaani: “Paacarasho canaa Quenaa”. ⁵Niaari naa maninia quiyatej, nia niishishacari Pueyasoori jyanohua maninia pa mi-niutianiya na niqitiosacari pajaniya jiyocuaaanu na jiiitasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa.

⁶Cuno maninia rupaari puetunu jiyacajinijanaa paaqueyaree, mariyata taa na paaque-canucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujajinia, mariyata taa na caneya nioojiacajiniacuaani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricu-ajani. ⁷Pa panishano Epafrasri naa pohuataquiaari nijaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸Nojuajaari canaa pohuatarucuaa nijaniyajinjiji, naajuhuj taa Pueyaso Sohuanu panitiooteya nijaniyani.

⁹Naaratej, canaa jaara tojiquianu nijaniyajinjini, majaari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuaara nia jataniiira niishijia nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj.

¹⁰Niaa jaara Pueyaso panishano niishijiaa quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquiritianura nijaniya, pueyaracaanu maninia nia quishacari. Niaari puetunu maninia casaajanaa miniutianiya. Naajuhuj, niaari socua maninia niishiniutianiya Pueyaso. ¹¹Canaari Pueyaso secojo-quiaa niaacuajuhuj, Pueyaso cumaquiniuria nijaniya puetunu na cumaacatajanaa.

Jyanohua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹²Canaari Pueyaso secojoquiaajuhuj niaa cuaara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiiitasanojiniji pajaniya, cuhuashiqui quiquiojinia pa quishacari. ¹³Pueyasoori nin-ishiquiji pa jayoquiaari, maja Sesaaacaa jiiitanura socua pajaniya. Pa jiyatereeri cuhuashiqui quijiaa pa quiniuria, Neyanuniyojua jiiitasano pa quiniuria maninia cutara. ¹⁴Tama Neyanu cusonutajaaja pa jyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusunucuaa pa niti

¹⁵Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujanaa quiquiaari Pueyaso ship-inyaquishacarijia puetunu casaajanaa. ¹⁶Na Que Pueyasoori na shipinitiquiaari puetunu casaajanaa jiya cajiniocua, mijiriano; niquishano casa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiiitanura nera jiyocuaaanu casaa, jiyocua-aaanu quijiacanio, mariyata mijiria casaa, mijiria quijiacanio. Nojuajaari puetunujuanaa

shipiniquiaari. Tama nerajaaja na shipiniquiaariiri. ¹⁷Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojaa, maninia na quiniuria. ¹⁸Cristoori Pueyaso muerasu Jiyaniijia-juhuaj, taa poojia quiya pa cuaqueya jiyaniijiacuaani. Puetunu Pueyaso muerasujuaaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianija, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacujitij, Cristoori coteenu quijia. Nojuajaari Jiyaniijiajuhanaj. ¹⁹Pueyasoori paniquiaari Neyanu Cristo jitianura puetunu tama na cumaacajanaa, juhua nojuaja na quiniurijahuaj. Naacujitij, Cristoori maja rimiajata quenaaja na quiniu na Quejiniji. ²⁰Naajuhua, Pueyasoori paniquiaari Cristo rupetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusunutajaaja niyacutesanoinia. Na Que rupetequiaariuhua puetunu casaajanaari, jiyocuaaanu casaa, mijiria casaanio.

²¹Tarijia, niaari Pueyaso paraa quiquiaari, juhua taanusano pueya Pueyasojiniji, sesa miijia nia quiniucua. ²²Saniniujia quiarijiani, Pueyasoori nia rupetequiaariuhua nocua, Cristo cusunucua pocuara, cuaqueyaraca na quishacari mijiria. Naacujitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanoiniji. Majaari niaacuara tonujusaanu quiniutianiya quenaaja sesa nia miishanoiniji. Majaari quenaaja shiitianiyojua sesa nia quiniu quiniutianiya na niquiara. ²³Niaari naa quiniutianiya maninia, niaa jaara cumaatia rupaquiaa Cristocua, nocua nia tiushacari, nioojia nia niquijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuatasaaanu puetunu jiyacajinijanaa. Janiya, Pabloni, janiyari na pohuatanu naacutaajaaniuhua.

Pablo Pueyaso pueya maanu cumaquiniara jiyatesaaquiaari

²⁴Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocujahuaj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiucuatej, janiyari Cristo naquiya miiniu tucataa tama cua cuaqueyajinijaaajani. ²⁵Pueyasocujaaari cua jiyatequiaari na saquiriojosano pueya cua jitianura, cua cumaquiniuria nijaniya puetunu na rupaatajanaa. ²⁶Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuaaanu quijia. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. ²⁷Pueyasoori pa niishitiniu paniquiaari taa jiyanhua shacantuca na cumaaca quiya nijaniyarani, canapuee maja na saquiriojosano Judiocuaca quiquiaaricujani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuca quijia jatanishaanutaniyajuhaaj.

²⁸Naaratej, Cristocujaaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. ²⁹Naaratej, puetunu Cristo niquitiosano cumaacatajanaa jiyanhua poonijioquiaanijia, na cumaquishacari janiya.

2

¹Pueyanaa, janiyari paniani nia niishiniuria taa jiyanhua cua poonijioquiaa Pueyaso cua secojonuta niaacuarani, Pueyaso muerasuucuaa Laodicea tiacajinijahuaj, puetunu juhuanajuaja cua niqiyaquiniaa pueyacuarajanaanio. ²Jiyanhua secojquiaa niaacuaranijia, nioojia cumaquishaanura, nioojia rupuetoonura jatiqijiuhuaj, jiyanhua nia panitiosacari. Naajuhua, secojoquiaanijia maninia niishijacara nia

quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocuajaari puetunu niishijajanaa. Majaari tamonu niishijia quiniu juhua nojuaja. Jiyanoehua maninia miijia puetunu na niishishanotajanaari. ⁴ Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasanota. ⁵ Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

⁶ Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenaj, maninia nia quiniuria mijiria na cumaacata. ⁷ Maninia nia rupuetooore Cristota, naatej, taa naana cumaatia nujuaacuuaani, jaara tucumaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricujani. Cunora, pueyaracaanu nia sequeriquia Pueyaso: “Paacarasho canaa Quenea”.

Niaari quiarinio pueya, Cristo quishacari nioojiajina

⁸ Tama nia cuaqueyajaaja nio cojuare, tamasaca mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhuj.

⁹ Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jiitiaja, puetunu na niishitijajanaano. ¹⁰ Naajuhuj, niaari Pueyaso cumaaca jiitiaa, na niishitijajano, nia rupuesacari Cristo. Naacuajitij, niaari puetunu nia panishanojuanaa jiitiaa tari, maninia quijiaa nia quiniuria. Cristojuaanaari Jiyaniijiajanaa. Cristo jaara na jiyarore, puetunu tamonu cumaacaraca quijiacajanaari na tojitiaa; jiyocuacaanu camarnu, mijiria camarnunio. ¹¹ Cristo nia rupuesacari, niaari seetanujuanaa jatanishaa-ree maja sesa nia quiniuria socua. Majaari nareja nia cararaatuuquia co miatesaanu quiquiaari, taa Judiocuaca miiquiaacuuaani. Nojoriiri miatesaaquiaa nojori niishiniuria nojori cuaara quiri sa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiaari, seetanujuanaa sesa nia quiniu jatasaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacua nia tiuushacari. Niaari samiitianishaarohua taa Pueyaso samiitianiquiaariuhua Cristocuaani.

¹³ Niaari juhua macu quiquiaari tarijia, sesa miijia nia quishacarijia, sesa jiuujiaraca nia quishacarijiano. Jiyacaritij, Pueyasoori nia samiitianiquiaari Cristota, na jiyanooshacari nijaniya puetunu sesa nia miishanojinijijanaa. ¹⁴ Pa tojiyaquishacari tariucuacaanu Pueyaso rootasano, paari puecosocoriquiano quiquiaari juucuani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiuutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiuutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuuaani, pueya niquiara macaatishocoriquiano.

Saaja Pueyaso casaacua nia jiaatariquia

¹⁶ Naaratej, majaari nia tojiniu noo pojori, canapuate nia tojitiniu saniniujia supuetana niishitiojosano cuajani. Nojoriiri najuhuaana niishitiojoquiaa casaa sumatuute puereshiyani, rusanonio. Nojoriiri niishitiojoquiaajuhuj teyano juucate pooni-jiyaquishiyani, naajuhuj, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jiyaniishacari paa jaara naa miyaquirini, Pueyaso mariqui pa saniitioreeri. ¹⁷ Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujuanaa quiniutianiyan

Niriqiano jaara tiuqiri. Cuno Niriqianocuaajaari Cristo. Tari tiuquiuaariiri. Nojuaajaari pocuaji Tacuna. Naaratej, majaari socua pa tojinu cuno miriqui niishitiojosano. Quiarjia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojanaa mariqui nia sapojoreeri, niaa mariqui Pueyaso niqitionu panishano niajanía maseyquiriiri. Nojoriiri tama na cuaqueyajaaja shuquiritiaquia na jianishacari nojori maja Pueyaso shocotaja na quiniu nojori secijosacari Pueyaso seya, maja Pueyasojuanaa. Nojoriiri tama na maquenujina na niquishanocuaajaaja tiuujia, maja Pueyaso rupaacua. Naacujitij, nojori tiuushacari tama na niishiriojosanocuaajaaja, nojoriiri seetanujuanaa pueya shocotajaca quiya. ¹⁹ Nojoriiri maja na rupenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojaari maninia maashitiya puetunu pa cuaqueyjanaa, paa jaara maninia rupuetoonu quiya puetunu pa nucuhuatjanaani, pa cusorohuatano. Pueyasoori naa pa maashitini panijahuaj Cristota rupuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quijia nia quiniuria. ¿Macutucua taa supuetana rootasano tojirini? Maja na naata. ¿Niajanियarihuaj? ¿Casaara nia tojitiaajaa cuno tariucuaaanu rootasani? Niaari juhua nareja mijiria quiniaa quiyajaa, nia tojishacarijaa cuno rootasano. ²¹ Supuetanaari naa piriyojoquiaritij: “Maja pa quianu cuno. Maja pa miaquenu cunojuhuaj. Maja cuno pa cooniu”. Pa supuetanaari naa sequejatej. ²² Naajaa, puetunu cuno pueresano casaajanaari saaja shaa-jeja pa seecojinia. Majaari poojia na miiniu sesa. Cuno tariucuaaanu rootasanoori saaja tama pueya niishishanojuaja quiquiaari. ²³ Paa naasucuaari jianiyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puereni, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhua Pueyasora. Cunoori maja na naacunu pajaniya sesa casaacua pa jiaatiaquiniuria.

3

¹ Niaa jaara samiitianishaaquiaari Cristota, jiyocuaaanu Pueyaso jiišanasocua nia jiaatiare, tee Cristo cajiya na Que Pueyaso miaquetajaracujani. ² Pueyaso casaacua nia niishiriojore saaja, maja mijiria casaacua. ³ Puetunu tarija sesa nia quiniujanaari tari juhua jamosaaquiaari, niaa jaara Cristo cusonu jiyateer tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuaajaari pa samiitianija. Saniniuujia, juhuanajuaja maja niishishano taamueca quijia pa cuaqueya quiniutianiyani. ⁴ Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutanianiyani shacantuuca cumaacaraca quijia pa quiniuria nata, juhua nojuajuhuj.

Maninia rootasano Pueyaso muerasura

⁵ Naaratej, nia cuaqueya cuaara quiri juhua macu tama nia niqiarajaaja, nia cuaqueya nia ruoretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamicua nia jiaatianu. Casaacua jiaatiajaari juhua Pueyaso ruuretaja quiya, tama na jiišanaso casaacuaajaaja na tiuushacari juhua Pueyasocuaaja. ⁶ Pueyasoori jianohua saniitionutaniya na tojiyashijia, canapuee naa sesa quijiacuajani. ⁷ Pueyaso tojiyashijia nia quishacari tarija, niaari naa sesa mijiaa quiquiaari. ⁸ Quiarijiani, nia tarinitiare puetunu naa sesa nia quiniujanaa. Maja juajia nia quiniu. Maja naseeca pueyano nia quiniu. Maja jianoyashijia nia quiniu. Maja sesa mijia nia quiniu. Maja pueya sesacaja nia quiniu. Maja sacuaratia najuhua nia niti taquiriocateja nia quiniu. ⁹ Maja nia cuarachijiootonu. Niaari tari jatanishaaquiaari tarija sesa nia quiniujiniji, sesa jiuujaraca nia quishacarija, sesa miiniuucua jiiinio nia quishacarijuhuaj. ¹⁰ Niaari quiarinio jiuujaraca quijia tari. Quiarijiani, tama nia cuaqueyajaarija tari jataa juhua nia Shipinina Pueyaso nia quiniuria, seetanujuanaa Pueyaso niishijia nia quiniuria.

¹¹ Pueyaso jatanishano pueya pa quishacari quiarijiani, majaari tari rimajata pa quiniu,

paa jaara Judiocuaca quiyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua mococori, poonijioteseano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojajinia quiyajuhua.

¹² Pueyasoori nia saquiriojoquiaari saa maninaja nia quiniuria nera. Nijaniyari na panishano muerasu. Naaratej, pueyacua taraajeja nia quiri. Maninia miijia nia quiri. Majaari nia jijaniniu tama nia cuaqueyajaari socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miirri nijaniyani. Taa pa Jiyaniijia jiyanooquiaari pajaniyacuuaani, naa nia jiyanoootioorejuhua. ¹⁴ Seetanujuanaa pueya panijiaca nia quiriujuhua. Cunoori socua jiyanoohua panishano. Panitioojua nia quishacari, puetunu nia miishanojuanaari jiyanoohua maninia quiniutianiya, jatiqui nia quiniuriajuhuaj. ¹⁵ Naajuhua, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijica nia quiniuria, maninia rupuetooteseano. Pueyaso muerasu cuara jatiqui poonijionuujuaca quiri, naatej, taa pa cuaqueyajiniacuma casaa puetunujuanaa jatiqui quiyacuuaani. Majaari nia juaatoojonu. Naajuhua, Pueyaso nia shuquiritari pueyaracaanu, puetunu maninia na miishanojinijijianaa niaara.

¹⁶ Nioojia cuara quiri mishaja Cristo rupaata, jiyanoohua na tojijia nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitiojore puetunu Cristo niishishanotajanaa. Nia jaaquequejonuere Pueyaso Rupaa naajiosanojiniji, pueya naajiosanojinijijuhua, Pueyaso Sohuanu niishitiojosano nijaniyano. Naa nia jaaquequejore Pueyasora, nia shuquiritanuta nojuaja. ¹⁷ Jesucristocuaari nia Jiyaniijia quiya. Naacujatij, niaari na sesaanucua. Naaratej, nia sequesano, nia miishanojuhuaj, puetunu cunujuanaa cuara quiri maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua nijaniya.

Maninia miijia pa quiri Pueyaso muerasu pa quishacari

¹⁸ Maajipohuanaa, nia niyaca tojtijajaca nia quiri. Pa Jiyaniijiaacua tiuujiaca cumaati naa miiquiaaqui. ¹⁹ Pueyanaa, nia niquiocua nia paniri. Majaari na juaaniu. ²⁰ Muerasapueanaa, nia queya tojijia nia quiri, nia shuquiritiniuria pa Jiyaniijia. ²¹ Pueyanaa, maja nia juaatiniu nia niquiohua, nojori mariqui maninia miiniucuaaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari nijaniya, na shuquiritanura nijaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyjetanu, pa Jiyaniijiaari nia niquitionutaniya jiyocuacaanu niaara na jittiasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saninujijia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyjetanu, niaari jiyocuacaanu Camarnuracajuhua.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”.

³ Naajuhua, canaacuara nia secojore Pueyaso, nojuaja cuara canaa pohuataniiria pueya niqiuara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano nia quiyaniija nio nujuatejojuajinia. ⁴ Pueyaso nia secojore cucuara, maninia cua pohuatatura Cristojiniji, pueya niishiniuria maninia cua pohuatasano, taa Pueyaso paniya cua pohuataturacuajani.

⁵ Maninia nia niishiriojore taa nia miiniutianiya noo pojorini, canapuetucuaaja maja Pueyaso muerasuni. Maninia nia miiri nojori, mijiria nia quishacarijia. ⁶ Nia pocoojosacari nojoritia, maja najuhuana nia pocuanu. Pueya nia cumaquiri nia sequesanota. Nia niishiriojore taa nia riucuanutaniya tamasaca pueyani, nojori jaara nequesotariquia nijaniya Pueyasocua nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tiqicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa poonijionura. ⁸ Niaacua na jiyaroyanjia na pohuatanura nijaniya taa canaa quiyani, naajuhuj, na cumanijanura nijaniya. ⁹ Pa panishano Onésimoori nata quianutaniyajuhuj. Nojuacuajaari nijaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niqijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura nijaniya nera. Marcoori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuajaara niaacua quiaare, niocua maninia na tiuquiniri nia tijinia. ¹¹ Jesu sesaanucua pueyanoori nia saruhuataajuhuj. Na sesari Justojuhuj. Saa nio pojorjia Judiocuacajinijioori cuata poonijioquia Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. ¹² Epafasri nia saruhuataajuhuj. Nojuajaari Cristo seru nijaniyajinijiniojuhuaj. Nojuajaari pueyaraacuanu niaacuara secojoquiaa queraatia, jiyanohua cumaatia Pueyasocua tiuujica nia quiniuria. Secojoquiaajaariuhua ritia Pueyaso tojjijica nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafasri jiyanohua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia saruhuataa. Demas nia saruhuataajuhuj.

¹⁵ Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhuaj, na tijinia rerejonaa Pueyaso pueya maanujuhuj. ¹⁶ Naa jaara nio naajionee serojorecuaa nia rerejosacari, Laodicea tiacajinia nia jiyarotarejuhuaj, cuaara serojosaaria Pueyaso pueya maanu niquiara tiijuhuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucuatunura quia poonijiosano pa Jiyaniijara. Nojuajaari quia jiyatequiaari nera poonijioriquiano”.

¹⁸ Janiyari Pablóni. Quiarijiani, tama cua juaashiquiatajaaja naajiyanjia saaja cua saruhuatanura nijaniya. Nia niishiriquia, janiyari moronucua nujuatesano quiyani. Pueyaso cuaara cumaquiiria nijaniya na cumaacata jiyanohua. Tariucuaaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablóni. Janiyari nio naajija Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejaca. Canaari mariyata nia saruhuataani, Silvano, Timoteonio. Pueyaso cuara maninia jiitiaara na cumaacata nijaniya, maninia nia quiniuria. Cuaara nioojia cajitiirijahuaj, juhuajaniya nia quiniuria.

Tesalónica pueyanaari Jesuucua tiuujiaca quiquiaari seetanujuanaa

² Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuuquiaani. ³ Pa Que Pueyaso canaa secojosacari, canaari pueyaracaanu niishiquiaa nijaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhuaj taa nia paniniutia nia naacuquiaa niarta pueyani. Naajuhuaj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. ⁴ Pueyaso panishano pueyanaa, canaacujaari niishiyani, nojuajaari nia saquiriojoquiaari na panishano muerasu nia quiniuria. ⁵ Canaa jaara nia niqiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoorijyanohua Pueyaso cumaacaraca quiquiaari. Pueyaso Sohuanuuri jyanohua poonijioriquiaa nioojiacajinia. Naacujitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

⁶ Niaari canacua jiaatiaquiaari, juhua canaa nia quiniurijahuaj, juhua pa Jiyaniijia Jesu nia quiniurijahuaj. Niaari seetanujuanaa naa miijacara quiquiaari, Pueyaso tojjijaca nia quiniurijahuaj taa canacuaani. Pueyaso rupaa nia tojjishacari, niaari jyanohua na timitiaquiaari. Cunora, niaari jyanohua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷ Naa shuquiriaatia Pueyaso tojjijaca nia quiniucuatej, niaari niarta Pueyaso pueya shiniujuquiaari, seetanujuanaa Pueyaso tojjijaca nojori quiniurijahuaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸ Pa Jiyaniijia rupaari nijaniyajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocujanaa poojotasaquiaari. Naacujitij, puetunu tiqiyocua quijiaca pueyajanaari tari niishiya taa Pueyasocua tiuujiaca nia quiya seetanujuanaani. Naacujitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinjicujani? ⁹ Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricuja nijaniyani. Nojoriiri niishiyajuhuaj taa canaa nia tiuquintiaquiaari maninia nia tiacajiniaqueyani, canaa pohuatasano nia tojjiniuria. Naajuhuaj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojanaa tojtiajaca nia quiniuria. ¹⁰ Naajuhuaj, niaanaari Neyanu sashiya, jiyocuaaanuji na tiuquiniuhua, teyano Pueyaso samiitianiqaariuhua macujinjicujani. Pueyari nijaniyajiniji niishiya-jacuuhaj, Jesuuri pocuaji Tacuna, maja mani quiquojinia pa quejoosaanura, Pueyaso saniitiosacari na tojtiaashijaca.

2

Pablo niishtiosacariuhua pueya, taa na quiquiaari nojoritiani

¹ Cuarta Pueyaso pueyanaa, niaacuajaari niishiya, majaari najuhua canaa quiniu quiquiaari, niaata canaa quishacari. ² Niaacuajaari niishiya, Filipo tiacajinia

canaa quishacari, niaacua canaa tiuquiyaquishacarijia, canaari cuno tiacajinia sesacasaquiarini. Canaari jyanohua taraatia miishaaquiarijiuhuaj. Naajuhuj, nia tiacajinia canaa tiuquijiosacari, pueyari canaa pahuatansano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pahuatanura Jesucristojiniji nia niquiarajuhuj. ³ Canaacuajaari niishiquiaarini canaa pahuatansanoori seetanu rupaajanaa. Majaari canaa pahuatanu quiquiaari canaa miiniuria sesa nijaniya, canaa sapojonura nijaniyajuhuj. ⁴ Pueyasojuaanaari canaacua tiuquiaari. Cunora, canaa jiyatequiaariiri Neyanujiniji pahuatanaa canaa quiniuria. Naacuajaari taa canaa poojotaquiaa pueya tiuuniuria nocuacujani, Pueyaso jyanooniuria nojori. Canaari seetanujanaa Pueyaso timitiniu paniyani, maja saaja pueya. Pueyasocuajaari canaa jiuujia niishijia. ⁵ Niaacuajaari niishiyajuhuj, majaari canaa sapojonu quiquiaari nijaniya shanohua canaa sequesana, canaa nia maniniucuanura. Naajuhuj, majaari canaa cuaracashijionu quiquiaari nijaniya, canaa nia niqutiojonura nia cumaneecajiniji. Pueyasoori na niishiyacuja. ⁶ Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniurajuhuj. Maja. ⁷ Canaacuajaari seetanujanaa nia jyanijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari nijaniya, juhua canaa seya nia quiniuria. Saniniujia, canaari tojetaarucujanaa juhua naatujoori quiquiaarini, niaata canaa quishacari. Naatej, taa maaji jiiitia maninia necohuacuaani, canaari naa nia jiiitiquiaarijiihuaj. ⁸ Jyanohua canaa paniniucua nijaniya, majaari saaja Pueyaso rupaa canaa pahuatanu quiquiaari nijaniya. Canaa cutaraa tama canaa cuaqueyajaaja panitiquiaari niaacuarani, naajaa, canaa cuara puecoosariaqui. Canaari naa jiiitiquiaari nijaniyani, jyanohua canaa paniniucua nijaniya. ⁹ Cuarta Pueyaso pueyanaa, niaacuajaari niishiya taa canaa poonijioquiaari jyanohuani, tama canaa panishanojuaaja canaa masetajara. Canaari naa poonijionuquiarini juuca, niucuanio, canaa pahuatanura Pueyaso rupaa nijaniya. Canaari naa miiquiarini maja canaa taajetenura nijaniya canaa mashiniquijionuta nia cumaneeca.

¹⁰ Naacuajitij cuarta Pueyaso pueyanaa, nijaniya, Pueyasojuhuj, niaacuajaari niishiya canaari saaja maninia miiquiarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacuara saquiriojotanu, canaa jaara tojetaarucujanaa sesa miyaquiquiaarini. ¹¹ Niaari niishiyajuhuj taa canaa shiniujiquiaari nijaniyani Pueyaso nia tojiniuria. Niaari niishiyajuhuj taa canaa cumaniaquiaari puetunu nijaniyajanaani taraatia nia quishacari, naatej, taa pueyano miiquiaa na panishano niqiohuacuaani. ¹² Naajuhuj, canaacuajaari jyanohua nia nacasuquiaarini maninia miijiaca nia quiniuria juhua seetanujanaa Pueyaso pueya. Pueyasocuajaari nia saquiriojioquiaari pueyaracaanu nata nia quiniuria, jyanijianucua nia quiniurajuhuj, juhua nojuajuhuj. Nojuacuajaari na shacantuca cumacajinia quijia.

¹³ Canaa jaara Pueyaso rupaa pahuataquiaari nia niquiarani, majaari nia jyaniniu quiquiaari cunoori saaja pueyajiniji canaa tojiniushano. Maja. Niaari seetanujanaa na tojtiajacara quiquiaari, nia niishishacari cunoori seetanujanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pahuatansanoori seetanujanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria nijaniya, Jesuucua tiuujia nia quiniucua. ¹⁴ Naa Jesucristoocua tiuujia nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaricuaani. Tama narta Judiocuacajaarijia nojori miiquiaari naquiya, Jesucristo tojijia nia nojori quiniucua. ¹⁵ Nio cuarta Judiocuacani, nojori supuetanaajuhuj, nojoricuajaari pa Jyanijia Jesucristo motuquiaari. Nojori supuetanaari naa tariucuaaanu puecooquiarijuhua Pueyaso sequesano caminiujiniuaa pueyatej. Naajuhuj, Jesuucua tiyashijia cuarta Judiocuacari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quinia paraajanaa. ¹⁶ Naacuajitij,

canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhuj, Judiocuacaari canaa tenujuquiaa juucuani. Naacuajitij, Pueyasora, sesa Judiocuaca miijiosanoori tari tojetaarucuajanaa puera. Cunora, Pueyasoori nojori saniitioquiaa jiyanohera.

Pablo naquerejosacari juucua Tesalónica tiacajinia quiniaa Pueyaso pueyacua

¹⁷ Cua panishano pueyanaa, canaacuajaari rupaquijiara nia shuriucuaji quiaquiaari-uhua. Jiyacari canaa niqiyaquishacari nijaniya, naajaa, canaacuajaari juhua niaata quiquiaajaani, pueyaracaanu canaa niishirojosacari nijaniya, niaacuara canaa secojosacari. Canaari juucua jiyanohera nia niqiniu paniriquiaani. ¹⁸ Cunora, canaari niaacua naquerejoquiaari juucuani. Janyari niaacua naquerejonu pacutejoquiaarini. Satanásri canaa cushitioquiaari saajani. ¹⁹ ¿Janyatucua casaara nia niqiniu paniyaquiriirini? Niacuajaari jiyanohera cua timitiasano pueya. Pa Jiyaniijia Jesucristo tiuquishacari-uhua, janyari niishiyani, nojuajaari canaa shuqiritianutaniya maninia na tojjijaca nia quishacari canaa niishitiojonuucua na rupaa nijaniya. Pa Jiyaniijata pa quishacari, jiyacaritij, canaari jiyanohera nia timitianutaniyani, maninia na tojtijajaca nia quiniuucua mijiria. ²⁰ Taaquiriirini, canaacuajaari tari shuquiriaatia quiyani, maninia na tojtijajaca nia quiniuucua. Niacuajaari seetanujuanaa canaa timitiasano pueya.

3

¹ Naa jiyanohera canaa niishiniu panishacari juucua nijaniyajinijitij, majaari socua canaa sashiniu paniniu qiriqiaa. Cunora, canaari niishiriojoquiaarini, maniacuajaari canaa jateenura tamajaaja Atenas tiacajinia. ² Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janyari niaacua na jiyaroquiaarini na cumaquiniuria nijaniya, mariyata socua na shiniujuniuria nijaniya Jesuucua nia tiuuniuria saaja. ³ Na jiyaroquiaarini nia cumaquiniuria nijaniya maja quenaaja niqiriyatu nijaniyajinijinio pishiniuria Pueyasocucaji, naquiya nia miishacari. Niacuajaari tari niishiquiaari, paari naquiya miishiyani Jesucristoocua pa tiuuniuucua. ⁴ Canaa quishacari niaataja, canaacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtijajaca pa quiniuucua. Niacuajaari niishiya, seetanujuanaa naa tohuatecanuuri cua sequesano. ⁵ Cua niishishacari nijaniyajinijini, niaanaaru naquiya miishaquiaa, janyari puerequiaani Sesaaca naasucua nia miitriucuaa sesa. Jaara naa qiritij, puetunu canaa miishanojuanaa niaara maara najuhua quiquianu. Naa cua tacaashacaritij, majaari socua cua tarishiniu paniniu quiquianu, nijaniyajiniji cua niishiniuria. Cunora, janyari ritia jyarocanu niaacua Timoteoni, saniniuujia nojuaja pohuatanuhua janiya, niaate Jesuucua tiuyajaa.

⁶ Timoteocujajari tari nijaniyajiniji tiuquiriohuacuaa. Nojuajaari canaa pohuata-suhucuaa, niaanaari Jesuucua tiuyajaa. Niaanaari panitiojuaca quiyajaa. Canaa pohu-atasuhucuaajaariuhuj, niaanaari canaa niishiriojoquiaa jiyanohera nia paniniutia canaa. Niaanaari canaa niqiniuucua jiaatiaa, naatej, taa canaa jiaatiaa canaa niqiniuria nia-janiyacuaani. ⁷ Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuajitij, canaari juhua samitiacorohuani, pa Jiyaniijia tojtijajaca nia quiniuucua. ⁹ Cunora, canaari jiyanohera nia shuqiritiaa Pueyaso niqiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanohera shuquiriaatia quiyani. ¹⁰ Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihua niaacua. Canaari maninia nia niishitiojonu tucatanu panyani, seetanujuanaa maninia jeenucuasano Pueyaso pueya nia quiniuria.

¹¹ Canaari panyani pa Que Pueyasojanaa, pa Jiyaniijia Jesucristonio, nojori cuara canaa naacuara niaacua canaa tiuquiniuria. ¹² Pa Jiyaniijia cuara nia jiyateera socua jiyanohera panitiojuaca nia quiniuria, tamasaca panijaca nia quiniurajuhuj, taa canaa

paniya nijaniyacuaani. ¹³ Naa panijiaca na jiyatesacari nijaniyatej, niaari nioojia niqui-
jioteyashijiaca quiniutianiya cutara. Naajuhuj, niaari tojetaarucujanaa sesa miyashiji-
aca quiniutianiya, pa Jiyaniijia Jesucristo tiuquishacariuhua puetunu na jiyanooshano
pueyatajanaa.

4

Taate pa naata Pueyaso shuquiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa
quiniucua, canaa sequesano nia tojiri. Quiarijiani, canaari nia shiniujiyani socua maninia
mijiaca nia quiniuria. Canaari nia niishitiojoquiaari maninia mijiaca nia quiniuriani,
Pueyaso nia shuquiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canacuajaari
nia rootaquiiaarini, Pueyasoori nia panitiaa saaja nera nia quiniuria, tojetaarucujanaa
maninia jeequesano nia quiniuria sesa nia miishanojiniji. Majaari nia numuetucunu nia
camishoo maaji. ⁴ Puetunu mashiquiorijianaa cuaara niishiiria maninia na cojuanura
necocarano, maja ritia na numuetucunura, nata na camiyaquishacarijia. Cuaara na
cuaqueya panishano rejetenu niishiiria. ⁵ Majaari sacuraatia nia miiniu taa Pueyaso ni-
ishiyashijiaca pueya miiquiaacuaani, jyanohua nojori jiaatiasacari maajiicua. ⁶ Naajuhuj,
majaari quenaaja jiyasohuja niarta pueyano niquiocua nia numuetucunu, neyaca nia
sajonuta. Cuno maajicuaajaari saa neyacaraja, maja tamonura socua. Pueyasocujaari
naa mijiaca saniitionutaniya jyanohua, taa canaa numootequiaari tari nijaniyacujani.
⁷ Pueyasoori maja na saquiriojonu quiquiaari pajaniya sacuraatia mijiaca pa quiniuria.
Pa saquiriojoquiaariiri tojetaarucujanaa sesa miyashijiaca pa quiniuria, saa neraja.
⁸ Naacuajitij, cante nio rootasano ruuretajani, nojuajaari maja saaja na rerequetenu
nio rootasanojiniji pohuatana. Nojuajaari Pueyasojanaa rerequeteya cutara, cante na
Sohuanu niquitioquiaari nijaniyacujani.

⁹ Quiarijiani cuarta Pueyaso pueyanaa, janiyara, najuhanaruhua niaacuara cua naa-
jionura cua niishitiniuria nijaniya, panitiojuaca nia quiniuria. Pueyasocujaari tari
nioojiajinia nia niishitioquiaari panitiojuaca nia quiniuria. ¹⁰ Niaacuajaari seetanujanaa
puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta
Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja
nia cumaquiriquia juhuajaniya quijiaca nia quiniuria. Tama nia poonijosanojiniajaaja nia
cojeriquia, tama nia juaashiquiatajaaja nia poonijosacari, taa canaa rootaquiiaari nijaniy-
acuajani. ¹² Naacuajitij, Pueyaso niishiyashijiaca pueyari nia rerequeteyaquiniutianiya.
Naajuhuj, niaari puetunu nia panishanojuanaa jiitianutaniya.

Taa pa Jiyaniijia tiuquishacariuhua quiniutianiyani

¹³ Cuarta Pueyaso pueyanaa, canaari juhuacarijia nia tonu paniyani taa Jesuucua
tiuujiaa shaajecono pueya miishaanutaniyani. Canaari nia niishitiniuni paniyani maja
nia taraajenura juhua Jesuucua tiuyashijiaca pueya. Nojoriiri maja na jiitianu nojori
Jiyano, nojori na samiitianijionuhua. ¹⁴ Paacuajaari niishiyani Jesuuri cusoquiaari.
Na nuhuaji samiitiaquiariuhuari. Naajuhuj, paari niishiyani, Pueyasoori Jesuucua
tiuujiaa shaajecono pueya samiitianijionutaniuhua, nojori na rijionura Jesuta, Jesu
tiuquishacariuhua.

¹⁵ Canaajanaacuajaari nia sequeyani, niocuajaari pa Jiyaniijia niishitishano canaa: pa-
janiya, canapuate pa Jiyaniijia tiuquishacariuhua saminiucua quiniutianiyaajaani, majaari
macunucua pa puetanu quiniutianiya pa Jiyaniijia pa naacuneetonura jiya cajiniocua.
¹⁶ Naa quiniutianiyaari. Pa Jiyaniijia nacanuari tojishaanutaniya, Pueyaso seya jiyaniijia
nacanujuhuj, Pueyaso trompeta jonenenunio. Jiyacaritij, pa Jiyaniijiajanaari jiyocua-
caanuji rosenutaniya cohuaja najacajiniara. Jiyacarijiihuuj, puetunujanaa Jesuucua
tiuujiaa shaajecono pueyari samiitacanutaniuhua coteenu. ¹⁷ Na nuhuaji pajaniya,
canapuate saminiucua quiyajaani, paari nojoritia ritia rijiosaanutaniya cohuaja najaca-
jiniarani. Paari tii coquetoonutaniya pa Jiyaniijia paratujiniani. Jiyacaritij, paari tari

pueyaracaanu nata quijiacarano quiniutianiyani. ¹⁸ Cua panishano pueyanaa, nio cua pohuatasanota nia cumanijiatooriqia.

5

¹ Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianiuhuani. Niaacuajaari tari na niishiya, naajuhuj, taate mijiria quiniutianiyani na tiuquiyacuishacarijia. ² Niaacuajaari maninia niishiya, pueya jyanishacari juhuanojuaja maja pa Jiyaniijia tiuquiniu quiniutianiuhua, nojuajaari jiyacari tiuquiniutianiya. Nojuajaari canashiyacari tiuquiniutianiya, taa nohuasejojua tiuquiquiaa niucua tijiniaacocuaani, juhuajaniya tia camaru maquesacari. ³ Naajuhuj, quera pa Jiyaniijia tiuquishacarihuua, mijiria quiniaa pueyari naa sequejaca quiniutianiya: “Paacujaja maninia quiyani. Shaaquicujaja miaquetojonu”. Canashiyacari jiyacari, Pueyaso saniitosacari na tojiyashijiacari quiniutianiya. Naa quiniutianiyari taa maaji nooquiaa juhuacatecara canashiyacari na manajacuaani. Majaari quenaaja niquiriyatu curosaanu quiniutianiya saniitosoo. ⁴ Nijaniya saniniujia cuarta Pueyaso pueyanaa, niaari maja juhua ninishiqui quijiacar, pa Jiyaniijia cariyatunura nijaniya. ⁵ Puetunu nijaniyajanaacuajaari cuhuashiqui quijiacar. Pueyasojuanaacuajaari niojiaca cuhuataquiaari. Majaari tari juhua ninishiqui quijiacar pueya pa quiniu. ⁶ Cunora, pa Jiyaniijia sashijiacar pa quirij. Maja juhua tamasaajaja, juhuajaniya quiquioyari. Nojoriiri juhua maquetiuya. Pajaniya saniniujia cuarta Pueyaso pueyanaa, juhua sutejaca pa quirij, maninia niishiriojuacajuhuj. ⁷ Maquetujuacaari niucua maquetuquiaa. Naajuhuj, mashaasequenuujacaari niucua mashaasequenuuquiaa. Naa miijiacari Pueyaso tojiyashijiacar. Majaari na maniniucuanu cuhuashiqui. ⁸ Pajaniya saniniujia, paari cuhuashiqui quijiacar cutarani. Naaratej, pueyaracaanu maninia niishiriojuacar pa quirij. Romano pueya miaquetoosacari, nojoriiri turtuco cushiyonuujuua, nocuaji na nujutajara cashi. Cumueeca casaa cushiyonuujuajaarihuuj, na naca na cojuatajara. Naajuhuj, naa poojia pa cojuare, saaja Jesuucua pa tiuuniutia, seetanujuanaa panijiacar pa quishacarijuhuaj. Seetanujuanaa pa niishiri, Pueyasoari pa saquiriojoquiaari na muerasu pa quiniuria pueyaracaanura. Naacuajitij, pocua pa niishitijaja cojuareni, maja poojia pa niqijiotenura najuhuanaj. Naacuajitij, Sesaacari maja na naata shocotanu quiniutianiya pajaniya. ⁹ Pueyasoari maja na saquiriojonu quiquiaari pajaniya na saniitosocoriqiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujiacar pa quishacari. ¹⁰ Neyanucujacari pocuara cusoquiaari, nata rishijiacar pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuj, pa Jiyaniijia tiuquishacarihuua, puetunu nocua tiuujiacajanaari pueyaracaanu saminio quiniutianiya nata. ¹¹ Naaratej, pueyaracaanu nia cumaquitiiojoriqia Pueyaso rupaata. Naa shiniujiutooriqiajuhuaj, seetanujuanaa pa Jiyaniijia tojiijiacar nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqiu nia jitianaa tojiijiacar nia quiri. Majaari nojori rerequetenu. Nojoriiri jyanohua poonijioquiaa pa Jiyaniijia nojori niishitiojonura nijaniya, na nacasunura nijaniyajujuaj. ¹³ Cunora, jyanohua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria nijaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuhuj cuarta Pueyaso pueyanaa. Taajecori nia nacasure. Noojia niqijitotejaca nia shiniujiuri, seetanujuanaa cumueeca Pueyaso pueya nojori quiniuria. Nio pojori nia cumaquiriquiajuhuaj, Satanás saniniujishacari na cuaqueya miiniu panishano rejeteraashijiacatej. Majaari cuno pojori cartenu. Naa juaanuu nia rejeteriquia, maja quenaaja nia juaniuria tamasaajaja.

¹⁵ Naajuhuj, tama nia cuaqueyajaaja nia cojuariqia maja nia naminiuria niarta pueyano, nojuaja jaara sesa miiriquia nijaniya. Saniniujia, pueyaracaanu maninia nia miitiooriqia niarta Pueyaso pueyata. Naa nia miiriquia puetunu pueyajujuaj.

¹⁶ Pueyaracaanu nia shuquiririquia, Pueyaso pueya nia quiniuucua. ¹⁷ Naajuhuj, pueyaracaanu nia secojoriquia Pueyaso. ¹⁸ Níaa jaara maninia miishaare, niaa jaara sesa miishaarejuhuj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacujaari naa paniya pa miiniuria, Jesucristo Sohuanu pa jiiitianuucua poojiajinia. ¹⁹ Majaari Pueyaso Sohuanu nia ruuretano, nojuaja jaara nioojiajinia nia shiniujiya maninia nia miiniuria. ²⁰ Naajuhuj, majaari nia soonu Pueyaso sequesano caminiujiuniaa pohuatasano. ²¹ Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojijiaca nia quiri. ²² Puetunu sesa niishishano casaajanaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijiaca nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuajaatijia. ²⁴ Cante nia saquiriojuiaaricuaja na pueya nia quiniuriani, nojuajaari puetunu shusha cua sequesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miiija pueyaracaanu.

Pablo sequesano na naajionee na tucuatasaari

²⁵ Cuarta Pueyaso pueyanaa, Pueyaso nia secojonuuriquia canaacuarajuhuj.

²⁶ Canaara nia saruhuatara cuniqui quiniaa parta Pueyaso pueyajuhua nojori nia nujuunuta, seetanujanaa Pueyaso paniniutia.

²⁷ Pa Jiyaniijia jiyaramiquishano cua quiniuucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

²⁸ Pa Jiyaniijia Jesucristo cuaara cumaquiiria nioojia. Cuaara naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaca

¹ Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapue te pa Que Pueyaso rupuejacacuajani, pa Jiyaniijia Jesucristo rupuejacadanio. ² Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quijiacarajuhuj.

Pueyasoori na tojtianu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanhua nia timitiaani jyanohua Pueyasooocua tiuujiaca nia quiniuucua socua, panitiojuaca nia quiniuucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa nijaniyajiniji Pueyaso pueya maapue niquiara tamaquicuua canaa rucanejosacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujuhuaj, Pueyasooocua tiuujiaca nia quiniuucua. ⁵ Pueyaso saquiriojonuucua nijaniya pueyaracaanu shuquiriaatia quijiacua nia quiniuria na shuriucua, cunoori maja najuhuaa quiquiaari. Niaacuajaari seetanujuanaa na pueya. Cunoori maatia niishishiyacua ja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaca pueyari naa naquiya miquiaa nijaniyatej, Jesucristoocua tiuujiaca nia quiniuucua.

⁶ Naajaa, Pueyasocuaajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca nijaniyatej. ⁷ Nijaniya saniniuujia, naquiya mijiosaaquiaarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jyanohua cumaacaraca na seyata jiyocuaanu. ⁸ Tiuquiniutianihuari na saniitionura noo pojori, canapue te Pueyaso niishiniu paniyaquiquiaani, noo pojorijihuaj, pa Jiyaniijia Jesu rupaa ruuretajacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoosaanutaniya pa Jiyaniijia shuriucua. Naacuajitij, majaari nojori niquiniu quiniutianiya na jiquioco, shacantuua na cumaacanio, nojuaja jaara mijiria tiuquiriohua pa shuquiritianura nojuaja. ¹⁰ Jiyacaritij, puetunu na jeenucuasano pueyajanaari jyanohua na timitianutaniya. Puetunu nocua tiuujiaca pueyajanaari jyanohua jiuujiateconutaniya, pa Jiyaniijia na shootiatusacari. Niaari na niquiniutianiyajuhuj, nojuajiniji canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua nijaniya. Canaari niaacuara secojoquiaaaniuhuj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniirajuhua puetunu nia miishanojuanaa, cuno, Pueyasooocua nia tiuuniutia nia poonijisanoni. ¹² Naacuajitij, pa Jiyaniijia Jesuuri socua timitiasaanutaniya naa nia miiniuucua maninatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari nijaniya.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarrijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajanihuaj. ² Canaa sequesano nijaniya nia tojori, pueyanaa. Majaari nia niyajetanu tariucuaanu canaa niishitiojosano nijaniya,

nia jiyajeneyaquiniuucuaaji tamasaca sapojosacari niajaniya. Majaari nia shirriquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaaca jaara naa nia pohuatatare, majaari na sequesano tojiniu. Naajuhuaaj, tamasaca jaara naajionuure tamajaaja, niaara na jiyatesocoriquiano juhua canaa naajionee, majaari nojori tojiniu. Nojoricuajaari nia sapojia. ³Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhuaaja, queraatia pueyari Pueyasooctuaji pishiniutianiya. Jiyacarijiuhuaaj, Pueyaso rootasano Ruuretajajanaari supenuutianiya. Nojuacuajaari tariucua Pueyaso saniitiosocoriquiano na riuriotaca. ⁴Nojuacuajaari Pueyaso paraca. Nojuajaari puetunu pueyajanaa tenujunutianiya maja nojori tojiniuria Pueyaso, pueya shipinijiosano nojori pueyasohuara nojori tarinitianurajuhuaaj. Nojuaja cutaraari tama na cuaqueyajaaja jiyatenutianiya juhua Pueyasora. Pueyaso Secojoua tiajinia cajiniutianiyaari, Jiyaniijiajanaa cajititujinia. Jiyacari sequenutianiyaari: “Janiyacuajaari Pueyasoni”.

⁵Pueyanaa, ¿majateeri nio nia niishiniuucuaaja? Janiyacuajaari nojuajinjii nia poojotajani niaata cua quishacari. ⁶Niaa naasucuaari niishiyacuaja canteeri juhua na quiaajaani, maja juhuanouaja mijiria na miiniuria tama na panishanojuajaaja, Pueyaso paniaquishacarijia. ⁷Seetanujuanaa, Sesaaca cumaacaari tari mijiria poonijia jiyasohuaja. Naajaa, Pueyaso paracaari juhuanouajaaja maja na naata muetanu, pueya niishiniuria nojuaja, na tenujuna cuaara niiquiji rishaarejaatijiaj. ⁸Na tenujuna jaara rishaare niiquiji, jiyacaritij cuno sesaaca sequeri muetanutianiya, jiyanhua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutianiya saaja na rupaata na nooniutia, na shaajanura puetunujuanaa. ⁹Cuno sesa miijia sequeri muetanutianiya Satanás cumaquishacari nojuaja. Naacuajitij, nojuajaari jiyanhua cumaaca jiiitianutianiya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyaariuhuaaj, pueya na sapojonura. ¹⁰Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuee saniitiosocoriquiano pueyacuajani. Nojoriiri sapojosaanutianiya, Pueyaso Rupaa ruuretajaca nojori quiniuucua. Nojoriiri maja na tojiniu paniniu quiquiaari seetanu rupaajanaa, Pueyaso jiyanooniuria nojori. ¹¹Naaratej, Pueyasoori nojori tarinitianutianiya nojori sapojosaanura, nojori tiuuniuria seetanujuanaa sapojonuunuucua. ¹²Naacuajitij, puetunu noo pojoriijanaari saniitiosaanutianiya, canapuee seetanu rupaacuajanaa tiuuni paniaquijiani, sesa miiniu maniniuucuaaja nojori quiniuucua.

Pueyaso muerasuranoori tariucuacaanujinjii saquiriojosano

¹³Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaja, na Sohuanu jataniniuucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyaracaanu Pueyaso sequequiaa niaacuaraani, “paacarasho”. ¹⁴Canaa pohuatasacari Pueyaso rupaa nia niquiara, niaari Jesucristoocua tiuquiaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuani.

¹⁵Naaratej cuarta Pueyaso pueyanaa, majaari nioojia nia niquijiotenu Pueyasooctuaji. Naajuhuaaj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajanijuhuaaj. ¹⁶Jiyanoojia pa Jiyaniijia Jesucristo quiniuucua, pa Que Pueyasojuhuaaj, nojoriiri pa paniquiaa. Naajuhuaaj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanhua maninia miishaanutianiya pueyaracaanuni. ¹⁷Naajuhuaaj, nojori cuaara nioojia shiniujiiria, maninia nojori tojtiaajaca nia quiniuria pueyaracaanu. Nojori cuaara cumaquiiria niajaniya, tojetaarucujanaa maninia nia sequesano quiniuria, nia miishanonio.

¹ Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari nijaniyacuaani. ² Canaacuara nia secojorejuhuaj, Pueyaso cojuanura canaa na tojiyashijiaca pueyacujaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuniu Pueyasocua. Cuno pojoricuajaari canaa paracaajiaca. ³ Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niqijiotenura nocuaji. Sesaacaacuaji nia cojuanutaniyajaariuhuaj. ⁴ Pa Jiyaniijiaacua canaa tiuushacari, majaari canaa taacanuunu niaa naasucuaari canaa rootasano tojtiaaquiniutianiya. Maja. Niaa naasucuaari na tojtiaacuaja. ⁵ Pa Jiyaniijia cuaara niishiitiiria nioojiajania, panijaca nia quiniuria taa Pueyaso paniyacuani. Naajuhuj, cuaara nia niishiitiiria naquiya miiniu rejeretajaca nia quiniuria, Jesucristo cumaquishacari nijaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniucua, canaa nia tojitiare. Majaari noo pojori nia rupeenu: taajecoritij, noo pojorijiuhuaj, canaa rootasano tojiyashijiatej. ⁷ Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quiriujuhuj. Majaari canaa taajeyaca canaa matanu quijiani. ⁸ Majaari najuhuaana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitianura, maja quenaaja canaa taajetenura nijaniya, maja nia tacaatianura canaajuhuj. ⁹ Pueyaso jiyaramiquishano pueya canaa quiniucua, canaa naata quiquiaaricuaajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canaajuhuj. ¹⁰ Canaa quishacari niaata jiyacarijuhuaj, canaari nio nia niishitiojoquiaarini: “Cante poonijionu paniyaquiyani, cuaara miaqueteshiyaquiirijuhuj”. ¹¹ Canaari pohuatasaarucuaajaaniuhuaj, noojiaqueya nijaniyajinijionaaari juhuajaniya quiquiaa. Majanaari na poonijionuunu quiquiaa. Nojoriniari noo pojori cushitiojoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniucua, canaari cuno taajecori sequeyani, nojori cuaara poonijionuura, nojori panishano nojori jiitianura.

¹³ Cuarta Pueyaso pueyanaa, teyano nijaniyajinijiniote maninia miijiacuaani, majaari maninia miiniu nia tarinitianu. ¹⁴ Saniniuujia, cante nio naajioneeginia canaa sequesano tojinu paniyaquiyani, nojuaja nia niishiri cantenononi. Majaari na rupeunonon, na caririqiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniucua.

Pablo sequesano na naajio na tucuatasaari

¹⁶ Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu nijaniyajanaa.

¹⁷ Jiyaniari Pabloni. Cua saruhuanura nijaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenononi. Janiyari naa puetunu cua naajioneecajanaa tucuatquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiiria puetunu nijaniyajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ²Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuaj, nojori cuaara cumaquiiria quiajaniya. Nojori cuaara quioqua taraajeerajuhuj. Nojori cuaara pueyaracaanu quioojia cajitiirajuhuj.

Pablo sequesacari sesa niishitiojonuujuaca cuaara sanaajasaaria

³Janiya jaara Macedonia jiyajiniara quiaquiaarini, janiyacuajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴Janiyari quia sequequiaarijihuhuj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijihuhuj, maja nojori niishiriojonura nojori supuetanaa sesacajinia, cuno, najuhuana tucuyocuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunoocua juayonuujuataquiaa saaja. Saniniuuja, nojori cuaara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuaara shitimia panitiojuaca quiiria, juhua jeequesano nojori jiuujia quishacari. Seetanujanaa Pueyasocua nojori tiuushacari, nojori cuaara panitioora maja nojia macuhajenuta sesa nojori miishanojiniji. ⁶Noojiaqueya cuno pojorijinjinioori tari tarinitiacanu tojiniu nio maninia niishitiojosano. Nojoriiri cushitiquianu na pocojonuucua, na nacojonuucua najuhuana tama nojori niishishanojinijiaaja. ⁷Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujiushacari pueya, pueya tojiniuria najuhuana capa nojori niishitiojosano.

⁸Paacuajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiari pa supuetanaani. ⁹Paacuajaari niishiyani, Moisés Rootasanoori maja na pueretenu maninia miijiaa pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso sojeacarajuhuj, sesa miijiacarani. Moisés Rootasanoori Pueyaso rerequetecacara, Pueyaso casaa rerequetecacarajuhuj, noo pojorirajuhuj, tama na que tacartaja monutej, na nucuanio, pueya puecojuacarajuhuj. ¹⁰Moisés Rootasanoori na camishoo maajipohua numuetucunujuacara, maajishurihuara, na numuetucunujuacarani. Moisés Rootasanoori pueya nohuasenujuacara juhua casami na niqitiojosocoriquiano tamasaca seyara; sapojonujuacarajuhuj; na sapojonuta na sequesano maatejaceranio, nocua na tiuushaanura; puetunu noo pojorirajanaanio, maninia niishitiojosano tojiyashijiatej. ¹¹Cuno maninia niishitiojosanoni, cunocujaari cua pohuatasano Jesucristo rupaajinjiji, pueya jatanura Pueyaso pueyara. Pueyasoori jiyanoohua maninia, cuno rupaa pohuatanara na jiyatenuucua janiya.

Pablo shuquiritiasacari Pueyaso, na rupaa pohuatanara na jiyatenuucua nojuaja

¹²Pa Jiyaniijia Jesucristoori cucua tiuquaiari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, "paacarasho". ¹³Tariucuacaanu, janiyari nocuara rimiaaqueja quiquiaari sacuaratiani. Janiyari naquiya na miiquaiarijihuhuj, nocua tiuujiaa cua

miitiasacari. Janiyari jiyanoohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacarijia. ¹⁴Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujaia cua quiniuria, panijia cua quiniuriajuhuaj.

¹⁵Timoteonaa, nioori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jyanootiniuria sesa miijiaca. Janiyacuajaari tojetaarucujanaa cuno sesa miijiaca pueyajinijinio na jiyanooshanoni.

¹⁶Janiyari naa jiyanooshaaquiaarini puetunu pueyajanaa niishiniuria taa jiyanoohua jyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaa janiya, sesa miijia cua quishacarijiatej, Jesucristoocua tiujiacarano cuaara niishiiria, nojoriiri na naata jiyanooshaanujuhuj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. ¹⁷Naa jyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari Jiyaniijiajuhanajaj. Nojuajaari Pueyasocua, shaajeyashijia, namijata niqiyakuishoo. jJiyanoohua maniniaari pa Jiyaniijia! jNaa seetanujuanaari!

¹⁸Timoteonaa, quiaacuajaari niishiya taa Pueyaso cumaquiaari quiajaniyacuajani, nera quia poonijionura. Cunoori quiquiaari Pueyaso pueya jiiitianaa jaara caminiujuquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹Naa quia quiri Pueyaso rupaa quia pohuatasacari, seetanujuanaa na rupaacua tiuujaia quia quishacari, seetanujuanaa na rupaa tojjia quia quishacarijuhuj. Naa quijia quia quiriritij, quioojia mariqui quia macuhujareeri quiaa jaara sesa miiriquia. Noojiaqueya pueyari tari Pueyasocua tiuuni tarinitiacanu nojori ruuretanuucua Pueyaso Sohanu numootesacari nojori jiuujiajinia, sesa nojori miishacari. ²⁰Naa miitiuquianuuri Himeneo, Alejandro. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaratia nojori rimiaaquenura Pueyasocua.

2

Secojonuunura niishitiojosano

¹Cua tojiri Timoteonaa, niaa jaara Pueyaso secojnuuriquia, nia secojnuure puetunu pueyacuarajanaa. Nia panishano casaacuara nia secojoriquiajuhuaj. Naajuhuj, Pueyaso nia sequeriquia “paacarasho”, pueyaracaanu maninia na miiniuucua. ²Jiya jiyaniijianucuaacuara nia secojnuuriquiajuhuaj, puetunu pueya camarucuaacuarajuhuj. Nojoricuara nia secojnuuriquia, juhuajaniya pa quiniuria panaatia, juhuajaniya pa tojinuria Pueyaso, maninia pa quiniuria parta pueyatajuhuj. ³Pa Jiyanoojia Pueyasoori naa paniquiaa pa secojnuratej. Naa pa secojosano maniniucuaquiaari. ⁴Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijia nojori quiniuriajuhuaj. ⁵Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quiya Pueyaso jyanootijia pueya. Nojuajaari Jesucristocua. ⁶Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosanura narta pueya niti. Naacuajitij, na Que Pueyasoori na naata jiyanooni pajaniya saniniuuja. Quiarijiacuajaari Pueyaso panishacari Neyanujiniji pohuataasanura pueya niquiara, nojori jiyanooshaanura. ⁷Nio rupaa cua pohuatanurajuhuj, Pueyasojuaari cua jiyatequiaari Jesucristojiniji pohuatana cua quiniuria. Cua jiyaramiquiaariiri taucua cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaj. Nio cua sequesanoori seetanujuanaa. Majaari cua sapojonu.

⁸Cunora, cua tojiri. Janiyari paniyani puetunu tiqiyocujanaa pueya secojnuunura Pueyaso. Jiyocuaanu nojori shiitiosacari nojori juashiquia nojori secojonura, nojori

jiuuja cuaara quiiria jeequesano sesa nojori miishanojiniji. Naajuhuj, cuaara quiyaqui-
 iria najiquitishano, maja sesa niishiriojonutajuhuj. ⁹ Naajuhuj, janiyari paniyani
 maajipohua cuaara cushiyaquiiria puera maniniuquiya toqueya, narta maajipohua na
 shocotanura. Cuaara cushiyaquiiria cararaatia niquishano toqueyajuhuj. Maniniacua-
 jaari nojori maniniushiniuria. Sesa cutaraari nojori maniniushiniuria puera, pueya
 shootianura nojori. Nojori cuaara jiyaniyaquiiria nojoriiri seetanujuanaa shanohua
 niquishano, nojori muecaca jeecasano quishacari puera, nojori cushishacari orojiniji
 shipinishano casaanio. ¿Maajitiiri seetanujuanaa shanohua niquishano maaji, na cushi-
 tianuucua queraatia cumaneecata masesano noturu shipinijosano sai tiujiau, queraatia
 cumaneecata masesano maniniuquiya toqueyano? Maja. ¹⁰ Nojori cuaara maniniu-
 cuasaariquia cutara, maninia miijiaa maajipohua nojori quiniuucua. Nojori cuaara
 quiiria juhua noo maajipohujaja, canapuetucujaja tama nojori cuaqueyajaaja jiyatecanu
 Pueyasora na quiniuria seetanujuanaani. ¹¹ Pueyaso rupaa niishitiojosacari, maajipohua
 cuaara tojitiariquia sanaa, maja Pueyaso rupaa pohuatanaa na rejetenuta. ¹² Maja
 cutaraari cua shanacunu maajipohua niishitiojonura Pueyaso rupaa pueya niquiara.
 Naajuhuj, majaari cua shanacunu maajipohua jiyatesaanura narta Pueyaso pueya jii-
 tiana na quiniuria. Nojori cuaara sanaa tojitiariquia cutara, narta Pueyaso pueya rerejosacari.
¹³ Quia niishiri Timoteonaa, casaara naa cua sequeyani. Pueyasocujajaari coteenu Adán
 shipiniquiaari. Na nuhuaji Adán niquiorano Eva shipiniquiaariiri. ¹⁴ Quia niishirijuhuj,
 Soconurano jaara sapojoquiaari Evatej, majaari na sapojonu quiquiaari neyaca Adán. Eva
 cutaraari sapojosaaquiaari. Naacuajitij, na sapojosaanuucua, Evaari Pueyaso tojiyashijara
 quiquiaari. ¹⁵ Naaratej, maajipohua cuaara maninia canashitijioora necohua. Cuaara pani-
 jiaca quiirajuhuj. Cuaara maninia miijiaa quiirajuhuj, maninia niishiriojojuaca nojori
 quishacari. Naa maajipohua miishacaritij, Pueyasoori nojori jiiitianutaniya maninia,
 Jesucristoocua tiuujiaca nojori quishacari.

3

Pueyaso pueya jiiitianatucua taamueca pueyano quiiriquiani

¹ Nio sequesanoori seetanujuanaa: cante Pueyaso pueya jiiitianara quiniu paniyani,
 nojuajaari maninia poonijosano miiniuucua jiaatiaa. ² Naaratej, cante Pueyaso pueya
 jiiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriy-
 atu maaji niyaca. Cuaara quiiria noojia niquijioteyashijia, maninia niishiriojojuajuhuj,
 pueya rerequeteyaquishoonio. Cuaara quiiria maninia pueyano, rucoojuaca pueya
 tiuquinitiaja na tiajinia. Cuaara quiiria Pueyaso rupaa niishitiojojuaa maninia. ³ Naajuhuj,
 nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na
 piniuria. Cuaara quiiria pueya rihuaneyashijia, pueya juaashacari nojuaja. Cuaara quiiria
 shiniquiajuhuj. Cuaara cumaneecaacua jiaatiaashijia quiirajuhuj. ⁴ Naajuhuj, nojuaja
 cuaara na tiajinia quiniaa jiiitiaja quiiria maninia. Cuaara necohua niishitiojojuaa quiiria
 maniniajuhuaj, tojitiajaca nojori quiniuria, pueya rerequeteyashijiacanio. ⁵ Naacuajitij,
 pueyano jaara maninia casaa necohua niishitiojiyashijia quiiriquia, ¿maatucua taa maninia
 jiiitariquia Pueyaso pueya maanuni? ⁶ Naajuhuj, Pueyaso pueya maanu jiiitariquiano
 cuaara quiiria seetanujuanaa Pueyaso tojijia pueyano cutara. Cuaara quiyaquiiria shusha
 Pueyasocua tiuunio pueyano, nojuaja mariqui jiyaniiriiri nojuaja tojishano pueyano
 cutara. Nojuaja jaara jiyaniiri nojuaja socua maninia pueyano narta Pueyaso pueyajiniji,
 nojuajaari cocuaatia miya taa Satanás miiquiaaricuaani. Pueyaso panishano seru Sa-
 tanás quishacarijia, nojuacuajaari taanusaquiaari Pueyaso shuriucujaja, na jiyaniishacari
 nojuaja na naata na Jiyaniijia Pueyaso shocotanu. ⁷ Naajuhuj, Pueyaso pueya maanu
 jiiitariquiano cuaara quiiria maninia miijia pueyano, Jesucua tiuyashijia pueya mariqui
 na sesacareeri maninia miyashijia na quishacari. Nojuaja jaara naa rerequetesano quiriritij,
 nojuajaari juhua Sesaaca norijosano quiniutaniya. Naacuajitij, pueya tojiyaquishano
 quiniutaniyari.

Narta Pueyaso pueya naacunaatucua taamueca pueya quiiriquiani

⁸ Naajuhuj, parta Pueyaso pueya naacuna cuaara quiiria tojishano pueya, rerequete-soo. Cuaara quiiria na sequesano miijiaca. Cuaara quiyaquiiria puera mashaca jereeca ratunuucua jitinio. Cuaara quiiria cumaneecaacua jiaatiaashijia, jiyasohuaja na nohuase-
 jonura, na sapojonuta na masenurano. ⁹ Naajuhuj, nojori cuaara seetanujuanaa Pueyaso
 rupaa tojijiaa quiiria, teyanooqua tiuujiaca pa quiyacuajani. Naacuajitij, nojori jaara
 naa miijiaca quiriritij, ¿nojoritiuqua casaacua cararosaariquiani? ¹⁰ Cunora, pueya cuaara
 senota jiyateyaquishaaria Pueyaso pueya naacuna nojori quiniuria. Cuaara coteenu
 maninia niishishiiria nojori seetanujuanaa Pueyaso tojitiajaca. Nojori jaara maninia
 miijiaca pueya quiri, na nuhuaji cutara, nojori cuaara jiyatesaaria narta Pueyaso pueya
 naacuna nojori quiniuria. ¹¹ Naajuhuj, Pueyaso pueya naacuna niquiocohua cuaara
 quiiria tojishano maajipohua, maja rimiaacatujuri. Cuaara quiiria niishiriojuaca, na
 sequesano miijiaca pueyaracaanunio. ¹² Cante Pueyaso pueya naacunaani, nojori cuaara
 jiitiaara saa niquiriyatu niquiocuaja. Cuaara quiiria necohua niishitiojua maninia casaa,
 na tojitiajaca necohua quiniuria. Naajuhuj, cuaara quiiria maninia jiitiaja na tiajinia
 quiniaa pueya. ¹³ Naacuajitij, Pueyaso pueya naacuna jaara maninia poonijioquia na
 naacusacari narta Pueyaso pueya, nojori seetanujuanaa pueya tojishano pueya quini-
 utianiya. Naajuhuj, nojoriiri socua jiyanohua Jesucristoocua tiuujiacara jatanutaniya, na
 puereyaquiniutia nojori poonijionura pa Jiyaniijiaara.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quiocua naquerejiyani. Naajaa, janiyari quiara naajiya nioni.
 Naacuajitij, janiya jaara tarishirini, janiyari panyani juhuacarijia quia niishiniuria taa
 quijia quia quiniutianiyani, Pueyaso pueya maanujinia quia quishacari. Pueyaso pueya
 maanucuaaari pueyaracaanu rishijia Pueyaso quiquio. Na saquiriojosano pueya nojori
 quiniucua, nojoriiri na rupaa jiitianaacuaja, nocuaji tacunaajaarihuaj. ¹⁶ Seetanujuanaa
 nocuaji jiuujiatesanoori Pueyaso niishitishano Jesucristojiniji pajaniya. Paari nio seque-
 sanoocua tiuujiacani:

Pueyaso Niyanuuri pueyanora jataquiaari, na rupenura pajaniya. Pueyaso Sohuanu-
 uri pa niishitiquiaari, nojuajaari tojetaarucujanaa sesa miyashijia. Naajuhuj,
 Pueyaso seyacuajaari Jesu niquiquiaari na samiitiasacariuhua. Nojuajiniijiri pohnu-
 atasaquiaari Judiocuaca niquiara, taucuaca niquiarajuhuj. Pueyapueeri nocua
 tiuuquiaari. Na Queeri na tacaniquiaariuhua Jiyaniijiajanaa na quiniuria.

4

Pueyaso Rupaa carteriquiano pueyajiniji pohnuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya
 pueyari Pueyaso rupaa tarinitianutaniya tojiniu, tamaatia niishitiojosano nojori tojini-
 uucua. Nojoriiri seetanujuanaa sapojosaanutaniya naa nojori tojiniucua samaruhua
 niishishano. ² Nojoriiri sapojonuujua pueya tojitiajacara quiniutianiya, noo pojori,
 sapenu juhua maninia niquishano pueyatej. Cuno sapojonuujuaacari tariucua sesa
 miiniucua jiitiquiono. Majaari tari na niishituniu caririquiniu. ³ Cuno pojoriiri pueya
 niishitiojua maja na caminiuria. Niishitijonuquiaajaarihuaj maja pueya miaquenura
 noojiaqueya miaquesanojuhuaj, teyano Pueyaso shipiniquiaari Jesuucua tiuujiacaracua-
 jani, cante seetanu rupaajanaa niishijiacacuajani. Cuno miaquesanocuaajaari pa timitiaso-
 coriquiano, Pueyaso pa sequenura, “paacarasho”. ⁴ Puetunu Pueyaso shipinishano casaa-
 janaari maninia. Puetunu miaquesano casaajanaa cuaara puereyaquishaaria miaquenu,
 paa jaara coteenu nocuara Pueyaso sequereni, “paacarasho”. ⁵ Pueyaso rupaacua tiuujiaca
 pa quishacari, naacuajitij, nocuara pa secojosacari, Pueyasoori na jiyatequiaa maninia na
 quiniuria pajaniyara.

Jesucristora poonijiona pueyanotucua taamuca pueyano quiriqiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya.
 Naajuhuj, pueyaracaanu tama quia cuaqueyajaaja quia cumaquiriquia Jesucristojiniji pa

niishishano rupaata, tama Jesucristojuuaaja rootasanotanio, taa quia tojiquiaacuajano. Quiaa jaara naa miijia quiriritij, quiaari maninia poonijiona quiniutianiya Jesucristora.

⁷ Majaari najuhuana tariucuacaanu supuetanaa pohuatanuusano tojjia quia quiniu, najuhuana tama pueya niishishanojuuaajano. Majaari cuno tojiniuucua quia cojenu najuhanaj. Jiyanhua quia jiaatiare cutara, saaja Pueyaso tojjia quia quiniuria. Naa miiniu quia saniniujiuri jiyanhua, seetanujuanaa Pueyaso panijia quia quiniuria. ⁸ Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniujia, socua jiyanhua maninia cutaraari Pueyaso panijia pa quiniuria seetanujuanaa. Cunoori jiyanhua maninia, mijiria pa quishacariria, Pueyaso shuriucua pa quishacarirajuhuj. ⁹ Nio cua sequesanoori seetanujuanaa. Puetunu pueyajanaa cuaara na tojiiria. ¹⁰ Cunora, pueya jaara pa miitiriqia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiyani. Nojuacuajaari puetunu pueyacuaji Tacunajanaa, canapue cutarate nocua tiuujiacuajani.

¹¹ Nio cua sequesano quiajaniya quia niishitiojore pueya. Nojori quia nacasuriqia jiyanhua, na tojtianura quiajaniya. ¹² Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhuj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuj, seetanujuanaa panijia quia quiri, Pueyaso rupaacua tiuujajuhuj. Majaari rucuaejejoju quia quiniu. Naa maninia miijia quia quiri, pueya jiaatianura quiocua. ¹³ Naacuajitij, cua tiuquiyaquishacarijia quiocua, pueya niqiuara maatia quia serojoriquia Pueyaso Rupaa. Parta Pueyaso pueya quia nacasuriqia jiyanhua, Pueyaso tojtijajaca nojori quiniuhua seetanujuanaa. Seetanujuanaa nojori quia niishitiojoriquia maninia. ¹⁴ Pueyasocuaajaari na cumaaca niqutioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyaracaanu. Majaari najuhuana na jiitianu.

¹⁵ Puetunu niya cua rootasanojuanaa quiajaniyani, cuno tojjia quia quiriquia. Naa quia quiriritij, puetunu pueyajanaa niquiniuria taa seetanujuanaa socua maninia Pueyaso tojjijara quia quiyareeni. ¹⁶ Naacuajitij, tama quioojiaaja quia cojuare. Naajuhuj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtijajaca pueyari Pueyaso pueyara quiniutianiyajuhuj.

5

Paatucua taa jiitariqia parta Pueyaso pueyani

¹ Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacarijuhuj, juhua quia tapueyocua. ² Naajuhuj, motajoori quia nacasure juhua quia nucua. Niyacoori quia nacasure juhua quia rimiatuhujuhuj, maja nojoriicua quia jiaatianuta.

³ Mashiquiopue jaara tojetaarucujanaa niqiuohaju quiri, jinianuhujunio, Pueyaso pueya cuaara nojori naacuura. ⁴ Saniniujia, mashiquio jaara niqiuohuaraca quiriquia, jinianuhuaraca soj, cuno pojori cuaara coteenu tama na nucuajaaja cojuatunu niishiiria, na jijiuhuj. Naacuajitij, necohua cuaara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyacia taraajajaca timitiaja. ⁵ Noo mashiquio, cante seetanujuanaa jiyopueejuni, nojuajaari saaja Pueyasocua tiuquiaa. Majaari na tarinitianu secojonu juuca, niucuanio. ⁶ Noo mashiquio

saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarijia. ⁷ Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. ⁸ Canapute na queecua, na nucuacua taraajeyaquijiani, tama na tijinia quijiaca pueyacuajuhuj, naa miijacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucujanaa sesa, Pueyasoocua tiuyaquijia pueyajiniji.

⁹ Mashiquio jaara Pueyaso pueya jiitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni.

¹⁰ Cuno mashiquio cuaara niishishano maaji quiiria, maninia miijia na quiniucua. Cuaara quiirijuhuj, cante maninia canashitijioquiaari necohuani. Cuaara rucojuacaacua taraajeja quiirijuhuj, na tijinia na maquiojojua. Cuaara maninia miijia quiirijuhuj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiirijuhuj, nojori cumanjianajuhuj. Cuaara puetunu maninia na miiniujianaa tarinitiaaquijia quiirijuhuj.

¹¹ Saniniuujia, noo mashiquio, teyanote juhuanojuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiitianaa naacunaara. Nojori na naata Cristo samiritianu, niyacaaniucua nojori jiaatiasacari. ¹² Naacuajitij, nojori camishacariuhua, nojoriiri tari sesa miirri, nojori jatanuucua nojori sequesano saaja Jesucristora na poonijionura. ¹³ Naajuhuj, niyacoo naata mashiquio nojori quishacarijia, nojoriiri saaja rucuanejonu maniniucuaaja, na tiuquijionura puetunu tiacojuanaa. Naa tama na poonijosanojuaja na jiitiaaquishacaritij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiniu tamasaraj. Naajuhuj, sacuaratia neteyocojiyari juhua paateca, na taajetenura pueya, na caminiujishacari jiyasohuaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara mueturajuhuj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵ Noojiaqueya niyacoojori naata mashiquiopueeri Pueyaso tojinu tarinitiacanu tari, Satanás tojiijaca nojori quiniuria saniniuujia.

¹⁶ Pa Jiyaniijiaacua tiuujia maajipohuajinijinio jaara tama na pueyajinijiniojuaja jiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapute tojetaarucujanaa jiyopueejuni.

¹⁷ Pueyaso pueya jiitianaa, noo pojori canapute maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuj, nojori cuaara nareja niqutiosaaria, na panishano nojori jiitianura. Pueyaso pueya maanu jiitianaajinijinio, canapute Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niqutiosaaria, maninia poonijosano nojori miiniucua. ¹⁸ Tariucuaaanu Pueyaso Rupaajinia naajiotasanoori naa niishitiojiyajuhuj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucujiniji”.

Naa sequeyajaariuhuj:

“Poonijotesano pueyano cuaara niqutiosaaria na poonijionu sami”.

¹⁹ Pueyano jaara saquirojotariquia Pueyaso pueya maanu jiitianaacuara, majaari na tojinu, jaara nocuara cojitiaaquiri saquirojotanu. Querajaa pueya jaara nocuara cojitiare saquirojotanu, cuno pojori sequesano cutaraari seetanujuanaa. ²⁰ Naacuajitij, Pueyaso pueya maanu jiitianaajinijinio jaara sesa miiriquia, Pueyaso pueya maanu niqiara quia nacasurenoj, puetunu narta Pueyaso pueyajanaa puerenura, maja sesa nojori miiniurajuhuj. ²¹ Timoteonaa, janiyari nio quia sequeya Pueyaso niqiariani, Jesucristo niqiarijuhuj, na saquirojosano seya niqiarianio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa

maninia pa niishiyaquishacari na miishano. Naajuhuj, majaari pa naata jiuujiaani pa panishano pueyano, nojuaja jaara sesa miiri. Naacujitij, majaari rimiajata miijionu sacuaraatia. ²² Naajuhuj, majaari senota quia juaashiquia quia nianu quia niishishoo pueyanooocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenononi, maja sesa mijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiuutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia quiniuucua, secaja vino quia raturiquiajuhuaj quia jiniacuma na jeeanura.

²⁴ Noojiaqueya pueya, sesa nojori miishanoori maatia niishishanocuja, Pueyaso saniitionu juuca quiaquishacarijia. Tamasacara saniniujia, sesa nojori miishanoori maja na niishishaanu quiniutianiya juhuanojuaja, Pueyaso cuaara nojori nujuatejore na tacojiaatijia, na nequesoreesocoriquiano. ²⁵ Naajaariuhuj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaj niishishaanutaniya maatiajuhuaj.

6

¹ Parta Pueyaso pueyajinijinio, canapue te poonijioesano pueyani, nojori cuaara na camarucua tojtiajaca quiiria. Nojori cuaara rerequeteyaquiiira na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniuucua. ² Poonijioesano pueyano camarnu jaara Pueyaso pueyano quiriqia, juhua na serujuhuj, na seru cuaara na tojjia quiiria. Cuaara na rerequeteja quiaquiiira, narta Pueyaso pueyano na camarnu quiniuucua. Nojuaja cuaara seetanujuanaa maninia poonijioora nera, na niishishacari na camarnucujaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuj. ³ Tamonu jaara tamaatia niishitiojoriquia cua niishitiojosanojiniji, nojuajaari tojetaarucujanaa moseeca. Pa Jiyaniijia Jesucristo rupaari jiyanhua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocujuhuj, Pueyaso rootasanojiniji na taacanusacari. Naa quijia pueya quishacarij, nojoriiri juaajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetoquiaa na juayonutanura. Sesacatoquiaajaariuhuj. Naajuhuj, nojoriiri najuhua soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaquijia. Nojoriiri maja na naata maninia niishiriojonu socua. Nojoriiri maja na niishiniu seetanu rupajaanaa Pueyasojiniji. Nojoriiri Pueyaso pueya jiitiajacara quiniu paniya, nojori jyanishacari nojoriiri naacujia jyanohua casamiriacara quiniutianiya. ⁶ Taaquiririni, Pueyasooocua tiuujia pa quishacari, paacuaaquiniatej seetanujuanaa juhua queraatia casamiriaca quijiacani. Paacujaari shuquiriaatia quijia Pueyaso rupacua tiuujia pa quishacari, juhuajaniya quijia pa quishacarijuhuaj pa jitiiasano casaaniyojuata. ⁷ Paacujaari juhuasunucua roosaaquiaari mijiriani. Naajuhuj, paari juhuasunucua tacateriquianohuani. ⁸ Naaratej, paa jaara pa miaquesocoriquiano jitiariquiani, paa jaara pa cushishocoriquiano jitiariquijuhuj, saa cunotaja shuquiriaatia pa quirij. ⁹ Saniniujia, noo pojori, jyanohua casamiriaca quiniuucua jiaatijacatej, nojoriiri maja na niishiniu rejetenu, na panishano na miyaquiniuria. Naacujitij, nojoriiri cocuaatia miiquiaa. Nojoriiri juhua norijiosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. ¹⁰ Cumaneeacaacia jiaatianu jyanohuani, cuniquij supuejaari puetunu sesa casaa

pa miiniurijanaa. Naacuajitij, noojiaqueya parta Pueyaso pueyajiniinioori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneeacaqua jiaatiajaca nojori quishacaritij. Naaratej Timoteonaa, majaari cuma-neecaqua jiaatiaja quia quiniu.

Pablo shiniujiushacari Timoteo, Pueyaso tojjia na quiniuria pueyaracaanu

¹¹ Quiajanía Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia mijia quia quiri, juhua pa Jiyaniijiaja. Pueyasocua tiuujia quia quiri socua. Socua panijia quia quirijuhuj. Puetunu casaajanaa rejeretaja quia quirijuhuj. Jacaria pocuaja quia quirijuhuj, maja pueya rerequeteja. ¹² Pa paraca nujuataja quia quiri quia, jiyano hua quia tiuuniutia Pueyaso rupaacua. Pueyasocujaari quia saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujini. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajanía jaaretenu. ¹³ Quiaacuajaari niishiya taa Jesucristo seetanujanaa pohuataquiaari Poncio Pilato niquiaracujani, nojuajaari seetanujanaa Pueyaso Niyanu. Naajaa, nojuajaari niishiquiaari nojuajaari cunora mosaanutaníya. Na Que Pueyasocujaari na samiitiani quiaariuhua. Pueyasocujaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhuj. Cua tojori. ¹⁴ Puetunu cua rootasano quiajaníyanaa quia tojori. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaníyacuajani, na tojjia quia quiri pueyaracaanu, pa Jiyaniijia Jesucristo cuara tiuquiriohuajaatijia, Jiyaniijiajanaa na quiniuria. ¹⁵ Na Que Pueyasoori na tiuquitiniutianíya na panishacari, taa na sequequiaaricujani. Pueyasocujaari jyanohua pa timitiasano, saaja maninia na quiniucua. Nojuajaari Jiyaniijia. Nojuajaari puetunu tamasaca jiyaniijianucujanaa Jiyaniijia. Nojuajaari camarucujiníji Camarnujanaa cutara. ¹⁶ Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianíyajuhuj. Nojuajaari jyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuara pueyaracaanu timitiasaari! ¡Nojuajaari namitia na cumaaca jitianajuhuanajaj! Cuaara naa quiri pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniucua. Nojori cuara niishiirajuhuj, maja na casamiicua nojori tiuuniuria, nojori jyanishacari nojoriiri pueyaracaanu shuquiriaatia quijia quiniutianíya casamiriaca nojori quiniucua. Pa jitianasano casamiiri shaajeriquiano. Nojori cuara Pueyasocua tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia mijia nojori quiniuria. Naatej, taa queraatia casamiriacatucua nojorini, maninia nojori miishano cuara naa queraatia quiriuhuj. Nojori cuara ritia niqutiojojuaca quiri nojori jitianasojiníji, narta Pueyaso pueyano jitianaquishacata na panishano. ¹⁹ Naa capora nojori quishacaritij, nojoriiri juhua tari jiyocuaanu racataa nojori casa. Naacuajitij, nojoriiri seetanujanaa shuquiriaatia quijia quiniutianíya pueyaracaanu, mijiria, jiyocuaanunio.

Pablo rootasano Timoteo, naajionu na tucuatascari

²⁰ Timoteonaa, Pueyasocujaari quia jiyatequiaari na rupaajiníji pohuatana quia quiniuria. Maninia quia cojure seetanu Pueyaso rupaajanaa. Majaari najuhuaa tama pueya niishitiojosanojuaja tojjia quia quiniu. Noo niishishanojuhuaj, pueya sequesano: “Seetanu niishijajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaari. ²¹ Noojiaqueya parta Pueyaso pueyari

Pueyaso rupaa tojiniu tarinitiacanu tari, cuno najuhuana niishishanoocua nojori tiuuni-
uucua. Niojuanaa Timoteonaa.

Pa Jiyaniijia cuara quia cumaquiiria.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuaaj, nojori cuara cumaquiiria quiajaniya. Naajuhuaaj, nojori cuara taraajeera quioocua, nojori cuara pueyaracaanu quioojia cajitiiriajuhuaaj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara sec-ojoquiaani. Cua niishiriojosacari quiajaniya, maninia Pueyaso tojjia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojtiaquiaari Pueyasocuaani. ⁴ Majaari cua niyajetanu quiquiaa quia nujuquenu cucua, janiya jaara quia shuriucuaaji quiaquiaarini. Janiyari cunora jiyanoohua jiaatiaa cua niquiniuria quiajaniyani, shuquiriaatiaa cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujiacuaja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaca quiquiaari. Majaari cua taacanuuu quiaari seetanujuanaa Jesucristoocua tiuujiaca quiquiaajuhuaaj, taa nojori quiquiaaricuaani.

⁶ Pueyasocujaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quioocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quioocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniuriajuhuaaj, maninia niishirio-jojuacarano. ⁸ Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuaaj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuaaj, Jesucristojiniji quia pohuatasacari. ⁹ Pueyasocujaari pa jiyatequiaari na pueyara. Nojuajaari pa saquirio-joquiaari saa neraja pa quiniuria. Na jiyanooniu pajaniyani, majaari na quiniu quiquiaari maninia mijiaa pa quiniuucua juucua. Maja. Nojuacuajaari naa pa jiyanoocuaari saaja naa na miiniu paniniuucua, jiyanoojia na quiniuucua juhuaaj. Jiya shipiniyaquishacarijia, Pueyasoori jiyacari niishiriojoquiaari taa na jiyanoonitianiya pajaniyani, Jesucristo cusosacari pa niti. ¹⁰ Quiari naataja pocuaji Tacuna Jesucristo niniuucua, Pueyasoori pa niishitiquiaari taate na naata jiyanooniu pajaniyani. Cunora, Jesucristoori pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaara jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquiarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhuaaj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacuajani. Naa quia miiriquia Pueyaso rupaacua tiuujiaca quia quishacari, pueya panijia quia quiniuucua juhuaaj, Jesucristo rupuesano pa quiniuucua. ¹⁴ Pueyasocujaari quia niishitiquiaari seetanu rupaajanaa. Pueyaso Sohuanu quiniuucua poojiajinia na

cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiari tamajaaja. Majaari na naacutunu paniniu quiqianu janiya. Nojorijinijioori quiqianujuhua Figelo, Hermógenesnio. ¹⁶⁻¹⁷ Saniniuujia, Onesiforo cutaraari cucua tiuquitiiasucanu. Cunora, pa Jiyaniijia cuaara nocua taraajeera, puetunu na tiajinia quijiacaacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riuriataraajaatijia. Jaara cua riuriatacanu, nojuajaari coojia cajitiqianu. Nojuajaari pueyaracaanu cucua tiuquiijiocanu niya nujuatejojuajinia, na naacunura janiya. Majaari cucuaji na caririqiniu quiqianu nujuatesano cua quishacari. ¹⁸ Quiaacuajaari niishiyajuhuj taa nojuaja naacuquiari pajaniyacuaajani, Éfeso tiacajinia pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesiforo saniniuujia.

2

Jesucristora poonijiojua quia quiri quia puereyaquiniutia

¹ Quiajaniya saniniuujia quiyanunaa, quioojia quia cumaquiriquia Jesucristo niquitiosano cumaacata. ² Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojiqiaari queraatia pueya niqiuara cua pohuatasacaricuajani.

³ Juhujaniya naquiya miiniu rejeretaja quia quiriqia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjijia, na camarnu timitianura nojuaja. Naa pa Jiyaniijia tojjijia quia quiriqiajuhuj Timoteonaa. ⁵ Naajuhuj, pueya tacuarishijiosacari, nojori cuaara quiria tacuarishijionu camarnu tojjijia. Tamonu jaara shocotare na tojiyaquiniutia camarnu, cuno na shocotanuri najuhuanaj. Naacuajitij, majaari na niquitiosaanu casaa, sesa na miiniuutia na shocotasacari. ⁶ Nio quia niishirijuhuj: cante cuhuariquia cuhuatajani, nojuaja cuaara coteenu na senoosanoiniji racataara na panishano. Na nuhuaji cutara, nojuaja na naata tamasaca niqutiojonu na senoosanoiniji. ⁷ Nio miriqui cua sequesanoocua quia niishiriojore. Pa Jiyaniijiacuaajaari quia niishitiniutianiya puetunujanaa.

⁸ Majaari nio niyajetanu: Jesucristoori macujiniji samiitanishaaquiariuhua, Pueyaso Nyanu na niiniuucua. Pueyano quiqiaarijiaariuhuj. Nojuacuajaari pa supuetanaa jiyaniijia David niqiuohuacuajinio supueno pueyano quiqiaari. Naacuajitij, nojuajaari Pueyaso Jiyarosano quiqiaari mijiria quinia pueya niti na mosaanura. Cunocuaajaari cua pohuatasano Pueyaso Rupaa. ⁹ Naa cua poojotanuucaatej, janiyari naquiya miyani. Janiyari cumayocuata moronucua quiyajaaniuhuj, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰ Cunora, janiyari puetunu naquiya miiniuujianaa rejeretaquiiani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhuj, taa na jatanishano pueya pa quiyacuaani. Naacuajitij, paari mariyata shacantuua quijiacara jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanoiniji. Naacuajitij, Jesucristo mosaanu jaara pocuara quiqiaari, na samiitanuhuari pajaniyara quiyajuhuj, pueyaracaanu rishiriquiano pa quiniuria. ¹² Naajuhuj, paa jaara naquiya miitiasariquia nocua pa tiuuniuucuanu, nojuajaari camarucuaa pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijia pueya niqiuarani, nojuajaari pa tamacanutaniyajuhuj. ¹³ Paa jaara na sequesano tojiyashijia quiriqiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quijiate Pueyaso shuquiritiasano nera poonijionani

¹⁴Parta Pueyaso pueya quia niishitiojorohuarohua maja najuhuaana nojori juayonuujutanura tamaatia niishitiojosanoocua. Jiyanoehua quia nacasure nojori Pueyaso niquiara, maja naa nojori nacojonura najuhuaana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵Tama quia cuaqueyajaaja quia cojuare, saa maninija quia niishitiojonura Pueyasojiniji cuno seetanu rupaajanaa. Naacuaajitij, Pueyasoori quia timitianutaniya nera poonijiona maniniu quia quiniucua. Majaari capa quia niishitiojonu, quiaa mariqui tamajaaja caririqiriiri. ¹⁶Naaratej, majaari najuhuaana tama mijiria pueya niishishanojuaja quia tojinuu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. ¹⁷Cuno najuhuaana niishitiojosanoori jiyanoehua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuaana. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuani, na camaru na cusojuanura. Himeneo, Filetonio, nojoriiri naa miiquioya quiarijia. ¹⁸Nojoriiri seetanu rupaajanaa jataniquianu tamaatiara. Nojoriiri pueya niishitiojia, paanaari tari tojetaarucujanaa samiitianishanocujani. Naacuaajitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojia, nojori tiuyaquiniuria pa Jiyaniijia sequesanoocua. ¹⁹Naajaa, Pueyasojuanaacuajaari pa niishitiquiaari na rupaari seetanujuaana. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquirojosano pueya niishiyacuja”.

Naa naajiotasanoori quiyajuhuj:

“Canapueje pa Jiyaniijia Jesucristoocua tiuujiacani, nojori cuaara sesa na miijionu tarinitiaara”.

²⁰Sanajanaa, cua tojiri. Jiyanoehua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniiji panishano patacocua, conaanio. Puetunu cuno casamijinijiojuanaani, noojiaqueyari racatasano saaja masu miaquetejarano quia, na raatojotajaranonio. Quiyajaariuhua rucucuaacuaji casa, rucucua cajitija. ²¹Paari naajuhuj. Paa jaara tama pa cuaqueyajaaja cojuariquia tojetaarucujanaa sesa pa miiniucuaajini, saaja pa Jiyaniijiaari pa quiniurajuhuj, naacuaajitij, pa naata juhua pa Jiyaniijia timitiasano tohuatashiniyojua quiniu. Naacuaajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²²Sanajanaa, quiaacuajaari niishiya, casa miiniucua jiaatiajacate mashiquiorini. Puetunu cuno sesa niishiriojosanojuanaa quia tarinitiaquia. Saniniuujia, saaja maninia mijia quia quiriquia. Saaja Pueyaso rupaacua tiuujia quia quiriquia, pueya panijiajuhuaj. Jiyanoojia quia quiriqiajuhuaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuani, pa Jiyaniijiaacua nojori tiuuniucua. ²³Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoreetare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴Pueyasora poonijiojua pueyano cuaara quiaquiriia pueya paracaajia. Saniya cuaara quiiria cutara puetunu pueya panijiajanaa. Cuaara quiirijuhua maninia niishitiojua. Cuaara juhuajaniya rejeretaja quiiria, tamasaca jaara na taajetere. ²⁵Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. ²⁶Naacuaajitij, nojoriiri maninia niishiriojua quiniutianiya, nojori jaareteenura Sesacaacuaji, maja Sesaaca miitiniuria nojori taa na paniyacuajani.

3

Taa quijiaa mijiria quiniaa quiniutianiya quera jiya puequesacarini

¹Quia niishirijuhua Timoteonaa, jiya puequenu panishacari, pueyari socua jiyacatenutaniya sesa miijiacara. ²Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jiiitanuucua jiaatajaca quiniutianiyajuhua. Naajuhua, pueyari najuhua narta pueya niquiara pocuajaca quiniutianiya, na jyanishacari nojori cutara socua niishijaca narta pueyajiniji, socua shanohua niqishano tamasacajinjinio. Pueyari Pueyaso sesacajaca quiniutianiya, narta pueya sesacajajuhua. Pueyari na queya tojiyashijaca quiniutianiya. Majaari quenaaja pueya timitianu quiniutianiya maninia na miijiacara. Pueyari maninia miyashijaca quiniutianiya, Pueyasojiniji maninia casaa rerequetajaca nojori quiniuucua. ³Naajuhua, majaari quenaaja na queya panijiacara pueya quiniu quiniutianiya, tapueyocua, tama necohuaajaano. Pueyari tojetaarucujanaa jyanoyashijaca quiniutianiya. Sacuaraatia rimiaacatujuri quiniutianiyajaariuhua. Naajuhua, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijiacara quiniutianiya, nojoricua na taraajeyaquiniutia. Pueyari puetunu maninia miijiacajanaa soojeaca quiniutianiyajuhua. ⁴Pueyari tama na cojiniaajaaja tacartajaca quiniutianiya. Pueyari cocuaatia casaa miijiacara quiniutianiya, mosanucua nojori quiniuucua. Pueyari juhuajaniya quijiacara quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵Pueyari sapuenu juhua Pueyaso pueya niqishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupuenutej.

⁶Tamasaca cuno pueyajinjinioni, nojoriiri tiaco tiuquitiajaca, noo maajipohua na sapojonura, najuhua pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja rejetejashijiacara. Naa sesa miijiacara nojori quiniuucuatej, nojoriiri najuhua tacaquiquiaa. Cunora, nojoriiri cuno sapojonujuaca tojtiaquiaa. ⁷Cuno maajipohuari najuhua pueyaracaanu tojtiaquiaa cuno sapojonujuaca niishitiojosano. Saniniuujia, majaari Jesucristojiniji seetanu rupaajanaa niishijacara nojori quiniu quiquiaa, Pueyaso jiyanooniuria nojori. ⁸Cuno sapuenu juhua Pueyaso rupaa niishitiojonaari seetanu rupaajanaa ruetaquiaa, taa nio shimiacuri, Janes, Jambres ruetaquiaari supuetana Moiséscaani. Naacujitij, nojori niishitiajaari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuaara tojiyaquiriaria nojori saniniuujia. Nojoricuaari Jesucristoocua tiyashijiacara. ⁹Naajaa, majaari queraatia pueya tiuuni quiniutianiya nojoricua. Ritia niishishaanutaniyacuaajaari, nojoriiri seetanujanaa niishiyashijiacara, taa pa supuetanaa niishiquiaaricuaani cuno shimiacuriiri sapojonujuaca.

Pablo tucuatascari naajionu, socua rootaa Timoteori

¹⁰Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhua taa seetanujanaa pa Jiyaniijiaacua tiuujia cua quiquiaarini, jacaria pocuajajuhua, pueya panijiano. Quiaari niishiyajuhua, majaari cojia cua najiqitini quijiani, pueya miishacari naquiya janiya. ¹¹Quiaari niishiyajuhua taa cua miitiasaquaari Antioquia tiacajiniani, Iconio tiacajinijuhua, Listra tiacajiniano. Seetanujanaa, janiyari naquiya miishaaquiarini. Naajaa, pa Jiyaniijiaari cucua taraajequiaari maninia na rishitiniuria janiya. ¹²Seetanujanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojiijaca nojori quiniuriatej. ¹³Saniniuujia, sesa miijiacara pueya, sapojonujuacano, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

¹⁴Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaquaaricuaajani. Quiaacuajaari niishiya, cuno

niishitiojosanoori seetanu rupaañanaa. Quiaari niishiyajaacuhuj canapue te quia niishitiojoquiaarini. ¹⁵ Quiaacuajaari quia naatujajini tariucuaaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶ Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuj pa miishanoori sesa, na nacasunura pajaniya maninia miijiaca pa quiniuhua. Pa rootaajaariuhuj tojetaarucujanaa maninia miijiaca pa quiniuria. ¹⁷ Naacujitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

4

¹ Quiaacuajaari niishiya, Jesucristo tiuquishacariuhua mijiria, Jiyaniijajanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujanaani. Cua tojiri. ² Majaari pueya niquiara Pueyaso rupaa pohuatanu quia tarinitianu. Pueyaracaanu quia pohuatariquia, naajaa, quia jiyaniishacari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijia quia nacasuriquia. Pueya quia shiniujuriquia Pueyaso rupaacua nojori tiuuniuria seetanujanaa. Puetunu cunोजना quia miiriquia jacaria quia pocuanuta, maja juaaniutia. ³ Naa quia poojotariquia pueya niquiara, nojori tojini panishacariquia Pueyaso rupaa. Na nuhuaji, pueyari seetanu rupaajini niishitiojosano tojini paniyaquiniutianiya. Saaja na ruoretanutaniyaariuhuj. Naa Pueyaso rupaa nojori tojini paniyaquishacaritij, nojori queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhua pohuatasana. ⁴ Nojori seetanu Pueyaso rupaajanaa tarinitianutaniya, najuhua sapojonuu sano tojtiajacua nojori quiniuria saniniuuja. ⁵ Quiajaniya saniniuuja, maninia niishiriojua quia quiriquia, maja quia sapojosaanurajuhuj. Naquiya miiniu rejeretaja quia quiriquia. Pueyaso rupaa Jesucristojini pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucuatere maninia, taa pa Jiyaniijia sequequiaari quiajaniyacujani.

⁶ Janiya saniniuuja, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niqitiosano quiniutianiya. ⁷ Majaari cua taajenu quijia, pueyaracaanu cua poonijosacari cua Jiyaniijia. Janiyari tari tucuatcanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. ⁸ Naacujitij, shanohua tuhuajaari quiriano jiyocuacaanu racatasano quiya tari, maninia miijiaca quia quiniucua. Cua Jiyaniijiaari cuno tuhuaja quia niqitionutaniya na samiitianishacariuhua janiya. Pa Jiyaniijiaari jyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niqitionu quiniutianiya cuno tuhuaja. Puetunu noo pojorijiana niqitionutaniyaariuhuj, canapue te nojuaja na paniniutia sashiyajani, cuara tiuquiuuhua shacantuuca na cumaacatajatijia.

Pablo sequesano Timoteo miishocoriquiano

⁹ Majaari puera tarishiniu. Quia secoore, cucua quia tiuquiniuria ritia. ¹⁰ Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijia jatarohuacuaa. Crecenteer saniniuuja Galacia jiyajinia quiaarucuaa. Titor Dalmacia jiyajinia quiaarucuaajacuhuj. ¹¹ Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaari cua poonijosacari. ¹² Janiyari saniniuuja Tíquico jiyarorucuaa Éfeso tiacajiniani. ¹³ Taa cua sequeya quiajaniyacujani, quiaa jaara cumaji niyare, quiocua cua tucuaque toque paare quiria, Carpo tiacajinia cua tiujiasano, Troas tiacajinia. Quiocua quiria patootaare cua nequesoreetunecajuhuj. Janiyari socua noo paniya quia patootanurani, shoquecua naajionuutasano Pueyaso Rupaatej.

¹⁴ Noo Alejandro, cumueeca casaajiniji shipinijiojua casamitij, nojuajaari jiyanoehua cua paracaajara quiquianu. Naajaa, pa Jiyaniijiacuaajaari saniniuujia cucua na naminiutianiy-acujua, naa na miiniuucua janiyatej. ¹⁵ Tama quia cuaqueyajaaja quia cojuare maja na miiniuria sesa quiajanijahuaj. Nojuajaari pa pohuatasano cuaracashitiya saaja, Pueyaso rupaa ruuretaja na quiniuucua.

¹⁶ Janiya jaara shushajanaa nujuatesaacanu jiyaniijianucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuaara jiyanooria nojori. ¹⁷ Naajaa, pa Jiyaniijiaari cua cojiquianuni. Cua cumaquiquianujaarihuaj, nojuajiniji cua pohuatanura puetunu cuniqui quiniaa Pueyaso niishiyashijiaca pueyajanaa. Pa Jiyaniijiaari cocuaatia cua miinujiniji juhua nojori juaashiquiajiniji cua jaaquianu, maja nojori monura janiya. ¹⁸ Janiyari nocua tiuyani, nojuajaari cua mashiquiniutianiya puetunu sesa casaacujijianaa. Cua cojuanutaniyajaarihuaj, pueyaracaanu rishijia cua quiniuria na shuriucua jiyocuaaanu, Jiyaniijiajanaa na quishacari. ¡Jiyanoehua maniniaari pa Jiyaniijia! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajionea na tucuatasaari

¹⁹ Quiria quia saruhuatara Prisca, neyaca Aquilano, puetunu Onesíforo pueyajanaajuhua, na tiajinia quiniaani. ²⁰ Erastoori Corinto tiacajinia jateecanu. Janiyari saniniuujia Trófimo tiujiacanu Mileto tiacajiniani, cusosu na quiniuucua. ²¹ Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajanija. Nojoriiri Eubulo, Pudente, Lino, Claudiano, puetunu parta Pueyaso pueya maanujuaanao.

²² Pa Jiyaniijia cuaara quioojiajinia quijia quiiria pueyaracaanu. Pueyaso cuaara cumaquiria puetunu niajanijianaa.

PABLO NAAJIONE TITOOCUARA

Pablo naajiosacari Titoocuara

¹ Janiyari Pabloni, Pueyaso seru. Jesucristoori cua jiyaroquiaari na Que Pueyaso saquirojosano pueya cua tiutuniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiuunaa cua niishitiniuria seetanu rupajaanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniuucua, pueyaracaanu quijiaca nojori quiniuria Pueyasota. Cunocujaaari tariucuaaanu Pueyaso sequesano, jiyanoehua tarijiatej, jiya shipinishaacarijiojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutuniuria nocua. ⁴ Quiarijiani, quiocuara naajiyanjia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquuaaricuaani. Naacuajitij, paari mariyata nocua tiuujicani. Pa Que Pueyaso, pocuaji Tacuna Jesucristonio, nojori cuara cumaquiiria quijaniya. Nojori cuara jiitiaara quioojia maninia, shuquiriaatia quia quiniuria pueyaracaanu.

Titara Pablo sequesano, Creta jiya tucuaatiajajinia na miishocoriquiano

⁵ Janiyari quia tiujiaquiaari Creta jiya tucuaatiajajiniani, quia tucuatunura cua poonijosano cureeno. Naaratej, quia sequecanunjia quia jiyatenura jiyaniijianucua, Pueyaso muerasu maapue jiiitanaa quiniuria puetunu cuno jiya tiacajinijajanaa, taa cua sequesuaari quijaniyacujani. ⁶ Pueyaso pueya jiiitariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiiitaara niqiriyaatujua niqiuocua. Necohua cuara quiiria Pueyaso muerasujuhuj, maja sesa miijiaa, maja tojiyashijiacajuhuj. ⁷ Cante Pueyaso muerasu jiiitanani, nojuajaari Pueyasora poonijiojua. Naaratej, nojuaja cuara quiiria maninia quijia, sesacasoo, maja tojiyashijia. Cuaara quiaquiiria ritia juaajia, mashaasequejojua, piyojotaja. Cuaara quiaquiiria cumaneeca panijia sesa na miishanota na masenura. ⁸ Naajuhuj, Pueyaso pueya jiiitana cuara quiiria rucoonaacua taraajeja. Cuaara quiiria maninia miijia, maninia niishiriojojua. Cuaara quiirajuhua seetanujanaa Pueyaso rootasano tojjia, maja rimijata maninia miijia. Cuaara quiirajuhua Pueyaso panijia cutara, tama na cuaqueyajaaja jiiitaja maninia, maja sacuaraatia casaa porocua. ⁹ Cuaara quiiria Pueyaso rupaa tojjia cutara, taa na niishitiojosaaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajiiuhuj, nojuaja na naata pueya tacatonuhua Pueyasooocua sesa nojori niishishanojiniji, noo pojori canapuate Pueyaso Rupaa ruuretajaca quiyacujani.

¹⁰ Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojoquiaa najuhuaana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojia pueya cararaatiuquia co miatesaanura, taa Moisés niishitiojoquiaari tarijiaacujani, seetanujanaa Pueyaso muerasu nojori quiniuria juucua. ¹¹ Nojoriiri queraatia niqiuohuara pueya jiyajeneteya sesa na niishitiojosanota, puetunu tapueyocacatajanaa nojori juayonuujutanura. Cuno niishitiojonaa cuara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacuuri tama na pueyajinijiaaja na sequesuaariitij: “Creta pueyari pueyaracaanu saaja sapojonuujua. Nojoriiri jiyanoehua juaajia juhua sayoru. Nojoriiri puera miaquenuujua. Nojoriiri taajecorijiuuhuj”. ¹³ Seetanujanaari cuno shimiacu sequesano. Nocuaji, jiyanoehua quia nacasure nojori, nojori cuara Pueyaso tojjiaa quiiria, maninia quijiaa nojori quiniuria. ¹⁴ Quia rootare nojori maja na tojtianura Judiocuaca nareja najuhuaana pohuatasano, naajuhuj, maja

nojori tojiniuria pueya rootasano, canapueete Pueyaso seetanu rupaajanaa tojiyashijiaca quiyacuajani.

¹⁵ Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniucua, majaari quenaaja niquiriyatu casa maninia quiniu nera. Na niishitiajaari juhua curuutuua, noojiano. ¹⁶ Nojoriiri tama na cuaqueyajaaja sequeya: “Pueyaso niishiyanjia”. Naa nojori sequesaciritij, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanoehua soosano pueya, puera sesa na quiniucua. Nojoriiri jiyanoehua sesa, tojiyashijiacajuhuj. Majaari na naata quenaaja maninia miiniu.

2

Maninia niishitijosano cutara

¹ Nocuaji, pueya quia niishitiojore maninia nojori quiniuria taa pa niishitijosaaquiaaricuajani. ² Naaratej, socua saaquiapue quia niishitiojore nojori cuara quiyacuiiria miaquejoru, mashaasequejorunio. Nojori cuara quiriia tojishano pueya cutara, maja rerequetesano. Nojori cuara quiriia maninia niishiriojojuaca. Cuaara quiriia maninia quijiicajuhuj, na tojishacari puetunu Pueyaso niishitijosanojuanaa, na panishacari pueyano. Nojori cuara quiriiajuhua maninia rejeretajaca taraatia na miishacari, juhujaniya nojori sashishacari pa Jiyaniija. ³ Naajuhuj, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacaturjuri, maja mashaasequenuujuaca. Nojori cuara pueyaracaanu miiria maninia tamasa niquiara, tamasa miiniuria juhua nojori miishanojuhuj. ⁴ Nojori cuara niishitiojora niyacaraca maajipohua, maninia na paniniuria neyaca, necoehuanio. ⁵ Cuno jiyaniyacua cuara niishitiojora narta maajipohua, maninia niishiriojojuaca nojori quiniuria, saaja neyaca panijia nojori quiniuria, maja tamonu caya panijiacara. Nojori cuara niishitijosaaarijuhuj, maninia poonijiojuaca na tiajinia nojori quiniuria, caporaturjuri nojori quiniuria, neyaca tojtiajacanio. Nojori cuara naa miiria, Pueyaso Rupaa mariqui rerequetesaareeri.

⁶ Naajuhuj, mashiquiri quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuara quiriia maninia nojori niquiara, nojori jiaatianura quiocua, juhua quiajaniya nojori quiniuriajuhuj. Quia niishitiojosacari nojori, tama quia cuaqueyajaaja quia cojuare, tama quia niishitijosanojuaja tojijia quia quiniuria. Majaari puenujuua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitijosaaquiaaricuajani. Naacuajitij, tamasaari maja na naata ruuretanu quiniutianiya quia niishitijosano pueya niquiara. Naa maninia quia niishitiojosaciritij, quia niishitijosano rerequetejaacari caririqiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniiji. Nojoriiri sanaajetanutianiya.

⁹ Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuqiritianura nojori. Cuaara quiriia na camarucua panijia, maja riuhuanajaca. ¹⁰ Cuaara nohuaseyacuiriia na camarucua casami. Cuaara quiriia seetanujuanaa maninia miijia, pueya niishiniuria pa Jiyanoojia Pueyaso rootasanoori jiyanoehua maninia cutara. Poonitijosano pueya jaara maninia quiriquia, Pueyaso Rupaa juhua maniniushitishano quia tamasa niquiara.

¹¹ Paacuajaari niishiyani Pueyasoori jiyanoehua jiyanoojia seetanujuanaa, Jesu cusonucua puetunu pueyacuarajanaa, sesa pa miishanojiniji pa jiyanooshaanura. ¹² Pueyaso jiyanoosacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuj. Naajuhuj, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacariija, maninia miijiacajuhuj, Pueyaso tojijiano pa paniniutia nojuaja.

¹³ Naa Pueyaso jiyanoosacari pajaniya na muerasu pa quiniuriatej, cunora paari na sequesanoocua tiuuquiaajuhuj. Nojuacuajaari pa sequequiaari pa Pueyaso Cristoori pocua muetanutianuhua, shacantuua na cumaacajinia. Naacuajitij, paari shuquiriaatia

sashiya pa Jiyanoni. ¹⁴Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujiniijianaa. Naa miiquiaariiri saaja tama na pueyarajaaja pa quiniuria, jiyanoohua maninia miiniucua jiaatiajaca pa quiniurijuhuj.

¹⁵Naa quia niishitiojore pueya Titonaa. Pueyaso pueya quia niishitiojore, quia shini-
ujiuri, quia nacasure. Naa quia cumaquiniuria nojoritij, quia cumaaca quia paaretare
juhua cutara jiyaniijia, tojishano pueyano quia quiniuria. Saaja maninia quia miiri-
quia pueyaracaanu, tamonu mariqui quia rerequetereeri.

3

Maninia rootasano Pueyaso pueyara

¹Quia pueya quia niishitiojorohua jiya jiyaniijia tojiijaca nojori quiniuria, jiyaniijianu-
cuara na jiyatesano pueya nojori tojiniurijuhuj. Nojori cuaara cuno pojori naacutaara
jaara sequesaaare maninia casaa nojori miiniuria. ²Pueya quia niishitiojore nojori cuaara
pueya sesacaashijiaa quiirijuhuj. Nojori cuaara quiiria juhuajaniya quiijaca, maja
juaajiaa. Cuaara quiiria jiyanoojiaa. Cuaara maninia niiquiiria puetunu pueyjanaa,
juhua socua maninia pueya nojoriijini, maja rimiajata na miiniuria tamasa.

³Tarijia, paari mariyata mosanucua quiquiaarini, Pueyaso tojiyashijiacanio. Paari juhua
tashucua quiquiaarini, sapojosano pa quishacari. Paari sesa miiniucua jiiitiquiaarini.
Majaari pa naata sesa pa miiniu tarinitianu quiquiaari. Paari pueyaracaanu shuquiriaatia
quiniucua jiaatiajaca quiquiaarini sesa pa niishishanota. Paari sesa miijiaa quiquiaarini.
Paari tamasa jiiitiasanocua jiaatiajaca quiquiaarini, juhua nojori pa quiniurijuhuj.
Paari pueya soosano quiijaca quiquiaarini. Paari niquitiojuaca quiyaquiquiaarini.

⁴Naajaa, pa Jiyanoojia Pueyaso cutaraari maninia miiquiaari pajaniya. Naacuajitij,
paari niishitishaaquiaarini taa Pueyaso paniya puetunu pueyjanaani, na jiyaronuucua
Neyanuniyojua pocuara na cusonura. ⁵Na muerasura pa jiyatequiaariiri saaja pocua na
taraajesacari, maninia miyashijia pa quishacarijia. Sesa miyashijiacara na Sohuanuta
pa jataniquiaariiri, na Sohuanu jeequesacari poojia, maninia juuujaraca pa quiniuria.
Pueyaso Sohuanuuri pa jataniquiaa juhua quiarinio pueya pa quiniuria. ⁶Pocuai Tacuna
Jesucristo miiniucua maninia, Pueyasoori jiyanoohua queraatia na Sohuanu niquitio-
quiaari pajaniya. Juhua pocua totasaareeri na Sohuanu. Maja shiitianiyojua quenaaja.
⁷Naacuajitij, pa jiyateereeri maninia quiijaca pa quiniuria na jiyanooshacari pajaniya. Naa
pa jiyatequiaariiri na muerasu pa quiniuria, pa masenura puetunu na jiiitiasanojuanaa
puera, jiyocuacaanu na racatasano. Naaratej, paari juhuajaniya sashiquiaani, pa ni-
ishishacari paari pueyaracaanu quiijaca quiniutianiya natani.

⁸Nio cua sequesanoori seetanu rupaajanaa. Nio rupaata quia nacasure Pueyaso
tojitiajaca puetunu quioojiatajanaa, nojori cuaara niishiriojora, maninia nojori miiniuria
pueyaracaanu. Nio rootasanoori jiyanoohua maninia. Maninia cutaraari puetunu pueya
cumaquitiajarajanaa. ⁹Maja cutaraari quia rupeenu cuno pueya, noo pojori canapue-
te najuhuaana nacojoquiaani, naajuhuj, noo pojori canapue-
te pueyaracaanu na supuetanaa
sesaca serojoquiaa najuhuanani, juhua pueya shocotajaca nojori quiniuria. Naajuhuj,
maja quia rupeenu noo pojori canapue-
te juatitioquiaani, canapue-
te tariucuacaanu
Moises Rootasanoocua juayonuutaquiaacuajani. Puetunu cuno nojori niishishanoju-
naari najuhuanaj. Majaari na naacunu nojori.

¹⁰Quia piriyojore cuno, cante Pueyaso muerasu maanu raquirijitiaani, capa na niishi-
tijosanota najuhuanaj. Nojuaja jaara quia tojiyaquiri coteenu quia sequesacari nojuaja,
quiocua socua na camiriohuanu piriyojonu. Jaara tojiyaquiri quiajaniya jiyacaritij, nojuaja
cuaara quiiriaqui juhua taanuusano. ¹¹Naa na tojiyaquishacari quiajaniyatej, quiocua
niishiri cuno pueyano tari seseree. Tama sesa na miishanojuarijia juhua nuocua
saquiriojataa.

Pablo sequesano Titora

¹²Janiya jaara Artermas jiyarore quiocuaani, jiyanoohua quia saniniujiuri cucua quia
niniuria Nicópolis tiacajinia. Janiyari quiniqui shuniya tajitiniuni paniani. Janiya jaara

Artemas jiyaroyaquiri quiocuani, janiyari Tíquico jiyaronutaniya quiocuani. ¹³ Zenas, Apoloori quiocua tiuquiniutianiya. Nojori quia naacutare quia jiišanasota, nojori jiišana nura puetunu na panishanojuanaa nojori quianu panishacari quia quiijajiniji. Zenasri pueyacuaji tacuna pueya nequesoreenaa.

¹⁴Parta Pueyaso muerasu cuaara niishiiria maninia miijiaca nojori quiniurijahuaj, maja najuhuana quijiaca na quiniuria. Maninia cutaraari nojori naacutanura na panishano jiišanaashijiaca.

Naajionee puequesacari saruhuatasano

¹⁵Puetunu cuata quiniaajanaari cua sequeya cua saruhuatanura quijaniya. Canaara quia saruhatate parta Pueyaso muerasujuhuaj, canapute canaa panijiacacuajani. Pueyaso cuaara cumaquiiria puetunu nijaniyajanaa. Cuaara naa quiiriatej. Tariucuja Titonaa.

PABLO NAAJIONEE FILEMÓNCUARA

Pablo saruhuatasacari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajia quiarani, jaarajaaja pa Jiyaniijiaara poonijiona quia quiniuucua. ² Canaara quia saruhuatare pa rimiaticua Apia, Arquiponio, jaarajaaja pa Jiyaniijiajiniji pohuatanani. Canaara quia saruhuatarehua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristonio, nojori cuaara cumaquiiria niajanija, jiyanoojiaa nojori quiniuucua. Nojori cuaara cajitiiria nioojiajuhuaj, juhuajaniya nia quiniuria.

Filemón paniniujiniji pohuatasano, Pueyasoocua na tiuuniujinijino

⁴ Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajanijiniji cua tojinuucua taa quia paniquiaa pa Jiyaniijia Jesuni, puetunu na pueyajanaanio. Quiaanaari seetanujuanaa pa Jiyaniijiaacua tiuujia. Janiyari cunora quia timitaani. ⁶ Janiyari quiocuara secoj-quiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jitiiasanojuanaa Jesucristojiniji, Jesucristoocua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa quia niishishacari quia miishanojinijitij, janiyari coojia cumanijiacanujuhuaj. Cunora, shuquiriaatia quiyanijia.

Pablo sequesacari Filemón, nojuaja jiyanooniuhuaa tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. ⁹ Naajaa, majaari cua sequenu panini quiajanija juhua quia jiyaniijia. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiarjia. Jesucristojiniji cua pohuatanuucua, janiyari quiarjia moronucua quiyani tariucua saaquiano. Naajaa, quia rupena Pablo cua quiniuucua, cua tojiri Filemónnaa. ¹⁰ Cucua quia taraajere quenaaja. Quia nenecojiyanijia cua nyanuniyojua Onésimoocua. Nojuajaari seetanujuanaa juhua quiyanura quiariucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tarijia, Onésimoori sesa seru quiquiaari quiara. Quiarjia saniniuujia, nojuajaari na naata maninia quini quiaara, taa quiria na quiyacuani. ¹² Janiyari quiarjia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuan, na naacunura janiya quia niti. ¹⁴ Naajaa, majaari naa cua miini panini quiriquiaa jiyasohuaaja, coteenu cua nequesotaaquishacari quiajanija. Janiya jaara quia sequereni janiya niya na jitianutianiya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miini paniyani. Cunora, janiyari na jiyaroya quiocuan. ¹⁵ Onésimo jiyoteeri quiocuaji rupatecanu rupaquiriaja, quiarjia quiara na quiniuhuaa pueyaracaanu cutara. ¹⁶ Quiarjiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarjiani, Jesuucua tiuujia na quishacarijuhuaj. Nojuajaari jiyanoohua cua panishano parta Pueyaso pueyano. Naajaa, quiaa cuaara jiyanoohua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacuajitij, janiya jaara seetanujuanaa quiarta Pueyaso pueyano qiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajanija, jaara quia casaa nohuasequiaar-iujuhuaj, nojuaja quia jiyanoori. Saniniuujia cucua quia tiutiare puetunu sesa na

miishanojuanaa quiajaniya. ¹⁹Janiyacua saniniuujia cua cumaneecajiniji quia niqutioreni puetunu sesa na miishanojinijijianaa quiajaniya. Janiyari Pabloni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitiniu panijajuhuj, Jesucristojiniji cua pohuatasanoocua quia tiuushacari, quiaacuajaari pueyaracaanu quijiara jatanishaaquiaari. Naacuajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. ²⁰Naa quiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanjuanaa coojia cumanijianutaniya.

²¹Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaaniuhuj, quiaari socua maninia na miiniutianiya cua sequesanojiniji. ²²Naajuhuj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatascari

²³Epafraasi cua sequeree cua saruhuatanura niajaniya. Nojuajaari cuarta moronucua-juhuaj, Jesucristojiniji canaa pohuatanuucua. ²⁴Jaarajaaja cuata Jesucristojiniji pohu-
atanaa pueyari nia saruhuataajuhuj. Nojoriiri Marco, Aristarco, Demas, Lucasnio.

²⁵Pa Jiyaniijia Jesucristo cuaara cumaquiiria niajaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiunaa pueya poojotaniquiaari pa supuetanaara. Nojuajaari nojuajiniji caminiujiunaa miijotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocajuhuaaj, puetunu pa niqiyaiquishoo casaajanaano. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiitiana quiriquiano. ³ Neyanuuri tojetaarucujanaa maninia, juhua na Quejuhuaaj, juhua na Que niquishanojuhuaaj. Naacuajitij, nojuajaari jiyanhua shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuaaanu tacaquiaarihuari, na Que Pueyaso miaquetajara na cajiniuria Jiyaniijajanaa quiquiojinia.

Pueyaso Niyanuuri Jiyaniijajanaa cutara Pueyaso seyajiniji

⁴ Naacuajitij, Pueyaso Niyanuuri Jiyaniijajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinijinio sequequiaari: “Niiori cua Niyanu”? ¡Maja! Neyanu sequequiaari cutaraari: “Quiaari quiyanu. Janiyari pueyanora quia muerateree jiyacuani, cua saquirojosano pueya Jiyaniijia quia quiniuria”.

Neyanujiniji sequequiaarijiaariuhuaaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari.

⁶ Tariucuacaanu Pueyaso Rupaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijajanaa na quiniuria:

“Puetunu cua seyajanaa cuara Quiyanu tojtiaara, Jiyaniijajanaa na quiniucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸ Neyanu sequeya saniniuurijia:

“Quiyanunaa, quiaacuajaari Pueyasojuhanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jiitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijijanaa”.

¹⁰ Pueyasoori naa sequequiaari Neyanujuhuaaj:

“Jiyaniijanaa, quiaacuajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaano. ¹¹ Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucushiriquiano juhua toqueja. ¹² Naa na tariucushishacaritij, quiaari juhua toque mocua na jiunioriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarijuhuaaj:

“Miji, cua miaquetajara quia cajishii, janiya jaara quia paraa shocojotare puetunujanaa-jaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajiniinio. ¹⁴ Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

2

Maja cumaati Jesucristo tojiyashijiacara pa quiniu

¹ Naaratej, Jesucristojiniji pa tojishano tojjiaca pa quiriqia socua, paa mariqui Pueya-soocuaaji rupatereeri. ² Tariucuaaanu, Pueyaso seya caminiujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari. ³ Pueyaso seya caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaca pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapuete pa Jiyaniijajanaa tojiqiaaari pueyaracaanuni, nojoriiri saniniuujia cuno rupaa caminiujiuqiaaari pajaniyara. Canaa sequetuqiaariiri nojori tojishanoori seetanu rupaaajanaa. ⁴ Naajuhuj, nojori pohuatasacari Jesucristojiniji, Pueyasoori nojori miitiqiaaari jiyajeneta casaa jiyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jiyanohua shiriqiu-tiuqiaaari queraatia Pueyaso cumaacata miishano nojori niquishacari. Naajuhuj, Pueya-soori Jesuucua tiuujia niquitioquiaa na Sohuanu, tamaatia pa miiniuria na cumaacata, taa na paniyacujani. Cunora, paa cumaati seetanujuanaa Pueyaso rupaa Jesucristojiniji tojtijajaca quiyani.

Jesucristo mijiria rasaanquiaari pa puerana na quiniuria

⁵ Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. ⁶ Naajaa, tariucuaaanu Pueyaso Rupaajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraa-jeya pueyacuanii? ⁷ Quiaacuajaari na shipiniqiaaari rupaqujiara socua cumaacaaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniurijuhuj. ⁸ Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa curenu quiniutianiya na jittiasoo. Saniniuujia, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. ⁹ ¿Jesuurijataj? Pueyano na quiniuria, na Que Pueyasoori rupaqujiara na miiquiaari socua cumaacaaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacujanaa, Neyanuuri mosaaquiaari pocuara. Naa na cusuucua pocuaratej, Pueyasoori na jiyatequiaari Jiyaniijajanaa na quiniuria, jiyanohua cumaacaraca na quiniurijuhuj.

¹⁰ Jamueyashijia Pueyaso quiniuucua, nojuajaari puetunu na muerasuranujuanaa panitiaquiaari na cojiniaa nojori quiniuria. Paniquiaariiri jatiqui nata shuquiriaatia pa quiniuria, puetunu tama nerajaaja na shipinishano casaatjanaajuhuj. Jeenucuaasano pa quiniuria pa cojiniuria Pueyaso, nojuajaari jiyanohua maninia miiquiaari pocuara, Neyanu na miitishacari naquiya na niti. Naacuajitij, Neyanuuri tojetaarucujanaa maninia quiquiaari Pueyaso muerasuranooquaji Tacuna na quiniuria. ¹¹ Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocucata”. ¹² Tariucuaaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritiasacari quiajaniya”.

¹³Tamaqui, Jesu sequesanoori naa naajiotasano quiyajuhua:

“Janiyari cua Queecua tiuuja quiniutianiyani”.

Naacuajitij, mijiria na quishacari, Jesuuri na Que Pueyasocua tiuuquiaaricuaa taa pa tiuuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocuacaa, nojori tojtianuucua janiya”.

¹⁴Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojtiaashijia pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. ¹⁵Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijata quiniuria quianutaniyani. Cunora, majaari tari pa puerenu pa cusonura. Nocua tiuyashijia pueyari seetanujuanaa cusonu puerejaca cutara. ¹⁶Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasocua tiuujiacuaani. ¹⁷Maninia pa naacuna na quiniuria, Jesucristoori puetunu naquiya miiniujanaa rejeretaquiaari mariyata taa narta pueya miishaquiaacuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanooniu puetunu sesa pa miishanojini. Na cusonuucua, naacuajiti Pueyasoori na naata pa jiyanooniu puetunu sesa pa miishanojini. ¹⁸Mijiria na quishacari, nojuajaari pueyaracaanu taraatia miishaquiaari. Nojuajaari jiyanoohua saniniujiushaquiaari sesa na miiniuria juucujuhua. Naacuajitij, nojuacuajari jiyanoohua niishijia na cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquajuhua.

3

Jesucristo cutaraari Jiyaniijajanaa Moisésjiniji

¹Cuarta Pueyaso pueyanaa, niaacuajaari Pueyaso saquiriojosano tama na pueyajaaja na quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanooniu pajaniya, nocua pa tiuushacari. Cunora, jacaria pa niishiriojore socua Jesucristojini. ²Mijiria na quishacari, Jesuuri na Jiyarona tojijia quiquiaari pueyaracaanu, taa Moisés quiquiaari Pueyaso tojijiacuaani, Israel pueya jitiiana na quishacari. ³Naajaa, Jesucristo cutaraari Jiyaniijajanaa Moisésjiniji. Moisésri saaja narta Pueyaso pueyajiniinio pueyano quiquiaari. Saniniujia, Jesucristoori puetunu Pueyaso pueyajanaa shipinina cutara. Naaratej, Jesucristo cuaraa tojishaaria socua cutara. ⁴Puetunu pueyapuejanaari supuetanaaraca. Naajaa, Pueyasojuanaari nojori shipinina seetanujuanaa. ⁵Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniuucua. ⁶Saniniujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijajanaa. Nojuajaari nojori jitiiaa saa maninijaa, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuuquiaani, naajuhua, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷Pueyaso pueya pa quishacari, Pueyaso Sohanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuacaanu Pueyaso Rupaajinia pajaniyarajuhua:

“Pueyanaa, niaa jaara quiarijia tojiri quia Pueyaso sequesano niajaniya, majaari na sequesano ruuretajaca nia quiniu. ⁸Majaari naa nia quiniu taa nia supuetanaa

quiquiaaricuaani, cariquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiaca nojori quishacari. ⁹Nojoricuajaari pueyaracaanu cua cumaacata cua mijiosano niqititiquiaari. Cuarenta marijaari shocojoquiaari, pueyaracaanu jiyajeneta casaa cua mijiosacari cua cumaacata, maninia cua jiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanusacari cucuaji. ¹⁰Janiyari cunora seetanujuanaa juaaquiaari puetunu cuno pojoritianaani. Naaratej, janiyari sequequiaarini: 'Nojoriiri juhua cucuaji tashuquioono rucoojiya tamajaaja. Nojoriiri cua niishitijosano ruuretaquiaa saaja'. ¹¹Janiyari cunora jiyanhua cua juaaniutia naa sequequiaarini: 'Majaari nojori rupeenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuata'".

¹²Naarate cuarta Pueyaso pueyanaa, tama nia cuaqueyajaaja nia cojuare jiyanhua, niaa mariqui Pueyaso Rupaacua tiyashijiacara quiriohuari, Pueyasocuaji nia rupatenura puetunujuanaa. Pa Pueyasocuajaari quijiajuhanajaj. Nojuajaari na tojiyashijiaca saniitiojua. ¹³Cunora, seetanujuanaa Pueyaso Rupaa tojitiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeaquishacarijia taa na Rupaa sequeyacuajani. Naa nia shiniujiutiooriquiatej nia jiitiquiaquiniucujaji sesa miiniuria. Saniniujia, niaa jaara sesa mijiajaca quiriqia, tama sesa nia miiniujiaarijia nia sapojonutianiya Pueyaso tojiyashijiacara nia jatanuhua. ¹⁴Jesucristoocua pa tiuuniucua, paari na cojiniaara jiyatesanoni. Naacujitij, puetunu na jiitiasanojuanaari puera quiriqianojuhuaj, paa jaara nocua tiuquiaa pueyaracaanuni, taa shushajanaa seetanujuanaa nocua tiuujia pa quiriqiaacuajani.

¹⁵Cunora, naa naajiotasano quiyari tariucuaaanu Pueyaso Rupaajinia:

"Pueyanaa, niaa jaara quiarjia tojiriqia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijiaca nojori quishacari".

¹⁶¿Canaputeeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiqiaari pocuaano. Naajaa, nojoriiri saaja na ruuretajaca quiquiaari. ¹⁷Nia niishiritioj, ¿canaputee cuno pojorini, Pueyaso juaatijioquiaarini, pueyaracaanu nojori camarucuneejotasacari cariquia jiyajiniani? Noo pojoricuajani sesa mijiacatej. Nojoriiri cunora cusunuquiaari nojori quiojosacari nucuaco cariquia jiyaco. Na cusunuasaquijia jamojosaaquiaariiri. ¹⁸Nia niishirijihuaj, ¿canapue naa Pueyaso sequequiaari seetanujuanaa na juaaniutiani: "Majaari nia tiuquitianu quiniutianiya niaarano cua niqitionu panishano jiyajinia, tii juhuajaniya shuquiriaatia nia quiniuria cuata"? Puetunu Pueyaso tojitiaashijiacajanaacuajaari naa sequesaaquiaaritij. ¹⁹Naacujitij, paacuajaari quiarjia maatia niishiyani, Pueyasocua tiyashijiaca nojori quiniucua, majaari nojori tiuquitianu quiquiaari Pueyaso niqitionu panishano jiyajinia.

4

¹Pueyasocuajaari pa masuyajaa panaatia pa quiniuria nata. Cunora, jiyanhua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoaquishaareeri. Na sequesanoocua tiyashijiacari maja na rupeenu quiniutianiya Pueyaso, shuquiriaatia na quiniuria Pueyasota. ²Pueyaso rupaacuajaari tari pa niqiaara pohuatasaaquiaarijuhuaj, nocua pa tiuuniuria, taa pa supuetanaa niqiaara na pohuatasaaquiaaricuaani. Nojoriiri Pueyaso rupaa tojiqiaari najuhuanaj. Majaari nocua na tiuutiuniu quiquiaari. ³Cunora, Pueyasoori pa supuetanaajiniji naa sequequiaari:

"Cua sequesanoocua nojori tiyacuquiniucua, janiyari cunora seetanujuanaa naa sequesquiaari cua juaaniutiani: 'Majaari nojori tiuquitianu quiniutianiya cua niqitionu panishano jiyajinia, cuata nojori quiniuria shuquiriaatia'".

Pajaniya saniniujia, Jesuucua tiuujia pa quiniucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhujaj:

jiya shipinini na tucuatana nuhuaji, nojuajaari panaatia quiya. ⁴ Cunora, tamaqui tariucuaaanu Pueyaso Rupaajinia, naa naajiotasaaquiaari:

“Seis juucajinia Pueyaso tucuatasaari puetunu na poonijosanojuanaa, na nuhuaji nojuajaari séptimo juucajinia samaatequiaari”.

⁵Pueyaso sequesanoori tariucuaaanu na Rupaajinia naa pacutejosaaquiaari naajiotanu: “Majaari cua tojtiaashijiaca rupenu quiniutianiya janiya, panaatia nojori quiniuria cuata”.

⁶ Naa sequesanojinijitij, maatia niishishiyari Pueyasoori pueya masuyajaa, nojori rupenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniucua. ⁷ Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarijia masuyajaa pueya. Cunora, jyanohua Moisés nuhuaji, Pueyasoori supuetana David naajiotaniquiaari pajaniyara saniniuuja. Naa sequeyari:

“Naa jaara quiarijia tojiri Pueyaso rupaa, Pueyaso sequesano niaarano, majaari na ruuretanu”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijiaca nojori quiniucua juhuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriqia. ¿Pueyasotucua casaara quiarijia pa masuuriqiaja Jesuucua pa tiuuniuriani, seetanujuanaa panaatia quijiaca pa quiniuria natani? ⁹ Naacuajitij, paacuajaari niishiyani, Pueyaso pueyaranoori panaatia quijiacara jatanishaanutianiya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuajaari panaatia quijiara jatanishaanutianiya. Majaari socua na tacaaniu quiniutianiya taa tama na cuaqueyajaaja na jyanootiniutianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuaana na poonijosanojinijij, naatej, taa Pueyasojuaana samaatequiaari na poonijionu nuhuajicuaani. ¹¹ Naaratej, panaatia pa quiniuria Pueyasota, seetanujuanaa na Rupaa tojjiacara pa quiriqia quiarijia. Naa na rupaa tojjiaca pa quiri paa mariqui saniitiosaareeri taa pa supuetanaa Israel pueya saniitiosaaquiaricuaani, Pueyaso sequesano tojijashijiaca nojori quiniucua.

¹² Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jyanohua socua shamatucuaaja nijiniaquetucuaaja mueruujinijij. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohanu tohuariquijijia, pa niishitijia tohuariquijijiano. Na naata cuhatanu poojiajinia jiyasohuaja pa niishiriojosano casa, poojiajinia pa niishishoo casaanio. Naacuajitij, Pueyaso Rupaari poojiajinia sesa casa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. ¹³ Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreeso na curenura. Nojuacuajaari maatia niishiya puetunu na miishanojuanaa, puetunu pa niishiriojosanojuanaanio.

Jesujuanaari Pueyaso jyanootijia pueya

¹⁴ Pueyaso Niyanu Jesuni, nojuajaari na Que jyanootijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujia pa quiniucua, maja cumaatii pa pishiniu nocuaji. Paacuajaari na muerasuniyojuani. ¹⁵ Jesu, Pueyaso pa jyanootijiani, nojuacuajaari pocua taraajenu niishijia paa jaara saniniujiushaariquishoo sesa pa miiniuriani. Nojuacuajaari naa saniniujiushaaquiarijihua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. ¹⁶ Cunora, pa jyanoojia Pueyaso pa rupueriquia pa puereyaquiniutia. Nojuacuajaari pa tojiquiaa

pa secojosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaajaariuhuj, pa rejeretanura paa jaara sesa miiniuria saniniujiushaariquiani.

5

¹ Puetunu pueyacuara secojonaa jiyaniijajanaari pueyaracaanu narta pueyajiniinio saquiriojosano pueyano quiquiaa, taa Pueyaso niishitiquiaari supuetana Moiséscajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niquitiojosano Pueyatorano masejojua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ² Pueyacuara secojona quiniuucua pueyanojuhuj, nojuajaari sesa miijiajuhuaj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujiuhuj. ³ Naacuajitij, nojuajaari tama nocuarajaaja seya nanaca shootequiaa sesa na miinuucua, taa na miiquiaacuaa narta pueyacuarani, sesa nojori miishacari. ⁴ Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocujaari naa saquiriojoquiaaricuaa Moisés tarajanu Aarón, pueyacuara secojonaa jiyaniijia na quiniuria. ⁵ Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanooniuria pajaniya. Tama Pueyasojuarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

⁶ Pueyaso sequesanoori tamaqui tariucuacaanu na Rupaajinia naa naajiotasano quiyajujuhuaj:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedecuaani”.

⁷ Naa pueyano na quishacari mijiriatej, Jesucristoori jiyanoohua saniniujiushaaquiaari. Naquiya na miyaquishaanuucujaji juucua, nojuajaari na Que Pueyaso secojoquiaari jiyanoohua na nujuquenuta. Jiyanoohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniuucua, na Que sequequiaariiri: “Naajaa, quia miiri quia panishano cua Quenaa, taa quia panitiaquiaari miiniu janiyacujani”. Na Queeri na tojiquiaari. ⁸ Jesucristoori seetanujanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹ Naacuajitij, tojetaarucuajanaa maninia miijia na quiniuucua, nojuajaari pueyacuaji Tacunara quiquiaari, puetunu na tojitiajajanaa na jiyatenura pueyaracaanu rishijiacara. ¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanoohua puereetaari Jesu tojiniu tarinitianu

¹¹ Janiyari queraatia socua nia niishitiojonu paniya Jesucristojiniini, nia niishiniuria nojuajaari seetanujanaa juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuuquiohua. Niaacuajaari tari niyajetarucuaa tariucuacaanu nia tojishano. ¹² Tariucuacaanujiniiji Pueyaso rupaa tojjijaca nia quiniuucua, ¿taateni? Naa mariqui na niishitiojonuujuaca quiriquia tari. Saniniuujia, niaari quiarijia paniya socua nia niishitiojosaanuhuara maatia niishishaatia casaa Pueyasojiniji. Naaari juhua naatujooriria quirohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijaca nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojitijaca nia quiniu, maninia miijijaca nia quiniuria. ¹⁴ Juhua tariucua mashiquioriria nia jiyateriquiani. Mashiquiori

cutaraari puetunu casaajanaa miaquenujuuca. Naajuhuj, puetunu Jesucristo niishitiojosanojuanaa niishijiaca nia quiriqia. Naa jaara na niishitiojosano tojjijaca quiriqia, saaja maninia miijiaca nia quiniuria, niaari maninia niishiniutianiya teyano casaate maniniani, teyano casaate sesa saniniunjia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtijajaca nia quiriqia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijiaca. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanooniniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuuria nijaniya. ² Naajuhuj, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniucua. Niaari niishitiojosaaquiaarijuhua Pueyaso pueyacu nia nianura nia juaashiquia nojoriucua nia secojosacari, Pueyaso cumaquiniuria nojori. Niaari niishiyajuhuj, macunucuaari samiitiaconutaniuhua. Nojorijinijinio saniniuuja, Pueyaso tojjijajiacari pueyaracaanu saniitosocoriquiano jiyatesaanutaniya. ³ Quiaarijiani, majaari socua cua niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya nijaniyani.

^{4,5} Pueyano jaara Pueyaso Rupaa tojjijajiacara quiriuhua, najuhuaanari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujiaraca quiquiaari. Najuhuaanari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritajaca quiquiaari, nojuaja jaara tari Pueyaso cumaacaraca quijia quiquiaarijuhuj. ⁶ Jiyano pueyanotej, majaari tari na naata sesa miijia na quiniucua taraajetesaanuhua, Jesucristoocua na tiuuniuhua seetanujuanaa. Nojuajaari juhua Pueyaso Nianu teetenu pacuteya niyacutesanojinia, naa na ruuretajaca na quiniucua. Naa Jesucristo tacartaja na quiniucuatej, tamasacaari Jesu rerequetequiaajuhuj. ^{7,8} Naacuajitij, cunoo pueyanoori juhua noo cuhuariquia tee cuniqui sesa jiyasocua maniniucuaa moritianucujani, riy-ocucanio. Pueyasoari najuhuaana maru niyojotequiaa. Majaari cunoo cuhuariquiajinia nataacuaca muetunu. Jiyano cuhuariquatej, na camaru cuara catijiaaaranaj. Pueyasoari naa saniitionutaniya nocuaji ruparequeno pueyajuhuj. Saniniuuja, Jesucristo rupaa tojjijacani, nojoriiri juhua maninia cuhuariquia. Pueyasoari maru niyojotequiaa nocua, maninia na muetutenura tii natoosano casaa. Naacuajitij, na camaruuri queraatia mijajauraca quiniutianiya. Naajuhuj, Pueyasoari na tojtianu tarinitiaashijiaca shuquiritianiya pueyaracaanura.

Pa niishishacari Pueyasoari maninia pa miiniutianiya, paari cunora na tojiniu tarinitiaaquiquiaani

⁹ Miriqui cua pohuatasano sesa cuhuariquiajinijini, cunoori maja nijaniya cua panishano pueyanaa. Majaari cua taacanuunu nijaniyajiniji. Niaacuajaari pa Jiyaniijia tojtijajaca quiquiaa. ¹⁰ Pueyasocujaari jiyanoohua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijia nia quiniucua, taa quiaari nia miyajaacujani. ¹¹ Naatej, taa shitimia niarta Pueyaso pueya naacujacatucua nijaniyani, naajuhuj, janiyari nia panitiaani pa Jiyaniijia nia sashiniuria nia timiniutijuhuj, nojuaja jaara pa rijionuucua tiuquiriohujaaatijia. Naa niishitiriqiaaaniuhuj, Pueyasoari jiyanoohua maninia miiniutianiya pajaniya. ¹² Majaari nia macuhajeconu juhua taajecori nia quiniuria pa Jiyaniijia. Saniya nia quiriqia cutara juhua tariucuaanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquiya miiniu rejeretajacari quiquiaarijuhuj. Naaratej, Pueyasocujaari tari maninia miiquiaa nojori, taa seetanujuanaa na sequequiaari na pueyarano na miiniuriacujani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuaajari Jiyaniijijanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia jihuah muetutenutaniya jiyanoahua queraatiarani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijiaatijia. ¹⁶ Pueyanaa, niaacuaajari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacartij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhuj, Pueyaso sequesacari taa seetanujuanaa na miiniutianiya na pueyaranoni, nojuajaari jiyanoahua panitiaquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuaajari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸ Naacuajitij, Pueyasoori maatia sequequiaari taa na miiniutianiya nocua tiuujiacarano pueyaranoni. Majaari saaja cuno na sequenu quiquiaari. Nojuajaari sequequiaarijihuhuj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujia pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. ¹⁹ Naa Pueyaso sequesanoocua tiuujia pa quishacartij, paari juhuajaniya naquiya miiniu rejeretajaca quiquiaani. Sesaacari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiuushanoni, nojuajaari jiyocuaanu quiya, niquishoojaariuhua na Que Pueyaso shuriucua na quiniucua. ²⁰ Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuanaa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasaca tiacajinijinio jiyaniijianucuaani, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoahua maninia”. ² Jiyacartij, Abrahamri na paraa casami nitiariquihua na quiquojiniohuara. Naacuajitij, nojuajaari puetunu cuno casamijinijiniojuanaa Pueyasora na riuoriosano niqitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miiijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhuajaniya quijia pueya tiaca”. Na sesaari naa quiquiaari na pueya jiuujia cajitijia na quiniucua. ³ Majaari tojetaarucujanaa na niishishaanu, ¿queraca quiquiaaritarii, nuclaracajuhua, supuetanaaracanio? Majaari quenaaja na pohuataaanu-juhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quiijajuhuanajaj. Majaari na niishishaanujuhua, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niqutioquiaari na paraa na shocotasano casamijinijinio. Secaja niqutioquiaariiri taa Pueyaso rootaquiaari pa supuetanaacuajani, nojori niqutiojonura nera. Tariucuacaanu, Pueyasoori pa supuetanaa niishitioquiaari nojori niqutiojonura secaja, puetunu nojori jiitiasano casaajinjijianaa. Naacuajitij, pueyano jaara diez casaa jiitiare, cuaara Pueyasora niqutioora niquriyatujua. ⁵Pueyasocuaajaari supuetana Leví niqiuohuacujinio supueno pueya jiyatequiaari narta Israel pueyacuara secojonaa nojori quiniuria. Nojoriiri jiy-atesaaquiaari Pueyasorano pueya niqutiojosano masejojua nojori quiniurajuhuj. Naa Pueyaso sequesanoacuajaari Moisés Rootasanojinia naajotasaquiaari. Abrahamcuajaari puetunu Israel niqiuohuajanaa supuetana quiquiaari, maja saaja Leví supuetana. Naajaa, Leví niqiuohuacujinio supueno pueyari Pueyasora narta Israel pueya niqutiojosano masejojua. ⁶Melquisedecri pueyacuara secojona quiquiaarijuhuaj. Maja cutaraari Leví niqiuohuacujinio na supueno quiquiaari. Naajaa, seetanujuanaa pueyacuara secojona na quiniucua, Abrahamri Pueyasorano na riuriotaca na niqutioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuanaacuajaari tari Abraham sequequiaari, nojuajaari maninia na miiniutianiya. Naajuhuj, Melquisedecri pa supuetana Abraham sequequiaari Pueyasoori jiyanohua maninia miiniutianiya nojuaja. ⁷Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. ⁸Quiarijiani, Pueyasorano pueya niqutiojosano masejojucani, puetunu nojorijianaari shaajejaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. ⁹⁻¹⁰Nia niishirijuhuj, Leví niqiuohuacujinio pueyacuajaari Pueyasorano pueya niqutiojosano masejojua, pueyacuara secojonaa nojori quiniucua. Cua tojori pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiitariquiaa puetunu nocujinio supueriquiano pueyajanaa. Naacuajitij, Abraham niqutiosacari Pueyasorano na riuriotaca Melquisedec, pa naata sequenu Leví quiuriquianojuanaari jiyacari Melquisedec niqutioquiaari, Abraham quiniucua na jiyasorano tari.

¹¹Leviacujinio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricujani. Naacuajitij, narta Israel pueya jaara sesa miiquiaari, nojoriiri sesa miijica seya puecooquiaari pueyaracaanu tama na camaruhuacarajaaja, nojori na jiyanootiniuria Pueyaso. Naa nojori miishano jaara pueya jiyateriquia tojetaarucujanaa sesa miyashijacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocujinio supueno pueyano. Nojoriiri shaajejaca cutara. ¹²Aaróncuajaari narta pueyacuara secojonaa jiyaniijiaari jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhuj, Moisés Rootasano niti na quiniuria. ¹³Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niqiuohuacujinio supueno. Nojuajaari supuetana Israel niyanuucujiniocujia, saniniuujia tamonu neyanuucujiniojaarohuj, teyanooacujinio quenaaja niquriyatuu pueyacuara secojona supueyaquiquiaaricujani. ¹⁴Maatia niishishiyacuajaari, pa Jiyaniijiaari Judá niqiuohuacujinio supueno quiquiaari. Judaari Leví tarajanucujia. Moisés pohuatasacari pueyacuara secojonaaajinjini, majaari quenaaja Judá na jiyaniquini quiquiaari.

¹⁵Quiarijiani, quiarinio pocuara Secojona quishacari juhua Melquisedec, paari maatia niishiyani Leví niqiuohuacujinio supueno pueyacuara secojonaari sanitishaaquiaari.

¹⁶Nojoriiri pueyacuara secojonaa quiquiaari saaja Leví niqiuohuacujinio supueno pueya

nojori quiniuucua. Jesucristo cutaraari pocuara secojonara jiyatesaaquiaari pueyaraaanu rishijia na quiniuucua. ¹⁷Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaaquiaari, najuhuana na quiniuucua. Cuno miishanoori cumaacaju quiquiaari pueya na jataniniuria. ¹⁹ Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitajaca. Quiarijia saniniuujia, paari Pueyaso rupaa Jesucristojiniji jiitiaani. Nocua pa tiuushacari, Jesucristoori pueyaraaanu pa jiyanootiquiaa na Que, juhuajaniya pa rupuenura nojuaja.

²⁰ Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. ²¹ Saniniuujia, Neyanujiniji na sequesaroni, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariuacaanu Pueyaso Rupajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecujaaari: ‘Quiaari pueyacuara secojoriquiano pueyaracaanu’”.

²² Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiunuucua. Naacuajitij, Pueyaso rupaa Jesujinijiiri socua jiyanoohua maninia Moisés Rootasanojiniji. Cunoori pueyaracaanu rishijia Jesu quiniuucua. ²³ Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijica nojori quiniuucua. ²⁴ Jesu cutaraari shaajeyashijia. Naa pocuara secojona na quishacariitij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijajuhanajaj, juhua na Que Pueyaso. Majaari quenaaja sesa miiniu na miishiniu. Sesa miijiacara tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijia na jiyatequiaari, Jiyaniijajanaa na quiniuria na shuriucua, tii na secojonura na Que pocuara. ²⁷ Leví niquiohuacuajinio supueno pueyacuara secojonaa jiyaniijnucuaari pueyaracaanu tama sesa nojori miishanoocujaraaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocua saniniuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocua, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijianaa. ²⁸ Moisés Rootasanojinia, Pueyasoori tii sequeyacuaja canapute pueyacuara secojonaa jiyaniijiaari jiyateshiyani. Puetunu cuno pueyacuara secojonaa jiyaniijnucujanaari sesa miijiacara quiquiaari, juhua puetunu pueyajuhuj. Jiyanoohua Moisés nuhuaj, Pueyasoori saniniuujia tama Neyanujaaaja jiyatequiaari pocuara secojonajanaa na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacuajitij, nojuajaari tojetaarucujanaa maninia, pocuara secojonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanootiquiaa na Que

¹Nio, janiya na pacutenutaniuha sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. ²Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojuanaa shipinishano quiquio, maja pueyano tiasano.

³Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niqitiojosano. Naajuhua, nojoriiri seya puecoojuaca, Pueyaso nojori jiyanoootiniuria. Naacuajitij, Jesucristo quiniuucua pueyacuara secojonajuhua, nojuaja cuara casaa jiitiaara, Pueyaso na niqitiosocoriquianojuhuaj. Cuno casaacuaajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴Leví niqiuoacuajinio supueno pueyacuara secojonaacuajaari pueya nitiasano nojoriicua masejoquiajaa, Pueyasora nojori niqitiojosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara pueyacuara secojona quiaquiriquiaj. Pueyacuara secojonaacuajaari queraatia quia. ⁵Pueyacuara secojona jeecajosano casaa Pueyaso Secojojuatiajinia nojori jiiitiasanoni, nojori miishanonio, puetunu cunोजनाaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojojuara suhuorotu, puetunu na casamitijanaano, jiyacaritij, Pueyasoori naa Moisés sequenu pacutequiaari: “Moisésnaa, cua tojiri. Maninia quia miiri jacaria puetunujuanaa, naatej, taa cua niqitiquianucua quiajaniyani, Sinaí tuhananuucua quia quishacari”.

⁶Pocuara Secojonajanaa miishanoori jiyanoohua maninia socua pueyacuara secojona Leví niqiuoacuajinio supueno miijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojiniiri jiyanoohua socua maninia Moisés Rootasanojiniji.

⁷Pueya jiuujia jaara na naata quiriquia seetanujuanaa sesa miyashijacara jatanishano Moisés Rootasano tojjiaca nojori quiniuucua, Pueyaso maara quiarinio rupaa niishitiyaquiquiaari pajaniya. ⁸Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinii. Cunora, tariucuacaanu pueyara Pueyaso sequesano caminiujiunia sequesanoori naa naajiotasano quia:

“Jiyaniijia Pueyasoori sequeya: “Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujuanaa cua pueya quiniutianiya. ⁹Quiarinio cua rupaa tamaatia quiniutianiya Moisés cua niishitiojosano rupaa jiniji puetunu Israel pueyarajanaa. Jiyacaritij, janiyari nojori mashiquiaari Egipto jiyajinijini. Juhua nojori que, janiyari nojori jaatucunuuriquiaa juucuanu nojori cua niqitiosocoriquiano jiyajiniara. Saniniuujia, nojoriiri Moisés cua rootasano nojoriria tojinii paniyaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. ¹⁰Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutianiya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitajajinia, seetanujuanaa cua tojtiajaca nojori quiniuria. Naacuajitij, janiyari nojori Jiyaniijijanaa quiniutianiyani. Nojoriiri saniniuujia cua pueya quiniutianiyacujua. ¹¹Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocuaicano, cunoori najuhana quiniutianiya. Puetunu pueyapuejanaacuajaari tariucua cua niishijia quiniutianiya; jiyaniijianucua, poonijiotasano pueyano. ¹²Janiyari nojoriicua taraajeja quiniutianiyani. Majaari cua saniitonu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiya’”.

¹³Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucuacaanu Moisés na rootasano jiyatequiaari tariucua neera. Naacuajitij, Moisés Rootasanoori quera shaajasaanutianiya puetunujuanaa.

9

Tariucuacaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj

¹ Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijiaariuhua taa pueyacuara secojonaa poonijionutaniya cuno na quiquiojiniani. ² Pueyaso Secojoja suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejanio, tee Pueyaso tajoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tajoji nujuatajaari juhuacutu, orojiniji shipinishano. Cuniqii catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuua casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriqiano cariiquia jiyajinia nojori camarucuneejotasacari. Mii matariquiaajaariuhua Aarón nataka catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niqitiojosano. ⁵ Cuno caaja tiootiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetesano quiquiaari. Teecojuuari, teje Pueyaso shacantuua mueranacujuquiaari Moisésacuajani. Cuno caaja tiootiuuri seya nanaca majiriuutiasaquijiuhuaj, Pueyaso jiyanooniuria puetunu Israel pueyajanaa. Tariucujaja puetunu cuno casaajinijijianaa cua pohuatasano nijajaniya.

⁶ Pueyaso Secojoja tia jaara tari naa maninia tiasano quiquiaari puetunu na casamitiajanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacujani. Maja cutaraari nojori tiuquitianu quiquiaari Pueyaso Quishaquijianaa sohuacamara. ⁷ Saaja nojori jiyaniijia cutaraari tii tiuquiquiaari saaja rupaquijia puetunu marijiajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaqui quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanujuaja maja na naata rupeenu quiquiaari Pueyaso. ⁹ Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaajanaari miriqui miishano quiquiaari saaja. Naajuhuj, pa supuetanaa niqitiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeeCANU seetanujuanaa, juhujajaniya nojori rupeenura Pueyaso. ¹⁰ Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaarijiaatijia quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiiara. Puetunu naa pueya miishanojuanaari maja na naata pueya jiuujia jeeCANU sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jiiitasano pajaniyarano. Cuno quiquio, tee na sec-ojoquiaa na Que pocuaracuajani, cunoori seetanujuanaa Pueyaso quiquio jiyocuacaanu, maja pueyano tiasano. ¹² Naa Cristo tiuquishacari na Que quiquiojinia Pueyaso na jiyanooniuria pajaniyatej, nojuajaari maja na tiuquitianu quiquiaari cabra nanaca, juunu niqiuohua nanacanio. Nojuaja cutaraari tama na nanacatajaaja Pueyaso jiyanooni-
tiquiaari pajaniya. Nojuajaari maja pueyaracaanu na tiuquijionu na Queecua, taa mijiria

pueyacuara secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusonuucuatej, na Queeri Neyanuucua tiuujiaa jiyanooquiaa puetunujuanaa. Naacuajitij, majaari Pueyaso shuriucuaaji pa taanusaanu quiniutianiya. ¹³ Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tiajinia tiuquiniujiuhuj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyadoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhua Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijijianaa. Naatej, taa pueyacuara secojonaa jiyaniijianucua tiuquitiaguaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaraanu quijia na quiniucua, Jesucristojuanaari tama na nanacajaaja tiuquitiaguaari Pueyasooocua, pa jiyanooshaanura puetunu sesa pa miishanojinijijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵ Jesucristo cusonuucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasooocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusonuta quiari naatajajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqui pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miiijiani pa casami serotasaanura maninia, teyano pueya pa panitiaa nojori jiitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaguaaricujani, saminio pa quishacarijia. ¹⁷ Naacuajitij, saminio pa quishacarijia, najuhuaanaa pa naajiotasano. Pa shaajesacari, jiyacari cutara pa casamiiri niqutiojosano. ¹⁸ Tariucuaaanu naajuhuj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niqiarajanaa. Na nuhuaji, Moisésri juunu niqiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuaataari. Cunota, mohuacanacu majiriutiaquiaari Pueyaso Rupaa na naajiotasanoocuaari, puetunu Israel pueyacuajanaanio. ²⁰ Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojjijiaa quirini”. ²¹ Moisésri Pueyaso Secojoua tiaacua majiriutiaquiaari nanacajuhuj, puetunu Pueyasora poonijiotajara shipinijosano casamiicujanaanio. ²² Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiaa Cristo cusonuucua pocuara

²³ Mijiria Pueyaso Secojoua tia, puetunu na casaatajanaa quiniucua juhua jiyocuaaanu casaa naaqui, seya nanacaari maninia quiquiaaricuaaja cuno mijiria casami quiniuria jeequesano. Saniniuuja, jiyocuaaanu casaa quiniuria jeequesano, socua maninia nanacaari panishaquiaari seya nanacajiniji. ²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiqioori saaja juhua jiyocuaaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. ²⁵ Mijiria

pueyacuara secojonaa jiyaniijianucuaari puetunu marijijarajanaa pueyaracaanu tiuquijioquiaari Pueyaso Quishaqui saaja seya nanacata, pueya na jiyanoootiniuria Pueyaso. Jesucristo cutaraari maja naa na miiniu quiquiaari. ²⁶ Jesu jaara Pueyaso pa jiyanoootiriquia puetunu marijijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijijarajanaa. Quiari naataja saniniuujia, Jesucristoori mijiria rasaanquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaja puetunu nocua tiuujiaca pueyajanaa jiyanooshaanura. ²⁷ Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua, socua na cusonuhua juhua coteenu na csonu. Nojori shaajenu nuhuaji, nojoriiri saaja sashiya Pueyaso nequesoreenura nojori. ²⁸ Naajuhujaj, naa Jesucristo mosaanuucua jiyacaritij, saaja cunajuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuajitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaca rijionuucua tiuquiniutianihua, noo pojoriria canapuate na sashiyacuajani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunajuanaari juhua seetanujuanaa Pueyaso jiyocuacaanu casa naaqui, Pueyaso racatasano Jesucristoocua tiuujiaca pueyarano. Moisés Rootasano tojtijajaca pueya cutaraari puetunu marijijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaca pueyara na jatanishaanu seya nanacata. ² Naajuhujaj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³ Naa seya puecoosacari puetunu marijijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵ Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuaajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. ⁶ Majaari quia timiniu quiquiaa seya catijiasacari quiocuara, naajuhujaj pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanjia cua miiniuria quia panishano cua Que Pueyasonaa, taa janiyajiniji tariucuacaanu naajotasaaquiaricujani’”.

⁸ Moisés Rootasanojiniji pueyari maatia niishitiojosaquiaari nojori puecootenura tama na seyajaaja Pueyasoocua, na nataacuacajinijinio nojori niqutiojonura nerajuhuj. Nojoriiri niishitiojosaquiaarijuhuaj nojori catijianura na seya Pueyasoocua, tama nojori seya nanacajaaja shootesaanurajuhuj, sesa nojori miiniucua. Naajaa, Jesucristo sequesanojiniji, paari quiarjia niishiyani, puetunu naa pueya miishanojuanaari maja na timitiniu quiquiaari Pueyaso. ⁹ Nocuaji, Jesucristoori naa sequequiaari na Que: “Niya quiyacuajanjia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhua seya puecoosaanura socua. ¹⁰ Pueyaso tojjia na quiniucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano

pa quiniuria pueyaracaanu. Naacujitij, na Que Pueyasoori juhua tojetaarucujanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijosacari Pueyaso Secojojuu tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. ¹² Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusonuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucatanu nuhuaji Pueyaso miiniu panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuuara na paraa shocotare puetunujuanaajaatijiaj. ¹⁴ Naa niquiriyatu pueyano mosaanucuatej, puetunu nocua tiuujia pueyajaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucujaari naa pa niishitijahuaj naa Pueyaso sequesacari tariucuaaanu na rupaajinia:

¹⁶ "Pa Jiyaniijia Pueyasoori naa sequeya: 'Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiajiniani, na tojjia puetunu sesa nojori miishanojuanaa niyajetanutaniya seetanujuanaani'".

¹⁸ Naacujitij, sesa pa miishano jaara tari seetanujuanaa jiyanooshano quiya, cunora, maajaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupuer jeequesano poojiata

¹⁹ Naacujiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenucua na nanaca pocuara. ²⁰ Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasoocua. Mijiria Pueyaso Secojojuu tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaaquiiniuria Pueyasoocua. Cuno shiquiaruque toque cutaraari sutequiaari Jesu cusosacari. Cunocujaari pa niishitiya, pocuajiiri juhua nuunusano quiya Pueyasoocua. Neyanu Jesucristocujaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajahuaj. ²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²² Cunora, Pueyasoocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujia, juhua poojiaacua Jesu nanaca majiriutiasano quishacari. Naajuhuj, puetunu sesa pa miishanojuanaa cuaara jiyanooshano quiiri, naatej, taa pa cuaqueyacuanaa, pa nanasacari maniniuniacu mohuacata. ²³ Niaa jaara moojinia tiuquinjiosaaquiaari, niaari maninia pohuataquiaari pueya niquiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuatenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. ²⁴ Parta Pueyaso pueyacu tacaajia pa quiriquia. Panijia pa quiniuria pa shiniujitiooriquia, maninia miijia pa quiniuriajuhuaj. ²⁵ Noojiaqueya parta Pueyaso pueyari tari jiitiquocanu maja na rerejonura narta Pueyaso pueyata. Majaari naa nia miiniujihuaj. Maninia cutaraari pueyaracaanu pa rerejonura parta Pueyaso pueyata, pa shiniujitioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuri tari catecanoya.

²⁶ Nia niishiri pueyanaa, maatia pa miishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijaajani, ¿cantucua socua pocuara cusonu pacuterohua saajanihuaj? Shaaqui. ²⁷ Naa sacuaatia miijiacani, nojori cuaara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jyanohua saniitiosaanutaniya. Narta Pueyaso paraata cojiritiasaanutaniya

quejoonu mani quiquojiniaari pueyaracaanura. ²⁸ Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. ²⁹ Moisés Rootasano tojiyashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shoote-saanu jiyatejaca juhua najuhuanaratej? ¿Noo pojoritiiri jiyanooshaanutaniyajuhaaj, Pueyaso Sohuanuucua rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojiyashijiaca pueyajiniji. ³⁰ Paacuajaari tari tojiquiaari naa Pueyaso sequesanooni: “Janiyacuaajaari naminiani. Janiyari sesa miijiaca saniitionutaniyani”. Naa naajiotasaaquiaarijuhuaj: “Pa Jiyaniijia Pueyasoori na pueya nequesoreenutaniya”. ³¹ ¡Jiyanoohua puereeta quiniutianiya cutaraari Pueyaso jiyanooniu ruuretajaca pueyara, Pueyaso nequesoreesacari nojori!

³² Pueyanaa, tariucuacaanu naquiya nia miishaanu nia niishiriquia, nia jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. ³³ Noojiaqueya nijaniyajinijinoori cararaatia macaatishaaquiaari. Niaari pueya niqiara naquiya miishaaquiaarijuhuaj. Niarta Pueyaso pueya niqishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴ Naajuhuaaj, niarta Pueyaso pueyajinijino jaara nujuatejosano quiquiaari nujuatejojuajinia, Jesu tojitiajaca nojori quiniucua, niaari nojoriicua tiuquijioquiaari, nojori nia cumanijianura nocua nia taraajenuucua. Naajuhuaaj, nia paraa jaara nia jiiitiasano casami riutiocojoquiaari tama nojoririjaaja, nojori soosano Jesu pueya nia quiniucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuaaanu jiiitiaa socua maninia casaa cuno casamijiniji, pueya jaariuutiasano nijaniyajinijini. Cuno, Pueyaso jiiitiasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujia nia quiniucua, naa Pueyaso sequesanoocua tiuujia nia qiriqia pueyaracaanu. Pueyasocuaajaari jiyanoohua maninia miiniutianiya nocua tiuuniu tarinitiaashijiaca. ³⁶ Naquiya nia miishacari pueyaracaanu, juhuajaniya nia rejeretariquia saaja, maninia nia tucatanura puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequesanoocuaajaari naa naajiotasano quiya:

“¡Niaaj! ¡Quera tiuquiya pueyaca Niriquiano! Maja na tarishiniu. ³⁸ Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiushacari. Saniniuujia, tamonu pueyano jaara nocua tiuuniu tarinitiare, nojuaajaari cua soosano pueyano quiniutianiya”.

³⁹ Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacuajaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

11

Pueyasocua tiuuniujiniji pahuatasano

¹ Pueyaso sequesanoocua pa tiushacari, paari niishiyani paari puetunu Pueyaso sequesanojuanaa masenutaniyani. Nocua pa tiushacari, paari maatia niishiyani puetunu na sequesanojuanaa pajaniyarano pa niqishoo casaani, cunoori seetanujuanaa quiya. ² Noojiaqueya pa supetanaajinijinoori seetanujuanaa Pueyaso sequesanoocua tiuujia quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniucua seetanujuanaa”.

³ Pajaniyara naajuhuaaj. Tariucuacaanu Pueyaso Rupaacua pa tiushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niqishano casaajanaari shipinishaquiaari niqishoo casaajiniji.

⁴ Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanoinijii. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasanoorimitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuuquiaaricuaani.

⁵ Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuaaanu, mijiria na shaajeyaquiniuucuaaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuaaanu Pueyasooocua Rupaajinia, nojuajiniijiri pohuatashiyacuaja, Enocnaari Pueyasooocua timitijia pueyano quiquiaari mijiria na quishacarijia. ⁶ Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyasooocua. Naacuajitij, cante Pueyasooocua niishiniuucua jiaatiaani, nojuaja cuuara tiuuria Pueyasoori seetanujuanaa quijia. Nojuaja cuuara tiuuriajuhaaj, Pueyasoori na secojonuujuaca tojiquiaa. Nojori panishano miiquiaa nojoririjaarijuhaaj.

⁷ Pueyasoori supuetana Noé numootequiaari nojuajaari nio jiya pajaashitianiniutianiya, puetunu mijiria sesa miijiacajanaa na shaajanura. Pueyasoori na sequequiaarijuhuaj puereetuca buque na shipiniuria tii na tacatajara pajaacuaji. Jiyacaritij, Noeeri maja na niishiniu quijia pajaa. Naajaa, Pueyasooocua sequesanoocua na tiuuniuucua, nojuajaari Pueyasooocua tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquicohuatajuhaaj. Puetunu narta mijiria quijia pueyanaari cusonuquiaari pajaajinia, nojori tiuyaquiniuucua Noé pohuatasanoocua Pueyasooocua. Noé cutaraari juhua sesa miyashijara jiyatesaaquiaari pueyaracaanu Pueyasota rishijara na quiniuria, Pueyasooocua tiuujia na quiniuucua.

⁸ Abrahamri Pueyasooocua tiuuquiaarijuhuaj. Pueyasooocua sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajiniijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijiaara na niqutionutianiya tama na jiyaranoujaaja. ⁹ Pueyasooocua niquticosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanenouja pueyano. Abrahamri juhuanoujaaja maja cuno jiya camaru na quiniu quiquiaari. Naajaa, Pueyasooocua sequesanoocua tiuujia quiquiaari pueyaracaanuuri. Nojuajaari saaja seya cajacajini shitasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujuanaa na sequesano Abraham. Naacuajitij, nojori Pueyasooocua sequesanoocua tiuujia quiquiaari pueyaracaanujuhuaj. ¹⁰ Pueyasooocua jaara Abraham sequesanoocua, nojuajaari pueyaracaanu na quijiarano quiquio na niqutionutianiya, Abrahamri niishiquiaari Pueyasoori miriqui sequeriquiaa tama na shipinishano tiacajiniijiaaja. Cuno pueyaracaanu rishijia tiacaari Pueyasooocua niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyasooocua sequesanoocua na tiuuniuucua.

¹¹ Naajuhaaj, seetanujuanaa Pueyasooocua sequesacari Abraham, nojuaja na muetutentutianiya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. ¹² Naacuajitij, mueya shipiniyashijia saaquianoori mueya mueratequiaari. Cuno neyanuucujinio supueno pueyari queraatiara canequiaari, queraatiara juhua riya, serojiyaquishoo, juhua shoniniacu caminia shuriuquico paajia jaaquia.

¹³ Puetunu cuno pa supuetanaajanaari Pueyasooocua tiuujiaaja shaajecoquiaari. Nojori juhuanoujaaja maja na jiiitanu quiquiaari seetanujuanaa Pueyasooocua sequesano nojori na niquticosocoriquiano. Naajaa, seetanujuanaa nojori tiushacari Pueyasooocua, nojoriria, Pueyasooocua sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiiitasano. Naacuajitij, nojoriiri juhuajianiya

quiquiaari juhua rucoojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴ Naacuajitij, paari niishiyani nojoriiri tamonu jiya jiitianuucua jiaatiariquiaa, pueyaracaanu nojori quiquiorano cutara. ¹⁵ Nojori jaara saaja mijiria jiya camaruhua quiniuria panijiaa quiquiaari, nojori maara na supuetujua jiyajiniara riujuuquiaariuhua. ¹⁶ Saniniujjia, nojori cutaraari socua maninia jiya jiitianuucua jiaatiaquiaari, pueyaracaanu nojori quiquiorano cutara. Cunoori jiyocuaaanu quiqiuo, Pueyaso jeenucuasano nojoriria. Naaratej, majaari Pueyaso caririqiniui quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucuasano tiaca jiitiaa nojoririano jiyocuaaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyojua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariiri cuara na panishano niyanu moora, nocuara na catijasocoriquiano. Cuno neyanu Isaacuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretano quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojua jaatucquiaariuhua shuquiriaatia na quiqiuojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajaculaani.

²⁰ Isaac tiuuniuucua Pueyasooocujuhua, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúno: “Pueyasoori jiyanhua maninia miiniutianiya niaara, niaacuajinio supueno pueyano, taa na sequequiaari janiyacuajani”.

²¹ Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanhua maninia miiniutianiya niaara, niaacuajinio supueno pueyano”. Naa na sequenu nuhuaji na jihuuatej, nojuajaari na natacaacia tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niqitiosocoriquiano jiyajiniara.

²³ Moisés queya quiniuucua Pueyasooocua tiuujiaa, nojoriiri Moisés jamoquiaari jaara shusha rasaquiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiochua shusha roosano canujuanaa cuara moojinia quejoosaaria. Naajaa, nojoriiri cuno sequesano tojiaquiquiaari nojori puerayaquiniutia saaja, Pueyasooocua tiuujiaa nojori quiniuucua.

²⁴ Naajuhua, Moisés quishacari tariuucua cumantumaca, Pueyasooocua tiuujia na quiniuucua, nojuajaari na canashitina Faraón niyatu tamacaquiaari. Nojuajaari tama sequequiaarijiaaja: “Majaari Faraón jinianu cua quiniu paniniu. Janiyacuajaari Israel pueyanoni”. ²⁵ Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacia taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojquiaari nojuaja cuara cojiritiasaaria naquiya miishaanu narta Israel pueyatajuhuaj. ²⁶ Pueyaso sequesanoocua tiuujia na quiniuucua, nojuajaari niishiquiaari Pueyasoori na tojtiajaca miiniutianiya

maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiitiaja na quiniuria mijiria, Faráon jinianu na quiniuucua.

²⁷ Pueyaso sequesanoocua tiuuja Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanhua. Seetanujuanaa Moisés tiuushacari na niqiuquishoo Pueyasoocua, nojuajaari Pueyaso niqiuquiaari noojiata, juhua na shuriucua quiyano pueyara-caanu. Naacuajitij, Moisésri tama na cuaqueyajaaja cumaquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiujiutianura na tia tohuateyaji, maja nia jiyapueranuhua cusojuasaanurajuhuj”. Moisésri Pueyaso sequesanoocua tiuquiaari. Naacuajitij, puetunu Israel pueya jiyapueranuhujinijinojuanaani, majaari quenaaja niquriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jyanishano camini-aari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiaara caminia taqijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niuutianu paniquiaarijiuhuj, nojoriiri saaja shushiniuquiaari.

³⁰ Israel pueya tiuquishacari Pueyaso niqitiosocoriquiano jiyajinia, nojoriiri na paraa Jericó tiaca shocua camarucuneataquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹ Puetunu Pueyaso tojiti-aashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujuna na jamojonuucua tarijia narta pueyacuaji. Rahabri naa maninia miiquiaari Pueyasoocua tiuuja na quiniuucua. Naaratej, Israel pueyari cuno paanatu jyanooquiaari.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasoocua tiuujiaca quiquiaari. Tariucuaja cua pohuatasano, maninia nia niishiniuria Pueyasoocua tiuujiaca pueyari Pueyaso jiyanooshano. Naajuhuj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequesano caminiujunaa pueyajinijinio. ³³ Pueyasoocua tiuujiaca nojori quiniuucua, nojoriiri tamasa jiyaniijianucua miaquejoquiaari na jiyajiniji. Pueyasoocua tiuujiaca nojori quiniuucua, nojoriiri maninia jiyani-ijianucua quiquiaari, maninia na jiiitianura narta Israel pueya. Pueyaso sequesanoocua tiuujiaca nojori quiniuucua, nojoriiri Pueyaso sequesano nojori na niqitiosocoriquiano masequiaari. Pueyasoocua tiuujiaca nojori quiniuucua, juurunu sareya rupaari juhua seecujutasaaquiaari saaja, maja na soonura nojori. ³⁴ Pueyasoocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasoocua tiuujiaca nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucujaja mueruuta. Pueyasoocua tiuujiaca nojori quiniuucua, sasaca pueyari jyanohua cumaacaraca quijiacara quiquiaari. Pueyasoocua tiuujiaca nojori quiniuucua, nojoriiri jyanohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijuhuj. ³⁵ Naajuhuj, Pueyasoocua tiuujiaca maajipohua quiniuucua, nojori macuuri samiiticoquiaariuhua nojoriria.

Tamasacaari jyanohua taraatia miishaaquiaari Pueyasoocua tiuujiaca nojori quiniuucua. Cunora, nojori paraa jaara nojori quiooquiaari, nojoriiri puecoonura mianana-josaaquiaari nojori jaara Pueyaso tojiniu tarinitiaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasoocua tiuujiaca nojori quiniuucua, nojoriiri saaja paniquiaari nojori cuaara puecoosariaqui, naajaa, jyanohua naquiya na miiniutia. Nojoricuajaari niishiquiaari, Pueyasoori nojori samiitianjonutaniuhua,

jiyanohua shuquiriaatia nojori quiniuria pueyaracaanura cutara. ³⁶ Tamasaca quiniuucua Pueyasooocua tiuujiacajuhuj, nojoriiri cararaatia macaatishaaquiaari, jiyanohua majacusaquiaariiaariuhuj. Naajuhuj, tamasaacari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷ Tamasacaari saitia jacusaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanohua naquiya na miishaanura. Naajuhuj, tamasaacari nijiniaquetucua mueruuta puetujusaaquiaarijanaa piyonu. Naajuhuj, tamasaaca quiniuucua Pueyasooocua tiuujiacajuhuj, nojoriiri juhua taanusano rucoojoquiaari puetunu tiquiyocujanaa. Casamijuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaj. ³⁸ Juhua taanusano nojori quiniuucua, nojoriiri juhua tashuquioonoo rucoojoquiaari cariquia jiyajinia, tuhananuhujajiniano. Tiaajunucua nojori quiniuucua, nojoriiri saaja raaco maquiyonuujuaca quiquiaari. Mijiria quijia pueyari nojori jiyatequiaari juhua najuhua quijia pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaca nojori quiniuucua.

³⁹ Pueyasocuaajaari nojori jiyanoocuaari, seetanujanaa nojori tiuuniuucua nocua. Naajaa, nojoriiri juhuanouaja maja nojori masenu quiquiaari seetanujanaa Pueyaso sequesano nojori na niquitiosocoriquiano. ⁴⁰ Pueyasoori nio pa quishacari nojori sashitiyajara, jiyanohua maninia na miishacari pajaniya na Sohanuta, Neyanu Jesucristoocua pa tiuuniuucua. Na nuhuaji, Pueyasoori puetunu nojoritajanaa pa cojiritianutaniya jataniniu tojetaarucujanaa maninia mijia pa quiniuria, na shuriucua na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniurijuhuj

¹ Naa pa niishishacari taa queraatia pueya maninia miiquiaari Pueyasooocua tiuujiaca nojori quiniuucuaaani, cunora, tama pa cojetasano najuhua casa pa tarinitiariquia. Tarinitiahiyari puetunu najuhua casaajanaa, teyanooocua pa cojequia Pueyaso panishano pa miyaquiniuracuajani. Naajuhuj, puetunu sesa miiniujanaa pa tarinitiare, puetunu pa cumacajanaa pa jitianura, juhuajaniya rejeretajaca pa quiniuria. Naacujiti pa naata maninia tucatanu puetunu Pueyaso panishanojanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucujanaa na Que Pueyasooocua tiujia quiquiaari. Nojuajaari niishiquiaari, naquiya na miini nuhuaji, na Queeri jiyanohua shuquiriaatia quijara na jiyatenutaniya. Naaratej, nojuajaari juhuajaniya rejeretaquiaari naquiya na miini niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijajanaa na quishacari.

³ Majaari nia niyajetanu taa Jesu rejeretaquiaari juhuajaniyacuani, pueyaracaanu sesa mijia paracaashacari nojuaja. Nocua nia niishiriojoriquia, nia mariqui Pueyaso tojinu tarinitianu paniriiri nia taraajenuta naquiya nia miishacari. ⁴ Niaacuaajaari naquiya miishaaquiaa, Jesucristoocua tiuujiaca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucujai. Nia rejeretariquia saaja. Majaari juhuanojuaja nia puecoosaanu quiquianu na tojtiajaca nia quiniuucua. ⁵ ¿Niaateeri Pueyaso rootasano niyajetarucuaa tari, na rootasano pajaniya juhua necohua? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniani. Janiya jaara quia nacasura socua maninia mijia quia quiniuriani, majaari cucujai pishiniu. ⁶ Quia Jiyaniijia cua quiniuucua, janiyacuaajaari cua panishano pueyano jiuujiyashijiani sesa na miishacari. Naajuhuj, janiyari cua nianura cua jiyatesano pueyano saniitiojani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria nijaniya, seetanujanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia?

¡Maja! ⁸Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohanu Que, pueyaracaanu rishijiaca pa quiniuria. ¹⁰Pa queyari pa canashitijioquiaari taa nojori paniquiaaricujani. Nojori rootasacari pajaniya, nojori saniitosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniuuja, nojuajaari pa saniitioquiaa seetanujuanaa maninia mijijaca pa quiniuria, juhua nojuaja pa quiniuriajuhuaj. ¹¹Seetanujuanaa, puetunu sanitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaquirini, paari socua maninia mijijara jatanishaaquiaani, socua Pueyaso tojjijara pa quiniuria juhuajaniyajuhuaj.

Jiyanhua cocuaatiari Pueyaso pa tojiyaquishacari

¹²Naacuajitij, majaari nia pishiniu pueyanaa, Pueyaso saniitosacari niajaniya. Nocua nia tiuuri saaja. Nioojica nia cumaquiriohua. ¹³Saaja Jesucristo rupaa tojjijaca nia quiri, jatarinitiaja Pueyasocua tiuujiaca mariqui noojia niqijiotereeri. Nojori cuaara saniya cumaquishano quiiria cutara.

¹⁴Tama nia cuaqueyajaaja nia cumaquiriquia, juhuajaniya quijijaca nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniija niqiniutianiya, seetanujuanaa maninia mijijacara jatanishano pueyatej. ¹⁵Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaaja na cumaquiniuria niajaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacia paaquenutaniya na sesonura queraatia pueya. ¹⁶Naajuhuj, tama nia cojuatooriquiaaja. Naa nia miitiooriquia tamonu niajaniyajinijinio mariqui Pueyaso sequesano na niqitiosocoriquiano pajaniya soojeera quiiri, saniya tama na cuaqueyajaaja na shuquiritiniuria mijiria. Supetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niqitiosocoriquiano janiya, na jiyapueranu cua quiniuucuan, cuno cuaara quiiria quiara, quiaa jaara quia sumatuujiniji rupore quiria. Jiyanhua miaajeyanijia”. ¹⁷Niaacuajaari niishiya, na nuhuaji, Esauuri paniquiaari na que secojonura nocuara, jiyanhua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanhua na que nenecoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiara.

¹⁸Nio pa quishacari, pajaniyara, Pueyasoori maja juhua tariucuaaanu na quishacari pa supetanaa Israel pueyata. Jiyacartij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanhua puereeta niqishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanhua ninishiquiri quiriqiaajuhuj. Paratuuri jiyanhua piyarojoriquiaa puereetajuhuj. ¹⁹Trompeta jonenenuunuuri jiyanhua tojishaariquiaa. Pueyaso pocuanuuri jiyanhua tojishaariquiaajuhuj. Israel pueya tojishacari Pueyaso pocuaano, nojoriiri jiyanhua puereetiquiaari. Naaratej, nojoriiri Moisés sequetuquiaari maja socua Pueyasojuaana pocuanura nojoriuara. ²⁰Nojoriiri maja socua na rejere-tanu quiquiaari puera puereeta Pueyaso sequesacari nojori. Pueyasoori jiyacari na sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa mijia seru cuaara naa puecoosaariajuhuaj”.

²¹Puetunu Israel pueya niqushanojuanaari jiyanoehua puereeta quiquiaari seetanujuanaa. Moisésjanaari na puerequiaarijuhuaj. Nojuajaari na puerenuta sequequiaari: “Cua puerenuta teteaanijia”.

²²Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuanaanuucua. Jesucristo cusunuucua pocuara, paari Pueyaso quiquio-jinijanaa tiuquitiaquiaani. Cuno na quiquio sesaari miriqui sequeshiya “Sión tuhuana-nu”. Na pueya pa quiniuucua, nojuajaari jiyocuacaanu pueyaracaanu pa quiijarano tiaca jitiiaa. Cunoori seetanujuanaa jiyocuacaanujinio Jerusalén tiaca. Naacuajitij, paari jiyanoehua queraatia Pueyaso seya rupuequiaani, Pueyaso pa maniniuuhaqueetanura no-joritajuhuj. ²³Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoree-tuneejinia naajiotasano quiya. Paari Pueyasocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasocua tiuujiaa sohuanuhuari tii quiyajuahuaj, canapue Pueyaso jiyatequiaari tojetaarucujanaa sesa miyashijiacaracujani. ²⁴Jesucristoori tii quiyajuahuaj. Nojuajaari tama na cusunutajaaja Pueyaso jiyanootiquiaari nocua tiuujiaa. Tama na nanacajaaja na shootenuucua pocuarajuhuj, paari cunota jeequejosaquiaari tojetaarucujanaani. Naacuajitij, Jesu nanacaari jiyanoehua socua maninia Abel nanacajiniji. Caín monuucua tarajanu Abel, Abel nanacaari Pueyaso shini-ujija na mona cuara mosaariajuhuaj. Jesucristo nanaca saniniuujia, cunoori Pueyaso pa jiyanootiquiaacujua.

²⁵Cunora pueyanaa, tama nia cuaqueyajaaja nia cojuare maja nia ruuretanura Je-sucristo Rupaa. Tariucuacaanu, pueyari jiyanoquishaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoquishaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoquishaquiaaricuaa, nio pa quishacari saniniuujia, ꝑaautucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyo-josacari pajaniyani? ²⁶Pueyaso pocuasacari Sinaí tuhuananujiniji, jiyari na pocuasacari tetequiaari. Quiarijia saniniuujia, Pueyasoori seetanujuanaa sequeya: “Janiyari socua caminiutianihua jiya jiuuquitiianuni. Maja saa jiyaja. Jiya cajiniocuanio. Jiyacunojua-naari quiniutianiya naa cua miiniu”. ²⁷Naa na sequesacari taa socua na caminiutianihua jiya jiuuquitiianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸Quiarinio quiquio, Pueyaso shipinishano na niqitiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanoehua maninia miiniutianiya pa-janiya. Cunora pa shuquiritiare nojuaja. Paari na shuquirityani pa timitiasacari nojuaja. Naacuajitij, nojuaja pa timitiare jiyanoehua pa paniniutia nojuaja, pa puerenutatio. ²⁹Nojuajaari puereeta mani, Neyanu ruuretajaca shaajaja, sesa pa miishano catijiajuhuaj.

13

Taa pa miyani Pueyaso pa timitiniuria

¹Majaari panitioonu nia tarinitianu. Naa Pueyaso pueya nia quiniuucuatej, pueyara-caanu panitiojuaca nia quiriquia. ²Naajuhuj, majaari rucojuaca ruuretanu, niacua nojori tiuquishacari. Nojori panijiaa nia quiriquia. Noojiaqueya pa supuetanaajinijin-icouajaari Pueyaso seya masuquiaari na tiacora, nojori jiyanishacari nareja pueyano naasucua.

³Nujuatejosano pueyacua taraajeja nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaj, nojoriicua nia taraajenura seetanujuanaa. Naquiya miitiasano pueyacua taraajeja nia quiriquiajuhuaj. Nia niishiriquia, niaari na naata naa miitiasaanujuhuj.

⁴Pueyasojuaanaacujajaari pa niishitioquiaari pa camitioonura. Cunora, camitioonu pueya cuara saaja neyacata, necocuata quiija quiiria. Cante camiyojuani, nojuaja cuara tama na cuaqueyajaaja cojuara maja narta pueyano niquiocua na numuetucunura, na

camishoo maajinio. Nia niishiri, Pueyasocuaajaari naa sacuaraatia miijiaa saniitionutaniya.

⁵ Majaari cumaneeca porocua nia quiniu tama niaarajaaja nia jiitianura. Juhujaniya quijia nia quiriquia nia jiitiasanota. Nia niishiri, Pueyasocuaajaari sequequiaari: “Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaaniu. ⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaqueiaari na sequesanoocujani. Naa sequequiaariiri:

“Jiyaniijia Pueyasocuaajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

⁷ Coteenujuanaa nia jiitianaa pueya nia niishiriojori quia, noo pojori canapueete shushajanaa nia tojtioquiaari Pueyaso rupaacuajani. Nojoriiri seetanujuanaa Pueyaso tojijiaa quiquiaari, Jesucristoocua tiuujiaa nojori quiniuucua. Juhua nojori quiniuucua jiaatiajaca nia quiriquiajuhuaj, taa nojori quiquiaaricuaani.

⁸ Taa quijia Jesucristo quiquiaari tariucuacaanuni, nojuajaari naa quiyajaa. Naa quiniutianiya pueyaracaanuari. Majaari na jatanu. ⁹ Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojtiajaca. Naajuhuj, majaari pueyacuara secjonaa jiuujia cumaquishaanu quiquiaari nojori miaquesacari Pueyasorano puecoosano seya shujiniji. Pueyaso Sohuanu cutaraari poojia cumaquiquiaa, panijiaa pa quiniuria.

¹⁰⁻¹¹ Saniniuujia, pueyacuara secjonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaritij. Pueyacuara secjonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijiaarajanaa, cuno nanaca na majiriutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secjonaa jiyaniijiaari tojetaarucujanaa tenujusaquiaari maja na miaquenura cuno shu. Nio pa quishacari saniniuujia, paari jiyanoohua cumaquishaquiaani Jesucristo consonuucua pocuara. Cunojiniji, paari seetanujuanaa Pueyaso rupuesano quiyacuajani. ¹² Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiarijuhuj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijianaa. ¹³ Nojuajaari jiyanoohua cararaatia teetesaaquiaari niyacutesanojinia pa niti. Naa Jesu miiniuucua pocuaracuatej, Pueyaso niishiyashijiaa jaara cararaatia miiriquia pajaniya Jesuucua pa tiuniuucuaani, juhujaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujacani, nio jiyari maja pa quiquio. Mijiria, shaaquiri pueyaracaanu rishijia quiquio pajaniyarano. Cunora, paari jiyocuaaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jiitianuucua pueyaracaanu rishijia quiquio pajaniyaranotej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquiaa na Queecua.

Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocuaajaari na panishano. ¹⁶ Naajuhuj, majaari nia niyjetanu maninia nia miiniuria niarta Pueyaso pueya. Nojori jiitaaquishacari nojori panishano, nia jiitiasano casaajiniji nia niqutiojori quia nareja nojori. Paa jaara na miijiaa quirini, paari juhua Pueyasora pa casaa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jiitianaa tojtiajaca nia quiriquia. Majaari nojori niishitiojosano nia ruuretanu. Nojoricuaajaari nioojiaa cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitiajaca nojori quiniuucua. Naaratej, shamaatia nojori tojtiajaca nia quiriquia maninia, Pueyaso nojori pohuata-nura shitimia nijaniyajiniji. Niaa jaara nojori tojtiaashijiaa quiri, nojoriiri Pueyaso pohuatanutaniya na taraajenuta nijaniyajiniji. Jaara naa quiriritij, niaa cutaraari taraatia quiniutianiyajuhuj.

¹⁸ Canaacuara nia secojonuuriquia. Canaacuajaari saaja maninia miiniuria saniniuji-
uquiaa pueyaracaanuni. Naacujitij, canaa jiuujiaari panaatia quiya Pueyaso niqiuara.
¹⁹ Janiyari jyanohua paniyani cucuara nia secojonura, Pueyaso tiuquitiniuhuara ritia
janiya niaacua.

Nio naajiona panishacari maninia Pueyaso miiniuria pueya, na sarhuatasacari pueyajuhuj

²⁰ Jesucristo shootenuucua na nanaca pocuara, paari niishiyani puetunu Pueyaso seque-
sanojuanaari seetanujuanaa pajaniyarano quiniutianiya pueyaracaanu. Naa Jesucristo
miishanoocua pa tiuushacaritij, na Que Pueyasoori pa jiyanooquiaa, juhuajaniya pa
rupuenura nojuaja. Pueyasojuanaacuajaari pa Jiyaniijia Jesucristo samiitianiquiaariuhua
macujiniji. Nojuacuajaari pa cojuana, na panishano pueya pa quiniuucua. ¡Jyanohua
maninia pa Pueyaso! ²¹ Neyanu Jesucristoocua nia tiuuniuucua, nojuaja cuaara jataniiria
niajaniya tojetaarucujanaa jeenucuasano nia quiniuria, taa na panyacuajani. Nojuaja
cuaara naa miiria niajanijatej, maninia nia tucuatunura puetunu na panishanojuanaa.
¡Pa Jiyaniijia Pueyaso cuaara pueyaracaanu shuquiritiasaaria jyanohua maninia na
quiniuucua! Cuaara naa quiiriatej.

²² Cuarta Pueyaso pueyanaa, jyanohua nia secojijianijia maja nia ruuretanura secaja
rupaata cua shiniujiushacari niajaniya nio cua naajiojinia. ²³ Nia niishiri pueyanaa, parta
Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara
tarishiyaquiri cucua na tiuquiniuria, janiyari cucua na ruponutaniyani nia niquiniuucua
cua quiasacari.

²⁴ Naajuhuj, quiria nia sarhuatare puetunu nia jiitanaa pueyajanaa, puetunu cuniqui
quiniaa parta Pueyaso pueyajanaanio. Italia jiyajinijinio parta Pueyaso pueyari nia
sarhuataajuhuj.

²⁵ Pueyaso cuaara na Sohuanuta cumaquiiria puetunu niajanijajanaa.

SANTIAGO NAAJIONE

Santiago naajiosano niyaquejeno pueyacuara

¹Janiyari Santiagoni, Pueyaso seru, Neyanu Jesucristo serujuhuaj. Nia saruhuataanjia puetunu tiqiyocua jiyacajiniajanaa niyaquejeno Israel doce niquiohuacuajinio caneno pueyanaa.

Niishitiaja Pueyasojiniji masesano

²Cuarta Pueyaso pueyanaa, shuquiriaatia nia quiriqia niaa jaara taraatia miishaare, niaa jaara naquiya miishaarejuhuaj. ³Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuaara puetunu maninijanaa miiria niaarajaatijia. ⁴Nia rejeretare seetanujuanaa maninia sashijaca nia quiniuria, majaari quenaaja nia taacanuunu. Niaa jaara naa mijia quiririj, niaari maninia jeenucuasano quiniutianiya, pueyaracaanu maninia mijia nia quiniuria.

⁵Tamonu nijaniyajinjini jaara niishiyaquiri taa na miiniutianiyani, nojuaja cuaara Pueyaso maseera, Pueyaso na secjosacari. Pueyasoori na niishitiaja niqutionutianiya. Nojuajaari puetunu pueyajanaa niqutioquiaa, capora na quiniucua. Majaari na juaaniu niaa jaara na masere. ⁶Nia masacari, seetanujuanaa nia tiuuri Pueyasocua, majaari quenaaja nia taacanuunu. Cante na masacari taacanuujuaani, nojuajaari juhua paratu piyarojosano mohuaca, naatej, taa paratu tacarobjia mohuaca na piyarojosacaricuaani. ⁷Jiyano pueyanotej, Pueyasoori maja na masesano na niqutionu quiniutianiya, noojia niquijijoteja na quiniucua. ⁸Noojia niquijijoteja pueyanoori quiarjia maseya na panishano. Tariqui na secjosacari saniniujia, tamonu casaa maseyari, na paniaquishacari coteenu na masesanocuaa. Jiyano pueyanoori noojia niquijijoteja pueyaracaanu. Majaari quenaaja na miini panishano na tucuatenu quiniutianiya.

⁹Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriqia. Pueyasocuaari nia jiyatequiaari na muerasura, na jiiitanasojiniji nia jiiitanurajuhuj. ¹⁰Saniniujia, niaa jaara casamiriaca pueyano quiri, shuquiriaatia nia quiriqia Pueyaso jiyanooshano nia quishacari. Niaacuajaari niishiya niaari tojetaarucujanaa saniitosocoriquiano quiquiaari juucua sesa mijia nia quiniucua tarjia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niquishiya shanohuari. ¹¹Pananu jaara nasaatia jama, neyonaari sorequee. Na shuuri tiqii. Shanohua niquishanoori shaajequeejuhuaj. Casamiriaca pueyanoori naajuhuj. Na casami na niqitiosacarjia na canijianura juucua, canashiaquiji shaajenutaniyaariuhuj.

Naquiya pa miishacari

¹²Shuquiriaatia quijia cutaraari Pueyasocua tiujia, cante taraatia na miishacari rejeretaja saajani. Naa taraatia na saniniujiushaanuucatej, nojuajaari juhua cutara jiyaniijia tuhuaja niqitiosaanutianiya, pueyaracaanu rishijia na quiniuria. Cunoori Pueyaso niqutionu panishano na panijaca, taa na sequequiaaricuaajani. ¹³Niaa jaara sesa miiniucua jiaatiaa, majaari sequenu: "Pueyasoqui sesa cua miitini pania". Pueyasoori maja sesa mijia. ¿Pa Jiyanijiatucua casaara sesa miitiri pajaniyani? ¹⁴Saniniujia, tama poojia sequejaarijia pa shiniujiuquiaa sesa pa miiniuria. Naajuhuj, tama pa niishitijajaarijia pa sapojuquiaa sesa pa panishano pa miiniuria. ¹⁵Naa sesa miiniucua pa jiaatiasacaritij, cunora paari sesa miiquiaani. Naa sesa mijia pa quishacaritij, paari cunora shaajasaanutianiyani.

¹⁶Cuarta Pueyaso pueyanaa, maja tama nia cuaqueyajaaja nia sapojonu. ¹⁷Puetunu maninia casaajanaa pa masesanoni, cunoori Pueyaso niqitiosano jiyocuaaanuji. Nojuajaari puetunu jiyocuaaanu pa niquishano casaajanaa shipinijioquiaari, mijiria pa cuhatariquiano. Pueyasoori pueyaracaanu maninia quijia. Majaari na jatanu tamaatia

na quiniuria, na cojuaaquiniuria pajaniya. ¹⁸ Pueyasocuajaari pa sohanu samiitianijio- quiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacar- icuaani, Pueyasoori naa juhua pa tutaquiaari na shuquiriniutiajuhuaj, coteenujanaa na jiyatenuhuhua pa quiniuucua. Nojuajaari tariucuacaanujiniji naa pa riurioquiaaritij.

Seetanujuanaa Pueyaso tojtijajaca

¹⁹ Naacuajiti cua panishano cuarta Pueyaso pueyanaa, cua tojtitiare. Puetunu nijaniya- janaa cuaara quiiria ritia tojijia, jacaria pocuaja. Cuaara quiiria shiniquiajuhuaj, maja ritia juaajia. ²⁰ Pueyanoori maja na naata Pueyaso panishano miiniu na juaaniutia. ²¹ Naaratej, nia cartere puetunu sacuaraatia nia miiniujuanaa, puetunu sesa nia niishiriojosanojua- naanio. Nio pa quishacari, puera sesa miiniuuri quiquiaa. Naajuhuj pueyanaa, juhua maninia naatujua nia tojiri Pueyaso rupaa, taa nia niishitiojosaaquiaaricujani. Majaari na ruuretano. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

²² Pueyaso rupaa tojijia nia quiri seetanujuanaa. Majaari nia numaa shama nia tojtitanunoj. Naa jaara Pueyaso rupaa tojiyaquiri, niaari tama nia cuaqueyajaaja sapojija.

²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqitiujinia narejaari. ²⁴ Jaara tacateyarohua, na jiquioco niyasetaseequiohuari taamuecate na jiquioco quiriqiaani. ²⁵ Pueyaso rootasanoori jiyanohua maninia, maja quenaaja sesa. Sesa miiniuucua jiiitino pueyano jaara na tojijia quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhuj.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojijajaacujua. Saaja sacuaraa- tia pocuaja quiya pueyaracaanuari. Nojuajaari najuhuaa Pueyaso rupaa tojijia. ²⁷ Cante seetanujuanaa pa Que Pueyaso rupaa tojijiani, nojuaja cuaara japueyojuaca niqiniuucua rucaneera, nojori na naacunura. Cuaara naa miiria mashiquiopuerajuhuj, nojori taraajenucujusacari nojori na cumanjianura. Naajuhuj, cuaara tama na cuaqueyajaaja cojuara, narta pueya na miyaquiniuucujia sesa. Naa miiija pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujiaca nia quishacari, majaari rimiajata nia niqiniu tamasa. ¿Pa Jiyaniijiateeri pa sooquiaaricuaa, ninishiqui quijia pa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqui toqueraca, jaaniishoraca- juhuaj, ¿taa nia miiniutianiya? ³ Niaari naa sequeja: “Niya quia cajishii pueyanonaa, cajitii maniniujiniani”. Saniniujia, toqueju pueyano jaara jiyacari tiuquimajuhuj, jiyareta curuutuquenaniyojua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujaani”. ⁴ Naa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamiiju pueyanojiniji. Naaratej, niaari casamiriaca pueyano shuquiritini panijia.

⁵ Cua tojtitiare cuarta Pueyaso pueyanaa, ¿majateeri nia niishiniu, Pueyasocuajaari casamiijuiniucua pueya saquiriojoquiaari nocua tiuujiaca nojori quiniuria? Nocua tiu- ujiaca nojori quishacari, nojoriiri juhua jiyanohua casamiriaca Pueyasora. Naajuhuj, Pueyasoori nojori jiyatenutianiya jiyaniijianucua nojori quiniuria, puetunu Pueyaso ji- itiasanojanaa nojori jiiitianura. Naa miiniutianiya na panijiaacari taa na sequequiaari seetanujuanaacujani. ⁶ Nijaniyarijiataj, niaari nojori cararojoquiaacujua. ¿Majateeri nia niishiniujuhuj, cuno casamiriaca pueyacuajaari nia nohuasejoquiaa na sapojonuta?

Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri naa miitiquiaaqui nia jiitiasano casaaniyojua na jaariuutianura puetunujuanaa. ⁷ ¿Majateeri nia niishiniu, nojoricuajaari pa shuquiritiasano Jiyaniijia sesacaquiajuhuaj? Pa Jiyaniijia sesa jiyaniquitiuquiaa na soonutaari.

⁸ Puetunu Pueyaso rootasanojinijijianaani, niiori socua tojishocoriqiano. Naa naajio-tasano qiyari:

“Pueya nia paniri taa nia paniya tama nia cuaqueyacuani”.

Pueyanaa, niaa jaara cuno rootasano miijia quiriquia, niaacuajaari maninia miijia.

⁹ Saniniuujia, niaa jaara rimiajata paniri pueya, niaari sesa miya. Niaari saniti-socoriqiano, Pueyaso niishitiojosano tojiyashijia nia quiniuucua. ¹⁰ Pueyano jaara puetunu Pueyaso rootasanojuanaa tojiqiaa maninia, saniniuujia, jaara niquiriy-atu cuno rootasanojiniji tojiyashijia quiri, cuno pueyanocuaajaari Pueyaso tojiyashijia.

¹¹ Pueyasojuanaacuajaari sequequiaari: “Maja nia camishoo maaji nia numuetucunu”.

Sequequiaarijaarihuaj: “Maja monu”. Naacuajitij, pueyano jaara na camishoo maaji numuetuqueyaquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaj.

¹² Niaa cumaati niishiya, Pueyasoori na muerasu nequesoreenutaniya taa nojori tojitiaquiaari na rootasanocujani. Nocuaijia tama pa cuaqueyajaaja pa cojuare taa pa miiquiaani, taa pa pocuaquiaani. Nia niishiri, paari nequesoreesanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricujani, nojoriiri jiyanooshaanutaniya taa nojori jiyanooquiaaricuaa tamasacani.

¹³ Saniniuujia, canapuate narta pueyano jiyanyashijia quiquiaarini, Pueyaso nequesoreenu juuca puetunu pueyanaa, nojoriiri jiyanyo-aquishaanutaniyajuhuj. Canapuate jiyanoojia cutarani, nojoriiri jiyanooshaanutaniya cutara, taa tamasaca nojori jiyanooquiaacuani. Nojoriiri shuquiriaatia quiriquiano cuno juuca, Pueyaso nequesoreesacari nojori.

Pueyasocua tiuujiaacari maninia miijia

¹⁴ Cuarta Pueyaso pueyanaa, ¿maninate pueyano jaara sequere: “Janiyacuajaari Pueyasocua tiuujiani”, nojuaja jaara maninia miyashijia quiyajaa? Nojuaja jaara maninia miijia jatanishoo quiyajaa, najuhuaa sequeyari: “Pueyasocua tiuujianijia”.

¹⁵ Naacuajitij, tamonu parta Pueyaso pueyano jaara pa sequesee: “Maja cua jiitianu toque. Maja quenaaja cua miaquesocoriqiano cua jiitianujuhuj”, ¿taa pa miyani? ¹⁶ ¿Maninateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujuhuj?”

Maja. Paa jaara quenaaja na niquitioyaquiri na panishanoni, pa sequesanoori najuhuanaj. ¹⁷ Naajuhuj, pueyano jaara sequere: “Jesucristocua tiuujianijia”, jaara seetanujuanaa Pueyaso rootasano tojiyaquiri, na sequesanoori najuhuanajuhuj.

Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijia quirijuhuj. Maninia miyashijiaari maja seetanujuanaa Pueyasocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishiniutianiyani janiyari seetanujuanaa Jesuucua tiuujia cutarani, maninia cua miishacari”.

¹⁹ Pueyaso Rupaacua quia tiuuniuucua, quiaari niishiyacuaja Pueyasoori Jiyaniijijanaa. Cuno quia tiuuniuuri maniacuaja. Naajaa, nia niishiri, samaruhuari cuno niishiyajuhuj. Na puerenuta nocuaijia tetecatuyari. ²⁰ Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijia quiyajaa, Jesuucua nia tiuuniuuri najuhuanaj, nia tojiyaquishacari Pueyaso.

²¹ Niacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaari: “Abrahamnaa, quia niyanuniyojua quia more cucuara quia catijasocoriqiano”.

Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojjia cutara”.

²² Naacuajiti cuarta Pueyaso pueyanaa, naa Abraham tojinuucua Pueyasotej, paari maatia niishiyani nojuajaari seetanujuanaa

Pueyasooocua tiuujia quiquiaari. Naajuhuj, Pueyaso sequesano na miishacari, nojuajaari Pueyasooocua tiuujia quiquiaari tojetaarucujanaa. ²³ Naa Abraham miiniuucuatej, nojuajaari tariucuaacaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasooocua tiuujiaari. Naa na tiuuniuucua Pueyasooocuatej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniuucua Pueyaso tojjiatej, nojuajaari sequesaaquiaari Pueyaso rupuenata.

²⁴ Naacujiti pueyanaa, Pueyasocujaari na sequesano miijia jiyanooquiaa. Maja cutaraari na jiyanooni noo pojori, nocua tiuuniuucua sequesaaquiaari. ²⁵ ¿Niaate niishiyajuhuj taa Pueyaso jiyanooquiaari Jericó tiacajininio paanatucaani, nooj, Rahab jiyanishanotej? Pueyasoori na jiyanooquiaari neyatu na quiniurijuhuj. Na jiyanooquiaari maninia na miiniuucua caapiqui pueyano Israel pueyajininio. Rahabri cuno pueya jamojoquiaari na tiaco. Na nuhuaji, nojori mashiquiaariuhua tamocoori, narta Jericó tiacajininio pueya puecoyaquiniuucujaji cuno pojori. Rahabri naa maninia miiquiaariti Pueyasojiniji na tojishanoocua na tiuushacari. Niishiquiaari Pueyasoori Israel pueya cumaquinia quiquiaari. ²⁶ Nio pohuatasanoori pa niishitiojia, naatej, taa pa cuaqueya macu quiya sohanuujucuaani, naajuhuj, paa jaara Pueyaso sequesano miyashijia quirini, paari najuhuaa sequeyani: “Jesuucua tiuujianijia”.

3

Pa niti juhua mani

¹ Cuarta Pueyaso pueyanaa, maja cumaati puera nijaniyajininio jiaatlanu Pueyaso rupaa niishitiojanaa nia quiniuria. Niaacujaari niishiya, Pueyaso rupaa niishitiojanaari socua jiyanoohua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaja. ² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacari? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujanaa maninia pueyano quiri cutara. Cuno pueyano maara na naata puetunu tama na cuaqueyajaaja jitianu niishiriquijuhua sesa na miyaquiniuucujaji. ³ Niaacujaari niishiya, caballo rupaama jaara niasaare na niqitijiotaja, na camaru na tojiniuria, na netesacari, na camaruuri puetunu na caballo cuaqueyajanaa niqitijiotaja na panishaco. ⁴ Puereetuca buqueeri naajuhuj. Shiitaniyojua na niqitijiotaja jitiiaajariuhuj. Jiyanoohua paratu piyarojosacari, naajaa, na camaruuri saa cunotaja na niqitijiotaja na panishaco. ⁵ Pa nitiiri naajuhuj, shiitaniyojua casaaniyojuaari pa cuaqueyajinia shipinishano. Naajaa, jiyanoohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquijania, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuj. ⁶ Pa nitiiri seetanujanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiarana. Pa nitiiri Sesaaca poonijotesano. Naacujitij, sesa pa pocuasacari, paari puetunu mijiria pa quiniujanaa sesoquiaani. ⁷ Pueyanoori na naata jiyartuutenu puetunu casaajanaa: jaacuatujuaa, roshiyocuatujucajuhuj, moojininio casaano. Seetanujanaari, pueyari tari naa na jiyartuutejoquiaa. ⁸ Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nititijia pa Que Pueyaso maninuhuaqueetaquiaani. Naajuhuj, paari Pueyaso shipinishano parta pueya sesaquiaa natajuhuj. ¹⁰ Naacujitij, pa rupaamaji tohutaari maninia sequesano, sacuraatia sequesanojuhuj. Cuarta Pueyaso pueyanaa, ¡maja cumaati naa pa quiniutij! Maja maninia naatej. ¹¹ Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacuta saniniujia pacaretajiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso

pueyanaa, ¿mariyajate na naata muetunu shucuenajara? ¿Nateecate sacamanajara muetujuajuhua? Maja. Naajuhua, maja pa naata pianacu mohuaca taquitianu cuari maniniujiniji. ¿Mohuacatucua casaara jatare tamaatiuniacurani? Naajuhua, paa cuaara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu niajanijajinijinio jaara niishijia quiri, nojuaja cuaara juhuajaniya maninia mijia quiria nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. ¹⁴ Saniniuujia, nioojia jaara najiqaquitishano quiri, niishijia nia quiyaquiniucua juhua niarta Pueyaso pueyano, niaari seetanujuanaa mosanucua. Naajuhua, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaan nia jijaniniu niaari niishijia. Naa mijia nia quishacaritij, niaa jaara tama nia niishitiajaaja shuquiriare, niaari mosanucua saaja. Nia sequesacari: “Niishijia cutaranija”, niaari sapojiya. ¹⁵ Cuno nia niishitiajaari maja jiyocuaaanuji Pueyaso niishitiaja. Cuno niishitiajaari tama nia niishishanojuaja, mijiria niishishanojuhua, Sesaacajanaa niishishanonio. ¹⁶ Pueyanaa, tee Pueyaso pueya juaatishano quiya tamasaca jaara na shocotare, naajuhua, pueya miishacari saaja tama na panishanojuaja, tii quiyari juayonuujutanu, puetunu sesa miiniujianaano. ¹⁷ Saniniuujia, cante Pueyaso niishitiaja jiiata cutarani, nojuajaari maninia mijia pueyano cutara. Jiyano pueyanoori maninia quijia puetunu pueya niquiarajanaa, jiyanoootio, jacaria pocuaja. Majaari na niishiniu ritia juaniu. Pueyacua taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhua, cante juaatoyano jiyanoootiootejani, nojuajaari jiyanoohua shuquiriaatia quiniutianiya Pueyaso shuquiritishacari nojuaja maninia na miiniucua.

4

Mijiria casaacua jiaatijacajiniji pahuatasano

¹ ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyajij sesa miiniucua nia jiaatiasacari. Nioojiaari najiqaquitishano quiquiaa nia panishanoocua nia jiaatiasacari sacuraatia. ² Naaratej, nia panishano nia maseyaquishacari, niaari na casamiicujaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyajij Pueyaso nia secojiyaquiniucua nojuaja niqutionura nijaniya nia panishano. ³ Naajuhua, niaa jaara na secjore, majaan nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa mijia nia miishano timitiajacani, nojuajaari Pueyaso paracara quiri. Niaa jaara naa mijia nia quini panijuhua, niaari tari Pueyaso paracara quiri. ⁵ Tariucuaanu Pueyaso Rupaajinia naa naajiotasanoori quiyajij:

“Pueyasoori na Sohuanu niaquiaari poojiajinia, nera na cojuanura pajaniya. Jiyanoohua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhua, Pueyasojuanaari jiyanoohua maninia naacquiaa pajaniya, jiyanoootio na quiniucua. Na Rupaajiniaari naa naajiotasano quiyajuhua:

“Pueyasoori noo pueya paracaajia, narta pueyajiniji juhua socua cutara pueyano quini panijatej. Saniniuujia noo pojori maniniucuaririja, naa sequejatej: ‘Maja cua naata miini maninia tamajaaja. Pueyaso cuaara cua naacuura’”.

⁷ Naarate pueyanaa, seetanujuanaa Pueyaso tojtiajacara nia quiriquia. Cumaatia nia nujuatare Sesaaca, maja na shocotanura nijaniya. Niaa jaara naa miiritij, niaacujaji mashiniutianiyari. ⁸ Niaa jaara Pueyaso rupeere, Pueyasoori nia rupenutaniyajuhua. Sesa mijiacanaa, cua tojtiare. Taa curuutucojuanucua shuquirioyacuani, naa tama

nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiaaari mijiria sesa miishano paniquiaajuhuj. Cuno pueya cuaara noojia jeequejoora maja socua noojia na niqijiotenura najuhuanaj. Cuaara saaja Pueyaso panijiacara quiria cutara. ⁹ Sesa nia miiniucua nia nujuquiture, nia tarajerejuhua. Nia sapiyonuure. Sesa miishano nia saroojotanu nia jataniri namijiaacatenuucua. Sesa miiniujiniji nia shuquiriniu nia jataniri tarajenuucujuhuj. ¹⁰ Niaa jaara nioojiajinia sequeriquia Pueyaso niqiuara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueyaso pueyacuara rimiaaqueyashijiaca pa quiriqiuaj

¹¹ Pueyanaa, maja sacuraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiari jiyanotej. Niaa jaara naa miiritij, niari Pueyaso Rupaajinia naajiotasano sesaca. Naajuhuj, niari tama nia cuaqueyajaaja jiyateya juhua jiyaniijia, niarta pueya nequesoreena nia quiniuria. Naa nia miishacaritij, niari Pueyaso rupaa tojiyashijiacara quiqii. ¹² Pueyasojuanaari tamajaaja Jiyaniijajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhua. Nojuajaari cumaacaraca pocuaji na tacunura, na shaajanura pajaniyajuhuj. ¿Canteeri quiajanianijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqitiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejicanaa. ¹⁴ Majaari nia niishiniu taa nia juhuaquenutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa niiniuri juhua shushiqiuani. Naatej, taa shushiquiacaana rupaqijia niqishiyari, na nuhuaji tajimiohuari, paari naajuhuj. ¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuan”. Naa cutarate maninia sequenu. ¹⁶ Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niari najuhua nia rupaa riutioconeetequiaa puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanohua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijia nia quishacari, niari tari sesa miijiaa.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Juhucarijia nia sapuere! ¡Nia sariyocature! ¡Niaari naquiya miiniutaniya taraatia! ² Niaari jyanohua casamiriaca. Cuno nia jiiitasano casamini, najuhuaana moqueyari. Surequeyari nia maniniuquiya toqueya miaqueyajuhuj. Naacuajitij, puetunu nia jiiitasanojuanaari moquenutaniya. ³ Nia paatijiosano oroni, nia cumaneecanio, najuhuaana tiyarashiyari. Naacuajitij, pa Nequesoreenaari maatia niishiniutaniya niaari sacuraatia jamuejaca quiqiuari. Naa miijia nia quiniuucuatej, niari saniitiosaanutaniya. Niaari socua shaajasaanutaniyaquij. Niaari najuhuaana queraatia casami paatijia shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiquishacariuhua na saniniujiuniuria pajaniya. ⁴ ¡Jiyaniijajanaari nia poonijiotasano pueya tojiqiuia! Nojoriiri sariyocatiuya nia cumaneecajiniji nia niqitioyaquiniucua nojori poonijionuunujiniji, niaara na senoonuucua nataacuaca nia cuhuariquiajiniji. ⁵ Mijiria nia quishacarijia, niari shuquiriaatia quiqiuapuetunu nia panishanojuanaa nia jiiitasacari. Naa shuquiriaatia nia quishacaritij, niari

juhuajaniya shiyoshiya juhua puecoosocoriquiano cushiya. Niaari naa miishaanutaniya-juhuaj. ⁶Niaari maninia miijiaca puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia najuhuanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhuajaniya pa sashiri pa Jiyaniijia

⁷Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuara. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. ⁸Naa nia sashirijuhuj. Majaari pa Jiyaniijiaacuaji nia pishiniu. Nojuacuajari quera tiuquiniutianihua. ⁹Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaareeri. Nia niishiri, pa saniniujunia Pueyasoori pocua catecanoya. Tari juhua pa tohuateyaji nujaari. Nojuajari seetanujuanaa pa saniniujunia cutara. Nocuaji maninia pa quirij. ¹⁰Pueyanaa, juhuajaniya pa rejeretarejuhuj, paa jaara naquiya miishaareni. Naatej, taa tariucuacaanu Pueyaso sequesano caminiujuniaa rejeretacoquiaari taraatia nojori miishacaricaaani, naa nia rejeretarejuhuj. ¹¹Paari niishiyacuajani, Pueyasoori naquiya miiniu rejeretajaca pueya shuquiritajia. Maninia na miiniutianiyari. Niaacuajari tari pohuatasaaquiaarijuhuj taa supuetana Job rejeretaquiaari naquiya na miishacaricaaani. Na nuhuaji cutara, Pueyasoori jiyanoehua maninia na miiquiaariuhua, jiyanoehua pueyacuara taraajeja na quiniucua, jiyanoehuaariuhuj.

¹²Cuarta Pueyaso pueyanaa, nia tojitiare. Nia pocojosacari, tamonu jaara quia sequesanoocua tiuyaquiri, naajaa, majaari najuhuaa sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaratiatej. Nia sequesano jaara seetanujuanaa quiri, nareja nia sequere: “Taaquiririnij”. Naajuhuj, nia sequesano jaara quiri “maja”, cuaara naa quiri seetanujuanaa. Majaari nia sequesano nia maatenu socua, Pueyaso mariqui nia saniitoreeri.

¹³Tamonu nijaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniujia, Pueyasora nia jaaquequejore. ¹⁴Cusosu nia quishacari, Pueyaso pueya jiitianaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojinij. ¹⁶Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuaraaja. Pueyasocua nia naatanijiorohua. Maninia pueyano secojosacari jiyanoehua, cunoori jiyanoehua cumaacaraca. Pueyasoori na secojosano tojjia. ¹⁷Tariucuacaanu pueyara Pueyaso sequesano caminiujunia Elfasni, nojuajari nareja pueyano quiquiaarijuhuj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸Elías jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

¹⁹Cuarta Pueyaso pueyanaa, tamonu nijaniyajinijinio jaara Pueyaso rootasano tojiyashijia quiriuhua, tamasaca jaara na niquiri, cuaara na rootaaranj, maninia miijiaca na quiniuhua. ²⁰Nia niishiri, cante sesa mijia tacatorohua Pueyasocua sesa na miiniujiniini, nojuajari cuno sesa miijiacuaji tacuya maja senota na shaajasaanura. Pueyaso na jiyanootiyaariuhua puetunu sesa na miishanojinijianaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapueete tiquiyocua niayaquecojoquaaaricujani: Ponto jiyajinia, Galicia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuaaanu, pa Que Pueyasocua-jaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanoquiaaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijia nia quiniuria, seetanujanaa Jesucristo tojjia nia quiniurijuhua. Naa Pueyaso panishano pueya nia quiniucua, nojuaja cuara cumaquiiria jiyanojia niajaninya. Cuara nioojia cajitiria pueyaracaanujuhua.

Pa niishiri, paari jiyanojia maninia miishaariquianoni

³ Pa Jiyaniijia Jesucristo Que Pueyaso pa maniniuhuaquetare, jiyanojia maninia na miiniucua pajaniya. Jiyanojia na taraajenuucua pocua, na pueya pa quiniucujuhua, nojuajaari pa niishitiquiaari paari juhua quiariniora samiitianijiosaanutaniuhua. Paari naa samiitianijiosaanutaniuhua, naatej, taa Jesucristo samiitiaquiaariuhua. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miini paniya pajaniyacuajani. ⁴ Naacuajitij, niaari niishiya niaari seetanujanaa masenutaniya puetunujuanaa niaarano Pueyaso jiiitasano jiyocuaaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucushiniujuhua. ⁵ Pueyasocua nia tiuuniucua, nojuajaari na cumaacata nia cojuaquiaa. Pueyaracaanu nia cojanutaniyani nojuaja cuara nia ri-jiorejaatijia mijiria taraatia nia quiniujiniji, tojetaarucujanaa jatanishano quijia nia quiniuria. Jiyanojia maninia Pueyaso miini panishano na pueyarani, shusha jiyacari niqishaanutaniyani.

⁶ Cunora niaari shuquiriaatia quiya. Saniniujia, niaa naasucuaari taraajeya rupaquijia nia miijosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷ Naquiya pa miiniuni, cunoori pa saniniujiushaanura paate seetanujanaa Pueyasocua tiuujacani. Niaacuajaari niishiya, pueyari jiyanojia oro panijia. Saniniujia, Pueyasocua pa tiuuniuni, cunoori jiyanojia socua panishano orojiniji. Niaacuajaari niishiya, pueyari oro catijaja, na sanishaanura maninia oro seetanutejanaa. Naajaa, seetanujanaa maninia oroori shaajejuhua. Saniniujia, paa jaara mijiria naquiya pa miini rejeretajaca quirini, Pueyasocua tiuujia pa quiniucua, cunoori socua jiyanojia maninia cuno shaajeya orojiniji. Pueyasocua nia tiuuniu jaara saniniujiushaare juhua orojuhua, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanojia maninia miiniutaniya niajaninya. Jiyaniujanucua nia jiyatenutaniyani.

⁸ Majaari juhuanajuaja Jesucristo nia niqiniu. Naajaa, niaacuajaari na panijia. Naa niqishoo na quishacarijia, naajaa, niaari nocua tiuquiaa. Naaari na timitiaquiaa jiyanojia. Tojetaarucujanaa jiyanojia nia timini quiniucua nioojiajinia, majaari nia naata na pohuatanu nia rupaata. ⁹ Naaari naa timiquiaa, tariucua jatanishano nioojia quiniucua, Jesucristoocua nia tiuushacari.

¹⁰ Tariucuaaanu, pueyara Pueyaso sequesano caminiujinuaa pueyari poojotaquiaari taa Pueyaso jiyanooniutaniya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojuuca quiquiaari, Pueyaso Sohuanu niishitishano nojori naajiotasanoni. Nojoriiri jiyanojia niishiniu paniquiaari taa Pueyaso jiyanooniutaniya pueyani. ¹¹ Jesucristo Sohuanucuaari juhucarijia nojori

niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaariiaariuhuj, naquiya na miiniu nuhuaji saniniuujia, nojuajaari Jiyaniijarajanaa jiyatesaanutaniya, shacantuuca quijia na quiniuria. Naaratej, nojoriri maninia na niishiniuria saniniuujiquiaari juucua, cantejaara cuno quiniutianiyan, Pueyaso Jiyarosocoriquianoni, naajuhuj, taacari na muetanutaniyani. ¹² Pueyasoori saaja nojori niishitiquiaari, na Sohuanu poojotaniishano nojorini, cunoori maja tama nojoririjaaja na quiniu quiquiaari. Cuarta Pueyaso pueyanaa, jicunoori niaarano quiquiaari seetanujanaa! jTariucuacaanu poojotasano Pueyaso Jiyarosocoriquiano-jimijiiri tari tohuateequiaari! Jiyocuacaanuji jiyarosano Pueyaso Sohuanuori Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuani. Naacuajitij, quiari naataja nia tojishano Jesucristojiniji, cunoori supuetanaa pohuatasano quiquiaaricujaja. Pueyaso seyajanaacuajaari pueyarano Pueyaso miishocoriquianoocua maatia niishiniuucua jiaatiaajuhuj.

Pueyasoori paniya saaja maninia miijiaca pa quiniuria

¹³ Cunora, cuarta Pueyaso pueyanaa, jeenucuasano nia quiriqia. Jesucristo muetasacari pocua, Pueyasoori jiyanohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niqijitotejaca nia quiniu. Maninia niishiriojojuaca nia quiriqia. ¹⁴ Tarijia, niaari tama nia cuaqueya panishanojuaja miijiaca quiquiaari, Pueyaso niishiyashijia nia quishacarjia. Quiarijia saniniuujia, niaari na tojjijaca cutara. Naaratej, na muerasu nia quiniuucua, majaari naa quijijaca nia quiniu socua. ¹⁵ Saniniuujia, saa maninia miijiacaja nia quiriqia. Pueyasocujaari nia saquiriojuiaari naa tojetaarucujanaa maninia miijiaca nia quiniuria, juhua nojuajuhuj. ¹⁶ Tariucuacaanu Pueyaso sequesanoori naa naajiotasano quiyajuhuj: “Tojetaarucujanaa sesa miyashijia nia quiri, taa janiyacuaani”.

¹⁷ Nia secojosacari, niaari Pueyaso sequequiaa, “cua Quenaa”. Cunoori maniniacuaja. Naajaa, majaari nia niyjetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimijata na saniitionu quiniutianiya. Cunora, mijiria nia quishacarjia, nia puerenuta tama nia cuaqueyajaaja nia cojuare, niaa mariqui na tojjiyashijiacara quiriohuari. ¹⁸ Pa supuetanaa quiniuucua sesa miijiaca, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. ¹⁹ Nojuajaari pa masequiaari tama Neyanuniyojuu nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niqiara mosaaquiaari na camaru niti, cuno borregoori tojetaarucujanaa borrego maniniu quiquiaari. Naajuhuj, Jesucristoori tojetaarucujanaa maninia miijia quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. ²⁰ Jiya shipiniyaquishacarjia, Jesucristoori tariucua pueya niti mosocoriquiano sequesaaquiaari, sesa miijiaca jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹ Naa Jesucristo miiniuucua pocuaratej, niaari Pueyasocua tiuquiquiaa. Pueyasocujaari Neyanu samiitianiquiaariuhua. Na jiyatequiaariiri Jiyaniijajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria nijaniyajuhuj. Naaratej, niaari juhuajaniya sashiya, shacantuuca quijiacara nia jatanishaanurajuhuj.

²² Seetanu rupaajanaa tojtijajaca nia quiniuucua, nioojaari tari jeequejosaaquiaari, niarta Pueyaso pueya panijia nia quiniuria seetanujanaa. Naaratej, seetanujanaa panitiojuaca nia quiriqia puetunu nioojiatajanaa, maja sesa nia niishiriojonuta que-naaja. ²³ Naa panijia nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijia nia quiniuria seetanujanaa. Pueyaso Rupaacuajaari pueyano samiitianijia, saminio na quiniuucua.

Naacujitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniuucua. ²⁴Tariucuacaanu Pueyaso Rupaajinia naajiotasanocujaari naa sequeya:

“Puetunu pueyajanaari rishiyashijiaca juhua jiyasocua. Na cumaaca, puetunu na jiiti-asanojuanaajuhuj, cunoori soreja, juhua naana shuu. Jiyasocuaari soreja. Naana shuuri tijia. ²⁵Saniniuujia, Pueyaso Rupaa cutaraari pueyaracaanu quijia”.

Cuno rupaacujaari nia niquiara pohuatasaaquiaari pueyaracaanu quijiacara na jataninuria niajaniya.

2

¹Naaratej, nia tarinitiare puetunu sesa nia miiniujuanaa. Seetanujuanaa nia tarinitiare cuarachishionu. Naajuhuj, majaari sapuenu juhua maninia pueyano niquishano nia quiniu najuhuanaj. Majaari tamasaca jiitiasanoocua jiaatiajaca nia quiniuujuhuj. Majaari coriaacojojuaca nia quiniu socua. ^{2,3}Niaa jaara tari niishiyacuaja pa Jiyaniijaari seetanujuanaa maninia, na rupaacua jiaatiajaca nia quircuarajaj. Naatej, taa shusha rasano conaaja jiaatiaa supuenucuacuaani, naa Pueyaso Rupaacua jiaatiajaca nia quiriquia-juhuj, cumueeca Pueyaso muerasu nia quiniuria seetanujuanaa. Naacujitij, niocua tojetaarucujanaa jatanishano pueya quiri.

Cristoori juhua saminio saajia, Pueyaso quiquiorano tiataja

⁴Saijiniji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiata Pueyaso quiquiora. Mijiria Pueyasora tijonaari jiyaniijaari cuno saajiari sesarujajau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquirojosanojuaja. Naaratej, nocua pa tiuuri. ⁵Naajuhuj, puetunu Jesuucua tiuujia pueyaranojuanaari pueyaracaanu rishijia quiquiorano Pueyasora. Naacujitij, Jesuucua pa tiuushacari, paari juhua maniniuajaca sai Pueyasorani, na quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tajoji. Majaari seya pa niquitiojonu quiquiaa Pueyasoni, taa tariucuacaanu pueyacuara secojonaa pueya miquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucuan, cunoori Pueyaso timitiquiaa. ⁶Cunora, tariucuacaanu Pueyaso Rupaajinia, miriqui Pueyaso sequesano Jesucristojinijiri naa naajiotasano quiya:

“Janiyari Sión tuhananuucua jiyanojuaa cua panishano saajia nianutaniyani. Cuno saajiari tama cua saquirojosanojuaja. Maniniuajajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

⁷Cua panishano pueyanaa, cuno saajiaacua tiuujia nia quiniuucua, cuno saajiari jiyanojuaa nia timitiasano. Nocua tiuyashijiaca cutaraari cararosaanutianiya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tijonaa jatasano saajia, nojori jyanishacari cuno saajia naasucua sesarujajau, cuno saajiacujaari socua jiyanojuaa panishano saajia jiyatesaaquiaariuhua”.

⁸Tamaqui, nojuajiniijiri naa miriqui naajiotasano quiyajuhuj:

“Pueyari cuno saajiaacua tiuriniutianiya. Nocua jiriatanutaniyaariuhua na tiuriniuria”.

Nojoriiri nocua tiuriquiaa, nojori tojiyaquiniuucua Pueyaso rupaa Jesucristojiniji. Pueyasocujaari tariucuacaanu sequequiaari Neyanuucua tiuyashijiacaari tiuriniutianiya puetunurajanaa.

⁹Niajaniya saniniuujia, niaari tama Pueyaso saquirojosano pueyajaaja. Nojuajaari puetunu niajaniyajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijia nia quiniurijuhuj. Puetunu niajaniyajanaari tamasaca pueyapuejinijinio saquirojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niquiara. Tarijia, niaacujaari juhua ninishiqui quijia quiquiaari. Pueyaso cutaraari nioojia cuhuataquiaari, seetanujuanaa shacantuca

cumaacajinia quijiaca nia quiniuria nata. ¹⁰ Tariucuacaanu, Jesucristoocua tiuyashijiaca nia quishacarijia, niaari juhua soosano taucuaca quiquiaari Pueyasora. Quiarijia sanini-uujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanooquiaari.

Pueyaso panishano miijiaca pa quiriqiaj

¹¹ Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quijara. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹² Saaja maninia miijiaca nia quiriqia Pueyaso niishiyashijiaca niquiara. Naacujitij, nojori jaara ni-aacuara rimiaaqueriquia juhua sesa miijiacara nojori jiyatesacari nijaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucujanaa maninia miijia na sanitiosacari nojori, maninia na miishacari nijaniya saniniuujia.

¹³ Pa Jiyaniijia tojjijaca nia quiniucua, puetunu mijiria pa jitianaa jiyaniijianucua tojjitajaca nia quiriqiajuhuaj. Naacujitij, nia jiya jiyaniijijanaa tojjijaca nia quiri. Nojuacuajaari jiyaniijijanaa cutara. ¹⁴ Cunora, na jiyatesano jiyaniijianucua tojjijaca nia quiriqiajuhuaj. Nojoricuajaari na jiyaramiquishano, sesa miijiaca saniitiosaanura, maninia miijiaca maniniuhuaqueetasanura saniniuujia. ¹⁵ Naacujitij, saaja maninia miijiaca nia quishacari, niaari niishiyashijiaca sesa miijiaca sanaajanutaniya, najuhuana nojori sesacasacari nijaniya. Cunora, Pueyasoori paniya maninia miijiaca nia quiniuria.

¹⁶ Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojshocoriquiano. Quiarijia saniniuujia, Jesu cusonuucua nia niti, nojuajaari Moisés Rootasano tohuateequiaari. Naacujitij, nojuajaari Moisés Rootasano sanaajaquiaari niaara. Naacujitij, Moisés Rootasano tonujiaquishacari niaacuara tari, naajaa, majaari nia jiyaniinu naacujiti nia naata tama nia panishanojuaaja miiniu. Pueyasojuanaacuajaari nia Jiyaniijijanaa cutara. Naaratej, seetanujuanaa na tojjitajaca seya nia quiriqia cutara. ¹⁷ Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriqia cutara. Seetanujuanaa Pueyaso tojjijaca nia quiriqia. Majaari jiya jiyaniijijanaa rerequeteja nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujuanaa maninia nia camarnu tojjijaca nia quiriqia. Nia camarnu jaara juaajia quiriqia, naajaa, saaja na tojjijaca nia quiriqia. Majaari saaja maninia nia jitiatjaca tojjijaca nia quiniu, nia jiyanoojacanio. ¹⁹ Naa jaara juhua-janiya rejeretariquia najuhuana nia camarnu saniitiosacari nijaniya, cunoori jiyanoohua maninia Pueyasora. ²⁰ Pueyaso cutaraari maja na timiniu niaa jaara juhujaniya rejeretare nia camarnu saniitiosacari nijaniya seetanujuanaa sesa nia miiniucua. Saniniuujia, nia camarnu jaara saniitiore nijaniya maninia nia miiniucua, niaa jaara na rejeretare juhujaniya, Pueyasoori cuno timitaja cutara. ²¹ Pueyasocujaari nia saquiriojquiaari naquiya rejeretajaca nia quiniuria maninia nia miiniucua. Cristojuanaacuajaari naquiya miishaaquiaari maninia na miiniuria pajaniya. Nojuajaari naa miiquiaritij, pa niishini-uria juhua nojuaja pa miiniurajuhuj. ²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuj. ²³ Jaara sesacasaaquiaari, nojuajaari maja quenaaja nojori na riuवानु quijia na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasooocua tiuquiaari, na niishishacari nojuajaari seetanujuanaa maninia nequesoreena cutara. ²⁴ Cristo jaara niyacutesanojinia cusojuaaquiaari, nojuajaari tari puetunu sesa pa miiniujanaa cusotaquiaari. Naa pa niti Cristo cusonuucuatej, cunoori quiquiaari maninia miijiaca pa quiniuria saniniuujia, maja socua sesa miijia pa quiniuria. Naajuhuj, nojuajaari pa niti nootusaquiaari, pa naatanijiosaanura sanini-uujia. ²⁵ Tarijia, niaari juhua tashuquioono borregohua rucojuaca quiquiaari. Quiarijia saniniuujia, niaari nia jojuana Cristoocua tiuquijioquiaari. Nojuacuajaari nioojia jitianaa maniniu.

3

Camiyono pueyara rootasano

¹ Camishano maajipohuanaa, nia niyaca tojitiyajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiyajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacarijia Pueyaso Rupaa. ² Nojori niquishacari tojetaarucajanaa maninia miijiacaja nia quishacari, nojori tojijiacajuhujaj, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucasano, saaja na muecaca na canusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucasano jaara juaani maniniu quiriquiajuhuaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiyajaca nia quiriquia cutara, jacaria pocuajajuhujaj, maja juaajia. Jiyano maajitij, cunoori seetanujuanaa maninia niquishano Pueyasora cutara. Naa jaara nioojia maniniushitiri cutara, cunoori seetanujuanaa shaajeyquiriquiano. ⁵ Naajuhujaj, Pueyasocua tiujujaca tariucuaaanu maajipohuari neyaca tojijiacaja quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niqiuocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jiyaniquijia na jiyaniijjata. Naacuajitij, niaa jaara maninia miijiacaja quiriquia, niaa jaara nia puereyaquiniutia nia niyaca tojijia quiriquiajuhuaj, Pueyasora, niaari Saara niqiuojori.

⁷ Nijaniyarijiata canuunaa, nia niqiuocua nia jiitariquia maninia, nia niishishacari maajiri maja cumueca juhua cayaja. Majaari na rerequetenu. Maajipohuacajaari Pueyaso jiyanooshanojuhuaj, taa na jiyanoquiaari nijaniyacuaani. Pueyasoori niaata nojori cojiritianutaniya samiitianijionu, pueyaracaanu rishijiacaja nojori quiniurajuhujaj. Naacuajitij, maninia nia jiitariquia nia niqiuocua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸ Pueyanaa, cua sequesano quiarijiani, niiori puetunu Pueyaso pueyarajanaa. Pueyaraaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocucata. Taraajetoojuaca nia quirijihuhujaj. Naajuhujaj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹ Naa jaara sesa miishaariquia, majaari na naminiu. Naajuhujaj, niaa jaara sesacasaariquia, majaari nojori nia riucuanu nojori nia sesacanurajuhujaj. Saaja maninia nia rihuanere nojori. Tariucuaaanu, Pueyaso paraca nia quishacarijia, nojuacajaari nia saquiriojoquiaari maninia na miiniuria nijaniya. Naaratej, saaja maninia nia miiriquia nia paracajuhujaj. ¹⁰ Tariucuaaanu Pueyaso Rupajiniacajaari naa naajiotasano quiyajuhujaj:

“Cante pueyaracaanu mijiria rishiniucua jiaatiaani, shuquiriaatia na quiniurajuhujaj, nojuaja cuaara na niti cojuuara maja sesa na pocuanura. Cuaara na rupaa cojuaarajuhua maja na cuaracashijionura. ¹¹ Naajuhujaj, cuaara sesa na miijionu tarinitiaara saaja maninia na miiniuria. Nojuaja cuaara pueya jiyanoootioteja quiri. Cuaara naa maninia na miiniu tarinitiaaquiiria. ¹² Cante naa maninia mijiani, Pueyasoori na cojuaja, na secojosano tojijiaariuhujaj. Saniniujia, Pueyasoori sesa miijiacaja samiritiaja saaja”.

¹³ ¿Cantucua sesa nia miiriquiani niaa jaara saaja maninia miijiacaja quiriquia? ¹⁴ Naajaa, niaa jaara saaja maninia nia miiniucua miitisaare, nia timiquire. Pueyasocujaari jiyanoohua maninia miiniutianiya nijaniya saniniujia. Mijiria quinaa miananajosacari nijaniya, majaari puerenu, majaari nioojia nia niqijiotenu. ¹⁵ Saniniujia, nioojiajinia Cristo nia jiyatere nia Jiyaniijajanaara, seetanujuanaa na tojijiacaja nia quiniuria.

Juhuacarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare nijaniya, casaara juhuajaniya naquiya miiniu rejeretajacate nijaniyani. ¹⁶ Jacaria nia pohuatate nia paniniutia nojori, maja nia rerequetenuta nojori. Pueyaracaanu maninia miijiacaa nia quiriquia, sesa nia miiniu mariqui nioojia macuhuaajareeri. Naacuajitij, pueyaracaanu shitimia maninia miijiacaa nia quishacari Jesucristoocua tiuujiaca nia quiniuucua, niaacuara rimiaaquejacaari tama sesa na pocuanuucuaaja caririquiniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸ Cristojuaanaacuaajaari mosaaquiaari sesa miijiacaa pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiacaaacuara cusoquiaari, Pueyasooocua na jiyatanura nijaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniuucua, nojuajaari samiitiaquiaariuhua. ¹⁹ Naa sohuanu na quiniuucuatej, nojuajaari macunucua quiquiojinia rosequiaari tii tama nojuajiniijiaaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. ²⁰ Cuno pojoriiri, noo pojoricuaja tariucuaaanu supuetana Noé tojiyashijiacaa quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuuca buque na shipinishacari, pajaacuaji na tacajara, Pueyasoori jiyacari cuno sesa miijiacaa sashiquiaari juucua. Pueyaracaanu sashiquiaariiri nojori tacatonuhuaa noojiaca nocua juucua. Puetunu mijiria quijiacaa pueyajiniijiojuanaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasooocua tiuujiaca cuataniquiaari na buquejinia. ²¹ Quiarijia pajaniyara saniniuujia, cuno pajaari miriqui pa niishitiojija taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasooocua tiuujiaca na quiniuucua, pueraari naajuhuaaj. Naacuajitij, paa jaara moojinia tiuquinishaareni, paari pa timiniutia moojiniji tohuataquiohuani, poojia cajitishano seetanujanaa pa niishishacari paari tari jiyanooshanoni, pocuaji Tacuna Jesucristo samiitianiucua macujiniji. Majaari pa tiuquinishaanu quiquiaa pa seca pa jatanura. ²² Jesucristo samiitiasacariuhua, nojuajaari jiyocuacaanu tacaquiaariuhua. Quiarijia cajija Pueyaso miaquetajaraari. Jiyaniijiajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhanio.

4

Maninia miijiacaa pa quiriquia, Pueyaso cumaaca pa jitianuucua

¹ Naacuajiti pueyanaa, naatej, taa Cristo rejeretaquiaari naquiya miiniu mijiria na quishacariuaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ² Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaja pa miiniuria socua. ³ Tarijia, Pueyaso tojiyashijiacaa nia quishacarijia pueyanaa, niaari jiyanoohua sesa miijiacaa quiquiaari, taa Pueyaso niishiyashijiacaa miiquiaacuuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatijacaa quiquiaari. Niaari saaja mashaasequenuujuuca quiquiaari. Nia queranacunuusaqui, niaari tojetaarucujanaa sacuaaratia miijiacaa quiquiaari. Niaari rerejojuajuhua puera nia ratunura, jiyanoohua nia mashaasequenuunurajuhuaaj. Naajuhuaaj, niaari juaashiquiata shipinishano nia pueyasora nia jiyatesano shuquiritijacaa quiquiaari. Niaari na tajoji sacuaaratia pueresano casaa miiquiaarijuhuaj. ⁴ Quiarijia saniniuujia, Pueyaso niishiyashijiacaa nia cojiyaquishacari naa sacuaaratia nia miijionuratej, nojoriiri jiuujiatequiaa nojori shaacasacari nijaniya. Nojoriiri cunora nia sesacaquiaa. ⁵ Cuno

pojori cuara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuara tama nojoriicuaaji riucuaarajaaja. ⁶ Cunora, pa Jiyaniija Jesucristoori macunucua niquriara pohuataquiara Pueyaso rupaa tama nojuajiniijiaaja, nocua tiuujiacara na jiyatesocoriquiano. Nocua tiuujiaaari pueyaracaanu rishijiacara quiriqiano, taa Pueyasocuaani. Sesa mijjica mijiria nojori quiniucua, nojoriiri pajaajinia csonuuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianiijosaanutaniuhua.

⁷ Nio pa quishacarini, paari socua quenaacoya jiya puequesacariicuarani. Naaratej, niishiriojuuca nia quiriqia. Maninia nia jiitariquia tama nia cuaqueyajaaja, saaja Pueyaso secojojuuca nia quiniuria pueyaracaanu. ⁸ Jiyanoohua panitiojuuca nia quiriqiajuhuaj. Cunoori socua panishano cutara. Paa jaara panijiaa quiriqiani, paari queraatia sesa miishano jiyanoojia quiniutianiyan. Naaratej, seetanujanaa panijiaa nia quiriqia. ⁹ Niarta Pueyaso pueya jiitaaquishacari na maquejara, na miaquesocoriquianojuhuaj, nojoricua taraajeja nia quiriqia. Nojori nia tiuquinitiariquia nia tajiinia nia timiniutia. Majaari nojori nia ririjiotanu nia taajenuta. ¹⁰ Pueyasocuaaari na Sohanu niqitioquiaa puetunu na pueyajanaa, tamaatia maninia casaa miiniu niishijiaa pa quiniuria. Naaratej, puetunu nijaniyajanaa cuara maninia miiria niarta Pueyaso pueya pueyaracaanu, taa Pueyaso cumaquiquiaa nijaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niqitiojosano nijaniyani. ¹¹ Naacujitij, nia pocuasacari, Pueyasocua nia tiuuri nojuaja cumaquiniuria nijaniya na panishano nia sequenura. Naajuhuj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaa nia quiniucua. Nojuaja cuara maniniuhuaqueetasaria pueyaracaanu, tojetaarucujanaa maninia mijia na quiniucua, puetunu cumaacaracajanaa na quiniucuaajuahuaj. Cuaara naa quiiriatej.

Juhujaniya pa rejeretare naquiya miiniu, Pueyaso pueya pa quiniucua

¹² Cua panishano cuarta Pueyaso pueyanaa, majaari nia shiriqiniu niaa jaara jiyanoohua naquiya miishaariquia. Majaari nia jyaniniujuhuaj saa nijaniyaja nia miishiya. ¹³ Niaa jaara naa naquiya miishaariquiatej, nia timiri. Jesucristoocua tiuujiaa nia quiniucua, niaacuaaari nia miishiya taa Jesucristo miishaaquiara naquiyaacuaani. Naa naquiya miiniu nia rejeretasacariitij, niaari jiyanoohua timitianutaniya Jesucristo, shacantuuca na cumaacata na tiuquishacariuhua, na jataniniuria nijaniya juhua nojuaja nia quiniurajuahuaj. ¹⁴ Naajuhuj, niaa jaara sesacasaariquia Jesucristo tojjiaa nia quiniucua, shuquiriaatia nia quiriqia. Pueyari naa nia sesacaquiaa, shitimia maninia mijjiaa nia quishacari, Pueyaso Sohanuraca nia quiniucua. ¹⁵ Niaa jaara naquiya miishaariquia pueyanaa, cuno cuara quiiria maninia mijjiaa nia quiniucua, maja sesa mijjiaa nia quiniucua. Niaa cuara caririquiiria cutara niaa jaara mojuja quiri, nohuasejojua, sesa mijjia, timia niishiniu panijia tamasaca casaa. ¹⁶ Saniniujia, maja cutaraari nia caririquini niaa jaara naquiya miishaariquia Jesuucua tiuujiaa nia quiniucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquiaa na tojtiaaquishacari na rupaa. Paa jaara naa saniitosaaquiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸ Naacujitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojyashijiaa miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa mijjiacano. Nojoriiri jiyanoohua socua naquiya miishaanutaniya, Pueyaso saniitiosacari nojori. ¹⁹ Naacujitij, Pueyaso jaara naa naquiya nia miishaanura panija, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojanura maninia. Nojuacuaaari na Shipinia. Nojuacuaaari saa maninija. Naquiya pa miitiquiaacuaaari socua na jeenucuanura pajaniya.

5

Socua rootasano Pueyaso pueyara

¹ Quiarjia saniniuujia cuarta Pueyaso pueyanaa, janiyari nia jiitianaa nacasuyani. Ni-janiya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhuj, juhua nijaniyajuhuj. Janiyacuajaari pa Jiyaniijijanaa niquiniani, nojuaja jaara naquiya miijioquiaari mijiria na quishacarijia canaata. Naajuhuj, nojuajiniji cua pohuatanuucua, janiyari naquiya miishaaquiaajaaniuhuj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanu-taniya jatanishaanuni, juhua nojuaja pa quiniuria mariyata. ² Cunora Pueyaso pueya jiitianaanaa, shamaatia nia cojuare Pueyaso pueyaniyojua, teyano jiitianaara Pueyaso jiyatequiaari nijaniyacujani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracujani. Majaari nojori nia jiitanu nia taajenuta saaja nojori jiitianaa nia quiniucua. Naajuhuj, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jiitanu juhua tama nia seyajaaja. Nijaniya saniya cuara maninia miijiaa quiria nojori niqiuara, nojori niishiniuria naa quijiacate Pueyaso pueya, naa nojori miiniurijuhuj. ⁴ Naacuajitij, pa Jiitianajanaa tiuquishacariuhua jiyocuacaanuji, niari shacantuuca quijiacara jatanishaanutaniya, pueyaracaanu rishijia nia quiniurijuhuj. ⁵ Nijaniya mashiqiorinia, Pueyaso pueya jiitianaa tojijia nia quiriqiajuhuj. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuaaanu Pueyaso Rupaajiniacuajaari naa naajiotasano quiya:

“Pueyasoori na juaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

⁶ Naarate pueyanaa, puetunu niarta Pueyaso pueyanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijia nia quishacarijia, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniurijuhuj. ⁷ Pueyanaa, puetunu nia tacaanujianaa nia niqitiore Pueyaso. Nojuacuajaari niaacua taraajequia.

⁸ Pueyanaa, nia Paraca sequeeri nia shanacujuquia, juhua sare, taa sare shanacujia na sanura casaacuani. Cunora, soquejaca nia quiriqia pueyaracaanu. Juhua sutejaca nia quiriqia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujuanaa Pueyasoocua tiuujia nia quishacari. Majaari Pueyaso Rupaacuaji nia taacanunu. Naa nia miiriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquioyajuhuj. ¹⁰ Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jyanoojia na quiniucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniucua. Naaratej, nojuacuajaari nia jiyatenutaniya seetanujuanaa nioojia niqijioteyashijia nia quiniuria, socua jiyanhua na cumaaca jiitajaca nia quiniuria, maja quenaaja Sesaaca pootionura nijaniya. ¹¹ Jiyanhua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiiriatej!

Pedro sequesano quera na naajio na tucuatascari

¹² Cuarta Pueyaso pueyanaa, janiyari parta Pueyaso pueyano Silvano naajioteree no posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura nijaniya, cua shiniujiuniuria nijaniyajuhuj maja nia pishiniuria Pueyasoocujia. Seetanujuanaa jyanoojia na quiniucua, naarate nojuajaari nia jiitiaa maninia, naquiya na miitishacari nijaniyajuhuj. Cunora, nocua nia tiuuriquia, pueyaracaanu na cumaquiniuria nijaniya.

¹³ Babilonia tiacajinia quinia parta Pueyaso pueyari nia saruhuaata. Nojoriiri Pueyaso saquiriojosano na pueyaranojuhuaj, taa na saquiriojosanotucuaa nijaniyani. Marcoori

nia saruhuataajuhua. Nojuajaari juhua quiyanu. ¹⁴Nia sarhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapuate Jesucristoocua tiuujiacuajani.

TANEE PEDRO NAAJIONEE

Pedro saruhuatascari narta Pueyaso pueya

¹Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquiaaricuaani. Nocua nia tiuuniuni, cunoori jiyanoohua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niquiara, taa canaa quiyacuaani. ²Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanoohua cumaquishaanutaniya. Nioojaari cajitishaanutaniyajuhuj, juhujaniya quijiaca nia quiniuria.

Pueyaso pueya cuaara nio niishitiojosano miijiaca quiiria

³Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniurijuhuj. ⁴Naa jyanohua maninia miijia Jesucristo quiniucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojtiajaca quiri seetanujuanaani, paari jatanishaanutaniyani juhua nojuaja pa quiniurijuhuj. Naacuajitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriuriani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniucua. ⁵Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniucuatej, jyanohua nia saniniujiuri maninia miijiaca nia quiniuria pueyaracaanu. Naa maninia miijiaca nia quishacaritij, jyanohua nia saniniujiuri socua niishijiaca nia quiniuria, sesa miiniu nia ruuretunura. ⁶Naa niishijiaca nia quishacaritij, jyanohua nia saniniujiuriquia tama nia cuaqueya miiniu panishanojuaaja rejetejaca nia quiniuria, maja nia miiniuria sacuaratia casaa nia panishano. Naa tama nia cuaqueyajaaja rejetejaca nia quishacaritij, jyanohua nia saniniujiuriquia juhujaniya sashijiaca nia quiniurijuhuj. Naa juhujaniya sashijiaca nia quishacaritij, jyanohua nia saniniujiuriquia seetanujuanaa Pueyaso panijiaca nia quiniuria. ⁷Naa Pueyaso panijiaca nia quishacaritij, jyanohua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jyanohua nia saniniujiuriquia tojetaarucujanaa panijiaca nia quiniuria.

⁸Niaa jaara puetunu nio niishitiojosanojuanaa tojijiaca quiriquia seetanujuanaa, majaari najuhua na Jiyaniijia Jesucristo niishijiaca nia quiniuria quiniutianiya. Naajuhuj, majaari najuhua quijiaca nia quiniuria quiniutianiya. ⁹Nio rootasano tojiyashijiaca saniniucua, nojoriiri juhua cariojuaru, niishiyashijiaca. Naa nojori quiniucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰Cuarta Pueyaso pueyanaa, Pueyasocujaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriquia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. ¹¹Naa maninia quijiaca nia quiniucuatej, niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijijanaa na quiniucua.

¹²Niaacuajaari maatia niishitiojosaaquiaari Pueyaso rupaa Jesucristojiniji. Niaari cunoo seetanujuanaa rupaacua tiuujia. Naajaa, janiyari pueyaracaanu nia niishitiniutianiyan, maninia nia racatanura nia numaama. ¹³Mijiria cua rishishacarijia, Jesucristo jiyaramiquishano cua quiniucua, maniacuajaari pueyaracaanu cua shiniujiuniuria nijaniya, maja tariucua nia niishishano Jesucristo rupaajiniji nia niyajetanura. ¹⁴Pa Jiyaniijia Jesucristoori tari cua niishitiriucuaa janiyari quera mosaanutaniyani. ¹⁵Cunora,

janiyari nio naajiya niaarani. Naacuajitij, janiya jaara mosaareni, niaari nio cua naajione jiiitanutaniya cua nuhuaji nia serojosocoriquiano. Maniniacuajaari nia jiiitanura cua naajione maja nia niyajetanura puetunujuanaa cua niishitiojosano nijaniya.

Shacantuuca Jesucristo cumaaca niquiniaajiniji pohuatasano

¹⁶ Canaa niishitiojosano nijaniya pa Jiyaniijajinijini, cunoori maja canaa tojishano tamonujiniji. Naajuhuj, cunoori maja tama niishijiacajaaja pohuatasano na sapojonura pueya. Jesucristo cumaacajiniji canaa pohuatasani, naajuhuj, taa na tiuquiniutiani-uhuani, puetunu cunujuanaari maja tama canaa niishishanojuaja. Canaajanaacuajaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. ¹⁷ Jiyacaritij, na Que Pueyasoori jiyanoehua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanunijojua. Jiyanoehua cua timitiasano”. ¹⁸ Canaa quishacari pa Jiyaniijata shacantuucara na jatasaqi tuhuanuucua, canaajanaari naa Pueyaso tojiquiaari jiyocuacaanuji pocuaanoni.

¹⁹ Canaa tojinuucua Pueyaso sequesanojuanaa Neyanujiniji, canaari cunora seetanujanaa niishiyani, tariucuacaanu nojuajiniji pueyara Pueyaso sequesano caminiujiuniaa sequesanoori seetanujuanaajuhuj. Naaratej, maniniacuajaari nia tojinuria nojori naajiotasano Pueyaso Jiyarosocoriquiano Pueyanojiniji. Nojori naajiotasani, cunoori poojijania cuhuataquiaa, naatej, taa samaritiu cuhuataa niishiquiuaani, cuara juhuaque-majaatijia. Pananuuri saniniuujia muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitijatajaaja. ²¹ Tariucuacaanu Pueyaso sequesano caminiujiuniaa naajionuutasani, cunoori maja tama nojori niishishanojuaja. Pueyaso Sohuanujuanaacuajaari nojori niishitiquiaari nojori pohuatanura Pueyaso sequenu panishano pueyara.

2

Sacuraatia miijiaca niishitiojonaajiniji pohuatasano

¹ Tariucuacaanu, noojiaqueya Israel pueyajinijinoori tama na cuaqueyajaaja jiyatequiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri narta Israel pueya sapojonuuquiaari. Naajuhua cua panishano pueyanaa, sapojonuujuacaari nia tajinia supuenutaniyajuhuj. Nojori niishitiojosacari sacuraatia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuaa mosaaquiariacujani, na pueya nojori quiniuria juucua. Cunora, nojoriiri canashiyajuiji niqijijij puetunu shaajasaanutaniyajanaa saniitiosocoriquiano.

² Queraatia pueyari sacuraatia miijiaca quiniutianiyajuhuj, sacuraatia cunoojori niishitiojosano tojijia nojori quiniuucua. Naa nojori miiniuucatej, Pueyaso niishiyashijiacaaari seetanu rupaajanaa sesacanutaniya. ³ Cuno sacuraatia niishitiojonuujuacaari jiyanoehua casamiriaca quiniuucua jiaatijaca quiniutianiya. Naaratej, nojoriiri najuhua shanohua nojori niishitiojosanota nia sapojonutaniya, nareja nia niqitiojonura nojori nia cumaneeca, nia casaminio. Naajaa, naa sacuraatia miijiaca nojori quiniuucatej, nojoriiri tariucuacaanujiniji Pueyaso riuriosanocujaa na saniitiosocoriquiano. Majaari Pueyaso jiyanooniu quiniutianiya nojori.

⁴ Naajuhuj, Pueyaso seya jaara sesa miiquiaari, majaari Pueyaso jiyanooniu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuara quirijiaatijia. ⁵ Naajuhuj, Pueyasoori Noé quishacari sesa miijiaca pueya jiyanoayiquiaarijuhuaj. Cuno sesa miijiaca pajaashitianiquiaariiri nojori cusununura puetunujuanaa. Saaja Noé curoquiaariiri Pueyaso tojijia na quiniuucua, socua siete pueyanu. Noeri pueyaracaanu cunoojori sesa miijiaca pueya numotequiaari juucua, nojori tacatonura noojia Pueyasooocua, sesa nojori miiniujiniji.

⁶ Naajuhuj, Sodoma tiacajinia quiniaa pueya quiniuucua jiyanoehua sesa miijiaca, Pueyasoori cunoojori tiaca catijataquiaari tojetaarucujanaa juacara. Naa catijataquiaari Gomorra

tiacaariuhujaj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniurijuhujaj, nojori mariqui saniitiosaaquiaaruhujaj. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniucua. Sodoma tiacajinia quijia Lot quiniucua, nojuajaari jiyanoehua taajequiaari tari, cuno pueya miijionuucua sacuraatia casaa, tariucua nojori jiiitishano casaacua.

⁸ Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojijano. Sacuraatia nojori pocoojonu tojiquiaariijaariuhujaj. Maninia pueyano Lot quiniucua, nojuajaari jiyanoehua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacuajiti pueyanaa, paari niishiyani, Pueyasoori na tojitiajaca pueya cojuaja, maja nojori mitishaanura sesa. Saniniujia, Pueyasoori sesa miijiaca racatajajaara nujuatejosano, nojori saniitiojosaaunu juucara. ¹⁰ Pueyasoori socua jiyanoehua nio pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunuujacajuhujaj, noo pojorijuhujaj, pa Jiyaniijia rootasano ruuretajaca saajatej. Naa sacuraatia miijiacani, nojoriiri tojetaarucujanaa tojiyashijia. Majaari na pueretunu quiquiaa sacuraatia tama nojori panishanojuaja nojori miiniuria. Naajuhujaj, nojoriiri maja na pueretunu quiquiaa jiyocuacaanu cumaacaraca quijiaaca na sesacanura. ¹¹ Saniniujia, Pueyaso seya cutaraari jiyanoehua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijiaaca nojori sesacanura.

¹² Cuno pojori, saaja sacuraatia miiniuria niishitiojanaani, nojoriiri niishiyashijia. Nojoriiri juhua nacujiniaaco quijiaaca casami, teyanote saaja puecoosocoriquiano roosaaquiaacuajani. Tojetaarucujanaa niishiyashijia nojori quiniucua, nojoriiri maninia quijiaaca pa quiniuria pa Jiyaniijia rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya mishocoriquianojuhujaj, naquiya nojori miitianoehua narta pueya. Nojoriiri jiyanoehua timiquiaa nojori jaara naata quiriquiaa sesa miiniu juucajuhujaj taa nojori miiquiaa niucuaacuaani. Cuno pojoriiri sacuraatia miijiaca. Majaari na niishiniu caririquiniu. Nojori sapojonuucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanoehua timiquiaa tariucua nojori jiiitishano sesa casaacua nojori niishiriojosacari. ¹⁴ Naacuajitij, nojoriiri maja nareja na niqiniu quiquiaa maajipohua. Puetunu maajipohujanaa niqitiquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapueje jatarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta, sesa nojori miiniurijuhujaj. Naajuhujaj, cuno pojoriiri tariucua jiiitino puetunu nojori panishanojuanaa nojori jiiitishano, jaara na naata quiriquiaa. Nojoriiri tariucua Pueyaso jiyatesano na saniitiosocoriquiano. ¹⁵ Pueyaso rootasano tojiyashijia nojori quiniucua, nojoriiri juhua tashuquioonu Pueyasooehua neteja nuujiniji. Nojoriiri casamiriaca quiniucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niqitioconutaniya, nojuajaaja nocua quiaaare, Israel pueya na shimiojonura nera. ¹⁶ Casamiicua jiaatiaja na quiniucua, Balaamri na seru nijinia cajiquiaari. Quiaareeri. Nucucaco na quiasacari, Pueyasoori Balaam seru pocuatequiaari pueyano rupaa, Balaam na nacasanura. Naacuajitij, pocuaashijia seruuri Balaam tariniquiaariuhua, juhua moseeca sesa na miiniu panishacari juucua.

¹⁷ Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhujaj, nojoriiri juhua niqitioehua paratu piyarojosano, tamoco quiaamaa saajaari. Nojori niishitiojosanoori naajuhujaj. Majaari na tojitiajaca na naacunu. Pueyasoori jiyanoehua ninishiqui quiquio tari jiiitiaa nojoriicuaaji, pueyaracaanu nojori quiquiorano. ¹⁸ Nojori pohuatasanoori najuhuaana shanoehua tojishano. Saaja sapojonuuri. Naacuajitij, nojoriiri shusha Jesuucua tiujujiaa shiniujuquiaa nojori miiniuhuaa tama nojori cuaqueya panishanojuaja. Cuno Jesuucua tiujujacacuajaari shusha naataja sesa

miijiaca pueyajinijinio jatanishaariquiaa juucua, Pueyaso tojjijaca nojori quiniuria juucua.¹⁹ Sapojonuujuaca cuno niishitiojonuujuaca quiniuucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjijaca quiriquia. ¿Nojori niishitiojosano pueyatucua taa juhuajaniya quijiaca quiriquiani, tama nojorijiaaja jaara sesa miiniuucua jiiitnio quiyajaa? Seetanujuanaari, pueyano jaara maja na naata quiriquia sesa casaa na miiijionu tarinitianu, cuno pueyanoori seetanujuanaa juhua tama sesa na miiijosano serujuaaja. Majaari na naata na tarinitianu.²⁰ Pueyanaa, niaacuajaari niishiya, pueyano jaara pocuaji Tacunaacua tiuujiara quiri, pa Jiyaniijia Jesucristoori na cumaquijia na tarinitianura sesa miiniuria na jiiitishano. Saniniuuja, cuno pueyano jaara sesa miiijiaa quiriohua, nojuaja jaara sesa miiijionura jiiitiriohua socua, neraari socua puereeta quiniutianiya Pueyaso niishiyashijiaca pueyajiniji.²¹ Naacuajiti pueyanaa, pueyano jaara seetanu rupaaajanaa niishijia quiriquia, nojuajaari cocuaatia miya jaara na samiritiarohua sesa miiijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niquiara pohuatasaaquiaricujani, jatanishano pueyano na quiniuria.²² Naa pa Jiyaniijia samiritiajaca pueya quiniuucatej, sesa miiijaca nojori quiniuhua, nojoriiri nio tariucuacaanu Pueyaso Rupaaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuj: “Cushiiri nanatosaree juucua. Saaja na cooquojinia neeneecuasuhuariuhuj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojinia, janiyari nia nacasuquiaarini socua cua shiniujuniuria nijaniya maja nioojia niqijiojetejaca nia quiniuria Pueyaso rootasanojiniji. Janiyari naa miya quiarjia nio cua naajiojiniajuhaaj.² Maninia nia numaama nia racatariquia tariucuacaanu pueyara Pueyaso sequesano caminiujuniaa pohuatasano, pa Jiyaniijia jiyaramiquishano pueya pohuatasanonio. Cunocujaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miiniu panishano miijiacajaaja. Na macaatiuria nijaniya, nojoriiri nia nequesotanutaniya: “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenuitaniuhuanijia’. Majaari na tiuquiniu. Tariucuacaanu na niqiniiaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”.⁴ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijiaca. Jiyanohua tariucuacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujajinia na quiniuria.⁵ Na nuhuaji, Pueyasoori cuno mohuacaja pajaashitiquiaari puetunu mijiria quijiicajanaa na cusojuanura.⁷ Quiarjia saniniuuja, nio cajiniocua, nio jiyanio, Pueyasoori na cumaacata nojori jiiitaaajaara. Na nuhuaji cutara, puetunujuanaari catenutaniya, Pueyaso saniitosacari puetunu na ruuretajaca pueyajanaa.

⁸ Naajuhuj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niqiriyaatu juucaari juhua mil marijia. Naajuhuj, mil marijiaari juhua niqiriyaatu juuca nera.⁹ Majaari nia jiyaniinu maja pa Jiyaniijia tacatenu quiniutianuhua. Majaari na tarishiniu najuhanaj, taa tamasaca jiyaniyacujani. Maja. Maja cutaraari na paniniu pueya quejoosaaanura mani quiquiojinia. Naacuajitij, nojuacuajaari pueya sashiyajara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianuhua. Pueya jyanishacari Jesucristo maja na tiuquiniu quiniutianuhua, jiyacaritij, canashiyajiqiji tiuquiniutianuhuari. Juhua nohuasejovia tiuquiniutianuhuari, sesa miijiaca na saniitionura. Na nuhuaji, jiya cajiniocuaari shaajenutaniya. Jyanohua cojuatunenutaniyari na shaajesacari. Casaajiniji jiya

shipinishaaquiaarini, cunoori puetunu catenutaniyajanaa. Naacujitij, jiyari puetunu mijiria na jiitiasano casaatajanaa shaajasaanutaniya jiyanoohua naseeca manijinia.

¹¹ Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijia nia quiriqia saa maninia miijiacaja nia quiniuria. ¹² Naa maninia miijiacaja nia quiriqia, Pueyaso cuaara pa Jiyaniijia mueraterohua pocuajaatijia. Pa Jiyaniijia sequesano tojjiaca nia quiriqia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacujitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyano. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jiyanoohua nia saniniujiuriquia saaja maninia miijiacaja nia quiniuria. Tojetaarucujanaa jiyanooshano nia quiriqiajuhuaj, juhuajaniya nia quiniuria pa Jiyaniijia tacoji, na nequesoreesacari pajaniya. ¹⁵ Naacujiti pueyanaa, nio nia niishiriqia: pa Jiyaniijiaari tarishiyajaara pueyacua na taraajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuhuj, Pueyaso niishitijaa na jiitianuucua. ¹⁶ Nojuacujaaari puetunu na naajioneecajiniyajanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacujitij, mosanucua, noojia niqijjitejacionio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacujitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacujaaari tari niishiya cuno Pueyaso rootasano tojiyashijiacajiniji. Nocujaji jiyanoohua nia cojuariquia tama nia cuaqueyajaaja maja nia sapojosaanura sesa miijiacaja nia quiniuhua. Saaja Pueyaso rupaacua tiuujiacaja nia quiriqia cutara, taa nocua tiuujiacaja nia quiyacujani, cuno pojori mariqui nioojia niqijjiotereeri. ¹⁸ Naajuhuj, socua pocujaji Tacuna niishiniuucua jiaatijaca nia quiriqia. Naa maninia nia niishiri pa Jiyaniijia Jesucristo, socua na panijiacaja nia quiniuria, socua na cumaaca nia jiitianurajuhuj. ¡Pa Jiyaniijiaari jiyanoohua maninia! ¡Nojuaja cuaara shuquiritiasaaria quiarijia, pueyaracaanujuhuj! Cuaara na quiiriatej.

COTEENUJUANAANAA JUAN NAAJIONE

Pueya samiitianijia rupaa

¹ Jiya shipinishaacarijiyojua, Jesucristoori quijiajuhanajaj. Canaari niaara naa-jiyani, canaa niishitiniuria niajaninya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuj canaa rupuesacari nojuaja. Nojuajaari pueyaracaanu quijia cutara, pa Samiitianijiajaariuhuj, pueyaracaanu quijia pa quiniuriajuhuaj, na sequesanoocua pa tiuushacari. ² Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijajiniji nia pohuatajaaniuhuj. Coteenu na Queta quijia jiyocua-caanuuri. Na nuhuaji, canaacua muetaquiaariiri. ³ Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupetooreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴ Naa jaara nio naajiojinia canaa sequesano tojiri, niaari seetanujua-naa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyajaacuhuj.

Pueyaso pa cuhuatana

⁵ Jesucristocuaajari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶ Naacuajitij, paa jaara sequereni: “Pueyaso rupueja cutaranijia”, na rupaa pa tojiaquishacari, paari saaja najuhuana sapojiyani. Paari juhua ninishiqui quijia quiyajaani. ⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupetootesano quiya parta Pueyaso muerasuta cutarani. Naa juhua rupetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojajiniji.

⁸ Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. ⁹ Paa jaara sesa pa miishano pohuatare saniniunijia, Pueyasoori jiyanoootio cutara, na jiyanooniuria pajaniya, taa na sequequiaaricujani. Poojajiniji jeequenutianiya puetunu sesa casaajanaari. ¹⁰ Paa jaara saniniuuja sequereni: “Maja sesa cua miiniu”, paari Pueyaso jiyateya juhua sapojuarani. Paa jaara naa quirini, majaari seetanujuanaa na rupaa quiniu poojajinija.

2

Jesucristo pocuaji tacuna

¹ Quiquiohuaniyojuanaa cua tojitiare. Nio naajiya niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuricuaa jitiiaa pocuaji Tacunani, na Que Pueyaso na jiyanoootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusonucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

³ Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojyashijia jaara sequeriquia: “Pueyaso niishyanijia”, jiyano pueyanoori sapojua. Majaari na jitianu Pueyaso rupaa noojajinia. ⁵ Cante saniniuuja pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶ Cante sequejani: “Janiyari Pueyaso rupuejani”, nojuaja cuara quiiria juhua Jesucristo, taa na quiquiaari maniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuacaanu nia tojishano, majaari quiarinio. Niaacuajaari tari na tojiqiaari, Pueyaso rupaa jaara shushajanaa nia niquiara pohuatasaaquiaari. ⁸ Naajaa, nio rootasano quiarijia cua naajiosanoni, nioori seetanujanaa juhua quiarinio niaara. Niaari tari na tojiqiaa, pueya panijia nia quishacari, taa Jesucristo quiqiaari pueya panijiacuaani mijiria na quishacari. Na rootasano nia tojishacari, niniqiaari tari quiamacuaa nioojiajiniji. Pueyasoori nioojiajinia cuhuataa nia panitiosacari quiarijia.

⁹ Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuahuaj, tama nojuajaarijia maja sesa na miniu quiniutianiya, pueya panijia na quishacari. ¹¹ Cante narta Pueyaso pueya niqiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaarihuaj. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariojuaru quiya. Majaari na niishiniu Pueyaso casaa.

¹² Quiquihuaniyojuanaa, niaara naajiyani nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. ¹³ Queyanaa, niaara naajiyani nia niishiniuucua pueyaracaanu Quijia, cante tari pocuaji quiqiaari jiya coteyaquishacarijiaacuajani. Mashiquiorinia, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuj mashiquiorinia, seetanujanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucujuhuj.

¹⁵ Majaari mijiria sesa miiniuucua nia jiaatianu, mijiria casamiicuanio. Cante mijiria casaacua jiaatijani, cunoori maja pa Que Pueyaso panijia. ¹⁶ Mijiria niishijiaa coretanijiosano tama nojori niishishanojinijiaajani, puetunu cunोजनाari maja pa Que Pueyaso niishitishano. Cunoori sacuraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniurijaaja. Paari pa niquishano pa maniniucuasano casaa paniquiaa pueyaracaanuni. Naajuahuaj, paari pueyaracaanu timiquiaani tamasaca timitiasacari pajaniya. Puetunu naa sacuraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucuashiyaree. Socua shaajasaanutaniya puetunujanaari. Puetunu sesa pa jiaatianujanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari superee. Naacuajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajinijinio pueya quiqianuucua. Pocuaji rupateucanuuri maja seetanujanaa Pueyaso muerasu nojori quishacari. Jaara seetanujanaa Pueyaso muerasu quiqianu, mariqui pata quiyacuateni. Naa nojori miiniuucatej, paari niishiyani majaari puetunu pata rerejonaajanaa seetanujanaa parta Pueyaso muerasu.

²⁰ Saniniuujia nijaniya Pueyaso muerasunaa, Jesucristoori nia niqitioquiaari na Sohuanu. Naaratej puetunu nijaniyajanaari Pueyaso niishitijaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuj, sapojoua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocuajaari Cristo paraca. Jaara sequerejuhuaj: “Jesuuri maja Pueyaso Nyanu”, cunoori Cristo paracajuhuj. ²³ Cante Pueyaso Nyanu

Cristo tamacajani, majaari Pueyaso na jiitianu na Querajuhuj. Cante Pueyaso Niyanu Cristo jiitiaa cutarani, pa Que Pueyaso jiitiaa na Querajaariuhuj.

²⁴ Naaratej, Pueyaso rupaa nia racatare nia numaama taa nia tojiquiaari tariucuaaanucujani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqiu quiya pa Que Pueyaso, Neyanu Jesucristotanio. ²⁵ Jesucristocuaajaari na Sohanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria nijaniya, nia niishiniuria taa Jesu paraa niishitiojonuuquiaa sesa najuhuaa na cuaracashiniuniutiani. ²⁷ ¿Casaara nojori nia tojiquiaani? Niaacuajaruhua tari Pueyaso Sohanu jiitiaa, Jesucristo niquitiosano nijaniyani. Naacuajitij, majaari tari panishaanu tamasaca niishitiojonura socua nijaniya. Pueyaso Sohanucuaajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqiu nia quiriquia Jesucristota, taa Pueyaso Sohanu niishitiojoquiaa nia quiniuriacuajani.

²⁸ Quiarijiani quiquiuhaniyojuanaa, jatiqiu nia quiri Cristota, seetanujuanaa juhujaniya nia quiniuria pa Jiyanijia jaara tiuquiriohua pocua. Naa nia quiriritij maja nia caririquiniuria nojuaja jaara pa jiitiasuhua. Na rupaa tojiyashijiacaari caririquiniutianiya cutara. ²⁹ Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Niaa cumaati niishiyajuhuj, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishituyaquiyari nojori niishiyaquiniuucua pa Que Pueyaso. ² Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacariuhua, paari na niqiniutianiya taa na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

⁴ Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu. ⁵ Niaari niishiyajuhuj, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. ⁶ Naacuajitij, cante jatiqiu quiya pa Jiyanijiatani, nojuajaari maja sesa na miiniu quiquiaa cutara. Cante saniniuuja sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. ⁷ Quiquiohuaniojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyanijia Jesucuaani, pueyaracaanu maninia quijia cutara. ⁸ Saniniuuja, cante sesa miijiani, nojuajaari Sesaaca pueyano. Shusha jiya coteenujiniji, Sesaacacuaajaari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiniuni, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohanu nojori jiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijiaa nojori quiniu pueyaracaanu.

¹⁰ Naacuajitij, maatia niishishanocuaajaari cante Pueyaso muerasuni. Saniniuuja, cante maninia miyashijiani, nojuajaari maja Pueyaso pueyano. Naajuhuj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritiij: “Panitiojuuca nia quiri”. ¹² ¡Maja cutaraari pa quiniu juhua Caín! Nojuajaari tama tarajanujuuaja moquiaari, Sesaaca tojjia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuuaja tacartaquiaari monu, tarajanu miishano quiniuucua maninia. Saniniuujia, tama na miishanojuuarjia sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niqiniu paniyaquiriquia nijaniya. ¹⁴ Paacuajaari juhua macu samiitianijiosaaquiar-iuhuanu, seetanujuanaa saminiuucua pa quiniuria. Paari seetanujuanaa na niishiyani panitiojuuca pa quishacari parta Pueyaso pueyata. Cante tapueyocuaa paniyaquijiani, nojuajaari juhua macu quiyajaa. ¹⁵ Naajuhuaaj, narta pueyano niqiniu paniyashijiacani, nojuajaari juhua pueya mojuua Pueyasa. Niaacuajaari niishiya, pueyano mojuuari Pueyaso samiitianiyaquishoojua pueyaracaanu na rishiniuria. ¹⁶ Paacuajaari niishiyani, Cristoori jiyanojua pa panijia na cusunuucua pocuara. Naacuajiti paari niishiyani taamuecate seetanujuanaa paniniuni. Paa cuaara naa panijia quiriirajuhuaaj, tama pa cuaqueyajaaja pa tarinitianura parta Pueyaso pueyacuara, jiyanojua pa paniniutia nojori. ¹⁷ Naaa jaara nareja niqiyia niarta Pueyaso pueya casamijiuniuucua, puetunu nia panishanojuanaa nia jiiiasacaricuua, niaari najuhuana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niqitioyaquijia na jiiiasanojiniji? ¡Maja! ¹⁸ Quiquihuanijoyuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa tarajere, taraati nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori panijianijia”.

Pueyaso tojjiaari juhuajaniya quijia Pueyaso niqiaara

¹⁹ Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰ Pueyaso muerasu pa quishacari, poojia jaara pa taacanuuutere saaja nocuaji, naajaa, Pueyaso cutaraari jiyanojua maninia niishijia socua poojia niishishanojiniji. Nojuacuajaari pa niishiya cutara. ²¹ Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niqiarani. ²² Nojuajaari puetunu na masasano niqitionutaniya pajaniya, na rupaa pa tojishacari, puetunu na panishanojuanaa pa miishacarijuhuaaj. ²³ Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuaaj taa na sequequiaaricuajani. ²⁴ Canapuate Pueyaso rootasano tojjiacani, nojoriiri Pueyasota rupuetootesano quijiaa. Naajuhuaaj, Pueyasoori nojorijinia quiyacujua. Nojuacuajaari na Sohuanu niqitioquiaari pajaniya. Naa na Sohuanu pa jiiiasacaritij, paari maatia niishiyani Pueyasoori poojajinia quiya.

4

Pueyaso Sohuanujiniji pohuatasano, Cristo Paraca sohuanujinijinio

¹ Cuarta Pueyaso pueyanaa, quiarjiani, queraatia Pueyaso sequenu panishano camini-ujuniiaa pueyari supueya. Majaari ritia nia tiuuniu puetunu nojoriicujajanaa. Coteenu nojori nia saniniujuri, nia niishiniuria nojori caminiujushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuuuacaari caneya. Nojoriiri najuhuana cuaracashiniuya na sequesacari: “Janiyacuajaari Pueyaso sequenu panishano caminiujuniani: Pueyaso Sohuanu niishitishano janiya”. ² Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³ Cante saniniuujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquihuaniyojuanaa, niaacuajaari Pueyaso muerasu. Naacuajitij, niaari cuno saponuujuaca shocotacanu Pueyaso cumaacata. Nioojiajinia Quijiaari socua cumaacaraca nojori jiiitasano Sesaaca cumaacajiniji. ⁵ Cuno sapojonuujuacaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojtiaquiaa. ⁶ Paa cutaraari Pueyaso pueyani. Naacuajitij, cante Pueyaso tojtiajacani, nojoriiri pa tojtiaquiaa. Canapueete saniniuuja maja Pueyaso pueyani, nojoriiri maja na tojtianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuuja sapojoua sohuanu jiiitaaianija.

Pueyaso pa panijia cutara

⁷ Cua panishano Pueyaso pueyanaa, jiyanoehua panitioojuaca pa quirij. Pueyasocujaari pa panijia. Nojuajaari pa panitijia na Sohuanuta, jiyanoehua panijia pa quiniuriajuhuaj. Canapueete puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaarihuaj. ⁸ Canapueete pueya paniyashijiacani, nojoriiri maja na niishiniu Pueyaso. Pueyasocujaari panijia cutara. ⁹ Nojuajaari pa niishitiquiaari taa na paniquiaa jiyanoehua pajaniyani, Neyanuniyojua na jiyarosacari mijiria pa samiitianiijoriqiano, pocuara na cusosacari. ¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojuaca pa quirijjuhuaj. ¹² Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamascata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiyani, na paniniu quishacari poojiajinia. ¹³ Nojuajaari na Sohuanu pa niqitioquiaari poojiajinia na quiniuria. Naacuajitij, paari niishiyani paacuajaari nata rupuetoojua quiyani. ¹⁴ Canaajanaari seetanujuanaa canaa niqishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaca jiyatesaanura Pueyaso pueyara. ¹⁵ Cante pueya niqiara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojua quiyajuhuj.

¹⁶ Naacuajitij, paari niishiyani Pueyasoori jiyanoehua pa panijia. Paari na niishiyajaa-nihua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. ¹⁷ Naa Pueyaso quishacari poojiajiniatej, paari pueya panijia jiyacatequiaa socuani. Naa seetanujuanaa panijia pa quishacariitij, paari juhuajaniya quiniutianiya Pueyaso nequesoreesacari puetunu pueyapuejanaan. Majaari pa puerenu quiniutianiya panijia pa quishacari taa panijia nojuaja quiyacuani. ¹⁸ Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu noojitajanaa. Puerejaari niishirojiya: “Saniitiosaanutaniyanijia”.

¹⁹ Naaacuajaari niishiya, Pueyasoori coteenujuanaa pa paniquiaari, naarate paari saniniuuja na paniyani. ²⁰ Saniniuuja, cante sequejani: “Janijari Pueyaso panijiani”, narta pueya niqiniu paniyaquiya saajaaraarihuaj, jiyano pueyanoori sapojoua. Naa na paniyaquishacari tarajanu na niqishano na namijiata cutaratej, ¿maatucua taa Pueyaso panirini, na niqishoo socuani? ²¹ Pueyasocujaari naa pa rootaquiaari: “Cante cua panijiani, cuara paniiria narta pueyajuhuj”.

5

Taa pa shocotanutaniya mijiria niishishanoni

¹ Naa jaara Jesucuaa tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaarihuaj.

² Naacuajitij, pa panishacari Pueyaso, pa tojishacari na rootasanojuhuaj, jiyacariti paari

niishiyani paari parta Pueyaso muerasu paniyajaacuhuaaj. ³Paa jaara Pueyaso panijia quiri seetanujuanaani, paari na sequesano tojjijaca quiyajaaniuhuaaj. Na rootasano pajaniyani, majaari jiyajeneta na quiniu pajaniyara. ⁴Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasooocua pa tiuushacari. ⁵Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pahuatasano

⁶Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaaquiaari. Canaa niishitiquiaariiaariuhuaaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuaaj, janiyajanaari na niqiquiaari na nanaca shooteyano na shuucujini. Naajuhuaaj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. ⁷Jiuujianaraca jiyocuaaanu quijiaaari pa niishitiya Jesucristoori mijiria niqiaari pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. ⁸Paari mijiria jiiitia Jesujiniji pa niishitijacajuhuaaj. Cunoori jiuujianaraca quiyajuhuaaj. Cuno pojoriiri nio: poojiajinia quijia Pueyaso Sohuanu, jiyocuaaanuji tojjishano rupaa Jesu tiuquinishacari moojinia, naajuhuaaj, na nanaca, puey niquishano na shuucujaji shoyano. Puetunu cunोजनाari mariyata pa niishitiya Jesuuri seetanujuanaa Pueyaso Niyanu. ⁹Paa jaara tojiriquia pueya pahuatanusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujinijiiri socua seetanu rupaajanaa cutara pueya pahuatanusanoinijiji. ¹⁰Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiyacuquishacari tama Pueyaso sequesanoocuaaja Neyanujiniji. ¹¹Pueyasocuaajaari sequequiaari, Neyanuucua tiuujiaaari pueyaracaanu rishijiaa quiniutianiya. ¹²Cante Pueyaso Niyanu jiiitia noojiajiniani, nojuajaari tari samiitanishaarohua pueyaracaanu rishijia na quiniuria. Pueyaso Niyanu jiiitiaashijiaari saniniujia maja na rishiniu quiniutianiya.

Nio naajio puequenu panishacari rootasano

¹³Nio naajia niaaranijia nia niishiniuria, Pueyaso Niyanuucua nia tiuushacari niaari tari samiitanijiosaarohua pueyaracaanu nia rishiniuria.

¹⁴Paari Pueyasooocua tiuquuaani, pa niishishacari nojuajaari pa tojiquiaa pa secosacari nojuaja, pa masesano jaara quiri taa na paniyacujani. ¹⁵Naatej, taa pa niishiyacuaani Pueyasoori pa secosano tojiquiaa, paari naa niishiyajuhuaaj paari nojuaja pa masesano maseree tarini.

¹⁶Cante narta Pueyaso pueyano niquiya sesa miyanoni, cuara Pueyaso secujoora nocuara, sesa na miishano jaara na cusojuashijia quiri. Naacuajitij, Pueyasoori cuno sesa mijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miini. Paa jaara cuno sesa casaa miirini, paari cusoqueeni. Naa cua sequesari nijaniyatej, majaari cua sequenu nijaniya nia secojonura jiyano sesa miishanoocuaratej. ¹⁷Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸Paacuajaari niishiyani pueyanaa, cante Pueyaso jiiitia juhua na Que cutarani, nojuajaari sesa miyacuquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitini. Majaari na naata sesa na miiniujuhuaaj.

¹⁹Paari niishiyani paa cutaraari Pueyaso muerasuni. Sesaacaari saniniujia puetunu mijiria quinaa Pueyaso niishiyashijiacajanaa jiiitiaacujua. Nojuajaari nio jiya camarnu.

²⁰Paari niishiyajuhuaaj Pueyaso Niyanuuri mijiria pocua niqiaari. Nojuajaari na niishitijia niqitioquiaari pajaniya, maninia pa niishiniuria na Que, na Que quiniuria pa Quejuhuaaj. Nojuajaari Pueyasojuanaa cutara. Paari nata quiya jatiquini, Neyanu

Jesucristota pa rupuetoosacari. Nojuajaari Pueyasojuhuanajaj, pa Samiitianijijaariuhuj, pueyaracaanu rishijiaca pa quiniuria. ²¹Quiquiohuaniyojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucuaja.

TANEE JUAN NAAJIONEE

Pueyaso Rupaa seetanujuanaa panijara pa jiyateja

¹ ¿Quiaate quiyajaa cua panishano cua rimiaticuanaa? Quiaacuajaari Pueyaso saquiriojosano, neyatu quia quiniuria. Quiocuara naajiyanjia, quia panishano muerasuucuaranio.

Janiyari saaquiiano Juanni, Pueyaso muerasu jiidiana. Seetanujuanaa nia paniyanijia, taa puetunu Pueyaso rupaa tojiniaa pueya paniya nijaniyacuaani. ² Pueyasojiniji seetanu rupaaajaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. ³ Nia tojishacari seetanu Pueyaso rupaaajanaa, nia panitioosacarijuhuaj, naacujitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaarihuaj. Nioojia jiyatenutaniya juhuajaniya quijiacarajaarihuaj.

⁴ Noojiaqueya quia niquiohuajinijinio niquiquianunijia. Nojori timitiacanunijia nojori tojtianuucua maninia seetanu rupaaajanaa, taa pa rootasaaquiaari pa Que Pueyasojinijicuaajani. ⁵ Quiocuara naajiya quiarijianijia cua panishano cua rimiaticuanaa, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quiocuarani. Nio rootasanocuaajaari pa jiidiasano pueyaracaanu Jesucristojiniji. ⁶ ¿Taate pa naata paniniuni? Paari pueya panijaca quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuaara quiriia Pueyaso pa paniniutia poojiajinia.

Cristo paraari sapojonuujuaca

⁷ Quiarijiani, queraatia sapuenu juhua Pueyaso sequenu panishano caminiujuniiaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria”. Canapueete naa sequejacani, nojoriiri sapojonuujuaca. Nojoricuaajaari Cristo paraa. ⁸ Tama nia cuaqueyajaaja nia cojuare cuno pueyacujaji, maja nia tojiniuria nojori, niaa mariqui Pueyaso niqutionu panishano pajaniya maseyaquiriiri, pa Jiyaniijia nia poonijionujiniji na niqutionu panishano. Suraatiaja nia tojiriohuarohua seetanu rupaaajanaa, nia masenura puetunu Pueyaso jiidiasanojuanaa niaara. ⁹ Cante tama na cuaqueyajaaja jiyateja Pueyaso casaa niishijia socua Jesucristo jiyaramiquishano pueya niishitiojosanojinijini, cuno shocotajaari Pueyasoosojura quiquii, na shocotanuucua Cristo rupaa. Cante saniniujia seetanu rupaaajanaa tojtiaquiaa maniniani, taa pa rootasaaquiaari Cristo rupaacuaajani, Pueyasocuaajaari na Que, Neyanuuri nocujaji Tacunajuhua. ¹⁰ Seetanu rupaaajanaa jiidiaashijia jaara niaacua tiuquiniu paniya tamaatia na niishitiojonura nijaniya, majaari niaacua na shanacununoj. Majaari quenaaja na saruhuanujuhua nia cumaquiniuria nojuaja. ¹¹ Cante na sequeyani: “Pueyaso cuaara cumaquiiria quiajaniya”, naa sequejaari cuno sapojoua cojiritiasaaree tari sesa na miishanotaja.

Juan puecasacari naajionu

¹² Socua queraatia sequenu paniya nijaniyanijia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niquiohuari cua sequeere nojoriria cua saruhuanura quiajaniya. Nojuacuajaari Pueyaso saquiriojosano maajijuhua. Tariucuaaja.

SOCUA TANEE JUAN NAAJIONEE

Juan maninia pohnuatasaaquiaari Gayojiniji

¹ Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiiitiana. Seetanujuanaa quia panianijia, Pueyaso rupaa quiniucua coojiajinia.

² Quiocuara secojoquiaanijia, puetunu quia miishanojuanaa cuaara quiiiria maninia. Janiyari quiocuara secojoquiaaaniuhuj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojjia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanhua shuquiriaatia quiquianuni nojori pohnuatasacari quiajanijiniji. Quiaanaari seetanujuanaa maninia miijia quiquiaa taa pa rootasaaquiaari Jesucristo rupaacujani. Quiaacujaari maninia tojiquiaa seetanu rupaajanaa, sanajanaa. ⁴ Jiyanhua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricujani. Naa cua tojishacaritij, cunoori jiyanhua cua timitiquiaa socua tamonu casaajiniji.

⁵ Sanajanaa, quiaacujaari maninia miijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tijinia quia niishishoo tamaquiicujainio Pueyaso muerasu. ⁶ Pueyaso muerasu rerejosacari niya, Pueyaso rupaa pohnuatanura rucoojuacaari canaa niqiiara pohnuatanu maninia quia miishanojiniji nojoriria, quia paniniutia nojori. Quiarijiani, nojori quia niqiiatiora nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiriniuria. ⁷ Nojoriri Jesucristojiniji pohnuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuaara naacuura jiyano pueya, noo pojori canapueje pa Jiyaniijia rupaa pohnuatanura rucoojiyacujani. Naa pa miiriti Pueyaso rupaa pohnuatanu naacunaa pa quiniuriajuhuaj.

Sesa Diótfrefes miishanojiniji pohnuatasano

⁹ Janiyari quia quijia tiacajinia Pueyaso pueya maanuucua naa naajoquiaarijuhuaj. Janiyari nojori sequequiaarini nojori cuaara Pueyaso Rupaa pohnuatanura rucoojuaca naacuura, cuno pojori jiiitanura na panishano. Diótfrefes saaja tama na cuaqueyajaaja shuquiritaja, Pueyaso pueya maanu jiiitiana na quishacari. Nocuaji cua sequesano ruuretacanuuri. Cua rerequetequiaaarijuhuaj. ¹⁰ Naajaa, janiya jaara niaacua quiaareni, janiyari na sacuaraatia na miiniucua na nacasunutaniyani. Nojuajaari tamasaca niqiiara canaa sesacaquiaa na sapojonuta. Naa socua sesa miiquiaaarijuhuaj: majaari na tiuquinitianu quiquiaa Pueyaso Rupaa pohnuataana na tijinia. Canapueje saniniuuja nojori tiuquinitiu paniquiaa nojori tijiniani, Diótfrefes nojori tenujuquiaa saaja. Canapueje Pueyaso rupaa pohnuatanura rucoojuaca tiuquinitianu paniquiaajaa na tijiniani, Diótfrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cuno sesa miijiaacua, quiaa mariqui juhua nojuaja quiriijaarijuhuaj. Saaja quia jiaatiare cutara maninia miijiaacua, juhua nojuaja quia quiniuria. Cante maninia miiquiaani, cunocujaari Pueyaso pueyano. Sesa miijia saniniuuja, nojuajaari Pueyaso niishiyashijia.

Maninia Demetrio miishanojiniji pohnuatasano

¹² Puetunu pueyajanaari saniniuuja maninia pohnuatanuquiaa Demetriojiniji. Tama Demetrio miijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacujani. Niacujaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu paniyajaa quiajaninyani. Naajaa, majaari cua sequenu paniniu saaja cua naajiojinia. ¹⁴ Janiyacuaja quiocua naquerejiyani. Jiyacaritij, pocua maninia pocoojore cutarani.

¹⁵ Pueyaso cuaara quioojia jiitiaara maninia, juhuajaniya quia quiniuria. Niya pa rupuentaari cua sequeturee cua saruhuanura quiajaninya. Puetunu cuniqui pa rupuentaajanaa quia saruhuatate canaarajuhuj. Tariucuaja.

JUDAS NAAJIONE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajiyaniija canapueete pa Que Pueyaso panishano muerasucujani. Nojuajanaari nia saquiriojuaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. ² Pueyaso cuaara nia juujujaaria. Cuaara nioojia cajitiirijahuaj. Cuaara paniiria niajanijahuaj. Pueyaso cuaara naa miiria jiyanhua niajanijatej.

Sapojonujuacajiniji pohuatasano

³ Cua panishano pueyanaa, janiyari niaacuara naajionu paniriquiaa jiyanhuaani, cua pohuatanura niajaniya taa maninia pa miishaanutaniyani, Pueyaso saquiriojosano pueya pa quiniucua: niajaniya, canajahuaj. Saniniuujia, quiarijiani, socua maninia cutaraari cua naajionura niaacuara, cua nacasunura niajaniya seetanujuanaa Pueyaso tojjijaa nia quiniuria. Jiyanhua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocujaaari na rupaa pohuataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaricuaani. ⁴ Naa nia sequeyanijia Pueyaso rerequetejaca supuesacari jiyasohua nia tajinia. Tariucuaanu Pueyaso Rupaajiniacuajaari cuno sesoriquia pueyajiniji naajio-tasaaquiaricuaaja. Nojoriniaari quejoosaanutaniya pueyaracaanu saniitosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaja, pa jyanoojia Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitoyashijia, pa Jiyaniijajanaa Jesucristoni.

⁵ Niaari niishiyacuaja, Pueyasoori Israel pueya supuetanaa mashiquiaari Egipto jiyajiniji, Egipto pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijiaa puecooquiaari. ⁶ Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapueete na shuriucua quijiaa quiquiaari jiyocuaaanucujani. Nojoriiri Pueyasora na poonijosano tiujiaquiaari. Nojori poonijosaquu tiujiatuquiaarijiaariuhuj. Cunora, cumayocuata morojosaaquiaariiri, pueyaracaanu niishiqui nojori quiniuria, cuaara quirijiaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiacajanaa saniitiojonutaniya. ⁷ Nia niishirijihua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaja nojori miiniuria, jiyanhua sacuaraatia. Nojoriiri maajishuriu numuetucujuuca quiquiaari. Cayashuriuuri narta maaji numuetucujuuca quiquiaarijuhuj. Pueyasoori maja na shipininiu quiquiaari naa pueya quiniuriatej. Naa Pueyaso tojiyashijiaa nojori quishacaritij, mariyata taa tama Pueyaso seyajaaja na tojiyashijiaa quiquiaaricuaani, Pueyasoori nojori quejooquiaari mani quiquiojinia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijiaa pa quiniuria taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricuajaari Pueyaso saniitionujiniji niishiya. Naajaa, nojoriiri juhuajaniya miiquiaa puetunu sesajanaa taa noojiajinia nojori niishiyacuajani. Nojoriiri tama nojori juujuicajaja curuushojuquiaa nojori miishacari tama nojori niquishanojuaja na maquenujinia. Pa Jiyaniijia sootiuyajariuhuj. Nojoriiri jiyanhua cumaacaraca quijiaa sesacaquiaajuhuj, jiyocuaanu quijiacani. ⁹ Supuetana Moisés shaajesacari, Pueyasoori na seya jiyaniijia Miguel jiyarouquiaari Moisés quete na jamonura. Sesaacari Moisés quete paniquiaari juucua. Nocua Miguelta juayonuutaquiaariiri. Miguel cutaraari seetanujuanaa cumaacaraca quijia. Naajaa, majaari na saarjionu quiquiaari Sesaaca. Na sequeree saajaari: “Pueyasojanaa

cuaara juaaria cutara quiajaniya”.¹⁰ Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanhua cocuaatia miiquioquiaa. Nojoriiri narta pueya niqiniu paniyaquiquiaa, taa supuetana Cafn niqiniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuaj, naatej, taa supuetana Balaam miiniu paniquiaari juucucuaani. Nojoriiri mariyata puetunu quejoosaanutaniyajanaa nojori ruuretannucua Pueyaso, taa supuetana Coré cusoquiaaricuaani na ruuretasacari Moisés.¹² Nia queranacusacari Pueyaso niquiara nia panitioonuta, cuno sacuaatia niishitiojonuujaacari jiyanhua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiaca. Puera miaquenuujuaca nojori quishacari, cunoori cararaatia. Jiyano pueyari maja na cumaquiniu njajaniya. Nojoriiri najuhuaa quijiaca, juhua niqitioocuaari tajimiaquiaa paratu piyarojosacari. Majaari maru ninuu. Nojoriiri najuhuaa quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano.¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanhua shoniniacu caminia queyocuasacari cushau, curuutuca. Nojoriiri shanhua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju.¹⁴ Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqitishano nojuaja pohuataquiaari taa nio sesa miijiaca pueya miishaanutaniyani. Nojuajaari naa sequequiaaritij: “Janiyari Jiyaniijia niqirii cunocoji niyano jiyanhua queraatia na pueyatani.”¹⁵ Nijoriiquiaari sesa miijiaca na saniitionura. Rerequetejacaacia tiutianutianiya puetunu sesa nojori miishanojuanaari. Puetunu na soojecajanaari saniitosaanutaniya puetunu nojori sesacanuucujanaa pa Jiyaniijia”.¹⁶ Cuno sesa niishitiojonuujaacari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiiisanota. Nojoriiri tama na cuaqueya panishanojuaja miiquiaa. Puera pocujaca qiyajariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano njajaniya.¹⁸ Nojoricuajaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojecajuahuaj. Nojoriiri sesa miiniutianiya tama nojori cuaqueyajaaja nojori shuquiritiniuria”.¹⁹ Naa cuno pueya miiniucuatej, nojoriiri Pueyaso muerasu jiuujia niyaquejotequiaa maja rupetoosano nojori quiniuria. Nojoriiri saaja tama sesa nojori niishishano miiquiaajacujua, Pueyaso Sohuanuuju nojori quishacari.

²⁰ Cua panishano Pueyaso muerasunaa, Jesucristo rupaacia nia tiuuri jiyanhua socua, seetanujanaa na pueya nia quiniuria maninia. Pueyaso nia secojore Pueyaso Sohuanu cumacata.²¹ Naacuajitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuaara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyaari maninia jiyanoojia na quiniucua.

²² Canapute pa Jiyaniijiaacuaji taacanuyajani, nojori nia niishitiojore jacaria, seetanujanaa nojori tiuniuria maninia pa Jiyaniijiaacua.²³ Tamasaca nia piriyojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanhua sesa miijiaca. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaaja jiyanhua nia cojuare niaa

mariqui sesa miitishaarejaariuhuj nia cojishacari nojori. Jiyano pueyacua nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanhua na timitianutaniyani.

²⁵ ¡Jiyanhua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusunuucua pocuara. ¡Jiyanhua shanohua na cumaaca! ¡Nojuajaari Jiyaniijajanaa! ¡Jiyanhua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyoyua, nojuajaari quijajuhanajaj. Naa quiyajaari. Naa quiniutianiya pueyaracaanuuri. Taaquiriirinij, naacuaaquinatejaj.

JESUCRISTO NIQUITISHANO JUAN

Jesucristo niquitishano pajaniyara

¹Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ²Janiyari puetunu na niquitishanojuanaa caminiuujia nijaniya seetanujuanaani. Niocuajaari seetanujuanaa Pueyaso rupaa, Jesucristojiniji cua caminiujiushano niaara.

³Shuquiriaatia quijiaca cutaraari noo pojori, canapuate nio cua caminiujiushano Pueyasinjinini serojonutaniya Pueyaso pueya maapue niquiarani. Na tojtiajacaari shuquiriaatia quijiaca quiniutianiyajuhua, nojori tiuuniucua nio naajiojina cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapueecuara

⁴Janiyari Juanni. Asia jiyajinia quinia siete Pueyaso pueya maapueecuara naajianijia. Pueyaso cuara cumaquiiria nijaniya, cuara nioojia cajitiirajuhua. Pocua niriqiano pa Que Pueyasoori jianohua maninia. Nojuajaari pueyaracaanu quijiacuaja. Quiaritia quiyajariuhua. Na Sohuanuuri juhua siete saminio casaa niquishano, puetunu tiquiyocuajanaa quijia na quiniuucua. Nojoriiri Pueyaso cajishaqui tajoji qutiuya. ⁵Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupaa-janaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucujanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. ⁶Nojuajaari pa jiyatequiaari jiyaniijianucua pa quiniuria, na Que Pueyaso secojona pa quiniuria pueyacuara, nojuaja pa shuquiritianurajuhua. ¡Pa Jiyaniijiaari jianohua maninia! ¡Pa Jiyaniijia cuara shuquiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiriitej.

⁷¡Nia maure! ¡Pa Jiyaniijia Cristoori cohuajajinia tari cunocojiuhua! Puetunu pueyajanaari na niquiniutianiya, noo pojorijuhua, na motenaatej. Puetunu mijiria quijiaca pueyapejajanaari nocuaji nujuquenutaniya nojori martentata. Taaquiririnij. Naa quiniutianiyacuaaquinateja na tiuquishacariuhua.

⁸Pa Jiyaniijia Pueyasoori tama nojuajiniijiaaja sequeya:

“Janiyacuajaari puetunu casaajanaa coteetanani, na shaajariquianojuhua. Puetunu cumaacaracajanaanijia. Janiyacuajaari pueyaracaanu quijiani. Majaari cua supueni quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumaacajinia quiyano

⁹Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniucujuhua, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucua jiyatesocoriquianoni. Cunora, paari juhuajaniya naquiya miini rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰Tamonu juuca, pa Jiyaniijia samiitianuhua pa niishini juucani, Pueyaso Sohuanuuri cucua niqianu jianohua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. ¹¹Cua sequeriquiaari:

—Casaa cua niquitiniutianiya quiajaniani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecuara. Nojoriiri Éfeso tiacajinia quinia, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹²Janiyari cua nijiniara tacatequeeni cua niquniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijiosano. ¹³Cuno samari nujuatacojua tajiniani, janiyari pueyano niquiriini, juhua Pueyaso Niyanu niquishano. Tucuaque toque cushiriqiaari. Na niohuacaacuma puecariqiaari. Na jiriqiajinia camarucuteriquiaa orojiniji shipinishano casaari. ¹⁴Pueyaracaanu quijia na quiniucua, na muecacaari tojetaarucujanaa jiyanojua cohuaja quiriqiaa juhua sohuuanatuu. Maatia pueya jiuujia niquijia na quiniucua, na namijiaari juhua mani rimianacuriqiaa. ¹⁵Na niohuacaari nenecuariqiaa juhua jiyanojua naseeca casaajinia mohuaquishano bronce. Naa shacantuua niquishano quiriqiaari puetunu sesa casaajanaa paracaajia na quiniucua. Cumaacaraca Jiyaniijia na quiniucua, na pocuasacari, jiyanojua tojishaariqiaari juhua sararojua, jiyocuaaanuji mohuaca tijia. ¹⁶Na miaquetajata siete riya muetujuriqiaari. Naajuhuj, nijiniaquetucujaja mueruuri na rupaamaji mueranacuriqiaa, na rupaa ruuretajaca na puecoonura. Na jiquiooori jiyanojua shacantuua quiriqiaa juhua jiyanojua pananu jasacari panacari.

¹⁷Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetajaja niaree cucua. Cua sequeereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuaj. ¹⁸Janiyari pueyaracaanu quijiani. Macu quiqiaarinijia. Naajaa, janiyari samiitiaquiaarihuani pueyaracaanu saminio cua quiniuria. Janiyari macunucua quiquio riatataja camaruni. Naacujitij, janiyari cumaacaracani cua tojiyashijiaa cua quejooonura macunucua quiquiojinia. ¹⁹Pueya niishishocoriqiano, quia niquishano quia naajiotare Juanna, taa na quiyacuajani, naajuhuj taa mijiria quijiaa miishaanutianiya na nuhuajini. ²⁰Quiarijia quia pohuatareera maatia quia niishiniuria cua niqitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijiosano quia niquishanojanihuaj, cunoori siete cua saquiriojosano pueya maapue.

2

Éfeso tiacajinia quinia Pueyaso pueya maanuucua naajione

¹Juhucatecara naa cua sequeereeri:

—Éfeso tiacajinia quijia cua seruucua quia naajiore, Pueyaso pueya maanu jitianani. Naa quia sequeere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: ²Janiyari puetunu quia miishanojuanaa niishiyani. Quiaari jiyanojua poonijioquiaa quiria. Naajuhuj, quiaari puetunu casaajanaa rejeretaquiaa juhuajaniya. Janiyari niishiyajuhuj, majaari quia shanacunu quiqiaa sesa miijiaa nia tajinia. Naajuhuj, quiaari cuno sapojonuujuaca nequesoreecanu, noo pojori canapueete tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujuaca seetanujuanaa. ³Quiaari puetunujuanaa taraatia quia miiniu rejeretaquiaa, cucua tiuujia quia quiniucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiqiaa. ⁴Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵Cunora, quia niishiri taa jiyanojua cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucuajani. Quiaa jaara quioojia tacatoyaquiri, janiyari quioocua niniutianiyani, Éfeso tiacajiniji cua patanura quia samaritiu nujuataja. ⁶Quiaari maninijuhuj, sacuaratia casa Nicolás niishitojosano tojijiaa miishano sojea quia quiniucua. Janiyari cuno pojori miishano soyajuhuj. Nio cua sequesano quiajaniyani, cunoori puetunu cua pueyarajanaa. ⁷Cante numaacarani, nojori cuara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante

puetunu sesa casaajanaa nujuataja cumaatiani, janiyari nojori jiyatenutaniya cuno naana-jiniji mioojuarani, pueyaracaanu rishijiaca nojori quiniuria' ”.

Esmirna tiacajinia quiniaa Pueyaso pueya maanuucuaa naajionee

⁸Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucuaa quia naajiore, Pueyaso pueya maanu jitianani. Naa quia sequere nojuaja: “Naa sequeyari cante puetunu casaajanaa coteete-nacuajani, na tucuatjano. Nojuacuajaari cusoquiaari, na nuhuaji samiitiaquiaarihuari. Janiyacuajaari nojuajani. ⁹ Janiyacuajaari niishiyani, quiaari naquiya miishaquiaa. Quiaari casamiijujuhuaj. Naajaa, quiaari jiyanoahua casamiriacuaja niya cua shuriucuan. Janiyari niishiyajuhuaj, cuno Judiocuacaari quia sesacaquiaa. Nojoriiriri tama sequequiaaacuaja nojoriniaari Pueyaso pueya cutara, Judiocuaca nojori quiniucua. Maja naatej. Nojori cutaraari Satanás pueya maanu. Satanásacuajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya nijanyajiniinoo nujuatejotenutaniya nujuatejojuajinia nia sanishaanura, niaate cucua tiuujiaca seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjia quia quiriquia pueyaracaanu, quiaa cuaara shaajeyerejaatijia. Quiaa jaara naa miiritij, janiyari quia jiyatenutaniya jiyanoahua shuquiriaatia quijia quia quiniuria pueyaracaanuni. Nio cua sequesano quiajaniyani, cunoori puetunu cua pueyarajanaa. ¹¹ Cante numaaracani, nojori cuaara tojjiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminiajina' ”.

Pérgamo tiacajinia quiniaa Pueyaso pueya maanuucuaa naajionee

¹²Jiyaniijia Jesucristoori socua cua sequeree:

—Pérgamo tiacajinia quijia cua seruucuaa quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucujaja mueruu jitianani naa sequeya: ¹³ Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaquiaari janyajiniji pohuatanu na tarinitiaaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucujaj. Puetunu naa quia miishanojuanaari jiyanoahua maninia. ¹⁴ Saniniujia, maja cutaraari nio cua maniniucuanu: tamasa niajanyajiniinooori maja na tarinitianu paniniu sesa na miijionu. Nojoriiri supuetana Balaam niishitiojosano tojjia quiyajaa. Balaamcuajaari Israel pueya paraca Balac niishitiojoquiaari na pueya cuaara shiniujuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juashiquiata shipini-jiosano casaacuara puecoosano quiquiaaricujani juhua Pueyasooacara. Naa sacuaatia nojori queranacujasacari nojori paraatatej, Israel pueyari cuniquijia cuno taatujuri numuetucujuquiaarijuhuaj. ¹⁵ Naajuhuj, majaari nio cua maniniucuanu: noojiaqueya nijanyajiniinooori maja na tarinitianu paniniu jiyanoahua sacuaatia casa Nicolás niishitiojosano. ¹⁶ Quiaari nareja niquiquiaa sacuaatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaatia miijia cua miaquejonura cua rupaamaji mueranacujaja mueruuta. ¹⁷ Cante numaaracani, nojori cuaara tojjiria Pueyaso Sohuanu sequesano Pueyaso pueya maapuera. Cante tama na cuaqueya miini panishanojuajaja rejetejani, janiyari na mianuutenutaniya jiyocuaanu cua racatasano cua pueyarano cua riuriotacajinijini. Janiyari na niqutionutaniya cohua-jajau saatajjuhuaj, teyanooaca quiarinio sesa naajiotasano quiniutianiacujani. Majaari tamonu niishini quiniutianiya cuno sesa. Saaja na camaruuri na niishiniutianiya, cana cua niqutionutaniya cuno saajiacujani' ”.

Tiyatira tiacajinia quiniaa Pueyaso pueya maanuucuaa naajionee

¹⁸Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaru quia naajiore, Pueyaso pueya maanu jii-tianani. Naa quia sequere nojuaja: “Pueyaso Niyanu, juhua mani rimianacuyano nami-jiaaracani, juhua bronco mohuaquishano shacantuuca nohuacaracajuhuj, nojuajaari naa quia sequeya: ¹⁹ ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasooqua tiuuja. Quiaari maninia poonijiona Pueyasora, pueya quia naacunura. Naajuhuj, quiaari juhujaniya rejeretaquiaa quiaa jaara taraatia miishaariquia. Janiyari niishiyajuhuj, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaa quishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiniya pueyara. Quiaari juhujaniya na shanacuaquiaa saaja, sacuraatia na niishitiojosanota na sapojonura cua pueya. Naa sacuraatia na niishitiojosanotatej, cuno maajiiri cua pueya shiniujuquiaa juhujaniya nojori numuetucunura na camishoo maajipohua. Cua pueya shiniujuquiaa jaariuhuj nojori miaquenuunura noo shu, teyanote juaashiquiacata shipinijosano taucuaca pueyasohuacuara puecoosano quiquiaacuajani. ²¹ Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuj, na numuetucunuujuaca jaara noojia tacatoyaquiri sesa nojori miiniujini, janiyari jiyanhua naquiya miiniutianiya nojorini. ²³ Noo maajipohujuhuj, paanaturirria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa pueconutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajinianaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiacua nijaniyajinijinio maninia miiniutianiyani. Nijaniyajinijinio sesa miijiacua saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya nijaniyajinijinio saniniuujia, niaari sacuraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuraatia casaa jiyasohuaja niishishano, sacuraatia miijiacua jiyaniquis-hanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia nijaniya. ²⁵ Saaja tama nia cuaqueyajaaja nia cojure jiyanhua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuaara shaajeyereaatijia, janiyari cuno pueyano jiyatenutaniya tamasaca pueyapue jiyaniija na quiniuriani, taa cua Que jiyatequiaari janiya jiyaniija cua quiniuriacuaani. ²⁷ Jiyaniijanucuaru cua jiyatesano pueyani, nojoriiri cumaacaraca quiniutianiya na jiiitiasano pueya na tojitiniuria nojuaja. Na tojitiaashijiacua na saniitiosacari saniniuujia, nojori pyonutaniya jacanuraari, juhua cumamacata pishano conatu. ²⁸ Naajuhuj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuj. ²⁹ Cante numaacarani, nojuaja cuaara tojiiria Pueyaso Sohanu sequesano puetunu Pueyaso pueya maapuerajanaa’”.

3

Sardis tiacajinia quiniaa Pueyaso pueya maanuucuaru naajione

¹Jiyaniija Jesucristoori socua cua sequeree:

—Sardis tiacajinia quijia cua seruucuaru quia naajiorejuhuj, Pueyaso pueya maanu jii-tianani. Naa quia sequere nojuaja: “Naa sequeyari cante Pueyaso Sohanu jiyaramiquiaa cuno siete Pueyaso pueya maapuecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jii-tianaa Jii-tianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² Quia maquenu quia jatare! ¡Suteja quia quir! Quia cumaquiri noo pojori canapue te jatarinitiaja rishiya-jaani. Quera cusonyari. Janiyari Pueyasora quia miishano niquiquiaani. Majaari maninia

na quiniu cua Pueyasora. ³ Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricuajani, cuno quia niishiriohua. Quioojia quia tacatorohua Pueyasocua, seetanujanaa na rupaa tojjia quia quiniuria. Quiaa jaara suteja quiniu paniaquiri, janiyari canashyaquiji quiocua niniutianiya juhua nohuasejojuani, quia jiyanihacari maja naasucua juhuanajuaja cua tiuquiniu quiniutianihua. ⁴ Quia jiitiasano pueyajiniinio cuniqui Sardis tiacajiniani, secaja nojorijinijinoori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiaquishano janiyara. Naaratej, janiyari nojori cushiyotenutaniya cohuajaqueya toqueni, cuata nojori rucuanenonura, cua rupuenaa nojori quiniuucua. Cunoori seetanujanaa sesa miiniu ruuretajaca nojori quiniuucua, cucua tiuujiaca nojori quishacari. ⁵ Canapuate naa sesa miiniu ruuretajacani cua tojjitajaca nojori quiniuucua, nojoriiri naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuani, na seya tacojirianio, cua sequenura nojoriiri cua timitiasano pueyaniojua. ⁶ Cunora, cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

Filadelfia tiacajinia quiniaa Pueyaso pueya maanuucua naajione

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojjia cua quiniuucua. Puetunu cua sequesanojuanaa seetanujanaa. Jiyaniijajanaa cua quiniuucua cua supuetana David niti, janiyari cua Que tiotiu riatataja jitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuj, janiyacuaajaari juhua tiotiu riarucuaa quiocuajini, cua rupaa quia poojotanura. Naacuajitij, tamasacaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojjiacuaja. Naajuhuj, majaari cua soojeaca pueya niquiara quia tamacanu quiquianu janiya. ⁹ Naa maninia quia miiniuucua janiyaracuatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujiniinio mojoquetanijionutaniya quiocuarani. Cuno nojoriiri tama na cuaqueyajaaja sequeja, nojoriniaari seetanujanaa Pueyaso pueya, Judiocuaca nojori quiniuucua. Naa nojori sequesaciritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuuja quia quiniuucua. ¹⁰ Janiyari quia sequequiarini maja quia tarinitianura quiria poonijionu, quiaa jaara naquiya miishaariquia. Quiaari seetanujanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuaajaari jiyacari nia cojuanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojjinu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niqutionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojjia na quiniuucua, janiyari jiyocuaacaanu Pueyaso Secojojua tiajinia na nujuatenutaniya juhua morijiumi Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiasano quiniutianiya. Naajuhuj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuaacaanuji roshiniti-asaariquiano. ¹³ Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucua naajione

¹⁴ Jiyaniijia Jesucristoori socua naa cua sequeree:

—Laodicea tiacajinia quijia cua seruucuaa quia naajiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Naa sequeyari noo pueyano cana sequesante seetanu rupaajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuaajari janiya. Cunora, cua tojiri. ¹⁵ ‘Janiyari puetunu quia miishanojuanaa niishiyani. Quiaari najuhuana quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojjia quiriquia, janiya maara quia timitiaren. Saniniuujia, najuhuana cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitoyani. ¹⁷ Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jiitiaani maninia mijia cua quiniuucua’. Maja cutaraari quia niishiniu quioojaari cusosu. Janiyara, quiaari tojetaarucuaajanaa casamijiu, cariyojuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhuaaj, maninia mijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuaaj, cua niishitaja quia masere cutara, quiooja namijia riatenura, seetanujuanaa maninia niqijia quia quiniuria. ¹⁹ Janiyari puetunu cua panishano pueyajanaa nacasujani, nojori saniitiojuajuhuaaj. Cunora, quiooja quia tacatore cucua. Tama quioojaajaaja quia shiniujurijuhuaaj shamaatia cua tojjia quia quiniuria. ²⁰ Cua tojiri. Janiyari quiooja tiotuijiniji jiquionuujiyani. Cante cua tojiyani, nojuaja cuaara na tiotiu riataara cucuaji. Janiyacu nocua tiuquiumiani, nata cua miaquenura, shuquiriaatia cua pocoojonura nata. ²¹ Janiyari cua Paraca shocotaquiarini cua Que tojjia quia quiniuucua. Naaratej, cua Queeri cua cajitiquiaari na shuriucua, Jiyaniijajanaa cajituijinia. Naajuhuaaj, janiyari Sesaaca shocotajaca cajitijionutaniya cua shuriucua, jiyaniijianucua nojori quiniurijuhuaaj. ²² Cante numaaracani, nojuaja cuaara tojiiria Pueyaso Sohanu sequesano Pueyaso pueya maapuera”.

4

Juan niquishacari Jiyocuaaanu Quijiaari maniniuhuaqueetasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tiotiu niqiquiaari riatasanoni. Shushajanaa cua tojishano rupaa juhua trompeta jonenenuni, cuno rupaajaari cua pacutequiaariuhua sequenu. Naa cua sequereeri:

—Miji quia tacama. Janiyari quia niqitiniutianiyani taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohanuuri cucua niqiaari. Cua sohanu tacaniquiaari jiyocuaaanuuri. Janiyari jiyacari Jiyaniijajanaa cajitiu niqiriini. Pueyanoori tii cajiriquiaa. ³ Nojuajaari shanohua niquishano quiriquiaa, jiyanoehua shacantuuca juhua jaspe saajia, jiyanoehua naatucajuhuaj, juhua cornalina saajia. Naashiiri na cajitiu caco nujuariquiaa. Jiyanoehua shacantuuca quiriquiaari neeruua, pocojuanaque juhua esmeralda saajia. ⁴ Janiyari socua veinticuatro cajitiuca niqirii Jiyaniijajanaa cajitiu shocyani. Tii cajitiriqiaari veinticuatro niishijaca jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. ⁵ Jiyaniijajanaa cajituijiniji, miacanaari nunujuriquiaa. Jiyanoehua majacuriquiaajaariuhuaaj. Jiyaniijajanaa cajitiu tacoji, tii noshiquioriquiaari siete samari. Cunocuaajari siete Pueyaso Sohanu, puetunu tiquiyocuaajanaa quijia na quiniuucua. ⁶ Jiyaniijajanaa cajitiu tacoji, juhua jiyanoehua puereetuaa caminiaari quiriquiaajuhuaaj, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuaaj, puetunu na shocuaajanaa. Nojoriiri jiyanoehua queraatia namijiaaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminiucua casaari tamaatia niquishano quiriquiaa

tamonujiniji. Niquiriyatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonu casaa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacamajanaa quiriquiaari na namijiaa, nocuaji na niquitija, na nijiniara na niquitajanio. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijiajanaanaa, quiaari saa maninija, jyanohua maninia, tojetaarucujanaa maninia mijia! Quiaacujaaari Pueyaso, puetunu cumaacaracajanaa. Quiaari quijiajuhuanajaj. Majaari quia supueno quiquiaari. Quiaari quia pueyacia tacateriquianohua.

⁹Cuno cuatro saminio casaari naa pueyaracaanu maniniuhuaqueetariquiaa Jiyaniijiajanaa, na cajitujinia cajiyano, pueyaracaanu Jiyaniijiajanaa quiriquiano na quiniucua.

¹⁰Naa pueyaracaanu cuno cuatro saminio casaa timitiasacari Jiyaniijiajanaacuaatej, cuno veinticuatro niishijica jiyaniijianucuaari jaarajaaja mojuquetacoqueequiaa Jiyaniijiajanaacuara. Nojoriiri na tuhuajaa jartaqueequiaa Jiyaniijiajanaa cajituu pajama, naa na sequenuta:

¹¹—Nioori quiara, Jiyaniijianaa. Quiaa cutaraari Jiyaniijiajanaa, maja canaa. Quiaacujaaari canaa Pueyaso. Quiaa cuara timitiasaaria pueyaracaanu, jyanohua maninia shacantuuca quijia quia quiniucua, puetunu cumaacaracajanaa quia quiniucujahuaj. Quiaacujaaari puetunu casaajanaa shipiniquiaari. Tama quia paniniucujaja, quiaari na shipiniquiaari.

5

Rupanacujusano naajioneejiniji pahuatasano, Borrego Niquiojuajinjinio

¹Na nuhuaji, janyari Jiyaniijiajanaa cajitujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri juuniososano quiriquiaa. Naajioori nocua quiriquiaa, na nijinia, na jiniacumanio. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ²Jiyacaritij, janyari jyanohua cumaacaraca Pueyaso seru niquiriini. Naa nequesoreeriquiaari jyanohua na nacanuta:

—¿Cante seetanujanaa maninia mijia cutarani? Cuno cuara rupartaara rupanacutasano, na riatanura cuno naajionee.

³Jiyacaritij, majaari quenaaja maninia mijia quiniu quiquiaari jiyocuaaanu, jiyajinia, jiya cariquimianio na riatanura cuno juuniososano naajionee. Tojetaarucujanaa shaaqui quiquiaari cuno naajionee serojoriquiano. ⁴Naaratej, janyari jyanohua nujuqueriquiaani, tojetaarucujanaa shaaqui maninia mijia quiaquiniucua cuno naajio na riatanura, na serojonuranio. ⁵Cua nujuquesacari, tamonu cuno veinticuatro niishijica jiyaniijianucujajinijioori cua sequere:

—Maja nujuquenu. Quia cumantare. Quia niquiri. Pa Jiyaniijiajanaacujaaari jyanohua cumaacaraca. Tariucuaaanu Pueyaso Rupaajinia, nojuacujaaari miriqui sequeshiya Juurunu sareta, Judá niquiohuacujajinio supueriquiano, Jiyaniijiajanaa na quiniuria na supuetana David niti. Nojuacujaaari pa paraca Satanás shocotana, tojetaarucujanaa Jiyaniijia Pueyaso tojjia na quiniucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶Jiyacaritij, janyari Borrego Niquiojua niquiriini Jiyaniijiajanaa cajituu taccoji nujuano, cuno cuatro saminio casaa taminiano. Cuno veinticuatro niishijica jiyaniijianucuaari na shocua quiriquiaajuhuj. Borrego Niquiojuaari seetanujanaa juhua mosano samitanohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniucua. Naajuhuj, siete namijaaraca quiriquiaari. Cuno na siete namijiaani, cunocujaaari Pueyaso Sohanu, Pueyaso jiyaramiquishano puetunu mijirijanaa. ⁷Cua niquishacari, Borrego Niquiojuaari Jiyaniijiajanaa cajitujinia cajiyano juaashiquiajiniji juuniososano naajionee masetaree. ⁸Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijica jiyaniijianucuanio. Puetunu nojorijianaari taquiniojosano casaa

jiitariquiaa. Naajuhua, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajaniyari seetanujuanaa maninia miiija. Naaratej, quia naata cuno naajioneepatanu quia rupareetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaajuhua, puetunu jiyacajinijiniojuanaanio. ¹⁰Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhua.

¹¹Na nuhuaji janiyari tojetaarucujanaa jiyanoehua queraatia Pueyaso seya niquiriini. Jiyaniijajanaa cajituu shocua mariquiaari, cuno cuatro saminio casa shocua-juhua, niishijiaa jiyaniijianucua shocuanio. Nojoriiri jiyanoehua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetaanoni. ¹²Nojoriiri naa na sequeturiquiaa na nacanuta:

—Pa Jiyaniijiaari jiyanoehua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quiijiaa casaajanaa cuaara tojtiaara pa Jiyaniijia. Saaja nojuaja cuaara quiiria jiyanoehua timitiasano. Puetunu quiijacajanaa cuaara na maniniuhuaqueetaara.

¹³Naajuhua, janiyari puetunu Pueyaso shipinishano saminio casaajanaa tojiriini, jiyocuaaanu quiijiaa, jiyajinia quiijiaa, jiya cariquimia quiijiacajuhua, shoniniacu caminiajina quiijacanio. Puetunu nojorijianaari jiyanoehua na timiniutia sequeturiquiaa:

—¡Cuno, na shacantuca cumaacajinia cajiyani, Borrego Niquiojuanio, nojori cuaara maniniuhuaqueetasaaia pueyaracaanu! ¡Puetunu casaajanaa cuaara tojtiaara nojori pueyaracaanu! ¡Nojori cuaara timitiasaariajuhua! ¡Saa nojorijia cuaara na cumaaca jiitiaara pueyaracaanura!

¹⁴Jiyacaritij, cuno cuatro saminio casaari nojori riuhaneriquiaa saniniuujia:

—¡Taaquiririnij! ¡Cuaara naa quiiriatej!

Cuno veinticuatro niishijiaa jiyaniijianucuaari saniniuujia mojuquetacoqueecujua cuno pueyaracaanu Quiijiacacuara, nojori na shuquiritianura.

6

Jiuniosocoo naajioneecua seis rupanacujutasano rupareetasacari

¹Na nuhuaji, cua shootiasacari, Borrego Niquiojuuari coteenujuanaa cuno naajioneejinia rupanacutasano rupartaree. Naa miiriiri cua niqitishaanura taa mijiria quiniaa miishaanutaniya jiyanoehua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “¡Miji!”. Na pocuanuuri juhua miacana majanu tojishano quiriquiaa. ²Naa na sequesacaritij, janiyari cohua-johuana caballo niquirii nocua canujianoni. Na nijinia cajiniaari balista cacariquiaa. Jiyacaritij, jiyaniijiaa shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³Na nuhuaji, Borrego Niquiojuuari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “¡Miji!” ⁴Naa na sequesacaritij, naatuhua caballoori nocua canujumaa. Na nijinia cajiniaari cumaaca niqitiosaare. Naacuajitij, nojuajaari mijiria quiijiaa tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucujua mueruu niqitiosaare.

⁵Na nuhuaji, Borrego Niquiojuaari tercero rupanacutasano rupartaree. Janyari jiyacari tercero cuno saminio casaajinijinio tojirii sequeyanoni: “¡Miji!” Jiyacaritij, janyari mueruhuaana caballo niquirii nocua canujyanoni. Na nijinia cajiniaari niiquia shanacujata jaasutetariquiaa, mijiria quiniaara miajajau shanacujusaanura nojori serotasaanura. ⁶Jiyacaritij, janyari cuno cuatro saminio casaa tajiniji rupaa tojirii naa sequeyanoni:

—Niquiryatu juuca poonijionu sami, cuaara niquitiosaaria saaja niquiryatu kilo trigo jajau. Jaara trigo jajau paniyaquiri, cuaara niquitiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocujaaari queraatia quiniutianiya cutara.

⁷Na nuhuaji, Borrego Niquiojuaari cuarto rupanacutasano rupartaree. Jiyacaritij, janyari cuarto saminio casaa tojirii naa sequeyanoni: “¡Miji!” ⁸Janyari jiyacari tiriuhuaana caballo niquirii nocua canujyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitasocoriquiano. Nojoriiri cumaaca niquitiosaaree jiyanhua queraatia pueya na cusojuanura. Naacuajitij, jiyanhua queraatia pueyari puecoosaanutaniya miaquetoosacari. Tamasacaari cusonuunutaniya jiyanhua miaajesacari. Tamasacaari paaqueja cusonu cusonuunutaniya. Naajuhuaaj, tamasaacari sareya sootesaanutaniya. Sacocua satejosaanutaniyajaariuhuaaj. Naacuajitij, jiyanhua jiyanhua queraatia pueyari cusojusaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaa pueya cajiniocujajini-jiujojanaa.

⁹Na nuhuaji, Borrego Niquiojuaari quinto rupanacutasano rupartaree. Jiyacaritij, janyari Pueyasoocuaa catijiasaqui juhuacutu cariquiaco niquirii Pueyaso pueya sohuanuhuaani, noo pojori canapute puecoosaaquiaricujani Pueyaso Rupaa tojijiaa nojori quiniucua, Jesucristojiniji nojori pohuatanuucujuhuaaj. ¹⁰Jiyacaritij, nojoriiri naa jiyanhua nacaree:

—¡Jiyaniijianaa! ¡Quiaari saa maninijia! Quiaari quia sequesano miijia seetanujanaa. ¿Taa quia tarishiniutianiyaara canaa puecoonaa quia nequesoreenurani, nojori quia naminiuria canaacua saniniuujia?

¹¹Jiyacaritij, puetunu nojorijianaari cohujaque toqueya niquitiojosaaree. Nojoriiri naa sequesaree:

—Socua rupaquijia nia samaaterejaara, Pueyaso saquirojosano niarta Pueyaso pueyaji-
niniujinio cuaara puecoosaaria nia shirijaaatijia, taa nia puecoosaaquiaricuaani.

¹²Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuquiujiutiaree jiyanhua. Janyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. ¹³Riyari jiya cajiniocujaji totere jiyocua, taa satuna totequiaa jiyanhua paratucaricuaani. ¹⁴Jiya cajiniocuaari shaajeequiejuhuaaj, juhua tucuanee naajioneeri jiuicosaaree. Shoniniacu caminiajinia, puetunu jiya tucuaatijajanaa, puetunu tuhananuhujuhuaaj, puetunu cunojuanaari jiyajeetaquee na nujuatusaqui. ¹⁵Nojori puerenuta, mijiria jiyaniijianucuaari raacajinia jamaatiushii, sai tajinia tuhananuhujajiniuhuaaj. Naa jamaatiushijiaariuhua noo pojori: pueyacua paaretajaca na cumaacatej, soldaduhua jiyaniijianucua, jiyanhua casamiriaca pueya, pueya tojishano pueya, poonitijosano pueyajuhuaaj, puetunu narta pueyajanaanio. Puetunu pueyajanaari naa mashiriquiaa juucua. ¹⁶Nojoriiri tuhananuhua sequeriquiaa, sainio:

—¡Canaacua nia tiyare canaa nia jamonura cunocujaji, na cajitujinia cajiya na shacantuuca cumaacajiniani! ¡Canaa nia jamojore maja na niquiara canaa quiniuria, naajuhuaaj, maja Borrego Niquiojua saniitionura canaa, jiyanhua na juaashacari! ¹⁷Quarijiaacujajari Pueyaso saniitionu juuca. Jiyanhua puereeta. ¿Cante na naata na nujuatanuni? Shaquii.

7

Pueyaso saquirojosano pueyajiniji pohuatasano, Israel niquiohuacujainio supueno pueyajinijinio

¹Naa cua niqiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaqiji paratu tenujuriquiaa maja na piyarojonura jiya, shoniniacu caminia, nacuhuanio. ²Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapuate cumaacaraca quiriquiaacuajani nojori sesonura jiya, shoniniacu caminianio. Naa nojori sequereeri:

³—¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niojiyacuquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiuhuacuajinio supueno pueyapuejinijinioori ciento cuarenta y cuatro mil pueya jirioosaaree. ⁵Naacuajitij, supuetana Judá niquiuhuacuajinio supueno pueyajinijinioni, doce mil pueyari jirioosaaree. Supuetana Rubén niquiuhuacuajinio supueno pueyajinijinio, doce miljuhuaj. ⁶Supuetana Gad niquiuhuacuajinio supueno pueyajinijinio, doce miljuhuaj. ⁷Supuetana Aser niquiuhuacuajinio supueno pueyajinijinio, doce miljuhuaj. ⁸Supuetana Neftalí niquiuhuacuajinio supueno pueyajinijinio, doce miljuhuaj. ⁹Supuetana Manasés niquiuhuacuajinio supueno pueyajinijinio, doce miljuhuaj. ¹⁰Supuetana Simeón niquiuhuacuajinio supueno pueyajinijinio, doce miljuhuaj. ¹¹Supuetana Leví niquiuhuacuajinio supueno pueyajinijinio, doce miljuhuaj. ¹²Supuetana Isacar niquiuhuacuajinio supueno pueyajinijinio, doce miljuhuaj. ¹³Supuetana Zabulón niquiuhuacuajinio supueno pueyajinijinio, doce miljuhuaj. ¹⁴Supuetana José niquiuhuacuajinio supueno pueyajinijinio, doce miljuhuaj. ¹⁵Supuetana Benjamín niquiuhuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹Naa cua niqitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiqiyocua jiyacajinijiniojuanaa pueya quiriquiaa, puetunu tamaatiucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiqiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuca cajitiu tajoji nujuaturiquiaa, Borrego Niquiujua tajojino. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriquiaa. ¹⁰Puetunu nojorijianaari naa mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuca cajituijina cajiyani, Borrego Niquiouajuahuaj. Nojoricujaari pa jiyanoocuaari, tojetaarucujanaa quiariniora jatanishano pa quiniuria!

¹¹Naajuhua, puetunu Pueyaso seyajanaa, canapuate shacantuca cajitiu shocua nujuaturiquiaacuajani, niishijaca jiyaniijianucua shocujahuaj, cuno cuatro saminio casaa shocuanio, nojoriiri Pueyasoocura jacamaturee nojori timitianura nojuaja. ¹²Pueyaso na timitiatusacari, naa sequetureeri:

—¡Taaquiriririnj, seetanujuanaacuaj! ¡Canaari pueyaracaanu quia maninihuaqueetanutaniyani! ¡Quiaacuajari canaa timitiasano! ¡Saaja quiajanianari seetanujuanaa niishijia cutara! ¡Paacarasho, canaa Pueyasonaa! ¡Quiaa cuara tojishaaria pueyaracaanu! ¡Quiaari canaa Jiyaniijijanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuaara naa quiriia pueyaracaanu, pueyaracaanutej!

¹³Jiyacaritij, tamonu cuno veinticuatro niishijaca jiyaniijianucujinijinioori cua nequetosaree:

—¿Canapuate cuno pojorini, cohuajaque toqueyaracani? ¿Tejenote nojorini?

¹⁴Janiyari na riucaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuaajaari jiyajinijinio pueya. Jiyajinia nojori quishacarijia, nojoriiri cuno jiyanohua naquiya miishacari rejeretajaca quiquiaari. Nojori tiuuniuucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequeojuiaari Borrego Niquiojua nanacajinia. Naacuaajitij, nojoriiri cohuajaqueya toqueya cushiyonuya.¹⁵ Naa Pueyaso jiyanooshano pueya nojori quiniuucatej, nojoriiri Pueyaso cajishaqui tacoji quijiaca. Nojoriiri pueyaracaanu tii Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teutenutaniya nojori caco, jatiqii na quiniuria nojoritia pueyaracaanu.¹⁶ Naacuaajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuj, majaari socua nasaatia pananu jartanu nojori niishiniu quiniutianiya.¹⁷ Borrego Niquiojuacuajani, Jiyaniijajanaa cajitii jiuujajinia cajijiani, nojuajanaari nojori jitianutaniya juhua tama na borregohuajaaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijajiniji.

8

Séptimo rupanacutasanojiniji pohuatasano, shanohua jaanutaja patajajinijinio

¹Borrego Niquiojua jaara séptimo rupanacutasano rupartaree, cuno naajionee saacatanura puetunujuanaa, tojetaarucujanaa sanaacara quiqiiiri jiyocuacaanu pueyaracaanura. Maja cua niishiniu, media horaruhua.² Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niqutiojosaaree.³ Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniji shipinishano Pueyasocuara catijiaja casaa tacoji nujuaseeri, Jiyaniijajanaa cajitii tacoji. Queraatia shanohua jaanutaja niqutiosaareeri Pueyasocuara na catijianura. Jaanutajaari catijiasaariquiano puetunu Pueyaso pueya secjonuusanotajanaa, Pueyasocuara na jaanujunura cuno catijiaja casaajiniji.⁴ Naacuaajitij, Pueyaso seruuri Pueyaso pueya secijosano tacanirii Pueyasocuara, shanohua jaanujua najacata.⁵ Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiyata. Jiyanohua na majiriataree nio jiyacuara. Miacanaari ritia nunujuquee. Jiyanohua majacureeri. Jiyanohua cojuatunereeri. Rijiaari jiuquiujuutiareejuhuaj.

Trompetaa jonenejosacari

⁶Cuno siete Pueyaso seya, trompetaa cacariquiaani, nojoriiri jeeceanecoree na trompetaa na jonenenura.⁷ Jiyacaritij, niquiriyatu cuno Pueyaso serujinijinoori na trompeta jonenenu coteeree. Jiyacaritij, miacanajaa shiniituijiaacaari, mariyata mani cojishishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatano.

⁸Segundo Pueyaso seruuri na trompeta joneneree. Jiyacaritij, casaa juhua puereetuuca tuhuananu noshiyanoori shoniniacu caminiajinia jataasaaree. Quera shoniniacu caminia cajiniocuaari nanacara quiqii.⁹ Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhuj, shoniniacu caminiajinia ruhuanetasano puereetuuca buqueyajinijinoori, quera puetunu na cajiniocujanaa sesosaaree.

¹⁰Tercero Pueyaso seruuri na trompeta joneneree. Jiyacaritij, puereetuuca rijiaari jiyocuacaanuji tiqii, jiyanohua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaj.¹¹ Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquira quiqii. Pueya ratusacari cuno mohuaca, queraatia pueyari saaja cusonuuree.

¹²Cuarto Pueyaso seruuri na trompeta joneneree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiqii. Quera na cajiniocuaari ninishiqui

quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocujuhuj.

¹³ Na nuhuaji, janiyari juhua puereetuca surohua miooru niquirii jiya cajiniocuanii. Na jaasacari naa nacariquiaa jiyanoahuari:

— ¡Puereeta, puereeta, puereeta! Seetanujuanaa jiyanohua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenere, canapueete joneneyaquiyajaa juhuanouajacujani.

9

Quinto trompeta jonesacari

¹ Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuaanuji jiyocua tinio rijia niquiriini. Cuno rijiaari tootiu riatataja niquitiosaaree, puequeetuujuu raa na riatanura. ² Na riatasacari, najacaari nojomaa juhua puereetuca cuhuariquia sesacari. Pananu namijia tiomaari. Jiya cajiniocuaari mueruucara quiqiiijihuhuj. ³ Sequeruuri cuno najacajiniji mueratuuma. Puetunu nio jiyacuajanaa paaqueemaari. Sequeruuri cumaaca niquitiosaaree nojuaraca na quiniuria juhua turucuaniiini.

⁴ Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapueete na jiniji jirioyaquishoo quiriquiaa Pueyaso sesatacujani. ⁵ Sequeruuri rootasaareejuhuj, maja nojori cusojanura pueya. Cinco raca cuaara nojori shocojora cutara, pueyaracaanu sequeru saashi noosacari. Cuno sequeru saashiiri juhua turucuaniiini saashi noonutaniya.

⁶ Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanohua na shaajenu panishacari juucua, nojoriiri saaja rishiniutianiya, jiyanohua naquiya nojori miishacari.

⁷ Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casaa jiiitariquiaa na nacajinia juhua jiyaniijianucua ora-jiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. ⁸ Nojoriiri juhua maaji muecacaraca quiriquiaa, tucamuejarujuri. Juhua juurunu sare quiacaraca quiriquiaajaariuhuj. ⁹ Nojori jiriqiaqueeri cumueeca quiriquiaa juhua turtuco. Nojori jaacuatasacari, na nesuhuari jiyanohua cojuatuneriquiaa juhua caballohua jayotasacari queraatia rucuanetaruhua, miaquetojonuucua na netecuatasacari. ¹⁰ Cuno sequeruuri juhua turucuaniiini nojuacaraca quiriquiaa. Jiyanohua noonacuracajuhuj. Jaara nojori saare, cunoori quiquiaari nojori na noonura cinco raca.

¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuujuu raa camarujaariuhuj. Hebreo rupaajinia, na sesaari “Abadón”. Griego rupaajinia saniniuuujia “Apolión”. Pueyano rupaajinia saniniuuujia, niiori sequeya “Pueya Puecoona”.

¹² Janiyari naa niqutishaareeni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquirii cureyajaa na nuhuajiria.

Sexto trompeta jonesacari

¹³ Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanhua jaanutaja catijiaja juhuacutu cuatro tuhuajaa tajiniji, Pueyaso tajoji nuuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

— Cuno cuatro Sesaaca seya quia saacarojore, puereetuca Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jiyanohua queraatia pueya nojori puecoonura, quera na cajiniocua puetunu mijiria quijiaca pueyajinijiniojuanaa. Cuno Sesaaca seyari tariucuaanu naa morojosano quiquiaari, jeenucuasano nojori quiniuria namitia jiyacari nojori cartesanura, cuno hora, cuno juuca, cuno racara, cuno

marijiara. ¹⁶Janiyari tojiriini cuno cuatro Sesaaca seya soldadohuari, dosciento millones pueya quiriquiaa saa caballohuaracaja.

¹⁷Janiyari cuno caballohua niquitishaaree juhua cua maquenujiniani, na nijinia cajituniaanio. Jiyanoehua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucuaaji nojori cushiyosano turtuconi, cunoori puereeta niquishano quiriquiaa; naatuca juhua mani, nentuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸Cuno jiuujianaraca puereeta casaata quera na cajiniocua puetunu pueyajinijinojuanaari cusojuusaaree. ¹⁹Naacujitij, caballohuari cumaaca jitiariquiaa na rupaama, na pitiujiniajuhuaj, nojori puecoonura pueya. Na pitiucuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

²⁰Cureeno pueya, canaputee maja na puecoosaanu quiri cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secjonu tarinitiaaquiriquiaa. Naajuhuj, nojoriiri orojiniji shipinijosano casa shuqiri-tiariquiaa Pueyaso niti, platajiniji shipinishano, broncejiniji, saajiajinijijuhuj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquiniu. Majaari na tojinuu. Majaari na rucuanenujuhuaj. ²¹Naajuhuj, majaari pueya tarinitianu quiriquiaa narta pueya monu, shimiojonujuhuaj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaj. Nohuasejonu tarinitiatuuyaquiriquiaajaariuhuj.

10

Pueyaso seru mueetasano tucuanee naajioneeniyojuajiniji pohuatasano

¹Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuaaanuji roseyanoni. Cohuaja najacajinia cuhuajaatiariquiaari. Na nacacua camarucuteriquiaa naashiiri. Na jiquicoori jiyanoehua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuua na noshishacaritij. ²Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniurijia. ³Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—¡Maja pueya niishitini cuno siete miacana sequesano! ¡Maja na naajiotanu! Tama quioojiajiniajaaja quia racatare.

⁵Jiyacaritij, Pueyaso seru cua niquishano shoniniacu caminiaacua nujuaanoni, nio jiyacujuhuj, nojujaari na miaquetajara na juaashiquia shiitioree jiyocuaaanu, seetanujuanaa na sequenura. ⁶Naa sequereeri:

—Cuno, pueyaracaanu Quijiani, nojujaari jiya cajiniocua shipinini, jiya shipinini, shoniniacu caminia shipinijuhuj, puetunu tii quijiaa casaajanaa shipiniani. Nojujaari seetanujuanaa naa cua pohuataniya: “Majaari tari na tarishiniu quiniutianiya. ⁷Séptimo Pueyaso seru coteescari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujuunaa pueyacujani”.

⁸Cua tojishano rupaa jiyocuaaanuji pocuaanoni, socua cua pacuterohua naa sequenu-
uri:

—Pueyaso seruucua quia quiaare, cuno, shoniniacu caminiaacua nujuaanu, jiyacuanio. Nojuaja quia masetasee cuno riatasano naajioneeniyojua, na mueetaani.

⁹Janiyari Pueyaso seruucua quiaareeni. Janiyari na sequeeseeni na naajioneeniyojua na niquitionura janiya. Cua riuucareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniiniurijia. Cunoori, pueya na saniitiotaja rupaa na quiniucua.

¹⁰Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriqiaari juhua samiyatu. Cua miasacari, cua seecojinia jatasee piiquiaraari. ¹¹Jiyacaritij, janiyari naa sequesaaareeni:

—Quiocua Pueyaso sequesano caminiujiuriotia pohuatanu queraatia pueyapue niqiuara, queraatia tamaatia jiyacajinia quiniaa niqiuara, queraatia tamaatia rupaaca pocuajaca niqiuarajuhua, queraatia jiyaniijianucua niqiuaranio.

11

Caapiqui Pueyaso sequesano caminiujuninaa miishanojiniji pohuatasano

¹Na nuhuaji, janiyari tia shanacujutaja naajua niquitiosaaareeni, juhua nataca niquishano. Janiyari naa sequesaaareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojoua tia quia shanacujusee quia shanacujutajata, orojiniji shipinishano shanohua jaanutaja catijijajanio. Quia serojorejuhuaj puetunu Pueyaso secojonuujuacajanaa tii. ²Maja cutaraari quia shanacujunu Secojoua tia carijiniacuma. Cunocujaari taucuaa niquitiosaarucuaa tari. Pueyaso soojeaca taucuaaari Pueyaso saquirojosano na tiacarano jiitianutaniya pueyaracaanu, cuarenta y dos raza cuaara na shocojorejaatijia. ³Janiyari caapiqui cua saquirojosano pueya jiyaronutaniyani, janiyajiniji nojori pohuatanura pueya niqiuara. Nojoriiri janiyajiniji pohuatanutaniya cuaara shocojorejaatijia mil doscientos sesenta juuca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

⁴Cuno caapiqui janiyajiniji pohuataanaani, nojoriiri cuno caapiqui olivo naana, tariucuaaano Pueyaso Rupaajinia pohuatahiyacujani. Naajuhua, nojoriiri cuno caapiqui samari nujuatacojua, Jiyaniijijanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. ⁵Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapueete nojori miiniu pania sesa juucacuajani. ⁶Nojori, janiyajiniji pohuataanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhua nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari.

⁷Nojori jaara janiyajiniji pohuatanu tucuatere, jiyacaritij, puequeetuuju raamaji tohuatariquiano pueresano sacuaaraatia Casaani, cunoori nojori paracaaniutianiya. Nojori shocotanutaniyari. Naacuajitij, nojori puecoonutaniya socuaari. ⁸Nojori queteeri cuno puereetuca niishishano tiaca nuucujinia pojoconutaniya, tee nojori Jiyaniijia mosaaquiaari niyacutesanojinia teetesanoacuajani. Cuno tiacaari miriqui jiyaniquishiya Sodomata, Egiptotania. ⁹Naacuajitij, jiuujianaraca juuca, socua niquriyatu juuca cajiniucuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiqiyocua tiacajinijinio pueya, tamaatiuucua rupaaca pocuajaca pueyajuhua, queraatia tamonu jiyacajinijinio pueyanio. Nojori paraari maja na shanacunu quiniutianiya nojori jamojosaanura. ¹⁰Puetunu mijiria quiniaajanaari shuquiritiutianiya, macunucua cuno caapiqui Pueyaso sequesano caminiujuninaa quishacari. Pueyari jiyanohua timiquionutaniya, naquiya nojori miitajaca puecoosaanucua. Naaratej, mijiria quijiacaari tama na casamijinjijiaaja nareja niquitiojotoonutaniya nojori shuquiriniutia.

¹¹Naajaa, jiuujianaraca juuca, socua tamonu juuca cajiniucua nuhuaji, Pueyasoori nojori samiitianijiorhua. ¡Nojoriiri na matusaquiji sanecuatuohua! Puetunu nojori

niquiniaajanaari jiyanoehua shiriiquitiurii. ¹² Jiyacaritij, cuno caapiqui Jesucristojiniiji pohuatanaari puereetuca rupaa tojitiurii jiyocuacaanuji pocuaano. Naa nojori se-queriquiaari:

—¡Miji nia tacatama!

¡Jiyacaritij, nojoriiri na paraa niquiara tacataquee cohuajajinia jiyocuacaanura! ¹³ Na paraa shootiasacari nojori, jiyacaritij, rijiaari jiyanoehua jiuuquiujutiaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusonuuree. Cureeno pueyari jiyanoehua jiuuujiateree Pueyasooquaji. Nojoriiri jiyacari niishirii Jiyocuacaanu Quijiaari seetanujuanaa Pueyaso cutara.

¹⁴ Janiyari naa segundo naquiya miiniu niquitishaareejanihuaj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta joneneree. Jiyacaritij, puereetuca rupaacaari jiyocuacaanu tojishaaree. Naa sequeturiquiaari:

—¡Quiarrijiani, pa Jiyaniijia Pueyasoori tari jiitianutaniya puetunu jiyacua jiyaniijianucua jiitiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriqiano!

¹⁶ Jiyacaritij, cuno veinticuatro niishijiaca jiyaniijianucua, shanoehua cajituijina cajituriquiaa Pueyaso tacojini, nojoriiri Pueyasooquara jacamaturee jiyanoehua na shuquiritanuta nojuaja. ¹⁷ Naa sequeturee Pueyasoori:

—¡Paacarasho canaa Jiyaniijiana! ¡Quiaari puetunu cumaacaracajanaa! ¡Quiaari quijajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! ¹⁸ Cunora, puetunu jiyacua jiyaniijianucujanaari juaaquiuya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuj. Saniniuuja, quiaari pueyara quia sequesano caminiujuninaa pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaanio, jiyaniijianucua, narejaca pueyano. Naa-juhuaj, quiaari jiya sesojuaca pueya shaajanutaniya.

¹⁹ Jiyacarijihuhuj, jiyocuacaanu Pueyaso Secojoua tiaari riatasaaree. Janiyari Pueyaso Quishaquijianaa niqiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jyanootiaja, na tojiyashijiaca na santiio-tajajuhuj. Jiyacaritij, miacanaari nunujuree. ¡Jiyanoehua majacureeri! ¡Puereetatej, jiyanoehua cojuata! ¡Rijiaari jiyacari jiuuquiutiaree! ¡Jiyanoehua queraatia miacanajaa shiniituijiaacaari juhua maru totereejuhuaj! ¡Jiyanoehua puereetaari quiriqiaa!

12

Miriqui pohuatasano maajijiniiji, puereetuca Naaquerujinijijuhuj, juhua cohuaniquia niquishano

¹ Na nuhuaji, pueya jiuuujiatenura, casaari jiya cajiniocua niquishaaree. Maajiiri quiriqiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce riyari na nacaque quiriqiaa. ² Cuno maajiiri manajaraca quiriqiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niquitishaaree jiya cajiniocuanii. ¡Puereetuca Naaqueruuri quiriqiaa, naatuhua! Juhua cohuaniquia niquishano quiriqiaari. Siete nacacaracaari quiriqiaa, diez tuhuajaaracanio. Jiyaniijianucua shipinijosano nacaqueya niquitiacoriquiaari na siete nacacaacua. ⁴ Cuno naatuhua Naaqueruuri quera na cajiniocua riyajinijinio nocua rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuara raara, mueya na mianura jaara rasaare! ⁵ Maajiiri cayaniyojua raree. Nojuajaari puetunu mijiria quijia pueyapuejanaa Jiyaniijiajanaa quiriqiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua

jaariutiasaaree Naaqueruucujaji. Pueyasoori na shuriucuara na ririi, tii na cajitiniuria, Jiyaniijia quiriquianoni. ⁶Maajiiri saniniuujia cariiquia jiyajinia mashirii, tee Pueyaso jeenucuaciaari tari nocuaji na quijiaracuajani, tii na mianuutesaanurajuhujaj, cuaara shocojorejaatijia mil dosciento sesenta juuca.

⁷Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhujaj puetunu na seyatajanaa. Puetunu nojorijianaari puereeta quiaquetooriguiaa jiyocuacaanu. Cuno Naaqueruuri na seyata jiyanohua quiaqueriquiaa Pueyaso seya juucua. ⁸Naajaa, majaari nojori naata quiriquiaa Pueyaso seya shocotanu. Pueyaso seya paracaaniucua jiyanohua nojori, majaari quiquio quiniu quiriquiaa socua nojoriria jiyocuacaanu. ⁹Naacuajitij, cuno Naaqueruuri jiyocuacaanuji taanuusaaree. Nojuacuajari cuno tariucuacaanu Soconu, Eva sapojoquiaarini. Cuno Sesaaca seque sesaari "Satanás". Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰Jiyacaritij, janiyari jiyocuacaanu quiijaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa seque-turiquiaari:

—¡Pueyasoori parta Pueyaso pueyacuara Saquirojotana jatatee tari! Nojuajaari pueyara-caanu Pueyaso saquirojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jitianutaniya pajaniya, jiyanohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquirojosano na quiniucua. ¹¹¡Pueyaso Borrego na quiniucua, nojuajaari na nanaca shootequiaari, tojetaarucuajanaa jiyanooshano pa quiniuria sesa pa miishanojiniji! Naacuajitij, Satanás saquirojotasacari parta Pueyaso pueyacuara, nojoriiri na sanaajaquiaari nojori tiuuniucua Jesucristoocua. Nojoriiri na shocotaquiaarijianaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quiijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹²¡Naaratej, jiyocuacaanunaa, shuquiriaatia quia quiri! ¡Naa Sesaaca jatasaanuucuatej, nia timiquiore jiyocuacaanu quiijacanaa! ¡Niajaniya saniniuujia, jiyacua quiijacanaa, shoniniacu caminiajiniya quiijacanio, jiyanohua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanohua na juaaniutia!

¹³Cuno puereeta niquishano Naaqueru niishishacari nojuaja tari jatasaaree jiyocua, nojuajaari cuno mueya nucua neteyojotanu coteeree na mianura juucua. ¹⁴Cuno maajiiri querajaa puereetuca nesu niqitiosaaree saaja, juhua jiyanohua puereetuca surohua mioru nesu. Cuno nesuta, maajiiri na quiquiojiniara jaaree cariiquia jiyajinia, tucua-caanu cuno Naaqueruucujaji. Tii mianuutesaanutaniya pueyaracaanuuri cuaara na shocojorejaatijia jiuujianaraca marijia, socua seis racanio. ¹⁵Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶Jiyari maaji naacutaree. Jiyari juhua na rupaa riataree. Naaqueru rupaamaji pojuare-taano moo raturee saajaari. ¹⁷Naaqueruuri jiyamitia maajiicua macarii jiyanohua. Quiaareeri maajiicuaajinio supueno pueyata miaquetojonura. Cuno pojoricuajari Pueyaso rootasano tojitiajaca, canapuee Jesucristoocua nojori tiuuni seetaashijiacuajani.

¹⁸Naaqueruuri shoniniacu caminia casaqueyaji nujuasee.

¹ Na nuhuaji, janiyari puereeta niqushano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez naca-jaacua jiitariquiaa jiyaniijianucuaa shipinijosano nacaqueyari. Puetunu na nacacaacua-janaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. ² Janiyara, cuno cua niqushano puereeta niqushano Casaani, cunoori juhua marucuatque sare niqushano quiriquiaa. Na niohuacaari juhua oso niohuaca niqushano quiriquiaa, tucacocua juashococaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuaa juhua cohuaniquia niqushano Naaqueruuri na cumaaca na niqitioree. Tama na cajitiujiniaaja na cajitiriiri jiyaniijajanaa na quiniuria jiyacua. ³ Cuno puereeta niqushano Casaa siete nacacaracani, niquriyatuu na nacacajiniioori pishano quiriquiaa na mosaanura juucua. ¿Cuno puereetuca piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojjijacara quirii. ⁴ Jiyacartij, mijiria quiniaa pueyari cuno naatuhuaa Naaqueruucuaa jacamaturee juhua Pueyasoocua, cuno puereeta niqushano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niqushano Casaacuaa jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoonura? Shaaqui.

⁵ Jiyacartij, cuno naatuhuaa Naaqueruuri cuno siete nacacaraca puereeta niqushano Casaa niishitiojoree sacuraatia na rimiaaquenura Pueyasoocua, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijia jiyatesaaree saaja cuarenta y dos racara. ⁶ Naacuajitij, cuno puereeta niqushano Casaari Pueyaso rerequetenu coteeree. Pueyasoocua rimiaaquereeri. Jesuucua tiuujica pueya sesacareejaariuhuj, jiyocuaaanu Pueyaso quiquionio. ⁷ Mijiria quijia Pueyaso saquiriojosano pueya paracaatishaaree-jaariuhuj. Cumaquishaareejaariuhuj Pueyaso pueya na shocotanura. Cumaaca niqiti-osaareejaariuhuj jiyaniijajanaa na quiniuria, puetunu tamaatiuucua pueyapuejanaa na jitianura, puetunu tiqiyocua tiacajiniinio pueyajanaa, puetunu tamaatia rupaaca pocuajaca pueyajuhuj, puetunu tamonu jiyacajiniijanaa quijiacanio. ⁸ Naacuajitij, puetunu mijiria quijia pueyajanaari cuno puereeta niqushano Casaacuaa jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitianasano naajioneejinia, cante pocuara mosaaquiaricujani. Pueyaso muerasu sesaca cutaraari cuno naajioneejinia naajio-tasaquiaari jiya shipinishaacarijiyojua, pueyaracaanu rishijaca pa quiniuria.

⁹ Cante numaaracani, nojuaja cuara tojiiria nio: ¹⁰ “Cante Pueyaso jiyatesano quiaso-coriqianoni, nojuajaari seetanujanaa quiasano pueyano quiniutianiya. Naajuhuj, cante nijiniaquetucuaa mueruuta mosocoriqianoni, seetanujanaa naa mosaanutani-yari”. Naaratej, Pueyaso pueya cuara puetunu casaajanaa rejeretajaca quiriia, seetanujanaa nojori tiushacari Pueyasoocua.

¹¹ Na nuhuaji, janiyari tamonu puereeta niqushano Casaa niquirii jiyajiniji muetaanoni. Caapiqui nacajaraca quiriquiaari, juhua borrego niquiojua nacajaa niqushano. Juhua cumaacaraca jiyaniijia na rupaa paaretariquiaari. ¹² Jyanohua cumaacaraca quiriquiaari, juhua narta puereeta niqushano Casaa, teyano naca pishanotucuaa cushiriiriohuani. Nojuajaari na naca cushiriinohua narta puereeta niqushano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasoocua, nojori timitianura na naca pishano cushiriinohua puereeta niqushano Casaa. ¹³ Naajuhuj, nojuajaari na cumaacata miiri jiyajeneta casaa pueya jiuujiatenura nocuaji. Jyanohua cumaacaraca na quiniuucua, pueya niquiara, nojuajaari mani tinirii jiyocua-caanuji jiyocua. ¹⁴ Naa na cumaacata na miiniuucua cuno na naca cushiriinohua puereeta niqushano Casaa tacojitij, puetunu mijiria quiniaa pueyajanaa sapojoreeri. Naacuajitij,

nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacuajani. ¹⁵ Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocuajara na quiniuria, nocuara jacamatiuyashijiaca na puecootenurajuhuaaj. ¹⁶ Naajuhuaaj, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacujanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacujanaa naa naajiotasaareeri, tojiyaquishoo pueyacua, tojishano pueyacua, casamiriaca pueyacua, casamijiuniucua pueyacua, tama nojoriria poonijionu-ujuaajaaja pueyacujuhuaaj, poonijiotasano pueyacuanio. ¹⁷ Jiyacaritij, canapuate cuno puereeta niquishano Casaa sesa naajiotasano jiitiaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuaaj, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jiitiaaquiri naajiotasano na cuaqueyacuani, na naata na sesa número jiitianu nocua naajiotasano.

¹⁸ Nio niishishaanura maninia, jiyanohua niishitijaari panishiya cutara. Niishijica pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuaaj!

14

Borrego Niquiojua cojiniaajiniji pahuatasano

¹ Na nuhuaji, janiyari Borrego Niquiojua niquiriini, Sión tuhuananuucua nujuano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuaaj. ² Na nuhuaji, janiyari casaa tojirii juhua sararojua cojuatuneyano jiyocuaanujini, juhua miacana majacyano, juhua queraatia pueya arpa taquinionuyanohuaaj. ³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajituu tacoji jaaquequenuuriquiaa, cuno cuatro saminio casaa tajojijuhuaaj, cuno veinticuatro niishijica jiyaniijianucua tajojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucujanaa maaji numuetuqueyashijica quiquiaari, saaja pocuaji Tacunaacua jiaatiajaca nojori quiniucua. Naaratej, tiqiyocua Borrego Niquiojua rucanejosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurijuhuaaj. Nojoriiri socua Pueyaso timitiasano pueya puetunu Pueyaso saquiriojosano pueyajinijiojuanaa, taa pa shuquiritiaa shushajanaa pa carojosano pa nataujinijicuaani. ⁵ Nojoriiri tojetaarucujanaa sapojonu niishiyashijica quiquiaari, tojetaarucujanaa sesa miyashijica nojori quiniucua.

Jiuujianaraca Pueyaso seya pahuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijica pueya niquiara na pahuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiucua pueyapuerajanaa, puetunu tamaatia rupaaca pocuajaca pueyarajanaajuhuaaj, puetunu tiqiyocua tiacajinia quijica pueyarajanaano. Na pahuatasanoori seetanu rupaajanaa pueyaracaanura. ⁷ Pueyaso seruuri mijiria quiniaa pueyacua nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijaari na nequesoresacari pueya! ¡Nocuara nia mojqoquetacore nia shuqiritianura nojuaja!

¡Nojuacuajaari jiyocuaaanu shipininia, nio jiya, puereetuca shoniniacu caminiajuhuaq, puetunu samocua nacaca pacartacojuacajanaano!

⁸ Jiyacaritij, tamonu Pueyaso seruuri narta Pueyaso seru nuhuajimiaajuhuaq. Naa miriqui sequeriquiaa Roma tiacajiniijiiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojowa, sacuaraatia nojori miiniuria juhua nojuajuhuaq. Babilonia tiacani, nojuajaari puetunu sesa casaa na miijiosanotajanaa juhua mashaasequetejoquiaari puetunu mijiria quijiacajanaa. Naacujitij, puetunu pueyajanaari tama na cuaqueya miini panishanojuaja miijiacara quiquiaari, jiyanhua nojori jiaatanuta sacuaraatia casaa na miiniuria, taa Babilonia tiacajinia quiniaa miijioquiaacuani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuaq. Mijiria quiniaa pueyacu nacaree naari:

—¡Jiyanhua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojoquetacajua juhua Pueyasoocuarani! ¡Jiyanhua puereeta quiniutianiyari noo pojoririjuhuaq, canapuate juhua na naca cushiriinohua niquishano shipinishano Casaacuara jacamatuacuani! ¡Naajuhuaq, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰ ¡Pueyasoori puetunu cuno pueyajanaa saniitionutaniya jiyanhua na juaaniutia! ¡Majaari quenaaja Pueyaso jiuujiaani quiniutianiya nojori! ¡Pueyaso seya niquiara, Borrego Niquiojua niquiarajuhuaq, nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriinohua puereeta niquishano Casaacuara jacamatujuuca juhua Pueyasoocuarani, juhua nojuaja niquishano shipinishano Casaacuarajuhuaq! ¡Naa miishaanutaniyajaariuhuaq noo pojori, canapuate cuno puereeta niquishano Casaa sesa naajiotaniniutianiya tama nocuajajani!

¹² Cunora, Pueyaso saquiriojosano pueyani, canapuate na rootasano tojitiajacani, Jesuucua tiuuni tarinitiaashijiacajuhuaq, nojori cuara juhuajanya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuaaanuji naa cua sequeyanoni:

—Nio quia naajiotare: “¡Quiarijiani, jiyanhua shuquiriaatia quijiaca cutaraari cuno macunucua, canapuate tariucua Jiyaniijia Jesucristoocua tiuujiaa cusonuunutaniani!” Pueyaso Sohuanuuri naa sequeyajuhuaq: “¡Taaquiriirini! Nojoriiri samaateya, pueyaracaanu na Jiyaniijia na poonijionuunu nuhuaji. Maninia nojori miishanocuaajaari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquirini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijia shipinishano nacaque cushitiriquiaari, orojiniji shipinishano. Nataacuaca na senotajara shamaticuaja jacatunee mueruu mueturiquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajianoocua nacaree jiyanhuaari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacajaari tari noshuriujua! ¡Cuaara quiarjia senoosaaria!

¹⁶ Jiyacaritij, cohuaja najaca caco cajianoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuaaanu.

¹⁷ Jiyacaritij, socua tamonu Pueyaso seruuri tohuatamaa jiyocuaaanu Pueyaso Quishaquiji. Nojuajaari shamaticuaja jacatunee mueruu mueturiquiaajuhuaq. ¹⁸ Na nuhuaji, socua tamonu Pueyaso seruuri tohuatamaa Pueyasoocuaa catijiaja casaajiniji.

Nojuajaari mani camaru. Nojuajaari narta Pueyaso seruucua nacaree, shamaticuaja mueruu muetuyanooqua. Na sequereeri:

—¡Quia shamaticuaja mueruuta uva quia carojotare, jiyajinia moritiaconuni! ¡Tari noshurijuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jiyanhua na juaaniutia. Cuno uvani, nojoriiri Pueyaso ruuretajaca pueyacuaja. ²⁰ Cuno uvaari rapijiosaaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanhua nanaca quiniuucua, cabollohua rupaacuma puecariquiaari. Pueyaso tojiyashijiaca pueya nanacaari jiyanhua tucuaaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitiaja na mueetacosacari

¹ Na nuhuaji, janiyari jiya cajiniocua socua niqutishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niqishanoori jiyanhua puereeta quiriqiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

² Janiyari casaa niquiriijiaanihuaj juhua puereetuca caminia motiiquojiniji shipinishano. Manitia cojitishanoori quiriqiaa. Pueyari cuno caminia shocua nujuaturiquiaa. Nojoriiri noo pojori quiriqiaacuaaja, canapueete na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niqutiojosano arpa taquinionuuriqiaa. ³ Nojoriiri Pueyaso seru Moisés jaaquequejosano jaaquequenuuriqiaa, Borrego Niquiojua jaaquequejosanonio. Nojoriiri naa jaaquequenuuriqiaa:

—Jiyaniijianaa, puetunu quia miishanojuanaari jiyanhua maninia, nocuaji jiuujiate-sano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajari puetunu jiyacajinia quijiaaca pueya Jiyaniijianaa. ⁴ ¡Quiaari pueresano, Jiyaniijianaa! ¡Quiaari tojetaarucujanaa maniniuhaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajinijinio pueyajaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuj.

⁵ Naa cua tojinii nuhuajitij, janiyari jiyocuaaanu Pueyaso Quishaquijianaa niquirii riateyanoni, tee cuniqui seetanu Pueyaso rupaajanaa racatasano quiyacuajani. ⁶ Cua niquishacari, cuno siete Pueyaso seyari Pueyaso Quishaquijijianaa tohuareetariqiaa, canapueete cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji toqueyaraca quiriqiaa, shacantuqueya. Nojoriiri orojiniji shipinijosano casaa na jiriqiaacajinia camarucuteriquiaa. ⁷ Jiyacaritij, niquiriyatu cuno cuatro saminio casaajinijinoori miacojua niqutiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriqiaa. Pueyaracaanu rishijia Pueyaso juaaquiacata mishinijosano quiriqiaari. ⁸ Jiyacaritij, Pueyaso Quishaquijianaari maatia najacata mishiquimiam. Cunora, majaari tamonu na naata Pueyaso Quishaqui tiuquinii quiriqiaa, cuno siete Pueyaso seya cuaara puecaarajaatijia naquiya nojori miitajaca pueya. Cuno najacaari Pueyaso shacantuca cumaacajiniji quiriqiaa, naa na saniitiojosacari na paraa.

16

Saniitionujiniji pahuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquia nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapusee jiyocuaari. Jiyacaritij, jiyanohua nootuuca sapueyari pueyacia supueree. Noo pueyacia supuereeri, canapueete nocua naajitotano jiitiriquiaa na naca pishano cushiriinohua puereeta niquishano Casaa sesacujani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhua. Jiyanohua nootujuaaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapusee puereetuaa shoniniacu caminiajinia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusunuree.

⁴ Tercero Pueyaso seruuri miacojuajiniji Pueyaso juaaquiaca jaapusee puetunu moocujinijanaa, puetunu samocua nacaca pacartacojuacajinijanaano. Jiyacaritij, nanacara jataquee puetunujanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhanajaj. Majaari quia supueni quiquiaari. Quiaari tojetaarucujanaa maninia. Naa quia miitiasacari quia tojitiaashijiatej, quiaari seetanujanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiari pueyaracaanu, quia sequesano caminiujuniasa nanacano. Quiarijia saniniujia, naa miijia nojori quiniucuatej, quiaari nojori raatejoree nanaca. ¡Maniniacuaja Jiyaniijianaa!

⁷ Jiyacaritij, janiyari Pueyasoocuaa catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiririni Jiyaniijianaa, puetunu cumaacaracajanaa Pueyasonaa. Quiaacuajaari maninia saniitioree quia tojyashijiaa, taa quia sequequiaari tariucuaaanu nojoricuajani, quiaari quia tojyashijiaa saniitionutaniya. Quiaari seetanujanaa sequequiaari quia miishocoriqiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapusee pananuucua. Naacujitij, pananuuri socua jiyanohua nasecara quiqui, pueya na catijanura juhua mani. ⁹ Naa pananu januuca jiyanohua nasaatiatej, pueyari jiyanohua cateree. Nojoriirri Pueyaso sesacaree saaja, cumaacaraca na quiniucua, naa nojori na saniitionuucuatej. Majaari queenaaja nojori pishiniu quirii sesa nojori miiniujiniji, nojori tacatonuhuaa noojia Pueyasooocua, nojori jiyaniijiaa nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapusee. Na naca pishano cushiriinohua puereeta niquishano Casaa cajishaqui na jaapuseeri, tee cuniqui juhua jiyaniijianaa na cajiriquiaacuajani. ¡Jiyacaritij, puetunu na jiitiasano jiyacajanaari ninishiquiria quiqui! Cunora, na pueyari na niti saaquioriquiaa jiyanohua nooeta naquiya na miiquiosacari. ¹¹ Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriirri jiyocuacaanu quijia Pueyaso sesacaree saaja, nootujuaaca sapueyaraca nojori quiniucua-juhua.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapusee cuno puereetuaa Eufrates moojinia. Moori joojequetaquee jiya pajamaji niriqiano jiyaniijanucua niutijajara.

¹³ Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruuari tohuareetariquiaa juhua cohaniquia niquishano naatuhana Naaqueru rupaamaji. Tohuareetariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaaminio. Cuno puereeta niquishano Casaari mijiria quiniaa pueya sapojoriquiaacuaja, nojori tojinuria na naca pishano cushiriinohua puereeta niquishano Casaa. ¹⁴ Cuno jiuujianaraca samaruuari cumaacaraca quiriquiaa, na cumaacata nojori miiniuria nocuaji jiuujiate-sano casaa, pueya tiuniuria nojori sequesanoocua. Nojoriirri naa miiriquiaatej, puetunu mijiria jiyaniijanucujanaa nojori rerejotenura. Jiyaniijanucuaari naa rerejotesaaree nojori miaquetojonura puetunu cumaacaracajanaa quijia Pueyasota. Pueyasocujajari

tariucuacaanu niishiriojoquiaari naa cuno juuca na miaquetojonura nojoritia. Naa paniquiaaricuajaari na paraa na puecoonura.

¹⁵Jiyacaritij, janiyari pa Jiyaniijijanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejojuua tiuquiquiaa casami nohuasenuucuacuanaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucuajanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niqiuaraari.

¹⁶Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaaajinia, nojori rerejosaqui sesaari, “Armagedón”.

¹⁷Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajituijiniji, janiyari rupaa tojirii naa nacaanoni:

—¡Tari miishaaree puetunujuanaacujaja!

¹⁸Jiyacaritij, miacanaari nunujuree. ¡Jiyanohua majacureeri! Cojuataari quiriquiaa puereeta. Rijiaari tojetaarucuajanaa jiyanohua jiuuquiujutiaree. Pueyano shipinishaanujiniji, majaari naa rijia jiuuquiujutianu quijia juhua nio rijia. ¹⁹¡Naa rijia jiuuquiujutianucua jiyanohuatej, cuno puereetuuca tiacaari neequeresetaquee! Jiuujianaracara raqititijiquiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuuca Babilonia tiaca saniitioree, taa tariucuacaanu na niishiriojoquiaari cuno juuca na saniitionuracuajani. ¡Jiyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacujaja. ²⁰Jiyacarijjuhuaj, puetunu shoniniacu caminiaajinia jiya tucuaatijacajanaari shaajequee, puetunu tuhuananuhua-janaanio. ²¹Naajuhuj, jiyocuacaanuji jiyanohua puereetujuaaca miacanajaa shiniituijiaacaari totere pueyacu. ¡Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianucua shiniituijiaaca miacanajaatej.

17

Miriqui pohuatasano Roma tiacajiniji, juhua paanatu

¹Na nuhuaji, cucua nimiaari niquiriyatu cuno siete Pueyaso seyajinijinio, canapueete siete miacojuua patootariquiaacuajani. Cua sequeeseeri:

—Miji quia nimia. Janiya quia niqutiniutianiyani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. ²Mijiria jiyaniijianucuaari cuno Maaji numuetucujujuaca. Sacuaraatia cuno Paanatu niishitiojosanota, nojuajaari juhua mashaasequetejojuua puetunu jiyacu quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuj.

³Pueyaso seru niqutiniuria janiya na niqutiniu panishano, nojuajaari cua sohuanu jiyataare cariquia jiyajinia. Janiyari tii niquishii Maajini, naatuhua puereeta niquishano Casaa nijinia cajiyano. Queraatia sesacaari cuno naatuhua Casaa cuaqueyacu quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracari quiriquiaa, diez tuhuajaaracanio. ⁴Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitija casa cushitiriquiaari: orojiniji shipinijosano casa, shanohua sajiniji shipinijosano tiujiaujuhuj, noturu shipinijosano sajiniji tiujiaunio. Orojiniji shipinishano miacojuua mueetariquiaari. Mishaja quiriquiaari puetunu sacuaraatia na mijijosano casaatajanaa, numuetucujusaanu porocua na quiniucua. ⁵Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuuca Babilonia tiacani. Janiyari paanatujuri nucuani, puetunu mijiria sacuaraatia miishanojuanaa coretanijiojuua nucuanio”. ⁶Maninia cua niquishacari, cuno Paanatuuri

juhua mashaaseca quiriquiaa na puecootesano Pueyaso pueya nanacata. Nojuajaari jiyanhua timijia, Jesujiniji pahuatanaa puecoonu porocua na quiniuucua.

Naa cua niquishacari nojuajatej, janiyari jiyanhua jiuujiatereeni. ⁷Pueyaso seruuri jiyacari cua sequeere:

—¿Casaara quia jiuujiateya nocuajini? Quiarjia quia pahuatareera quia niquishano-jiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na ninjiniani, puetunu cunojuanaari miriqui. ⁸Cuno puereeta Casaa quia niquishanoni, cunoori tariucuacaanujiniji quijia quiquiaari. Quiarjia saniniuujia, majaari tari na quiniu. Naajaa, quera tacanutaniuhua cuno puequeetuuju raamajiiri, seetanujanaa puetunujanaa na shaajasaanuhua cutara. Pueyaso ruuretajaca pueyari jiyanhua shirriqitiutiutianiya nojori jaara cuno puereeta niquishano Casaa niqiri tacatehuano, teyanote tariucuacaanu quijia quiquiaaricujani, quiarjia saniniuujia majaari na quiniu. Jiya shipiniyaquishacarijia, cuno pueya sesacacuaajaari Pueyaso saquirojosano pueya sesaca naajiotasaqui naajiotasoo quiquiaari.

⁹Cante niishijiani, nojuaja cuaara niishiiria cua pahuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhananuhua, teyanocua cuno Paanatu cajiyacujani. ¹⁰Cuno siete jiyaniijianucua-jinijinioni, cinco nojorijinijinioori tari shaajasaquiaari. Cuno caapiqui cureenoinijini, niqiriyatuuri jiyaniijia quia quiarjia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. ¹¹Cuno puereeta niquishano Casaa, teyanote tariucuacaanu quijia quiquiaaricujani, nojuajaari cuno cinco shaajasanoni jiyaniijianucujinijinio quiquiaaricujia. Majaari quiarjia na quiniu. Na nuhuaji supuentaniuhuari octavo jiyaniijia na quiniuria rupaquijia. Na nuhuaji shaajasaanutianiya cutaraari.

¹²Cuno diez nacajaa quia niquishanojanuhua, cunoori diez jiyaniijianucuaranocujaa. Nojoriiri cumaaca niqitiosaanutianiya saaja niqiriyatu hora jiyaniijianucua nojori quiniuria cuno puereeta niquishano Casaata. ¹³Cuno diez jiyaniijianucuaari mariyata niishirionotunianiya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. ¹⁴Nojoriiri Borrego Niquiojuata miaquetojonutaniya. Borrego Niquiojuaaari nojori shocotanutaniya saaja, seetanujanaa Jiyaniijiajanaa na quiniuucua. ¡Nojuajaari puetunu jiyaniijianucujanaa Jiyaniijia! Nata quinaa pueyari Pueyaso saquirojosano pueya, Neyanu tojtijacatujuaj.

¹⁵Pueyaso seruuri socua cua sequeere:

—Quiaacuajaari cuno Paanatu niqirii puetunu mohuacaacuajanaa cajiyano. Cuno mohuacaacuajaari queraatia tiaca, tamaatiuucua pueyapue, tamaatia rupaaca pocuajacajujuaj, tamaatia jiyacajinia quijia pueyano. ¹⁶Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niqiniu paniaquiniutianiya tojetaarucujanaa. Na cartetunutaniyari. Tojetaarucujanaa juhuasu na tujiatunutaniyari. Nojoriiri cuno Paanatu miaquenutaniya. Na nuhuaji, na nucuhua catijiatunutaniyari. ¹⁷Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso pania na miishaanuracujani. Naajujuaj, Pueyasoori cuno diez jiyaniijianucua niishiriojotenutaniya jatiqui. Naacuajitij, cuno jiyaniijianucuaari rojotoonutaniya nojori cuaara cumaquiriia cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuatesaanutianiya taa na sequequiaaricujani. ¹⁸Naajujuaj, cuno Paanatu quia niquishanoni, nojuajaari cuno puereetuca Roma tiacacujaa, miriqui sequeshiya Babiloniatani. Nojuajaari puetunu mijiria jiyaniijianucujanaa tojtiquiaa nojuaja.

18

Babilonia tiaca catetanujiniji pahuatasano

¹Naa Pueyaso seru niqitini nuhuaji janiyatej, janiyari socua tamonu Pueyaso seru niqirii jiyocuaanuji roseyanoni. Jiyanhua cumaacaracari quiriquiaa. Na shacantuca cumaacaari jia cuhuatariquiaa. ²Jiyocuaanuji na rupaa paaretaree jiyanhuari.

Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiquiora jatanishaaree quiaríjia saniniuuríjia. Naaquiya quiquiora quiniutianiyajaariuhuj, puetunu pueya soosano pueresano jaacatujuaca casaajanaa quiquioranio. ³ Puetunu jiyacajinjiojuanaa pueyari sapojonuuasaquiaari Babilonia tiacajinjio niishitiojosanota, juhuajaniya sacuaraatia miíjia nojori quiniuríajuhuj, juhua mashaaseca. Naajuhuj, jiyaca jiyaniíjianucuaari Babilonia tiacajinia sacuaraatia miíjosano miíjoquiaajuhuj, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijanaa masejoquiaa puetunu jiyacajinjijianaa, saaja tama nojori cuaqueyajaaja nojori shuquiritiniuria. Naacujitij, cumaneecara na casami niqutiojonuujuaca pueyari jiyanhua cumaneecaraca pueya.

⁴ Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiníjia nia quiojore, niaa mariqui sesa miíjicara quiriohuari, cuno sesa miíjia nia cojiniuucua! Nojoríjini nia carajere, niaa mariqui puetunu nojoritíajanaa cojiritiasaare naquiya miíniuri. Nojoricuajaari quera saniitioshiya. ⁵ Cuno tiacajinia sacuaraatia miishanoori puera jiyanhua caneyaree. Juhua tuhananuuri maashiyaree jiyocuacaanura. Pueyasocujaari sacuaraatia nojori miíjosano niishiya. Majaari socua tari na naata rejeretanu. ⁶ Babilonia cuara namishaaria taa naquiya na miíjoquiaa tamasaacuaani. ¡Nojuaja cuara saniitonu caminiujushaaria saniniujia, sesa na miíniuucua tamasa! Babiloniaari juhua pueya raatejoquiaari sacuaraatia na niishishano, sesa miíjia nojori quiniuria juhua nojuajuhuj. Cunora, nojuaja cuara puetunu Pueyaso juaaquiacaajanaa raatesaaria, tama na suhuocojiniíjia mishinshanoni. ⁷ Naatej, taa tama na cuaqueyajaaja na shuquiritiquiaa sacuaraatia na miishacarícuani, saniniujia cuara naa jiyanhua miitiasaariíjuhuj. ¡Jiyanhua tama na cuaqueyajaaja timitíjia na quiniuucuaíjuhuj, cuara saniitiosaaria! Nojuajaari tama sequequiaaajucua: “Janiyari niya cajiya shuquiriatiani, cumaacaraca maaji, pueya tojishano jiyaniíjia. Janiyari maja mashiquioni. Majaari quenaaja cua taraajenu quiniutianiya”. ⁸ Cunora, niqiriuyí juucajiniíjia, cuno Paanatuuri jiyanhua taraatia miitiasaanutaniya. Jiyacari-tij, cusunuuri quiniutianiya, naquiya miíniuri, miaajenujuhuj. Jiyacari catíjatasaanutaniyaariuhuj. Jiyanhua cumaacaraca Jiyaniíjia Pueyaso quiniuucua, nojuajaari naa saniitonutaniya cuno Paanatu.

⁹ Miíjiria jiyaniíjianucuaari sacuaraatia miíniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriíri jiyanhua nujuquetunutaniya cuno Paanatu jaara saniitiosaare. Nojori niqishacari najaca tacaano jíjia cajiniocua, Babilonia tiaca catesacari, nojoriíri nocua sapiyoununutaniya. ¹⁰ Nojoriíri na puerenuta na shootianutaniya tucuacaanují, nojori mariqui saniitiosaareariuhuj. Nojoriíri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanhua cumaacaraca quíjia juucua Babiloniana! ¡Quiaari canashiyajuij saniitiosaare!

¹¹ Puetunu jiyacajiniíjianaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriíri jiyanhua taraatia quiniutianiya nojori niishishacari, nojoritíucua tee na casami niqutiojore na cumaneecarani. ¹² Tucuacaanují Babilonia tiacajiniara nojori nitiasano casami quíjiaari nio: oro, plata, jiyanhua panishano saíjihuaj, noturu shipiníjosano sainio. Nitiasaaquiaajaariuhua maniniuí toqueya linojini, sedajini toqueya, shaaruque toqueyajuhuj, juhua jiyaniíjia cushishano, naatuque toqueyano. Nitiasaaquiaajaariuhua puetunu tamaatia shanhua jaanujua juhuana raquíquia, elefante quíajajini shipiníjosano casamíjuhuj, shanhua naana-jini shipiníjosano casaminio. Nitiasaaquiaajaariuhua broncejini shipiníjosano casami, cumueca casaajini shipiníjosano casamíjuhuj, shanhua mármol saíjajini shipiníjosano casaminio. ¹³ Naajuhuj, nio shanhua jaanujua casami: canela, muesu nunacuhua,

catijiasocoriquiano shanohua jaanujua casaa, mirrajuhuj, cuaqueyacia shuquiujiutiasano shanohua jaanutajanio. Nitiasaaquiaaariuhua jereeca uva caaca, shiyocua, maninia cashojuhuj, trigo jajaunio. Nitiasaaquiaaariuhua casami niyotesano seya, borregohua, caballohua, caballohua jayatasocoriquiano shipinijosano casaanio, cumaneecara niqitiojosocoriquiano pueyajuhuj seya nojori quiniuria. ¹⁴Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanhua quia maniniucuasano naana jajau, jiyanhua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanhua cumaneecata quia masesano casaminio!

¹⁵Puetunu cuno casami niqitiojonaa pueyajanaari jiyanhua casamiriaca quia Babilonia tiacajinia quiniaa masejonuucua nojori casami. Maja nojori saniitiosaanurajuhuj, cuno pojoriiri tucuaaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶—¡Juhuej! ¡Babiloniaari tiaca maniniu quijia juucua! Jiyanhua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijosano saitiajuhuaj, shanohua niquishano saitanio. ¹⁷¡Jiyanhua queraatia puetunu na jiiatiasano casamijianaari canashyaquiji catijiasaaree juhua sohuanatuu!

Puetunu pueyajanaa, canapuate shoniniacu caminiajinia poonijionaa na cumaneecaracuaajani, nojoriiri tucuaaanuji shootiariquiaa Babilonia tiaca catetasacari. Naa shootiatuquiaaariuhua casami jaqueroojuaca tamaquicua tiaca tacatajajiniaqueya, rucoonaa pueya, buquejinia poonijionaa pueyajuhuj, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari. ¹⁸Nojori niquishacari najaca nujuaano jiya cajiniocuara, nojoriiri naa sariyocuatuee:

—¿Socua tamonu tiacateeri quia juhua cuno Babilonia tiacajuhuj? ¡Shaaqui!

¹⁹Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatuee:

—¡Juhuej! ¡Babiloniaari tiaca maniniu quijia juucua! ¡Puetunu shoniniacu caminiajinia buque jiiitianaajanaari jiyanhua casamiriaca quia, jiyanhua casamiriaca Babilonia quiniucua! ¡Quiarjia saniniuujia, canashyaquiji puetunujuanaari shaajasaaree!

²⁰Jiyacaritij, Pueyaso seruuri naa nacaree:

—¡Nia shuquiriri, jiyocuaaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhuj, Pueyaso sequesano caminiujiuniano! ¡Pueyasocuaajari niaacua namirri Babilonia!

²¹Jiyacaritij, cumueeca Pueyaso seruuri jiyanhua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashyaquijijuhuj, Babilonia tiacanaa! ¡Majaari socua quia niquishaanu quiniutianiya! ²²¡Quia nuucuaari tojetaarucuaajanaa sanaaca quiniutianiya! ¡Majaari arpa tapeta jonenenuunio tojishaanu quiniutianiya socua, turequenaco jonenenuunujuhuj, trompeta jonenenuunio! ¡Puetunu tamaatia poonijosano niishijia juaashiquiaraca pueyajanaari shaajasaanutaniyajuhuj! ¡Majaari quenaaja niquiriyatu cureenu quiniutianiya quia quishaqui! ¡Naajuhuj, majaari socua riiquiniunio tojishaanu quiniutianiya! ²³¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhuj, majaari camishacari queranacunuunu cojutatunenu tojishaanu quiniutianiya socua! ¡Quiaari naa saniitiosaaerequij, jiyanhua cumaacaraca quia casami niqitiojonaa pueya quiniucua puetunu jiyacajinijanaa! ¡Naajuhuj, quiaari puetunu jiyacajinia quijia pueyajanaa shimiojona, sapojosano nojori quiniuria puetunu sacuaratia casaa quia miijosanotajanaa! ²⁴¡Quiarjia saniniuujia,

quiocua tiutiashiyari pueyara Pueyaso sequesano caminiujuniana puecoosaanu, Pueyaso saquiriojosano pueya puecoosaanujuhuj, puetunu jiyacajinijanaa pueya puecoosaanunio!

19

¹ Naa cua tojiniu nuhuajitij, janiyari jiyocuacaanu tojirii queraatia rupaacani. Naa sequeturiquiaa jiyanoahuari:

—¡Jiyanohua maninia pa Pueyaso! ¡Nojuaja pa shuquiritiare! ¡Nojuacuajaari pa Jiyanoojia! ¡Nojuajaari jiyanohua shacantuca, tojetaarucujanaa maninia miijia na quini-uucua! ¡Puetunu cumaacaracajariuhuj! ² ¡Maninia na niishiniuucua puetunu cuno Paanatu miishano sacuraatiajanaa, nojuajaari maninia na saniitioree! ¡Cuno Paanatuuri jiyacua quijiaca pueya sesoquiaari tojetaarucujanaa, sacuraatia na miijosano na niishitiojosanota! ¡Pueyasoori cunora na saniitioree! ¡Naajuhuj, Babilonia puecoonuucua Pueyaso tojitajaca pueya, Pueyasoori na namirijihuhuj!

³ Jiyocuacaanuji rupaaca cua tojishanoni, nojoriiri naa sequerohuacuhuj:

—¡Jiyanohua maninia pa Pueyaso! ¡Nojuaja pa timitariquia pueyaracaanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

⁴ Cuno veinticuatro niishijiaca jiyanijianucua, cuno cuatro saminio casaajuhuj, nojori-iri jiyacari jiyocuara jacamatuee Pueyasooacara. Nojoriiri naa timitiaree Pueyaso, cante na shacantuca cumaacajinia cajiriquiaacuajani. Nojoriiri naa na sequeturiquiaa:

—¡Cuaara naa quiriarte! ¡Pa Jiyaniijia cuaara timitiasaaria pueyaracaanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitariquia, puetunu na tojitajaca pueyanaa! ¡Nojuaja nia shuquiritiare, tojishano pueyanaa, nijaniyajuhuj, tojishoo pueyanaa!

Borrego Niquiojua camishocoriqiano maaji maniniushishacari

⁶ Jiyacaritij, janiyari queraatia pueya tojirii jiyanohua nacaanoni, juhua puereetuca sararojua, juhua miacana majacunujuhuj. Puetunu nojorijianaari naa sequeriquiaa:

—¡Jiyanohua maninia pa Jiyaniijia Pueyaso! ¡Nojuaja pa timitariquia pueyaracaanu! ¡Nojuacuajaari Jiyaniijianaa! ¡Puetunu cumaacaracajanaajuhuj! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoraroni, nojoricuajaari puetunu nocua tiuujia pueyajanaa. Naajuhuj, cuno cohuajaque na toqueni, cunocuajaari puetunu maninia nojori miijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapueete Borrego Niquiojua camishacari queranacujajiniara masuusanoni”.

Naa cua sequeree socuaari:

—Cua sequesaroni, cunoori seetanu Pueyaso rupaajanaa.

¹⁰ Jiyacaritij, janiyari Pueyaso seruucua mojoquetareeni, juhua Pueyasooacara, nojuaja cua timitianura juucua. Cua sequequee saajaari:

—¡Maja pueyananaa! ¡Maja naa quia miiniu! Janiyari nareja Pueyaso seruni taa quiajanuyacuani, juhua quia tapueyocacajuhuj, noo pojori canapueete pa Jiyaniijia Jesujiniji pahuatanu tarinitiaashijiacani. ¡Pueyasooacara quia mojoquetare cutara, quia timitianura nojuaja! Puetunu Jesujiniji pahuatasanojuanaani, cunoori Pueyaso Sohanu niishitishano na pahuatanaa, janiya, nijaniyajuhuj.

Cohujohuana caballo nijinia cajiniijini pahuatasano

¹¹ Na nuhuaji, janiyari jiyocuacaanu Pueyaso quiquio niquiri tariucua riatasanoni. Janiyari tii niquiri cohuajohuana caballoni. Na nijinia cajiniiaari caapiqui sesacaraca quiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucujanaa maninia miijia na quiniuucua, puetunu niishijajanaajuhuj, nojuajaari seetanujanaa maninia saniitiojua sesa miijiaca. Naajuhuj, majaari najuhuana

na miaquetooujonu na paraata. ¹²Puetunu casaajanaa niqijia na quiniuucua, na nami-jiiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujuanaa Jiyaniijijajanaa na quiniuucua. Tamonu na sesaari naajiotasano quiriquiaajuhuj. Cuno sesaari tama na niishishanojuaja cutara. ¹³Na toqueeri nanacatuque quiriquiaa. Nojuajaari tariu-cuacaanu nio sesaraca quijiacuaja, “Pueyaso Rupaa”. ¹⁴Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballo-hua nijinia cajitiuriquiaa. Naajuhuj, nojoriiri linojiniji cohuajaquijiasano toqueyaraca quiriquiaa, jiyanohua cohuajaqueya tojetaarucujajanaa. ¹⁵Nojori Jiyaniijijajanaa rupaamaji, nijiniaquetucujaja mueruuri puereeta mueranacuriquiaa. Cunoori puetunu mijiria jiyaca-jinijajanaa na tojitiaashijiaca na puetujutajara. Nojuajaari jiyacari nojori Jiyaniijijajanaa quiniutianiya, nojori na jiitianura jiyanohua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijoshiya na caaca shoonuracuaani. ¹⁶Na tucuaque toqueecua, na ruhuajacuucujuhuj, naa naajiotasanoori quiriquiaa: “Jiyaniijianucua Jiyaniijijajanaa”, “Camarucua Camarnujuanaa”.

¹⁷Na nuhuaji, janiyari tamonu Pueyaso seru niquirii pananuucua nujaanonni. Nojuajaari puetunu jiya cajiniocua jaacuatujua casaajanaa jiiquioonuuriquiaa jiyanohua, teyano jaacuatujucate shu miojonuujuacacujani. Naa cuno jaacuatujua casa se-queriquiaari:

—¡Miji, niya nia rerejosee! ¡Pueyasoori nia queranacutenutaniya! ¹⁸¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanohua cumueeca puereyaquijiaa shu, caballohua shu, na nijinia cajitiuniaa pueya shujiuhuj! ¡Camarucuaaju pueya shuuri quiniutianiyajuhuj, pooni-jiotasano pueya shu, tojishoo pueya shujiuhuj, tojishano pueya shunio!

¹⁹Jiyacaritij, janiyari cuno puereeta niquishano Casaa niquiriini, mijiria jiyaca jiyani-ijianucuanio, puetunu nojori soldadohuatajanaa. Puetunu nojorijianaari tariucua rere-jonu quiriquiaa na miaquetooujonura cohuajohuana caballo nijinia cajiyana, nata quiniaa na soldadohuatano. ²⁰Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaa pueya na sapojonura na cumaacata na miishanota, nojori na tiuutiniuria na naca pishano cushiriinohua Casaacua. Naa na sapojonuuca mijiria quijiaa pueyatej, nojoriiri nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacura mojuquetacojua quiquiaari juhua Pueyasocuara. Jiyacaritij, cuno caapiqui puereeta niquishano Casaari azufreta noshiyano mani quiquio-jinia quejoosaaree saminiucujaja. Nojoriiri tii pueyaracaanu naquiya miishaanutaniya. ²¹Puetunu nojoritia quiniaajanaari saniniuujia puecoosaaree nijiniaquetucujaja mueruuta, teyanote cohuajohuana caballo nijinia cajiyano rupaamaji mueranacuriquiaacujani. Puetunu jiya cajiniocua jaacuatujua casaajanaari nojori shu tooquioree jiyanohua.

20

Mil marijara Satanás morosaanujiniji pahuatasano

¹Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuujj raa riatatata patariquiaari, puereetiuyocua cumayocua shipinishano casaanio, Pueyaso Paraca na morotajara. ²Pueyaso seruuri cuno naatuhua Naaqueru juhua cohuaniquia niquishano quiasee. Na morojoreeri mil marijara. Nojuacuajaari cuno tariucuacaanu Soconu, samaruhua jiyaniijijajanaatuhuj. Na sesaari “Satanás”. ³Maninia na morojonu nuhuaji, Pueyaso seruuri puequeetuujj raama na jartaree. Raa tiootiu mishiquiorohuari. Tiootiu rupanacureeri, maja na riatasaanura. Sesaacaari naa mishiquiosaareeqij mijiria quijiaa pueya na sapojiyaquiniuucujaja cuaara na shocojore-jaatijia mil marijia. Cuno mil marijia jaara na shocojore, rupaquijjara cartesaanutani-huari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucujinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitiianura. Janiyari noo pojori sohanuhua niquiriijiaaniuhuj, canapuee nacareesaaquiaaricujani nojori pojotanucua pa Jiyaniijia Jesujini, Pueyaso rupaa tojitiyajaca nojori quiniucujahuaj. Nojori cutaraari cuno na naca pishano cushiriinohua Casaacuara jacamatyuayquiquiaari tojetaarucujanaa, juhua nojuaja niquishano shipinishano Casaacuarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. ⁵ Saniniuujia, narta macunucuaari maja na samiitianijosaanu quiriquiaa cuno mil marijia cuara shocojorejaatijia. Nio macunucua samiitianijosacari cua niquishanoni, cunoori coteenujanaa Pueyaso samiitianijosacari pueya. ⁶ Shuquiriaatia quijiaca cutaraari noo pojori, canapue Pueyaso samiitianijonutaniya coteenujanaacuajani. Nojoriiri jiyacari tojetaarucujanaa maninia quijiacara jatanishaanutaniya pueyaracaanu rishijiaa nojori quiniuria. Naacuajitij, Pueyaso ruuretajaca pueya jaara puetunu shaajasarejanaa, jiyacari majaari Pueyaso pueya pacutenu quiniutianuhua cusunu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuj, nojoriiri jiyaniijianucua quiniutianiya Cristota, mijiria quijiaca nojori jitiiasacari cuno mil marijia.

Sesaaca saniitiosacarijanaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miacquetojonura pa Jiyaniijia, puetunu na pueyatajanaano. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosaanu.

⁹ Cua niquishacari, tojetaarucujanaa jiyanohua queraatia pueyari nijioriquiaa. Jiya pueturiquiaa puetunujuanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuaaanuji tinishaare nojoriicua. Puetunu cuno pueyajanaari catijiasaaree tojetaarucujanaa. ¹⁰ Satanás, cante puetunu cuno pueyajanaa sapojoreecuajani, nojuajaari caminiajia jatasaree tee cuniqui mani noshiya azufretacuajani. Tariucuaaanu tii jaqueroosaaquiaricujaaari na naca pishano cushiriinohua Casaa, narta puereeta niquishano Casaano. Cunocujaaari mijiria quijiaca pueya sapojoquiaricujaja, na naca cushiriinohua Casaacuara jacamatujuaa nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

Macunucua nequesoreesacari cohuaja cajitiu tajoji

¹¹ Na nuhuaji, janiyari Jiyaniijiajanaa cohuaja puereetuca cajitiu niquiriini, tii cajiniiano. Na niquiara, jiyari puetunu shaajequeejanaa, jiya cajiniucuanio. Majaari socua na niquishaanu quiriohua. ¹² Jiyacaritij, janiyari puetunu macunucujanaa niquirii nujuatiuyano cuno cohuaja cajitiu tajojini; jiyaniijianucua, tojishoo quijiaca pueyano. Jiyacaritij, na cohuaja cajitiujinia cajiniari na nequesoreetuneca riataquere, socua tamonu nequesoreetuneeenio. Cuno nequesoreetuneejinia naajiotasano quiyacujaaari Pueyaso saquiriojosano pueya sesaca, pueyaracaanu rishijiaa nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanoinijijianaa, taa cuno nequesoreetuneecejinia na naajiotasaaquiaricujani. ¹³ Cua niquiara, macunucua quiquiojinia racatasano puetunu cusununo sohanuhujanaari na cuaqueya rupetesaarohua, shoniniacu caminiajia moquecono, jiyacua moquecononio. Puetunu nojorijianaari nequesoreesaaree taa miijiaa nojori quiquiaricujani. ¹⁴ Na nuhuaji, Cusojuana, macunucua Quiquiojuhuaj, nojoriiri mani noshiyano caminiajia jaqueroosaaree.

Canapuete cuno mani noshiyano caminiainia quejoosocoriquiano pueyacuajani, nojori-iri cusunuuu pacuteriquianocujaja. ¹⁵ Naacuajitij, canapuete Pueyaso samiitianijiosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiainia quejoosaaree pueyaracaanura.

21

Quiarinio jiya cajiniocuajiniji pahuatasano, quiarinio jiyajinjini

¹ Na nuhuaji, janiyari quiarinio jiya cajiniocua niquiriini, quiarinio jiyanio. Coteenujua-naa jiya cajiniocuaari tari shaajasano quiriquiaa, jiyanio. Naajuhuj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriquiaari, juhua neyacarano camishocoriquiano niyacoo. ³ Naajuhuj, janiyari Jiyaniijajanaa cajitiujiniji tojirii jiyano hua nacanuni. Naa sequeriquiaari:

—¡Pueyaso Quiquoori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucujajaari tari shaajasano quiriquiaa!

⁵ Na nuhuaji, Jiyaniijajanaa cajitiujinia cajiniiaari naa sequeree:

—¡Cua tojiri! ¡Janiyari quiariniora mijia puetunu casaajanaani!

Cua sequerejaariuhuj:

—Cua sequesano quia naajiotare. Seetanujuanaari cua sequesano. Jiyacuajaari cua sequesano tohuateequiaa pueyaracaanuni.

⁶ Cua sequerohuariuhuj:

—Cua sequesano cua miishocoriquianoni, janiyari tari na tucuateree miiniuni. Janiyari quijiajuhuanani. Janiyari pueyaracaanu quiriquianojuhuj. Janiyari puetunu casaajanaa coretanijiani, na shaajajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohanucujaja. Janiyari nareja na niqitioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojjia na quiniucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyani. Nojuajaari quiyano quiniutianiyacujaja. ⁸ Sesa pueya saniniujia, nojoriiri puetunu quejoosaariquianojuanaa azufreta noshiyano mani caminiainia. Naa quejoosaanutaniyari nio pojori: Pueyaso tojitiaashijia pueya, puerejaca nojori quiniucua, Pueyaso Rupaacua tiyashijia, soosano pueya tama sesa nojori miiniucujaja seseno, pueya moojuaca, na camishoo maajipohua numuetucunuujaca, shimiacuri, shipinijosano casaacua jacamatujuaca juhua Pueyasocua, puetunu cuaracashijionujuaca pueyajanaano. Puetunu cuno pojorijanaa jaara nequesoreesaare, nojoriiri puetunu taanusaanutaniyajanaa Pueyaso shuriucujaja. Nojoriiri mani noshiyano caminiainia quejoosaanutaniyani, pueyaracaanu naquiya nojori miishaanura tii. Cucucuaari sequeshiya, “pueya pacutesacariuhua cusunu”.

Quiarinio Jerusalén tiacajiniji pahuatasano

⁹ Jiyacuajaari tari nia pahuataree cuno siete Pueyaso seyajinjini, canapuete siete miacojua patootanaa quiquiaaricujani, mishaja Pueyaso saniitiotajata. Niquiryatu nojoriinjiniioori cucua nimiaa. Nojuajaari cua sequeese:

—Miji. Quia niqitiriiria Borrego Niquiojua niqiorano. Nojuacuajaari pa Jiyaniijia pueya, na quiquiojaariuhuj.

¹⁰ Jiyacaritij, nojuajaari cua sohanu jiyataree jiyano hua puereetuaa jiyaconaja tuhuanuucua. Tiji cua niqitirii cuno puereetuaa quiarinio Jerusalén tiacaari, Pueyaso shuriucujaja roseyano. Tojetaarucujanaa shanohua maniniushitishano quiriquiaari.

¹¹ Nenecuariquiaari Pueyaso shacantuuca cumaacata. Na nenecuanuuri juhua jiyano hua

panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohuaja motiiquio. ¹²Cuno tiaca shocua matacaari jiyanhua puereetuca quiriquiaa, jiyaconajahuaj. Tiaca shocua matacaari doce tiotiuhuaraca quiriquiaa. Niquiriyatu Pueyaso seruuri puetunu cuno tiotiuujiniijianaa nujuatariquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotiuhuacuajanaa naajiotasano quiriquiaa. ¹³Jiuujianaraca tiotiuhuari pananu muetasamajiria quiriquiaa, cuno tiaca matacaacua. Socua jiuujianaraca tiotiuhuari quiriquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiriquiaa. Socua jiuujianaraca tiotiuhuari quiriquiaa pananu tiuquishocora. ¹⁴Cuno tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵Cuno Pueyaso seru cuata pocojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. ¹⁶Cuno tiacaari jiyanhua tucuhuana quiriquiaa. Na cajiniocuaari mariyata juhua na tucuhuana quiriquiaajuhuj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jiyaconaja, na cajiniocuanio. ¹⁷Na nuhuaji, tiaca mataca shanacujureejaariuhuj. Setenta y cinco metro jitiariquiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiriquiaa. ¹⁸Cuno tiaca matacaari puetunu jaspe saijinijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacujitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹Cuno mataca nujuataja doce sairi queraatia tamaatiujiaaca shanhua niquishano saitia maniniushitishano quiriquiaa. Cuno mataca nujuataja doce saijinijinioni, coteenu saajiaari jaspe saitia maniniushitishano quiriquiaa. Jaspe sairi neeruua cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruua. Cuarto saajiaari neeruua esmeralda saitia maniniushitishano quiriquiaa. ²⁰Quinto saajiaari ónice saitia maniniushitishano quiriquiaa. Ónice sairi pocojuanaque naatuua cojitishano. Sexto saajiaari naatuua cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tiijaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanhua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanhua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuua. Duodécimo saajiaari jiyanhua nentuuca amatista saitia maniniushitishano quiriquiaa. Puetunu cuno saijianaari jiyanhua shanhua sai, shacantujuaaca. ²¹Tiaca shocua mataca doce tiotiuhuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajajiniji shipinishano quiriquiaa. Naa shipinijosano quiriquiaari puetunu cuno doce tiotiuhuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanhua maninia cuno oro quiniuucua, Pueyaso shacantuuaari na tohuariquiriquiaa, juhua motiiquio cohuajaco na quiniuucua.

²²Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqi, majaari socua Pueyaso Secojoua tia panishaanu. Puetunu cumaacarcajanaa Pueyasojuanaari tii quiyacuja, Borrego Niquiojuajuhuj. Puetunu cuno tiacajanaari nojori quishaquicuja, pueyaracaanu nojori rupuesano pa quiniuria. ²³Cuno tiacaari maja na paniniu pananu na cuhuatariquiano, racajuhuj. Pueyaso shacantuua cumaacacujaari na cuhuataa. Borrego Niquiojuacuajaari na cuhuatana. ²⁴Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu

jiyaca jiyaniijianucujajanaari socua nojori panishano casami patootanutaniya nojori cuhuatana tiacajiniara, Jiyaniijijajanaa nojori niqutiosocoriquiano. ²⁵ Cuno tiaca tiotiuhuari pueyaracaanu riataquesano quiniutianiya, juuca na quiniucua pueyaracaanu. Cuniqui, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanohua nojori timitiasano quiniutianiya. ²⁷ Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhuj, majaari sesa miijiaca tiuquiniu quiniutianiya tii, sapojonuujucanio. Saaja noo pojori cutaraari tii tiuquitanutaniya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

22

¹ Na nuhuaji, Pueyaso seruuri cua niqutirii pueya samiitianijiotaja moo, cohuanacu tojetaarucujajanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartariquiaa, tee Borrego Niquiojua cajiyajaanuhuj. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquicojuhuaj, niiquijiria, na taquijiriano. Cuno naanaari puetunu racarajanaa muetujuaca. Naacuajitij, puetunu marijiarajanaa, doce caminiuujia muetunuuri. Na muecacaari maninia, puetunu jiyacajinia quijiaca pueyajanaa naarajotajara. ³ Cuniqui, majaari socua Pueyaso sesacasano casaa quiniu quiniutianiya. Naacuajitij, Pueyasajuanaa, Borrego Niquiojuajuhuj, nojoricuajaari cuno tiacajinia quijiaca quiniutianiya, Jiyaniijijajanaa cajitii quiniucua tii. Nojori tojitiaja-caari nojori timitianutaniya pueyaracaanu tii. ⁴ Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. ⁵ Cuniqui, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasajuanaacuajaari nojori cuhuatanutaniya. Nojoriiri jiyaniijianucua quiniutianiyajuhuj, puetunu Pueyaso shipinishanojuanaa nojori jiitiana pueyaracaanura.

Jesucristo quera tiuquihua

⁶ Na nuhuaji, Pueyaso seruuri cua sequeeree:

—Cua niqutishano quiajaniani, cua sequesanojuhuaj, puetunu cunojuanaari seetanujanaa. Puetunujanaari tohuateeriquiano. Pueyasoori na Sohuanuta niishitiquiaa na sequesano caminiuujunaa pueya, nojori pohuatanura pueya niqiara na niishitiniu panishano. Naajuhuj, nojuacuajaari quiarijia na seru jiyaroree, na tojitiajaca na niishitiniuria taa quiaru naataja nojuaja tucatanutaniya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquihua niaacuani”. Shuquiriaatia quijiaca cutaraari noo pojori, canapute nio naajioneejinia Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhuajitij, cua tojinu nuhuajijuhuj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuanu, juhua Pueyaso. ⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaj, juhua quiajanijuhuj, juhua puetunu quarta Pueyaso sequesano caminiuujunaa pueyajuhuj. Naajuhuj, nio naajioneejinia naajiotasano tojijia pueyani, nojoriiri cuarta Pueyaso seyajuhuj. ¡Pueyasajuanaa quia timitiare cutara!

¹⁰ Cua sequeereejaariuhuj:

—Pueyaso niishitishano nio naajioneejinia quia naajiotasani, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasanoacuajaari quera tohuateya. ¹¹ Naacuajitij, canapute sesa na miiniu tarinitianu paniaquiyani, sacuaraatia miijiojuacajuhuj, cuaara na tarinitiaaquiiriaqui. Saniniuujia, canapute maninia miijiojuaca cutarani, saaja Pueyasora poonijionuujacajuhuj, nojori cuaara tarinitiaaquiiria maninia nojori miiniuujuhuj.

¹² Pa Jiyaniijiacuajaari naa pa sequeya:

—¡Taaquiririnj! ¡Quera tiuquihuanijia! Janiyari cua tojitiyajaca cua niqutiojoso-coriqiano casaa tiuquitianutaniuhuani. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri.¹³ Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujuniani. Janiyari qijijajuhuanani. Majaari cua supueno quiquiaari. Janiyari puetunu casaajanaa coretanijiani, na shaajariquianojuhuaj.

¹⁴Shuquiriaatia quijiaa cutaraari noo pojori, canapue te juhuacarijia nojori jiuujia jeequecanu Borrego Niquiojua nanacatani. Nojoriiru juhua cohuajaque toqueyaraca quiniutianiya cua niqiuara. Naacuajitij, nojoriiru tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵Saniniuujia, nio pojoriiru Pueyaso tiaca mataca tamajiria jateenutaniya: sacuarataa casaa miijiaa, shimiacuri, na camishoo maajipohua numuetucunujuaca, narta pueya puecoojuaca, shipinijosano casaacuara jacamatujuaca juhua Pueyasoocuara, cuaracashijionu porocua pueyano.

¹⁶Janiyacuajaari cua seru jiyarorucuaa quiocuan, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maopue niqiuara na caminiujushaanura. Janiyacuajaari Jesuni, supuetana David niqiuoacuajinio caneno pueyajinijinio supueno, Jiyaniijajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucacaanu Pueyaso Rupaajiniacuajani.

¹⁷Pueyaso Sohuanuuri Borrego Niquiojua niqioranota naa sequetiuya: “¡Miji Jiyaniijiana!” Canapue te naa nio naajioneejinia naajiotasano tojiyani, nojori cuara naa sequeerajuhuj: “¡Miji!” Cante jiyamueyani, nojori cuara niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸Cante nio naajioneejinia juhuacarijia Pueyaso niishitishano tojiriini, taa Pueyaso miiniutaniyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitiaja casaata. ¹⁹Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaa nojori quiniuria, taa nio naajioneejinia na pohuatashiyacuajani.

²⁰Cante nio sequeyacuajani, nojuajaari naa sequeya: “Taaquiririnj, quera tiuquihuanijia”.

Jaa, Jiyaniijia Jesunaa. ¡Naacuaaquinatejaj! ¡Ritia quia nimiohua canaacual!

²¹Pa Jiyaniijia Jesu cuara puetunu nijaniyajanaa cumaquiriia na Sohuanuta.